

Ebe-No-Pfuase Ishobo
Onogbo



New Testament in Ivbie North-Okpela-Arhe (NI:atg:Ivbie
North-Okpela-Arhe)

Ebe-No-Pfuase Ishobọ Onogbọ

New Testament in Ivbie North-Okpela-Arhe

(NI:atg:Ivbie North-Okpela-Arhe)

copyright © 2012 Wycliffe Bible Translators, Inc.

Language: Ivbie North-Okpela-Arhe

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789194797

The New Testament

in Ivbie North-Okpela-Arhe

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files dated 29 Jan 2022

03be06b0-68fd-500b-b9a9-6bca4b63979a

Contents

iMatiu	1
iMaki	67
iLuku	109
iJoni	176
Ikanya	227
iRoma	290
1 iKoritia	319
2 iKoritia	347
iGalesha	366
Efisha	376
iFilipia	387
iKolosha	394
1 iTeşalonia	401
2 iTeşalonia	407
1 iTimoti	410
2 iTimoti	418
iTato	424
iFilemo	428
Iburu	430
iJemhisi	452
1 iPita	459
2 iPita	467
1 iJoni	472
2 iJoni	479
3 iJoni	480
iJudu	481
Irokhase	483

Usonhi Onete oyi iJesu iKirisiti ni iMatiu O keke

*Unuekpe oyi iJesu iKirisiti
(iLuk 3.23-38)*

¹ Ona o khi akeke shi eke
abi unuekpe oyi iJesu iKirisiti
Omi iDefidi ni o khi Omi Abu-
raamu o li ze.

² Aburaamu o bia Aziki,
Aziki o bia iGiekopu,
iGiekopu o bia iJuda
ali inyoghuo oli nya.
³ iJuda o bia iPerenzi
ali iZera, okpotso ni o bia we,

a lu iTama.
iPerenzi o bia Ezironi.
Ezironi o bia iRamu.

⁴ iRamu o bia Aminadabu.
Aminadabu o bia iNashoni,
iNashoni o bia iSalimoni.

⁵ iSalimoni o bia iBoazi,
okpotso ni o bia iBoazi,
a lu iRe-abu.

iBoazi o bia Obedi
ni a lu inyoli iRutu.
Obedi o bia iJese.

⁶ iJese o bia iDefidi
ni o khi oghie.
iDefidi o bia iSolomoni
ni inyoli o kpe khi ughue
Uraya.

⁷ iSolomoni o bia iReobuamu.
iReobuamu o bia Abija.
Abija o bia Asa.

⁸ Asa o bia iJeoshafati.
iJeoshafati o bia iJeoramu,
iJeoramu o bia Uzaya.

⁹ Uzaya o bia iJotamu.
iJotamu o bia Aazi.

Aazi o bia Ezekaya.

¹⁰ Ezekaya o bia iManase,
iManase o bia Amoni.
Amoni o bia iJosaya.

¹¹ iJosaya o bia iJekonaya
ali inyoghuo oli nya
egheghe ni a ro muno
egbo iZireni ighumha je iBa-
bilo.*

¹² Abi e ke ro rote iBabilo jele,
iJekonaya o bia iShalitieni.
iShalitieni o bia iZerubabeli.

¹³ iZerubabeli o bia Abiudu.
Abiudu o bia Eliakimu.
Eliakimu o bia Azori.

¹⁴ Azori o bia iZadoki.
iZadoki o bia Akimu.
Akimu o bia Eliudu.

¹⁵ Eliudu o bia Eliaza.
Eliaza o bia iMataani.
iMataani o bia iGiekopu.

¹⁶ iGiekopu o bia iJosefu,
ni o rue iMeli inyi iJesu shi
ni a lu iKirisiti.

¹⁷ Rote egheghe Aburaamu
bhale egheghe iDefidi, e
khi agbhotu igbene. Ke
rote egheghe iDefidi bhale
egheghe ni a ro muno egbo
iZireni ighumha je iBabilo,
e khi agbhotu igbene. Ke
rote egheghe iBabilo bhale
egheghe ni a ro bia iJesu
iKirisiti, e gbo li khi agbhotu
igbene ghọ.

*Abi a li bia iJesu iKirisiti
(iLuk 2.1-7)*

¹⁸ Abi a li bia iJesu iKirisiti
na. Neni iMeli inyoli o ngeli
na iJosefu ni o o gue oli. A
bhale ya e khi iMeli o o me
omoni ni o rote obọ oyi Ayemhe-
no-pfuase bhale.†

* 1:11 Li ze 2 Ighie 24.14-15; 2 Okhe 36.10; iJere 27.20 † 1:18 Li ze iLuk 1.27

19 Itobọ khi iJosefu ughuọli, ọ khi ọgbọ ni ọ guę angeli, ọọ sali shi udu khi lọli ya kuegbe-a ri imeli shi eke, ini lọli khi yęghę ọlia ukpęloe agbọ.

20 Abi ọ lii sa ona shi udu, agęni ọ bhale deba li alo ęlena, ọọ li, "IJosefu omi iDefidi, khi ke zę ni ulishi o mu ę abi u li ya rue iMeli shi ughue, irari khi ọmọ ni ọọ mę, obọ oyi Ayemhę-nọ-pfuasę ọ te bhale.

21 Ọ ya bia ọmọ ọmọse, eva ni u ya lu ọni ọmọ khi iJesu, irari khi ọ ya mie ęgbọ eyọli olamhę pfuese."‡

22 Eri a mę enana ni a rọ bhę ya ę khi ingmemhi ni Eshinęba ọ rọte unu oyi ọmekęguele ngme, ni e bhale ya tse. Ni ọọ,

23 "Ghe khę! Ọmueshi ni ọa lę deba ọmọse ghue ọ ya ke mę ọmọ, ọ bia ọmọ ọmọse, eva oyọli a ya ke lu iManuęni."§ Abi ona o ngme khi, "Eshinęba ọ nu awa la."

24 Abi iJosefu ọ rọ guale, ọ rięlę emini Ọnọmhuę ọ mhęse na li ọ rięlę, ọ rue iMeli ughue abi Eshinęba ọ gueyę ọli.

25 Eri-tse khi iJosefu ọa tigbe lę deba iMeli, ramhi ni ọ rọ bia ọni ọmọ ọmọse. IJosefu ọ lu eva oyi ọni ọmọ, iJesu.*

2

Epfese ni e rọte obini ovọ o te ę ngale bhale

1 Eoli ni a lu iBętileęmu obini eke iJudia a bia iJesu shi, ęghęghę ni oghie ni a lu Erọdu ọ rọ khi oghie. Emọse

elesingme eghuo e rọte obini ovọ o te ę ngale bhale eke iJerusalemu.

2 Ee mhila, ee lię, "Obo a bia ọni ọmọ ni ọ ya khi oghie oyi ęgbọ iJu shi? Irari khi anye she mę ukpętata oyọli obini ovọ o te ę ngale, lọli o zę khi anye bhale ni anye ya ga li."

3 Abi ọni oghie Erọdu ọ rọ suọ ona, egbe ęa ke sheshe lọli ali ęgbọ kpa ni e la iJerusalemu.

4 Ọ luno ighie eyi ekpodalougamhi nya ali esesę Ishi eyi iMosisi kugbe. Ọ mhila wę, ọọ wę, "Obo ę khi a ya bia iKirisiti Ọmiepfuese shi?"

5 E gueyę ọli, "Eoli iBętileęmu na eke iJudia lọ." "Irari khi ighọ emekęguele e keke shi eke khi:

6 "iBętileęmu na eke iJudia, yeyę u ga khi ọni ọ mu ęloe nę nya elemhi ęoli eniemhi ni e la eke iJudia.

Ayę oghie ọ te ya lasele, ni ọ ya ri ęgbọ iZireni khase ode.'"*

7 Ighọ oghie Erọdu ọ lu eni emọse eghọ ochi, ọ mhila wę, "Eghęghę onoghuo a rọ mę oni ukpętata?"

8 Ighọ ọ ghie wę je iBętileęmu, ọọ wę, "A ke lę, a kuegbe-a ya nono ọli. A kha da mę ọli ne, a nyenę egbe bhale ya gueyę mhę ni mhi li ya ga li."

9 Abi e rọ suọ abi Erọdu ọ ngme se, e te aghọ fię lasele. Ighọ e gbo mę oni ukpętata ni e kpę mę obini ovọ o te ę

‡ 1:21 Li zę iLuk.1.31 § 1:23 Li zę Aza 7.14; 8.8,10 * 1:25 Li zę iLuk.2.21 * 2:6 Li zę iMika 5.2

ngale. O rẹ wẹ khasẹ ode ya ramhi ni o rọ migha ukhomhi oni owa ni ọni ọmọ ọ la.

¹⁰ Egbe e mema mu wẹ abi e rọ mẹ oni ukpẹtata. ¹¹ Igho e lo elemhi oni owa. Abi e rọ mẹ ọni ọmọ ali inyọli iMeli, e wugha e ga li. E khueghie ẹkuẹ ni e tsua-a, e rue igolu ali afu ituale ali oili ituale ni ẹẹ pfie ni e ghalẹ somhi ọli opfa.

¹² Igho Ẹshinegba ọ tse agua yẹ wẹ alo ẹlena e khi gbo nyenẹ egbe ukhokho deba ọni oghie. Itobọ igho e rọte ode olese ya je apfẹ.

A rue iJesu na je eke ijipiti

¹³ Abi eni emọse e rọ je se, aḡeni oyi Ọnọmhuẹ ọ gueye iJosefu alo ẹlena, ọọ li, “Erodu ọọ nono ọni ọmọ ọna ni luẹ gbe ọli-a. Rue ọli ali inyọli na je eke ijipiti. La agho ramhi ẹghẹghẹ ni mhi rọ ya gueye u rọte agho vu.”

¹⁴ Obili o bi, iJosefu ọ rue ọni ọmọ ali inyọli na je eke ijipiti.

¹⁵ Oobọ ọ la ramhi ni oghie Erodu ọ rọ ghu-a. Eri Ẹshinegba ọ riẹle ona ni a rọ bhale ya ẹ khi emini ọmekẹguele ọ ngme khi o bhale ya tse. Ni ọọ, “Eke ijipiti mhi te lu omi mhe.”†

Erodu ọ shi ushi a gbolo eniye enikeke-a

¹⁶ Abi Erodu ọ rọ mẹ khi eni emọse ni e rọte obini ovo o te ẹ ngale bhale egho khi e di luẹ, Elemhi ee bi ọ egbegbo. Ọ shi ushi a gbolo eniye emọse enikeke ni e la ẹoli iBetiẹmu ali ẹoli ni e la

gase ọli-a nya. Eniye rọte ikpe eva tiemhi eke, abi eni epfese e gueye ọni oghie ẹghẹghẹ ni e rọ mẹ oni ukpẹtata.

¹⁷ Abi a li mẹ ọli ena, o ri ungmehi ni ọmekẹguele iJeremaya ọ ngme bhale ya tse.

¹⁸ “A suọ okokokhue eke iRama,‡

ni o khi oyi evie,
ali evie oya.

IReche ọọ vie imi ọli,

Àá yese ọli,

ọa ze yese, irari

khi imi ọli e ghulo-a.”

IJosefu ali apfoli e rọte eke ijipiti jele apfẹ

¹⁹ Erodu ọ ghu-a se, aḡeni oyi Ẹshinegba ọ bhale deba iJosefu alo ẹlena obini eke ijipiti.

²⁰ Ọọ, “IJosefu, vule, rue omie ali ughue, a ke je eke iZireni irari khi eni ẹẹ nono ni wewe e gbe ọni ọmọ-a, e she ghuloa.”

²¹ Igho iJosefu ọ vule, ọ rue ọni ọmọ ali inyọli, ọ nyenẹ egbe je eke iZireni.

²² Eri-tse khi abi iJosefu ọ rọ suọ khi Achelusi ọ ke shito ukpekhomhi oyi itali shi eke iJudia, ulishi o mu ọli ọa gbudu je oobọ, ọ ri ochogho ya je obini eke iGalili abi aḡeni ọ she kpẹ tse agua yẹ ọli.

²³ Ọ ri iNazareti mele apfẹ oyọli-a. Irarigho, ungmehi ni emekẹguele e ngme, o bhale ya tse. Ni ọọ. “A ya ke lu ọli ọngi iNazareti.”§

† 2:15 Li ze Osia 11.1 ‡ 2:18 Li ze IJere 31.15 § 2:23 Li ze iMak 1.24; iLuk 2.39; iJon 1.45

3

Ijōni Ōni ọọ batazi ẹgbọ ọọ tse abọ

(iMak 1.1-8; iLuk 3.1-18; ijōn 1.19-28)

1 Ikpe ni e bu e dọṣe, ijōni Ōni ọọ batazi ẹgbọ ọ lasele shi elemhi ọdagbe ifufu na eke ijudia, ọọ tse abọ.

2 Ọọ liẹ, “A rọte olamhẹ eye ẹ mu pfi irari khi Eghiele oyi Ẹshinẹgba o she ti bhale.”*

3 Ingme oyi ijōni ọna, Azaya ọmekeguele ọọ ngme abi ọ rọ liẹ,

“Ọgbọ ọghuo ọ la elemhi ọdagbe ifufu ẹ tsese, ọọ liẹ, ‘Bẹ ode-a na Ọnọmhue rọte, bẹ ọli sheshe.’”†

4 Itsua ni ijōni ọ rọ sọ, iriria akphere a rọ do wẹ. Ọ ri ọgbenẹ ẹkuẹ ẹlamhi mu oku. Initso ali oribo e khi eminale eyọli.‡

5 IJerusalemu ali eke ijudia ali ẹdẹli ni e mama okẹ ijodani nya ẹgbọ e rọte e bhale ni e suọ ungmehi oyọli.

6 Ọ la elemhi okẹ ijodani batazi ẹgbọ, ee zọnọ olamhẹ eyewẹ lasele.

7 Abi ijōni ọ rọ mẹ khi ẹgbọ otu iFarisi ali iSadusi ni e bu e bhale deba li ọ batazi wẹwẹ, ọọ wẹ, “Eẹ enye ali imi enye! Ọghuo ọ tse agua ye ẹ, a na, khi anasemhẹ ọọ bhale ni Ẹshinẹgba ọ ya ghie ghi ẹ?”§

8 A ke ngeli ingeli eni e ya rọkhasẹ khi a she mu pfi.

9 A khi ke sa khi a ya na pfue anasemhẹ ini a da liẹ, ‘Aburaamu ọ khi itita anye.’ Itobo

khi Ẹshinẹgba ọ doṣe ya rọte eche ena wolọ eniye lasele na Aburaamu.*

10 A she tọ uze sọ udi ọara. Ọara ni ọa da mọ umomhi onete ne, a ya khi ọli pfilo erali.†

11 “Amẹ mhi rọ ọ batazi ẹ memena, irari khi a she mu pfi. Ọgboṣe ni ọọ bhale ikpukhokho oyemhẹ, ọ fu dọṣe mhẹ. Mhi a fẹ fute ọni ọ tsua ekuẹ oyọli eke. Lọli ọ ya ri Ayemhẹ-no-pfuase ali erali batazi ẹ.

12 Ọ mu ukpokpo ni a tọ akhuli ni o zẹ epfia sọ mhue obọ oyọli, ni ọ rọ ya ke ghi-aghie wẹ, ọ pfie efue ado-a, ashini a la kpishi wẹ. Ọọ ti wẹ gbili shi ashini a ri eminale ẹ shi, eni efue wẹ eghọ, ọ ya ri erali ni ẹa ya pfua ghue tose wẹ-a.”

Abi iJesu ọ li batazi

(iMak 1.9-11; iLuk 3.21-22)

13 IJesu ọ ya rọte eke iGalili bhale okẹ ijodani ni ijōni ọ batazi luẹ.

14 Ijōni, ọọ nono ni lọli khu iJesu oni ibatizi, ọọ iJesu, “Yeye u kha batazi mhẹ, sẹ u ke gbo li bhale deba mhẹ mhi batazi ẹ?”

15 IJesu ọ sọli ọ, ọọ li, “Iiye. Kie zẹ ni awa lina riẹlẹ ọli ẹghẹghẹ ona, ni awa mẹ asha ri ọghuemhẹ oyi Ẹshinẹgba gbe akanya pfo.” Ijōni ọ lama shi ọli ọ.

16 A batazi iJesu se, khi ọ leṣe na rọte elemhi okẹ ngale esọ egele, ọ mẹ khi idane o

* 3:2 Li zẹ iMat 4.17; iMak 1.15 † 3:3 Li zẹ Aza 40.3 ‡ 3:4 Li zẹ 2 Ighie 1.8

§ 3:7 Li zẹ iMat 12.34; 23.33 * 3:9 Li zẹ ijōn 8.33 † 3:10 Li zẹ iMat 7.19

khueghie a. Igho o me khi Ayemhe oyi Eshinegba o li abi anekhukhu tiemhile bhale ya ma li egbe.

17 A suo khi uruli o rote idane ngme, oo li, "Ominhe ni mhi nono ingme oyoli na, ni o ri egbe e mu mhe."‡

4

Imufe oyi iJesu

(iMak 1.12-13; iLuk 4.1-13)

1 Ayemhe o rue iJesu je odagbe ifufu ni Okphaghię o me asha mu oli fe.*

2 Abi iJesu o ro pfi azumhi ogbele egbhuęva se, okiamhi oo gbe oli.

3 Igho Okphaghię o bhale deba li, oo li, "Ini o khia khi Omi Eshinegba u khi, nu eni eche ena ngme ni e mele eminale-a ne ni u le."

4 IJesu oo li, "Ebe-no-pfuase o ngme ghọ khi:

"'Oa khi eminale tse,
o ri agbo a na ogbo,
ama ungmehi ni
o rote Eshinegba unu
lasele kpa.'"†

5 Igho Okphaghię o rue iJesu je iJerusalemu, eoli no pfuase. O rue oli ya nga apfiępfięmhi ashini o yagha ne shi Owa Oyi Eshinegba ya migha.

6 Oo iJesu, "Ini o khi Omi Eshinegba u khi, rote ukhomhi ana ji ya tiemhi ekekhe." Irari khi Ebe-no-pfuase o ngme oli khi:

"'Eshinegba o ya
ri unu na igeni eyoli

e ri eloe shi e egbe
e kpe abo muę,
Ini u khi khi owe
shi eche.'‡"

7 IJesu oo li, "A gbo li keke o shi Ebe-no-pfuase khi, 'Khi mu Eshinegba Onomhuę oye fe bino.'"§

8 Igho Okphaghię o rue iJesu nga ukhomhi ute ni o lolo yagha, o ga ri eghiele ni e la agbo ona nya ali isomhotse oyewe khasę oli.

9 Oo li, "Ena nya mhi ya ro ne ini u lese nyese ukhomhi ga mhe."

10 IJesu oo li, "Vu mhe alo-a, Okphaghię! Ebe-no-pfuase oo lię,

"'Nyese ukhomhi na
Eshinegba Onomhuę oye,
lolighuo kpe wa ke ga.'"*

11 Igho Okphaghię o ze iJesu obo, igeni e bhale ya kpaghię oli obo.

*IJesu o rote iGalili gba
ikanya eyoli eke le
(iMak 1.14-15; iLuk 4.14-15)*

12 Abi iJesu o ro suo khi a mu iJonni shi owa ighumha, o nyene egbe je edeli iGalili.†

13 Oa migha iNazareti, o je iKapanomu, edeli ni o la ukiękię oke iGalili ni o la eke iZebulo ali iNafutali.‡

14 Eri a me ena ni a ro bhale ya e khi ungmehi ni Azaya omekęguele o ngme, o bhale ya tse, ni o la lię,

15 "Eę eke iZebulo
ali eke iNafutali,

‡ 3:17 Li ze Igbae 22.2; Iwolo 2.7; Aza 42.1; iMat 12.18; 17.5; iMak 1.11; iLuk 9.35

* 4:1 Li ze Iburu 2.18; 4.15 † 4:4 Li ze iDeut 8.3 ‡ 4:6 Li ze Iwolo 91.11,12

§ 4:7 Li ze iDeut 6.16 * 4:10 Li ze iDeut 6.13 † 4:12 Li ze iMat 14.3; iMak 6.17;

iLuk 3.19-20 ‡ 4:13 Li ze iJon 2.12

ni a la ini a da okẹ iJodani
lase,
iGalili, ni ẹgbọ

iJeta^S e ngeli, ni o la ode
ni o je okẹ oniẹmhi.

16 Ẹgbọ ni e la alo ebili
e ya mẹ ákpá oniẹmhi.

Oni ákpá ọọ ngale na
ẹgbọ ni o li abinẹ khi
eghuli o ti mama wẹ.”*

17 Rọte aghọ vu iJesu ọ rọte
tse abọ kia guele, “Ogbogbọ ọ
mu pfi, irari khi Eghiele oyi
Ẹshinẹgba o she ramhi.”†

*Ijesu ọ lu egbifẹlẹ aane e
deba luẹ*

(iMak 1.16-20; iLuk 5.1-11)

18 Abi iJesu ọ li kia epfepfe
okẹ oniẹmhi iGalili, ighọ ọ
mẹ iPita ali Aduru, ọgbọ ali
inyoḡhuo ni e khi egbifẹlẹ khi
e ri aga a gbe ifẹlẹ oni okẹ-no-
kishi.

19 Ijesu ọọ wẹ, “A bhale
deba mhẹ khi mhi ya sẹsẹ ẹ
abi a ke liẹ ke lu ẹgbọ bhale,
ocho ni a rọ ọ gbe ifẹlẹ.”

20 Aghoaghọ e zẹ aga eyẹwẹ
obọ, e deba li.

21 Ọ ke lẹ, ọ mẹ ọgbọ ali
inyoḡhuo, iJemhisi ali iJoni
imi iZebedi khi e nu itawẹ la
elemhi ọkọ okẹ ni e lo, e riẹlẹ
aga oyẹwẹ ẹ riẹlẹ. Ijesu ọ lu
wẹ e bhale.

22 Aghoaghọ e lase ọkọ-okẹ
le, e pfi itawẹ shi aghọ, e deba
li vu.

Ijesu ọ ri eni ẹẹ ghua ze

(iLuk 6.17-19)

23 Ijesu ọ kia asha kpa eke
iGalili ọ la owa ugamhi eyẹwẹ

sẹsẹ wẹ usomhi onete oyi
iloghie, ali ọ ri ẹgbọ ni e mhue
ighuamhi ọdọda ze.

24 Ighọ a li suọ eko ọli
ushishi iSiria oghọ nya, ya
ramhi khi ẹgbọ e tsua eni
mhue ighuamhi ali anasẹmhẹ
ọdọda, ghe eni e mhue ayẹmhẹ
ọkphaghie ali ughuamhi ni
ọọ mu ọgbọ pfi gbe ali eni e
guoḡho-a bhale deba iJesu. Ọ
ga rẹwẹ ze nya.

25 Ighọ ebubu ẹgbọ e rọte
iGalili ali ẹoli iDikapolisi
ali iJerusalemu, eke iJudia
ali ẹgbọ ni e la ukiekie
obinokpọle oyi okẹ iJodani, e
deba li.

5

*Osesẹ ni ijesu ọ la esọ ute
sesẹ*

1 Abi iJesu ọ rọ mẹ oni olele
ẹgbọ, ọ ti nga esọ ute dẹnẹ, ọ
shitọ. Eniyẹ odukhokho eyọli
e bhale ya shitọ gasẹ ọli. 2 Ọọ
sẹsẹ wẹ, ọọ liẹ,

3 “Ikhivọsẹ o khi oyi ẹgbọ
ni e lẹsẹ khi

Ẹshinẹgba ọ mhue emhikpa,
wẹwẹ e mholi obọ shi
Eghiele oyi Ẹshinẹgba.

4 Ikhivọsẹ o khi na ẹgbọ
ni ẹẹ viẹ,*

Ẹshinẹgba ọ ya yẹsẹ wẹ.

5 Ikhivọsẹ o khi oyi ẹgbọ ni
e ti egbewẹ tiemhile,†

Ẹshinẹgba ọ ya ri
agbọ ona nya na wẹ.

6 Ikhivọsẹ o khi oyi ẹgbọ ni
okiamhi ali okiamẹ
iguẹ-ngeli ọọ gbe,‡

Ẹshinẹgba ọ ya ri

S 4:15 Ẹgbọ iJeta khi ẹgbọ ni e la eke agbọ ona nya ni ẹa khi ẹgbọ iZireni. * **4:16**

Li zẹ Aza 9.1-2 † **4:17** Li zẹ iMat 3.2

* **5:4** Li zẹ Aza 61.2 † **5:5** Li zẹ Iwolo

37.11 ‡ **5:6** Li zẹ Aza 55.1-2

emini ẹ nono na wẹ.

7 Ikhivọsẹ o khi oyi ẹgbọ
ni e mhọli ilẹlemhi na ẹgbọese,
Eshinẹgba ọ ya
mhọli ilẹlemhi na wẹ.

8 Ikhivọsẹ o khi oyi ẹgbọ
ni e mhọli udu no pfuase, §
e ya mẹ Eshinẹgba.

9 Ikhivọsẹ o khi oyi ẹgbọ
ni ẹẹ dua ini opfomhẹ o la ọ,
Eshinẹgba ọ ya lu wẹ
imiọli.

10 Ikhivọsẹ o khi oyi ẹgbọ
ni a mu okhọli vule shi ọ
irari khi e da riẹlẹ
emini Eshinẹgba ọ nono,*
wẹwẹ e mhọli obọ shi
eghiele oyi Eshinẹgba.

11 “Ikhivọsẹ o khi nẹ, ini
ẹgbọ e mu okhọli vule shi ẹ ọ,
ẹẹ kiẹ iwali ẹgbhọli ọdọda mẹ
irari khi u mie mhẹ suọ.†

12 Zẹ ni u ke ghele, egbe
ẹẹ muẹ, irari khi eleli oye
ni o la iloghie oo gbẹdi gba.
Ina e li mu okhọli vule shi
emekeguele ọ ni e kpẹ bhale
khe.‡

*Ugbheli ali ákpá oyi agbọ a
khi*

(iMak 1.16-20; iLuk 5.1-11)

13 “Eri a li abi ugbheli shi
agbọ ọ. Ini ugbheli o wase
oviọlọ oyọli-a, aa ke tigbe
mhọli abi a li ya rọli gbo mele
ugbheli-a. Aa ke rọli ya li
emhikhoghuo dọsẹ a ku ọli
kua ni a ri awẹ lighi ọli eke.

14 “Eri a li abi ákpá shi agbọ
ọ. Owa ni a tọ shi ukhomhi
ute ọa ya sheli. §

15 Aa mẹ ọgbọ ni ọ ya ri ákpá
ru se, ọ khukhu ọli shi atalabi.
Eri ọ ya ri ochoghọ rue ọli nga
asha na keghe, ni o ke mẹ eke
ni ẹgbọ ni e la oni owa e ke mẹ
eke.*

16 Lighọ zẹ ni ákpá oye o
ke gẹ khasẹ ẹgbọ, ni e rọ
mẹ ikanya enete eye ni e mẹ
asha kuẹghie Eshinẹgba ni ọ la
iloghie.†

*Osesẹ abi ishi eyi iMosisi o
ngme*

17 “A khi dabi khi eri mhi
bhale ya shishi Ishi eyi iMo-
sisi eke-a, a khi a dabi khi
eri mhi bhale ya shishi emini
emekeguele e sesẹ-a. Iiye! Eri
mhi bhale ya rẹ wẹ tse.

18 Zẹ mhẹ gueye khi eke ali
ukhuli e kha da kie la ọ ne,
ukupamhi ingme okhoghuo ọa
ya wa Ishi eyi iMosisi-a, ini
emini e keke wẹ shi eke shi
nya ẹa li bhale ya tse.‡

19 Itobọ ighọ, ọnini ọ da gbe
ushi ni o ga shẹ nẹ a nya, ni ọ
gbolo ẹ sesẹ ẹgbọ e li lighọ ne,
lọli ọ ga ya shẹ nẹ nya Eghiele
oyi Eshinẹgba, ọnini ọ da riẹlẹ
wẹ ni ọ gbolo ẹ sesẹ ẹgbọ eni
ishi eyi Eshinẹgba ne, ọ ya khi
onofunẹ Eghiele oyi Eshinẹgba.

20 Mhi gueye ẹ khi ini igue-
ngeli oyeẹ ọa da dọsẹ igue-
ngeli oyi esesẹ Ishi eyi iMosisi
ali ẹgbọ iFarisi ne, aa ya lo
Eghiele oyi Eshinẹgba.

*Osesẹ oyi ingme elemhi
ibibi*

(iLuk 12.57-59)

§ 5:8 Li zẹ iwolo 24.3-4 * 5:10 Li zẹ 1 iPit 3.14 † 5:11 Li zẹ 1 iPit 4.14 ‡ 5:12
Li zẹ 2 Okhe 36.16; Ika 7.52 § 5:14 Li zẹ iJon 8.12; 9.5 * 5:15 Li zẹ iMak 4.21;
iLuk 8.16; 11.33 † 5:16 Li zẹ 1 iPit 2.12 ‡ 5:18 Li zẹ iLuk 16.17

21 “A suọ khi ẹgheghe ni o doṣe khi a gueye eni egbhali, ẹẹ, ‘Khi gbe ugbeli, ọnini ọ da ligho ne, a ya ri ọli gue ẹzo.’[§]

22 Ama memena mhi gueye ẹ khi ọni ọ da mhue ofu deba inyoghuo ọli ne, a ya roli gue ẹzo. Ọni ọ da lie inyoghuo ọli, ‘Ye ye ogbo afue ọnal’ A ya rue ọli bhale deba enighie. Ọni ọ da lu inyoghuo ọli, ‘Ye ye oyeghe ọnal’ O ya la okhena erali na ilimhi irierie.

23 “Ini u mhue isomhopfa ni u wa nono ni u ro ghi Eshinegba ukhomhi atete, ni u ro da sato khi inyoghuo ẹ ọ mhue ofu ne shi emini u ri ele ọli ne,

24 ze oni isomhopfa ogho obo shi odalo atete, u je apfe ni ye ye ali ọni inyoghuo ẹ ni a ro ri ele, u tigbe bhale ya ri isomhopfa oye na Eshinegba.

25 “Ini obe ẹ ọ rue ẹ le ikotu, nyanya lema li abi a li la ode ẹ le egho neni a ramhi agho. Ini ọa khi igho, ọ ya rue ẹ na ọso-ẹzo, ọni ọso-ẹzo ọ rue ẹ na ogbanelemhi, ọ rue ẹ ya khukhu shi owa ighumha.

26 Abi o li mhi li gue ọli ẹ ye ẹ khi, waa ya rote agho lasele ini u waa li ze oko na fie pfo nya.

Ose se ingme okia

27 “A suọ ẹgheghe ni o doṣe khi a lie, ‘Khi kia okia.’^{*}

28 Ama memena mhi gueye ẹ khi ọnini ọ da ri oghumhe itsebo bino ọkpotoso ne, ọ she

kia okia deba ọni ọkpotoso el-emhi usamhi udu oyoli.

29 Irarigho, ini o khia khi eloe na obita oye o ya ze ni u lo owa ere, vuonyo li pfia, irari khi o ti ne ini egbe ẹa gba ne ya lo iloghie, doṣe khi ye ye nya u lo ilimhi irierie.[†]

30 Ini o khia khi obita oye o ya ze ni u pfido ya lo owa ere, khi ọli pfia. O tine ni u ze obo oghuo ya lo iloghie doṣe khi ye ye nya u lo ilimhi irierie.[‡]

Ose se ipfa ughue-a
(iMat 19.9; iMak 10.11-12; iLuk 16.18)

31 “A li ngme ọli shi Ishi eyi iMosisi khi, ‘Omose ọ kha khu ughue ọli, ọ nya ebe ipfa ughue-a na li.’[§]

32 Ama memena mhi gue ẹ ye ẹ khi, ọni ọ da khu ughue ọli ni o khia khi ọa khi eri ọ kia okia ne, ọ she ye se ọni ọkpotoso mele okiokia-a. Omose ni ọ rue ọni ọkpotoso ogho, eri ọ li kia okia.^{*}

Ose se ironga

33 “A gbo li suọ khi a gueye ẹgbo ena elele, ‘A khi da ironga ni a ro nga, ama emini u romhi Onomhuet ro nga, khi da ọ, ligho roli tse.’[†]

34 Emini mhi ke gue ẹ ye ẹ mena khi, khi ga romhi isheli kpa. Khi romhi idane irari khi oobo ukpekhomhi oyi Eshinegba o la.[‡]

§ 5:21 Li ze Okiali 20.13; iDeut 5.17 * 5:27 Li ze Okiali 20.14; iDeut 5.18 † 5:29

Li ze iMat 18.9; iMak 9.47 ‡ 5:30 Li ze iMat 18.8; iMak 9.43 § 5:31 Li ze iDeut

24.1-4; iMat 19.7; iMak 10.4 * 5:32 Li ze iMat 19.9; iMak 10.11-12; iLuk 16.18; 1

iKori 7.10-11 † 5:33 Li ze iLev 19.12; iNba 30.2; iDeut 23.21 ‡ 5:34 Li ze iJem

5.12; Aza 66.1; iMat 23.22

35 Khi gbo li romhi ekekhe, irari khi loli khi akphawęnga oyi Eshinegba. Wękhi iJerusalemu, irari khi loli o khi ęoli oyi Oghie no funę. §

36 Khi ga ri ukhomhi oye romhi ishe, irari khi waa ya dobe ri ętsui oghuo kpe bishi a we khi eri u dobe roli ya pfuase-a.

37 Ungmemhi oye o lese migha shi ii, okekhi iye, emini o da dose igho ne, obo oyi Okphaghię o te bhale.

Khi ri onobe fali ota onobe
(iLuk 6.29-30)

38 "A suo khi a kpe ngme oli, khi, 'A ri ukpęloe fata ukpęloe, ali ękoli o fata ękoli.*"

39 Ama mena, mhi gueye ę, a khi rięle ęgbọ to o ini o rięle ę onobe. Ini ęgbọ, o lase ę esọ obita nyene ona ęgobọ na li gbo lase.

40 Ini ęgbọ ọọ nono ni loli luę ęzo, ni loli ro mie ę awulu oye, bie gbo gueghie oni u so kpọke ma o nali.

41 Ini ęgbọ o ri itoto lię u tsua itsua na luę imali oghuo, tsua we imali eva.

42 Ini ęgbọ o mhila ę emhi, rona li. Ngmomhi na oni o ye ongmomhi deba ę.

Mholi inono na ebe ę
(iLuk 6.27-28,32-36)

43 "A she suo khi a lię, 'Nono ingme oyi ęnuzi-ava oye, u ke biselemhi obe ę.†"

44 Ama mhi gueye ę. Nono ingme oyi obe ę, u gbo so

iomhi na eni mu okholi vule shi ę o.

45 U kha lina, eri u wa ngeli abi itę na iloghie. Irari khi loli o ri ovọ oyoli ę to na ęgbọ okholo ali ęgbọ enete. Igho o gbo lię ruęę amę na ęgbọ okholo abi o lię ruęę oli na ęgbọ enete.

46 Se u ke li ya me asha mhue eleli obọ oyi Eshinegba ini u lese nono ęgbọ ni e nono ingme oye? Egbegbi emionoga e lili ę ligho.

47 Ini o khia khi inyoghuo ę tse u lese ę tse, ighe ikhioda ni o la ye ye ali eni ęa miesuo o? Eni ęa miesuo e lili ę ligho.

48 Itobo ona, ze ni u gba pfo abi Itę na iloghie o li gba pfo."‡

6

Ose se isomhopfa

1 "Guę kia ini u khi rięle igue-ngeli abamemhe ukpęloe ęgbọ. Ini u wa a ligho, wa a ya mhue eleli obọ oyi Eshinegba Ita ni o la iloghie.*"

2 "Ini u ri isomhopfa na ęgbọ ni ęa mhue, khi roli pfi akala ke kiakia, abi eni ęa miesuo ęę li elemhi owa ugamhi ali ifuapfe. Eri ę ligho ni ęgbọ e ba kuęghie we. Abi o li mhi li gue ę ye ę, khi, e she mie eleli eyewe se.

3 Ama rona oni o la ọmunu, khi ze ni ęgbọese o lese.

4 Eghęghę agho o khi emhi osheli, ni Itę ni o la iloghie ni ọọ me emini u rięle elemhi osheli, o ri eleli ne.

§ 5:35 Li ze Aza 66.1; Iwolo 48.2 * 5:38 Li ze Okiali 21.24; iLev 24.20; iDeut 19.21

† 5:43 Li ze iLev 19.18 ‡ 5:48 Li ze iLev 19.2; iDeut 18.13 * 6:1 Li ze iMat 23.5

Oseşę abi a lię sọ iromhi
(iLuk 11.2-4)

⁵ “Yęyę o yę ini u ya sọ iromhi khi ya rięę ọli abi eri ugamhi ku alo ni ęę migha epfę odę ali elemhi owa ugamhi ini ęgbọ e ba ke mę wę. Abi o li mhi lię gue ọli ę yę ę khi e she mhue eleli oyewę gba se.†

⁶ Ama ini u ya sọ iromhi, lo elemhi owa oyę, u khukhu odę, u sọ iromhi ghi Ita ę ni ọ la osheli, Itę ni ọ la osheli ni ọọ mę emini a li osheli, ọ ya ri eleli gba nę.

⁷ Ini u ya sọ iromhi, khi ke rięę ungmehi oghuo ngme itingmingmę, abi eni ęa miesuo ęę li. Eri ęę dabi khi ingmemhi ni e bu dọşę ęshinęgba oyewę ọ rọ suo wę.

⁸ Khi li abi węwę. Itobọ khi Itę ọ she kpę lęşę emini u wa nono neni u mhila li.

⁹ “U kha sọ iromhi, ke lię: “Ita anye ni ọ la iloghie, anye ri ufumhi na eva oyę no pfuase,

¹⁰ zę ni Omhęşę oyę o bhale.

Zę ni a rięę oghuęmhę oyę eke agbọ abi a lię rięę ọli obini iloghie.

¹¹ Ri eminale ona ogbe-namo na anye.

¹² Gbe olamhę kua na anye, abi anye lię gbe kua na ęgbọ ni e lamhę shi anye ọ.

¹³ ‘Khi zę ni anye de pfilo imufę, mie anye pfuese obọ oyi ọkphaghie.’

¹⁴ U kha gbekua na eni e lamhę shi ę ọ, Itę na iloghie ọ ya li gbekua nę.

¹⁵ Ama ini u wa a gbekua na eni e lamhę shi ę ọ, Itę na iloghie ọa ya li gbekua nę.‡

Abi a lię pfi azumhi

¹⁶ “U kha pfi azumhi, khi wushe alo-a shi ukhomhi abi eni ęa miesuo ęę li. Eri ęę nyenę alo zę shi ukhomhi ini ęgbọ e ba lęşę khi ęę pfi azumhi. Abi o li mhi li gue ę yę ę, e she mhue eleli oyewę se.

¹⁷ Ama u kha pfi azumhi, ri oili shishi ukhomhi rọ dala egbe-a, u pfiono itsu-a shi ukhomhi,

¹⁸ ini ęgbọ e khi lęşę khi azumhi wa pfi. Ama ọni Itę ni ọọ mę osheli nya ọ ya ri eleli nę gbodojo.

ępfue ena obini iloghie
(iLuk 12.33-34)

¹⁹ “Khi ti ępfue ma leghe na egbe ę shi elemhi agbọ ona, ni ifu e la le emhi, ni emhi e la mu oghuooghuo-a, ali ni ighiatọ e la dobę ę do.Ş

²⁰ Ochoghọ ti ępfue ma iloghie ni ifu ęa dobę la le emhi, ali ni emhi ęa la mu oghuooghuo-a wękhi ighiatọ e dobę la do.

²¹ Irari khi asha ni ępfue oyę o la aghọ udu oyę ọọ la.

Ákpá oyi idiegbe
(iLuk 11.34-36)

²² “Ikpamhi alo e khi ákpá ni idiegbe o mhue. Ini ukpęloe oyę o dala, egbe eyę nya o khi ákpá.

23 Ama ini alo eye ẹa ti, idiegbe eye nya e khi alo ebili. Ini a ke bhale ya ẹ khi ákpá ni o la idiegbe oye o khi obili, se oni obili o ke beshi lie gba ramhi shi idiegbe oye!

Eshinẹgba ali ẹpfue
(iLuk 16.13; 12.22-31)

24 “Ogbokhoghuo ọa dobe ya ga ega ava. Eri ọ ya nono ingme oyi oghuo, elemhi onokpole ẹẹ bi ọli. Ọ ya ke suọ esọ na oghuo, ọ ri ukpelo gbe onokpole. Ogbọ ọa ya dobe ga Eshinẹgba ali ukpaghọlo utoghuo.

25 “Onana o ze ni mhi ro gueye u khi ke sa usamhi emini a le ali emini a da, wẹkhi usamhi egbe ẹ emini u ya so. Agbọ oye ọa fu dose eminale? Abi khi eri idiegbe oye ọa fu dose ode?”

26 A bino ipfeli ni e la idane, ẹa ro ko wẹkhi eri ẹẹ khiese tima shi aka. Ama eri Itẹ na iloghie ọ kie ri ẹloe ẹ khu wẹ. Aa mu ẹloe dose wẹ?”

27 Ongeẹ onoghuo ọ dobe ya ri isamhi ali ayele khi iwakati oghuo kpe ma agbọ oyọli?”

28 “Elo o ze ni a ro ọ sa usamhi ode ni a ro ọ ku egbe? A bino idodo ni e la ifui ebuli, khi ẹa ya gbe akanya wẹkhi eri ẹ fia ide zu egbewe.”

29 Ama mhi gueye ẹ khi ashini Oghie iSolomoni ọ mhue ufumhi ramhi, ọa khuẹ akhuẹ ramhi udodo okhoghuo ena.*

30 Ini Eshinẹgba ọ lina ri ide ku ebuli tse, ni o kha la ọ amo, akọ o to-a, se ọa ke lie li ri

ode ku ẹ? Eẹ egbo ni irudunga oye o she.

31 Itobọ ighọ khi ke yele obini u ya me eminale le ali obini u te ya me da, ali obini u te ya me ide ku egbe.

32 Emhi enana eni ẹa miesuo e na khu, ama Itẹ na iloghie ọ lese khi a kha mhọli emhi eghogho kpa.

33 Ochoghọ kpe ze ni Eshinẹgba ọ mhese shi agbo oye ne, ni u ri eni omhese gbe akanya, khi ọ ya ri emhi enekpole nya ma ọ ne.

34 Irarighọ, khi ke ze ni ayele akọ o nase udu amo, akọ o ya sa usamhi egbo. Ogbẹle ogbogbo o mhue anasemhe oyọli.”

7

Igue egbo ẹzo
(iLuk 6.37-38,41-42)

1 “A khi gue egbo ẹzo, ini Eshinẹgba ọ khi gue ẹ ẹzo.

2 Irari khi abi u li gue egboese ẹzo, ighọ Eshinẹgba ọ li ya gue ẹzo oye. Emini u ro mhese na ogboese a li ro ya mhese ne.*

3 “Elo o ze ni u ro me uku ni o la inyoghuo ẹ ẹloe ni u waa ro me ufolo ọara ni o pfida ẹ ẹloe?”

4 Se u ke lie gueye inyoghuo ẹ, ‘Ze ni mhi rue ẹ uku ẹloe le,’ ni ye ye oye wa a ro me ufolo ọara ni o pfida ẹ ẹloe?”

5 Ye ye ọ ri ugamhi ku alo, kpe rue ufolo ọara ni o pfida ẹ ẹloe-a ne neni u tigbe ya meke rue oni o la oyi inyoghuo ẹ ọ-a.

* 6:29 Li ze 1 Ighie 10.4-7; 2 Okhe 9.3-6

* 7:2 Li ze iMak 4.24

6 “Khi ri emhi ipfuase na ewa. Khi pfi emini o mu ẹloe abi igolu ghi igulu. Eri e ya wu wẹ eke-a, e sọ alo okhọli ghue ẹ.

Mhila, u nono, u kpheli
(iLuk 11.9-13)

7 “Mhila khi a ya rọ ne. Nono khi u ya me rue, kpheli obọ ode khi a ya khueghie-a ne.

8 Irari khi oni o mhila, loli a rọ o na. Ogbọ ni o nono loli o me ẹ rue. Oni o kpheli obọ ode, loli a khueghie-a a na.

9 “Ongeẹ onoghwo o bia ni omiọli o ya mhila li ibuledi ni o ya rue echeli na li?

10 O kha mhila ẹ afele, enye u ya rue na li?

11 Ini ẹẹ ni a khi egbo ebe a lese abi a li ri eminete ẹ na imi ẹ, se Ita ni o la iloghie o ke beshi li ya ri eminete na egbo ni e mhila li?

12 Irarigho, abi u nono ni ogbo li riẹle deba ẹ, yeye li ligho riẹle deba li. Irari khi emini Ushi oyi iMosisi ali emekeguele e sese nya na.†

Ode unuekpe na pfi ali ona
gbada

(iLuk 13.24)

13 “Rọ te ode unuekpe na pfi lo. Irari khi ode unuekpe na gbada ali ode agbala na gbada o khi ode ni o je owa ere, ebubu egbo e rọte o.

14 Ode ni o je iloghie eri oo riele, ode unuekpe ni a te ẹ je o, oo pfi, ama ikuku egbo e rọte o.

Qara ali ikpamhi eyọli
(iLuk 6.43-44)

15 “A be eke ma emekeguele egbhọli. Eri e ri ekuẹ osumha ku egbe, ama elemhi udu oyewe, idumhi ni ẹ nyanọ ogbo le e khi.

16 Angeli oyewe o re we ẹ khasẹ emini e khi. Okphẹkphẹ ọa ya mo udumhi olomu, we khi eri ọọ mo udumhi okhua eni.

17 Qara onete ọọ mo udumhi onete. Qara ni ọa ti ọọ mo udumhi ni ọa ti.

18 Qara onete ọa ya mo udumhi ni ọa ti, wekhi eri ọara ni ọa ti o dobe ya mo udumhi onete.

19 Qara kpa ni ọa da mo udumhi onete ne, eri a ya khi ọli pfi, a tose ọli a.‡

20 Itobọ igho emini emekeguele egbhọli ẹẹ riẹle, u te ẹ lese we.§

Mhi aa lese oni u khi
(iLuk 13.25-27)

21 “Ọa khi ogbokpa ni ọọ lu mhe, ‘Onomhue, Onomhue’ o ya lo eghiele oyi Eshinegba, ama egbo ni ẹ riẹle oghuemhe oyi Itamhe ni o la iloghie.

22 Ini ele iguezo o ramhi, ebubu egbo e ya lie mhe, ‘Onomhue, Onomhue, anye ẹẹ she ri eva oye me eke guele, anye ri eva oye khu egbo iyemhe ebe egbe-a, anye gbo gbe ikanya onyaloa ododa?’

23 Eghẹghẹ agho mhi ya gueye we gboo, ‘Mhi aa lese ẹ. A vu mhe ana le pia, ẹẹ egbo okholo ena.’*

† 7:12 Li ze iLuk 6.31 ‡ 7:19 Li ze iMat 3.10; iLuk 3.9 § 7:20 Li ze iMat 12.33

* 7:23 Li ze iWolo 6.8

Egbọ ava ni e tọ owa
(iLuk 6.47-49)

24 “Ogbọkpa ni ọ da suọ ungmehi oyemhe ni ọ da rọli gbe akanya ne, eri ọ li abi ogbọ olesingme ni ọ tọ owa nga ukhomhi eche.

25 Ini amẹ o riẹ rue, ni ochikpho o rọ tu, khi akpekpeli o riẹ li gbe oni owa ogho, ọa o ya de, irari khi ukhomhi eche a tọ li nga.

26 Ama ogbọ ni ọ da suọ ungmehi oyemhe ni ọa da rọli gbe akanya ne eri ọ li abi oyeghe ni ọ tọ owa nga ekhashe.

27 Amẹ o kha rue, ni ochikpho o rọ tu, ni akpekpeli o rọ li gbe oni owa ogho, oni owa o de kua, o de udemhi ọsanabe.”

28 Abi iJesu ọ rọ ngme se, oseşe oyọli o ri abọ sha eni e legba.

29 Irari khi eri ọ sese egbo abi ogbọ ni ọ lese emini ọọ sese.†

8

Omose ashomha

(iMak 1.40-45; iLuk 5.12-16)

1 Abi iJesu ọ rọte ukhomhi ute tiemhile, ebubu egbo e bhale deba li.

2 Igho omose ashomha oghuo ọ bhale ya wugha iJesu odalo, ọọ li, “Onomhue, ini o ghole e, u dobe ya re mhe ze.”

3 IJesu ọ nise obọ-a ti ọli, ọọ li. “O ghole mhe, khi oni ọ ze.” Aghogho oni omose ọ ze.

4 IJesu ọọ li, “Khi gueye ogbokhoghuo, ama ka ri egbe e khase ekpodalo-ugamhi eyi Eshinegba, ni u riẹle iluasobo ni iMosisi ọọ a ke riẹle ini a ri oni efafe mu pfuase.”*

Irudunga ni okhọli-okhue ọ rọkhashe

(iLuk 7.1-10)

5 Abi iJesu ọ rọ lo iKapanomu le, okhọli-okhue ni ọ mheshe na ekhọli-okhue egbhueshe oyi iRomu oghuo ọ bhale ya lema li ikpaghiobo.

6 Ọọ li, “Onomhue, oni ọọ ga mhe ọ ga yeshi apfe e ghua egbegbo. Eri ọ guoghọ a.”

7 IJesu ọọ li, “Mhi ya bhale ya rọli ze.”

8 Oni okhọli-okhue ọọ li, “Onomhue, iye, lese ngme oni ungmehi tse, khi oni ọọ ga mhe ọ ya ze. Irari khi mhia fu te ni u wa bhale apfe oyemhe.

9 Mhemhe oyemhe, mhi li mhọli ekhọli-okhue eni e fu dose mhe, mhi li mhue elese ni mhia mheshe na. Mhi kha gueye ona ọ ke le, ọọ le, mhie olese ọ bhale, ọ bhale. Mhi khe oni ọọ ga mhe ọ li ona, ọ li ọli.”

10 Abi iJesu ọ rọ suọ emini oni omose ọ ngme, abọ e sha li. Ọọ eni e deba li, “Abi o li mhi li gue ọli e ye e ena khi mhia me irudunga onabi onana ghue eke iZireni.

11 Mhi gueye e khi ebubu egbo e ya rọte obini ovọ o te e ngale ali obini ovọ o te e lo eko, bhale ya nu Aburaamu ali Aziki ali iGiekopu shito ukue na eghiele na iloghie†.

† 7:29 Li ze iMak 1.22; iLuk 4.32 * 8:4 Li ze iLev 14.1-32 † 8:11 Li ze iLuk 13.29

12 Ama ẹgbọ ni é khá lá iloghie, a ya pfi wẹ je eke alo ebili ni e la ke viẹ, ẹẹ le akọ.”‡

13 Ijesu ọọ ọni ọkhọli-okhue ọgho, “Ke je khi o ya ligho ne abi u li mhọli irudunga egho.” Igho ọni ọọ ga li ọ ze oni eghẹghẹ ni ijesu ọ la ngme ọli igho tee.

Ijesu ọ ri ebubu ẹgbọ ze

(iMak 1.29-34; iLuk 4.38-41)

14 Abi ijesu ọ rọ bhale apfe oyi iPita, ọ me khi ọgo iPita ni ọkpotoso ọ yeshi khi ọọ ghu ughuamhi iba.

15 Ijesu ọ ri obọ ti ọli, eni iba e lase ọli egbe le. Ọ vule ọ feji ọli epfese.

16 Abi ogbomhi o rọ mu eke, ebubu ẹgbọ e wolọ eni e mhọli ayemhe ebe ọdoda bhale ghi ijesu. Igho ijesu ọ ri ungmehi unu khu wẹ eni ayemhe ebe egho egbe ku a. Ọ gbo ri eni ẹẹ ghua nya ze.

17 Eri a me enana ni ungmehi ni Azaya ọmekẹguele ọ ngme o bhale ya tse; Ni ọọ, “Lolighuo ọ mie awa umha-ze, ọ tsua ighuamhi eyawa ya kua.”§

Emini ideba-ijesu-kia o ya mie ogbo ọ rue

(iLuk 9.57-62)

18 Ijesu ọ me olele ẹgbọ ni e le gasẹ ọli, ọọ e ze ni wewe e da je ukiẹkiẹ obini o kpole oyi okẹ oniemhi iGalili.

19 Osese Ishi eyi iMosisi ọghuo ọ bhale deba li ọọ li,

“Osese, mhi ya debe ke je obiobini wa je kpa.”

20 Ijesu ọ sọli ọ, ọọ li. “In-yako e mhọli ese, ipfeli e mhọli eko, ama Omi Ogbọ ọa mhọli ashini ọ de ukhomhi ẹ gbe.”

21 Omose olese ni ọ khi omọ odukhokho oyọli, ọ lu ọli, ọọ li, “Osese, ze mhe kpe je apfe ya ri itamhe ni ọ ghu-a to ne.”

22 Ijesu ọ sọli ọ, ọọ li “Ke deba mhe, ze ni eni e ghu-a e ri eni e ghu-a to.”

Ijesu ọ pfomhise akpekpeli ukhomhi okẹ oniemhi

(iMak 4.35-41; iLuk 8.22-25)

23 Ijesu ọ lo elemhi ọko-okẹ oniemhi, eniye odukhokho eyọli e li lo deba li.

24 Utoghuo-kpe, akpekpeli oniemhi oo li oni ukhomhi okẹ oniemhi. Ukuku emhi o kpole denẹ ni oni ọko-okẹ oniemhi ọa rọ ku lue. Ama ijesu ọọ lese-a

25 Eniye odukhokho eyọli e ya guise ọli le, ẹ ọli, “Onomhue, tsumhi anye! Awa ya pfua!”

26 Ọọ wẹ, “Elo o ze ni a rọ lina na ulishi, Eri irudunga oyeẹ oo na beshi she?” Igho ọ vule nu oni akpekpeli ngme, oni okẹ o de ma.

27 Abọ e sha ẹgbọ nya ni e la agho, e mhila, “Ogbọ nabise ọnana ọ khi, egbegbi ozughu oyi okẹ oniemhi ali akpekpeli e ga suọ esọ ọ na li.”

Ijesu ọ ri emose ava eni e mhọli ayemhe ebe ze

(iMak 5.1-20; iLuk 8.26-39)

‡ 8:12 Li ze iMat 22.13; 25.30; iLuk 13.28

§ 8:17 Li ze Aza 53.4

28 Abi iJesu ọ rọ da je ukiękię obini o kpọle oyi oke onięmhi iGalili obini iGadara, emọse ava ni e rọte atalimhi lasela e bhale deba li. Eni emọse ava ena e mhọli ayemhe ebe ni e yese we ngme ni o rewe nono ingme. Egbọ ẹa ke gbudu rọte oni ode dọse.

29 Eni ayemhe ebe egho ni e la eni emose egbe, e tseşe utoghuokpe, ẹ ọli, “Elo e ku anye ali yeye gbe, yeye Omi Eshinegba? Eri u bhale ya nase anye neni oni eghẹghẹ o ramhi?”

30 Igulu ni e bu ẹ la epfe agho le eminale.

31 Igho eni ayemhe ebe egho e lema iJesu, ẹ ọli, “Ini u khu anye ya fię, khu anye ya lo eni igulu egho egbe.”

32 Igho iJesu ọọ, “A ke vu!” Igho e lasela ya lo eni igulu egbe. Eni igulu nya e na ya tiemhi eseso oni ute, ya lo oni oke, e ghuloa.

33 Emose ni e ri eni igulu u kia, e na kua, e je ifui apfe ya guele emini a me ali emini eni emose ni e mhọli ayemhe ebe e me.

34 Igho egbọ ni e la oni ẹoli nya e fię lasela deba iJesu. Abi e rọ me ọli, e lema li ọ kpẹkpẹ ọ lase wewe eke le.

9

Ijesu ọ ri emose ni ọ guoghọ-aze

(iMak 2.1-12; iLuk 5.17-26)

1 Ijesu ọ lo oko-oke onięmhi, ọ da oni oke iGalili mu egbe pfi je ukiękię obini o kpọle,

ọ bhale apfe oyọli obini iKapanomu.

2 Emose egho e tsua omose ni ọ guoghọ-a shi iya bhale. Abi iJesu ọ rọ me irudunga oyewe, ọọ oni omose ni ọ guoghọ-a, “Ri obọ shi udu, omimhe, a she ri olamhe topfa ẹ.”

3 Igho esese Ishi eyi iMosisi eghuo e nu egbe we ngme, e lie, “Oni omose ọna ọ pfi unu-
a!”

4 Ijesu ọ lese usamhi ni ẹ sa, ọ mhila we, “Elo o ze ni a rọ sa isamhi ebe udu?”

5 Onoghuo o kele mhe ya ngme oni omose ne? Ni mhi lie, ‘A she gbe olamhe kua ne,’ Ali ‘Vule ke kia?’

6 Ama, ni a rọ lese khi Omi Ogbọ ọ mhue afu elemhi eke agbo ni ọ rọ gbe olamhe kua na ogbọ.” Igho, ọọ oni omose ni ọ guoghọ-a, “Vule, rue iya oye u ke je apfe.”

7 Igho oni omose ọ vule ọọ je apfe.

8 Abi eni ebubu egbọ e rọ me ona, abọ e sha we. E kuęghie Eshinegba ni ọ ri afu onana na egbọ.

*Ijesu ọ lu iMatiu ọ deba lue
(iMak 2.13-17; iLuk 5.27-32)*

9 Abi iJesu ọ rọte agho je odalo, ọ me khi omionoga oghuo ni a lu iMatiu, ọ shito okhola ni a la miono oga. Ọọ li, “Deba mhe.” Igho ọ vule deba li.

10 Abi iJesu ọ rọ la owa oyi iMatiu le eminale, emionoga eni e bu elese ali ena olamhe e bhale ya ku ma we ọ, e ga nu

ɔli ali eniye odukhokho eyɔli le eminale.

¹¹ Abi ɛgbɔ iFarisi eghuo e rɔ mɛ ona, e mhila eniye odukhokho eyɔli, ɛɛ, “Elɔ o zɛ ni ɔsɛsɛ oyɛ ɛ ɔ rɔ nu emionoga ali ena olamhɛ ɛ le eminale?”*

¹² Ijesu ɔ suɔ ona, ɔɔ wɛ, “Oni ɔ toto ɔa mhue emini ɔ ri ɔbo ɛ li, ama oni ɔɔ to ɔɔ ye apfɛ ɔbo.

¹³ A ka wɛna emini a ri ona ngme, ikhi, ‘Oa khi iluasobo e ghɔle mhɛ, ama isomhelemhi’ Oa khi ɛgbɔ eni e pfuasɛ ne mhi bhale ya lu e mu pfi, ama ɛgbɔ ena olamhɛ.”†

Omhila oyi ingme azumhi
(iMak 2.18-22; iLuk 5.33-39)

¹⁴ Eniye odukhokho eyi iɔni Oni ɔɔ batazi ɛgbɔ, e bhale deba ijesu, e mhila li, “Elɔ o fɛ zɛ khi anye ali ɛgbɔ iFarisi, khi anye ɛ pfi azumhi ni eniye odukhokho eyɛ ɛa rɔ pfi?”

¹⁵ Ijesu ɔɔ wɛ, “Emɔle ɔmɔse ni ɔɔ rue ɔmueshi ɔnɔgbɔ e famhi ya mhue iyese udu-a ini ɔni ɔɔ rue ɔmueshi ɔ kie la wɛ iteva? Eghɛghɛ ɔɔ bhale ni a rɔ ya rue ɔni ɔmɔse ni ɔɔ rue ɔmueshi ɔnɔgbɔ iteva oyɛwɛ vu, ɛghɛghɛ aghɔ e rɔ tigbe ya ke pfi azumhi.

¹⁶ “Ogbɔ ɔa ya gbɛla ode onogbɔ toma onodiɔ, ini a mɛ ghɔ, onodiɔ oghɔ o ya nyanɔ-a toma onogbɔ, o fia esɛ ni o ke fu nɛ shi ɔ.

¹⁷ U kɛ neta khi eri ɔgbɔ ɔ ya ku onyɔ onogbɔ kulo akpaba ɛkuɛ ɛlamhi onodiɔ,‡ ini a mɛ ghɔ, eri oni akpaba o ya vɛ-a, oni onyɔ o ku kua, oni akpaba onyɔ o li opfu-a. Onyɔ onogbɔ a ku ɛ shi akpaba onogbɔ, ɛghɛghɛ aghɔ, oni onyɔ ali oni akpaba onyɔ e ga migha.”

Omɔ ɔmueshi ni ɔ ghua ali ɔkpotoso ni ɔa ze
(iMak 5.21-43; iLuk 8.40-56)

¹⁸ Abi oni ungmehi o kie la ijesu unu, ɔkhemhue iJu ɔghuo ɔ bhale ya wugha li odalo, ɔɔ li, “Kpɛkpɛ bhale ya ri obɔ ti omimhɛ ni ɔ lɛsɛ ghua, ni ɔ guale.”

¹⁹ Ighɔ ijesu ɔ vule deba li vu, eniye odukhokho eyɔli e li deba li.

²⁰ Ighɔ ɔkpotoso ɔghuo ni ɔlia e she ku ɔli egbe ramhi ikpe igbɛva ɔ rɔte ukhokho ti mama ijesu, ɔ ri obɔ ti ɔli esɔ ode.

²¹ Itobɔ khi ɔ she ngme ɔli shi udu khi, “Mhi kha da lɛsɛ ri obɔ ti ijesu ode tsɛ ne, mhi ya ze.”

²² Ighɔ ijesu ɔ mu egbe nyene, ɔ mɛ ɔli, ɔɔ li, “Kpotso khi ke zɛ ni ulishi o muɛ irudunga ni u mhue o she rɛ ze.” Aghɔaghɔ ɔni ɔkpotoso ɔ ze.

²³ Abi ijesu ɔ rɔ ramhi owa oyi ɔni ɔkhemhue, ɔ bhale ya ɛ khi ɛgbɔ e la aghɔ. Ee viɛ ɔni ɔmueshi ni ɔ ghua eghɔ. Aghɔ oo li nyoghoo.

* 9:11 Li zɛ iLuk 15.1-2 † 9:13 Li zɛ iMat 12.7; Osia 6.6 ‡ 9:17 Akpaba oyi ɛkuɛ ɛlamhi ɛgbɔ iJu e ku onyɔ ɔ shi.

24 O gueye օgbօkpa օ lase aghօ le, khi օni օmueshi օa ghu ne khi eri օ lese-a. Eni օgbօ e suօ ungmehi ni օ ngme, ee gia li.

25 Eni օgbօ e fiօ je olase se, iJesu օ lo elemhi օni owa, օ mu օni օmueshi obօ, օni օmueshi օ vule.

26 Okeke օni ingme օna օ gbhiaku asha kpa օni օđeli.

IJesu օ khueghie ezalo ava alo-a

27 IJesu օ ke rօte aghօ vu je odalo, ezalo ava e deba li. Ee tsօsօ lema li, e liօ օli, “Mhuօ isomhelemhi na anye, օni iDefidi.”

28 Abi iJesu օ rօ lo elemhi օni owa, օni ezalo ava e bhale deba li. օ mhila wօ, “A miesuօ khi mhi ya dobօ rօ օ ze?”

E ke օli, “Gueguegue.”

29 Ighօ iJesu օ ri obօ ti wօ alo, օօ wօ, “Alo eyօ օ e khueghie-a abi a mhuօ irudunga.”

30 Ikpamhi alo eyօwօ e khueghie-a. IJesu օ tse agua yօ wօ e khi gueye օgbօkhօghuo emini a mօ.

31 Ama asha ni e ramhi kpa, eri e gueye օgbօ, e gue ingme օyi iJesu yօ օgbօ asha kpa.

IJesu օ ri ungmehi ze

32 Eni emօse e vu, a tsua օmօse օghuo ni օ mhuօ ayօmօ ebe bhale, ni օa li ngme unu.

33 IJesu օ khu օli օni ayօmօ ebe ebe oghօ egbe ya lase, օni օmօse օ ngme. Abօ e sha

օgbօkpa e liօ, “Anye օa kpe mօ ingme օnana ghue eke iZireni.”

34 Ama օgbօ iFarisi e liօ khi oghie օyi iyօmօ ebe օ ri ekpabօ na li. Lօli օ zօ ni օ rօ dobօ օ khu օgbօ ayօmօ ebe egbe-a. §

Egbikanya eyi Eshinegba օa bu

35 IJesu օ kia la օli khi օli sօsօ ungmehi օyi Eshinegba elemhi owa ugamhi eyօwօ, օ tse abօ usomhi onete օyi Eghiele օyi Eshinegba. օ ri օgbօ ni e mhuօ ighuamhi khi ighuamhi i ze.*

36 Abi օ rօ mօ օni ebubu օgbօ, elemhi wօ e lala li irari khi udu օyօwօ օa sheshe itobօ khi օa mhօli օni օօ kpaghiօ wօ obօ, abi isumha ni օa mhuօ օrօwօkia. †

37 օ gueye օniyօ odukhokho eyօli, “Oni ikhiօsօ օo gbօdi gba, ama khi օni օ khիօsօ wօ, օa bu.”

38 “A sօ iromhi, ni Eshinegba օni օ mhuօ ikhiօsօ, ni օ ghie օni e ya khիօsօ օni ikhiօsօ fiօ lasele.” ‡

10

IJesu օ ghie ighiusomhi na keօ ogbava eyօli fiօ

(iMak 3.13-19; iLuk 6.12-16)

1 IJesu օ lu օniyօ odukhokho ogbava eyօli kugbe. օ ri afu na wօ, e ke ya khu iyօmօ ebe օdօda

§ 9:34 Li zօ iMat 10.25; 12.24; iMak 3.22; iLuk 11.15 * 9:35 Li zօ iMat 4.23; iMak 1.39; iLuk 4.44 † 9:36 Li zօ iNօba 27.17; 1 Ighie 22.17; 2 Okhօ 18.16; Ezik 34.5; iMak 6.34 ‡ 9:38 Li zօ iLuk 10.2

egbo egbe-a, e gbo ri egbo ni e mhue ighuamhi ododa ke ze.

² Eva eyi eni ighiusomhi na kee ogbava na. Oni odode khi ISamo ni a gbolo o lu iPita, ali inyoghuo oli, Aduru. Ijemhisi ali inyoghuo oli ni a lu iJonni ni e khi imi iZebedi.

³ IFilipu ali iBatolomiu. ITomosi ali iMatiu ni e khi emionoga. Ijemhisi omi Afeusi ali iTadiusi.

⁴ ISamo ni ingme o gho mu egbe ali iJudasi Isikaroti ni o ri iJesu de.

Usomhi ni a ghie eni etuogbava

(iMak 6.7-13; iLuk 9.1-6)

⁵ IJesu o ghie eniye odukhokho ogbava ena fie, o tse agua yewe, oo we, "A khi je eoli oyi egbo iJeta wekhi eoli na eke iSameria.

⁶ Ochogho a le deba egbo iZireni ni e li abi isumha ni e waa.

⁷ Abi a lie ke le, a ke tse abo usomhi ona-yewe, a lie we, 'Eghiele oyi Eshinagba o she ti bhale.'

⁸ A ri egbo ni e mhue ighuamhi ze, a ri eni e mhue efafe ze, a guise eni e ghuale, eni e mhue ayemhe ebe, a khu we ewe egbe lasele. Afue a ri eni ekpabo ena na e, a re we kpaghie egbo obo afue, a khi mie ifata shi o.

⁹ Abi a lie le ena, a khi tsua ukpagho okhoghuo shi omomhi.

¹⁰ A khi tsua eku e pfi so, wekhi itsua na ro so elese, wekhi eku ni a so, wekhi

ukpokpo na ro a to okpo, irari khi asha ni ogbo o la gbe agho o te e le.*

¹¹ "Eoli oni a da bhale kpa, a kushi ayi ogbo no da ke abo mie e, ramhi eghenge ni a ya rote agho vu.

¹² Neni a ya so ukhomhi owa okhoghuo, a kpe lie, 'Opfomhe o la oni owa ona.'

¹³ Ini egbo ne la oni owa e kpe abo mie e, opfomhe oyee o ka nu we la, ama, ini ea mie e, opfomhe oyee o gbo nyene deba e.

¹⁴ Ini a bhale eoli, khi egbo ne la oni eoli ea da kpe abo mie e ne, a kpe abo o-a na we ini a te o fie lase.†

¹⁵ Ogbele iguezo, mhi gueye e khi Eshinagba o ya mholi isomhelemhi na egbo iSodomu ali iGomora dose oni eoli ogho.‡

¹⁶ A sato khi eri mhi ghie e fie lase abi isumha ne la ifuabo idumhi. Irarigho, a ze ni a lese ingme abi enye, ama a mhue ikuegbe-a abi anekhukhu.*

Okholi ni a ya mu vule shi e o

(iMak 13.9-13; iLuk 21.12-17)

¹⁷ "A mu egbe e tsuke, irari khi egbo e ya mu e bhale ikotu, odalo egbhali ni ee so ez. E gbe e itali elemhi owa ugamhi eyewe.

¹⁸ E ya ri itobo eva oyemhe muno e bhale deba igovuno ali enighie, ni a gue usomhi onete oyemhe ye we. A gbo pfi

* 10:10 Li ze 1 iKori 9.14; 1 iTimo 5.18

† 10:14 Li ze Ika 13.51

‡ 10:15 Li ze

iMat 11.24; Igbae 19.24-28

§ 10:15 Li ze iLuk 10.4-12

* 10:16 Li ze iLuk 10.3

oṭsele oyemhe ye egbo iju ali egbo iJeta.

19 A khi yele abi a ya ngme ali abi a ya so we, ini e muno e bhale agbala ezọ. Irari khi emini a ya ngme o ya bhale unu oye e egheghe ni a nono oli shi.

20 Irari khi ingmemhi ni a ya ngme, ға ya khi eye e. Ayemhe-no-pfuase oyi Eshinegba ni o khi ita e, o ya ri ungmemhi ni a ke ngme shi e unu.†

21 “Egheghe na ngme ena, egbo e ya ri inyoghuo we bhale ni a gbe-a, ita eniye e wolọ imi we bhale na gbolo-a, igho eniye e li ya rue itawe bhale na gbe-a.‡

22 Egbo kpa e ya ke biselemhi e shi irari oyemhe. Ama ogbo ni o da mu irudunga oyoli mhu e ramhi ukpese ne, loli a ya mie pfuese. §

23 Ini a la asheghuo mu okholi vule shi e o, a na je eoli olese. Mhi ze e lese khi, aa ya gbe akanya ona pfo ne eke iZireni neni Omi Ogbo o nyene egbe e bhale.

24 “Omọ odukhokho ọa lese dose ọga oyoli, wekhi eri oni ọọ ga ogbo o ya fu dose ọga oyoli.*

25 Omọ odukhokho o dobe ya li abi ọga oyoli, oni ọọ ga ogbo o ya dobe li abi ọga oyoli. Ini a lu odapfe iBezebọ, see a ke beshi e lu eni e la oni omhu e-apfe oyoli.†

Oni a ya ke na ulishi oyoli (iLuk 12.2-7)

26 “Itobo igho a khi ze ni ulishi o mu e irari khi aa me emini a gba khukhu ni ọa ya khueghie a, wekhi eri a me emini o sheli ni ọa ya lasele.‡

27 Emini mhi gueye e eliyose a ngme oli lasele ini ogbe o gbe-a. Ungmemhi ni a bena gueye e, a la ukhomhi owa ngme oli lase ni egbo e suo gboo.

28 A khi na ulishi egbo ni o khia khi idiegbe e lese dobe ya gbe-a, ni ға dobe ya pfuse ogbo ayemhe-a. Ama a na ulishi oyi Eshinegba no kha gbe-a se o gbo mhu e ekspabo ro ya pfuse ayemhe-a elemhi ilimhi iriere.

29 U lese khi ukpaghuo a ri ipfeli otuava de? Ama aa me ongewe ni o ya ghu-a ni Eshinegba ọa ya lese.

30 Eshinegba o she leli egbegbi itsu ni e la e ukhomhi nya.

31 Itobo igho, a khi ze ni ulishi o mu e, irari khi a mu eloe dose ipfeli ni e bububu.

Eni e migha na iJesu ali eni e kie oli (iLuk 12.8-9)

32 “Ogbo ni o da gue ungmemhi oyemhe ye egbo ne, mhi ya li gue ingme oyoli ye Itamhe ni o la iloghie.

33 Ama onini o da la ukpeloe egbo kie mhe, mhi ya li kie oli

† 10:20 Li ze iMak 13.9-11; iLuk 12.11-12; 21.12-15 ‡ 10:21 Li ze iMak 13.12; iLuk

21.16 § 10:22 Li ze iMat 24.9,13; iMak 13.13; iLuk 21.17 * 10:24 Li ze iLuk 6.40; ifon 13.16; 15.20 † 10:25 Li ze iMat 9.34; 12.24; iMak 3.22; iLuk 11.15 ‡ 10:26

Li ze iMak 4.22; iLuk 8.17 § 10:33 Li ze 2 iTimo 2.12

ukp̄eloe oyi Itamh̄e na obini iloghie.ᅆ

Ijesu ọa ri opf̄omh̄e bhale ama okemhi

(iLuk 12.51-53; 14.26-27)

34 “A khi sa khi opf̄omh̄e mhi r̄o bhale ek̄e agb̄o. Mhi aa r̄o opf̄omh̄e bhale, ama ọgb̄hor̄o.

35 Eri mhi bhale ya to okhue na

“ ‘Om̄ose ali itali,
 ọkp̄otso ali inȳoli,
 ọsam̄o ali inȳod̄oli.

36 Unuekp̄e oyi ọgb̄o,
 ebe ọli e la.*

37 “Ọgb̄o ni ọ da nono ingme oyi ita okekhi inȳo d̄ose ingme oyemh̄e ne, ọa ya dobe khi ọm̄o odukhokho oyemh̄e. Ọgb̄o ni ọ da nono ingme oyi omi ọli d̄ose mh̄e ne, ọa ya dobe khi ọm̄o odukhokho oyemh̄e.

38 Ọgb̄o ni ọa da kpha apfida oȳoli tsua ni ọ ke deba ẹte-aw̄e oyemh̄e ne, ọa ya dobe khi ọm̄o odukhokho oyemh̄e.†

39 Oni ọ da mu agb̄o oȳoli mhue gagaga ne, o mema ya de ọli ob̄o-a, ama ọni rue agb̄o oȳoli ob̄o-a shi ek̄e itob̄o oyemh̄e ne, ọ ya m̄e eleli agb̄o oȳoli.‡

Eleli
 (iMak 9.41)

40 “Ọgb̄o ni ọ da kpe ab̄o mie ẹ ne, mh̄emh̄e ọ kpe ab̄o mie. Oni ọ da kpe ab̄o mie mh̄e, ọni ọ ghie mh̄e ọ kpe ab̄o mie.ᅆ

41 Ọgb̄o ni ọ da kpe ab̄o mie ọmek̄eguele oyi Ẹshin̄egba ne, ọ ya mhue isomhopfa onayi ọmek̄eguele. Oni ọ da kpe ab̄o mie ọgb̄o ni ọ pfuase ne irari khi ọ da khi ọgb̄o ni ọ pfuase, ọ ya mhue eleli oyi ọgb̄o ni ọ pfuase.

42 Ini ọgb̄okh̄ogh̄uo ọ die am̄e ni e pf̄omh̄e na ẹgb̄o eni ẹa mu ẹloe ena da ne, irari khi e da khi eniȳe odukhokho eyemh̄e, mhi gue ọ ye ẹ gūegūegūe khi eleli oȳoli ọa ya de ọli ob̄o a.”

11

Ijesu ali iJ̄oni Ọni ọọ batazi ẹgb̄o

(iLuk 7.18-35)

1 Abi iJesu ọ r̄o gueye eniȳe odukhokho ogbava eȳoli emini e ya rīe se, ọ je ẹoli ni e la ek̄e iGalili ya sese, ọ gbolo tse ab̄o oni usomhi onete.

2 Abi iJ̄oni Ọni ọọ batazi ẹgb̄o ọ r̄o la owa ighumha sūo ikanya ni iKirisiti ọọ gbe, ọ ghie eniȳe odukhokho eȳoli ghi ọli,

3 E l̄e ya lina mhila li. “Yēye u khi ọni iJ̄oni ọ ngme khi ọ ya bhale, abi anye ri ẹloe shi ek̄e ke kh̄e ọgb̄o ọlese?”

4 Ijesu ọ s̄o w̄e ọ, ọọ w̄e, “A nyene ẹgbe ya gueye iJ̄oni emini a sūo ni a m̄e.

5 Ezalo ẹẹ khueghie alo-a, eni e gūogh̄o aw̄e-a, e vule ẹẹ kia, a ri eni e mhue ighuamhi ẹkūe idiegbe ọd̄oda ze, eles̄o ẹẹ sūo es̄o, ẹgb̄o ni e ghu-a, a

* 10:36 Li z̄e iMika 7.6 † 10:38 Li z̄e iMat 16.24; iMak 8.34; iLuk 9.23 ‡ 10:39 Li z̄e iMat 16.25; iMak 8.35; iLuk 9.24; 17.33; iJ̄on 12.25 ᅆ 10:40 Li z̄e iMak 9.37; iLuk 9.48; 10.16; iJ̄on 13.20 * 11:5 Li z̄e Aza 35.5-6; 61.1

guise wẹ le. A gbolo ẹ tse abo usomhi onete yẹ ẹgbọ eni ẹa mhue.*

6 Ikhivose o khi na ogbọ ni ọa mhọli akhokhomhẹ shi ingme oyemhẹ!”

7 Eniyẹ odukhokho eyi iJoni ee vu se, iJesu ọọ ngme ingme oyi iJoni khasẹ eni e legba. O mhila wẹ, ọọ. “Abi a rọ fiẹ je ọdagbe ifufu ni a rọ ya bino iJoni, ogbọ nabise a dabi khi a ya mẹ? Ebuli ifulo ni akpekpeli ọ pfi ẹ nga pfi ẹ tiemhi a dabi khi a ya mẹ?”

8 Ini ọa khi ighọ shọ, elọ a dabi khi a ya mẹ abi a rọ fẹ fiẹ lase? Omose ni ọ sọ itsua eni e somhi otse a sa khi a ya mẹ? Iiye o! Ẹgbọ eni ẹẹ sọ itsua eni e somhotse, apfẹ oyi oghie ẹẹ la.

9 Elọ a fẹ fiẹ lase khi a ya mẹ shọ? Omekeguele? Gueguegue, ama mhi gueye ẹ, oni ọ gbo fu dose omekeguele a mẹ.

10 IJoni ọ khi oni ogbọ ni Ebe-no-pfuase o ngme ingme oyoli, ni Eshinegba ọ la liẹ,

“ ‘Mhi ya kpẹ ghie aghiu-somhi oyemhẹ ralo nẹ, ni ọ ya khueghie ode-a nẹ.’†

11 Abi o li mhi li gue ọli yẹ ẹ khi, iJoni ọ fu dose ogbokpa ni ọ la agbọ ona ghue, ama, ogbọ ni ọ ga kpọkẹ nya obini Eghiele oyi Eshinegba, ọ fu dose ọli.

12 Rote egheghe oyi iJoni Oni ọọ batazi egbo ya ramhi ogbe na amo, Eshinegba ọ te ẹ ri ikakabo mhọli omhese oyoli shi

agbọ oyi egbo, ama ikakabo egbo e ke rọ ọ lo ọ.

13 Irari khi emekeguele nya ali Ishi eyi iMosisi, e mẹ guele shi eke ramhi egheghe oyi iJoni.‡

14 Ini a ya lama shi ọ, iJoni ọ khi oni Elaja ni ẹ khi ọ ya nyene egbe bhale.§

15 A mhọli eso, a suọ emini mhia gueye ẹ, ni a rọli gbe akanya.

16 “Elọ mhi ri agbhotu ona ya khokho? Eri e li abi ikuku eniyẹ ni e shito epfefẹ oki ni e lu egbe wẹ,

17 “ ‘Anye pfi ofele na ẹ, aa lama gbe ishimhi, anye to uwolo

ni a rọ viẹ olimhi shi ẹ ọ, ama aa lama viẹ.’

18 Abi iJoni ọ rọ bhale, eri ọọ pfi azumhi, ọa lama da onyo, irarigho egbo e liẹ khi, ‘Ayemhẹ Okphaghiẹ oo nase ọli.’

19 Ama Omi Ogbọ ọ ke bhale, ọọ le ọọ da, egbo kpa e ke liẹ khi, ‘Ogbọ unu-emhi ali ọdonyo ọ khi, ni ọ nu emionoga ali ena olamhẹ ẹ mu omole.’ Emini Eshinegba ọọ riẹle, o ri ilẹsingme oyoli ẹ khasẹ.”

Emini ẹoli ni ẹa lama mu pfi ẹẹ mẹ

(iLuk 10.13-15)

20 Igho iJesu ọ li zẹ emuebe na egbo ni e la ẹoli ni ọ la gbe ikanya onyaloa ebubu eyoli, itobọ khi ẹa mu pfi, ọọ li.

21 “Epfua o khi nẹ, iKorazi! Epfua o khi nẹ, iBetisaidal!

† 11:10 Li zẹ iMala 3.1 ‡ 11:13 Li zẹ iLuk 16.16 § 11:14 Li zẹ iMala 4.5; iMat 17.10-13; iMak 9.11-13

Irari khi ini ikanya onyaloa ni a gbe ifui eoli eye e khi a li gbe we iTai ali iSidoni lo, e kha she vie osoli na egbewe shi olamhe eyewe, e te olamhe eyewe mu pfi agboagbo.*

22 Ama mhi gueye e khi, o ya somhi iTai ali iSidoni egbe dose e, ogbele iso-ezo

23 Yeye iKapanomu, eri a nono ni a ya yase e nga idane ramhi irarogbe? Iiye o! Eri a ya pfi e tiemhi oke ilimhi iriere. Irari khi ini onyaloa ni a gbe khasa e khi a gbe we eke iSodomu lo, o kha la o ramhi amo.†

24 Ama mhi gueye e khi o ya somhi iSodomu egbe dose e, ogbele iso-ezo.”‡

Bhale deba mhe ni u mholi iyemhea

(iLuk 10.21-22)

25 Eghenge agho iJesu o lie, “Ita, Onomhue, ni o mhue eke ali ukhuli, mhi tse uwegbe khi emini u ro sheli na eguebe, ali eni e fialo-a, khi u rewe khasa egbo ni ea mu eloe.

26 Igho, Ita, ina o li ghole e shi.

27 “Itamhe o she ri emhikpa nga mhe obo. Ogbokhoghuo o la o, ni o lese oni Omọ, se ni Ita. Ogbokhoghuo o la o ni o lese Ita se ni oni Omọ, ali eni oni Omọ o lama ri oni Ita khasa. §

28 “A bhale deba mhe, ee nya ni a tsua itsua ni ee khose e, mhi ya ri iyemhea na e.

29 A ri egbe mie emini mhi e a ke riela, a rote obo oyemhe wena, itobo khi mhii pfomhe gba, ali khi udu oyemhe o mholi iriegbe-tiemhile, ni a mhue iyemhea.*

30 Irari khi emini mhia lie a riela oni o ze e riela yeghela lo, ali khi eri itsua eyemhe ee fue.”

12

IJesu o khi Onomhue oyi ele iyemhea

(iMak 2.23-28; iLuk 6.1-5)

1 Eghenge ni a ngme ena, iJesu o rote ifui ishemhi iakpa dose ele iyemhea. Okiamhi oo gbe eniye odukhokho eyoli. Igho e li be eni iakpa, e le we.*

2 Abi egbo iFarisi e ro me ona, e oli, “Ghe khe! Eniye odukhokho eye ee riela emini Ishi eyi iMosisi o la lama shi a riela ele iyemhea.”

3 O so we o, oo, “Aa she kpe ze emini iDefidi o riela abi okiamhi o ro gbe oli ali apfoli?

4 Eri o lo elemhi owa oyi Eshinegba, loli ali apfoli, e ya rue ibuledi oni o pfuase le, ni ushi o la lama shi e le. Oni ibuledi ona, ekpodalougamhi eyi Eshinegba tse, e lese le oli.††

5 Abi khi aa rote ebe ushi iMosisi ze oli khi ekpodalougamhi eyi Eshinegba ni e la Owa Oyi Eshinegba, ee gbe ushi-a ogbele iyemhea, ama ogbo o ro mu ota so we? §

* 11:21 Li ze Aza 23.1-18; Ezik 26.1-28.26; iJof 3.4-8; Emo 1.9-10; iZaka 9.2-4

† 11:23 Li ze Aza 14.13-15; Igbae 19.24-28 ‡ 11:24 Li ze iMat 10.15; iLuk 10.12

§ 11:27 Li ze iJon 3.35; 1.18; 10.15 * 11:29 Li ze iJere 6.16 * 12:1 Li ze iDeut

23.25 † 12:4 Li ze iLev 24.9 ‡ 12:4 Li ze 1 iSam 21.1-6 § 12:5 Li ze iNoba

28.9-10

6 Ama mhi gueye e khi ogbọ ni o fu dọse Owa Oyi Eshinegba o la ana.

7 Ini a lese emini a ri oni ungmehi ona ngme shi Ebe-no-pfuase lo, ni oọ, 'Ilelemhi o ghole mhe, o a khi iluasobo,' aa kha ke pfa ezo mu eni ea lue.*

8 Irari khi mhemhe Omi Ogbọ mhi khi Onomhuẹ oyi ogbele iyemhea."

Ijesu o ri omose ni obọ oyọli o cheghẹle-a ze

(iMak 3.1-6; iLuk 6.6-11)

9 Abi ijesu o rote agho vu, o lo elemhi owa ugamhi oyewe.

10 Igho omose oghuo ni o cheghẹle obọ oghuo-a, o la ak-aghọ. Egbọ eghuo e la agho ni e nono ni wewe e mu ingme shi ijesu egbe, igho e mhila li. E ọli, "O fe ti ni a ri ogbọ ze ele iyemhea?"

11 Ijesu oọ we, "Ini ongefe o fe mhọli osumha, ni o ro de pfilo ateke ele iyemhea, wa a ya fe mu ọli o lasele?†

12 Ogbọ o mu eloe dọse os-umha! Irarigho, Ishi eyi iMosisi o lama shi o, ogbọ o ri ele onete ogbele iyemhea."

13 Igho oọ oni omose ni o cheghẹle obọ oghuo a egho, "Nise obọ oye-a." Igho o nise ọli-a. Oni obọ o na ya to abi onokpọle

14 Igho eni egbo iFarisi e fie ya ye ugbamhi abi e li ya gbe ijesu-a.

Oni oọ ga ni Eshinegba o ze

15 Abi ijesu o ke ro lese ug- bamhi ni e gba, o rote agho vu

je oboese, ebubu egbo e deba li. O ri eni e mhọli umha-ze nya ze.

16 O tse agua ye we e khi gueye egbo oni lolu khi.

17 Eri a ri ona ri ungmehi ni Azaya omekeguele o ngme bhale ya tse, ni o la lie,

18 "Oni oọ ga oyemhe

ni mhi ze na,

oni mhi nono ingme oyoli,

ni o ri egbe e mu mhe,

mhi ya ri Ayemhe oyemhe

shi ọli egbe,

o ya ri igue-so-ezo oyemhe

khashe ishishi nya.

19 Oa ya nu egbo wola

wexhi eri o ya tse

ni ogbọ suọ ifui apfe.

20 O ya kuegbe-a

nu eni ea mhuẹ ekpabọ ngeli,

abi a li kuegbe-a mu

oakpa

ni akpekpeli o pfigbe vule.

O ya le elemhi

eni ee nono ikpaghiobo,

abi ogbhali o a lie la apfe

ni amẹ o gbe erali

ni o la umutse pfuse-a,

ya ramhi ni o ro

ri igue-so-ezo leghie.

21 Itobọ igho egbo ijeta nya

e ro regbenga eva oyoli."‡

Ijesu ali iBezebo

(iMak 3.20-30; iLuk 11.14-23)

22 Igho egbo eghuo e rue omose oghuo ni o mhọli ayemhe obe bhale ghi ijesu. O zalo o gbo khi ungmehi.

* 12:7 Li ze iMat 9.13; Osia 6.6 † 12:11 Li ze iLuk 14.5 ‡ 12:21 Li ze Aza 42.1-4

Ijesu o ri oni omose ze. Oo ngme, o gbolo e me eke.

²³ Igho abo e sha eni egbo nya, e mhila, e lie, “Abi khi ijesu ona o khi Oni Omiepfuese omi iDefidi ni e khi o ya bhale?”

²⁴ Abi egbo iFarisi e ro suo ona, e ke, “Ekpabo eyi iBezebō ni o khi oghie oyi iyemhe ebe nya, o ro khu egbo iyemhe ebe egbe lasese.”§

²⁵ Ijesu o she lese usamhi oyewe, oo we, “Eghiele ni o da kemhi shi iku-iku ni o nu egbewe e kholi ne, eri o ya pfua. Igho khi eoli ali unuekpe ni e kemhi egbe nu egbewe e kholi, ea dobe ya migha.

²⁶ Ini Okphaghiē oo khu Okphaghiē lase, o she kemhi egboli. Seē eghiele oyoli o ke li dobe ya migha?

²⁷ Ini mhi ri ekpabo eyi iBezebō eē khu egbo ayemhe ebe egbe a, ekpabo eyi oghuo egbo eye e e ro khu we kua? Emi ni eē deba e eē riēle o rokhasē khi aa rote ode.

²⁸ Ama ini o khia khi Ayemhe oyi Eshinegba mhi ro o khu ayemhe ebe kua, loli o rokhasē khi Eshinegba o she e mhesē shi e egbe.

²⁹ “Oghuo o fe lese ya vule, o dose lo apfe oyi omose akama ya tsua li itsua vu. Oa khi eri o kpe ya ge oli shi eke? O tigbe dobe tsua li itsua owa?

³⁰ “Oni oa da nu mhe la ne, eri o biselemhi mhe, ali khi oni oa da nu mhe ti e gbili ne, eri o miatsē ku a.*

³¹ Irarigho, mhi gueye e khi, a ya ri olamhe ali ungememhi ipfiunu-a nya topfa ogbo, ama aa ya tigbe ri ungememhi ipfiunu-a ni a ngme deba Ayemhe-no-pfuase topfa ogbo.

³² A ya dobe ro topfa onini o da pfi unu-a deba Omi Ogbo, ama aa ya ro topfa oni o da pfi unu-a deba Ayemhe-no-pfuase, elemhi agbo ni a la memena, ghe agbo ni o ke e bhale.†

Udumhi oora a te e lese oora
(iLuk 6.43-45)

³³ “Ri eloe khu oara, o ya mo umomhi onete, ini u waa ri eloe khu oara, o mo umomhi ni oa ti. Irari khi umomhi oyi oara a te e lese emini oni oara o khi.‡

³⁴ Seē eē egbo ebe ni a kholo abi enye afue, a lie ngme ungememhi onete unu? Usamhi ni e vo ogbo udu o roli eē ngme ungememhi rote unu lasese.§

³⁵ Udu onete ogbo onete o te e ngme ungememhi onete lasese. Igho ungememhi obe o li rote udu oyi ogbo e e lasese.

³⁶ Ama a lese khi ogbogbo o ya zono abi o li ngme ungememhi afue unu lasese ogbele iso-ezo.

³⁷ Irari khi ungememhi unu oye a ro ya pfa ezō ne, ungememhi unu oye a gbo ro ya pfa ezō mu e.”

Irokhasē oyi ijona
(iMak 8.11-12; iLuk 11.29-32)

§ 12:24 Li ze iMat 9.34; 10.25 * 12:30 Li ze iMak 9.40 † 12:32 Li ze iLuk 12.10

‡ 12:33 Li ze iMat 7.20; iLuk 6.44 § 12:34 Li ze iMat 3.7; 23.33; 15.18; iLuk 3.7; 6.45

38 Igho ẹgbọ iFarisi ali esese Ishi eyi iMosisi eghuo ẹẹ iJesu, “Osesẹ, ri ọlẹlẹ ọnyalao oghuo khase anye.”*

39 O so we ọ, ọọ, “Eẹ ẹgbọ ọkhọlọ ni aa ri igesikia ga Eshinegba.” Áá mhila mhe ọlẹlẹ ọnyalao? Ọgbọkhoghuo ọa ya ri ọlẹlẹ okhoghuo khase ẹ, seẹ ni onabi a rokhase oyi iJona ọmekẹguele.†

40 Irari khi abi iJona ọ li la elemhi oyi afele ogbele ese ele ọguota ali ele iyose, igho Omi Ọgbọ ọ li ya li la elemhi eke ogbele ese, ele ọguota ali ele iyose.‡

41 Egbọ iNineve e ya mu ezọ vule shi ẹ ẹgbọ agbhotu ona ọ ogbele iguezọ, irari khi e mu nyene abi iJona ọ rọ tse abọ ungmehi oyi Eshinegba ye we. Ama memena, ọni ọ ga fu dose iJona ọ la akana, ama aa lama mu pfi.§

*Abi ayemhe obe o liẹ kia
(iLuk 11.24-26)*

42 Oghie-ọkpotoso oyi eke iSheba ọ ya mu ezọ vule shi ẹ ẹgbọ agbhotu ona ọ ogbele iguezọ, ọ pfa ezọ mu we. Itobo khi ọọ rọte obini odonue bhale ya ri esọ kpe ose se ile singme oyi iSolomoni. Ama memena ọni ọ fu dose iSolomoni ọ la akana, ama aa lama pfi esọ shi ọli ọ.*

43 “Ini ayemhe ebe o rọte ọgbọ egbe lasele, eri ọ kpe je eke okhakha ya dudu kia nono ashini ọ je ya yemhe-a. Ama ini ọa me,

44 ọ gueye egboli, ‘Mhi ya nyene egbe ukhokho je owa ni mhi kpe te vu.’ Ini ọ nyene egbe bhale agho ni ọ rọ ya ẹ khi agho ọ gboo, khi asha kpa oo pfa se nguene.

45 Eghẹghẹ agho, ọ fiẹ je olase ya rue ayemhe ebe ishilua elese ni e khọlọ dose ọli bhale ya lo agho, e la agho. Eghẹghẹ agho, ikpukhokho oyi ọni ọgbọ ọgho o ke ya khọlọ dose abi o kpe li. Igho o ya li ẹ egbe ẹẹ ẹgbọ ọkhọlọ ena.”

*Inyo iJesu ali inyoghuo iJesu
(iMak 3.31-35; iLuk 8.19-21)*

46 IJesu ọ kie ghọ nu eni ebubu ẹgbọ ọ ngme, inyoli ali inyoghuo ọli e bhale. E migha olase, e nono ni we we e nu ọli ngme.

47 Ọgbọghuo agho, ọọ li, “Inye ali inyoghuo ẹ, e migha olase, ẹẹ nono ni we we e nu ẹ ngme.”

48 IJesu ọ sọli ọ, ọọ, “Eghuo e khi inyemhe ali inyoghuo-mhe?”

49 O nise obọ ghue eniye odukhokho eyoli, ọọ, “Enana e khi inyemhe ali inyoghuo-mhe.

50 Ọnini ọ da ri ungmehi oyi Itamhe na iloghie gbe akanya, loli ọ khi inyoghuo-mhe ọni ọmose ali ọni ọkpotoso ali inyemhe.”

13

*Okhe irọkhokho oyi oghiale
ni ọ kọ ikpamhemhi
(iMak 4.1-9; iLuk 8.4-8)*

* 12:38 Li ze iMat 16.1; iMak 8.11; iLuk 11.16 † 12:39 Li ze iJona 1.17-2.10; iMat 16.4; iMak 8.12 ‡ 12:40 Li ze iJona 1.17 § 12:41 Li ze iJona 3.5 * 12:42 Li ze 1 Ighie 10.1-10; 2 Okhe 9.1-12

1 Eļe ni a ngme ena, iJesu o fię owa ya lase, o shitō epfe okę onięmhi.

2 Ebubu eĝbo e le gase ọli ramhi ni o rō vu ya lo oko-oke onięmhi shito, eni eĝbo nya e migha egele oni oke onięmhi.*

3 O ri okhe irokhokho gue emhi ebubu u ye we, ọọ we, “A ghe i! Oghiale oghuo o je ishemhi ya ku ikpamhi emhi.

4 Abi o li i ku eni ikpamhi emhi egho, eghuo o e de kua epfe ode. Ipfeli e bhale ya sano we le.

5 Eghuo o, e de nga ukhomhi okpegbhe, ni ọa mhue eke ni e bu. E nyanya ze. Ama itobo khi oni eke ọa mhue elamhi ni e pfi imhili lo,

6 ovo o gbolo we-a. E khakha-a, irari khi ęa me asha pfi imhili lo eke egegbō.

7 Ikpamhi eghuo o, e de kulo ashini igba e la. Eni igba e ze, e tono we gbolo-a.

8 Ama ikpamhi eghuo, e de shi egegbi eke, e fu, e nyese ekhe. Eghuo e ri imomhi asha egebhueshe lasele, elese e ri asha egebhuese lasele, enekpole, asha uye ali igbe. Egehegho e ke ya bu dose emini a kpe ro ko.

9 A ze eso, a suo emini mhia gueye ę, ni a roli gbe akanya.”

Emini oni okhe irokhokho o migha shi

(iMak 4.10-12; iLuk 8.9-10)

10 Eniye odukhokho eyoli e bhale deba li, e mhila li, “Elo

o ze ni u ro ri okhe irokhokho o sese eni eĝbo?”

11 IJesu ọọ we, a she mholi ilese oyi osheli abi Eshinegba o she mholi omheshe shi e egbe, ama a roli sheli we.

12 Onini o da kpe mholi, a ya ro ma o na li, o mholi gbeku o. Ama oni ọa mhue, a ya mie ọli oni o kpe mhue.†

13 Emini o ze ni mhi ro ri okhe irokhokho nu we ngme khi.

Ini e rię bino,
ęa ya me eke,
ini e rię ri eso shi eke,
ọa ya lo we eso.

14 Loli o ze khi ungememhi ni omekeguele Azaya
o ngme o tse shi we egbe
ni o la lię.

“A ya ri eso shi eke khue,
ama ọa ya tigbe lo e eso,
a feli ofeli khue,
aa me emhikhoghuo.

15 Udu oyewe o bi obili-a.
Itobo khi eri
eso eyewe e zuse,
e gbo guese alo.

Ini ọa khi igho,
e kha ri alo eyewe
ke me eke,
eso eyewe e kha suo,
udu oyewe o kha
mholi ileasingme,

ee kha mu pfi
bhale deba mhe,
mhi rewe ze.”

“Eni eĝbo e ya ri eso
shi eke khue,
ama ọa ya tigbe lo we eso,
e feli ofeli khue,
ama ęa me emhikhoghuo.”‡

* 13:2 Li ze iLuk 5.1-3 † 13:12 Li ze iMat 25.29; iMak 4.25; iLuk 8.18; 19.26

‡ 13:15 Li ze Aza 6.9-10

16 Ama oyeḗ ọa khi igho. Á me afa gba. A ri alo eye ẹ me eke, a ri esọ eye ẹ suọ.

17 Abi o li mhi li gue ọli ye ẹ khi, emekeḡuele ebubu ali ẹgbọ eyi Ẹshineḡba ebubu, e li dua ini wẹwẹ e me emini a me ali ini wẹwẹ e suọ emini a suọ, ama ẹa doḡe. §

Emini okhe irọkhọkhọ oyi oghiale o ngme

(iMak 4.13-20; iLuk 8.11-15)

18 Ijesu ọọ. “A ri esọ shi eke, ni e suọ emini oni okhe irọkhọkhọ o ngme.

19 Ogbọ ni suọ ungmehi omhesẹ ni Ẹshineḡba ọ mhọli shi agbọ oyi ẹgbọ, ni ọa lo ọli esọ ne, lọli ọ li abi ikpamhi emini e de kua epfe ode. Eri ọkphaghie ọọ bhale ya sanọ li wẹwẹ udu kua.

20 Eni e zẹ nga ukhomhi ọkpegbhe, eri e li abi ọgbọ ni ọ kha suọ ungmehi, ọ ga ri oghẹle mie ọli.

21 Ama ọa tiemhi ọli udu, itobọ igho, ọa migha tẹse. Irarigho, ini ọmunu o bhale ali ni a rọ mu okhọli vule shi ọli ọ shi itobọ oni ungmehi, ọ de ode a aghoagho.

22 Ikpamhi ni e zẹ shi ifu igba, wẹwẹ e li abi ọgbọ ni ọ kha suọ ungmehi oyi Ẹshineḡba, inase-udu shi ingme agbọ ali oghueme oyi epfue, e tonon oni ungmehi abi igba, ọa doḡe mo umomhi.*

23 Ikpamhi ni e zẹ shi egbegbi eke, e li abi ọgbọ

ni ọ kha suọ ungmehi oyi Ẹshineḡba o lo ọli esọ. O mo umomhi. Eghuo e kha mo imomhi egbhueshe, elese mo egbhuesẹ, eghuo ọ uye ali igbe.”

Okhe irọkhọkhọ oyi ebuli ofaghue ali ado

24 Ijesu ọ gbo zẹ okhe irọkhọkhọ olese khasẹ we, ọọ we, “Eri omhesẹ oyi Eghiele oyi Ẹshineḡba o li abi omose oghuo ni ọ kọ ado enete shi ishemhi oyoli.”

25 Ẹliyose, khi ẹgbokpa e ya lese-a, obe ọli ọ bhale ya kọ ebuli ofaghue solọ shi ọli ọ, ọ vu.

26 Eni ado e zẹ khi e fu khi e ri itsagha lasele, eni ebuli ofaghue e li zẹ lasele.

27 “Igho eni ẹẹ ga eyi oni omose e bhale ya gueye ọli, ẹẹ ọli, ‘Oga egbegbi ado ni u kọ shi ishemhi oye, ebuli ofaghue e nu wẹ zẹ lasele kia solọ shi wẹ?’

28 “Obe mhe ọ riẹle ona.

“Eni ẹẹ ga e mhila li, ‘Wa a nono ni anye vuole eni ebuli ọ kua?’

29 Oọ we, Iiye! Irari khi ini a vuole eni ebuli-a, a ya do obọ vuole eni ado ma eni ebuli.

30 A zẹ ni e ga fu kugbe ya ramhi eghẹghe ikhiesẹ. Eghẹghe agho, mhi ya gueye eni ẹẹ khiesẹ, e kpe vuole eni ebuli-a, e ge we ikhuli, e tose we-a, e tigbe khiesẹ eni egbegbi ado shi aka na mhe.”

§ 13:17 Li zẹ iLuk 10.23-24; iJon 8.56; Iburu 11.13; 1 iPit 1.10-12 * 13:22 Li zẹ iMat 19.23; 1 iTimo 6.9-10,17

Okhe irōkhōkhō oyi ukpamhi ɔara imōsitadi
(iMak 4.30-32; iLuk 13.18-19)

³¹ IJesu ɔ zɛ okhe irōkhōkhō olese khasɛ wɛ. Ɔɔ wɛ, “Eri omhɛsɛ ni Ɛshinɛgba ɔ mhɔli shi agbɔ oyi ɛgbɔ o li abi ukpamhi ɔara ni a lu imōsitadi ni ɔmɔsɛ ɔghuo ɔ rɔ ya kɔ ishemhi oyɔli.

³² Ukpamhi ɔli, o khi oghuo ikpamhi ɛɛra ni e shɛ nɛ nya, ama ini o fu vule, lɔli o ke fu dɔsɛ emini a kɔ shi oni ishemhi nya. O mele ɔara oni ofunɛ a. Ipfeli e bhale ya ku eko shi iguabɔ eyɔli.”

Okhe irōkhōkhō oyi ifuma
(iLuk 13.20-21)

³³ IJesu ɔ gbo zɛ okhe irōkhōkhō olese khasɛ wɛ, ɔɔ wɛ, “Eri omhɛsɛ ni Ɛshinɛgba ɔ mhɔli shi agbɔ oyi ɛgbɔ o li abi ifuma ni ɔkpotso ɔ rɔ ma ifulawa ni o bu wushe, ni o rɔli fuma shi ɔ.”†

³⁴ Okhe irōkhōkhō iJesu ɔ rɔ gue ingme ena yɛwɛ. Ɔa tigbe gue ingme okhɔghuo yɛwɛ ni ɔa khi okhe irōkhōkhō.

³⁵ Eri ona o ya tse shi ungemhi ni ɔmekɛguele ɔ ngme. Ni ɔɔ,

“Okhe irōkhōkhō
mhi rɔ ya nu wɛ ngme.

Mhi ya gue ingme
ni a rɔte igbaekɛle
oyi agbɔ rɔ sheli yɛ wɛ.”‡

³⁶ Abi iJesu ɔ rɔ zɛ eni ebubu ɛgbɔ obɔ, ni ɔ rɔ ya lo elemhi owa, eniyɛ odukhokho eyɔli e bhale deba li. Ɛɛ ɔli, “Gueyɛ anye

emini okhe irōkhōkhō oyi ebuli ɔfaghue oghɔ o ngme.”

³⁷ IJesu ɔɔ, “Ogbɔ ni ɔ ri eni egbegbi ikpamhi emhi ɛkɔmhi kɔ, ɔ khi Omi Ogbɔ.

³⁸ Oni ishemhi o khi oni agbɔ ona, eni ikpamhi ado enete eghɔ e khi ɛgbɔ ni e ya ri egbewɛ na Eghiele oyi Ɛshinɛgba. Eni ebuli ɔfaghue e khi ɛgbɔ eyi Ɔkphaghie.

³⁹ Ɔkphaghie ɔ khi Obe ni ɔ ri eni ebuli kɔ ifu ishemhi. Oni ɛghɛghɛ ikhiɛsɛ o khi ikpukhokho agbɔ, eni eni ɛɛ ga eghɔ e khi igɛni eyi Ɛshinɛgba.

⁴⁰ “Ɛzɛzɛ abi a li ti eni ebuli gbili tose-a eghɔ, ighɔ ikpukhokho agbɔ o ya li.

⁴¹ Omi Ogbɔ ɔ ya ghie igɛni eyɔli ya wolɔ ɛgbɔ ni e yɛsɛ ɛgbɔ pfidɔ ali eni e li ɔkhɔlo elemhi eghiele oyɔli lasele.

⁴² A ya pfi wɛ kulo elemhi avuerɛ, aghɔ ɛgbɔ e la ya ke vie ɛ le akɔ akɔ.

⁴³ Ɛghɛghɛ aghɔ ɛgbɔ eyi Ɛshinɛgba e ya ke gɛ abi ovɔ elemhi agbɔ onogbɔ oyi Ɛshinɛgba. A mhɔli esɔ, a suɔ emini mhia gueyɛ ɛ ni a rɔli gbe akanya.”

Okhe irōkhōkhō oyi ɛpfue ni a rɔ sheli

⁴⁴ “Eri omhɛsɛ ni Ɛshinɛgba ɔ mhɔli shi agbɔ oyi ɛgbɔ o li abi ɛpfue ni a rɔ sheli ifui ishemhi, ni ɔmɔsɛ ɔ tɔnɔ ekɛ mɛ rue, ni ɔ nyanya gbo rɔli sheli. Egbe e mu ɔli, ɔ ya ri emini ɔ mhɔli nya dɛ, ɔ ya dɛ oni ishemhi oghɔ.

† 13:33 Li zɛ iLuk 13.20-21; iGal 5.9; Igbae 18.6 ‡ 13:35 Li zɛ Iwolo 78.2

45 “Eri omhese ni Eshinegba o mholi shi agbo oyi egbo o li abi omose ni o nono ugbhema.

46 Ini o me oni o lo mu eloe, o je apfe ya ri emini o mholi nya de, o de oli.

Okhe irokhokho oyi aga

47 “Eri omhese ni Eshinegba mholi shi agbo oyi egbo o gbo li abi aga ni egbifele e pfi lo oke oniemi ni o khishi, e muno ifele ododa.

48 Abi oni aga o ro vo, e ti oli ngale egele. Igho, e shito e sano ifele eni e khi egbegbewe o kulo ughughu, e tsua eni ea ti kua.

49 Igho o ya li ogbele ni o kpe ukhokho. Igeni eyi Eshinegba e ya sano egbo okholo ifuabo egbo eni e pfuase lasele.

50 E pfi egbo okholo egho kulo owa ere, ni e la ke vie, ee le ako ako.

51 “Eni ingmemhi ena nya e she lo e eso?” E oli, “Ii.”

52 Oo we, “Irarigho, eri oshese ushi nya ni o mele omo odukhokho-a, ni o da mie Eghiele oyi Eshinegba shi udu, o li abi ogbo ni o mholi owa, ni o rote elemhi owa ni o ri itsua shi e rue epfue onogbo ali onodiyo lasele.”

Edeli eyi iJesu e kie oli

(iMak 6.1-6; iLuk 4.16-30)

53 Abi iJesu o ro ze eni okhe irokhokho ena se, O lase aghole.

54 O nyene egbe je eoli oyoli. O la owa ugamhi sese, egbo ni e suo oli, abo e sha we. E

mhila, e lie, “Obo o te mhue ilasingme enana, obo o te me ikanya oshabo ena a gbe?”

55 “Oa she khi omi ikapita na? Oa khi iMeli o khi inyoli, iJemhisi ali iJosefu ali iSamo ali iJudasi ea she khi inyoghuo oli?”

56 Ena ea khi inyoghuo oli eni ikpotso ni e ga nu awa la ana ena? Mhie, Obo o te me enana nya?”

57 Irarigho, o ri elemhi bi we.S

Igho iJesu oo we, “Aa me ashini aa la mu ekpe na omekeguele, se ni apfe oyoli ali unuekpe oyoli tse aa la mu ekpe na li.”

58 Itobo khi ea mhue irudunga, oa la agho gbe ikanya onyaloa ni e bu.

14

Eghuli oyi iJoni Oni oo batazi

(iMak 6.14-29; iLuk 9.7-9)

1 Eghenge agho, Erudu oghie eke iGalili o suo eko iJesu.

2 O gueye eni e ga li, oo, “IJoni Oni oo batazi na, ni o nyene egbe bhale agbo. Loli o ze ni o ro ligho mholi afu ro o gbe ikanya onyaloa enana.”

3 Irari khi Erudu o ke kpe ghie ya mu iJoni. Oo, a ri iweghe ge oli, a mu oli pfilo owa ighumha shi itobo ingme oyi Erudiasi ughue iFilipu inyoghuo oni Erudu.

4 Eri iJoni o ke gueye Erudu khi ushi oyi egbo iju oa lama shi o ni o ro rue ughue inyoghuo oli iFilipu shi.*†

⁵ Oni eḡheḡhe Erōdu o nono ni lōli gbe iJōni-a shi oni ingme, ama ulishi oyi eḡbō iJu oo mu ọli irari khi o leṣe khi eḡbō kpa e leṣe khi ọmekẹguele iJōni o khi.

⁶ Ama, eḡe ni Erōdu o gheḡe shi ogbeḡe ni a rọ bia li, omi Erōdiasi o gbe ishimhi khase wẹ ni o ri egbe mu ọni Erōdu doṣe.

⁷ O ri ọni Erōdu romhi ishe, o neta ọmose gueye ọni ọmueshi khi lōli ya ri emiemini o mhila luẹ na li.

⁸ Igho inyọli o ya seṣe ọni ọmueshi, o ka gueye itali o khi iJōni ukhomhi shi ukpeko na luẹ.

⁹ Abi o rọ ngme ọli gho, egbe pfọ ọni oghie-a. Ama irari ishe ni o romhi ali apfọli ni e nu ọli shito, ọọ a ri emini o mhila na li.

¹⁰ Igho o ghie ya khi iJōni ukhomhi o elemhi owa ighumha.

¹¹ A khi oni ukhomhi shi ukpeko a ri ọli na ọni ọmueshi, ọni ọmueshi o tsua li ghi inyọli.

¹² Eniye odukhokho eyi iJōni e bhale ya tsua ekuli oyọli rọ ya tọ. E vu ya gueye iJesu.

Ijesu o ri eminale na eḡbō agbeḡe ishe le

(iMak 6.30-44; iLuk 9.10-17; iJōn 6.1-14)

¹³ Abi iJesu o rọ suo emini a me, o fiẹ agho lase. O lo ọko-oke oniẹmhi je asha ni o da-ya ya shito. Abi eni eḡbō e rọ suo ona e ri awe kia le deba li.

¹⁴ Abi iJesu o rọte oni ọko-oke oniẹmhi fiẹ lase, ni o rọ me eni ebubu eḡbō egho, elemhi

wẹ e ala li, eni ẹa ze, o rẹ wẹ ze.

¹⁵ Ogbomhi o mu eke, eniye odukhokho e bhale, eḡ ọli, “Waa ke ze eḡbō ena ke je, irari khi oola o nuata shi apfe, ni e je ifu ẹoli ya de emhi le.”

¹⁶ Ijesu ọọ wẹ, “Oa ti ni e ligho vu tse, a nono eminale na wẹ le.”

¹⁷ Eḡ iJesu, “Ibulẹdi ishe ali ifeḡe ava e khi emini awa leṣe mhue shi ana.”

¹⁸ Ijesu ọọ wẹ, “A rue wẹ bhale ghi mhe ghue.”

¹⁹ Oo, oḡbōḡbō o shito ukhomhi ebuli. O rue eni ifeḡe ava ali ibulẹdi ishe egho, o tsua wẹ idane o ri ikpẹmhi na Eshineḡba. O kholo eni ibulẹdi-a, o rẹ wẹ na eniye odukhokho eyọli. Eni eniye odukhokho eyọli e kemhi wẹ na wẹ.

²⁰ Oḡbōḡbō o le, o khue, e kpọle. Igho eniye odukhokho eyọli e sanọ eni e kpọle vọ ighughu igbeva tsululu.

²¹ Emose agbeḡe ishe (5,000) e le eni eminale, ini aa leli ikpotso ali eniye ma o.

Ijesu o la ukhomhi oke kia
(iMak 6.45-52; iJōn 6.15-21)

²² Aghoaghọ iJesu o gueye eniye odukhokho eyọli e lo ọko-oke da je ukiẹkiẹ oke obini o kpọle, o gueye eni ebubu eḡbō, oḡbōḡbō o ke je.

²³ O veṣe eni eḡbō kua se, o je ukhomhi ute ya so iromhi. Ogbomhi o mu eke, iJesu lōlighuo o kie la oobọ.

²⁴ Eḡheḡhe ni a ngme ena, oni ọko-oke o she rọte eke lo oni oke kia nuata.

Igho akpekpeli oniēmhi oo zughuse oni okẹ, ni o tsua oni oko-okẹ ya nga ya tiemhi.

²⁵ Eḷe uzogbe neni ogbe o gbe-a, iJesu bhale deba wẹ, o la oni ukhomhi okẹ ẹ kia.

²⁶ Abi eni eniyẹ odukhokho e rọ mẹ ọli khi ọ la ukhomhi oni okẹ ẹ kia, e yila. E tsẹsẹ, e liẹ, “Ayemhẹ olimi lọ!”

²⁷ IJesu ọ nyanya nu wẹ ngme, ọọ, “A mhọli udu, mhemhẹ lọ, a khi ke na ulishi.”

²⁸ IPita ọọ, “Ọnọmhue ini yeye lọ igesikia, wẹẹ mhe mhi bhale debẹ oni ukhomhi okẹ.”

²⁹ IJesu ọọ li, “Bhale.” Igho iPita ọ fiẹ oni oko-okẹ lasele, ọọ kia ukhomhi okẹ, ọọ lẹ deba iJesu.

³⁰ Ama abi ọ ke rọ mẹ abi oni ukpokpomhi akpekpeli o li pfiolo, ulishi o mu ọli, ọọ tiemhi elemhi oni okẹ. O tsẹsẹ, ọọ, “Ọnọmhue tsumhi mhe!”

³¹ Igho iJesu ọ nise obọ-a o mu ọli. Ọọ li, “Elo o zẹ ni irudunga oye o rọ na she. Elo o zẹ ni u rọ mhue akhokhomhẹ?”

³² Igho e ga ya lo elemhi oni oko-okẹ, oni akpekpeli o pfohmẹ.

³³ Igho eniyẹ odukhokho eyoli e nyese ukhomhi na li ẹẹ ọli, “Igesikia lọ khi, Omi Eshinegba u khi.”

IJesu ọ la iGenesareti ri oni ọọ ghua ze

(iMak 6.53-56)

³⁴ Abi e ke rọ da oni okẹ ni o khishi, e bhale ekẹ iGenesareti.

³⁵ Abi egbo ni e la oni ekẹ e rọ lese khi iJesu lọ, e ghie ghi egbo ni e la ẹoli i kia gasẹ oni ẹoli nya. Egbo e tsua egbo eyewe nya ni ẹẹ ghua ghi ọli.

³⁶ E lema li ọ kpẹkpẹ ọ lese zẹ ni eni ẹ ghua e ri obọ ti esọ awulu ni ọ sọ. Egbo nya ni e ri obọ ti ọli, e ze.

15

Osesẹ ipfuase na ekelemhi (iMak 7.1-13)

¹ Igho egbo iFarisi ali esese Ishi eyi iMosisi eghuo e te iJerusalemu bhale ya mhila iJesu, ẹẹ,

² “Elo o zẹ khi eniyẹ odukhokho eye ẹa ya ri osese ni ititawa e rọ shi ekẹ gbe akanya? Ẹa ya kpe abọ-a neni e le eminale!”

³ IJesu ọọ wẹ, “Elo o zẹ ni a rọ ri itobọ ushi oyeẹ gbe ushi oyi Eshinegba-a?”

⁴ Irari khi Eshinegba ọọ liẹ, ‘Ogbo ọ ke ri ekpe na itali ali inyoli,’ ali khi, ‘Onini ọ da ku itse na itali okekhi inyoli ne, a gbe ọli-a.’*

⁵ Ama abi ẹẹ a ke ngme khi, ini ogbo ọ mhọli ikpagho ni ọ kha rọ na itali okekhi inyoli, ni ọ ke rọ liẹ khi eni ikpagho egho khi loli mu udu pfi, khi Eshinegba loli ke ri eni ikpagho ya na.

⁶ Khi ọ guẹ kia ini ọa ke rie ri ikpagho na itali ali inyoli. Ina a li ri eloe ẹ gbe ushi oyi Eshinegba ni a ba mẹ asha ke deba osese oye ẹ.

* 15:4 Li zẹ Okiali 20.12; 21.17; iLẹv 20.9; iDeut 5.16

7 ƐƐ e ri ugamhi ku alo!
Azaya Omekeguele o kpe lina
ngme o!i shi e egbe ni o re,

8 “Eni egbo ena, unu e ro mu
ekpe e na mhe,
ama udu oyewe o nuata
shi mhe o.

9 Afue e mema ga mhe,
irari khi osese oyi egbo ee
sesese egbo,
abinu khi ishi eyemhe
lo.”†

*Emini e ri ogbo oo khi oni oa
pfluase*

(iMak 7.14-23)

10 IJesu o lu egbo ni e legba,
oo we, “A ri esu shi mhe eke,
ni a mhuu ilisingme.

11 Oa khi emini ogbo o rote
unu le tiemhi elemhi e roli e
khi oni oa pfluase, ama emini
e te oli unu ya fie e ri ogbo khi
oni oa pfluase.”

12 Igho eniye odukhokho
eyoli e bhale deba li e mhila li,
ee oli, “U li lese khi ingmemhi
ni u ngme amo khi, o ri el-
emhi e bi egbo iFarisi?”

13 IJesu oo we, “Oara ni Ita-
mhe na iloghie oa da ro ko ne,
a ya vu oli eke-a.”

14 A khi ze ni ingme oyewe o
nase e udu. Ezalo ni eri ezalo
e kia e khi. Ini ozalo o mu
ozalo onabi loli obo ro o kia,
eri wewe ava e ga de ya pfilo
ateke.‡

15 IPita oo iJesu, “Gueye
anye abi oni okhe irokhokho
ena e ngme.”

16 IJesu oo we “Aa kie lese
emini mhia ngme?”

17 A lese khi emini o da te
unu ya tiemhi elemhi khi eri
a ne oli e kua?

18 Ama emini o da te unu
lasele ne, elemhi udu o te
lasele. Ena e khi emini e dobe
ri ogbo o khi oni oa pfluase.§

19 Irari khi elemhi udu
isamhi ebe e te e lasele.
Usamhi abi a lie gbe ugbeli,
ali abi a lie kia okia, abi lie do
ighiatu ni a ro na eta ali iku
itsebo ali iyese ogbo-a, ali ni a
ro o pfi otsele egbhue.*

20 Emhi enana e ri ogbo o
khi oni oa pfluase. Ama ini
ogbo o le eminale ni oa ro
kpe abo, oa ri ogbo khi oni oa
pfluase.

*Irudunga oyi okpotso ongi
iKena*

(iMak 7.24-30)

21 IJesu o te agho vu, o bhale
eke iTai ali iSidoni.

22 Okpotso ongi iKena ni o
la ukiekie eke ogho o bhale
deba iJesu o lema li, oo
li, “Onomhuu Omi iDefidi
kpekpe mholi ilelemhi na mhe.
Ominhe ni omueshi o mhuu
ayemhe okphaghie. Oo ze mu
oli gba memena.”

23 Ama iJesu oa so oli o.
Eniye odukhokho eyi iJesu, e
iJesu o khu oni okpotso khi oo
kpe okeke deba ewe.

24 IJesu oo we, “Isumha eyi
iZireni ni e waa, a ghie mhe
ghi tse.”

25 Oni okpotso o suo ona, o
bhale ya de wugha odalo oyi
iJesu, oo li, “Onomhuu kpekpe
kpaghie mhe obo.”

† 15:9 Li ze iAza 29.13 ‡ 15:14 Li ze iLuk 6.39 § 15:18 Li ze iMat 12.34 * 15:19
Li ze iGal 5.19-21; 1 iKori 6.9-10; iRom 14.14

26 Ijesu o o li, "Oa ti ni a rue eminale oyi eniye pfi ghi ewa."

27 Oni okpotso oo, "Igho lo gueguegue, Onomhue. Ama ewa ee le eminale ni o rote ukhomhi itebu oyi oni o mholi we de kua eke."

28 Ijesu oo oni okpotso, "Egbegbo u mhue irudunga, a ya ri emini u nono ne." Aghoaghoo omi oli o ze.

29 Ijesu o te agho vu, o rote oko oniemi iGalili le. O nga ukhomhi ute ya shito.

30 Ebubu egbo e bhale deba li agho, e tsua egbo ni e guoghoo awe-a, ali eni e ze alo ali eni e le eso, ali eni e ki shi, ali ingmenu ali ebubu egbo ni e mhue ighuamhi ododa bhale ya shi ufuenge oyi ijesu. O ri wewe nya ze.

31 Aboo e sha egbo abi e ro me khi ingmenu ee ngme, egbo ni e guoghoo a, e vule kia, eni e ze alo e me eke, igho, ee kuenghie Eshinegba oyi iZireni.

Ijesu o ri eminale na egbo agbele ene le

(iMak 8.1-10)

32 Ijesu o lu eniye odukhokho eyoli, oo we, "Elemhi egbo ena e ga lala mhe irari khi ele-ese na ni e te nu mhe la akana. Ee me eminale le. Mhi aa nono ni mhi gueye we e ri elemhi ofue ke je, ini ubi o khi rue we shi ode."

33 Eniye odukhokho eyoli e mhila li, "Obo a te ya me eminale ni ebubu egbo ena e ya le ifu oyemi ni awa la ena?"

34 Ijesu o mhila we, "Ibuledi ingme a mholi shi agho?"

E oli "Iruli ishilua ali ikuku ifele."

35 Igho ijesu oo eni egbo e shito ekekhe.

36 Igho o rue eni ibuledi egho ali eni ifele o kphemhi na Eshinegba shi o. O khi we a, o rewe na eniye odukhokho eyoli e kemhi we na eni egbo.

37 Ogbokpa o le, o khue. Eniye odukhokho eyoli e sano eni e le kpole shi ighughu ishilua e vo tsuulu.

38 Emose agbele ene 4,000 e le eni eminale. Ini ogbo oa leli ikpotso ali eniye ma o.

39 Ijesu o vese eni ebubu egbo kua se, o lo oko-okoo oniemi je ukiekie eke iMagidalen.

16

E mhila ijesu o ri olele khase ewe

(iMak 8.11-13; iLuk 12.54-56)

1 Egbo iFarisi ali iSadusi eghuo e bhale deba ijesu e ya mu oli fe. E mhila li o ri olele ni o te iloghie bhale khase we.*

2 Ijesu oo we, "Ini ogbomhi oo mu eke, a guele khi, 'Ogbenamo o ma ti irari khi idane o yile-a.'

3 Ele uzogbe, a guele khi, 'Ame o ya rue amo irari khi idane oo yile, o gbo bishi-a.' A gue bino irarogbe guele abi ogbe o ya li, ama aa dobe e guele emini eghenge ni a la memena o ngme.

* 16:1 Li ze iMat 12.38; iLuk 11.16

4 Eẹ ẹgbọ ebe na agbhotu ona ni aa ri igesikia ga Ẹshinegba! A mhila mhe ọlele? Aa ya ri okhoghuo khasẹ ẹ, se ni onayi iJona ọmekẹguele.”†

Igho iJesu o pfi we shi agho vu.

Oyese oyi ẹgbọ iFarisi ali iSadusi

(iMak 8.14-21)

5 Abi eniye odukhokho eyoli e ro da oni okẹ oniemihi ni o khi shi je egele ukiẹkiẹ obini o kpole se, e sato khi wewe ẹa yelege tsua ibulede.

6 Ijesu oo we a mhuẹ ẹgbhe ẹ shi angeli oyi ẹgbọ iFarisi ali iSadusi ni o li abi afuma oyi oyese.‡

7 Eni eniye odukhokho e nu egbewe ngme oli khi itobo khi wewe ẹa tsua ibulede bhale iJesu o ro ngme ona.

8 Ijesu o suo emini e ngme, oo we, “Eni ẹa mholi irudunga ena, elo o ze ni a ro gue ẹzo eminale?”

9 Aa kie lese ingme? Aa sato abi mhi ro kemhi ibulede ishe na ẹgbọ agbele ishe, ighughu ingme a sanọ eni e le kpole vo?§

10 Ali ibulede ishilua ni mhi ro na ẹgbọ agbele ene le, ighughu ingme a sanọ eni e le kpole vo?*

11 Elo o ze khi aa kie lese khi ọa khi ingme ibulede mhi nu ẹ gue? Ama, mhiẹ a mu egbe ẹ shi oyese oyi ẹgbọ iFarisi ali iSadusi ni o li abi ifuma.”

12 Loli eniye odukhokho eyoli e ro tigbe lese khi, ọa

khi ingme ifuma ni a ro nye ibulede o nu we ngme ẹ shi, ama ingme osese ẹgbholi oyi ẹgbọ iFarisi ali iSadusi oo ngme.

IPita o guele oni iJesu o khi (iMak 8.27-30; iLuk 9.18-21)

13 Abi iJesu o ro bhale eke iSizeria iFilipi, o mhila eniye odukhokho eyoli, oo we, “Oghuo ẹgbọ e famhi ẹ lie khi Omi Ogbọ o khi?”

14 Eẹ iJesu, “Eri ẹgbọ eghuo ẹ khi iJoni Oni oo batazi ẹgbọ u khi, eghuo ẹ lu ẹ, Elaja, eghuo o ẹ khi, iJeremaya u khi, eghuo ẹ khi, ooghuo emekẹguele u khi.”†

15 Ijesu oo we, “Eẹ oye ẹ, oghuo ẹ khi mhi khi?”

16 ISamọ iPita o ro oli, “Yeye u khi oni iKirisiti Omi Ẹshinegba ni o la o.”‡

17 Ijesu oo li, “Oni a khi vose na u khi, iSamọ omi iJona. Ọa khi ogbọ o ri igesikia ona khasẹ ẹ, obọ oyi Itamhe na iloghie o te bhale.

18 Mhi gueye, yeye iPita, (ni u khi eche). Oni ungmehi ni u ngme ena mhi ya ma Igbaa oyemhe ni e mie mhe suo nga, ekpabo oyi eghuli ọa dobe ya mu oli o le.

19 Mhi ya rue okpe oyi eghiele oyi Ẹshinegba ne, emiemi ni u waa da lama shi elemhi agbo ona ne, Ẹshinegba ọa ya li lama shi o obini iloghie, emini u da lama

† 16:4 Li ze iMat 12.39; iLuk 11.29 ‡ 16:6 Li ze iLuk 12.1 § 16:9 Li ze iMat

14.17-21 * 16:10 Li ze iMat 15.34-38 † 16:14 Li ze iMat 14.1-2; iMak 6.14-15;

iLuk 9.7-8 ‡ 16:16 Li ze iJon 6.68-69 § 16:19 Li ze iMat 18.18; iJon 20.23

shi elemhi agbọ ona ne, ọ ya lama shi ọ obini iloghie.”[§]

²⁰ Ijesu ọ gueye eniye odukhokho eyọli e khi gueye ẹgbọ khi lọli khi oni iKirisiti.

Ijesu ọ gue ingme eghuli oyọli le shi eke

(iMak 8.31–9.1; iLuk 9.22-27)

²¹ Rọte ẹghẹghẹ aghọ vu ijesu ọ te gueye eniye odukhokho eyọli, ọọ, liẹ, “Mhi mema ya je eke iJerusalemu ni mhi la ya me osoli ebubu abọ eyi eni egbhali ali ighie eyi ekpodalo-ugamhi ali esese Ishi eyi iMosisi. A mema ya gbe mhe-a, ama ele nuzi-ese a ya guise mhe le bhale agbọ.”

²² Ighọ iPita ọ lu ọli fiẹ je olase ọ liẹ ọli ọ khi ke gbo ngme ghọ, “Eshinegba ọ bighi ọli ku a, oghọ ọa ya tse shi ẹ egbe!”

²³ Ijesu ọ mu egbe pfi ọọ iPita, “Vu mhe ana, ọkphaghie! Ọzuode u khi shi mhe ọ, irari khi waa ya sa isamhi ni e rọte obọ oyi Eshinegba bhale, ama usamhi oyi agbọ.”

²⁴ Ighọ ijesu ọ gueye eniye odukhokho eyọli, ọọ we, “Ini ọgbọ ọ da nono ni lọli deba mhe ne ọ mema ya kie egbọli ọ tsua apfida oyọli ọọ deba mhe.*

²⁵ Irari khi ọgbọ ni ọ da dua ni lọli tsumhi ayemhe oyọli ne, agbọ onabi oyi Eshinegba o ya de ọli obọ-a, ama ọgbọ ni ọ da ri itobọ oyemhe rue ayemhe oyọli pfi-a ne, ọ ya tsumhi ọli.†

²⁶ Ighẹ eleli ni ọgbọ ọ ya me ini ọ le ugu agbọ ona nya, ni ayemhe oyọli o rọ de ọli obọ-a? Abi khi elọ ọgbọ ọ dobe rọ ya fali ota rọ to ayemhe oyọli.

²⁷ Irari khi Omi Ọgbọ ọ ya bhale elemhi ufumhi oyi Eshinegba lọli ali igeni eyọli, ẹghẹghẹ aghọ ọ ya ri eleli na ọgbọgbọ abi ọ li gbe.‡

²⁸ Mhi gueye ẹ khi ẹgbọ eghuo e la ana memena ni ẹa ya ghu ne, ni e rọ ya me khi Omi Ọgbọ ọọ bhale abi oghie.”

17

Imamachi oyi ijesu

(iMak 9.2-13; iLuk 9.28-36)

¹ Ogbẹle-esesa o dose se, ijesu ọ rue iPita ali iJemhisi ali iJoni ikhi inyoghuo iJemhisi, weweghuo kpe e ya nga ukhomhi ute ni o yagha.

² Ọ la aghọ mu mela-a ukpeloe we. Alo eyọli e ge abi ovọ, itsua ni ọ sọ e ge abi akpá.

³ O li denẹ, ghe khe, e me khi iMosisi ali Elaja khi e nu ijesu ẹ ngme.

⁴ Ighọ iPita ọọ ijesu, “Onomhue, o ma gue ti khi anye la ana! Ini o ghọle ẹ, mhi ya to okhọlo ese, oghuo ọ o khi o ye, olese ọ o khi oyi iMosisi, onokpọle o khi oyi Elaja.”

⁵ Abi ọ kie li ngme, ighọ otughunu ni o ge nyanyanya o bhale ya khukhu we-a. E suọ khi uruli o rọte oni otughunu liẹ, “Omimhe ni mhi nono ingme oyọli na, ni

* **16:24** Li ze iMat 10.38; iLuk 14.27 † **16:25** Li ze iMat 10.39; iLuk 17.33; iJon 12.25 ‡ **16:27** Li ze iMat 25.31; Iwolo 62.12; iRom 2.6

o ri egbe e mu mhe. A suo emini o gweye e.”*†

6 Abi eni eniye odukhokho e ro suo ona, e de yeshi ta alo rughu, ulishi oo mu we.

7 Igho iJesu o bhale ya ri obo ti we, oo we, “A vule, a khi ke ze ni ulishi o mu e.”

8 Abi e ke ro yase alo eke, ea ke me ogbokhoghhuo agho se ni iJesu lolighuo kpe.

9 Abi e ro tiemhi oni ute le, iJesu o tse agua ye we, oo. “A khi gweye ogbokhoghhuo emini a me, ini aa li rote eghuli guise Omi Ogbọ le.”

10 Eni eniye odukhokho eyoli e mhila li, ee, “Elo o ze khi esese Ishi eyi iMosisi e lie khi Elaja o mema kpe ya bhale?”‡

11 IJesu oo we, “Elaja o mema kpe ya te ode bhale ya mu egbe emhikpa shi eke.

12 Ama mhi gue e ye e khi Elaja o she bhale ama egbo ea lama khi loli o khi, e li oli abi o ghole we. Igho e ya li na Omi Ogbọ osoli.”§

13 Igho eniye odukhokho eyoli e tigbe lese khi ingme oyi iJoni Oni oo batazi egbo oo ngme.

Ijesu o ri omọ ze

(iMak 9.14-29; iLuk 9.37-43a)

14 Abi e ro nyene egbe bhale deba eni ebubu egbo, omose oghuo o bhale ya wugha odalo oyi iJesu.

15 Oo, “Onomhue, kpekpe le elemhi omi mhe ni o mhue

ughuamhi ni o mu ogbo pfi gbe. O ma nase oli gba. Isheghuo o mu oli e pfilo er-ali, isheghuo o de pfilo oke.

16 Eri mhi rue oli ghi eniye odukhokho eye, ea dobe roli ze.”

17 IJesu oo, “Ashi mhi beshi ri abo mu udu na e ya ramhi, ee egbo ni ea mhue irudunga ali iwali egbo, ele ingme mhi ke beshi ri abo mu udu na e ya ramhi? A rue oni omọ ghi mhe ana.”

18 Igho iJesu o mhese na oni ayemhe okphaghiye ogho, o te oli egbe fie ya lase, oni omọ o ze aghoaghọ.

19 Igho eniye odukhokho e bhale deba iJesu abi o ro kpe lolighuo le, e mhila li, ee oli. “Elo o fe ze khi anye ea dobe khu oni ayemhe okphaghiye ya lase?”

20 IJesu oo we, “Itobo khi irudunga oye e oo she lo. Mhi gweye e khi ini a mhue irudunga ni o she abi ukpamhi oara imositadi, a ya dobe gweye ute ona, ee oli, ‘Vu ana lasele je oobo.’ O ligho ne abi u ngme. Aa me emini oa ya ze e ke li.”

21 [Ama ode ni a te dobe khu ayemhe obe onana fie lase khi, ode iromhi isoso ali azumhi ipfipfi.]*

Ijesu o gbo gue ingme eghuli oyoli le shi eke

(iMak 9.30-32; iLuk 9.43b-45)

* 17:5 Li ze Igbae 22.2; iDeut 18.15; iwolo 2.7; Aza 42.1; iMat 3.17; 12.18; iMak 1.11; iLuk 3.22 † 17:5 Li ze 2 iPit 1.17-18 ‡ 17:10 Li ze iMala 4.5 § 17:12 Li ze iMat 11.14 * 17:21 Li ze iMat 21.21; iMak 11.23; 1 iKori 13.2

22 Abi eniye odukhokho eyoli e ro bhale iGalili, iJesu o o wẹ, “Egheghe o she ramhi ni a ro ya ri Omi Ogbona egbo de.

23 E ya gbe oli-a, ama elenuzi-ese a ya guise oli le bhale agbo.” Oni ungmehi o ri egbe pfo we-a.

E mhila iJesu oga oyi Owa ugamhi

24 Abi iJesu ali eniye odukhokho eyoli e ro nyene egbe jele iKapanomu, emionoga na Owa oyi Eshinegba e bhale deba iPita, e mhila li, “Oseseyeye o li fe ze oga oyi Owa oyi Eshinegba?”†

25 IPita oo we, “Ee.”

Abi iPita o ro lo elemhi owa le ya mhila iJesu, iJesu o kpe ngme. Oo, “ISamo, eghuo u fe sa khi enighie ena agbo ona e famhie mie oga? Emọ-ekẹ abi epfese?”

26 IPita oo, “Epfese.”

Ijesu o li, “O ti sho! Ogho o rokhase khi omo eke o a khi oni oo ze oga.”

27 “Ama ini awa khi lue na we, je oke ya pfi ugba oye pfilo. Afele ni u tode ya mu, khueghie oli unu-a, u ya me oli ukpaghọ unu rue. Rue oli ni u roli ya ze oni oga oyemhe ali oye.”

18

Oghuo o fune shi Eghiele oyi Eshinegba

(iMak 9.33-37; iLuk 9.46-48)

1 Egheghe agho, eni eniye odukhokho e bhale deba iJesu, e mhila li, “Oghuo o fe fune shi Eghiele oyi Eshinegba?”*

2 Igho iJesu o lu ukuku omo bhale migha we odalo.

3 Oo we, “Abi o li mhi li gue oli e ye e, khi, ini aa li mu pfi ni a li abi ikuku eniye, aa ya lo Eghiele oyi Eshinegba.†

4 Ogbon o ga fune shi Eghiele oyi Eshinegba khi, oni o ri egboli tiemhile abi ukuku omo onana.

5 “Onini o da ri irari eva oyemhe mie omo onana ne, mhemhe o mie.

6 Ama ini oghokhoghuo o yese enana ni e mie mhe suo pfido, ini a bie mu iko zu ogbon oghoghon uruli tsua pfilo elemhi oke oniemhi, o ti ne.

7 “O maa kholo mu egbo ni e yese egbo o lamhe. Ogbon o dobe ya na pfue imufe oyi olamhe. Ama o ma kholo egbo ni e ze khi a me eni imufe eghoghon egbe.

8 Ini obon oye, okekhi owe oye, o ze ni u lamhe, khi oli pfi-a. Irari khi o ti ne ini ogbon o khi okhomhi ya lo agbon na agboagbo, ni abon ali awe e gba pfo nali ya lo owa ere.‡

9 Ini o khia khi eloe oye o ze e lamhe, vuonyo li pfia. O ti ne u ri ukpeloe oghuo ya lo iloghie, ni alo e ro gba ne, pfi e ya lo ilimhi irierie.§

Okhe irokhokho oyi os-umha ni o wa
(iLuk 15.3-7)

† 17:24 Li ze Okiali 30.13; 38.26 * 18:1 Li ze iLuk 22.24 † 18:3 Li ze iMak 10.15; iLuk 18.17; 1 iPit 2.2 ‡ 18:8 Li ze iMat 5.30 § 18:9 Li ze iMat 5.29

10 “A khi zẹ ni a ri ẹloe gbe eni ẹa mu ẹloe enana, irari khi eri igeni eyewẹ na iloghie ẹ migha odalo oyi Itamhẹ ẹghẹghẹkpa.

11 [Eri mhemhẹ Omi Ọgbọ mhi bhale ya tsumhi eni e wa-a.]

12 “Sẹ a sa shi ọ? Ini ọgbọ ọ mhuẹ isumha egbhueshe ni ọghuo ọ, ọ rọ wa-a. Ọa khi eri ọ ya zẹ ọghuo ọa la egbhueshe eghọ obọ, ọ ya nono ọghuo ni ọ wa a eghọ?”

13 Ini ọ mẹ ọli, mhi gue ẹ yẹ ẹ khi egbe e ya mu ọli shi ọghuo ọghọ dọsẹ ọghuo ọa la egbhueshe enekpọle ni ẹa waa.

14 Ighọ Ita ẹ na iloghie ọa li nono eni ẹa mu ẹloe enana ni e wa-a.

Inyoghuo ẹ ni ọ pfiđo nẹ

15 “Ini inyoghuo ẹ ọ lue nẹ, lẹ deba li ka gueyẹ ọli emini ọ li. Ama zẹ ni o khi yeyẹ ali lolighuo kpe. Ini ọ ri esọ shi ẹ eke, u she gbo sheshe ọli shi ode.*

16 Ama ini ọa ri esọ shi ẹ eke, lu ọgbọ ọghuo abi ava elese, ẹghẹghẹ aghọ ni e khi ọtsẹle abi Ebe-no-pfuase ọ ngme.†

17 Ini ọa ri esọ shi ẹ ọ, lẹ ya gue eni ingme nya yẹ ena igbaa oyi eni e mie iJesu iKirisiti suọ. Ini ọa gbo da ri esọ shi igbaa oyi eni e mie iJesu iKirisiti suọ ọ ne, a ti kia nali. A rue ọli shi ọgbọ ni ọa miesuọ ali ọmionoga ọgbọ ọkhọlọ.

18 “Abi o li mhi li gue ọli ẹ yẹ ẹ khi emiemini aa da lama shi oni agbọ ona ne, aa ya li lama shi ọ na ẹ obini iloghie. Ali khi emiemini a da lama shi agbọ ona ne, a ya lama shi ọ na ẹ obini iloghie.‡

19 “Mhi gbo gueyẹ ẹ khi ini ẹẹ otuava a da lama shi emhikhoghuo agbọ ona ni a rọ sọ iromhi shi ọ ne, Itamhẹ ni ọ la iloghie ọ ya riẹle ọli na ẹ.

20 Irari khi asha ni ẹgbọ ava o khi aase e da lona kugbe irari eva oyemhẹ ne, mhi nu wẹ la aghọ.”

Okhẹ irọkhọkhọ ọni ọa ya gbe kua na ọgbọ

21 IPita ọ bhale deba iJesu, ọ mhila li, “Iti-ingmẹ inyoghuo-mhẹ ọ fẹ ya lue na mhẹ ramhi ni mhi rọ ya gbe kua nali? Iti ishilua?”

22 IJesu ọọ li, “Iiye, ọa khi iti ishilua tse, ama iti egbhuesẹ ali igbe asha ishilua.§*

23 “Irari khi eri Eghiele oyi Eshinegba o li abi oghie ọghuo ni ọọ eni ẹẹ ga eyọli e bhale ya rọkhasẹ luẹ abi e li gbe akanya.

24 Abi ọ rọ ghọ bino na wẹ abi e li gbe na li, a rue ọmọsẹ ọghuo ni ọ lo ọli ẹkpa idududu bhale.

25 Abi ọni ọmọsẹ ọa rọ dobe fali eni ikpaghọ, ọni oghie ọọ e mu ọli ali ughue ọli ali imi ọli ya de ni ọ rọ fali eni ota.

26 “Ọni ọọ ga ọghọ ọ de ya wugha odalo oyi ọni oghie, ọọ

* 18:15 Li zẹ iLuk 17.3 † 18:16 Li zẹ iDeut 19.15 ‡ 18:18 Li zẹ iMat 16.19; iJon 20.23 § 18:22 Li zẹ Igbae 4.24 * 18:22 Li zẹ iLuk 17.3-4

li, 'Kpekpẹ, rabomudu na mhe, mhi ya fali ẹ eni ikpagho nya.'

27 Igho oni oghie o ya mhue isomhelemhi na li, o gbe eni ota kua na li, o ze o li vu.

28 "Ama abi oni oo ga o ro fie lase, o me oni oo ga nabi loli ni o lo o li ikuku ikpagho. Igho, o khi awulu shi o li uruli, oo li, 'Fali mhe ota ni u lo mhe!'

29 "Onuzava oyoli ogho, o de ya wugha, oo lema li, oo li, 'Kpekpẹ rabomudu na mhe, mhi ya fali ẹ.'

30 "Ama o a lama na li. Oo a mu o li ya shi owa ighumha ya ramhi ni o ro ya fali eni ota.

31 Abi eni ee ga enekpole e ro me emini o li, elemhi ee bi we. E le ya gue eni ingme nya ye oni oghie ogho.

32 "Igho oni oghie o ghie ya lu oni oo ga ogho, oo li, 'Ye ye oni oo ga ona okholo ona, mhemhe mhi gbe ikpokpomhi ikpagho ni u lo mhe kua ne irari khi u lema mhe,

33 waa khi oni o kha li mhue isomhelemhi na onuzi-ava oye abi mhi mhue isomhelemhi ne?'

34 Igho elemhi e bi oni oghie, o mu o li ya shi owa ighumha ni a nali osue ya ramhi ni o ro ya fali eni ota ni o lo nya.

35 "Ina Itamhe na iloghie o li ya li ẹ ini aa rote ekelemhi udu gbekua na inyoghue ẹ."

19

Ipfa-ughue-a
(iMak 10.1-12)

1 Abi iJesu o ro ngme se, o te eke iGalili vu je eke iJudia ukiokie oke iJodani,

2 Ebubu egbo e ve deba li. O rewe la agho ze.

3 Egbo iFarisi eghuo e bhale ya mu o li fe ni e ba me asha mu ingme ma li obo. E mhila li, "Ushi oyawa o fe lama shi o omose o ri itobo emhikhoghueo khu ughue o li?"

4 IJesu o mhila we, "Aa ze abi Ebe-no-pfuase o ngme khi eri Eshinegba ni o ma egbo te igbaekele, o ma egbo omose ali okpotso?*

5 Eshinegba o gbolo e, 'Itobo ona omose o ya ze itali ali inyoli obo, o to ma ughue o li o, we we ava e mele ogbo oghuo-a.'

6 Egheghe agho ea ke khi ava ama oghuo. Itobo ona, emini Eshinegba o she to ma, ogbo khi vase o li-a."†

7 Eni egbo iFarisi e mhila iJesu, "El o ze khi Ushi oyi iMosisi o lama ogbo o nya ebe ipfa-ughue-a mholi ughue o li obo, o khu o li?"‡

8 IJesu oo we, "Itobo khi aa gbe udu o ze ni Ushi oyi iMosisi o ro lama li na e, ama o a kpe te igbaekele ligho.

9 Mhi gueye e khi onini o khu ughue o li ni o a ro khi itobo okia, ni o ro ya rue okpotso olese ne, o she kia okia."§

* 19:4 Li ze Igbae 1.27; 5.2 † 19:6 Li ze Igbae 2.24 ‡ 19:7 Li ze iDeut 24.1-4; iMat 5.31 § 19:9 Li ze iMat 5.32; 1 iKori 7.10,11

10 Eniye odukhokho eyi iJesu eḡ, ini o khia khi ina o bie khi iteva oḡose ali ughue ọli, o bie ti ne ọgbọ khi rue ọkpotoshi.

11 IJesu ọọ we, “Ọa khi ọgbokpa oni oseḡe ona o ọọ lu, se ni eni Eshineḡba ọ ri oni afu na e khi rue ọkpotoshi.

12 Irari khi emhi ebubu eḡ ze khi ebubu eḡbo ẹa ya rue ọkpotoshi, eghuo, itobọ khi ighọ Eshineḡba ọ ma we, eghuo, itobọ khi eḡbo e re we khi ighọ, elese e ri eḡbewe mele ọwali-a ni e me asha ga Eshineḡba eḡbegbo. Ọgbọ ni ọ doḡe ya ri eḡbe mie oni oseḡe, ọ ri eḡbe mie.”

IJesu ọ lema na eniye enikeke
(iMak 10.13-16; iLuk 18.15-17)

13 Eḡheḡhe aghọ, eḡbo eghuo e wolọ eniye enikeke bhale ghi iJesu ini ọ ri obọ nga we ukhomhi, ni ọ sọ iromhi na we. Ama eniye odukhokho eyọli ee khu we, e ti je ukhokho.

14 IJesu ọọ we “A ze ni ikuku eniye e bhale deba mḡe, a khi ke khu we irari khi wewe enana e mhọli agbo oyi Eshineḡba.”

15 Ọ ri obọ nga we ukhomhi se, ọ rote aghọ vu.

Ọzeo ni lolo pfue
(iMak 10.17-31; iLuk 18.18-30)

16 Ọzeo oghuo ọ bhale ya mhila iJesu, ọọ, “Oseḡe onete, elọ mhi fe ya li ni mhi rọ

ya mhọli agbo onabi oyi Eshineḡba?”

17 IJesu ọọ li, “Elọ o ze ni u rọ ọ lu mḡe onete? Eshineḡba luḡghuo kpe ọ leḡe ti. Ini u wa nono ni u mhọli agbo onabi oyọli, ri ishi eyọli gbe akanya.”

18 Ọ mhila iJesu, “Ishi eneghuo ọ?”*

IJesu ọọ li, “Khi gbe uḡbeli, khi kia okia, khi do ughiatọ, khi pfi ọtselḡ eḡbhue mu ọgbọ.

19 Mu ekpe na ite ali inye, gbo ze ni, u nono ingme oyi ọnuzava oye abi u li nono eḡbe e.”†

20 Oni ọzeo ọọ iJesu, “Te ekpe vu mhi te ri eni u ga ngme ena nya a gbe akanya, onoghuo o ke kpọ mḡe le?”

21 IJesu ọọ li, “Ini u wa nono ni u gba pfo, le ya ri itsua ni u mhọli nya de u kemhi eni ikpaghọ na eḡbo ni ẹa mhọli, ni u mhọli eḡfue shi obini iloghie. U tigbe bhale ke ya deba mḡe kia.”

22 Abi ọni ọzeo ọ rọ suọ ona, eḡbe e pfo li-a itobọ khi ọọ pfue gba.

23 IJesu ọọ eniye odukhokho eyọli, “Mhi gue ọli e ye e khi, o ma munu ni eḡbo ni e pfue e ze ni Eshineḡba ọ mḡeḡe na we.”

24 Mhi gbo gueye e khi, ni ọgbọ ni ọ pfue ọ rọ lo eghiele oyi Eshineḡba, o ya munu doḡe, ni ọgbọ ke dua ni lọli ri akphere rote ese asuge ya fe.”

25 Abi eniye odukhokho eyi iJesu e rọ suọ ona, abọ e

* 19:18 Li ze Okiali 20.13-16; iDeut 5.17-20 † 19:19 Li ze Okiali 20.12; iDeut 5.16; iLev 19.18

sha wẹ, e mhila li, “Oghuo ọ ke doḅẹ ya lo Eghiele oyi Ẹshinẹgba shọ?”

²⁶ Ijesu ọ bino wẹ, ọọ, “Ini a ri oyi ọgbọ ngme, ona o ya munu, ama obọ oyi Ẹshinẹgba, emhikpa o zẹ ọli ẹ riẹlẹ.”

²⁷ IPita ọ mhila iJesu, ọọ li, “Anye ni anye zẹ emhikpa obọ bhale deba ẹ ena, elọ anye ya mẹ ọ rue?”

²⁸ Ijesu ọọ wẹ, “Abi o li mhi li gue ọli ẹ yẹ ẹ khi ini Omi Ọgbọ ọ da shitọ ukpẹkhomhi ufumhi oyọli ẹghẹghẹ agbọ Onogbọ, ẹẹ ogbava ni a deba mḅẹ a ya nu mḅẹ shitọ ikpẹkhomhi igbẹva, a mḅẹḅẹ ẹ na ẹḅeli igbẹva eyi iZirẹni.‡

²⁹ Ọgbọkpa ni ọ da zẹ owa oyọli obọ, okekhi inyọghuo ọli, ni ọ zẹ itali ali inyọli obọ ali inyọghuo ọli ali imiọli ali ẹpfue eyọli obọ shi itobọ oyemḅẹ ne, ọ ya mḅẹ ẹpfue eghọghọ asha egbḅuḅshe, ọ gbo mḅẹ agbọ onabi oyi Ẹshinẹgba.

³⁰ Ama ẹgbọ eghuo ni e ralo e ya kpukhokho eni e kpe ukhokho, e ya ralo.”§

20

Okḅẹ irokhokho oyi eg-bikanya na elemhi ogba ipfonu

¹ “Eri Eghiele oyi Ẹshinẹgba o li abi ọmḅẹ ọghuo ni ọ fiẹ lase ya wolọ ẹgbọ ẹluzogbe je ogba ipfonu oyọli ya gbe akanya.

² Ọ lama khi lọli ya fali ọgbọgbọ ingmẹ ni a mie

ogbẹlẹ. Ọ rẹwẹ je ogba ẹera ipfonu oyọli ya gbe akanya.

³ “Elemhi agogo itili ẹluzogbe, ọ fiẹ lasele, ọ mẹ khi emḅẹ eghuo e migha elemhi oki ni ẹa mḅẹ oni ẹẹ gbe.

⁴ Ọọ wẹ, ‘A je ogba ẹera ipfonu oyemḅẹ ya gbe akanya khi mhi ya fali ẹ emini o ti.’

⁵ Ighọ e vu.

“Elemhi agogo igbẹva ẹlẹ ọguota ali agogo eḅẹ ẹlẹ ogbomhi, ọ gbo lighọ ya wolọ emḅẹ elese.

⁶ Agogo ishe o she ramhi, ọ gbo bhale ya ẹ emḅẹ elese ni ẹa li gbe okhọghuo. Ọ mhila wẹ, ọ wẹ, ‘Elọ o zẹ ni a rọ migha ana amo kpa pfuse ẹghẹghẹ-a, ni aa rọ gbe okhọghuo?’

⁷ “Ẹ ọli, ‘Irari khi ọgbọkhọghuo ọa lu anye shi akanya lọ.’

“Ọọ wẹ, ‘A je ogba ipfonu oyemḅẹ ya gbe akanya.’

⁸ “Ọgbomhi o ke mu eḅẹ, ọni ọ mḅẹ ogba ọghọ, ọ lu ọni ọ ri ẹgbọ ẹ gbe akanya na li, ọọ, ‘Lu eni e gbe akanya ni u fali ọgbọgbọ ota. Ọ kpẹ rọte ẹgbọ ni e kpẹ ukhokho bhale fali ota ya ramhi eni e kpẹ bhale.*

⁹ “Ọ fali ẹgbọ ni e te agogo ishe ẹlogbomhi gba akanya le ukpaghuo.

¹⁰ Abi eni e te ododẹ gba akanya le e rọ bhale ya mie ifata, e dabi khi ikpaghọ eyẹwẹ e ya bu doḅẹ eni e kpe ukhokho bhale oni akanya. Ama a ga fali wẹ abizize.

‡ 19:28 Li zẹ iMat 25.31; iLuk 22.30 § 19:30 Li zẹ iMat 20.16; iLuk 13.30 * 20:8 Li zẹ iLev 19.13; iDeut 24.15

11 E mie ifata se, ee wọlọ ọni ọ mhue ishemhi.

12 E ọli, 'Emose ena ni a kpukhokho mie, iwakati oghuo e lese gbe akanya, ama rote ele uzogbe fiefie anye te ri ukhomhi shi ovo ya ramhi ogbomhi. Ama u ya fali anye abizize!'

13 "Omhue-ishiemhi ọ ro otuoghuo elemhi we, 'Omue, mhi aa liele. Oa khi ukpaghwo-ghuo a lama na mhe shi akanya ogbele?'

14 A mo ikpaghwo eye e ni a ke je apfe. Onoghwo o de e shi ọ ini mhi fali omose ni mhi kpukhokho mie abi mhi fali e.

15 Abi khi mhia dobe ya li ikpaghwo eyemhe abi o ghole mhe? Eri a ke kpe ofuma irari khi mhi da khi ogbo ni ọ somhopfa?'

16 "Ama egbo eghuo ni e ralo e ya kpukhokho eni e kpe ukhokho e ya ralo."†

Ijesu ọ gbo gue ingme eghuli oyoli le shi eke

(iMak 10.32-34; iLuk 18.31-34)

17 Abi ijesu ọ ro ọ nga iJerusalemu, ọ lu eniye odukhokho eyoli je asheghuo ya gueye, ọọ we.

18 "IJerusalemu ni awa je ena, a ya la oobo ri Omi Ogbo na ighie eyi ekpodalougamhi ali esese Ishi eyi iMosisi de, agho e la ya pfa ezọ igbe-a mu ọli.

19 E tigbe rue ọli na egbo iJeta, e roli li egia, e gbe ọli ite,

e ta li ma apfida, ama elenuziese, a guise ọli le bhale agbo."

Emini ughue iZebedi ọọ Ijesu ọ riele na lue

(iMak 10.35-45)

20 Igho ughue iZebedi ọ rue imi ọli ava bhale deba ijesu, ọ wugha li odalo, ọọ li ọ kpekpe ọ somhi lue ofpa.

21 Ijesu ọ mhila li, "Elo wa nono."

Ọọ li, "Lama na mhe khi imimhe aava ena, khi oghuo ọ kha shito e obo ita, onokpole ọ shito e ogobo eghiele oye."

22 Ijesu ọọ we, "Aa lese emini a mhila. A ya dobe da uko osoli ni mhi ya da?"

E ọli, "Anye ya dobe."

23 Ijesu ọọ, "A rote uko ni mhi te da ya da, ama, ọa khi mhemhe mhi ya ze oni ọ ya shito mhe obo ita ali ogobo. Eni Ita ọ riele we shi na e mholi we."

24 Abi eniye odukhokho ogbe enekpole e ro suo, e pfaa na ogbo ali inyoghwo egho.

25 Igho ijesu ọ lu we tigbili, ọọ we, "A lese khi ighie eyi egbo iJeta eri ee jili egbo eyewe. Eni e kpeda e ri omhese ri itoto e sha we ma.

26 Ama, ọa khi igho iteva oye e. Oni ọ da nono ni lolu fu ne, ọ khi oni ọọ ga enekpole.‡

27 Ini ongege ọọ nono ni lolu khi onodode, ọ mele oni ọọ ga oyi enekpole a.§

28 Ezeze abi Omi Ogbo, ọa li bhale ni a ke ga li, ama ọ bhale ni ọ ro ga egbo ali ni ọ

† 20:16 Li ze iMat 19.30; iMak 10.31; iLuk 13.30 ‡ 20:26 Li ze iLuk 22.25-26

§ 20:27 Li ze iMat 23.11; iMak 9.35; iLuk 22.26

gbo ri agbọ oyọli mie ebubu pfuese.”

Ijesu ọ ri ezalo aava ze
(iMak 10.46-52; iLuk 18.35-43)

²⁹ Ijesu ali eniyẹ odukhokho eyọli e rọte iJeriko vu, ebubu ẹgbọ e wẹ deba li.

³⁰ Emọse ezalo aava e shito epfe-ode. Abi e suọ khi ijesu ọ rọte aghọ dọse. E tsese, e lie. “Ọnọmhuẹ, Omi iDefidi, le elemhi anye.”

³¹ Oni ebubu ẹgbọ e dese wẹ, e khukhu unu, ama e kiele tsese leghe, e lie, “Ọnọmhuẹ, Omi iDefidi kpekpẹ le elemhi anye.”

³² Ighọ ijesu ọ migha, ọ lu wẹ, ọọ wẹ, “Elo a nono ni mhi riẹle na ẹ?”

³³ Eẹ ọli. “Ọnọmhuẹ, kpekpẹ anye ẹ nono ni u khueghie anye alo-a.”

³⁴ Ijesu ọ mhue ilelemhi na wẹ, ọ ri obọ ti wẹ alo, eni alo e khueghie-a, e deba li.

21

Egbọ e ri ufumhi na ijesu abi ọ rọ lo elemhi iJerusalemu
(iMak 11.1-11; iLuk 19.28-40; iJon 12.12-19)

¹ Abi ijesu ali eniyẹ odukhokho eyọli e li ti i mama iJerusalemu, e bhale ikuku ẹoli na lui iBetifagi ni o la Ute ẹera Olivu. Ijesu ọ la aghọ ghie eniyẹ odukhokho eyọli aava je ẹoli ni o la odalo.

² Oọ wẹ, “A je ẹoli ni a fe odalo oyeẹ ena, khi a ya me akphere ali omioli. A taghie we-a, a mu we ghi mhe ana.

³ Ini ogbokhoghuo ọ mhila ẹ emhikhoghuo, a gueye ọli khi Onomhuẹ ọ ya rewe riẹle emhi, ọ gbo ya nyene we bhale lena.”

⁴ Eri a me enana ni a ro bhale ya ẹ khi ungmehi ni emekeguele e ngme, ni e bhale ya tse. Ni oo

⁵ “A gueye edeli iZayo,*

‘A bino khi oghie oye ẹ oo bhale deba ẹ.

Ọ mholi ikuegbe-a, ọ nga ozele akphere, ikhi Omi akphere.’ ”

⁶ Ighọ eniyẹ odukhokho eyi ijesu e ye abi ọ ghie we.

⁷ Ighọ e rue oni akphere ali omi ọli bhale, e banọ ide eyewe egbe nga li egbe, ijesu ọ nga li shito.

⁸ Ebubu ẹgbọ e gueghie itsua eyewe naghie-a shi ode, eghuo e kholo eyamhi naghie-a shi ode.

⁹ Eni ẹgbọ ni e ralo ali eni e kpe ukhokho e tsese, e kuẹghie ọli, e lie,

“Tsumhi anye, Tsumhi anye, Omi iDefidi!”

“Ikhivose khi oni ọ ri eva oyi Onomhuẹ bhale.”

Ikuẹghie khi oyi Eshinegba.

“Tsumhi anye.”†

¹⁰ Abi ijesu ọ ro lo elemhi iJerusalemu, oni edeli nya o wushe-a, ẹgbọ e mhila, e lie, “Oghuo oni omose onana ọ fe khi?”

¹¹ Eni ẹgbọ ni e nu ọli kia e gueye we, ee “Ona khi ijesu oni emekeguele onge iNazareti na eke iGalili, ni a shobo na

* 21:5 Li ze iZaka 9.9 † 21:9 Li ze Iwolo 118.25,26

awa khi ọọ bhale, ikhi ọni awa migha khe.”‡

Ijesu ọ lo elemhi Owa Oyi Eshinegba

(iMak 11.15-19; iLuk 19.45-48; iJon 2.13-22)

12 Ijesu ọ lo elemhi Owa Oyi Eshinegba. Ọ khu ẹgbọ ni e la elemhi ọli ẹ du oki kua. Ọ ghino wẹ abọ itebu ni e la ngmomhi ikpaghọ kua, ali ibẹchi oyi eni e ri inekhukhu u ẹ dẹ.

13 Ọọ wẹ “A she kẹkẹ ọli shi Ebe-no-pfuase, ‘Owa oyemhẹ, owa ni a la lema o khi,’ ama a she rọli mele owa oyi ighiatọ-a.”§

14 Ezalo ali eni e guogho awẹ-a e bhale deba li obini Owa Oyi Eshinegba, Ọ rẹwẹ ze nya.

15 Abi ighie eyi ekpodalo-ugamhi ali esesẹ Ishi eyi iMosisi e rọ mẹ khi ijesu ọọ gbe ikanya ọnyaloa ọdọda, elemhi Owa oyi Eshinegba, ali khi eniyẹ e la akaghọ tsesẹ leghe kuẹghie ọli, e liẹ, “Ikuẹghie o khi oyi Omi iDefidi,” elemhi e bi wẹ.

16 Ighọ e mhila ijesu, ẹ ọli “Wa a suọ abi eniyẹ ẹẹ ngme ẹ?”

Ijesu ọọ, “Mhi suọ.” Ọ mhila wẹ, “Aa kpẹ suọ abi Ebe-no-pfuase o ngme ni ọ.

“‘U she ri eniyẹ ali emofẹ kuẹghie ikuẹghie ni o gba pfo’ ”*

17 Ijesu ọ te aghọ vu je iBetani. Ọ gbhẹ aghọ ni ogbe o gbe.

Ijesu ọ ku itse na okhua-eni (iMak 11.12-14,20-24)

18 Eḷẹ uzogbe abi ọ ke rọ nyenẹ egbe ukhokho je iJerusalemu, okiamhi o gbe ọli.

19 Ighọ ọ mẹ okhua-eni epfẹ oḍẹ, ọ lẹ ya bino ọli, ama ọa mẹ udumhi okhoghuo ukhomhi ọ, sẹ ni ebebe. Ighọ ọọ oni ọara oghọ “Wa gbo ya mọ udumhi ghue!” Aghọghọ oni ọara o ku ebe-a.

20 Abi eni eniyẹ odukhokho eyọli e rọ mẹ ọli, abọ e sha wẹ. E mhila li, ẹẹ. “Sẹ o li kia khi oni okhua o rọ ghọ nyanya ku ebe-a?”

21 Ijesu ọọ wẹ, “Mhi gueyẹ ẹ khi, ini a mhue irudunga ni aa rọ mhue akhokhomhẹ, a ya doḅẹ li emini mhi li oni okhua ona. Ọa khi onana tse, a ya liẹ oni ute ona, ‘Vu ya de pfilo okẹ oniemi,’ oni ute o suọ na ẹ.”†

22 Irari khi ini a mhue irudunga, emiemi a sọ iromhi mhila a ya mhọli ọli.”

A mhila ijesu obini ọ te mhọli afu

(iMak 11.27-33; iLuk 20.1-8)

23 Ijesu ọ lo elemhi apfẹ oyi Owa oyi Eshinegba le, ighie eyi ekpodalo-ugamhi ali eni egbhali e mhila li, “Afu eyi ọghuo u rọ gbe ikanya enana? Ọghuo ọ ri afu ne?”

24 Ijesu ọọ wẹ, “Mhemhẹ mhi ya li mhila ẹ ogbọ oghuo, ini a da gbaghie ọlia ne, mhi

‡ 21:11 Li zẹ iJon 6.14; 7.40; Ika 3.22; iMak 6.15; iLuk 13.33 § 21:13 Li zẹ Aza

56.7; iJere 7.11 * 21:16 Li zẹ Iwolo 8.2

† 21:21 Li zẹ iMat 17.20; 1 iKori 13.2

ya gueye ẹ ọni ọ ri afu ona na mhe.

²⁵ Mhiẹ i, ibatazi ni iJoni ọọ batazi na ẹgbọ, ọghuo ọ ri afu na li ọ ke batazi ẹgbọ? Ẹgbọ e ri ọli na li abi khi Ẹshinẹgba lo?”

E nu egbewẹ khako, e lie, “Ini awa ẹ khi ‘Obọ oyi Ẹshinẹgba o te bhale,’ ọ ya mhila awa, ‘Elo o zẹ ni aa rọ mie ọli suọ?’

²⁶ Ama ini awa ẹ khi, ‘Obọ oyi ọgbọ o te bhale,’ ulishi apfowa ọọ mu awa, irari khi ọgbokpa ọ leşẹ khi ọmekeguele iJoni ọ khi.”

²⁷ Itobọ ighọ e ke iJesu “Anye aa leşẹ.” IJesu ọọ wẹ “Mhemhe mhi aa li ya gueye ẹ obini mhi te me afu.”

Okhe irọkhokho oyi eniye aava

²⁸ “Şẹ a me ona shi? Ọmọşe ọghuo ọ mhue eniye emọşe aava. Ọ bhale deba ọni ọgbhali, ọọ li, ‘Ọmọ ke le ọgba ipfonu amo ni u ya gbe akanya.’

²⁹ “Ọọ itali, ‘Mhi a ya ye.’ Ama o li deşe, ọ mu udu pfi, ọọ le oni ọgba ipfonu.

³⁰ “Ọni itawẹ ọ gbo le deba ọnikeke, ọ gbo ngme ọli abi ọ kpe ngme ọni ọgbhali. Ọni ikeke ọghọ ọ lama khi loyi ya ye, ama ọa tigbe ye.

³¹ “Ọnọghuo eniye aava ena ọ riele emini itawẹ ọ nono?”

Ẹẹ iJesu, “Ọni ọgbhali.”

IJesu ọọ wẹ, “Abi o li mhi li gue ọli ẹ ye ẹ khi emionoga ali idegbe e she pfi ẹ shi ana kpe lo Eghiele oyi Ẹshinẹgba.

³² Irari khi abi iJoni Ọni ọọ batazi ẹgbọ ọọ bhale ya seşe ẹ ode ni a ya rote, ni aa lama mie ọli suọ. Ama emionoga ali idegbe e mie ọli suọ, e mu pfi. Abi a tseku ri ẹloe oyeye me, aa kie mu udu pfi ni a miesuo.‡

Okhe irọkhokho oyi eni a mie shi ọgba ipfonu

(iMak 12.1-12; iLuk 20.9-19)

³³ “A suọ okhe irọkhokho olese. Ọmhue-apfe ọghuo ọ ya laọ ni ọ gua ọgba ipfonu shi ukhokho apfe oyoli. Ọ khi ọgba gase ọli, ọ riele ashini a la nye onyo shi ọ, Ọ gbo to owa ni o yagha ni a la khe-ekhe shi ọ. Ọ roli na ẹgbọ e ke ri ẹloe khu ọli, ọ vu ẹli oboese.‡

³⁴ Abi ẹghẹghẹ ikhişe o ro ramhi, ọ ghie eni ẹẹ ga eyoli ghi eni ẹgbọ, e ka mie we eni e khi eyelue ghi lue.

³⁵ “Eni ẹgbọ ni ọ ro shi oni ọgba ọghọ, e mu eni eni ẹẹ ga eyoli, e gbe ọghuo, e gbe ọghuo-a, e tononokpole eche.

³⁶ Ighọ ọni ọmọşe ọ gbo ghie eni ẹẹ ga elese ghi we ni e ke bu doşe eni ọ kpe ghie. Ighọ eni e la oni ọgba e li we abi e kpe li eghọ.

³⁷ Ikpukhokho ọ, ọ ghie omi ọli ghi we. Ọọ, ‘E ya mu ekpe na li.’

³⁸ “Ama abi eni e la oni ọgba e ro me khi ọni omi ọli ọọ bhale, e lu egbewẹ ochi, ẹẹ egbe, ‘Awa gbe ọni omi ọli-a, ni awa le ugu oyoli.’

39 Igho e mu ọli e rue ọli je olase oni ogba, e gbe ọli-a.

40 “Irarigho, ini oni o mhue oni ogba ipfonu ogho o fe bhale, se ee a sa khi o ya li eni egbo egho?”

41 Ee iJesu, “Eri o ya gbolo eni egbo okholo egho-a, o ri oni ogba na egbo elese, eni e ya ke ri eni e khi eyoli ghi ọli.”

42 IJesu oo we, “Ee a kpe ze ọli abi a li keke ọli shi Ebe-nopfuase khi:

“ ‘Eche ni itsona e kie pfa,
loli o ke ya mele egbegbi
eche
ni o ke mu eloe ne nya-a.

Onomhue o ligho riefe ona,

oo ti anye eloe gba ’ ”*

43 “Irarigho, igho a li ya mie e Eghiele oyi Eshinegba obo, a rue ọli na egbo ni e riefe emini Eshinegba oo a ke riefe.

44 Ogbọ ni o da ya de nga oni eche ne, o ya guoghọ-a, ama ogbo ni oni eche o da de nga egbe ne o ya mhele-a abi ifufu.”

45 Abi ighie eyi ekpodalougamhi ali egbo iFarisi e ro suo oni okhe irokhokho ona, e lese khi wewe iJesu o nu ngme.

46 E nono ode ni wewe e te mu ọli ya khukhu, ama ulishi o mu we irari khi egbo e lese khi omekeguele iJesu o khi.

22

*Okhe irokhokho oyi ukue ni
a la rue omueshi*

(iLuk 14.15-24)

1 IJesu o gbo ri okhe irokhokho ona nu we ngme, oo,

2 Eri Eghiele oyi Eshinegba o li abi oghie oghuo ni o gbhe ukue na omioli ni oo rue omueshi.

3 O ghie eni ee ga eyoli e ka gueye egbo ni o gbhe oni ukue na e bhale, ama ea lama ye.

4 “Igho o gbo ghie eni ee ga elese, oo we, ‘A ka gueye eni a lu shi oni ukue khi mhi she nye ekhe shi eke. Mhi she gbolo ena-a, ena ni e mhue ila, shi elamhako eyemhe, a she mu egbe emhikpa shi eke. A bhale oni ukue ikhuese omueshi.’

5 “Ama eni egbo ea pfi eso shi, e vu asha. Oghuo o vu ishemhi, olese o vu oki.

6 Eghuo o ni a lu shi oni ukue e mu eni eni ee ga egho, e gbe we, e gbolo we-a.

7 Igho elemhi e bi oni oghie, o ghie ekholi-okhue eyoli, e ka gbolo eni egbo ni e gbolo eni ee ga eyoli-a, e tose we apfe-a.

8 “Igho oni oghie o luno eni eni ee ga eyoli, oo we, ‘A she mu egbe ukue oyemhe shi eke se, ama egbo ni mhi lu shi o, ea khi eni a kha lu shi o.

9 Mena, a ke je ifu eoli ikpe ni ebubu egbo e legba, ogbokpa ni a da me ne, a lu ọli bhale oni ukue.’

10 Igho eni eni ee ga e lo ifu eoli e luno egbo ni e me kpa tigbili, ghe egbo enete ali ikhi-akhiamhi egbo. Oni ashini a gbhe oni ukue shi o vo egbo.

11 “Ama abi oni oghie o ro bhale ya bino eni egbo, o me khi omose oghuo o la agho ni oa so itsua ukue ni a ro khuese omueshi ye ughue.

* 21:42 Li ze Iwolo 118.22-23

12 Oni oghie ọ mhila li, ‘Omue se u li lo ana le ni u wa ro so itsua oyi ukue ni a ro khuese omueshi,’ Oni omose ọa dobe soli ọ.

13 “Igho oni oghie ọ gueye eni eni e ga egho, ‘A mu ọli ge abo ali awe, a tsua li pfi je olase alo ebili ni a la vie, ni a la le ako ako.’* ”

14 “Ogbokpa a lu ama ikuku we ni e mie oni ulumhi, a ze.”

A mhila iJesu ini a ke ze oga na iSiza
(iMak 12.13-17; iLuk 20.20-26)

15 Igho egbọ iFarisi e fiye ya gba abi e li ya ri omhila me asha mu iJesu.

16 E ghie eniye odukhokho eyewe ali eniye odukhokho eyi Erọdu deba iJesu, e ọli, “Osese, anye lese khi ogbọ igesikia u khi, u gbolo e sese igesikia oyi oghuemhe oyi Eshinegba. Wa a ya na ulishi oyi ogbokhoghuo, itobọ khi egbolie ọa la onini ogbọ ọ khi.

17 Gueye anye, se o fe li udu oye? Abi ushi oyawa o ngme, o fe ti ni awa ze oga na oghie iSiza abi khi ọa ti?”

18 IJesu ọ lese ugbamhi obe ni e gba, ọọ we, “Ee eri ugamhi ku alo, elo o ze ni a ro nono ni a di mhe mu?”

19 A rue ukpaghua ni a ro ze oga khase mhe ghue!” Igho e rue ukpaghua bhale ghi ọli.

20 Ọ mhila we “Alo eyi oghua na? Eva oyi oghua na?”

21 E ọli “Eyi iSiza.”

Igho iJesu ọọ we, “Irarigho, a ri oni o khi oyi iSiza na

iSiza a ri oyi Eshinegba na Eshinegba.”

22 Abi e ro suo ona, abo e sha we, e ze ọli obo, e vu.

Ingme ughue iruerue ali irote eghuli guale

(iMak 12.18-27; iLuk 20.27-40)

23 Oni ogbele elegeho, egbọ iSadusi ni e khi iteghuli guale ọa la ọ, e bhale deba iJesu ya mhila li ogbọ.†

24 E ọli “Osese, iMosisi ọ gueye anye khi, ini omose ọ ghu-a ni ọa ro bia eniye, inyoghua ọli ọ rue oni osamhi olimhi ni ọ bia eniye na li na inyoghua ọli ni ọ ghu-a ogho.‡

25 Mena inyoghua etuoshilua e ke nu anye la ana. Oni ogbhali ọ rue okpotso ọ ghua, abi ọa ro bia eniye, ọ ze oni okpotso obo na inyoghua.

26 Igho eghuli o li gbe inyoghua ọli onuzava ali onuzase ya ramhi onuzi-oshilua ea ga bia omọ okhoghuo na oni okpotso.

27 Ikpukhokho ọ oni okpotso ọ ghu a.

28 Mena, ogbele iteghuli guale, ughue oghua ọ fe ya khi elemhi ewe nya, aborokhia khi wewe oshilua e ga rue ọli shi?”

29 IJesu ọọ we, “Eri a da ode! Itobọ khi aa lese ungmehi oyi Eshinegba ali itoto eyoli lo.

30 Irari khi ini egbọ e rote eghuli guale, ea ke ya rue ikpotso, we khi ikpotso e ke ya ke ngeli na emose, eri e ke ya li abi igeni na iloghie.

* 22:13 Li ze iMat 8.12; 25.30; iLuk 13.28 iDeut 25.5

† 22:23 Li ze Ika 23.8 ‡ 22:24 Li ze

31 Ama oyi ingme ite-eghuli-guale oyi ẹgbọ ni e ghua-a ne, eri aa suọ abi Ẹshinẹgba ọ ngme e.

32 Ọ khi, ‘Mhẹmhẹ mhi khi Ẹshinẹgba oyi Aburaamu ali Ẹshinẹgba oyi Aziki, ali Ẹshinẹgba oyi iGiekọpu.’ Ẹshinẹgba oyi ẹgbọ ni e la agbọ ọ khi, ọa khi Ẹshinẹgba oyi ẹgbọ ni e ghua.”§

33 Abi eni ebubu ẹgbọ e rọ suọ ona, abọ e sha wẹ shi osesẹ ni ọ sesẹ.

Ushi ni o ga funẹ nya
(iMak 12.28-34; iLuk 10.25-28)

34 Abi ẹgbọ iFarisi e rọ suọ khi iJesu ọ pfi ẹgbọ iSadusi okpẹ unu, e le gba.

35 Ọghuo ọ elemhi wẹ ni ọ khi osesẹ ushi ọ roshẹka ni lọli dobe ri ushi mu iJesu. Ọ mhila li ogbọ.

36 Ọọ li, “Osesẹ, Ushi onoghuo o ga funẹ nya elemhi Ishi eyi iMosisi?”

37 IJesu ọọ li, “‘Ri udu oye nya ali ayemhẹ oye nya ali usamhi udu oye nya nono ingme oyi Ọnọmhuẹ Ẹshinẹgba oye.’* ”

38 Onana o khi ushi onodode ali oni o ga fu ne nya.

39 Eri onuzi-eva o gbo li abi lọli, ni ọọ li, ‘Nono ingme oyi ọgbọ ọlese abi u li nono ingme egbe e.’†

40 Ishi eva ena elemhi Ishi eyi iMosisi ali emekeguele nya, e te ze.”‡

Omi ọghuo Ọmiepfuese ọ khi
(iMak 12.35-37; iLuk 20.41-44)

41 Abi ẹgbọ iFarisi e kie li la aghọ eghọ, iJesu ọ mhila wẹ.

42 “Sẹ a khọkhọ shi Ọmiepfuese ọ? Omi ọghuo ọ fe khi?”

E ọli “Omi iDefidi.”

43 IJesu ọọ wẹ, “Elo o ke ze khi iDefidi ọ rọte elemhi ayemhẹ lu ọli, ‘Ọnọmhuẹ’? Irari khi iDefidi ọ liẹ,

44 “‘Ọnọmhuẹ gueye Ọnọmhuẹ ọyemhẹ.

Shitọ mhẹ ukiẹkiẹ obita ramhi ni mhi rọ ya ri ebe ẹ shi ẹ ufu ẹkowẹ.”§

45 “Ini iDefidi ọ lu ọli ‘Ọnọmhuẹ,’ sẹ ọni Ọmiepfuese ọ ke gbolo ẹ khi omiomi iDefidi?”

46 Ọngewẹ ọa dobe gbaghie oni ogbọ-a. Rote ẹleghọ vu ọgbọ okhọghuo ọa ke gbo gbudu mhila li ogbọ okhọghuo.

23

A mhue ẹgbhẹ shi esesẹ Ishi eyi iMosisi ali iFarisi egbe
(iMak 12.38-39; iLuk 11.43,46; 20.45-46)

1 Ighọ iJesu ọ nu ẹgbọ ni e ri esọ shi ọli eke ali eniye odukhokho eyọli i ngme.

2 Ọọ wẹ, “Esesẹ Ishi eyi iMosisi ali ẹgbọ iFarisi a ri afu na ni e ke guele abi Ushi oyi iMosisi o ngme.

3 Irarighọ, a mema ya suọ esọ na wẹ, a li abi e gueye ẹ a ke li, ama a khi khọnya

§ 22:32 Li ze Okiali 3.6 * 22:37 Li ze iDeut 6.5 † 22:39 Li ze iLev 19.18 ‡ 22:40 Li ze iLuk 10.25-28 § 22:44 Li ze Iwolo 110.1; Ika 2.34-35; Iburu 1.13; 10.13

wę ngeli ingeli enabi eyewę. Irari khi wewę ęa ri emini ęę sęsę ęgbō gbe akanya.

⁴ Eri ę gę itsua ni e khō na ęgbō tsua. Ama wewę oyewę ęa lama ri umiesobō da wę ọ kpaghie wę tsua eni itsua.

⁵ “Emhikpa e ri abamemhę ę rięę. E ri ọgbenę ni a fia ọtsuọtsuọ shi mu alukpo ali abō. E pfi emini a rōte ebe-nopfuasę kękę emhi shi lo eni ọtsuọtsuọ. E gbo fia emhi na yayagha na dōdōdō shi esō iwulu ni ęę sō.*

⁶ Ashini o mhue ekpę ukue ali ikpękhomhi ni e funę ọọ ghōle wę ini e bhale owa ugamhi.

⁷ E ma nono ni a ke tse wę otse ekpę atuoki, ali ni a gbo ke lu wę, ‘Osesę.’

⁸ “Ama ęę oyę ę a khi lama ni ęgbō e lu ę ‘Osesę,’ irari khi Ọga ọghuo ọ ga mhōli ę nya, a gbo khi inyọghuo.

⁹ A khi lu ọgbōkhōghuo agbō ona ‘Ita,’ irari khi Ita ọghuo kpe a mhue, iloghie ọ la.

¹⁰ Wę khi a zę ni ọgbō ọ lu ę ‘Osesę,’ irari khi Ọsesę ọghuo kpe a mhue ni ọ khi iKirisiti.

¹¹ Ọni ọ ga funę elemhi ę, ọ mema mele ọni ọọ ga oyęę a.†

¹² Ọnini ọ da ya ti egbōli nga ne, a ya ti ọli tiemhile. Ama ọnini ọ da ti egbōli tiemhile ne, a ya ti ọli nga.‡

¹³ “O ma khōlō ę egbe, ęę esęsę Ishi eyi iMosisi ali ęgbō iFarisi erugamhi-ku-alo, ni e pfi okpę ode iloghie zuse ęgbō shi olase. Ęę oyęę na, aa lama

lo elemhi ọ wękhi eri a zę ni eni ę nono ni wewę e lo, ni e mę asha le.

¹⁴ [O ma khōlō ę egbe, ęę esęsę Ishi eyi iMosisi ali ęgbō iFarisi! Ęę eri-ugamhi ku alo! Eri a li esamhi olimhi le, ni a ri abamemhę a sọ iromhi ni o nuata. Itobō ighō a ya na ę osoli egbegbō.]

¹⁵ “O ma khōlō ę egbe, ęę esęsę Ishi eyi iMosisi ali ęgbō iFarisi erugamhi-ku-alo! A ga rōshęka kia ekę ali ukhomhi okę ye obini odonue ya nono ọgbō mu pfi lama shi osęsę oyęę. O kha da tse na ę se, osoli ni ọni ọgbō ọghō ọ ke ya mę ilimhi irierię, o ke fu dōsę oni ęę a ya mę agbhagh-hamhi eva.

¹⁶ “O ma khōlō ę egbe irari khi ezalo a khi ni a sęsę ęgbō. Ęę ni a sęsę khi, ‘Ini ọgbō ọ romhi Owa Oyi Ęshinegba ọa mhue abi o ngme, ama ini ọ romhi igolu ni o la ukhomhi oni Owa Oyi Ęshinegba, oni ishe o ya mu ọli.’

¹⁷ Ęę eyęghe, ezalo, onoghuo o fe funę? Igotu abi Owa oyi Ęshinegba ni o ri oni igolu rō khi oni o pfuasę?

¹⁸ A gbolo ę sęsę ęgbō khi ini ọgbō ọ romhi atęte khi ọa mhue abi o ngme, ama ọ khada romhi emini a rō luasę oni atęte, oni ishe o ya mu ọli.

¹⁹ Ęę ezalo, onoghuo o fe funę? Emini a rō luasę obo ni o la ukhomhi oni atęte abi oni atęte ni o ri oni iluasobo khi oni o pfuasę?

* **23:5** Li zę iMat 6.1; iNōba 15.38; iDęut 6.8 † **23:11** Li zę iMat 20.26-27; iMak 9.35; 10.43-44; iLuk 22.26 ‡ **23:12** Li zę iLuk 14.11; 18.14

20 Itobọ ighọ, ini ọgbọ ọ da romhi atẹtẹ ne, oni atẹtẹ ali emini o la ukhomhi ọli nya ọ romhi eghọ.

21 Ini ọgbọ ọ romhi Owa Oyi Ẹshinẹgba, oni Owa Oyi Ẹshinẹgba ali Ẹshinẹgba ni ọ la ọ ọ romhi eghọ.

22 Ini ọgbọ ọ romhi iloghie, ukpẹkhomhi oyi Ẹshinẹgba ali oni ọ shitọ ọ ọ romhi eghọ. §

23 “O ma a khọlọ ẹ egbe, ẹ ẹ esesẹ Ishi eyi iMosisi ali ẹgbọ iFarisi. Ẹ ẹ erugamhi-ku-alo. Aa zẹ aze-oghuo-igbe oyi ebe akhọkhọ ali okphasa, ama a ri ẹloe ẹ gbe emini e mu ẹloe shi elemhi ishi, nabi, umha gbe azeba ali isomhelemhi ali igbe akanya te ode igesikia. Enana khi egbegbi emini a kha riẹlẹ, aa kha pfi enana shi eke ni aa riẹlẹ wẹ.*

24 Ẹ ẹ ezalo ni a ri ẹgbọ ọ kia, a pfiolo akia onyọ-a, ama a to akphẹrẹ luẹ.

25 “O ma a khọlọ ẹ egbe, ẹ ẹ esesẹ Ishi eyi iMosisi ali ẹgbọ iFarisi, erugamhi-ku-alo. A kpe ukhokho iko ali itasa-a, ama emini a ri emhi itoegbe ali ufa mie e vọ elemhi wẹ.

26 Ẹgbọ iFarisi ezalo! A kpe ke kpe elemhi uko ali utasa-a ne, ẹghẹghẹ aghọ ikhokho wẹ e li pfuase.

27 “O ma a khọlọ ẹ egbe, esesẹ Ishi eyi iMosisi ali ẹgbọ iFarisi, erugamhi-ku-alo. Eri a li abi uji ni a ri ẹtseli opfopfo gbolo-a, ni o te odatọ ọli ti ẹloe, ama elemhi wẹ, e vọ igua ẹgbọ ni e ghu-a ni e ke-a. †

28 Ighọ a lili ẹ li, eri a rọte odatọ idiegbe ga li abi egbegbi ẹgbọ, ama ọkhọlọ ali irugamhi ku alo, o vọ ẹ elemhi.

Ijesu ọ gue anasemhe oyewe le shi eke

(iLuk 11.47-51)

29 “O ma a khọlọ ẹ egbe ẹ ẹ esesẹ Ishi eyi iMosisi ali ẹgbọ iFarisi, erugamhi-ku-alo! A ga tọ iji na emekeguele a riẹlẹ iji eyi eni e guẹ ngeli somhotse.

30 A gbolo ọ liẹ, ‘Ini anye la agbọ ẹghẹghẹ oyi itita anye lọ, anye a kha nu wẹ mhọli obọ shi emekeguele igbolo-a.’

31 Eri a ri ona pfi ọtselẹ mu egbe ẹ khi a lama shi ọ khi imimi eni e gbolo emekeguele-a, a khi.

32 A ke je odalo, ni a pfuse gbe ikanya ni ititaẹ e gbaekele gbe.

33 “Ẹ ẹ enyẹ ali imi enyẹ, sẹ a dabi khi a li ya na pfue ilimhi iriẹriẹ ni ọọ bhale?‡

34 Itobọ ighọ mhi ya gueyẹ ẹ khi mhi ya ghie emekeguele ghi ẹ ali ẹgbọ ni e fialo-a ali esesẹ ni e bu, a ya gbolo eghuo ọ-a, a tanọ wẹ ma apfida, elese a gbe wẹ itẹ elemhi owa ugamhi eyẹ ẹ, a khu wẹ te ẹoli oghuo ya je olese.

35 Itobọ ighọ a ya ri ọlia eyi ẹgbọ eni e pfuase nya ni a gbolo-a shi eke agbọ ona mu ota sọ ẹ, rọte idiegbe oyi Ebẹli ni ọa mhue abi ọ li vu, ya ramhi idiegbe oyi iZakaraya omi iBẹrẹkaya ni a gbe-a shi

§ 23:22 Li zẹ Aza 66.1; iMat 5.34 * 23:23 Li zẹ iLev 27.30 † 23:27 Li zẹ Ika 23.3

‡ 23:33 Li zẹ iMat 3.7; 12.34; iLuk 3.7

agadamhi eva atete ali Owa
Oyi Eshinegba. §

³⁶ Abi o li mhi li gue ɔ li e ye e
khi, osoli ni a ya me shi ugbeli
ni a gbe idiegbe oyi egbo egho,
egbo na agbhotu ona oni osoli
o ya de rughu.”

*Inono ni ijesu o mhue na
ijerusalemu*

(iLuk 13.34-35)

³⁷ Ijesu o ro lie, “Eekhue-
oo! Ijerusalemu, ijerusalemu!
A gbolo emekeguele-a, a tono
eni Eshinegba o ghie ghi e eche
gbolo-a. Iti-ingmi-ingme mhi
she roshaka ni mhi kolo egbo
eye e kugbe, abi okhokho o lie
kolo imioli shi ifui ipfua, ama
aa lama na mhe.”

³⁸ Ghe i! Eshinegba o ya te
Owa oyi Eshinegba oye e vu, o
mele afue a.*

³⁹ Mhi gueye e khi rote
memena vu, khi aa ke gbolo
ya me mhe ya ramhi ni
egheghe ni a ro ya ke lie,
‘Oghela o khi ni oni o ri eva
oyi Onomhue bhale.’ †

24

Olele oyi ikpukhokho agbo
(iMak 13.1-2; iLuk 21.5-6)

¹ Abi ijesu o rote oni Owa
oyi Eshinegba fie lasese, eniye
odukhokho eyoli e roli khasa
ugbe oyi oni owa.

² Ijesu o ro we, “A ga me
emhi enana nya, ama mhi
gue a ye e khi aa me echeli ni
a ro nga egbe egbe ro to oni
owa ona ni aa ya che kua.”

Ozughu ali imu-okholi vule
(iMak 13.3-13; iLuk 21.7-

19)

³ Abi ijesu o li shito
ukhomhi Ute era Olivu,
eniye odukhokho eyoli e
bhale ya ye oli ochi, ee oli.
“Gueye anye egheghe ni eni
ingme enana e ro bhale ya
tse, ali emini a ya ke me ni
anye ro ya lese khi a she
ramhi ukpese agbo.”

⁴ Ijesu o so we o, oo. “A
ke tokpe eke ini ogbokhoghuo
o khi di e.”

⁵ Irari khi ebubu egbo e
ya ri eva oyemhe bhale, ee
lie ‘Mhemhe mhi khi oni
iKirisiti,’ ee di ebubu egbo.

⁶ A ya su o eko okholi ali
okeke okholi. Ama a khi ze ni
ulishi o mu e. A mema ya me
emhi eghogho, ama ukpese
agbo o kie ramhi ne.

⁷ Ushishi e ya mu okholi
vule shi ushishi o, egbo e mu
egbe iku iku nu egbe e kholi.
Ukpokpomhi okiamhi o ya ke
pfi, eke e ya ke dekule asha
khi asha.

⁸ Eri enana nya e ya li abi
khi oku o lese to okpotso ni o
ya bia.

⁹ “Egheghe agho a ya mu e
na we ni e nase e, a gbolo e-
a. Egbo na agbo nya e ya ke
biselemhi e, itobo khi a khi
egbo eyemhe.*

¹⁰ Egheghe agho ebubu egbo
e ya de irudunga lasese, e ri
egbe e de, ee biselemhi egbe.

¹¹ Egheghe agho ebubu
emekeguele eyi egholi e ya
lasele, ee di ebubu egbo.

§ 23:35 Li ze Igbae 4.8; Iburu 11.4; iZaka 1.1; 2 Okhe 24.21 * 23:38 Li ze ijere 22.5

† 23:39 Li ze Iwolo 118.26 * 24:9 Li ze iMat 10.22

12 Irari khi օkħoօ o ya gba eke dose, imhue-inono na egbe օa ke lolo e la օ.

13 Ama օgbօ ni օ da migha irudunga oyօli gbagbagba ramhi ukpeօe, օ ya khi օni a mie pfuese.†

14 A ya she ri oni usomhi onete oyi oni Eghiele oyi Eshinegba onana, tse abօ gase agbօ kpa, ni o khi օtseօe na ishishi nya, eghेghe aghօ ukpeօe agbօ o tigbe ramhi.

Ighuighue

(iMak 13.14-23; iLuk 21.20-24)

15 “ ‘Irarighօ, a kha da me emhi obe ni o veօe egbօ օ kua khi ighuighue ni օօ veօe egbօ kua, ni օօ pfi ebemulishi, khi o da ya migha ashini o pfuaeօe ne,’ ezeze abi օmekeguele iDanie օ gue օli le ne, օni օօ ze ebe օ leօe emini օ ze.‡

16 Eghेghe aghօ, egbօ ni e la eke ijudia e na ya nga ukhomhi ite.

17 օgbօ ni օ la ukhomhi owa օ khi tiemhile ya rue emhikhօghuo elemhi owa.

18 օgbօ ni օ la ishemi օ khi jele apfe ya rue awulu oyօli apfe.§

19 O ma khօօ ikpotso ni e me egbe ali eni e ri emօfe shi egbe.

20 A lema Eshinegba օ khi ze ni eօe unamhi oyee օ khi eghेghe orue wekhi ogbeօe iyemhe.

21 Irari khi osoli oniemi օ ya lasele օ. Osoli ni օgbօ aa

kpe me ghue rote igbaekele agbօ ya ramhi ogbe ni amo, wekhi eri a ke gbolo ya me oghօghօ ghue.*

22 Ini aa rote eni ogbeօe eni a ngme ena khi-a, օgbօkhօghuo օa ya pfue օ. Ama itobօ oyi egbօ ni Eshinegba օ ze, օ ya khi eni ogbeօe-a.

23 Eghेghe aghօ, ini օgbօkhօghuo օօ u, ‘Bino, ghe օni iKirisiti!’ Okekha khi eri օ li, ‘Ghe օli oobօ khe,’ khi mie օli suօ.

24 Irari khi iromhi emiepfuese ali emekeguele eyi egbօli e ya lasele, ee ri օleօe eniemhi e khase, ali ee gbe ikanya օnyaloa ro ke di egbegbi eni Eshinegba օ ze, ini o ya ze li lo.

25 A ghe i, eri mhi gue onana ye e shi eke neni oni egh_e ghe օ ya ramhi.

26 “Ighօ, ini օgbօkhօghuo օ gueye e, ‘Ghe օli oobօ, obini օdagbe ifufu,’ a khi je oobօ. Okekha khi eri օօ, ‘Ghe օli ana, elemhi owa aza,’ a khi mie օli suօ.

27 Irari khi eri inyenegbe bhale oyi Omi օgbօ o ya li abi akphala o lie nyamhise alo nyaa, o rote udi ukhuli ge ya je udi ukhuli, rote obini ovօ o te e ngale ya je obini o te e lo eko.†

28 Itobօ khi ashini elamhako օ ke-a shi aghօ ighuli ee legba.‡

Inyenegbe bhale oyi Omi

† 24:13 Li ze iMat 10.22 ‡ 24:15 Li ze iDan 9.27; 11.31; 12.11 § 24:18 Li ze iLuk 17.31 * 24:21 Li ze iDan 12.1; Iro 7.14 † 24:27 Li ze iLuk 17.23-24 ‡ 24:28 Li ze iLuk 17.37

Ogbọ

(iMak 13.24-27; iLuk 21.25-28)

²⁹ “Egheghe osoli ogho o kha da lese dose tee,

“ ‘Ovo o ya bishi alo-a,

uki o a ke ge

ikpetata e deno ukhuli kule, ekpabo ena ukhuli ee

nighise.’§

³⁰ “Egheghe agho, olee irokhaso oyi Omi Ogbọ o ya lasese shi ukhomhi idane. Egbọ ni e la agbo ona nya, e ya ke vie oya abi Omi Ogbọ o li rote irarogbe e tiemhile elemhi ekpabo ali ukpokpomhi ufumhi.*

³¹ Egheghe agho akala onofun o ya de. Omi Ogbọ o ghie igeni eyoli je iguabo enenene na eke agbo nya, e ka ti egbo eyoli ni o ze gbili.†

Owena ni a te oora okhua-eni wena

(iMak 13.28-31; iLuk 21.29-33)

³² “A ze ni oara okhua o sese e ingme. Ini iguabo eyoli e da tsotsoghọ ne, ni o ro ta ebe, a lese khi okaso o she ramhi.

³³ Igho ini a da me emini mhi gue e ye ena ne, a lese khi oni egheghe o she ti ramhi ana.

³⁴ Abi o li mhi li gue e ye e khi agbhotu ona o a ya dose ne, ni emhi ena nya e ro bhale ya tse.

³⁵ Eke ali ukhuli e ya dose, ama ingmemhi eyemhe, o a ya de kua.

Ogbọ o a lese oni ogbele wekhi oni egheghe

(iMak 13.32-37; iLuk 17.26-30,34-36)

³⁶ “Ogbokhoghuo o a lese oni ogbele wekhi oni egheghe. Egbebi igeni na iloghie o a lese wekhi Omi Ogbọ o lese, se ni Ita lolighuo tse.

³⁷ Abi o ke li egheghe oyi iNoa, igbo ibhale oyi Omi Ogbọ o ya li.‡

³⁸ Neni a me ogbele oyi ochikpho oniemhi, eri egbo e le, e da, eghuo e wolo ikpotso, a ri ikpotso ye ughue, ya ramhi ogbele ni iNoa o ro mu oko-oké oniemhi nga,

³⁹ Ama o a kie lese emini a ya me ramhi ni ochikpho o ro bhale ya tsua we kua nya. Igho ibhale oyi Omi Ogbọ o ya li.§

⁴⁰ Emose aava e ya la ishemhi ke gbe akanya, a rue oghuo vu, a ze oni o kpole obo.

⁴¹ Ikpotso aava e ya la iko ke mhele emhi, a rue oghuo vu, a ze oni o kpole obo.

⁴² “A ri ukpelo e shi eke irari khi aa lese ele ni Onomhue oye e o ya bhale.

⁴³ A lese khi ini omhue-apfe o lese egheghe ni ighiato e ro ya do oli lo, eri o ya shito ni ogbe o gbe-a. O a ya ze ni ighiato e gbe oli ode-a lo owa le.

⁴⁴ Itobo igbo, a mema ya mu egbe shi eke, irari khi egheghe ni aa sa shi, Omi Ogbọ o ro ya bhale.

§ 24:29 Li ze Iro 8.12; Aza 13.10; Ezik 32.7; iJo 2.10-11,31; 3.15; iZef 1.15; Aza 13.10;

34.4; Iro 6.12-13 * 24:30 Li ze iDan 7.13; iZaka 12.10-14; Iro 1.7 † 24:31 Li ze 1

iKori 15.52; 1 iTea 4.16; Aza 27.13; iZaka 9.14 ‡ 24:37 Li ze Igbae 6.5-8 § 24:39

Li ze Igbae 7.6-24

Oni o gue ẹ ẹ ga ali oni o ga gue ẹ ẹ ga

(iLuk 12.41-48)

45 “Oghuo o fe khi oni oo ga ni ri egbe e nga ni o lese ingme. Ni oga oyoli o ze kpeda na eni ee ga eyoli, o ri eloehu omhọapfe oyoli, ni o ke ri emhi na we le shi eghẹghe?”

46 Oghẹle o khi na oni oo ga ogho ini oga oyoli o jele ya e khi oo riefe emini o mhesẹ na li.

47 Abi o li mhi li gue e ye e khi oga oyoli o ya ri emini o mholi nya nga li obo.

48 Ama ini o khi oni oo ga ni o ya suọ esọ lo, eri o ya ke gueye egboli, ‘Oga oyemhe o ya la oobo tẹse.’

49 Oo gbe eni ee ga ni e kpole, o le, o deba edonyo a da onyo kia kia.

50 Oga oyi oni oo ga ogho o ya jele apfe ogbele ali eghẹghe ni oni oo ga ogho o sa shi.

51 Oni oga oyoli ogho o ya nase oli agboagbo, o roli je asha ni a ri erugamhi-ku-alo shi. Agho o la ke vie o le akọ akọ.”*

25

Okhe irokhokho imueshi ogbe ni ea me omose ghue

1 “Eghẹghe ni a ngme ena, eri Eghiele oyi Eshinegba o ya li abi imueshi etuogbe ni ea me omose ghue, ni e ya rue ikpa eyewe, ni e vu ya a lu omose oni oo rue omueshi onogbo ode.*

2 Imueshi oshe elemhi we e khi eyeghe, oshe eni e kpole e khi elesingme.

3 Eyeghe ni e la o, e wolo ikpa eyewe ama ea sato tsua oili olese shi emhi.

4 Elesingme ni e la o, e wolo ikpa, gbo die oili olese shi emhi.

5 Abi oni omose ni oo rue omueshi egho o ro kefe e bhale, eni imueshi nya e ri ukhomhi bo, olese o dowe rue.

6 “Abi itsotsogbie ro mu eke, uruli o de leghe, oo, ‘A ghe khe! Oni oo rue omueshi o she e bhale o! A vule ni a ya lu oli ode!’

7 “Igho eni imueshi e ti vule, e ti ikpa eyewe ngale.

8 Ama ikpa eyi eyeghe ni e la o, e ea ke dofe lala. E le deba eni e khi elesingme, ee we, ‘A kpekpe a te oili oyefe die na anye irari khi ikpa eyanye e she e pfua.’

9 “Igho imueshi elesingme egho, ee we, ‘Iye e! Oni anye mhuẹ ena o ya lo anye ni o gbolo lo e o. A le deba eni e ri oili e de ya de.’

10 “Igho eni imueshi eyeghe oshe egho, e le deba eni e ro de ya a de. Abi e ro vu ya de oni oili, oni oo rue omueshi o lole. Eni imueshi oshe ni e mu egbe oili olese egho e deba li lo elemhi owa ukue. A khukhu ode.

11 “O ke li denẹ, enekpole e bhale, e ya kpheli ode, e lie, ‘Oga! Oga! Khueghie ode-a na anye.’

* 24:51 Li ze iLuk 12.39-46; 1 iTesa 5.2; Iro 3.3; 16.15; 2 iPit 3.10 * 25:1 Li ze iLuk 12.35 † 25:12 Li ze iLuk 13.25

12 “Ama ɔni ɔɔ rue ɔmueshi ɔgho, ɔɔ wɛ, ‘Abi o li mhi li gue ɛ yɛ ɛ, mhi aa lɛsɛ ɛ.’†

13 “Irarigho, a ri ɛloe shi eke, itobo khi aa lɛsɛ oni ɔgbele wɛ khi oni ɛgheghe.

Okhe irokhokho oyi eni ɛɛ ga etuase

(iLuk 19.11-27)

14 “Egheghe agho, eri Eghiele oyi Eshinegba o ya li abi ɔmose ɔghuo ni ɔɔ vu asha, ni ɔ lu eni ɛɛ ga eyoli, ɔ ri ɛpfue eyoli nga wɛ obo.

15 ɔ kemhi ikpagho na ɔgboɔgbo abi e li mhue afu ramhi. ɔ ri ikpeshe na ɔghuo, ɔ ri ikpeva na ɔlese. ɔ ri ukpaghuo na ɔnokpole. ɔ vu ɛoli.

16 ɔni ɔga ɔ lɛsɛ vu se, ɔni ɔ mie ikpeshe egho, ɔ nyanya ya ri ikpeshe eyoli du oki, ɔ me eleli ikpeshe elese nga ɔ.

17 Igho ɔni ɔ mhue ikpeva egho, ɔ li ri eyoli du oki, ɔ li me eleli ikpeva elese nga ɔ.

18 Ama ɔni a ri ukpaghuo na egho, ɔ vu ya to oni ukpagho eke so.

19 “O tɛsɛ, ɔni ɔga ɔyewɛ ɔ jele. ɔ lu wɛ ɔgboɔgbo ɔ bhale ya guele abi ɔ li gbe.

20 ɔni ɔɔ ga ni ɔ mhue ikpeshe egho, ɔ bhale deba ɔga ɔyoli, ɔɔ, ‘Oga, ikpeshe u ro na mhe, ama mhi she roli du oki, mhi me ikpeshe eleli.’

21 “ɔni ɔga ɔyoli ɔɔ li, ‘Mu akanya, yeye ɔni ɔɔ ga onete ni ɔ mhue igesikia! U she ri igesikia khasɛ shi ukuku emini mhi ro ngeɛ obo, mhi ya ri

emini e bu ngeɛ obo. Bhale ni awa ga la oghɛle!’

22 “Igho ɔni a ri ikpeva na egho, ɔɔ li, ‘Oga, ikpeva u ro na mhe, mhi she me eleli ikpeva.’

23 “ɔni ɔga ɔyoli ɔɔ li, ‘Mu akanya, yeye ɔni ɔɔ ga onete ni ɔ mhue igesikia! U she ri igesikia khasɛ shi ukuku emini mhi ro ngeɛ obo. Mhi ya ri emini e bu ngeɛ obo. Bhale ni awa ga la oghɛle!’

24 “Igho ɔni ɔ mie ukpaghuo egho ɔ bhale, ɔɔ li, ‘Oga, mhi lɛsɛ khi uwali ɔgbo u khi; khi ashini u waa gua shi wa je ya khiesɛ, ali khi ashini u waa ri ukpamhi ko, u je ya tima.

25 Itobo igho eri ulishi oye oo mu mhe, loli o ze ni mhi ro ya to ikpagho eye eke so. Ghe ikpagho eye emhikhoghuo ɛa li wɛ.’

26 “ɔni ɔga ɔyoli, ɔ soli ɔ, ɔɔ li, ‘Yeye ɔgbo ɔkholo ɔwaza ɔna. U lɛsɛ khi eri mhia khiesɛ emini mhi aa roko, mhi gbo rote asha ni mhi aa pfi ukpamhi shi ɛ khiesɛ.’

27 Abi o ro khi igho, wa a ke ri ikpagho eyemhe shi ilu ikpagho, mhi kha jele, mhi kha bhale ya ɛ khi e gbe nga ɔ.

28 “ ‘A mie oli oni ukpagho, a ri oli na ɔni ɔ mhue ikpeshe.

29 Irari khi ɔgbo ni ɔ mhue, a ya ro ma ɔ na li, ɔ mhue gbeku ɔ, ama ɔni ɔa mhue kpa, ukuku ni ɔ kpe mhue a ya mie oli lue.‡

30 Ama ɔni ukhiakhiamhi ɔni ɔɔ ga ɔnana, a mu oli pfi

‡ 25:29 Li ze iMat 13.12; iMak 4.25; iLuk 8.18 § 25:30 Li ze iMat 8.12; 22.13; iLuk 13.28

lase ya pfi alo ebili, agho ọ la ke vie ọọ le ako ako.'[§]

Iguezọ ni o kpukhokho

31 "Ini Omi Ogbọ o bhale abi Oghie Onomhue, ni igeni eyọli nya e rọ nu ọli bhe, ọ ya shito eghiele oyọli.*

32 Egbọ ni e la agbọ nya a ya tigbili odalo oyọli. Eghẹghẹ agho ọ khi we-a asha eva, abi orisumha-kia ọ liẹ vase isumha ali elamhi-a.

33 Ọ ya wolo egbo ni e pfuase je ukiẹkiẹ obita. Enekpole e la obogobo.

34 "Igho oni oghie ọ ya gueye egbo ni e la li obo obita, ọọ we, 'A bhale ni a ke li agbo elemhi iloghie ni Itamhe ọ riẹle na e rote eghẹghẹ ni agbo o te gba eke le. Eẹ ni Eshinegba ọ khi vose na.

35 Irari khi abi okiamhi o rọ gbe mhe, a ri emhi na mhe le, okiamẹ o gbe mhe, a diẹ amẹ na mhe da. Abi mhi rọ khi ọpfese, a mie mhe shi owa oyẹ.

36 Abi mhi rọ la irumheba a ri itsua na mhe so. Mhi ghua, a ri ẹloe khu mhe. Mhi la owa ighumha, a bhale ya bino mhe.'

37 "Igho eni egbo ni e pfuase egho e ya mhila mhe, e mhe, 'Onomhue, eghẹghẹ onoghuo anye rọ me khi okiamhi oo gbe e ni anye rọ ri eminale ne le, ni okiamẹ o rọ gbe e ni anye rọ rọ ne da?

38 Eghẹghẹ onoghuo u rọ khi ọpfese ni anye rọ mie lo owa le. Eghẹghẹ onoghuo u rọ

bano-a ni anye rọ ri itsua ne so?

39 Eghẹghẹ onoghuo u rọ ghua ni u rọ la owa ighumha ni anye rọ bhale ya bino e?'

40 "Oni oghie ọ ya so we ọ, ọ we, 'Abi o li mhi li gue e ye e egho khi, emiemini u da riẹle na egbo ni e khi Inyoghuo-mhe ni e miesuo ni ẹa mu ẹloe ena ne, mhemhe u riẹle ọli na.'

41 "Eghẹghẹ agho oni oghie ọ ya gueye egbo ni e la li ukiẹkiẹ obo ogobo, 'A vu mhe ana le, eẹ ni a pfi unu na, a ke je owa ere ni Eshinegba ọ riẹle na okphaghiẹ ali igeni eyọli.

42 Irari khi abi okiamhi o rọ gbe mhe, aa ri emhi na mhe le. Abi okiamẹ o rọ gbe mhe, aa bo amẹ na mhe da.

43 Abi mhi rọ khi ọpfese, aa lama ni mhi lo e apfe le. Abi mhi rọ la irumheba, aa bo ide na mhe so. Mhi ghua, aa ri ẹloe khu mhe. Mhi la owa ighumha aa bhale ya bino mhe.'

44 "Eghẹghẹ agho e ya liẹ mhe, 'Onomhue, obo anye la me khi okiamhi o gbe e, ni u rọ khi ọpfese, ni u rọ la irumheba, ni u rọ ọ ghua, ni u rọ la owa ighumha ni anye aa rọ kpaghiẹ obo?'

45 "Oni oghie ọ ya so we ọ, ọ we, 'Abi o li mhi li gue e ye e egho khi, emiemini wa a da riẹle na egbo ena ni ẹa mu ẹloe ni e mie mhe suo ne, mhemhe wa a riẹle ọli na.'

46 "Eghẹghẹ agho, e vu ya lo osoli na agboagbo, ama eni

* 25:31 Li ze iMat 16.27; 19.28 † 25:46 Li ze iDan 12.2; iJon 5.29

e gue ngeli, e je agbo na agboagbo.”†

26

Ugbamhi ni a gba khe ijesu (iMak 14.1-2; iLuk 22.1-2; iJon 11.45-53)

1 Abi ijesu o li sese emhi ena se, o o eniye odukhokho eyoli,

2 “A lese khi akopfua khi ukpe iPasova. A ya mu Omi Ogbō, a gbe o-li-a shi apfida.”*

3 Eghēghē agho, ighie eyi ekpodalo-ugamhi ali eni egbhali e ya lona agbala oyi iKefasi ni o khi Oga oyi ekpodalo ugamhi nya.

4 E la agho gba ugbamhi abi e li ya bēna mu ijesu ya gbe-a.

5 E gueye egbe khi, o a ya khi eghēghē oyi oni imu, ini egbo khi ri itobo igho tsua onyaghu lasele.

A la iBētani ku oili shi ijesu egbe

(iMak 14.3-9; iJon 12.1-8)

6 Ijesu o bhale iBētani, ikhi owa oyi omose oghuo ni a lu iSamō ni efafe e kpe mu.

7 Abi ijesu o li la agho le eminale, okpotso oghuo o tsua ituale ni o lolo ghalē shi ukoko alabasita ni a ri eche rieḷe bhale. O ya ku oḷi shi ijesu ukhomhi.†

8 Abi eniye odukhokho eyi ijesu e ro me ona, e liē, “Elo o zē ni a ro na pfuēche oni ituale kua shi afue?” Elemhi e bi wē.

9 “A kha ri ituale ona de ghalē lo, a kemhi eni ikpagho na eni ēa mhue.”

10 Ijesu o lese emini e ngme, o mhila wē, o wē, “Elo o zē ni a ro nyama oni okpotso ona? Emini o somhi otse o rieḷe na mhe.

11 Eghēghē kpa eni ēa mhue e ro a la ē ifuabo. Ama aa ya ke me mhe eghēghē kpa.‡

12 Emini o zē ni okpotso ona o ro ku ituale ona shi mhe egbe khi, ni o ro mu mhe egbe khe iroto oyemhe.

13 Mhi gueye e khi ashiashini a da la tse abo usomhi onete ona eke agbo ona ne, a ya ngme emini oni okpotso ona o rieḷe ro sato oḷi egbe.”

Ijudasi o lama khi loḷi ya ri ijesu de

(iMak 14.10-11; iLuk 22.3-6)

14 Igho oghuo eniye odukhokho ogbava eyi ijesu ni a lu ijudasi na Isikaroti, o fie deba ighie eyi ekpodalo-ugamhi.

15 O mhila wē, “Ingme a ya ro na mhe ini mhi ri ode khasē e ni a te ya mu oḷi?” Igho e leli ikpaghuo-ghuo uye ali igbe na li.§

16 Roḷe agho vu, eri ijudasi o ke ri ukpeḷoe shi eke nono ode ni o te ya ri ijesu na wē.

Eminale ogbomhi oyi Onomhue

(iMak 14.12-21; iLuk 22.7-13,21-23; iJon 13.21-30)

17 Ogbeḷe onodode oyi oni ukpe na ibuleḷi ni aa ri ifuma wushe o ramhi, eniye odukhokho eyi ijesu e bhale

* 26:2 Li zē Okiali 12.1-27 † 26:7 Li zē iLuk 7.37-38 ‡ 26:11 Li zē iDeut 15.11

§ 26:15 Li zē iZaka 11.12

deba li, e mhila li, e ọli, “Obo wa nono ni anye mu egbe shi ni u la le eminale iPasova?”

18 Ọọ wẹ “A lẹ deba ọmọse ọghuo ni ọ la elemhi oni ẹoli, a ka gueye ọli khi, ‘Osese ọ khi eghẹghẹ oyemhe o she ti ramhi, owa oye, mhemhe ali eniye odukhokho eyemhe anye la le eminale iPasova.’ ”

19 Igho eni eniye odukhokho eyi iJesu e riele abi ọ li ghie wẹ. E ya mu egbe oni eminale shi agho.

20 Abi ogbomhi o ro mu eke, iJesu ali eniye odukhokho ogbava eyoli ee shitọ shi eminale.

21 Abi e ro le oni eminale, iJesu ọọ wẹ, “Oghuo elemhi e ọ ya remhe de.”

22 Igho egbe e pfọ wẹ a. Oghuo oghuo ọ mhila li “Onomhue she khi ọa khi mhemhe wẹ khi o khi?”

23 IJesu ọọ wẹ, “Oghuo e ni ọ nu mhe e so obo utasa, ọ ya remhe de.*

24 Omi ogbo ọ ya ghu-a abi a keke nali. Ama o ma kholo ọmose ni ọ ri Omi Ogbo ya de egbe. O kha bie ti ne ini ogbo aa bie bia li.”

25 IJudasi ni ọ ya roli de ọọ li, “Osese, she khi ọa khi mhemhe wẹkhi o khi?” IJesu ọọ li, “Ii, ye ye lo.”

Eminale ogbomhi oyi Onomhue

(iMak 14.22-26; iLuk 22.14-20; 1 iKori 11.23-25)

26 Abi e li le egho, iJesu ọ rue ibuledi, ọ kphemhi, ọ khi ọli a, ọ roli na eniye odukhokho

eyoli, ọọ wẹ, “A mo, a le khi idiegbe oyemhe na.”

27 Igho ọ gbo li rue uko, ọ kphemhi, ọ roli na wẹ, ọ wẹ, “Ee nya a rote ọ da.

28 Olia eyemhe ni a ku ro luase obo na egbokpa a na, ni o gbe olamhe kua na wẹ. Olia ena Eshinegba ọ ro nu egbo eyoli mhue ishobo.†

29 Mhi gueye e khi mhi a ke gbo rote oni ukpamhi ọara upfonu onana ya da rote memena vu. See ni ele ni mhi ke ya nu e da li ode onogbo Iloghie oyi Itamhe.”

30 Abi e ro to uwolo se, e vu ya je ute ẹra Olivu.

IJesu ọ guele shi eke khi iPita ọ ya kie lue

(iMak 14.27-31; iLuk 22.31-34; iJon 13.36-38)

31 Abi e li le egho, iJesu ọọ wẹ, “Amiose ena, ee nya a ya mhue akhokhomhe shi mhe egbe, a na tsua mhe pfia, irari khi ebe o ngme ọli khi.

“ ‘Mhi ya ri emhi li
Orisumhafia,
eni isumha
e ya gbhiaku-a.‡

32 “Ama ini mhi rote eghuli guale, mhi ya ralo na e iGalili.”§

33 IPita ọọ li, “Ini egbo nya e tseku mhue akhokhomhe shi e egbe, mhemhe mhi aa ya mhue.”

34 IJesu ọọ li, “Abi o li mhi li gue ọli e ye, khi amiose ena, neni okpa ọ gbieghe, itese u ya lie khi waa lese mhe.”

* 26:23 Li ze Iwolo 41.9 † 26:28 Li ze Okiali 24.8; iJere 31.31-34 ‡ 26:31 Li ze iZaka 13.7 § 26:32 Li ze iMat 28.16

35 IPita ọọ li, “Mhi aa ya ngme ghọ ini o tseku khia khi oni mhi ya nu ẹ ghu-a lọ, mhi aa ya liẹ khi mhi aa lẹse.”

Eniye odukhokho enekpọle nya e li ngme ghọ.

Ijesu o la iGetisemani lema
(iMak 14.32-42; iLuk 22.39-46)

36 Ighọ ijesu o lu eniye odukhokho eyọli, e je ashini a lu iGetisemani, ọọ wẹ, “A shito ana khi mhi ya je oobọ ya sọ iromhi.”

37 O rue iPita ali imi iZebedi aava ma egbe. O viẹ osoli, egbe ẹa ke sheshe ọli.

38 Oọ wẹ, “Udu oyemhẹ o vọ osoli ramhi khi mhi ya ghua. A shito ana, a nu mhẹ ke tokpẹ.”

39 O ti lẹ deņe, o de yeshi to alo mu eke o sọ iromhi. Oọ, “Ita, ini o ya tse lọ, ze ni u mie mhẹ uko osoli ona. Ama ọa khi abi o li ghọle mhẹ, ama abi o li ghọle ẹ.”

40 O nyene egbe bhale deba eni eniye odukhokho, o me khi ẹe lese. Oọ wẹ, “Aa dobe nu mhẹ tokpẹ ukuku eghẹghẹ tse?”

41 “A ke tokpẹ, a sọ iromhi ini a khi de pfilo imufe. Ayemhẹ o mu egbe, ama o lose idiegbe.”

42 O gbo vu utonuzi-eva, o ya lema, ọọ, “Itamhẹ, ini o khia khi ọa ze li ni uko osoli ona o dose, see khi mhi da li, ze ni oghuemhẹ oye o tse.”

43 O gbo nyene egbe ukhokho bhale, o me khi e lese ẹa ke dobe khueghie alo-a.

44 Ighọ o ze we obọ shi aghọ. O gbo ya lema utonuzi-ese, o gbo ngme abi o kpe ngme.

45 Ighọ o nyene egbe ukhokho bhale deba eni eniye odukhokho, ọọ wẹ, “Eri a kiele ẹ lese-a, a kiele ẹ yemhẹ-a? A bino khi eghẹghẹ o she ramhi khi a she ri Omi Ogbọ na egbo olamhẹ de.

46 A vule ni awa vu! Oni o remhẹ ẹ de ọọ bhale!”

A mu ijesu
(iMak 14.43-50; iLuk 22.47-53; iJon 18.3-12)

47 Ijesu o kie lighọ ngme, iJudasi ni o khi oghuo eni eniye odukhokho ogbava, o bhale. Ebubu egbo ni e tsua epia ali itakobi e nu ọli bhale, eni ighie eyi ekpodalougamhi ali eni egbhali e ghie.

48 Oni o roli de o she ri ojele na eni egbo, ọọ wẹ, “Oni mhi da ya pfipfi egbe ne, loli lọ, a mu ọli.”

49 Oni iJudasi o le deba ijesu, ọọ li, “Opfomhẹ o ka nu ẹ la Osese,” o pfipfi ọli egbe.

50 Ijesu ọọ li, “Omue, nyanya riele emini u bhale shi.”

Ighọ eni emose e fiẹ lasele, e mu ọli.

51 Ghe i, abi a ro me na, oghuo eni e nu ijesu kia, o ji itakobi emhi lasele. O khi oni ọọ ga oyi Oga ekpodalougamhi eso-a.

52 Ijesu ọọ li, “Rue itakobi oye shi irari khi oni o ji itakobi, o ya li ghu eghuli itakobi.

53 Eri u dabi khi mhi aa dobe ya mhila Itamhẹ

ikpaghiobo, aghoaghō ọ ri igeni ni e doṣe agbhagbhamhi igbeva ghi mhe.

⁵⁴ Ama, se Ebe-no-pfuase o ke li bhale ya tse, ni ọọ khi a mema lina me ọli?"

⁵⁵ Igho iJesu ọọ eni ebubu egbo egho, "Eri mhi ri egbo e pfi ozughu ni a ro tsua igbhoro ali itakobi bhale ya mu mhe? Ele kpa mhi ro shito Owa oyi Eshinegba e sese, ama aa mu mhe.*

⁵⁶ Ama eri a me ena nya ni a bhale ya e khi emini emekeguele e ngme shi ebe o bhale ya tse." Igho eniye odukhokho nya e ze ọli obo, e na kua.

Igba enighie ni a lu iSaediri e ri iJesu gue ezo
(iMak 14.53-65; iLuk 22.54-55,63-71; iJon 18.13-14,19-24)

⁵⁷ Eni e mu iJesu e rue ọli je apfe oyi iKefasi ni ọ khi Oga oyi ekpodalo ugamhi, ashini eni e sese ishi ali eni egbhali e legbe.

⁵⁸ Ama iPita ọ tapfia a deba we. O deba we lo ramhi atukpapfe oyi Oga oyi ekpodalo ugamhi. O lo se, ọ nu eni ee khe ekhe shito, ni ọ me abi oni ingme o ke li ya kia.

⁵⁹ Ighie eyi ekpodalo ugamhi ali eni iSaediri nya, e nono otsela egbhali ni e ya mu mholi iJesu obo ni e ba me asha gbe ọli-a.

⁶⁰ Ama ea me okhoghuo, abi ebubu egbo e tseku fie lasele ya pfi otsela egbhali.

Ikpukhokho o, emose aava e fie lasele.

⁶¹ E li "Omose ona ọo, 'Mhi ya dobe guoghō Owa Oyi Eshinegba-a, mhi gbo riele ọli to gbele ese.' "†

⁶² Oga oyi ekpodalo ugamhi o vule, ọọ iJesu, "Waa bie mhue emini u ya ngme shi ezo ni a gue e shi e egbe ena?"

⁶³ Ama iJesu tsaghie-a.

Igho Oga oyi ekpodalo ugamhi o gbo vule migha, ọọ iJesu, "Mhi ri eva oyi Eshinegba ni o la o re romhi ishe, gueye anye, ini yeye u khi Omiepfuese Omi Eshinegba."

⁶⁴ IJesu ọọ li, "Igho o khi abi u ngme. Ama mhi gueye ee nya khi, rote memena vu, a ya me khi Omi Ogbo o shito obita oyi Eshinegba ni o fune nya, o la elemhi otughunu te irarogbe e bhale."‡

⁶⁵ Igho, Oga oyi ekpodalo ugamhi o nyan o awulu a shi egboli uruli. Oo, "O she pfi unu-a! Otsela olese awa ke gbolo e nono? Ee a she suo oni ungmehi ipfiunu-a ni o ngme.

⁶⁶ Se a sa shi o?"

E ọli "O she lue, o mema ya ghua."§

⁶⁷ Igho e tono ete ku iJesu alo, e ri ekpa gbe ọli. Eghuo, e lase ọli eso.*

⁶⁸ E lie ọli "Me eke na anye ghue yeye Omiepfuese. Gueye anye ghue oni o ri emhi gbe e."

* 26:55 Li ze iLuk 19.47; 21.37 † 26:61 Li ze iJon 2.19 ‡ 26:64 Li ze iDan 7.13

§ 26:66 Li ze iLev 24.16 * 26:67 Li ze Aza 50.6

IPita o kie iJesu

(iMak 14.66-72; iLuk 22.56-62; iJon 18.15-18,25-27)

⁶⁹ IPita o shito olase, omueshi oghuo oyi Oga oyi ekpodalo ugamhi o bhale deba li, oo li, "Yeŷe, u li nu iJesu onge iGalili kia."

⁷⁰ IPita o tia li ukpeloe we nya, oo li, "Mhi aa fe lese emini a ngme."

⁷¹ O ke rote agho fie je unu ode unuekpe ni a rote e lo oni apfe le, okpotso oni oo ga olese o gbo me oli, o gueye omose ni e la agho, oo "Omose ona o nu iJesu na iNazareti kia."

⁷² Igho iPita o gbo tia li. Utona, o romhise ma o, oo, "Mhi romhi ishe, khi mhi aa lese oni omose ogho!"

⁷³ O ke li deno, emose ni e migha agho e bhale deba iPita, e oli, "Igesikia lo khi otuoghuo elemhi we u khi. Ungmemhi oye o she ngmase le."

⁷⁴ Igho o li se egboli isheli, oo romhi isheli. O lie, "Mhi aa ga lese oni omose!"

Utoghuokpe okpa o gbieghe.

⁷⁵ Igho iPita o sato ungmehi ni iJesu o gueye oli ni o re oli, "Neni okpa o ya gbieghe, itese u ya lie khi waa lese mhe." O fie je olase ya vie oya.

27

A mu iJesu ghi iPaleti

(iMak 15.1; iLuk 23.1-2; iJon 18.28-32)

¹ Ogbe o gbe-a ogbeakolo, ighie eyi ekpodalo-ugamhi

nya ali egbhali e mheso abi e li ya gbe iJesu-a.

² E ge oli, e rue oli vu ghi iPaleti ni o khi igovuno.

Ijudasi o gbe egboli-a

(Ika 1.18-19)

³ Abi ijudasi ni o roli de, o ro suo khi a pfa ezo mu oli khi a ya gbe oli-a, o ri egbe pfo li-a, o nyene egbe rue ikpaghuo uye ali igbe egho ghi ighie eyi ekpodalo-ugamhi ali eni egbhali.

⁴ Oo we, "Mhi she lamhe, irari khi mhi she ri ogbo ni oa mholi olamhe okhoghua de," E oli, "Egboli oyi anye onoghua o ke la ogho? Yeŷe u lese."

⁵ Igho ijudasi o ku eni ikpagho kua eke elemhi Owa oyi Eshinegba, o vu ya soli egboli-a.

⁶ Igho ighie eyi ekpodalo-ugamhi e sano eni ikpagho eke, e oli, "Ikpagho oia na, awa aa ya ku we ma ikpagho ugamhi."

⁷ E gba ugbamhi nga eni ikpagho se, e rewe ya de eke onayi oni oo ma ekhe, ni a ri ilimhi epfese ke to agho.

⁸ Loli o ze ni a ro lu oli Eke Oia ramhi ogbe na amo.*

⁹ Igho ungmehi ni omekeguele ni a lu iJeremaya o ngme, o li bhale ya tse. Ni oo, "E rue ikpaghuo uye ali igbe ni e khi ikpagho ni egbo iZireni e lama fali shi oli egbe.

¹⁰ E rue eni ikpagho ya de eke eme onayi eni ee ma ekhe, abi Eshinegba o mheso na mhe mhi ngme."†

* 27:8 Li ze Ika 1.18-19 † 27:10 Li ze iZaka 11.12-13; iJere 19.1-13; 32.6-9

IPaleti o mhila iJesu ogbo
(iMak 15.2-5; iLuk 23.3-5;
iJon 18.33-38)

11 IJesu o migha odalo oyi igovunọ iRomu, oni igovunọ o mhila li, “Yeye u khi oghie oyi egbo iJu?” IJesu oo li, “Ti, Igho o khi abi u ngme.”

12 Ama o a mhọli emini o so shi ingme ni ighie eyi ekpodalo-ugamhi ali egbhali e ngme shi ọli egbe.

13 Igho iPaleti o mhila li, oo. “Wa a suọ emini a ngme shi e egbe?”

14 Ama iJesu o a lama so ọli abikhoghuo, o ga lolo ri abo sha oni igovunọ.

A pfa ezọ igbe-a mu iJesu
(iMak 15.6-15; iLuk 23.13-25; iJon 18.39--19.16)

15 Ini a da li ukpe iPasova, eri igovunọ oo rue ogbo oghuo ni a mu shi owa ighumha obọ-a na egbo iJu. Ikhi oni e ze, a rue igha le na wewe.

16 Eghẹghẹ agho, a me omose ni a mema lese shi ukhiakhiamhi ogbo, ni aa khena, ni a mu shi owa ighumha, ni a lu iBarabasi.

17 Igho abi eni egbo e ro le gba, iPaleti o mhila we, “Onoghuo elemhi egbo aava ena a nono ni mhi wolọ abọ-a na e? IBarabasi abi iJesu ni a lu Omiepfuese?”

18 Irari khi o she lese khi itobo khi ighie eyi egbo iJu ee biselemhi iJesu e ro mu ọli ghi lue.

19 Abi iPaleti o li shito ukpekhomhi ezọ oyọli, ughue ọli o ghie usomhi ghi ọli, oo.

“Khi mhue emini u li omose ni o a mhue emini o li egbo. Irari khi mhii me osoli elemhi elena ooyose shi ingme oyọli.”

20 Ama ighie eyi ekpodalo-ugamhi ali eni egbhali, e tano shi eni ebubu egbo elemhi, e lie iPaleti o rue iBarabasi obọ-a, ama a gbe iJesu-a.

21 Igho igovunọ o mhila we, “Elemhi aava ena, onoghuo o, a nono ni mhi rue obọ-a?” Wewe nya ee.

“IBarabasi!”

22 O mhila we, “Se mhi ya li iJesu ni a lu Omiepfuese ona sho?”

Wewe nya ee, “A ka ta li ma apfida!”

23 Ama iPaleti o mhila we, “Elo o ze, onobe onoghuo o riefe?”

Ama e kie tseşe leghe “A ta li ma apfida!”

24 Abi iPaleti o ro me khi lolọ e a mhọli emini lolọ ke ya li o, khi onyaghu o tigbe te o lasese, o die ame, o kpe abọ-a ukpeloe we nya, oo we “Mhi aa mhue obọ shi eghuli oyi omose ona o! Obọ oyee o la o!”[‡]

25 Eni egbo nya e li, “Olia eyọli e la ukhomhi oyanye ali oyi eniye eyanye.”

26 Igho oo rue iBarabasi obọ-a na we. Oo a gbe iJesu itali, o rue ọli na ekhọli-okhue eyi iRomu e ka ta li ma apfida.

Eni ekhọli-okhue e ri iJesu li egia

(iMak 15.16-20; iJon 19.2-3)

27 Igho ekhọli-okhue eyi iPaleti e rue iJesu lo elemhi

‡ 27:24 Li ze iDeut 21.6-9

agbala oyoli, o rue eni ekhòli-okhue nya le gasè òli.

²⁸ Ighò e gueghie òli itsua ni o sò, e ri itsua oyilè sò li.

²⁹ E ri igba do arula rughu òli. E ri ukpokpo mhòli òli obò ita, e wugha li odalo, e ri òli li egia. E liè òli, “Èshinègba o zè ni u tò agbò yeyè oghie iJu.”

³⁰ E to etè ku òli, e mie òli oni ukpokpo gbe òli ukhomhi.

³¹ E ri òli li egia se, e gueghie òli itsua eyilè ni e rò sò li eghò, e tigbe ri itsua eyòli sò li. E rue òli je obini a la ya gbòli-a.

A ta iJesu ma apfida gbe-a (iMak 15.21-32; iLuk 23.26-43; iJon 19.17-27)

³² Abi e li lè eghò, wèwè ali omòse ni a lu iSamò ongi iZirèni e ya lona, e ri itoto mu òli o tsua apfida oyi iJesu.

³³ E bhale asha ni a lu iGògòta. Abi iGògòta o ngme khi “Asha ugua ukhomhi ogbò.”

³⁴ Aghò e la ri onyò ni a ri emhi oyala shi na iJesu da, ama o to unu o bino, oà lama da li. §

³⁵ E ta li ma apfida se, e pfi onolo rò kemhi itsua ni o sò mhòli egbe abò. Onana o ri emini omekèguele o ngme bhale ya tse, ni oò. “E kemhi iwulu eyemhè, e pfi onolo shi ide eyemhè.”*

³⁶ E rièlè se, e shitò, e khè òli ekhè.

³⁷ E kèkè emini a gue shi òli egbe shi upepè oàra rò kphase kpeda nali. Emini a kèkè shi o

khi, Oàa khi iJesu, Oghie ègbò iJu.

³⁸ Ighò e gbe ighiatò aava ma li egbe. Oghuo o la ukièkiè obita, onòkpòle o la li ukièkiè ogbò.

³⁹ Ègbò ni ee dọsè, e pfi itsue odòda manya iJesu.†

⁴⁰ E liè “Yeyè ni u ya guoghò Owa Oyi Èshinègba-a, ogbèlè nuzi-esè u gbo tòli pfo. Tsumhi egbe è! Rote ukhomhi apfida ona tiemhile shò, ini Omi Èshinègba u khi.”

⁴¹ Ina ighie eyi ekpodalougamhi, ali esèşè Ishi eyi iMosisi ali egbhali e gbo li tsue òli.

⁴² E liè, “O tsumhi ègbòşè,” “Ama oà dobè tsumhi egbòli! Oa khi lòli khi oghie oyi iZirèni? Ini o da te ukhomhi apfida onana tiemhile ne, anye ya mie òli suò.

⁴³ Eri o ri egbe da Èshinègba o gbo liè khi, ‘Omi Èshinègba mhi khi.’ Awa ke bino ini Èshinègba o ya tsumhi òli mena.”‡

⁴⁴ Ighò khi ighiatò ni a ta ma apfida e li tsue òli.

Eghuli oyi iJesu (iMak 15.33-41; iLuk 23.44-49; iJon 19.28-30)

⁴⁵ Oguota o mu ekè obili o todè bi asha kpa elemhi iwakati esè.

⁴⁶ Agogo esè o de te, iJesu o viè lasele leghe oò “Eloi, Eloi, Lama Sabachi tani?” Abi ona o ngme khi “Èshinègba oyemhè, Èshinègba oyemhè, elò o zè ni u rò pfi mhè eso a?” §

§ 27:34 Li zè Iwolo 69.21 * 27:35 Li zè Iwolo 22.18 † 27:39 Li zè Iwolo 22.7; 109.25 ‡ 27:43 Li zè Iwolo 22.8 § 27:46 Li zè Iwolo 22.1

47 Egbọ eghuo ni e la aghọ e suọ ona, e liẹ li, “Elaja ọọ lu.”

48 Aghọaghọ, ọghuo ọ, ọ na ya rue isoso, ọ sọ li onyọ ni o khẹ-a, ọ gẹnọ li shi ukpokpo nise a ji iJesu unu ni ọ da.*

49 Ama enekpọle ẹ ọli, “Migha, zẹ ọli obo ni awa mẹ ini Elaja ọ ya bhale ya tsumhi ọli.”

50 Ighọ iJesu ọ gbo viẹ leghe, ọ ghu-a.

51 Eghẹghẹ aghọ tee, ode ug-bakpi, ni a rọ ta pfa ode-a ni o la elemhi Owa Oyi Eshinẹgba o te odode rọte idane kiẹse-a ya tiemhi ekẹ. Ekẹ agbọ o nighise, echẹ e vẹnọ-a.†

52 Iji e khueghie-a, ebubu ẹgbọ ni e pfuase ni eghuloa e guale bhale agbọ.

53 E fiẹnọ iji lasele. Abi iJesu ọ rọ rọte eghuli guale se, e je elemhi ẹoli no pfuase, e ri egbe khasẹ ebubu ẹgbọ.

54 Abi ekhọli-okhue ni a zẹ e ke khẹ iJesu ekhẹ e rọ mẹ abi ekẹ o li nighise ali emhi elese ni e mẹ nya, ulishi oo mu wẹ, e liẹ li, “Egbegbọ lọ khi Omi Eshinẹgba ọmọse ọna ọ khi.”

55 Ikpotoso ebubu e la aghọ ni e ta pfi-a fẹ. Eri e deba iJesu rọte iGalili bhale ni wẹwẹ e ri ukpẹloe khu ọli.

56 Eghuo ọ khi, iMeli ọngi iMagidaleni, iMeli inyi iJemhisi ali iJosefu, ali inyi iJemhisi ali iJoni.

Abi a ri iJesu to

(iMak 15.42-47; iLuk 23.50-56; iJon 19.38-42)

57 Abi ogbomhi o rọ mu ekẹ, ọmọse ni ọ pfue ọngi Arimatia ni a lu iJosefu ni ọ li khi ọghuo eniye odukhokho eyi iJesu,

58 ọ lẹ deba iPaleti ya mhila li olimhi ọyi iJesu, ọ rọli na lue ya tọ. iPaleti ọ ri unu bhale e ka rue ọli na iJosefu.

59 Ighọ iJosefu ọ rue ọli, ọ ri ode onogbọ no pfuase khuli ọli.

60 Ọ ri ọli tọ uji onogbọ oyọli ni a lẹse tọ shi elemhi echẹ. Ọ gheghele echẹ oniẹmhi khukhu oni uji unu, ọ vu je apfẹ.

61 Ighọ iMeli ọngi iMagidaleni ali iMeli ọnọkpọle e shitọ sọ alo ghue oni uji.

Ekhekhe ni e la oni uji

62 Ogbeakọlọ, ni o khi ẹlẹ Iyemhẹa oyi ẹgbọ iJu, ighie eyi ekpodalo-ugamhi ali ẹgbọ iFarisi e bhale deba iPaleti, ẹ ọli,

63 “Ọga, anye sa ya to khi abi oni ọloẹgbhue ọghọ ọ rọ la agbọ ọ liẹ khi, ‘Mhi ya guale ẹlẹ-ese.’‡

64 Mena ri unu bhale a ke ya khẹ aghọ ekhẹ ramhi ẹlẹ nuzi-ese, ini eniye odukhokho eyọli e khi bẹna ya tsua olimhi oyọli, ni e ke gueye ẹgbọ khi a she te eghuli guise ọli le. Egbhọli oni o ya kpukhokho ona, lọli o ke ya khọlọ dọse oni odode.”

65 iPaleti ọọ wẹ, “A rue ekhe-khẹ, a zẹ ni ẹ khẹ ekhẹ aghọ. A lolo khukhu ọli abi o ti ẹ ẹloe shi.”

* 27:48 Li zẹ Iwolo 69.21 † 27:51 Li zẹ Okiali 26.31-33 ‡ 27:63 Li zẹ iMat 16.21; 17.23; 20.19; iMak 8.31; 9.31; 10.33-34; iLuk 9.22; 18.31-33

⁶⁶ Igho e ya khukhu oni uji egbegbo, e zuse oli, e ze ekhekhe shi agho.

28

Irote eghuli guale oyi iJesu (iMak 16.1-10; iLuk 24.1-12; iJon 20.1-10)

¹ Ogbe o ya gbe khi ele iyemhea o dose ni o khi ele ni odode elemhi efo uka, iMeli ongi iMagidalen ali iMeli onokpole e le ya bino oni uji.

² Utoghuokpe eke o nighise, irari khi agheni oyi Onomhue o rote idane tiemhile. O gheghele oni eche ni o khukhu oni unu uji ode-a. O shito nga o.

³ O li abi erali akphala. It-sua ni o so e pfuase pepere abi otughunu opfopfo.

⁴ Ulishi o mu eni e la agho khe ekhe, ee guo, ubi o rue we pfi gbe.

⁵ Oni agheni oo eni ikpotso, "A khi ze ni ulishi o mu e irari khi mhi lese khi iJesu ni a gbe-a shi apfida a nono.

⁶ Oa la akana, o she te eghuli guale abi o kie kpe ngme. A bhale ya bino ashini a ri oli yeshi.

⁷ A nyanya ke le memena, a ka gueye eniye odukhokho eyoli khi. 'A she te eghuli guise oli le, khi mena, oo kia khe e, o je elemhi iGalili. Oobo a ya me oli.' Ghe i, a khi ye-le-a abi mhi gueye e."

⁸ Igho eni ikpotso e nyanya rote oni uji vu, ulishi o mu

we ama oghela o vo we elemhi, e na ya gueye eniye odukhokho eyoli.

⁹ Utoghuokpe iJesu o bhale deba we, oo. "Opfomhe o ka nu e la." E bhale deba li, e mu oli awe, e nyese ukhomhi gali.

¹⁰ IJesu oo we, "A khi ze ni ulishi o mu e, ama a ka gueye Inyoghuo-mhe e ke je iGalili. Agho e te ya me mhe."

Emini ekhe-khe e guele

¹¹ Abi eni ikpotso e ro vu se, eni ekholi-okhue ni e khe oni uji ekhe, e vu ya gueye ighie eyi ekpodalo-ugamhi emini a ga me nya.

¹² Igho ighie eyi ekpodalo-ugamhi e le deba eni egbhali e lona ye ugbamhi abi e ke ya li. E gba, e ri ikpokpomhi ikpagho na eni ekholi-okhue egho.

¹³ Ee we. "A lie khi, 'Eniye odukhokho eyoli e bhale ya tsua li vu abi obili o ro bi ni anye ro lese'a."

¹⁴ Ini igovuno o suo ona, anye ya pfa e shi eke, a khi ze ni emhikhoghuo o nase e udu."

¹⁵ Igho eni ekholi-okhue e mie we eni ikpagho e li abi e sese we. Eri ingme emini e riele o gbhiaku asha kpa ifuabo egbo iju. Ramhi ogbenamo, eri a kiele e ze oni okhe ona.

Usomhi ni o fune ni iJesu o ghie

(iMak 16.14-18; iLuk 24.36-49; iJon 20.19-23; Ika 1.6-8)

* 28:16 Li ze iMat 26.32; iMak 14.28; 1 iKori 15.5; iJon 21.1-23

16 Igho eniyẹ odukhokho ogbaghuo eyọli e je iGalili deba iJesu ukhomhi ute ni ọ seṣe wẹ.*

17 Abi e rọ mẹ ọli, e nyẹṣe egbe ga li, ama eghuo ọ e kiele khokho ọli.

18 Igho iJesu ọ kia ti mama wẹ, ọọ. “A she rue afu nya na agbọ ona ali iloghie na mhe.†

19 Irarigho, a fiẹ lase je asha kha asha, a ke ya ri ẹgbọ mele eniyẹ odukhokho eyemhe-a, a ri eva oyi Ita, ali oyi Ọmọ ali oyi Ayemhe-nọ-pfuase batazi.‡

20 A seṣe wẹ, e ke ri emhi nya ni mhi mheṣe na ẹ gbe akanya. A ghe i, mhi nu ẹ la ramhi ukpeṣe agbọ.”

† **28:18** Li zẹ iMat 11.27; iLuk 10.22; iFili 2.9; Efi 1.20-22 ‡ **28:19** Li zẹ Ika 1.8

Usonhi Onete oyi iJesu iKirisiti ni iMaki O keke

*Itsabọ oyi iJoni Oni ọọ
batazi egbo*

*(iMat 3.1-12; iLuk 3.1-18;
iJon 1.19-28)*

1 Ona o khi igbaekele
oyi usomhi onete oyi iJesu
iKirisiti Omi Eshinegba.

2 A keke ọli shi Ebe-no-
pfuase ni ọmekẹguele oyọli ni a
lu Azaya o keke. Ni Eshinegba
o la lie,

“Mhi ya ghie aghiusomhi
oyemhe ralo ne.

Oni o ya be ode
shi eke khe.”*

3 “Ogbọ o la odagbe
e pfi okokkhue. Oo lie,

‘A riẹle ode
shi eke khe Onomhue,
ni ọọ bhale.

Riẹle oni ode sheshe
ni o rote.’ †

4 Igho IJoni o li bhale, ọọ
batazi egbo obini odagbe
ifufu, ọọ tse abo, ọọ lie, “A mu
pfi lase olamhe eye e le bhale
deba Eshinegba ini a ri olamhe
topfa e.”

5 Igho egbo e rote eke iJudia ali
eoli iJerusalemu le deba IJoni.
Ee zono olamhe eyewe ye oli.
O la oke iJodani batazi egbo.

6 Ode ni a ri iriria eyi alakumi
do, iJoni o ro fia itsua so. O
ri ekuẹ riẹle ogbene mu oku.

Initso ali oribo e khi eminale
eyoli.‡

7 Abọ ni ọọ tse gueye agbo
khi: “Omose ni o ke ya bhale
elelese ode ukhokho oyemhe,
o fu dose mhe, o mholi ek-
pabo dose mhe. Mhi aa fu
ramhi oni ọọ taghiẹ uli ni o la
ekuẹ ni o so-a.

8 Ame mhi ro batazi e
memena, ama Ayemhe-no-
pfuase o ke ro ya batazi e.”

*Ibatazi ali imufe oyi iJesu
(iMat 3.13-4.11; iLuk 3.21-
22; 4.1-13)*

9 Oa te agho tese ne, ni iJesu
o ro rote iNazareti ni o la eke
iGalili bhale ni iJoni o la oke
iJodani batazi oli.

10 Abi iJesu o ro lese rote
elemhi oke ji egbe ngale te,
o me khi idane o khueghie.
Ayemhe oyi Eshinegba o li
abi anekhukhu rote idane
tiemhile ya ma li egbe.

11 A suo khi uruli o rote
idane ngme tiemhile, ọọ,
“Omimhe ni mhi nono ingme
oyoli u khi. U ma ri egbe e mu
mhe gba.”§

12 Utoghuokpe, Ayemhe
oyi Eshinegba o rue iJesu je
odagbe.

13 Ogbele egbhueva o la
oobo. Okphaghiẹ, ni o khi
oghie ayemhe ebe, o mu oli fe.
iJesu o nu elamhako la oobo,
ama igeni eyi Eshinegba e ri
ukpeloe e khu oli.

*Eniye odukhokho eni
odode ni iJesu o ze*

*(iMat 4.12-22; iLuk 4.14-
15; 5.1-11)*

* 1:2 Li ze iMala 3.1 † 1:3 Li ze Aza 40.3 ‡ 1:6 Li ze 2 Ighie 1.8 § 1:11 Li ze
Igbae 22.2; Iwolo 2.7; Aza 42.1; iMat 3.17; 12.18; iMak 9.7; iLuk 3.22

14 Abi a rọ mu iJoni shi owa ighumha se, iJesu ọ je iGalili ya tse abọ usomhi onete oyi Eshinẹgba.

15 Oọ liẹ, “Oni eghẹghe o she bhale, Eghiele oyi Eshinẹgba o she ti mama awa. A mu pfi lase olamhe eye ẹ le, ni a mie oni usomhi onete suo.”*

16 Abi iJesu ọ rọte epfepfe oke oniemihi oni o khi shi, na lui iGalili kia le, ọ me iSamọ ali inyoghuo ọli Aduru. Egbifele e khi. E pfi aga lo elemhi oni oke, ee gbe ifele.

17 IJesu oọ we, “A deba mhe, mhi ya sese e abi a ke liẹ ke ti egbo gbili.”

18 Aghoaghọ e ku iga eyewe shi eke, ẹ deba li.

19 O ke te agho je odalo denẹ, ọ gbo me inyoghuo etuava, ijemhisi ali iJoni imi iZebedi e la elemhi oko-oke oniemihi, e zu iga eyewe.

20 Abi iJesu ọ rọ lese me we, o lu we e deba luẹ, aghoaghọ e pfi itawe ali egbo ni e nu we ye shi elemhi oko-oke oniemihi, e deba li vu.

Ijesu ọ khu omose ayemhe ebe egbe-a

(iLuk 4.31-37)

21 IJesu ali eniye odukhokho eyoli e bhale ọli iKapanomu. Ogbelẹ iyemhea ni o ke deba li, iJesu ọ dọse lo elemhi owa ugamhi, ọ la agho sese.

22 O ri abọ sha egbo ni e ri esọ kpe abi ọ li sese, itobọ khi eri ọ sese egbo abi ogbo ni ọ lese emini oọ sese, osese oyoli o kiọda shi oyi eni e sese Ishi eyi iMosisi.†

23 Utoghuo kpe omose ni ayemhe ebe o la egbe, ọ lo elemhi oni owa ugamhi le. O tsesẹ gbaa! Oọ,

24 “Elo wa nono anye egbe, iJesu na iNazareti? Eri u bhale ya pfuse anye-a? Mhi ga lese oni u khi. Oni O pfuase oyi Eshinẹgba u khi.”

25 IJesu ọ dese oni ayemhe obe, oọ li, “Guese unu pia, te ọli egbe lase le.”

26 Oni ayemhe obe o nighise oni omose, o mu ọli pfi gbe. O pfi okokohue, o rọte oni omose egbe ya lase.

27 O ga ri abọ sha egbo nya. E mhila egbe we, “Onoghuo na? Osese onogbo ni o mhọli ekpabọ! Eri ọ ga nu ayemhe ebe ẹ ngme, e ga suo esọ na li.”

28 Aghoaghọ ingme oyi iJesu o gbe eke-a asha kpa eke iGalili.

Ijesu ọ ri ebubu egbo ze
(iMat 8.14-17; iLuk 4.38-41)

29 IJesu ali eniye odukhokho eyoli, ghe ijemhisi ali iJoni, e ga rọte owa ugamhi fiẹ lasele, e ya je apfe oyi iSamọ ali Aduru

30 Ogo iSamọ oni okpotso, ọ yeshi ghua ughuamhi iba. IJesu ọ lese ramhi agho, a gue ingme oyoli ye iJesu.

31 Igho ọ lo deba li, ọ mu ọli obọ, ọ mu ọli ukpho vule. Igho eni iba e lase ọli egbe le. O fele we epfese.

32 Elogbomhi elegho khi ovo oọ tiemihi eko, egbo e tsua eni

* 1:15 Li ze iMat 3.2 † 1:22 Li ze iMat 7.28-29

ɛa ze, ali eni iyemhẹ ɔkphaghie e yeşe ngme bhale ghi iJesu.

³³ Egbọ nya ni e la oni ɛoli e le gba odalo oni owa.

³⁴ IJesu ọ ri eni ɛ ghua, ighuamhi khi ighuamhi, ze. Ọ khu ayemhẹ ebe ebubu ɛgbọ egbe a, ama ọa zẹ ni eni ayemhẹ ebe eghọ e ngme emhikhoghuo unu lasele, itobọ khi e leşe ọni ọ khi.

IJesu ọ la iGalili tse abo usomhi onete
(iLuk 4.42-44)

³⁵ Ogbie-fiefie ogbeakọọ khi obili ọa pfo ogbe ne, iJesu ọ fiẹ lase je ashini o da-ya, ọ ya sọ iromhi.

³⁶ ISamọ ali apfọli ni e kpọle, e vu ya nono ọli.

³⁷ Abi e rọ mẹ ọli, ẹẹ ọli, “Egbọ kpa ẹẹ nono ẹ.”

³⁸ IJesu ọọ wẹ, “Awa mema ya je ɛoli oboese, ikhi apfe eni e timama akana, ni mhi li la oobọ tşe abọ, irari khi ona o zẹ ni mhi rọ bhale.”

³⁹ Ighọ ọ kia gase eke iGalili nya tse abọ. Ọ la owa ugamhi eyewẹ tse abọ. Ọ khu ɛgbọ ayemhẹ ebe egbe ku-a.‡

IJesu ọ ri ọni efafe e mu ze
(iMat 8.1-4; iLuk 5.12-16)

⁴⁰ Ọmọse ni efafe e mu ọ bhale deba iJesu. Ọ wugha li odalo, ọọ lema li, ọọ, “Ini o ghọle ẹ, u dobe ya remhẹ ze, u remhẹ khi ọni ọ pfuase.”

⁴¹ Ighọ elemhi ọli, ee ala iJesu, ọ nise obo-a ti ọni ọmọse, ọọ li, “O ghọle mhe, khi ọni ọ pfuase.”

⁴² Aghoaghọ eni efafe e lase ọli egbe le, ọ ze, ọ khi ọni ọ pfuase.

⁴³ IJesu ọ gueye ọli, ọ ke vu. Ọ lolo tse agua ye ọli,

⁴⁴ ọọ li, “Khi gue ingme ona ye ɔgbokhoghuo, ama le ya ri egbe ɛ khasẹ ekpodalougamhi eyi Eshinegba, ni e te ɔkpẹ ne, ni u luase obo ni iMosisi ọọ a ke luase, ini a ri ɔgbọ lina ze. Isheghọ, ni o khi ɔtşele na wẹ khi u she ze.”§

⁴⁵ Eri ọni ọmọse ọ ri ochoghọ ngme ọli kiakiala gboo, ọ miatşe oni ingme onete ku asha kpa. Itobọ ona, iJesu ọa ke dobe lo ɛoli okhoghuo le gboo. Eri ọ ke la ọdagbe obini o da-ya. Abi o riẹ khi ighọ, eri ɛgbọ nya e kie rọte asha kpa ẹ bhale deba li.

2

IJesu ọ ri ọmọse ni ọ guoghọ-a ze
(iMat 9.1-8; iLuk 5.17-26)

¹ Ikuku ogbele e doşe, iJesu ọ gbo lo elemhi iKapanomu, eni ɛgbọ e suọ khi ọ she bhale apfe.

² Ebubu ɛgbọ e le gba ramhi ni ɔgbọ a ke mẹ ashikhoghuo ni o kpọle, ya ramhi olase unu-ode. IJesu ọ tse abọ oni usomhi ye wẹ.

³ Ighọ emọse aane e tsua ọmọse ni ọ guoghọ-a adigege shi iya bhale ghi iJesu.

⁴ Abi eni emọse ɛa rọ mẹ asha tsua li lole ashini iJesu ọ la, itobọ ɛgbọ ni e ghọ bu doşe, e nga ukhomhi oni owa rọte

‡ 1:39 Li zẹ iMat 4.23; 9.35 § 1:44 Li zẹ iLev 14.1-32

ashini iJesu o la gbese ekpha-a. Abi e ro gbese o lia se, e ri li ri oni omose tiemhile, abi o kie li yeshi iya. ⁵ Abi iJesu o ro me irudunga oyewe, oo oni omose ni o guogh-a, "Omimhe, a she ri olamhe topfa e."

⁶ Ama eni e sese Ishi eyi iMosisi ni e shito akagh, e sa o udu oyewe, e lie,

⁷ "Elo o ze ni oni ogbo ona o ro ngme ungmehi onana unu. Eri o pfi unu-a! A li me oni o dobe ya gbe olamhe kua na ogbo? Oa khi Eshinegba lueghuo?"

⁸ Aghogh o iJesu o she lese elemhi ayemhe oyoli emini e sa shi elemhi udu oyewe, oo we, "Elo o ze ni a ro sa usamhi onana.

⁹ Onoghuo o kele ne, ni a ro lie oni omose ni o guogh-a, 'A ri olamhe topfa e,' abi khi 'Vule, rue iya oye ni u ke kia?'

¹⁰ Mhi ya ro li khasa e khi Omi Ogbo o mholi ekpabo elemhi agbo ona ni o ro gbe olamhe kua na ogbo." Igho o gueye oni omose ni o guogh-a egho,

¹¹ "Mhie ye u vule, u rue iya oye, u ke je apfe."

¹² Oni omose o vule, o rue iya oyoli, o la akpewe nya kia vu. O ri abo sha egbo kpa. Ee kueghie Eshinegba, e lie, "Anye ea kpe me onana ghue oo!"

Ijesu o lu iLevi

(iMat 9.9-13; iLuk 5.27-32)

¹³ Ijesu o gbo je epfe oke oniemhi ni o khishi. Ebubu egbo e bhale deba li, o sese we.

¹⁴ Abi o kia le, o me omionoga iLiva omi Afeusi khi

o shito okhola eyi eni e mie oga. Ijesu oo li, "Deba mhe." Igho o vule deba li.

¹⁵ Abi iJesu o la ayi iLevi le eminale elogbomhi, emionoga ni e bu ali egbo ena olamhe e li nu oli ali eniye odukhokho eyoli le emhi, irari khi egbo ni e bu e deba li.

¹⁶ Abi egbo eni ee sese ishi na lui iFarisi e ro me khi iJesu o nu egbushia ali emionoga e le eminale, e mhila eniye odukhokho eyoli, "Elo o ze ni o ro nu emionoga ali egbushia e le eminale?"

¹⁷ Ijesu o suo onana, oo we, "Egbo ni e ze ea mhue emini e ri obo e li. Oni oo to, o ye apfe obo. Oa khi eni e pfuase ne mhi bhale ya lu, ama egbushia."

Omhila ingme azumhi

(iMat 9.14-17; iLuk 5.33-39)

¹⁸ Eghenge oghuo eniye odukhokho eyi iJoni Oni oo batazi egbo ali egbo iFarisi ee pfi azumhi. Egbo eghuo e bhale ya mhila iJesu, e oli, "Elo o ze ni eniye odukhokho eyi iJoni ali enayi egbo iFarisi e ro pfi azumhi ni eye ea ro pfi?"

¹⁹ Ijesu o so we o, oo we, "Se epfese eyi omose ni o rue omueshi onogbo e lie ke pfi azumhi ini oni omose o kie nu we shito? Ea me asha pfi azumhi ini o kie nu we shito.

²⁰ Ama eghenge o ya bhale ni a ro rue oni odo oni omueshi vu. Eghenge agho, e ro tigbe ya ke pfi azumhi.

²¹ "Ogbo a ya khi ode onogbo gbela ma ode onodi.

Ini u ligho, eri oni ode onogbo o ya nyanọ oni ode onodiọ-a. O ke nyanọ-a dọse abi o kpẹ li.

²² Ali khi ọgbọ ọa ya ku onyo onogbo shi akpaba onodiọ. [Ikhi akpaba ni ẹgbọ ifu e ku onyo shi.] Ini u ligho, eri oni onyo o ya vese oni akpaba-a. Oni onyo ali oni akpaba e ga li opfu-a. Akpaba onogbo a ku onyo onogbo ẹ lo.”

Onomhue oyi ogbele iyemhea
(iMat 12.1-8; iLuk 6.1-5)

²³ Ogbeleghuo ẹle iyemhea oyi ẹgbọ ifu, iJesu ọ rọte ifui ishemhi iakpa kia dọse. Eniye odukhokho eyọli e li nu ọli kia. Igho e li be eni iakpa.*

²⁴ Igho iFarisi e mhila iJesu, “Elo o ze khi eniye odukhokho eye ẹẹ riẹle emini a ghue ẹle iyemhea?”

²⁵ IJesu ọ sọ we ọ, ọọ, “Aa kpẹ me ọli ze Ebe-no-pfuase emini Oghie iDefidi ọ riẹle abi okiamhi o rọ gbe ọli ali eni e nu ọli kia?”

²⁶ Eghẹghẹ ni Abiata ọ rọ khi Okpeda na ekpodalougamhi eyi Eshinegba, ni Oghie iDefidi ọ rọ lo Owa oyi Eshinegba ya rue ibuledi ni a rọọ ga Eshinegba le, ọ kholo na eni e nu ọli kia le. Ibuledi ona ighie eyi ekpodalougamhi tse, ushi o lama e ke le we.”†‡

²⁷ Igho ọọ we, “Eri a ma ogbele iyemhea na ọgbọ, aa ma ọgbọ na ogbele iyemhea.

²⁸ Itobọ igho, Omi Ogbọ ọ khi Onomhue, li shi oyi ogbele iyemhea.”

3

Omose ni ọ ghu obọ oghuo-
a (iMat 12.9-14; iLuk 6.6-11)

¹ Efelese khi iJesu ọ gbo je owa ugamhi, omose ni obọ oyọli oghuo o ghua, ọ la akaghọ.

² Egbọ eghuo e nono ashini e te ya me asha gue ingme shi iJesu egbe. E ri ukpelo shi ọli egbe ini ọ ya ri ọgbọ ze ẹle iyemhea.

³ IJesu ọọ oni omose ni ọ ghu obọ-a, “Vule migha odalo oyi ẹgbọ kpa.”

⁴ IJesu ọ mhila we, “Onoghuo o gbe akanya elemhi ushi oyawa ne ẹle iyemhea? Ni a rọ riẹle onete abi ni a rọ riẹle onobe? Ni a rọ tsumhi agbo oyi ọgbọ abi ni a rọ pfuse ọlia?” Ama e tsaghie a.

⁵ Igho iJesu ọ ri elemhi ibibi bino we gase, udu oyọli o yese-a shi udu obe ni e mhue. Ọọ, “Nomose nise obọ-a.” Ọ nise ọli-a. Igho obọ oyọli o gbo li abi o kpẹ te eke li

⁶ Igho ẹgbọ iFarisi e fiẹ deba eniye odukhokho eyi Erọdu, e ya gba ugbamhi abi e li ya gbe iJesu-a.

Ebubu ẹgbọ e deba iJesu

⁷ Igho iJesu ali eniye odukhokho eyọli e lase we iteva le ya je okẹ na iGalili. Ebubu ẹgbọ e rọte iGalili deba iJesu.

⁸ Abi e rọ suọ emini ọ riẹle, ebubu ẹgbọ e bhale deba li, rọte eke iJudia ali iJerusalemu, ali Idumia ali

* 2:23 Li ze iDeut 23.25 † 2:26 Li ze iLev 24.9 ‡ 2:26 Li ze 1 iSam 21.1-6

eke ni o kpe obo na iJodani ali epfepfe iTire ali iSidoni.

⁹ Itobo khi eni egbo e bu dose, iJesu o gueye eniye odukhokho eyoli e nono oko-oke oni ikeke ni loli lo o ini egbo e khi sha mu lue.

¹⁰ Itobo khi o she kpe ri ebubu egbo ze, egbo eni ea ze, e mise egbe ini e me asha ramhi oli egbe ri obo ti oli.*

¹¹ Eghēghē kpa ni egbo ni ayemhe ebe e yese e ngme e ro da me iJesu ne, e de ya yeshi eke odalo oyoli. Ee tsese, ee lie, “Omi Eshinegba u khi.”

¹² Ama, o tse agua ye eni ayemhe ebe egho e khi gue oni loli khi le.

Ijesu o ze ighiusomhi na ke ogbava

(iMat 10.1-4; iLuk 6.12-16)

¹³ Ijesu o nga ukhomhi ute, o lu emose ni e ghole oli. E bhale deba li.

¹⁴ O ya ze egbo ogbava ke, o lu we ighiusomhi na ke. O ze we ni e nu lue ke kia, ali ni lue me we ke ghie usomhi fie ke tse abo usomhi onete,

¹⁵ ali ni e gbo mhue ekpabo ni e ro ke khu egbo ayemhe ebe egbe kua.

¹⁶ Ena e khi otuogbava ni o ze. ISamo, oni iJesu o lu iPita.

¹⁷ IJemhisi ali inyoghuo-oli iJoni imi iZebedi (eni iJesu o ri akiseva iBonajisi na. Ni o migha shi Imi Akphala),

¹⁸ Ali Aduru, iFilipu, iBatomliu, iTomosi, iJemhisi omi Afeusi, ali iTadiusi, iSamo [oni ije-odalo oyi edeli iJu oo ghō mu egbe.]

¹⁹ Ali iJudasi Isikaroti oni o ri iJesu de.

Ijesu ali iBezebo

(iMat 12.22-32; iLuk 11.14-23; 12.10)

²⁰ Ijesu o nyene egbe je apfe. Igho ebubu egbo e gbo tiggibili ramhi khi iJesu ali eniye odukhokho eyoli ea me asha, we khi eminale e ya le.

²¹ Abi apfe o e ro suo ona, E nono khi wewe e ya mu oli je apfe. Irari khi eri e lie, “Ujili o she e kpha li.”

²² Eni ee sese ishi ni e rote iJerusalemu tiemhie, e lie, “Ayemhe iBezebo ni o khi Okphaghie o la li egbe yese oli e ngme! Loli o khi oghie oyi iyemhe ebe ni o ri ekpabo na li ni o ro ke khu egbo iyemhe ebe egbe kua.”†

²³ Igho iJesu o lu we, o ri okhe irokhokho nu we ngme, Oo we, “Se okphaghie o lie ke khu okphaghie?”

²⁴ Ini ushishi e kemhi egbe we shi ikui-iku ni e ro nu egbe we e kholi, eri oni ushishi oo de.

²⁵ Ini omhue-apfe o kemhi shi ikui-iku ni e ro nu egbewe e kholi, eri oni omhue-apfe o ya de.

²⁶ Ini okphaghie o mu okholi vule shi egboli o, oa ya to, eri o ya de, ukpese oyoli o she ramhi.

²⁷ “Ogbo okhoghuo oa la o ni o dobe ya lo owa oyi omose-akama ya ti oli itsua eke-a ini oa kpe mu oni omose-akama ge shi eke. Eghēghē agho, o tigbe dobe ti oli itsua eke-a.

* 3:10 Li ze iMak 4.1; iLuk 5.1-3 † 3:22 Li ze iMat 9.34; 10.25

28 “Egbegbi ingme mhi gueye ẹ, khi, aa me olamhe ni ogbo o lamhe ali ungmehi ipfiunu-a ni ogbo ya ngme, ni aa dobe ro ya gbekua na li.

29 Ama onini o da ngme ungmehi ipfiunu-a deba Ayemhe-no-pfuase ne, aa ya ro topfa li, irari khi olamhe ona agboagbo o pfi obo lo.”‡

30 Itobo khi e oli khi, “O mholi ayemhe ebe,” o ro ngme ona.

Inyo iJesu ali inyoghwo oli eni emose

(iMat 12.46-50; iLuk 8.19-21)

31 Igho inyo iJesu ali inyoghwo oli ee bhale. E migha oolase. E ghie ogbo o ka lu iJesu ghi ewe.

32 Ebubu egbo e shito gase oli. E bhale ya gueye oli khi inyoli ali inyoghwo oli e la oolase, khi ẹẹ nono ni wewe e me oli.

33 O mhila we, “Eghuo e khi inyemhe ali Inyoghwo-mhe?”

34 Igho o bino eni e shito gase oli, oo, “Enana e khi inyemhe ali Inyoghwo-mhe!

35 Onini o da riye emini e ghole Eshinegba, o khi Inyoghwo-mhe onomose ali onokpotso ali inyemhe.”

4

Okhe irokhokho oyi oni o ko ikpamhi emhi

(iMat 13.1-9; iLuk 8.4-8)

1 IJesu o ke gbo la epfe oke ni o khi shi na iGalili sese. Egbo ni e le gase oli e bu dose ramhi ni o ro ya lo elemhi

oko-okeshito. Oni oko-okeshito o la elemhi oni oke. Eni egbo e ke migha egele eseso oni oke.*

2 Emhi ebubu o ri okhe irokhokho o sese we. Oo we.

3 “A ghe i! Oghiale o ya la o. O fiye ya ko iakpa.

4 Abi o li kia miatse eni iakpa, ikpamhi eghuo o e de kua ode, igbo ipfeli e bhale ya sanwe le.

5 Eghuo o, e de kushi eke ni o khi okpegbhe, ni eke ea lolo la. Igho e nyanya ze, e fu, ama oni eke oa limhi.

6 Ama abi ovo o ro to, o tose we a, e khakha, itobo khi ea me eke ni o limhi pfi imhili lo.

7 Ikpamhi emhi elese e de kulo ifui igba. Igho igba e ze lasele tono eni iakpa abi e ro fu vule. Itobo igbo, ea ke dobe ni e fu nyanokhe lasele.

8 Ama ikpamhi eghuo, e de shi eke onete. Eni ikpamhemhi e ze, e fu, e nyanokhe lasele. Eghuo o, e mhuẹ ikpamhi uye ali igbe, eghuo o, e mhuẹ ikpamhi egbhueshe, elese e mhuẹ egbhueshe.”

9 Igho iJesu, oo, “Oni o mholi eso, o suo.”

Emini o ze ni a ro ze oni okhe irokhokho

(iMat 13.10-17; iLuk 8.9-10)

10 Abi iJesu lolighuo o ro shito, eniye odukhokho ogbava eyoli ali egboese ni e li suo abi o ro ngme, e bhale deba li, o gueye we emini o ri oni okhe irokhokho ngme.

11 Oo we, “A she ri osheli oyi Eghiele oyi Eshinegba na e.

‡ 3:29 Li ze iLuk 12.10 * 4:1 Li ze iLuk 5.1-3

Ama okhẹ iròkhòkhò a rọ gue ungmehi nya yẹ ẹgbọse.

¹² Ni a bhale ya ẹ khi,

“ ‘E kha riẹ nya alo-a shi eke ẹa tigbe ya mẹ emhikhoghuo, ali e kha riẹ ku esọ a shi eke, ọa ya lo wẹ esọ.

Irari khi ini ọa khi ighọ, e doḅe mẹ eke, e suọ esọ, e mu pfi deba Ẹshinegba, ọ rọ topfa wẹ.’ ”†

Ijesu ọ guele emini oni okhẹ iròkhòkhò o ngme

(iMat 13.18-23; iLuk 8.11-15)

¹³ Ijesu ọ mhila wẹ, ọọ wẹ, “Aa lẹsẹ emini a ri okhẹ iròkhòkhò ona ngme? Sẹ a li tigbe ya lẹsẹ emini a ri okhẹ iròkhòkhò okhoghuo ngme shọ?

¹⁴ Eni iakpa ni ọni ọghiale ọ miatse ẹ ku, e migha shi ungmehi oyi Ẹshinegba.

¹⁵ Eri ikpamhi iakpa ni e de shi ode e li abi ẹgbọ eghuo ni e kha da lẹsẹ suọ oni ungmehi ne, Ọkphaghiẹ ọ bhale ya rue wẹ luẹ udu le.

¹⁶ Ikpamhi emhi ni e de shi eke ni o li echeche, e li abi ẹgbọ ni e kha da lẹsẹ suọ oni ungmehi ne, e ri udu oghẹle mie ọli.

¹⁷ Ama, ọa ya tiemhi wẹ eke elemhi. Ẹa doḅe migha tẹsẹ, itobọ khi ọa pfi imhili lo eke. Itobọ ighọ, ini ọmunu o bhale ali ni a rọ mu okhọli vule shi wẹ ọ rọte oni ungmehi ni e suọ, e keḅe de ode-a.

¹⁸ Ikpamhi emhi ni e de pfilo ifui igba eri e li abi ẹgbọ ni e kha suọ oni ungmehi,

¹⁹ isamhi ingme agbọ ona, ali ọghuẹmhe ẹpfue, ali ọghuẹmhe khi ọghuẹmhe e lu guese oni ungmehi-a, ẹẹ tono ọli igba, itobọ ighọ ọa mọ imọmhi.

²⁰ Ama ikpamhi emhi ni e de shi eke onete, e li abi ẹgbọ ni e suọ ungmehi, e mie ọli suọ, e mọ imọmhi enete. Eghuo e mhue ikpamhi uye ali igbe, eghuo e mhue egbhuesẹ. Eghuo, e mhue egbhueshe.”

Ákpá ni a rọ nga ukhomhi asha

(iLuk 8.16-18)

²¹ Ijesu ọ gbolo ẹ wẹ “Ọgbòkhoghuo ọọ ya ri ákpá ru lasese, ọ ya rue atalabi guese ọli mu eke, wẹkhi eri ọ ke ya rue ọli ya sheli ufui ukpho?‡

²² Emiemini a rọ sheli, o ya lasese gbo alo gbugbugbu. Aa mẹ emhi osheli ni aa ya khueghie a. §

²³ Ọnini ọ mhọli esọ, ọ ri esọ shi eke ni ọ suọ.”

²⁴ Ọ gbolo ẹ wẹ, “Emiemini u da suọ kpa, sa ọ bie! Emiemini u da rọ shi ushi rọ gue ẹgbọse ẹzọ, Ẹshinegba ọ li ya rọli gue ẹ ẹzọ. Oye ọ gbo ya ze nẹ.

²⁵ Ọni ọ kpẹ mhọli ne, a ya gbo rọ ma ọ na li, ama ọni ọa mhọli a ya mie ọli ukukuọ ni ọ gbo mhọli.”*

Okhẹ iròkhòkhò oyi ikpamhi emhi ni ọọ zẹ

† 4:12 Li zẹ Aza 6.9,10 ‡ 4:21 Li zẹ iMat 5.15; iLuk 11.33

§ 4:22 Li zẹ iMat 10.26; iLuk 12.2 * 4:25 Li zẹ iMat 13.12; 25.29; iLuk 19.26

26 Ijesu o gbolo e, “Abi Eghiele oyi Eshinēgba o li na. Eri o li abi ini omōse o miatse ikpamhi iakpa kia ku shi eke.

27 Obili o kha bi, o ya lese a, ogbe o kha gbe o guale, ama eni ikpamhi emhi e e ze lasele, e e fu vule. Ama o a ya lese abi o li kia.

28 Eke lo lighuo o lese abi o li ri emhi ekomhi e e bie. Oni odode, o kha ze ukhuli, o ke fu vule, o nyan o ifele, o ya ri umomhi lasele.

29 Eni iakpa e kha da bie ne, oni o gua we o rue agaga ya gbe we, itobo khi eghēghe ikhise o ramhi.”†

Okhe irokhokho oyi ukpamhi oora imositadi

(iMat 13.31-32,34; iLuk 13.18-19)

30 Ijesu o gbolo e we, “Elo awa mema ri Eghiele oyi Eshinēgba ya khokho? Okhe irokhokho onoghuo awa mema ya ze roli lo ebo eso egho o?”

31 Eri o li abi ukpamhi oara imositadi ni ukpamhi o li o she ne nya agbo ona, ni obo o ro ko eke.

32 Ini a roli ko, o ze, o fu vule, o mele unyan o ni o fune a shi ishemhi, ni o mholi iguabo eniemhi, ni ipfeli e bhale ya ku eko shi.”

33 Okhe irokhokho enana ijesu o ro nu we ngme oni ungmehi, ramhi ashini o lo we eso ramhi.

34 Aa me ungmehi ni o nu we ngme, ni o a ri okhe irokhokho nu we ngme. Ama ini o de te o li ali eniye

odukhokho eyoli, o ro ri emini o nu we ngme nya a lo we eso.

Ijesu o pfomhise akpepeli
(iMat 8.23-27; iLuk 8.22-25)

35 Ele ogbomhi elegho, ijesu oo eniye odukhokho eyoli, “Awa da je ukiekie oke obini o kpo le.”

36 Igho e ze ebo ni e legba obo shi agho, eni eniye odukhokho e ya lo elemhi oko-oke oni ikeke ni ijesu o she lo shito. E gua li vu. Oko-oke elese e li deba we vu.

37 Utoghuokpe, akpepeli oniemhi oo li, oo zughuse oni oke, ni ame e fiase kulo elemhi oni oko-oke, ramhi ni o ro ro ame. Ukuku o kpo ni o a ro kulue.

38 Ijesu o la ukhokho oni oko-oke oniemhi, o lese-a ri ukhomhi nga akpesukhomhi. Igho eniye odukhokho eyoli e guise o li le. E o li, “Ose se, wa bie ga lie ini awa gho ghua?”

39 Igho ijesu o ti vule, o dese oni akpepeli, oo li, “Li tsuke.” Igho oni akpepeli o pfomhe te. Asha kpa o pfomhe tsuke.

40 Igho ijesu oo eniye odukhokho eyoli, “Elo o ze ni a ro ligho o na ulishi. Eri aa kie mholi irudunga?”

41 Ulishi oo mu we, e mhila egbe we, “Oghuo ona o khi? Ghe akpepeli ali izughuse oke e ga suo eso a na li.”

† 4:29 Li ze ifoe 3.13

5

Ijesu o ri omose ni ayemhe ebe o la egbe ze

(iMat 8.28-34; iLuk 8.26-39)

¹ Ijesu ali eniye odukhokho eyoli e da okẹ iGalili je ukiẹkiẹ eke iGerasenesi.

² Abi ijesu o lese rote el-emhi oko-okẹ lasele, omose ni o mhọli ayemhe ebe, o rote atalimhi ni o la agho bhale deba ijesu.

³ Ifui atalimhi oni omose oọ la. Ogbokhoghuo o a ke dobe ri iweghe ge ọli.

⁴ Egheghe kpa, a ro ri iweghe ge ọli abo ali awe, ama eri oọ kphuru we a, o taghie we a, o shashe we a. Ogbokhoghuo o a dobe mu ọli.

⁵ Nobi-nogbe o ro la ifui atalimhi ali ikhomhi ite dudu gase. Oo pfi okokokhue. O ri echẹ fianọ egbeoli.

⁶ Abi o lese ta pfia me ijesu te, o na bhale ya wugha li odalo.

⁷ O tsesẹ leghe, oo, "Ijesu Omi Eshinẹgba ni o Yagha Ne Nyaa, elo wa nono mhe egbe? Mhi ri Eshinẹgba lema e khi na mhe osoli!"

⁸ Itobo emini o ro ngme na khi, ijesu o she kpẹ gueye ọli, "Ye ye ayemhe obe, lase oni omose ona egbe le."

⁹ Igho ijesu o mhila li, "Se a lui eva oye?" Oo, "Eva oyemhe o khi Olele egbo, itobo khi anye bu gba."

¹⁰ O gbo lema ijesu o kpẹkpẹ, o khi khu ewe oni eke ya lase.

¹¹ Igulu ni e bububu e la epfe ute ni o la agho le eminale.

¹² Eni ayemhe e lema ijesu, "Khu anye ya lo igulu egho, ze ni anye ya lo we egbe."

¹³ Ijesu o ri eghẹghe na we, e ka lo eni igulu egbe. Igho e rote oni omose egbe lasele e ya lo eni igulu egbe. Eni igulu ni e ramhi agbele eva, e rote egele na ya kulo oni okẹ, e ghuloa nya.

¹⁴ Eni e ri ukpeloe e khu eni igulu e na je ifui apfe ali eoli nya ni e la oni eke ya guele emini a me. Igho egbo e bhale ya bino emini a me.

¹⁵ Abi eni egbo e ro bhale deba ijesu, e me oni omose ni ayemhe ebe ni e bu e kpẹ la egbe, khi o shito agho, o ri itsua so, egbhali eyoli e she gba na li. Ulishi oo mu we.

¹⁶ Eni e me emini a me e gueye egbo emini oni omose ni ayemhe obe e la egbe o me egbe ali emini e li eni igulu.

¹⁷ Igho, e gueye ijesu o lase wewe eke le.

¹⁸ Abi ijesu o lo elemhi oko-okẹ oni emhi khi oọ ke vu, oni omose ni ayemhe ebe e kpẹ la egbe, o lema ijesu o ze ni loli deba li vu.

¹⁹ Ama ijesu o lama na li. O ri ochogho lie ọli, "Ke je apfe ni u ya gueye egbo ena unuekpẹ oye emini Onomhue o ri ele ne, ali abi o li le elemhi e."

²⁰ Igho oni omose o lui ifui eoli igbe ododa ena eke iDikapolisi. O kia gueye egbo abi ijesu o li ri ele na lue. O ri abo sha egbo nya.

*Omueshi ni o ghu-a ali
okpotso ni o lia ee ku egbe*
(iMat 9.18-26; iLuk 8.40-56)

²¹ Abi iJesu o ro gbo nyene egbe da je ukiēkiē oke obini o kpole, egbo e le gasē o li.

²² Omoṣe oghuo ni a lu iJarōsi, ni o khi oṣuoghuo eni e mheṣe shi owa ugamhi, o bhale akaghō. Abi o o me iJesu te, o de ya wugha li odalo.

²³ O mema lolo lema li, o o li, “Omimhe oni omueshi o ma ghua gba memena, kpekpe bhale ya ri obo ti o li egbe ni o ze, ini o khi ghua.”

²⁴ Igho iJesu o deba li vu.

Igho ebubu egbo e deba li e ve mu o li.

²⁵ Okpotso oghuo o la agho ni o she ku o lia ishito egbe ramhi ikpe igbeva.

²⁶ O she me osoli obo oyi ebubu egbo abi o ro kia dua oni ughuamhi. O she ri epfue eyoli nya dua o, ama o a pfo, oo ga kholo o li egbe.

²⁷ Abi o ro suo ingme oyi iJesu, igho o te ifuabo oyi egbo ri obo ti o li awulu ni o so.

²⁸ O ro li shi udu khi, “Ini mhi da me asha ri obo ti o li awulu ne, mhi ya ze.”

²⁹ Abi o ri obo ti o li awulu te, eni o lia ni e ku o li egbe, e khakha utoghuo kpe. Aghoaghō o lese khi emini o yese lue e ngme, khi o pfo.

³⁰ Aghoaghō, iJesu o lese khi itoto o she rote lue egbe ya lase. Igho o migha, o mu egbe pfi iteva egbo ni e sha mu o. O mhila we, o o. “Oghuo o ri obo ti mhe awulu?”

³¹ Eniye odukhokho eyoli e e o li, u ga me abi egbo e lie ve mu e, u kiele e mhila, “Oghuo o ri obo ti mhe?”

³² Ama, iJesu o kie bino gasē ini o me oni o ri obo ti o.

³³ Abi oni okpotso o ro me abi o ke li o li egbe, o bhale odalo oyi iJesu ya wugha, ulishi o mema mu o li, o gue igesikia le abi o ga li kia nya.

³⁴ IJesu o o oni okpotso, “Omi mhe, irudunga oye o she mie e pfuese. Ri opfomhe ke je, anasemhe oye o she pfo.”

³⁵ Abi iJesu o kie li ngme, emose eghuo, e rote owa oyi iJarōsi bhale. E e iJarōsi, “Omi e o she ghua, khi ke yese Oseṣe ngme.”

³⁶ IJesu o a fe ri eso shi emini e ngme, o o oni omoṣe “Khi ze ni ulishi o mu e, ama lese mholi irudunga.”

³⁷ O a ze ni o gbokhoghuo o deba li se ni iPita, ali iJemhisi ali iJoni inyoghuo iJemhisi.

³⁸ Abi e ro bhale owa oyi iJarōsi, iJesu o me abi egbo e li i kpe okeke, ni e li i vie gbii.

³⁹ Igho, o lo elemhi oni owa, o o, “Elo o pfi onyaghu onana? Elo o re e vie? Oni omo o a ghua, eri o lese a.”

⁴⁰ Ama eni egbo e gia li. Abi o ro khu we fie se, o rue ita ali inyō oni omueshi ali eniye odukhokho otuase egho mhu e obo je ashini oni omo o yeshi.

⁴¹ IJesu o mu o li obo, o o oni omueshi, “Talita kumi.” Emi ni a ri ona ngme khi, “Onomueshi, mhi e ye u vule.”

42 Utoghuo kpe, ọni ọmueshi ọ vule, ọ kia gasẹ. [Ọmọ ikpe igbeva ọ khi.] Abi a rọ me ona, o ri abọ sha wẹ.

43 Ama iJesu ọ lolo tse agua ye we e khi gueye ọgbokhoghuo. Ọọ we, "A ri emhi na li le."

6

A ri ukpeloe gbe iJesu obini iNazareti
(iMat 13.53-58; iLuk 4.16-30)

1 IJesu ọ rọte agho vu je ẹoli oyoli, eniye odukhokho eyoli e deba li.

2 Ogbele iyemheya oyi egbo iju o ramhi, ọọ sese elemhi owa ugamhi. O ri abọ sha ebubu egbo eni e ri esọ shi ọli ọ.

E mhila egbe, "Obo ọni ọmose ọna ọ rọte me eni emhi enana? Ilesingme nabi onoghuo na ni a rọ na li, ni ọ gbo rọ gbe ikanya ọnyalao?"

3 Ọna ọa she khi ikapita, omi iMeli, ni ọ gbo khi inyoghuo ijemhisi ali iJosisi ali iJudasi ali iSamọ? Ena ẹa khi inyoghuo ọli eni imueshi, ni e ga li nu awa la akana enana?" O ri elemhi bi wẹ.

4 Ama iJesu ọọ, "Ashakpa a la mu ekpe na ọmekẹguele, se ni apfe oyoli ali unuekpe oyoli aa la mu ekpe na li."*

5 Ọa dobe la akaghọ gbe akanya ọnyalao okhoghuo, se ni ikuku egbo ni ẹa ze ni ọ rọ ze abi ọ rọ ri obọ ti wẹ.

6 Umha-mhọli irudunga oyewẹ o ri abọ sha iJesu.

Igho iJesu ọ kia rọte ẹoli je ẹoli sese eni egbo.

IJesu ọ ghie eniye odukhokho otuogbava fie
(iMat 10.5-15; iLuk 9.1-6)

7 Ọ lu eniye odukhokho etuogbava eyoli tiggibili, ọ ghie we ava-ava fie, ọ ri ekpabo na we ni e rọ mhuẹ itoto rọ khu ayemhe ebe.

8 Ọ gueye we, "Ini a le, a lese rue orokpo mhuẹ obọ, a khi tsua eminale, wexhi akpaba ni a pfi ẹ so, wexhi ukpagho.

9 A so ekuẹ, ama a khi tsua awulu olese ma oni a rọ so.

10 Ọ gbolo ẹ we, a kha da lo apfe okhoghuo le ni e rọ da mie ẹ, a la akaghọ ramhi ni a rọ ya rọte oni ẹoli vu.

11 Ini o khia khi a bhale ẹoli okhoghuo khi eni egbo ẹa mie ẹ, ni ẹa rọ gbo ri esọ shi emini a ngme, a rọte agho vu. A kpe abọ ọ-a na we, a rọte agho vu. Eri ona o ya khi ọtsele shi we egbe."†‡

12 Igho e fie ya tse abọ gasẹ, e lie egbo e rọte olamhe oyewẹ mu pfi.

13 E khu ebubu egbo ayemhe ebe egbe-a, e ri oili to eni ẹẹ ghua ebubu egbe, e rewe ze.§

Eghuli oyi iJoni Oni ọọ batazi
(iMat 14.1-12; iLuk 9.7-9)

14 Eghẹghe ana, oghie Erodu ọ li suọ eko eni ingme ena nya, itobọ khi eva oyi iJesu o she gasẹ asha kpa. Egbo eghuo e lie khi iJoni Oni ọọ batazi lo ni ọ nyenẹ egbe

* 6:4 Li ze iJon 4.44 † 6:11 Li ze Ika 13.51 ‡ 6:11 Li ze iLuk 10.4-11 § 6:13 Li ze iJem 5.14

bhale agbọ, loli o zẹ ni ọ rọ lighọ mhọli ekpabọ rọ gbe ikanya ọnyalọa.

15 Egbọ eghuo e liẹ khi, “Elaja Ọmekẹguele ọ khi.” Elese ẹ khi, “Ọmekẹguele nabi emekẹguele ena ẹlẹlẹ ọ khi.”*

16 Ama abi Erọdu ọ rọ suọ ona, ọ kẹ, “Ijọni, ni mhi khi ukhomhi ọ, a rọte eghuli guise le!”

17 Itobọ khi Erọdu ọọ ke mhẹsẹ a mu ijọni gẹ pfilo owa ighumha. Ini egbe e ba mu Erodiasi. Eri Erọdu ọ mie iFil-ipu inyọghuo ọli Erodiasi.

18 Eghẹghẹ kpa Ijọni ọ rọ gueyẹ Erọdu khi, ọa ti ni ọ rue ughuẹ inyọghuo ọli shi.†

19 Itobọ ona, ọni Erodiasi ọọ biselemhi ijọni, ọọ nono ode ni ọ te ya gbe ọli-a, ama ọa dobe.

20 A gbo bhale ya ẹ khi Erọdu ọọ na ulishi ijọni itobọ khi ọ lẹsẹ khi ijọni khi ọgbọ onete ali ọgbọ ọ ni ọ pfuasẹ ọ khi. Ọ ri irarighọ ri ukpẹloe ẹ khu ọli. Ọ ma nono ni loli ri esọ ke shi ungmehi oyi ijọni, ini o ri riẹ khia khi ingmemhi eyọli e ma yese ọli udu-a eghẹghẹ kpa ni ọ rọ suọ li.

21 Ikpukhokho ọ, Erodiasi ọ mẹ ashini ni ọ te ya mu ota sọ ijọni. Ighọ ẹlẹghuo ni o ikhi ogbẹlẹ ni Erọdu ọ rọ mhọli ukue ni ọ rọ yelele ogbẹlẹ ni a rọ bia li le. Ọ ya luno idenọmọ eyọli ali ẹgbọ eni mu ẹloe ali ẹgbọ igọmẹti ali eni ẹẹ gbe ikanya igọmẹti ni e la eke ijudia shi oni ukue.

22 Abi ọmọ ọmueshi omi Erodiasi ọ rọ fiẹ lasele gbe ishimhi, o mema ti Erọdu ali ẹgbọ eni e bhale ya bino ọli ẹloe.

Ighọ ọni oghie ọọ ọni ọmueshi, “Mhila mhẹ emiemini o ga ghọle ẹ, mhi ya rọli ne.”

23 Ọ romhi isheli khase ọni ọmueshi, “Emiemini u mhila, mhi ya rọli ne, o kha riẹ khi agbekhi-eva eghiele oyemhẹ.”

24 Ighọ ọni ọmueshi ọ fiẹ ya mhila inyọ li, “Elo mhi ya mhila?”

Inyọli ọọ li, “Ukhomhi oyi ijọni Ọni ọọ batazi ẹgbọ wa mhila.”

25 Aghọaghọ ọni ọmueshi ọ nyanya na ya lo deba oghie, ọ mhila li, “Ukhomhi oyi ijọni Ọni ọọ batazi ẹgbọ mhia nono ni u khi shi ukpẹko na mhẹ memena.”

26 Udu o tode yese oghie a. Ama itobọ ekha ni ọ tse ukpẹloe oyi epfese ni ọ lu shi oni ukue, ọa ke dobe ti da oni ekha.

27 Aghọaghọ ọ ghie eni ẹẹ gbolo ẹgbọ-a e ka pfa ijọni ukhomhi ọ bhale. Eni emọse e je owa ighumha ya khi ijọni ukhomhi ọ.

28 E rue ọli shi ukpẹko bhẹ. Ighọ oghie ọ kpha li na ọni ọmueshi. Ọni ọmueshi ọ kpha li na inyọ li.

29 Abi eniyẹ odukhokho eyi ijọni e rọ suọ ona, e bhale ya tsua etuli oyọli ya rọ tọ.

* 6:15 Li zẹ iMat 16.14; iMak 8.28; iLuk 9.19 † 6:18 Li zẹ iLuk 3.19-20

Ijesu o ri eminale na egbo agbele ishe le

(iMat 14.13-21; iLuk 9.10-17; iJon 6.1-14)

³⁰ Eni ighiusomhi na kee e jele, e le gasẹ ọli, e gueye ọli emini e rieḷe ali emini e sese nya.

³¹ Igho, itobo ebubu egbo, ni ee bhale ni ee vu, ijesu ali eniye odukhokho eyoli ẹa me asha le eminale. Ijesu oo we, "A bhale ni awa je ashini awa-eghuo tse awa ya la, ni a yemhe-a ukuku o."

³² Igho weweghuo tse ee lo oko-okẹ oniemi ya je ashini o da-ya.

³³ Ama ebubu egbo ni e me we abi e ro vu, e lese khi wewe lo. Igho eni egbo e rote ẹoli nya ri awe na ya ralo ashini ijesu ali eniye odukhokho eyoli e je.

³⁴ Abi ijesu o ro ramhi agho, o me abi eni egbo e bu, elemhi we e lala li. Itobo khi eri e li abi isumha ni ẹa mhọli oni o re we ẹ kia. Igho o li sese we emhi ebubu.‡

³⁵ Eghẹghe ana, ogbe o she vu. Igho eniye odukhokho eyi ijesu e bhale deba li, e ke ọli, "Aborokhia khi oola oo nuata shi apfe ena, ni eghẹghe o ro she vu dose ena,

³⁶ waa ke gueye eni egbo ena e kia je ifui apfe ya nono emhi de le."

³⁷ Ama, ijesu oo we, "A ri emhi na we le."

E mhila li, "Ifata eyi ogbele elele eyi ogbo e ya lo ni a ro de ibuledi ghi we le?"

³⁸ Igho ijesu o mhila we, "Iru-uli ibuledi ingme a mhọli shi agho? A ka bino ghue."

Abi e ro bino se, e ọli, "Truli we ishe ali ifele aava."

³⁹ Igho ijesu oo we e rieḷe eni egbo shito ikui-iku, ukhomhi ebuli.

⁴⁰ E shito ikui-iku, egbo egbhueshi-she ali egbhue-eveva ali ogbogbe.

⁴¹ Igho ijesu oo rue eni ibuledi ishe ali ifele aava egbo, o bino idane, o tse Eshinegba uwegbe. O gbe eni ibuledi khia, o ro na eniye odukhokho eyoli e ke kemhi na egbo. O gbo kemhi eni ifele aava na we nya.

⁴² Ogbokpa o le, o khue.

⁴³ Iku we ni eniye odukhokho eyoli e sanọ eke, e vo ighughu igbeva.

⁴⁴ Emose agbele ishe, e le eni eminale.

Ijesu o kia ukhomhi oke
(iMat 14.22-23; iJon 6.15-21)

⁴⁵ Aghogho o ri omo odukhokho eyoli lo oko-okẹ oniemi, e ka ralo iBetisaida ya migha khe lue ukiekie obinokpole. Igho o gueye oni ukpokpomhi ebubu egbo e ke je apfe.

⁴⁶ Abi o ro tse we okhila se nya, o nga ukhomhi ute ya so iromhi.

⁴⁷ Ogbomhi o mu eke, oni oko-okẹ oniemi o kia ramhi iteva oni oke, o ke kpe ijesu lolighuo tse le shi eke.

⁴⁸ O me khi akpekpeli oo nase eniye odukhokho eyoli.

‡ 6:34 Li ze iNoba 27.17; 1 Ighie 22.17; 2 Okhe 18.16; Ezik 34.5; iMat 9.36

O ramhi itsotso ogbie, iteteva elemhi agogo esẹ ali agogo esesa, ọọ kia ukhomhi oni okẹ lẹ deba wẹ. Ọ she kia ya dọsẹ wẹ.

⁴⁹ Ama abi e mẹ iJesu khi ọọ kia ukhomhi amẹ, e dabi khi ayemhẹ olimhi lọ, e tsesẹ leghe.

⁵⁰ Itobọ khi eri wẹwẹ nya e yila abi e rọ mẹ ọli.

Aghoaghọ ọ nu wẹ ngme, ọọ wẹ, “A mhọli udu! Mhẹmhẹ lọ! A khi ke na ulishi.”

⁵¹ Ọ lo elemhi okọ-okẹ oniẹmhi deba wẹ, oni akpekpeli o pfomhẹ. O ri abọ sha eni eniyẹ odukhokho,

⁵² itobọ khi ẹa kie doḅẹ lẹsẹ udi ingme eminale ni ọ kpẹ rọ na ẹgbọ agbẹlẹ ishe le; a toto wẹ udu.

Ijesu ọ la iGenesareti ri ẹgbọ ze
(iMat 14.34-36)

⁵³ Abi e rọ da oni okẹ se, e lasẹle shi iGenesareti, e mu oni okọ-okẹ oniẹmhi zu aghọ.

⁵⁴ Abi e lẹsẹ rọte okọ-okẹ oniẹmhi tiemhie, ẹgbọ e she lẹsẹ khi iJesu lọ.

⁵⁵ Ighọ eni ẹgbọ e nyanya kia gasẹ oni ekẹ nya, ashiashini e da suọ khi ọ da la ne, e tsua eni ẹẹ ghua shi iya bhale aghọ.

⁵⁶ Obiobini iJesu ọ da je ne, o ke khi ẹoli ni e gbẹdi, o ke khi enikeke o, ghe ifui ishemhi o, eri ee tsua eni ẹẹ ghua bhale agbagbajighana atuoki. E lema iJesu ọ lẹsẹ zẹ ni eni ẹẹ ghua e ri obọ ti ọ esọ awulu ni ọ rọ sọ tsẹ. Eni e da ri obọ ti ọli nya e ze.

7

Osesẹ oyi ipfuasẹ ni o te ekelemhi lasẹle
(iMat 15.1-9)

¹ IFarisi ali esesẹ Ishi eyi iMosisi eghuo ni e rọte iJerusalemu bhale, e le gasẹ iJesu.

² E mẹ khi eniyẹ odukhokho eyọli eghuo e ri abọ ni ẹa pfuasẹ ni aa kpe-a a le eminale. [Emini a ri ona ngme khi ẹa kpe abọ-a abi ẹgbọ iFarisi ẹẹ a ke li.]

³ Irari khi iFarisi ali ẹgbọ iJu eni e kpọle nya ẹa ya le eminale ini ẹa li kpe abọ-a. Abi ititawẹ e sesẹ wẹ na, ni e rọ gbe akanya.

⁴ Ini e rọte oki jele khi ẹa li kpe egbe a, ẹa ya le eminale. E gbo mhọli ighuighuẹ ebubu elese ni e gbolo ẹghuẹ, Ighuighuẹ abi a liẹ kpe iko, ekhe, itasa ali igege-a.

⁵ Irarighọ, eni iFarisi ali esesẹ Ishi eyi iMosisi e mhila iJesu, “Elo o zẹ khi eniyẹ odukhokho eyẹ ẹa ri ishi ni itita awa e rọ shi ekẹ gbe akanya, ni e rọ ri abọ eni ẹa pfuasẹ ẹ le eminale?”

⁶ IJesu ọọ wẹ, “Igesikia Azaya ọ ngme abi ọ rọ ngme ungmehi oyi Eshinẹgba ni o gọ lu ẹẹ ni a di egbe ẹ. Oni a keke shi ekẹ khi,

“ ‘Ungmemhi unu ẹgbọ ena e rọ ri ekpe ẹ na mhe,
ama udu oyewẹ
o nuata shi mhe ọ.

⁷ Ugamhi afuẹ ẹẹ ga mhe,
ushi eni ẹgbọ e rọ shi ekẹ,

ẹẹ sẹsẹ ẹgbọ.*

⁸ A she pfi ishi eyi Ẹshinẹgba shi eke, a ri osẹsẹ eyi ẹgbọ ẹ gbe akanya.”

⁹ O gbolo ẹ wẹ, “A ga lẹsẹ ode ni a te ri ishi eyi Ẹshinẹgba shi ukhokho obọ, ini a ba mẹ asha ri osẹsẹ eye ẹ gbe akanya.

¹⁰ Itobọ khi iMosisi oọ liẹ, ‘Mu ekpe na itẹ ali inyẹ.’ O gbolo ẹ, ‘Onini o da ku itẹ ni itali okekhi inyọli ne, a gbe ọlia.†

¹¹⁻¹² Ama ẹẹ a sẹsẹ ẹgbọ khi ini ogbọ o gueye itali okekhi inyọli, khi emini loli kha kpe ro kpaghie itali ali inyọli obọ khi Ikobani o ke khi, khi ọa mhue abi o ngme. Khi ushi ọa mu ọli ini ọa ke ririe ri emhikhoghuo na itali ali inyọ li. (Emini a ro somhi Ẹshinẹgba opfa se, áá lui Ikobani).

¹³ Eri a ri osẹsẹ ona a shishi ungmehi oyi Ẹshinẹgba eke a. A gbo mhọli emhi elese eghoghọ ebubu ni a gbolo ẹ riẹ.”

Emini e ri ogbọ khi oni ọa pfuase

(iMat 15.10-20)

¹⁴ Ijesu o gbo lu eni ebubu ẹgbọ gbili, oọ wẹ, “A ku esọ a shi mhẹ o, ni ona o lo ẹ esọ.

¹⁵ Emhikhoghuo ọa la o ni ogbọ le, ni o ri ogbọ khi ọna umha pfuase. Sẹ ni emini o rọte ogbọ ekelemhi lasese, o ri ogbọ o khi oni ọa pfuase odalo oyi Ẹshinẹgba.”

¹⁶ [Oni o mhọli esọ, o rọ suọ.]

¹⁷ Abi ijesu o rọ pfi eni ebubu ẹgbọ shi agho ni o rọ ya

lo owa se, eniye odukhokho eyọli e bhale deba li, e mhila li emini oni ungmehi o ngme.

¹⁸ O mhila wẹ, “Aa kie lẹsẹ udi emini mhia ngme? Oa kie lo ẹ esọ khi emhikhoghuo ni o rọte odato lo ogbọ elemhi khi ọa ya ri ọli khi oni ọa pfuase odalo oyi Ẹshinẹgba?”

¹⁹ Irari khi oni emhi ọa ya je ọli udu, ama eke elemhi oọ tiemhi, o gbo rọte idiegbe ya fiẹ lase.” Eri ijesu o ri ona guele khi eminale ni a le nya, khi e ti.

²⁰ Ijesu o gbo liẹ. “Emini o rọte ogbọ ekelemhi udu lasese, o ri ogbọ o khi ọna umha-pfuase.

²¹ Itobọ khi rọte ekelemhi udu oyi ogbọ, isamhi ebe e rọte ẹ lasese, enabi, itẹbo, ighiatọ, ogbọ ugbeli, okia,

²² emhi ituegbe, obe imumu, ikpamhika, efiala, ubogbo, iyese-egbe eva a, umha-mhọli ekpe, iditsea.

²³ Ekelemhi udu eni ingeli ena nya e rọte ẹ lasese ni e ri ogbọ o khi ọna umha-pfuase odalo oyi Ẹshinẹgba.”

Imiesuo oyi okpotso oghuo

(iMat 15.21-28)

²⁴ Igho ijesu o rọte agho vu, o je ukiekie eke iTai. O lo owa oghuo, ọa nono ni ogbokhoghuo o lẹsẹ khi loli la akaghọ. Ama ọa dobe ri egbe ọli sheli.

²⁵ Abi okpotso oghuo ni ayemhẹ ebe o la omi ọli oni omueshi egbe, o rọ suọ eko ijesu, o nyanya bhale ya de wugha li odalo.

† 7:10 Li zẹ Okiali 20.12; iDeut 5.16; Okiali 21.17; iLev 20.9

26 Oni iJeta oni okpotso o khi, a bia li shi eke iFonisha ni o la iSiria. O lema iJesu o khu oni ayemhe ebe omi oli egbe a.

27 IJesu o o li, "Ze ni eniye e kpe le eminale ne, o a ti ni eminale ni a kha ro na eniye le, ni a pfi oli ghi ewa."

28 Oni okpotso o o, "Gueguegue Onomhue! Ama ewa e kiele la ifui itebu e sano eminale ni eniye kеше le le."

29 IJesu o o oli, "Itobo oni ungmehi ni u ro so mhe o ena, ke je, u ya bhale ya e khi oni ayemhe ebe, o she rote omi e egbe ya lase."

30 Igho, oli je apfe, o ya e khi omi oli o yeshi ukpho khi oni ayemhe ebe o she rote oli egbe vu.

IJesu o ri ungmehi ni o gbo lesze

31 Igho iJesu o rote ukiekie obini iTai vu, o rote iSidoni ya tiemhi oke iGalili, o je eke iDikapolisi

32 Oobo egbo eghuo e la tsua omose oghuo ni o khi oleso, ni o gbo khi ungmehi, bhale ghi iJesu. E lema li o kpekpe o lese ri obo nga li egbe.

33 Igho iJesu o rue lolighuo fie iteva oyi eni ebubu egbo, o ri imiesabo shi oni omose eso, o to ete, o ri obo ti oni omose elemhi.

34 Igho iJesu o bino idane, o tu ekperumhe-a, o o oni omose "Efata!" Emini a ri ona ngme khi, "Khueghie-a!"

35 Utoghuo kpe eso eyi oni omose e khueghie a, elemhi oyoli o taghie-a, o ngme lasele gboo.

36 Igho iJesu o tse agua ye we e khi gueye ogbokhoghuo. Ama abi o dobe tse agua ye we kpa, igbo e dobe ngme oni ingme.

37 O ri abo sha egbo eni e suo nya. E lie, "O ma gue riefe emhikpa," e gbo lie, "O ri eni e le eso o suo eso, o khueghie ingmenu unu a, e e ngme."

8

IJesu o ri eminale na egbo agbele asha ene le
(iMat 15.32-39)

1 Oa rote agho tese ni ebubu egbo elese e ro legba. Abi eni egbo ea ro me emhi le, iJesu o lu eniye odukhokho eyoli, o o we,

2 "Elemhi egbo ena e e ala mhe, o she gba efe ese ni e te nu mhe la ana ni ea te me emhikhoghuo le.

3 Ini mhi e ri okiamhi ke je apfe mena, ubi o ya rue we shi ode, itobo khi eghuo o, e rote odonue bhale."

4 Eniye odukhokho eyoli e mhila li, "Obo u sa khi a te ya me eminale ni e bu ifu odagbe ona, ni e ya khuese egbo ena nya?"

5 IJesu o mhila we, "Ibuledi ingme a mholi?"

E oli "Ishilua."

6 O gueye eni ebubu egbo e shito eke. Igho o rue eni ibuledi ishilua egho, o kphemhi na Eshinegba, o khi we-a, o rue we na eniye odukhokho eyoli e ke kemhi we na eni egbo. Igho eniye odukhokho eyoli e li kemhi na we.

7 E gbo mhọli ikuku imi ifeḷe shi agho. O gbo kphemhi na Eshinẹgba shi o. O rewe na eniye odukhokho eyoli e gbo li kemhi we.

8 Eni egbo e le, e khue. E le se, eni eniye odukhokho e sanọ iku we ni e le kpole vo ighughu ishilua.

9 Egbo agbelele asha ene e khi. Ijesu oo eni egbo e ke je.

10 Lolli ali eniye odukhokho eyoli e lo oko-okẹ oniemi e je ukiẹkiẹ obini iDalamanuta.

Egbo iFarisi e mhila irọkhasẹ

(iMat 12.38-42; 16.1-4)

11 Egbo iFarisi e bhale, e mhila ijesu ogbo ni e ro mu oli fe. Ee oli o ri irọkhasẹ ni o rote iloghie bhale khasẹ ewe ni wewe e lese khi Eshinẹgba o ghie oli.*

12 Ijesu o tu ekperumhe-a, oo, "Elo o ze ni ee egbo a ro mhila irọkhasẹ onyaloa? Abi o li mhi li gue oli e ye e khi, aa ya me irọkhasẹ onyaloa okhoghuo."†

13 Igho o pfi we shi agho vu, o nyene egbe ukhokho gbo ya lo oko-okẹ oniemi, o da je ukiẹkiẹ obinuzeva.

Oyese oyi iFarisi ali Erọdu ni o li abi ifuma

(iMat 16.5-12)

14 Eniye odukhokho eyoli ea sato tsua ibuledi ni e bu, se ni uruli oghuo ni e mhuẹ shi oni oko-okẹ oniemi.

15 Ijesu o tse agua ye we, oo, "A mhuẹ egbhe shi ifuma eyi iFarisi ali Erọdu."‡

16 Eniye odukhokho eyoli e nu egbewe ngme, e lie, "Itobo khi awa a mhuẹ ibuledi o ro ngme ona."

17 Ijesu o lese emini e ngme. O mhila we, "Elo o ze ni a ro gue ezọ khi aa mhọli ibuledi? Eri aa ya me eke abi khi eri o a kie lo e esọ? Eri udu oyee o na khukhu?"

18 A mhọli alo, aa rewe a me eke? A gbo mhuẹ esọ aa rewe e suọ? Aa sato?§

19 Abi mhi ro kholo ibuledi ishe-a na egbo agbelele asha ishe, ighughu ingme a sanọ iku we eke vo?" Ee oli, "Igbeva!"

20 "Abi mhi ro gbo kemhi ibuledi ishilua na egbo agbelele asha ene, ighughu ingme a sanọ iku we vo?"

E oli "Ishilua."

21 Oo, "Eri emini mhia ngme o a kie lo e esọ?"

Ijesu o la obini iBetisaida khueghie ozalo alo a

22 E bhale iBetisaida. Egbo eghuo e tsua omose ozalo bhale ghi ijesu, E oli o kpekpe o ri obọ ti oli.

23 Igho ijesu o mu oni omose ozalo obọ-obọ ya fie ifui oni apfe. O to ete shi obọ ro shishi oli alo-a. Ijesu o mhila li ini o me emhikhoghuo.

24 Oni omose o bino idane, oo "Mhia me egbo khi e li abi eera a kia gase."

* 8:11 Li ze iMat 12.38; iLuk 11.16 † 8:12 Li ze iMat 12.39; iLuk 11.29 ‡ 8:15 Li ze iLuk 12.1 § 8:18 Li ze iJere 5.21; Ezik 12.2; iMak 4.12

²⁵ Igho iJesu o gbo ri abo shi oni omoşe alo. Alo eyoli e tigbe khueghie-a, o me eke gboo.

²⁶ IJesu oo ke je, o oli, "Khi gbo je elemhi ifui eoli."

IPita o guele oni iJesu o khi (iMat 16.13-20; iLuk 9.18-21)

²⁷ Igho iJesu ali eniye odukhokho eyoli e vu je ikuku eoli ni e la gaso iSizeria iFilipi. Abi e li le, o mhila we, "Oghuo egbo e famhi e lie khi mhi khi?"

²⁸ E oli, "Eri eghuo e khi iJon ni oo batazi egbo u khi; eghuo e khi Elaja u khi; elese e khi otuoghuo emekeguele na ele u khi."*

²⁹ O ke mhila we, "Ama, oghuo ee oye e a lie khi mhi khi?"†

IPita o so li o, oo li, "Yeye u khi iKirisiti ni o khi Omiepfuese?"

³⁰ IJesu o tse agua ye we e khi gueye ogbokhoghuo oni loli khi.

IJesu o guele shi eke khi loli ya ghua

(iMat 16.21-28; iLuk 9.22-27)

³¹ Igho o sese eniye odukhokho eyoli khi Omi Ogb o mema ya me osoli egbegbo. Eni egbhali, ali ighie eyi ekpodalo-ugamhi ali eni e sese ishi, e ya kie oli. A ya gbe loli-a, ama ele onuzise, o gbo ya guale.

³² O ngme ona lasese gboo. Igho iPita o lu oli ochi, oo

li o khi ke ngme ungmemhi onana ghue.

³³ Ama abi iJesu o ro nyene alo ukhokho bino eniye odukhokho eyoli, o dese iPita. Oo li, "Vu mhe odalo le yeye Okphaghie. Wa mholi ingme Eshinegba shi udu, ama emhi agbo."

³⁴ Igho o lu eni ebubu egbo ali eniye odukhokho eyoli, oo we, "Ini ogbokhoghuo oo nono ni loli bhale deba mhe, o mema ya kie egboli, o rue afida oyoli, oo deba mhe.‡

³⁵ Itobo khi onini o da dua ni loli tsumhi agbo oyoli ne, o ya de oli obo a, ama oni o da ri irari oyemhe ali irari oyi usomhi onete oyi Eshinegba rue agbo oyoli pfa, o ya tsumhi oli.§

³⁶ Eleli onoghuo ogbo o ya me ini o mholi agbo nya khi ayemhe oyoli o li opfu-a?

³⁷ Elo ogbo o ya ro ooghie ayemhe oyoli?

³⁸ Ini omama oyemhe ali omama oyi ingme oyemhe o da mu ogbokhoghuo elemhi agbo ichimhi ali agbo okholo ona ne, omama oyi onogbo o ya li mu Omi Ogb o elegho ini o bhale elemhi ufumhi oyi Itali ali oyi igeni ni e pfuase."

9

¹ O gbolo e we, "Mhi gue igesikia ye e khi, egbo eghuo e migha ana, ni ea ya ghu ne, ni e ro me khi Eghiele oyi Eshinegba o bhale, elemhi ekpabo."

* 8:28 Li ze iMak 6.14-15; iLuk 9.7-8 † 8:29 Li ze iJon 6.68-69 ‡ 8:34 Li ze iMat 10.38; iLuk 14.27 § 8:35 Li ze iMat 10.39; iLuk 17.33; iJon 12.25

Imamachi oyi iJesu

(iMat 17.1-13; iLuk 9.28-36)

² Abi eḷe-esesa e rọ dọṣe, iJesu o rue iPita, ali iJemhisi ali iḶoni, ya nga ute oniēmhi ni o yagha, asha ni wewēghuo kpe e la. Ighọ e mẹ khi iJesu o mu melaa.

³ Itsua ni o rọ sọ, e pfuase-a, e ge pẹpẹpẹ. E tode pfuase dọṣe utsakolo, e dọṣe abi oḡbọkhọghuo ọa tigbe doḃe ya li pfuẹ wẹ-a pfuase ramhi agbọ ona.

⁴ Ighọ eni eniye odukhokho aase eyọli e mẹ khi Elaja ali iMosisi e lasele nu iJesu ghẹta.

⁵ IPita ọọ iJesu, “Oṣeṣe, o guẹ ti khi awa la akana. Zobe ni anye to ikholo ese shi ana. Oghuo o o kha khi oye, oghuo o khi oyi iMosisi, onokpọle o khi oyi Elaja.”

⁶ Oa ke leṣe emini o ke ya ngme, itobo khi eri lọli ali enekpọle e yila dọṣe.

⁷ Ighọ otughunu o lasele ya guese wẹ-a, Eshineḡba o rọte elemhi oni otughunu ngme, ọọ, “Omimhe ni Omose na, ni mhi nono ingme oyọli egbgbọ. A ke suọ eso na li.”*†

⁸ Utoghukpe khi e ke pfi alo bino, ẹa ke mẹ oḡbọkhọghuo se ni iJesu lọlighuo.

⁹ Abi e li rọte oni ukhomhi ute e tiemhi le, iJesu o gueye wẹ e khi gueye oḡbọkhọghuo emini e mẹ ini Omi Oḡbọ ọa li rọte eghuli guale.

¹⁰ E ri oni ungemhi gbe akanya, ama e nu egbewe

ghẹta emini irọte eghuli guale o ngme.

¹¹ Ighọ e mhila iJesu, “Elo o ze ni eni e seṣe e rọ liẹ khi Elaja o kpe ya bhale?”‡

¹² IJesu ọọ, “Egbegbo lo khi Elaja o kpe ya bhale, o ya bhale ya mu egbe emhi nya shi eke. Elo o mema ze ni Ebe-no-pfuase o rọọ khi Omi Oḡbọ o mema mẹ osue egbgbọ, a gbo kie ọli?”

¹³ Ama a ghe i, Elaja o she bhale, e riḷe emini o ghọle wẹ deba li ezeze abi a li keke ingme oyọli shi Ebe-no-pfuase.

Iroze oyi ozeo no mhue ayemhe obe

(iMat 17.14-21; iLuk 9.37-43)

¹⁴ Abi e ke rọ ya kugbe eniye odukhokho ni e kpọle o, e mẹ khi ebubu eḡbo o le gasẹ wẹ, eseṣe Ishi eyi iMosisi e nu wẹ la akaghọ khako.

¹⁵ Abi eni eḡbo e leṣe mẹ iJesu te, abọ e sha wẹ egbgbọ. E na ya tse ọli.

¹⁶ O mhila wẹ, “Elo o khi ni a nu wẹ khako o shi?”

¹⁷ Omose oghuo o rọte elemhi eni ebubu eḡbo ya rue unu, ọọ, “Oṣeṣe, omimhe oni omose mhi rọ bhale ghi e, ayemhe obe o nase ọli, ni ọa ke ze ọli e ngme.

¹⁸ Ini oni ughuamhi o da tsua rughu ọli ne, eri o pfi ọli e gbe, ọọ chi ofulu unu, ọọ le akọ unu, o zese a. Mhi gueye eniye odukhokho eye e khu ọli oni ayemhe egbe-a, ama ẹa doḃe.”

* 9:7 Li ze iMat 3.17; iMak 1.11; iLuk 3.22 iMala 4.5; iMat 11.14

† 9:7 Li ze 2 iPit 1.17-18 ‡ 9:11 Li ze

19 Ijesu oḡ, “Eḡ eḡbḡ ni eḡ mhḡli irudunga ena, eḡ-ingme mhi ke mhḡli rḡ nu e ya la akana, eḡ-ingme mhi beḡshi ya la onana ramhi, Mu ḡni ḡmḡ ghi mhe!”

20 Ighḡ e mu ḡni ḡmḡ bhale. Abi ḡni ayemhe ḡ rḡ me ijesu tee, ḡ de rughu ḡni ḡmḡ, ḡ pfi ḡni ḡmḡ gbe, ḡḡ kpi abḡ ali awe-a, ḡḡ wu ḡli eke, ḡḡ chi ofulu unu.

21 Ijesu ḡ mhila ita ḡni ḡmḡ, “Aeḡ ḡ te lina?”

Ḡḡ, “Abi ḡ te khi ḡmḡ.”

22 “Ḡ she lina mu ḡli pfi lo elemhi erali ali elemhi oke it-ingmingme abi ḡ kha gbe ḡli-a. Ini u mhḡli emini u doḡe ya riḡe, kpeḡke ḡe elemhi anye ni u kpaghiḡ anye obḡ.”

23 Ijesu ḡḡ, “Eri u we ini mhi doḡe? Emhikpa ḡḡ tse na ḡni ḡ da mhḡli irudunga.”

24 Aghḡaghḡ ita ḡni ḡmḡ ḡ nyanya liḡ, “Mhi miesuḡ ukukuḡ, kpaghiḡ mhe obḡ ni mhi gbo miesuḡ shi ḡ eḡbegbḡ.”

25 Abi ijesu ḡ rḡ me khi eni ebubu eḡbḡ e na bhale ashini ḡni ingme ḡ de shi, ḡ tseḡe ku ḡni ayemhe obe. “Yeḡe ayemhe unḡmenu ali ileḡ, rḡte ḡli eḡbe ya lasele, khi gbo nyeneḡ eḡbe bhale ḡ ghue.”

26 Ḡni ayemhe ḡ tseḡe, ri itoto nighise ḡni ḡmḡ, ḡ rḡte ḡli eḡbe ya fiḡ. Ḡni ḡmḡ ḡ ke li abi ḡni ghua. Eḡbḡ e liḡ, “Ḡ she ghua.”

27 Ama, ijesu ḡ mu ḡni ḡmḡ obḡ vule migha. Ḡ migha.

28 Abi ijesu ḡ rḡ lo elemhi owa se, eniye odukhokho eyḡli e beḡna mhila li, “Eḡ ḡ zḡ ni anye aa rḡ doḡe khu ḡli ḡni ayemhe eḡbe-a?”

29 Ijesu ḡ sḡ we ḡ, ḡḡ we, “Iromhi isḡsḡ ali azumhi tse ḡ doḡe a khu onana.”

Ijesu ḡ gbo ngme ingme eghuli oyḡli

(iMat 17.22-23; iLuk 9.43-45)

30 Ijesu ali eniye odukhokho eyḡli e rḡte aghḡ vu, e rḡte iGalili doḡe, ḡa nono ni ḡgbḡkhḡghuo ḡ leḡe ashini weḡe e la,

31 Itobḡ khi ḡ seḡe eniye odukhokho eyḡli, ḡḡ ye, “A ya ri Omi Ḡgbḡ na eḡbḡ de. E gbe ḡli-a. Eḡ nuzi-ese ḡ gbo guale.”

32 Ama emini ḡ ngme ḡa lo we esḡ, ulishi ḡ mu we abi e li ya mhila li emini ḡ rḡli ngme.

Ḡni ḡ fu ne nya

(iMat 18.1-5; iLuk 9.46-48)

33 E bhale eḡli iKapanḡmu. Abi ḡ rḡ la elemhi owa, ḡ mhila we, “Eḡ a khakḡ shi amo abi a rḡ la odeḡ?”

34 Ama e tsaghiḡ-a, itobḡ khi ḡni ḡ kpeda nya elemhi we e la odeḡ khakḡ shi.ḡ

35 Ijesu ḡ shitoḡ, ḡ lu eniye odukhokho ogbava eyḡli, ḡḡ we, “Ini ḡgbḡkhḡghuo ḡḡ nono ni loḡi khi ḡni ododeḡ, ḡ kpe ya ri eḡbḡli khi ḡni ḡ kpukhokho nya, ali ḡni ḡ ga eḡbḡ nya.”*

36 Ḡ mu ukuku ḡmḡ vule migha we iteva. Ḡ mu ḡli shi abḡ, ḡḡ we,

37 “Onini o ri itobọ oyemhẹ mie oṣuoghwo ikuku eniye enana ne, mhemhẹ o mie. Onini o da mie mhẹ ne, oni o ghie mhẹ o mie, o a khi mhemhẹ.”†

Oni o a da khi o be awa ne oyi awa o khi
(iLuk 9.49-50)

38 Iṣoni ọ́, “Oṣeṣe, anye me oṣoṣe oghwo ni o ri eva oye khu ayemhẹ ebe kua. Ama anye gueye o li o khi gbo ligho, itobọ khi o a khi oghwo elemhi awa.”

39 IJesu o we, “A khi ke khu o li o, itobọ khi oni o ri eva oyemhẹ gbe akanya onyaloa, o a tigbe e vule ke ngme onobe oyemhẹ.

40 Itobọ khi oni o a khi obe awa, oyawa o khi.”‡

41 Abi o li mhi li gue o li e ye e khi, onini o da die uko amẹ na e da irari eva oyemhẹ ne, ali irari khi onayi iKirisiti a khi, o ya me eleli o. §

A mu egbe e shi emini eyese ogbo o lamhe
(iMat 18.6-9; iLuk 17.1-2)

42 “Ini ogbo khoghwo o yese ikuku eniye enana ni e mie mhẹ suo lamhe, o bie tine ni a ge eche iko oniemi shi ogbo oghoghwo uruli tsua pfilo elemhi oke oniemi.

43 Ini obọ oye o re ya lamhe, khi o li pfi. O ti e egbe ne ini u waa mhọli obọ ya lo iloghie na agbo agbo, ni u ro tsua abọ eve-eva eye ya lo

ilimhi iriere, ashini erali ea tigbe e pfo-a ghue.*

44 [Akagho ikpatso ni e le we ni ea tigbe e ghu e la, ali ashini erali ni e tose we-a, ea tigbe e pfu ghue.]

45 Ini owe oye o re ya lamhe, khi o li pfi, o ti e egbe ne ini u waa mhọli awe ro lo iloghie na agbo agbo ni u ro mhọli awe eve-eva, ni u ro ya lo ilimhi iriere.

46 Akagho ikpatso ni e le we ni ea tigbe e ghu e la, ali ashini erali ni e tose we-a, ea tigbe e pfu ghue.

47 Ini ukpeloe oye o re e lamhe, vuonyo li pfi, o ti e egbe ne ini u ri ukpeloe oghwo lo Eghiele oyi Eshinēgba, ocho ni u ro ya mhọli ikpamhi alo eva, a pfi e ya lo ilimhi iriere.†

48 Akagho,
“Ikpatso ni e le we
ni ea tigbe e ghu e la,
ali ashini erali ni e tose we-a,
ea tigbe e pfu ghue.”‡

49 “Erali a ro nye ogbogbo-a, a roli khi oni o pfuase abi a li ri ugbheli e ri iluasobo khi pfuase.

50 “Ugbheli o ma ti, ama ini oviolo oyoli o kala, se o ke li ze gbolo ro ya mele ugbheli-a?

“A ze ni a mhọli ugbheli shi agbo oye e. A nu egbe ke ngeli angeli opfomhe.”§

10

Ijesu o ngme shi ingme ipfughue-a
(iMat 19.1-12; iLuk 16.18)

† 9:37 Li ze iMat 10.40; iLuk 10.16; iJon 13.20 ‡ 9:40 Li ze iMat 12.30; iLuk 11.23

§ 9:41 Li ze iMat 10.42 * 9:43 Li ze iMat 5.30 † 9:47 Li ze iMat 5.29 ‡ 9:48

Li ze Aza 66.24 § 9:50 Li ze iMat 5.13; iLuk 14.34-35

¹ Ijesu ọ rọte agho vu je eke ijudia, ini a da ijodani. Igho egbọ ni e bu e gbo ve ngale deba li, ọ sese we abi ọ kpẹ li.

² Egbọ iFarisi eghuo e bhale ya mu ọli fe, e mhila li, “Ushi oyawa o lama, omose ọ khu ughue oyoli?”

³ Oo, “Elo iMosisi ọ gueye e a ke li?”

⁴ E ke, “Eri iMosisi ọ lama omose ọ keke ebe ni a ro pfa ughue-a mhọli ughue ọli obo, ọ khu ọli.”*

⁵ Ijesu oo we, “Itobo khi udu oyee oo gbe, iMosisi ọ ro ligho keke oni ushi na e.

⁶ ‘Ama omose ali okpotso, Eshinegba ọ rọte igbaekele agbo ma we.’†

⁷ Onana o ze ni omose ọ ro ọ pfi itali ali inyoli shi eke, ọ ya toma ughue ọli ọ.

⁸ We we aava e mele idiegebe oghuo a.’ Eghẹghẹ agho ẹa ke khi etuava, ama oghuo.‡

⁹ Irarigho, emini Eshinegba ọ da toma ne, ogbokhoghuo ọ khi vase we a.”

¹⁰ Abi e ro gbo la elemhi owa, eniye odukhokho eyi ijesu e mhila li ogbo ona.

¹¹ Ijesu oo we, “Onini ọ da khu ughue ọli ni ọ ya rue okpotso olese ne, eri ọ kia okia shi oni ughue ọli ọ.

¹² Ini oni okpotso ọ lase ayi odoli le khi ọ ya ngeli na omose olese, eri ọ kia okia.”§

Ijesu ali eniye enikeke

(iMat 19.13-15; iLuk 18.15-17)

¹³ Egbọ eghuo e mu eniye bhale deba ijesu ni ọ ri obo ti we, ama eniye odukhokho eyoli ee khu we.

¹⁴ Abi ijesu ọ ro me gho, o ri elemhi bi ọli. Oo we, “A ze ni ikuku eniye e bhale deba mhe. A khi ke khu we, itobo khi enabi we we e li mhọli obo shi Eghiele oyi Eshinegba.

¹⁵ Ze mhe gue igesikia ye e khi oni ọa da rue Eghiele oyi Eshinegba abi eniye enikeke ne, ọa tigbe ya lo iloghie.”*

¹⁶ O muno eniye shi egbe, ọ ri obo nga we ukhomhi, ọ so iromhi na we.

Ozele-omose ni ọ lolo pfee
(iMat 19.16-30; iLuk 18.18-30)

¹⁷ Abi ijesu ọ ke rue okiali eke khi ọ vu, omose oghuo ọ na bhale ya wugha li odalo, oo li, “Osese nete! Elo mhi ya riyele ni mhi ro ya mhu e agbo na agbo agbo?”

¹⁸ Ijesu ọ li, “Elo e ze ni u ro ọ lu mhe onoti. Ogbokhoghuo ọa la ọ ni ọ ti, se ni Eshinegba.

¹⁹ Ni mhi ro so e ogbo ni u mhila mhe, u lese ushi ni Eshinegba ọ ro shi eke. Ni ọ le, ‘A khi gbe ugbeli, a khi kia okia, a khi do ughiatọ, a khi pfi otsele egbholi mu ogbo, a khi li ogbo le, mu ekpe na ita e ali inye e.’ †

²⁰ Oni ozeo oo, “Osese, abi a te bia mhe mhi te ri ena nya a gbe akanya.”

²¹ Ijesu ọ ri eloe inono bino ọli, oo li, “Emhi oghuo tse

* 10:4 Li ze iDeut 24.1-4; iMat 5.31 † 10:6 Li ze Igbae 1.27; 5.2 ‡ 10:8 Li ze Igbae 2.24 § 10:12 Li ze iMat 5.32; 1 iKori 7.10-11 * 10:15 Li ze iMat 18.3 † 10:19 Li ze Okiali 20.12-16; iDeut 5.16-20

o kpe ẹ le ni waa riẹle ne. Je ya ri emini u mhọli nya de ni u kemhi we na eni ẹa mhọli emhi, ẹghẹghẹ agho ni u mhọli ẹpfue shi obini iloghie, u tigbe bhale ya deba mhe ke kia.”

22 Abi oni omose o ro suo ona, alo eyoli e yese a, o ri iyeseudu-a ya vu, itobo khi o mhọli ẹpfue eniemhi.

23 Ijesu o bino gase kpa, oo eniye odukhokho eyoli, “O ma mu ogbo ni o pfue unu ni o ro lo Eghiele oyi Eshinegba.”

24 Ingmemhi eyoli e ri abo sha eniye odukhokho eyoli. Ama ijesu o gbolo e, “Eniye eyemhe, o ma mu eni e ri egbe da ẹpfue oyewe unu ni e ro lo Eghiele oyi Eshinegba.

25 Ni ogbo ni o pfue o ro lo Eghiele oyi Eshinegba, o ya munu dose, ni ogbo ke dua ni lolu ri alakumi rote ese asuge ya fie.”

26 Ona o ke ri abo sha eniye odukhokho eyoli ne, e ro mhila egbe, “Oghuo o dobe ya lo o sho?”

27 Ijesu o pfi ukpeloe bino we, od, “Ona ọa ze ogbo ya li ama emhikpa o ze Eshinegba a li.”

28 IPita od ijesu, “Emhinya anye tsua kua bhale deba e.”

29 Ijesu od we, egbegbi-ingme mhi gue e ye e khi onini o da pfi apfe oli shi eke, ali inyoghuo oli eni emose ali eni ikpotso, ali ita ali inyo, ni o pfi eniye ali ishemhi, ghe owolo shi eke irari oyemhe ali usomhi onete oyi Eshinegba,

30 a ya somhi oli opfa. Elemhi agbo ona, a ya khivose na li asha egbhueshe, ikhivose owa ali ikhivose inyoghuo, ali inyo ali eniye ali ishemhi, ali anasemhe. O ya mhue agbo na agboagbo, elemhi agbo ni o ke e bhale.

31 Ama egbo eghuo ni e ralo, e ya kpe ukhokho. Eni e kpe ukhokho amo, e ya khi eni odode.‡

Ijesu o gbo ngme ingme eghuli oyoli utonuzi-ese
(iMat 20.17-19; iLuk 18.31-34)

32 Abi ijesu o ro tsua we le iJerusalemu, ni o ro ralo na we, eni ingme e pfuse ghagha a shi eniye odukhokho eyi ijesu udu. Ulishi o mu egbo ni e deba we. Igho ijesu o gbo li rue eniye odukhokho ogbava eyoli ye ochi, o gueye we emini lolu ya me ini wewe e ramhi iJerusalemu.

33 Oo, “iJerusalemu awa je ena, a ya la oobo rue Omi ogbo na ighie eyi ekpodalougamhi ali eni e sese ishi de, a ri oli na we mu. E pfa ezọ igbe-a mu oli, e ghi oli abo ghi egbo ijeta.

34 E ya roli ke li egia, e tono ete ku oli, e gbe oli ite, e tigbe gbe oli-a. Ama ele nuzi-ese, o ya rote eghuli guale.”

Emini ijemhisi ali ijoni e mhila ijesu o riẹle na ewe
(iMat 20.20-28)

35 Igho ijemhisi ali ijoni imi iZebedi e bhale deba ijesu, e oli, “Ose, anye e nono ni u

‡ 10:31 Li ze iMat 20.16; iLuk 13.30

riẹlẹ emini anye ya mhilẹ ena na anye.”

36 Ijesu ọọ wẹ, “Elo a nono ni mhi riẹlẹ na ẹ?”

37 E kẹ, anye ẹ nono, ini u da shito ukpẹkhomhi oye obini Eghiele oniẹmhi oye ne, ni u zẹ ni ọtuoghuo anye ọ kha shito ẹ ukiẹkiẹ obita, ọnọkpọle ọ shito ẹ obogobọ.

38 Ijesu ọọ wẹ, “Aa lẹsẹ emini aa mhila. Uko ni mhi rọte da, a dobe ya rọte ọ da, abi khi eri a dobe ya mie ibatizi onabi mhi mie?”§

39 E kẹ, “Anye ya dobe.” Ijesu ọọ wẹ, “A dobe ri uko ni mhi rọ da ya da, a gbo dobe mie ibatizi onabi mhi mie,

40 ama mhia mhọli afu ni a rọ ri ọgbọ ọ shito mama mhe ukiẹkiẹ obita ali obogobọ ukpẹkhomhi oghie obini iloghie. Eshinẹgba ọ ri asha eghoghọ ya na ẹgbọ ni ọ rẹ wẹ shi aghọ khe.”

41 Abi eniyẹ odukhokho etuogbe enekpọle e rọ suọ ingmemhi ena, e nu iJemhisi ali iJoni i wola shi ọ.

42 Ighọ iJesu ọ lu wẹ tiggili, ọọ wẹ, “A lẹsẹ khi eni ẹ lu egbewẹ ighie eyi ẹgbọ eni ẹa ya ga Eshinẹgba, khi eri ẹ li wẹ abi o ghọle wẹ, ighọ eni e kpeda omhẹsẹ e li ẹ mhẹsẹ na wẹ.

43 Ama, a khi li abi wẹwẹ. Ama ọnini ọ nono ni lọli khi oniẹmhi elemhi ẹ, ọ khi ọni ọ ga ẹẹ nya.*

44 Ọnini ọ nono ni lọli khi ọnodode, ọọ mema kpe ri

egbọli khi oghumha ọyi ẹgbọ kpa.†

45 Itobọ khi Omi Ọgbọ ọa bhale ni a ke ga li, ama eri ọ bhale ya ga ali ni ọ gbo ri agbo oyọli bhale ni a rọ luasẹ obo na ebubu ẹgbọ.”

Ijesu ọ ri iBatimeusi ọtasẹ-alo-a ze

(iMat 20.29-34; iLuk 18.35-43)

46 Ighọ e bhale iJẹriko. Abi iJesu ali eniyẹ odukhokho eyọli ali ebubu ẹgbọ ni e deba li, e rọ rọte oni ẹoli vu, ọmọsẹ ọghuo ni ọ tasẹ alo-a na lui iBatimeusi (omi iTimeusi a ri iBatimeusi ngme) ọ shito epfẹ ode mhila omhila.

47 Abi ọ rọ suọ khi iJesu ọna iNazarẹti lọ, ọọ tsẹsẹ leghe, ọọ liẹ, “Ijesu omi iDefidi, kpẹkpẹ, lẹ elemhi mhe.”

48 Ebubu ẹgbọ e tsẹsẹ ku ọli, ẹẹ ọli ọ zẹ ni a suọ esọ. Ama eena ọ mema lolo pfi okokokhue lu ọli ne, “Omi iDefidi lẹ elemhi mhe!”

49 Ijesu ọ migha, ọọ, “A lu ọli na mhe.” Ighọ e lu ọni ọtasalo-a, ẹ ọli, “Ke ghele, vule, khi ọọ lu ẹ.”

50 Ọ rue awulu nọ ọ sọ pfi a, ọ ti vule pia bhale deba iJesu.

51 Ijesu ọ mhila li, “Elo wa nono ni mhi riẹlẹ ne?”

Ọni ọmọsẹ ni ọ tasẹ alo-a, ọọ, “Ọsẹsẹ, mhia nono ni mhi gbo ke mẹ eke.”

52 Ijesu ọọ, “Ke lẹ, khi irudunga oye o she rẹ ze.” Aghoaghọ, ọọ mẹ eke, ọ deba iJesu rọte ode vu.

§ 10:38 Li zẹ iLuk 12.50 * 10:43 Li zẹ iLuk 22.25-26 † 10:44 Li zẹ iMat 23.11; iMak 9.35; iLuk 22.26

11

Egbọ e ri ufumhi na ijesu abi ọ rọ lo ijerusalemu

(iMat 21.1-11; iLuk 19.28-40; iJọn 12.12-19)

1 Abi e rọ ti ramhi iJerusalemu ni e rọ bhale iBetifagi ali iBetani Udi Ute Olivu, ijesu ọ ghie etuava elemhi eniyẹ odukhokho eyọli,

2 Ọọ wẹ, “A je ẹoli ni o la odalo oobọ eghọ. A kha lẹsẹ lo oni ẹoli le, a ya mẹ omi akphẹrẹ ni a muzu, ni ọgbọkhọghuo ọa nga shito ghue. A taghiẹ ọli bhale ana.

3 Ini ọgbọkhọghuo ọ mhila ẹ, ‘Elo o ze ni a rọ taghiẹ ọli? A gueyẹ ọli khi, Ọnọmhue ọọ nono ni lọli ri ọli rieḽe emhi, ali khi ọ gbo rọli bhale ya shi ekẹ lẹna.’ ”

4 Ighọ ee bhale ya ẹ ọni ozele akphẹrẹ ni a muzu shi ifui apfẹ epfẹ ode. Abi e li taghiẹ ọli-a,

5 ẹgbọ eghuo ni e migha akaghọ e mhila wẹ, “Elo a la akaghọ a rieḽe ni a rọ taghiẹ ọni omi akphẹrẹ ọghọ-a?”

6 E sọ wẹ ọ abi ijesu ọọ e li sọ wẹ ọ. Ighọ eni ẹgbọ e zẹ wẹ vù.

7 Abi e rọ mu ọni ozele akphẹrẹ bhale ghi ijesu se, e banọ ide egbe-a pfino nga ọni ozele akphẹrẹ ukhokho. Ighọ, ijesu ọ nga li shito.

8 Ehubu ẹgbọ elese e li ba ide rọ ku ode, eghuo, e nyanọ eyamhi ku ode.

9 Egbọ ni e ralo ali eni e deba li e gbe ukua, e tsẹsẹ, e liẹ,

“Okuekhoogo! Oolo!”

Eshinegba ọ ka khivose

na ọni ọ ri eva oyi

Ọnọmhue bhale!*

10 “Eshinegba ọ ka khivose

shi Eghiele oyi oghie iDe-
fidi

ita awa ni ọọ bhale.”

“Ikuẹghie o khi oyi Eshinegba!”

11 Abi ijesu ọ rọ ramhi iJerusalemu, ọ dọsẹ ya lo elemhi Owa oyi Eshinegba. Ọ bino emhi nya gase, ama aborokhia khi obili o she bi dọsẹ, lọli ali eniyẹ odukhokho ogbava eyọli e je iBetani.

Ijesu ọ pfi unu na ọora ọkhua-eni

(iMat 21.18-19)

12 Ogbeakọlo abi e li rọte ẹoli iBetani fiẹ, okiamhi oo gbe ijesu.

13 Ighọ ọ tapfia mẹ ọara ọkhua-eni ni o guẹ ta ebe. Ọ lẹ ya bino ini o she mọ udumhi. Abi ọ rọ ramhi aghọ ọa mẹ emhikhọghuo ọ, sẹ ni ebe, itobọ khi ọa ramhi ẹghẹghẹ ni ọkhua-eni e rọ mọ ne.

14 Ighọ ọọ oni ọkhua-eni, “Ogbọkhọghuo ọa ke gbo rọte ẹ ukhomhi ya pfa udumhi ghue.”

Eniyẹ odukhokho eyọli e suọ khi ọ ngme na.

Ijesu ọ je Owa oyi Eshinegba
(iMat 21.12-17; iLuk 19.45-48; iJọn 2.13-22)

15 Abi e ke rọ ramhi iJerusalemu, ijesu ọ lo Owa oyi Eshinegba, ọ vesẹ eni e la

* 11:9 Li zẹ *Iwolo 118.25-26*

akaghọ du oki kua. Ọ kpha okpẹ oyi eni e pfa ikpaghọ ali eni e ri inekhukhu de kua.

16 Ọa zẹ ni ọgbọkhoghuo ọ tsua itsua-oki rọte elemhi apfẹ oni Owa oyi Eshinẹgba doṣe.

17 Abi ọ ke rọ sẹsẹ ẹgbọ, ọ rọ lie, "A she kpẹ kẹkẹ ọli shi Ebe-no-pfuasẹ khi,

"'Owa iromhi oyi ishishi nya, a ya ke lu Owa oyemhẹ,' Ama ẹẹ, a she rọli mele owa ighiatọ a."†

18 Abi ighie eyi ekpodalo-ugamhi ali eni ẹ sẹsẹ ishi e rọ suo ona, ee dua ode ni e te me asha ya gbe iJesu a. Ama ulishi oyi iJesu oó mu wẹ, itobọ khi eri osesẹ oyọli o ri abọ sha ẹgbọ kpa.

19 Ogbomhi o mu eke, iJesu ali eniyẹ odukhokho eyọli e rọte oni ẹli ya fiẹ.

Ilesingme ni a rọte ọkhua-eni ni o ku ebe a rue
(iMat 21.20-22)

20 Eluzogbe oogbeakọlọ khi e rọte oni ode doṣe, e me khi oni ọara ọkhua-eni o khakha ya ramhi imhili.

21 IPita ọ sato, ọọ iJesu, "Osese, bino khe! Ọara ọkhua-eni ni u pfi unu na o she khakha-a."

22 IJesu ọ sọ li ọ, ọọ, "Mhọli irudunga na Eshinẹgba."

23 "Egbegbi-ingme mhi gue ẹ ye ẹ khi ọni ọ gueye oni ute ona, 'Rọ te akana lasele ya je elemhi okẹ oniemi,' ni ọa rọ da mhọli akhọkhomhẹ shi udu shi emini ọ ngme ne, ni ọ rọ mhọli miesuọ khi emini

lọli ngme o ya bhale ya tse, oo ya lighọ na li.‡

24 Irarighọ, emiemini u sọ iromhi mhila, miesuọ khi u she mhọli ọli, oye o ke khi.

25 U kha da migha a lema, ni u rọ ri ingme oyi ọgbọ shi elemhi, nyanya rọ topfa li. Ini itẹ ni ọ la iloghie ọ ri olamhẹ eye li topfa ẹ."

26 "Ama ini u waa da rọ topfa ọgbọese ne, itẹ na iloghie ọa ya li ri olamhẹ eye topfa ẹ."§

A mhila iJesu oni ọ ri afu na li
(iMat 21.23-27; iLuk 20.1-8)

27 Ighọ ee gbo lo iJerusalemu le. Abi iJesu ọ li kia elemhi apfẹ Owa oyi Eshinẹgba gase, ighie eyi ekpodalo-ugamhi ali eni ẹ sẹsẹ ishi ali egbhali e bhale deba li.

28 E mhila li, "Oghuo ọ ri afu ne ni u rọ riele eni emhi enana nya, oghuo ọ ri unu ne u ke riele ena."

29 IJesu ọ sọ wẹ ọ, Ọọ, "Mhi ya mhila ẹ ogbọ oghuo. A sọ mhe ọ, ni mhi tigbe gueye ẹ oni ọ ri afu na mhe mhi ke riele emhi ena.

30 Oghuo ọ fe ri itoto na iJoni ọ ke batazi ẹgbọ abi ẹgbọ?"

31 Ighọ, e ya ye egbe ochi, e nu egbe wẹ ngme ọli khi, "Awa khe 'Rọte iloghie' lẹ, ọ ya mhila awa, 'Elo o zẹ ni aa rọ mie ọli suo?"

32 Ama ini awa ke, 'Obọ oyi ẹgbọ.' " Ulishi oyi ẹgbọ o mu

† 11:17 Li zẹ Aza 56.7; ijere 7.11 ‡ 11:23 Li zẹ iMat 17.20; 1 iKori 13.2 § 11:26 Li zẹ iMat 6.14-15

wẹ, itobọ khi ogbọkpa ọ lẹsẹ khi ọmekẹguele ijọni ọ khi.

³³ Ighọ ẹẹ iJesu, “Anye ẹa lẹsẹ.” Ighọ iJesu ọọ wẹ, “Mhi aa ya li gueyẹ ẹ ọni ọ ri afu na mhe mhi rọ ke rieḷẹ eni emhi ena.”

12

Okhe irọkhokho oyi eni e ngmomhi shi ogba ẹera ipfonu
(iMat 21.33-46; iLuk 20.9-19)

¹ Ighọ iJesu ọ ke ri okhe irọkhokho sẹsẹ wẹ. Ọọ, “Ọmọsẹ ọghuo ọ ke ya gua ogba ẹera ipfonu. Ọ ma ugbe gasẹ oni ogba. Ọ tọ esẹ shi ọ, ni a mino amẹ ikpamhi eni ẹera kulo. Ọ gbo tọ owa ni o yagha ni a la khe-ekhe shi ọ. Ighọ ọ ya ri oni ogba nga eghiale eghuo obọ e nu lọli ri ukpẹloẹ ke khu. Ọ vu asha obini odonue.*

² Eghẹghẹ ikhiẹsẹ o ramhi, ọni ọmọsẹ ọ ghie oghumha ọyọli ghi eni ọ ri ogba nga obọ, ọ lẹ ya mie wẹ idumhi emhi ni a kọ shi oni ogba bhale ghi lue.

³ Ama e mu ọli, e gbe ọli, e khu ọli. Ọ pfino abọ efue ya je.

⁴ Ọ gbo ghie oghumha ọyọli ọlese ghi wẹ, E pfi emhi shi ọli ukhomhi, e yeghe ọli-a

⁵ Ọ gbo ghie ọlese, e gbe onana-a. Ọ ghie elese ni e bu, e gbe eghuo itali, e gbolo eghuo-a.

⁶ “O kpọli ọghuo le ni ọa ghie ne, ikhi omi ọli ni ọ lolo nono ingme oyọli. Lọli ọ

kpukhokho ghie. Ọ sa, ọọ, ‘E ya mu ekpe na omi mhe.’

⁷ “Ama eni e la oni ogba, ẹẹ egbewẹ. ‘Ọna ọ ya le ugu oni ogba ona, a bhale ni awa gbe ọli-a. Eghẹghẹ aghọ ni oni ugu o mele oyawa-a.’

⁸ Ighọ e mu ọli, e gbe ọli-a, e pfi ọli rọte oni ogba ya lase.

⁹ “Sẹ ọni ọ mhọli oni ogba ona ọ fẹ ya li? Eri ọ bhale ya gbolo eni egbọ ni ọ ri oni ogba nga obọ-a, ọ rue oni ogba na egbọese.

¹⁰ Aa she zẹ ọli Ebe-nopfuasẹ khi.

“Eche ni itsọna e kie pfi, lọli o ke ya mele egbegbi eche ni o kẹ mu ẹloẹ nẹ nya-a.

¹¹ Ọnọmhuẹ ọ lighọ rieḷẹ ona, óó ti anye ẹloẹ gba’ ”†

¹² Ighọ egbhali eyi egbọ iJu, e nono odẹ ni e te ya mu iJesu, itobọ khi e lẹsẹ khi wẹwẹ ọ ri oni okhe irọkhokho ona nu ngme. Ama e na ulishi oyi ebubu egbọ ni e la aghọ, e zẹ ọli obọ, e vu.

Ingme izẹ oga na iSiza
(iMat 22.15-22; iLuk 20.20-26)

¹³ Ighọ e tigbe ya nyenẹ egbe ya ghie iFarisi eghuo ali eniyẹ odukhokho eyi Erọdu ghi iJesu, ni e mẹ asha rọte emini ọ ya ngme ri ingme de ọli.

¹⁴ Ighọ e bhale deba iJesu, ẹẹ ọli, “Ọsẹsẹ, anye lẹsẹ khi u ma ngme igesikia, khi emiemini egbọ ẹẹ ngme ali emiemini ogbọ ọ khi ọa ya mu ẹ ẹloẹ, ama odẹ oyi Eshinegba

* 12:1 Li zẹ Aza 5.1-2 † 12:11 Li zẹ Iwolo 118.22-23

wa sẹsẹ ni o te ode igesikia. Mhie i, o famhi ti abi khi ọa ti elemhi ushi, ni a rọ zẹ oga na oghie iSiza?

¹⁵ Anye ke zẹ, abi anye khi zẹ?”

Ama iJesu ọ she mẹ ikpamhika oyewẹ. Ọọ wẹ, “Elo o zẹ ni a rọ nono ni a di mhe mu? A rue ukpamhi anini bhale ghue ni mhi bino.”

¹⁶ E rue oghuo bhale ghi ọli, ọọ wẹ, “Alo ali eva eyi oghuo na ni a mu shi ọ ena?” Eẹ ọli, “Eyi iSiza lo.”

¹⁷ IJesu ọọ wẹ, “A ri emini o khi oyi iSiza na iSiza, a ri emini o khi oyi Eshinegba na Eshinegba.”

Igho ingme oyi iJesu o sha wẹ abo.

Ingme iteghuli-guale

(iMat 22.23-33; iLuk 20.27-40)

¹⁸ Igho egbo ena otu na lui iSadusi ni eẹ sẹsẹ khi ite-eghuli-guale ọa ya la ikpukhokho agbo, e bhale deba iJesu ya mhila li ogbo.‡

¹⁹ Eẹ ọli, “Osese, iMosisi ọ keke ọli shi ebe ushi na awa khi, ‘Ini omose ọ ghu-a pfi ughue ọli shi agbo, ni ọa rọ bia omọ na li, inyoghuo oni omose ọ mema rue oni osamhi-olimhi ughue ni ọ bia eniyẹ na oni ọkpotso na inyoghuo ọli ni ọ ghu-a ogho’\$

²⁰ Eghẹghẹ oghuo ó ya la ọ, a mẹ emose oshilua ni e khi inyoghuo. Oni ogbhali ọ rue ọkpotso. Oni omose ya ghua, ọa bia omọ na oni ọkpotso.

²¹ Inyoghuo ọli ni ọọ deba li ọ ke rue oni ọkpotso, ọ gbo ghua, ọa bia omọ. Igho o gbo li inyoghuo ọli onuzase.

²² Igho o gbo li khi eni inyoghuo oni omose ni e kpole nya. Eni inyoghuo oshilua nya e ga rue oni ọkpotso ughue ni ẹa bia omọ okhoghua na li. Ikpukhokho ọ, oni ọkpotso ọ li ghua.

²³ Ini ogbele iguale o ramhi, ni eni e ghu-a nya e rọ guale, oghuo ọ famhi ya khi ughue oni ọkpotso? Aborokhia khi wewẹ oshilua nya e ga rue ọli ughue egho.”

²⁴ IJesu ọ sọ wẹ ọ, Ọọ, “Wa a mẹ khi eri a da ode khi aa lese emhikhoghua elemhi Ebe-no-pfuase, wẹkhi eri a lese emhikhoghua elemhi ekpabo oyi Eshinegba.

²⁵ Ini eni e ghu-a e guale, ẹa ke ke rue ughue wẹkhi eri a ke re wẹ ke ye ughue. Eri e ke li abi igeni ena iloghie.

²⁶ Ama ingme iguale oyi eni e ghua, aa she kpe zẹ ọli ebe ni iMosisi ọ keke ni ọ ngme ingme ebuli ni oo to shi? Abi Eshinegba ọ gueye iMosisi khi, ‘Mhemhe mhi khi Eshinegba oyi Aburaamu ali Eshinegba oyi Aziki, ali Eshinegba oyi iGiekopu.’*

²⁷ Eshinegba oyi eni e la agbo ọ khi, ọa khi oyi eni e ghua. Eri a ga da ode pfo nya.” Emini a ri ona ngme khi, egbo eni ghu-a eghuo e kie mholi agbo.

‡ 12:18 Li zẹ Ika 23.8 § 12:19 Li zẹ iDeut 25.5 * 12:26 Li zẹ Okiali 3.6

Ushi ni o fune nya

(iMat 22.34-40; iLuk 10.25-28)

28 Otuoghuo eni e sese ishi, o la agho suo abi e ro khako, o me khi iJesu o ga gue so egbo iSadusi ogbo ni e mhila li, o mhila li, "Elemhi ishi nya, onoghuo o ga fune nya?"

29 IJesu o so li o, o, "Oni o mu eloe ne nya na, 'Ku esq-a yeye iZireni, Onomhue Eshinegba oyawa, lolighuo kpe o khi Onomhue."

30 Nono ingme oyi Eshinegba Onomhue oye, ri udu oye nya ali agbo oye nya, ghe isamhi ali ekpabo eye nya nono ingme oyi Eshinegba.†

31 Onuzi-eva ni o gbo lolo mu eloe khi, 'Nono ingme oyi onuzava oye abi u li nono ingme egbe e.' Ushi olese okhoghuo o ke la o ni o gbo mu eloe dose ena."‡

32 Oni omose o, "U ga gue ngme, Oses. Igesikia u ngme ni u we khi Eshinegba oguo o khi, ali khi olese o ke la o, se ni lolighuo.§

33 Ali khi awa ri udu oyi awa nya, ali isamhi eyi awa ali ekpabo eyi awa nono ingme oyi Eshinegba. Ali awa nono ingme oyi onuzava oyawa abi awa li nono ingme egbe awa. Ni awa ro ri ishi eva ena gbe akanya, o ghole Eshinegba dose ni awa ya ri iluasobo ali isomhopfa ododa bhale ghi oli."*

34 Abi iJesu o ro me ilisingme ni o ro so lue o, iJesu o li, "Wa a ga nuata shi Eghiele oyi Eshinegba."

Rote agho vu ogbo okhoghuo o ke gbolo mhila li ogbo okhoghuo.†

Omi oni Omiepfuese o khi

(iMat 22.41-46; iLuk 20.41-44)

35 Abi iJesu o ro la elemhi apfe ni o la Owa oyi Eshinegba sese egbo, o mhila we ogbo. O, Elo o ze ni esese Ishi eyi iMosisi e ro lie khi omi iDefidi Omiepfuese o khi?

36 Abi Ayemhe-n-pfuase o ro kpha iDefidi so, o ro rote unu oyoli lie.

" 'Eshinegba o, Onomhue oyemhe.

Shito mama mhe ramhi egheghe ni mhi ro ya ri ebe e

shi e ufui ekoawe.' "‡

37 Ini iDefidi o rote unu oyi lolighuo lu oli Onomhue, se oni Onomhue oyoli o ke gbo lie khi omi oli?

Ebubu egbo e ku esq a shi eke shi emini o ngme, ni o ri egbe mu we.

IJesu o tse agua ye eniye odukhokho eyoli shi esese Ishi eyi iMosisi egbe

(iMat 23.1-36; iLuk 20.45-47)

38 IJesu o sese we, O we, "A mu egbe e shi esese Ishi eyi iMosisi egbe. Itsua na dolodolo e ma ghole we e iso ke kia ifui oki, ni egbo e ke tse we otse ekpe.

† 12:30 Li ze iDeut 6.4-5 ‡ 12:31 Li ze iLev 19.18 § 12:32 Li ze iDeut 4.35

* 12:33 Li ze Osa 6.6 † 12:34 Li ze iLuk 10.25-28 ‡ 12:36 Li ze Iwolo 110.1

³⁹ E ma nono ni wewe e shito ukpekhomhi ni o mu eloe elemhi owa ugamhi oyi awa ali ashini o mu eloe elemhi ilegba, ni a la le, ni a la da.

⁴⁰ Itoto e ro li esamhi-olimhi e le. Iromhi ni e nuę, eyi abamemhe, e so. Eshinegba, o ya na we osoli onięmhi to o.”

Irona ni osamhi-olimhi o ro na Eshinegba

(iLuk 21.1-4)

⁴¹ Abi iJesu o ro shito ti mama oni akpati ni a pfi ukpagho lo irona a lo elemhi Owa oyi Eshinegba, oo bino ebo abi e li pfi ikpagho lo o. Ebo ni e pfue ebubu e pfi ikpokpomhi ikpagho lo.

⁴² Igho osamhi-olimhi ni o mhue emhikhoghuo, o li ya pfi anini eva lo.

⁴³ Igho iJesu o lu eniye odukhokho eyoli, Oo we, “Igesikia mhi gue e ye e, khi oni osamhi-olimhi ni o mholi emhikhoghuo ona, loli o ri irona ni o fune nya bhale dose ebo enekpole nya

⁴⁴ Itobo khi eri eni e pfue e rote epfue ni e mhue mu epfie ro riele irona. Ama oni osamhi-olimhi ona, rote elemhi umhame oyoli, o kie rue emini o mholi nya ni o kha ro ke le, riele irona.”

13

IJesu o guele emini a ya ke me ikpukhokho agbo

(iMat 24.1-2; iLuk 21.5-6)

¹ Abi iJesu o rote elemhi Owa oyi Eshinegba fie lasete tee, omoo odukhokho oyoli oghuo, oo li, “Bino ghue,

Ose se! Ghe abi ukpokpomhi owa ona ali eche ni a ro ma li e li somhi otse khe!”

² IJesu o so li o, oo, “Wa me ukpokpomhi owa ona. Eghęghę o ya bhale ni echele okhoghuo o ke ro ya migha ukhomhi okhoghuo. Wewe nya e ya de kua.”

Ozughu ali Imu-okholi vule

(iMat 24.3-14; iLuk 21.7-19)

³ Abi iJesu o li shito ukhomhi Ute era Olivu, ni o so alo ghue oni Owa oyi Eshinegba, iPita ali iJemhisi ali iJoni ali Aduru e bena bhale ya mhila li,

⁴ E oli, “Gueye anye, eghęghę ni a ro ya ke me eni ingme enana. Elo a ya ke me ni a ro ya lese khi oni eghęghę ni eni emhi ena e ro ya tse khi o she ramhi?”

⁵ Igho iJesu oo we, “A kuegbe-a ke tokpe, ini oghokhoghuo o khi di e.

⁶ Ebubu ebo e ya ri eva oyemhe bhale deba e, e lie khi, ‘Mhemhe mhi khi loli,’ ee di ebubu ebo.

⁷ Ini a suo khi a kholi, o ke khi eri a suo eko ingme okholi obini odone, a khi ze ni o nighise e udu. Emhi eghoghoo e mema bhale ya tse, ama ukpese agbo o kie ramhi.

⁸ Ishishi ali ishishi e ya mu okholi vule shi egbe o, eghiele ali eghiele e ya li mu okholi vule shi egbe we o. Eke o ya la asha kpa ke nighise, ee kulue. Okiamhi onięmhi oo pfi. Igbaekele osoli na abi oo li okpotso ni oku o lese bele e to egbe.

9 “A ri ukpeloē shi ekē lolo ke tōkpē. A ya mu ẹ je owa ni a la gue ẹzọ. A la elemhi Owa ugamhi gbe ẹ. A ya ri itobọ oyemhẹ mu ẹ bhale odalo oyi enighie ali eni ẹ mhẹsẹ ni a rọ gue usomhi onete oyi Ẹshinẹgba yẹ wẹ.

10 Ama neni ukpẹsẹ agbọ o ya ramhi, a mema she ya tse abọ oni usomhi onete oyi Ẹshinẹgba yẹ ẹgbọ na ishishi nya.

11 Ini a da mu e bhale khi a rẹ ẹ gue ẹzọ, khi zẹ ni udu o nase ẹ shi emini u ya ngme. Ama lẹsẹ ngme emiemini Ẹshinẹgba o ya rọ nẹ oni ẹghẹghẹ aghọ, itobọ khi ọa khi yeyẹ wa ngme, ama Ayemhẹ-nọ-pfuase.*

12 “Ẹgbọ e ya ri inyoghuo wẹ bhale na gbolo-a, ita e li ri imi wẹ li bhale ni a li gbolo-a. Ẹghẹghẹ aghọ, eniyẹ e ya ke sọ alo okhọli ghue eni e bia wẹ ọ, e gbolo wẹ-a.

13 Ẹgbọ nya e ya ri itobọ oyemhẹ ke biselemhi ẹ, ama ọni ọ ri egbe mie ya ramhi ukpẹsẹ, a ya mie pfuese.†

Emhi obe ni ọọ vẹsẹ ẹgbọ kua
(iMat 24.15-28; iLuk 21.20-24)

14 “Ama, a kha da mẹ emini ẹ pfi oyese, ashini aa kha mẹ ọli, ikhi oni ọ vẹsẹ ẹgbọ kua, ẹghẹghẹ aghọ ọni ọ zẹ ebe ọ lẹsẹ abi a ri emini ọ zẹ ngme. Eni e la ekẹ iJudia e na nga ikhomhi ite.‡

15 Ọni ọ la ukhomhi owa ne ọ khi tiemhile elemhi owa ya rue emhikhoghuo.

16 Ọni ọ la ifui ishemhi ọ khi na bhale apfẹ ya rue awulu oyoli.§

17 O ma ze mu ikpotso ni ẹ mẹ ali eni e mhọli eniyẹ ni ẹ nye ẹnyesi shi egbe ẹghẹghẹ aghọ.

18 Lema Ẹshinẹgba ọ khi bie zẹ ni o de shi ẹghẹghẹ ni ulili oniemi o la gbe ẹgbọ elemhi ukpe.

19 Itobọ khi onana o ya khi osoli ni o khọlọ ne nya rọte ẹghẹghẹ ni Ẹshinẹgba ọ te ma agbọ. Ọgbọ a ke gbo ya mẹ osoli uza onana ghue ekẹ agbọ.*

20 Ini Ẹshinẹgba ọa li rọte ogbẹlẹ osoli ni a ngme ena khi-a, ogbọkhoghuo ọa ya dobẹ ji ukhomhi ọ le. Ama irari oyi ẹgbọ eyọli ni ọ zẹ ọda kẹ, ọ rọ rọte eni ogbẹlẹ osoli ena khi-a.

21 Ẹghẹghẹ aghọ ini ogbọkhoghuo ọ gueye, ‘Ghekhe, ghe Ọmiepfuesel’ Okekha khi eri ọ yẹ, ‘Ghe ọli oobọ khe!’ Khi mie ọli suọ.

22 Itobọ khi iromhi emiepfuese ali emekẹguele e ya lasele. E ya ke riẹlẹ ọlẹlẹ ali ikanya ọnyaloa ọdọda rọ ke di ẹgbọ. Ni o kha khi ini ọa gue kia, e ga li ya di egbegbi eni Ẹshinẹgba ọ zẹ ọda kẹ.

23 Irarighọ, a ga lolo kuegbe-a ke tọ ẹloē ekẹ. Mhi she gue emhi nya yẹ ẹ shi ekẹ se neni oni ẹghẹghẹ o ya ramhi.

* **13:11** Li zẹ iMat 10.17-20; iLuk 12.11-12 † **13:13** Li zẹ iMat 10.22 ‡ **13:14** Li zẹ iDan 9.27; 11.31; 12.11 § **13:16** Li zẹ iLuk 17.31 * **13:19** Li zẹ iDan 12.1; Iro 7.14

Inyenegbe bhale oyi Omi Ogbọ
(iMat 24.29-31; iLuk 21.25-28)

24 “Ini eghẹghẹ osoli ona o ga dọsẹ se nya,

“ ‘Ovọ o ya bishi alo-a, uki ọa ke dobe ẹ,†

25 Ikpẹtata e deno ukhuli kule, ukhuli ali ekpabọ ni e la irarogbe ẹ mhẹsẹ e ya ke nighise.’‡

26 “Eghẹghẹ aghọ, ẹgbọ nya e ya mẹ khi Omi Ogbọ ọ kia elemhi otughunu ẹ bhale, elemhi ekpabọ ali ufumhi ni ọ ẹ nyanyanya.§

27 Eghẹghẹ aghọ, ọ ya ghie igeni eyọli e te asha kpa, ikhi ukpẹsẹ agbọ nya, ti ẹgbọ eyọli ni ọ zẹ ọda kẹ gbili.

Osẹsẹ oyi oni ọora ọkhua-eni
(iMat 24.32-35; iLuk 21.29-33)

28 “Bino abi ọkhua-eni o li ẹ te. O kha da kpẹsẹ ukhuli, ni o rọ ke ta ebe ne, lẹsẹ khi okasẹ o kẹlẹ ya le.

29 A kha da gbo li lighọ mẹ khi eni emhi ena khi a da mẹ wẹ ne, lẹsẹ khi eghẹghẹ o she ramhi.

30 Abi o li mhi li gue ọli ẹ yẹ ẹ khi, ẹgbọ eghuo ni e la agbọ memena ẹa ya ghu ne, ni eni emhi ena nya e rọ bhale ya tse.

31 Eke ali ukhuli e ya dọsẹ, ama ingmemhi eyemhẹ ẹa ya tigbe dọsẹ ghue.

Ogbọkhoghuo ọa lẹsẹ oni ogbẹlẹ wẹ ọni eghẹghẹ
(iMat 24.36-44)

32 “Ogbọkhoghuo ọa lẹsẹ oni ogbẹlẹ wẹkhi oni eghẹghẹ. Ghe egbegbi igeni ena iloghie ali mhẹmhẹ Omi ọli, sẹ ni Itamhẹ lọlighuo.*

33 A ri ukpẹloẹ shi eke ke tọkpe, itobọ khi waa lẹsẹ eghẹghẹ ni ọ la ya bhale.

34 Eri ona o li abi ọmọsẹ ni ọ vu asha obini odonue, ni ọ ri ighumha eyọli shi apfe e ri ukpẹloẹ khu shi na lue. Ọ gueye ọgbọgbọ akanya ni ọ ya gbe. Ọ gueye ọni ọ khe ekhe ọ ke khe ekhe apfe.†

35 “Irarighọ, ke khe ekhe, itobọ khi waa lẹsẹ eghẹghẹ ni ọga ọ rọ ya jele. Ini ẹlogbomhi lọ o, okekhi itsotso ogbiẹ lọ o, okekhi eghẹghẹ obili-atso lọ o, abi khi ogbiẹ-fiefie lo.

36 Ini ọ bhale guo, khi zẹ ni ọ bhale ya ẹ khi u wa lẹsẹ a.

37 Abi mhi li gue ọli yẹ ẹ ena mhi li gbo gueye ọgbọkpa. ‘A ke khe ekhe!’ ”

14

Ugbamhi ni a gba khe ijesu
(iMat 26.1-5; iLuk 22.1-2; iJọn 11.45-53)

1 O ke kpe ogbẹlẹ eva le ni a rọ ya li ukpe iPasova ali ukpe ni a la le ibuledi ni aa ri ifuma shi nye, ighie eyi ekpodalougamhi ali esesẹ Ishi eyi iMosisi, ee nono ode ni e te ya bẹna mu ijesu gbe-a.*

† 13:24 Li zẹ Aza 13.10; Ezik 32.7; iJọe 2.10,31; 3.15; Irọ 6.12 ‡ 13:25 Li zẹ Aza 34.4; iJọe 2.10; Irọ 6.13 § 13:26 Li zẹ iDan 7.13; Irọ 1.7 * 13:32 Li zẹ iMat 24.36

† 13:34 Li zẹ iLuk 12.36-38 * 14:1 Li zẹ Okiali 12.1-27

² Ẹ egbe, “Awa khi riẹlẹ ọli ini a li imu, onyaghu ọa ya lasele shi ọ.”

A la iBẹtani ku oili shi iJesu egbe

(iMat 26.6-13; iJọn 12.1-8)

³ Abi iJesu ọ rọ la ẹoli iBẹtani, owa oyi iSamọ ni efafe e kpe mu shitọ le eminale, ọkpotoso ọghuo ọ rue ukoko ituale ni o lolo ghalẹ, ni o pfiẹ lasele. Ọ gbe oni ukoko a, ọ ku oni ituale shi iJesu ukhomhi.†

⁴ Ẹgbọ eghuo ni e la agho, e ri elemhi ibibi liẹ egbe, “Elo o zẹ ni a rọ na pfiẹchẹ oni ituale kua shi afuẹ?”

⁵ A kha ri ọli dẹ ramhi ifata ukpe ali emhi, a kemhi eni ikpagho na eni ẹa mhue. E shi oni ọkpotoso unu egbegbo.

⁶ Ama iJesu ọọ wẹ, “A zẹ ọli obọ. Elo a yẹsẹ ọli ẹ ngme shi? Egbegbi emini o ti ni o somhi otse ọ riẹlẹ na mhẹ.

⁷ Ẹghẹghẹ kpa eni ẹa mhue e rọ nu ẹ la ana, ẹghẹghẹ ni o ghọle ẹ kpa a kpaghiẹ wẹ obọ. Ama aa ya mẹ mhẹ ẹghẹghẹ kpa.‡

⁸ Emini ọ dobe ya riẹlẹ ọ riẹlẹ egho. Eri ọ ku ituale ku mhẹ egbe shi eke khe ẹghẹghẹ irotọ oyemhẹ.

⁹ Igesikia mhi gue ẹ ye ẹ khi, ashashini a da la tse abọ usomhi onete eke agbo ona nya ne, a ya yele emini ọkpotoso ọna ọ riẹlẹ le.”

Ijudasi ọ lama khi lọli ya ri iJesu dẹ

(iMat 26.14-16; iLuk 22.3-6)

¹⁰ Ẹghẹghẹ agho iJudasi Isikaroti, ni ọ khi ọtuoghuo eniye odukhokho ogbava, ọ lẹ deba ighie eyi ekpodalougamhi, ni ọ ya ri iJesu na wẹ dẹ.

¹¹ Onana ni ọ gueye wẹ, o ga ghọle wẹ. E shobọ khi wẹwẹ e ya ri ikpagho na li. Igho iJudasi ọ li nono ẹghẹghẹ ni ọ ti ni ọ rọ ya mẹ asha ri iJesu na wẹ.

IJesu ọ nu eniye odukhokho eyoli le Eminale iPasova

(iMat 26.17-25; iLuk 22.7-14,21-23; iJọn 13.21-30)

¹² Ogbẹlẹ ni ododẹ ni a li oni ukpe ni a la le ibuledi ni aa ri ifuma shi nye o ramhi, ni o khi ogbẹlẹ ni a rọ gbe ozele Osumha oyi oni iPasova-a, eniye odukhokho eyi iJesu e mhila li “Ashi o ghọle ẹ ni anye mu egbe shi eke nẹ, ni u la le eminale iPasova?”

¹³ Igho, ọ ghie eniye odukhokho etuava eyoli, ọọ wẹ, “A lo ifuapfe, omose ni ọ tsua ubene amẹ, ọ ya lona ẹ odẹ. A deba li je apfe.

¹⁴ A gueye oni ọ mhọli apfe ni ọ ya lo, khi, ‘Ọsẹsẹ ọọ, anye mhilẹ u ri anye khasẹ elemhi owa ni lọli ali eniye odukhokho eyelue wẹwẹ e la ya le eminale iPasova?’

¹⁵ Ọ ya rẹ ẹ khasẹ agbala ni emhi nya e gba shi ukhomhi owa atonga, a muno egbe shi akaghọ na awa.”

¹⁶ Eni eniye odukhokho e vu, e lo ifui apfe, e ya mẹ eni emhi tee abi iJesu ọ gue ọli

† 14:3 Li zẹ iLuk 7.37-38 ‡ 14:7 Li zẹ iDeut 15.11

yẹ wẹ. Igho e mu egbe oni eminale iPasova.

¹⁷ Ogbomhi o mu eke, iJesu ali eni eniyẹ odukhokho ogbava e bhale.

¹⁸ Abi e li shito gasẹ itebu le eminale, iJesu ọọ wẹ, “Egbegbi-ingme mhi gue ẹ yẹ ẹ khi ọtuoghwo elemhi ẹ ọ ya rẹ mhẹ dẹ. Oni ọ nu mhẹ le emhi memena.”[§]

¹⁹ Udu o yese wẹ-a, ọtuoghwo-oghwo ọọ mhila li, “She khi ọa khi mhemhẹ o khi?”

²⁰ Ọ sọ wẹ ọ, ọọ wẹ, “Ọtuoghwo elemhi ẹẹ ogbava ọ ya khi, oni ọ ga ri ibuledi nu mhẹ ẹ sọmhi elemhi utasa memena.

²¹ Eri Omi Ogbọ ọ ya ghu-abi a li keke ọli shi eke na li. Eri-tse khi, o maa khọlo oni ọ ya roli dẹ egbe! O kha ga ti ne, ini ogbọ ọa bie bia li lo!”

Eminale oyi Onomhwe

(iMat 26.26-30; iLuk 22.14-20; iKori 11.23-25)

²² Abi e li le eminale egho, iJesu ọ rue ibuledi, ọ kphemhi, ọ khi ọli a, ọ ro na eniyẹ odukhokho eyoli, ọọ, “A mo le; Idiegbe oyemhẹ na.”

²³ Igho ọ gbo sọ onyo shi uko, ọ kphemhi, ọ roli na wẹ, wewẹ nya e ga te ọ da.

²⁴ IJesu ọọ wẹ, “Olia eyemhẹ na ni e migha shi ishiobo onogbo, ni a ku kua na ebubu egbo.*

²⁵ Mhi gue igesikia yẹ ẹ khi mhi aa ke gbo ya rote onyo upfonu ona da, se ni obini

Eghiele oyi Eshinegba, ni mhi la da onyo onogbo.”

²⁶ Abi e ro to uwolo se, e fiẹ lasele, e je Ute Efera olivu.

IJesu ọ guele shi eke khi iPita ọ ya kie lue

(iMat 26.31-35; iLuk 22.31-34; iJon 13.36-38)

²⁷ IJesu ọọ wẹ, “Eẹ nya, a ya na kua, a zẹ mhemhẹ-ghuo obọ, irari khi a she keke ọli shi Ebe-no-pfuase khi.

“Mhi ya ri emhi li
orisumhafia,
isumha e ya wẹ kua.”[†]

²⁸ “Ama ini a guise mhẹ le se, mhi ya ralo khe ẹ iGalili.”[‡]

²⁹ IPita ọọ li, “Ini egbo nya e ririẹ kie ẹ, mhi aa ya kie ẹ.”

³⁰ IJesu ọọ iPita, “Mhi gueye khi, neni okpa ọọ gbieghe iteva amiöse, u ya kie mhẹ itese.”

³¹ IPita ọ kie gema ọ gue gagaga, ọ lie, “Ini o ri riẹ khia khi oni mhi la nu ẹ ghua lo, mhi aa ya tigbe kie-ẹ.” Enekpole nya e li ngme ghọ.

IJesu ọ la iGetisemani sọ iromhi

(iMat 26.36-46; iLuk 22.39-46)

³² E je ashini a lu iGetisemani, iJesu ọọ eniyẹ odukhokho eyoli, “A shito ana ni mhi ya sọ iromhi bhale.”

³³ Ọ rue iPita ali iJon ali ijemhisi ma egbe vu. Iyesudu-a ali anasemhẹ e bhale na li.

³⁴ Ọ wẹ, “Oya ni o la mhẹ udu memena o gba a. O ga

§ 14:18 Li zẹ Iwolo 41.9 * 14:24 Li zẹ Okiali 24.8; ijere 31.31-34 † 14:27 Li zẹ izaka 13.7 ‡ 14:28 Li zẹ iMat 28.16

nono ni luẹ gbe mhe. A migha akana khe mhe, a ke tokpe.”

35 O ti je odalo deṅe, o de ya yeshi eke, oo so iromhi ini o ya ze rieḷe ni oni eghẹghe ona o doṣe luẹ.

36 Oḷ, “Itamhe, Itamhe, emhikpa o ze e rieḷe. Rue mhe oni uko osoli ona odalo le. Eri-tse khi, o a khi abi o ghole mhe, seḷe ni abi o li ghole e.”

37 Abi o nyene egbe bhale, o me khi eni eniye odukhokho e lese-a. O o iPita, “ISamo, eri u lese-a? Aa doḷe nu mhe tokpe ukuku eghẹghe tse?”

38 Ri ukpeḷoe shi eke gboo ke so iromhi ini u khi de ini u mholi imufe. Ayemhe oye o mu egbe ni o ro rieḷe, eri-tse khi, idiegbe oye o a doḷe.”

39 Igho o gbo vu ya so iromhi enabi o kpe so.

40 Abi o ro nyene egbe bhale, o gbo bhale ya e we khi e lese-a, irari khi olese o la we alo, e a lese abi e ke ya ngme oḷi.

41 Abi o ro nyene egbe bhale utonuzese, oḷ we, “Olese a kie la, ni a yemhe-a? Olese ogho o she bu e! Oni eghẹghe o she ramhi. A bino khe khi, a ri Omi Ogbọ na ena olamhe de.

42 A vule ni awa vu! Oni o remhe de oḷ bhale ena!”

A mu iJesu

(iMat 26.47-56; iLuk 22.47-53; iJon 18.3-12)

43 Abi o li ngme, iJudasi, ni o khi oṭuoghwo elemhi eni eniye odukhokho ogbava o bhale. Egbọ ni e tsua itsua okhọli

ali itakobi ali ikpokpo, ni ighie eyi ekpodalo-ugamhi, ali esese Ishi eyi iMosisi ali egbhali e ghie, e nu oḷi bhale.

44 Oni o roḷi de o she kpe gueye eni e nu oḷi kia, oo we, “Oni mhi da pfipfi ekphamhi ne, loḷi o khi oni a nono. A mu oḷi, a khe oḷi ekhe rue vu.”

45 Abi e ro lese lole, iJudasi o le deba iJesu, oḷ, “Oseḷe.” O pfipfi oḷi ekphamhi.

46 Eni emose e mu iJesu.

47 Igho oṭuoghwo eni e migha epfe-agho o ji itakobi oyoli emhi lasele, o be oghumha oyi Oga oyi ekpodalo ugamhi eso-a.

48 IJesu oḷ we, “Okhọli mhi tsua, ni a ro lina tsua itsua okhọli ali itakobi ali ikpokpo bhale ya mu mhe?”

49 Ogbelẹ kpa mhi ro nu e la, mhi la Owa oyi Eshinegba e sese. Aa mu mhe. Eri a me emhi ena ni emini a keke shi Ebe-no-pfuase o bhale ya tse.”§

50 Igho eniye odukhokho eyoli nya ni e deba li e ve kua, o kpe loḷighwo le.

51 Ozeo oghwo ni o so awulu ona yeyeye, oo deba iJesu. Abi e ro to obo so li, khi wewe e ya mu oḷi,

52 o nyan o awulu-a mhuẹ we abo, o ri irumheba na vu.

Otu iSaḷdiri e ri iJesu gue ezo

(iMat 26.57-68; iLuk 22.54-55,63-71; iJon 18.13-14,19-24)

53 E mu iJesu bhale owa oyi Oga oyi ekpodalo ugamhi, ighie eyi ekpodalo-ugamhi

nya, ali egbhali ali ekekebe ali esese Ishi eyi iMosisi nya e le gba.

⁵⁴ IPita o tapfia deba li ukhu-khokho, ya ramhi elemhi apfe oyi Oga oyi ekpodalo ugamhi. O nu eni e khe ekhe shito khaser erali.

⁵⁵ Eni ighie eyi ekpodalo-ugamhi ali oni igbaa oyi iSaediri nya, e nono emhi ushi ni e ya mu mhali iJesu obo, ni e ba me asha gbe oli-a. E a me emhikhoghuo.

⁵⁶ Eububu egbo e pfi otsele eyi egbhali mu oli, eni otsele nya, e a de shi oghuo.

⁵⁷ Ikpukhokho, egbo eghuo e vule pfi otsele egbhali ona mu iJesu. Ee,

⁵⁸ "Anye suo khi oo lie khi, 'Mhi ya guogh Owa oyi Eshinegba onana ni egbo e ri abo ma-a, ele-ese mhi to olese ni egbo e a ri abo ma.' "*"

⁵⁹ Abi e ri e kie ngme ona, otsele eyewe e a kie de shi oghuo.

⁶⁰ Igho Oga oyi ekpodalo ugamhi o vule migha odalo oyewe nya, o mhila iJesu. "Waa bie ya so we o? Ezọ elo na ni egbo ena ee gue shi e egbe?"

⁶¹ Ama iJesu o tsaghi e a, o a so we o. Oga oyi ekpodalo ugamhi, o gbo mhila li, "Yeye u khi Omiepfuese, Omi Eshinegba ona Kueghie?"

⁶² IJesu oo li, "Loli mhi khi. Ee nya a ya me khi Omi Ogbo o shito obita oyi Eshinegba ni o fune, ali khi o la otughunu rote irarogbe e tiemhie."†

⁶³ Oga oyi ekpodalo ugamhi o nyan o itsua shi egboli uruli abi o li yila. Oo, "Awa ke gbo nono otsele olese.

⁶⁴ Ee nya a she suo abi o pfi unu-a deba Eshinegba. Se a so shi o?"

Wewe nya e pfa ezọ mu oli khi oni a gbe-a o khi.‡

⁶⁵ Egbo eghuo o, e tono ete ku oli. E ri emhi gen o alo. E pfi oli emhi, e oli, "Me eke guele, gueye anye oni o pfi e emhi?" Eni e khe ekhe e mu oli, e lase oli eso.

IPita o khi loli e a lese iJesu (iMat 26.69-75; iLuk 22.56-62; iJon 18.15-18,25-27)

⁶⁶ Abi iPita o kie shito elemhi apfe egho, omueshi oghuo ni o khi oni oo ga oyi Oga oyi ekpodalo ugamhi o bhale.

⁶⁷ O me iPita abi o rokhase erali, o toli okpe tsuke.

Oo li, "Yeye u li nu iJesu na iNazareti i kia."

⁶⁸ Ama iPita o tia. Oo, "Mhi a lese emini wa ngme." O lase agho le je ode ni a te e lo elemhi apfe. [Igho okpa o gbieghe.]

⁶⁹ Abi oni omueshi ni o ga ogbo ogho o ro gbo me iPita agho, o gbo ri ele eni ingmemhi ngme khaser eni e migha epfe agho. Oo, "Otuoghuo elemhi we, oni omose ona o khi."

⁷⁰ IPita o gbo tia.

Oo li den e, eni e migha epfe agho e ke iPita, "Igesikia lo khi otuoghuo elemhi we u khi, irari khi on e galili u khi."

* 14:58 Li ze iJon 2.19 † 14:62 Li ze iDan 7.13 ‡ 14:64 Li ze iLev 24.16

⁷¹ Igho o li se egboli isheli, o romhi eni isheli. O lie, "Mhi aa ga lese omose ona ni a ngme ena."

⁷² Utoghuokpe, okpa o gbieghe utonuzi-eva. IPita o sato emini iJesu o gueye oli khi, "Neni okpa o ya gbieghe utonuzi-eva, u ya kie mhe itese." Igho o gbe akhe evie a.

15

A rue iJesu bhale odalo oyi iPaleti

(iMat 27.1-2,11-14; iLuk 23.1-5; iJon 18.28-38)

¹ Eluzogbe fiefie, ighie eyi ekpodalo-ugamhi, ali egbhali ali esese Ishi eyi iMosisi ali igbaa eyi isaediri nya, e ye ugbamhi. E ge iJesu rue vu ghi iPaleti.

² Oni iPaleti o mhila iJesu ogbo, oo li, "Oghie oyi egbo iju u khi?"

IJesu oo, "Eee! Igho lo abi u ngme oli."

³ Eni ighie eyi ekpodalo-ugamhi eyi Eshinegba e ga gue ezọ emhi ebubu shi iJesu egbe.

⁴ Igho iPaleti o gbo mhila li ogbo, oo, "Wa ya pfunu, u suo iwali ezọ ni e gue e shi e egbe?"

⁵ Ama iJesu o a so li o. O ri abo sha iPaleti.

A pfa ezọ mu iJesu a ka gbe oli a

(iMat 27.15-26; iLuk 23.13-25; iJon 18.39-19.16)

⁶ Abi aa li ini o lina ramhi egheghe ukpe iPasova, eri iPaleti o rue ogbo oghuo owa

ighumha lasela na we abi o ghole we shi.

⁷ Egheghe agho omose oghuo ni a lu iBarabasi o la owa ighumha, ni o khi oghuo egbo ni a mu. Eri a mu oli shi ugbeli ni o gbe egheghe ni a ro me onyaghu.

⁸ Abi eni egbo e ro bhale gbii ya mhila iPaleti o riefe emini o kie kpe riefe na we,

⁹ IPaleti o mhila we, oo, "A nono ni mhi rue oghie iju abo a na e?"

¹⁰ O ga lese gboo khi itobo ibiselemhi, ighie eyi ekpodalo-ugamhi e ro mu iJesu ghi lue.

¹¹ Ama ighie eyi ekpodalo-ugamhi e sese egbo e gueye iPaleti o ri ochoghọ wolo iBarabasi obo a na ewe.

¹² IPaleti o mhila we, oo, "Elo mhi ke li oni a lu oghie iju sho?"

¹³ E tsefe leghe, "A ta li ma oara apfida."

¹⁴ IPaleti o mhila we, oo, "Elo o ze, umha-guekia onoghuo o riefe?" Ama eena e tsefe ne, "A ta li ma oara apfida!"

¹⁵ Ni o ro riefe emini oo ghole eni egbo, o wolo iBarabasi abo-a na we. Oo e gbe iJesu ite, o rue oli na we e ka ta li ma oara apfida.

Ekholi-okhue e ri iJesu li egia

(iMat 27.27-31; iJon 19.2-3)

¹⁶ Eni ekholi-okhue e rue iJesu lo elemhi apfe agbala oyi igovuno. E lu ekholi-okhue apfewe eni e kpole.

17 E ri awulu iche ni o khi egholi ibulu, so li, e ri igba do arula rughu oli ukhomhi.

18 E lie oli, "A da abo na oghie oyi egbo iJu!"

19 E pfino oli ukpokpo ukhomhi iti ingmi-ingme, e tono ete ku oli. E de ya wugha li odalo, e nyese ukhomhi na li.

20 Abi e ro ligho ri iJesu li egia se nya, e gueghie oli oni awulu iche ni o khi egholi ibulu ogho, e nyene egbe ri itsua eyoli so li. Igho e rue oli vu ya tama oara apfida.

A ta iJesu ma apfida

(iMat 27.32-44; iLuk 23.26-43; iJon 19.17-27)

21 Abi e ro le, e ya e omose oghuo ni a lu iSamon ni o rote ode oyoli dose, ni o rote asha jele. Igho eni ekholi-okhue e ri itoto mu oli o tsua oara apfida oyi iJesu. ISamon ongi iZireni o khi, o gbo khi ita Alezada ali iRufosi.*

22 E rue iJesu bhale ashini a lu iGogota. [Ugua ukhomhi olimhi a ri iGogota ngme]

23 A ri onyo ni a ku ikhumhi na lui Imari shi na li o ro da, ama oara lama da li.

24 E ta li ma oara apfida. E kemhi itsua ni o so mholi egbe abo. E ti ebe ro kemhi eni ide eyoli, ni e lese oni o ya te ogbogbo.†

25 Eghenge agogo itili eluzogbe a ro ta li ma oara apfida.

26 Emini e keke ro kphase oni oara apfida kpeda na li khi. Oghie Oyi Egbo iJu.

27 E li gbo ta ighiato etuava ma oara apfida mama li, otuoghuo o la li obo-ita, onokpo o la li obogobo.

28 Ona o ri emini a keke shi Ebe-no-pfuase bhale ya tse, ni o o, "A leli oli ma ighiato."‡

29 Egbo eni e te epfe agho dose, e pfi itsue manya iJesu, ee nighise ukhomhi, e lie, "Ebaneke! Yeye ni u ya guogh owa oyi Eshinegba-a, u gbo rie o to ogbele ese.§

30 Ro te oara apfida tiemhie sho ya mie egbe e pfuese."

31 Igho ighie eyi ekpodalougamhi, ali esese Ishi eyi iMosisi e li ri iJesu li egia, e lie egbe we. "O mie egboese pfuese, ama oara dobe mie egboli pfuese.

32 A ze ni oni Omiepfuese ona, ikhi oghie iZireni, ni o rote oara apfida tiemhie ni awa me, ni awa mie oli suo." Eni a li ta ma oara apfida mama li, e ga li nu we tsue oli.

Eghuli oyi iJesu

(iMat 27.45-56; iLuk 23.44-49; iJon 19.28-30)

33 Agogo igbeva oguota, obili o bi oni eke a nya. Elemhi iwakati ese oni obili o la ogbe ramhi.

34 Agogo ese o ramhi, iJesu o tse leghe, o ri unu eoli oyewe lie, "Eloi, Eloi, Lama Sabachi tani?" Emini a ri ona ngme khi, "Eshinegba oyemhe,

* 15:21 Li ze iRom 16.13 † 15:24 Li ze iwolo 22.18 ‡ 15:28 Li ze Aza 53.12

§ 15:29 Li ze iwolo 22.7; 109.25; iMak 14.58; iJon 2.19 * 15:34 Li ze iwolo 22.1

Ɛshinẹgba oyemhẹ, elọ o zẹ ni u rọ tsua mhẹ pfiá.”*

35 Abi ẹgbọ eghuo ni e migha epfe agho e rọ suọ khi o ngme na, e ke, “Ri esọ shi eke khi o lui Elaja.”

36 Omoşe oghuo elemhi eni ẹgbọ o na ya rue isoso sọ li onyo ni okhe a, o ge ọli shi ukpokpo roli kpe iJesu unu o rọ da. Oni omoşe o ke. “A zẹ ọli obọ, ni awa me ini Elaja o ya bhale ya rue ọli ukhomhi ọara apfida tiemhie.”†

37 iJesu o tseşe leghe, o ghua.

38 Ukpokpomhi ode ug-bakpi ni a rọ pfa ode-a shi elemhi Owa Oyi Ɛshinẹgba, o rọte idane kişe-a asha eva ya to eke.‡

39 Abi okhọli-okhue ọniemhi ni o migha odalo oni ọara apfida o rọ suọ abi iJesu o tseşe leghe, ni o rọ me abi o li ghua, ọọ, “Egbegbo lo khi, Omi Ɛshinẹgba omoşe ọna o khi.”

40 Ikpotoso eghuo e ta pfiá bino, iMeli onge iMagidaleni, ali iMeli inyi ijemhisi oni o kpọke, ni o gbo khi inyi ijosisi ali iSalome.

41 Ikpotoso ena e mema deba iJesu ni e ri ukpeloe khu ọli obini iGalili. Ikpotoso elese ni e deba iJesu bhale iJerusalemu e li ga migha agho. §

Irotọ oyi iJesu

(iMat 27.57-61; iLuk 23.50-56; iJón 19.38-42)

42 Ogbomhi o she mu eke ẹlegho ni o khi ẹle ni a rọ mu egbe ke ẹle iyemhea oyi ẹgbọ iJu.

43 iJosefu onge Arimatia, ni o khi oghuo eni e mhese, ni o khi ogbọ ni o li mu ẹloe. Eri o bie kpe ri ẹloe shi eke ke Eghiele oyi Ɛshinẹgba. O gbe udu le ya gueye iPaleti o rue olimhi oyi iJesu na lue ya to.

44 O ga sha iPaleti abọ khi iJesu o she gbhe ghọ kele ghua. O lui oni okhọli-okhue ọniemhi ogho mhila ini iJesu o she gbhe ghua.

45 Abi iPaleti o rọ rọte unu oyi oni okhọli-okhue ọniemhi ogho suọ khi igho o khi egbegbo, o tsua olimhi oyi iJesu na iJosefu.

46 Igho iJosefu o de ide, o rue oni olimhi tiemhile ọara, o khuli ọli, o ri ọli to uji ni a to shi eche. O gheghele eche oniemhi guese oni uji.

47 iMeli onge iMagidaleni, ali iMeli inyo ijosisi e me ashini a ri ọli to.

16

Irote eghuli guale oyi iJesu
(iMat 28.1-8; iLuk 24.1-12;
iJón 20.1-10)

1 Abi ẹle iyemhea o rọ dose se, iMeli onge iMagidaleni, ali iSalome, ali iMeli inyi ijemhisi, e de afu ituale ni ẹe pfié mhue obọ ni wewe e ya khakha li shi idiegbe olimhi oyi iJesu.

2 Ogbie-fiefie ni o khi uka, khi ovo o lese ngale, e je atalimhi ni a roli to.

³ Igho e mhila egbe wé, “Oghuo o ya gheghele eche unu oni atalimhi-a na awa?”

⁴ Ama abi e ke ro yase alo eke bino, e me khi a she gheghele oni eche ni o gho gbèdi unu oni atalimhi-a a.

⁵ Abi e ro lo oni uji, e me ozeo ni o so itsua epfopfo na dogo, khi o shito epfe obita. O sha we abo.

⁶ Oo we, “Abo e khi sha e.” “Ijesu onge iNazareti oni a ta ma oara apfida a nono? O she te eghuli guale. Oa la akana. Ghe ashini a roli to.

⁷ Ama a ke vu, a ka gueye eniye odukhokho eyoli ali iPita khi, ‘O she ralo iGalili e khe e. A ya bhale ya e oli shi agho abi o kie kpe gueye e.’”*

⁸ Eni ikpotso e lasese, e na ya je apfe. Abo e sha we, ulishi oo mu we, ea nu ogbokhoghuo ngme irari khi ulishi o mu we.

[Ebe eni odode eghuo eni a rote keke oni Usomhi Onete ona, ea mholi odada 9-20 oyi ukhomhi 16 ona.]

Ijesu o ri egboli khasé iMeli ongi iMagidaleni

(iMat 28.9-10; iJon 20.11-18)

⁹ Abi ijesu o ro rote eghuli guale ele uka se, o ri egbe oli kpe khasé iMeli onge iMagidaleni, oni ijesu o khu ayemhe ebe ishilua rote egbe ya fie.

¹⁰ O vu ya gueye apfe ijesu ni ee vie.

¹¹ Abi e ro suo khi ijesu o she guale khi o la agbo ali khi

iMeli ongi iMagidaleni o me oli, ea mie shi oli o.

Ijesu o ri egboli khasé eniye odukhokho aava
(iLuk 24.13-35)

¹² Abi a ro me ona se, ijesu o rote ode ododa ri egboli khasé ewe aava abi e li lo elemhi oni eoli.

¹³ E nyene egbe jele, e gbo gueye eniye odukhokho ni e kpole, ama, ea gbo li mie shi we o.

Ijesu o ri egboli khasé eni eniye odukhokho ogbaghuo
(iMat 28.16-20; iLuk 24.36-49; iJon 20.19-23; Ika 1.6-8)

¹⁴ Ikpukhokho, ijesu o ri egboli khasé eni eniye odukhokho ogbaghuo abi e ro le eminale. O dese we shi umha-mholi irudunga oyewe, ali umha-nono ni e mie shi emini eni e me lue e ngme abi o ro guale se.

¹⁵ Oo we, “A lo elemhi eke agbo nya, a ke gue usomhi onete oyemhe ye ogbokpa.†

¹⁶ Onini o da mie e suo, ni a da batazi ne, o ya mholi imiepfuese, ama oni oa da miesuo, a she pfa ezoo mu oli.

¹⁷ Olele ona o ya ke deba eni e miesuo, e ya ri eva oyemhe khu ayemhe ebe kua, e ya ngme emue onogbo unu.

¹⁸ E ya ri abo eyewe mu enye eke, ini e rie rue ikhumhi ni oo gbe ogboda, oa ya li we abikhoghhuo. E kha ri abo nga eni e ghua egbe, e ya toto.”

* 16:7 Li ze iMat 26.32; iMak 14.28 † 16:15 Li ze Ika 1.8

*A rue iJesu nga obini
iloghie*

(iLuk 24.50-53; Ika 1.9-11)

¹⁹ Abi iJesu Ọnọmhuẹ ọ rọ nu wẹ ngme se, a rue ọli nga idane iloghie. Ọ shitọ ukiẹkiẹ obita oyi Ẹshinẹgba.‡

²⁰ Ighọ eniyẹ odukhokho eyi iJesu e li fiẹ ya tse abọ oni usomhi onete gasẹ asha kpa. Ighọ Ọnọmhuẹ ọ rẹ wẹ gbe ikanya, ọ ri ikanya ọnyaloa ni e gbe ri ungmehi oyọli tşẹ.

‡ **16:19** Li zẹ *Ika 1.9-11*

Usohmi Onete oyi iJesu iKirisiti ni iLuku O keke

Irɔkhasɛ

¹ Ebubu ɛgbɔ e she rɔshɛka keke emini e bhale ya tɛɛ nya ɛghɛghɛ oyi anye.

² Ɖɛzɛzɛ abi ɛgbɔ eni ɛ gue ungmehi oyi Ɖshinɛgba le, ni e rɔte igbaekɛle ri ɛloe mɛ wɛ abi e li de, ighɔ e li gue wɛ yɛ anye, ni anye rɔ lighɔ keke wɛ.

³ Aborɔkhia khi eni ingme ena, khi rɔte igbaekɛle mhi te tɔwɛ ɔkpɛ, lɔli o rɔ ti mɛ ɛloe, ni mhi kuegbe-a keke abi e li de ghi ɛ, yɛyɛ iƉiofilɔsi ni a ri ekpɛ ɛ na,

⁴ Isheghɔ ni u rɔ ya lɛɛ ɛgbegbi ingme ni e la emini a sɛɛ ɛ.

A guele shi ekɛ khi, a ya bia iƉɔni

⁵ Ɖkpodalo-ugamhi oyi Ɖshinɛgba ɔghuo ni a lu iZakaraya ɔ ya la ɔ ɛghɛghɛ oyi oghie ni a lu Erɔdu ni ɔ mhue ekɛ iJudia. Ɖni iZakaraya ɔ khi ɔtuɔghuo igbhogbho ekpodalo-ugamhi eyi Ɖshinɛgba ni Abija ɔ li la. A lu ughue ɔli Enizabɛti ni ɔ khi omiomi Erɔni.*

⁶ Ɖni ɔmɔsɛ ɔna ali ughue ɔli, e khi ɛgbɔ ni e pfuasɛ shi odalo oyi Ɖshinɛgba, ni e ri ishi eyi Ɖshinɛgba á gbe akanya.

⁷ Ɖa bia ɔmɔ itobɔ khi Enizabɛti aga ɔ khi. Wɛwɛ awa-ava e she womɛ.

⁸ Ɖlɛghuo, khi ugamhi o tɛ iku ɛgbɔ ekpodalo-ugamhi eyi Ɖshinɛgba ni iZakaraya ɔ la,

⁹ obɔ o mu iZakaraya khi lɔli ɔ ya lo Owa oyi Ɖshinɛgba ya toɛ ituale afu ɛɛra ukhomhi atɛtɛ. Ighɔ eni igbhogbho ekpodalo-ugamhi eyi Ɖshinɛgba e kie kpɛ ɛ li.

¹⁰ Abi ɛghɛghɛ ni a rɔ ɔ toɛ eni ituale o rɔ ramhi, eni ɛgbɔ ni e bhale shi oni ugamhi, e legba atukpapfɛ, e sɔ iromhi.

¹¹ Ighɔ agɛni oyi Ɖshinɛgba ɔ bhale ya migha ukiɛkiɛ obɔ ita oni adido ni a la toɛ ituale.

¹² Abi iZakaraya ɔ rɔ mɛ ɔni agɛni, ɔ yila, ulishi oo mu ɔli.

¹³ Ama ɔni agɛni ɔɔ li, “Khi zɛ ni ulishi o muɛ, Ɖshinɛgba ɔ she suɔ iromhi ni u sɔ. Ughue Enizabɛti, o ya bia ɔmɔ nɛ. IƉɔni khi eva ni u ya lu ɔli.

¹⁴ Ɖni ɔmɔ, ɔ ya ri oghɛɛ ali iregbemu ghi ɛ. Ebubu ɛgbɔ e ya ghɛɛ shi ubiamhi oyɔli.

¹⁵ Irari khi ɔ ya fu shi odalo oyi Ɖshinɛgba. Ɖ khi tigbe da onyɔ ni o toto ghue. Rɔte ɛɛ ni a te ya bia li, ɔ te ya mhue Ayɛmhɛ-no-pfuasɛ.

¹⁶ Ɖgbɔ iZirɛni ebubu ɔ ya mu pfi bhale deba Ɖshinɛgba Ɖnɔmhue ɔyɛwɛ.†

¹⁷ Ɖnɔmhue ɔ ya ghie ɔli ralo, ɔ mhue ekpabɔ ali ayɛmhɛ enabi eyi Elaja. Ɖ ya mu udu oyi eni e khi ita pfi ni e ke nono ingme oyi imi

* 1:5 Li zɛ 1 Okhɛ 24.10 † 1:16 Li zɛ iNɔba 6.3

wẹ. Egbọ eni ẹa kpẹ ẹ suọ eso na Eshinẹgba, ẹẹ suọ eso na Eshinẹgba abi egbegbi egbo ẹẹ li. Ọ gbo mu egbo egbe shi eke kẹ Eshinẹgba.”‡

18 IZakaraya ọ rọ mhila oni aḡeni, “Sẹẹ o li ya khuese mhẹ khi iḡesikia u ngme? Irari khi mhẹmhẹ ali ughuẹmhẹ anye she womhẹ.”

19 Oni aḡeni ọọ li, eva oyẹmhẹ khi iGebulẹni. Mhẹmhẹ mhia migha odalo oyi Eshinẹgba. Lọli ọ ghie mhẹ mhi ka nu ẹ ngme, mhi gue oni usomhi onete ona yẹ. §

20 Ama unḡmenu u kẹ ya melea ramhi eghẹghẹ ni oni unḡmemhi ona o rọ bhale ya tṣẹ, itobọ khi u waa mie emini mhi gueyẹ suọ ni ó bhale ya tṣẹ shi eghẹghẹ oyọli.

21 Eghẹghẹ ni a ngme ena, egbo e kie migha olase kẹ iZakaraya. Abọ e sha wẹ, irari khi ọ she ke tṣẹ oni elemhi Owa oyi Eshinẹgba dọṣẹ.

22 Abi ọ ke rọ lasẹle ọa ke ngme unu. Eni egbo e te ododẹ lẹṣẹ khi imekẹ ọ mẹ oni elemhi Owa oyi Eshinẹgba irari khi obọ ọ ke rọ nu wẹ ngme.

23 Abi ogbeḷẹ ni iZakaraya ọ rọ ya ga oni ugamhi e rọ gba, ọ je apfẹ.

24 Ighọ, ughuọli Enizabẹti ọọ mẹ. Ọ la ufui owa iki ishe, ọa ke lasẹle ni egbo e mẹ.

25 Oni ọkpotoso ọọ, “Eshinẹgba ọ she rieḷẹ onana na mhẹ. Ọ mhẹ isomhelemhi na mhẹ,

Ọ rue mhẹ omama egbe le ukpẹloẹ oyi egbo.”

Aḡeni ọ guele abi a liẹ bia iJesu

26 Uki onuzi-esesa o gba ni Enizabẹti ọ te e mẹ, Eshinẹgba ọ ghie aḡeni ni a lu iGebulẹni bhale ẹoli iNazarẹti ni o la eke iGalili.

27 Oni aḡeni ọ bhale deba ọmueshi ni ọa lẹṣẹ ọmọṣe ne ni a lu iMelii ni ọmọṣe ni a lu iJosefu ọọ gue. Unuẹkpẹ oyi iDefidi iJosefu ọ khi.*

28 Oni aḡeni ọ bhale deba iMelii. Ọ tṣẹ ọli, ọọ li, “Moo mueshi! Eshinẹgba ọ she khivọṣẹ nẹ! Eshinẹgba ọ nuẹ la!”

29 Oni otṣẹ ona o ri abọ sha iMelii irari khi ọa lẹṣẹ emini otṣẹ onana o ngme. Egbe ẹa ke sheshe ọli.

30 Ama oni aḡeni ọọ li, “Khi ke zẹ ni ulishi o muẹ, irari khi Eshinẹgba ọ she mhọli isomhelemhi nẹ.”

31 U ya ke mẹ, u bia ọmọ ọmọṣe, iJesu wa lu eva oyọli. †

32 Ọgbọ ọniẹmhi ọ ya khi, Omi Eshinẹgba nọ Yagha nẹ Nya a ya ke lu ọli. Eshinẹgba ọ ya rue ukpẹkhomhi eghiele oyi itali iDefidi na li.

33 Ọ ya mhẹ omhẹṣẹ shi ọmhẹ-apfẹ oyi iGiekọpu agboagbo. Eghiele oyọli ọa ya mhẹ ukpẹṣẹ. ‡

34 IMelii ọ mhila oni aḡeni, ọọ, “Sẹ ingme ni u ngme ena e li bhale ya tṣẹ? Irari khi mhi aa lẹṣẹ ọmọṣe ghue.”

‡ 1:17 Li zẹ iMala 4.5 § 1:19 Li zẹ iDan 8.16; 9.21; iMat 18.10 * 1:27 Li zẹ iMat 1.18 † 1:31 Li zẹ iMat 1.21 ‡ 1:33 Li zẹ 2 iSam 7.12,13,16; Aza 9.7

35 Oni aḡeni ọọ li, “Ayemhẹ-nọ-pfuase ọ ya bhale debe, eḡheḡhe aḡhọ ekpabọ eyi Eshineḡba nọ Yagha ne Nya e ya tsua rughue, ọmọ ni u ya bia, ọni ọ pfuase Omi Eshineḡba a ya ke lu ọli.

36 Enizabẹti inyoḡhuoẹ ni a kpẹ ẹ lu aga, ọ she lie me umemhi, iki esesa o la memena, abi ọ tseku khia khi ọ she womhẹ eḡhọ, ọ ya bia ọmọ.

37 Irari khi aa me emini Eshineḡba ọa doḡe ẹ rieḡe.”§

38 IMeli ọọ li, “Eshineḡba ọ mhue mhe. O ka a tse na mhe abi u li ngme ọli.” Ighọ ọni aḡeni ọ li vu.

IMeli ọ ya feli Enizabẹti

39 Eḡheḡhe ana iMeli ọ nyanya muno egbe, ọ je ẹoli ni e la epfepfe ute ena eke ijudia.

40 Ọ ramhi apfe oyi iZakaraya, ọ tse Enizabẹti.

41 Abi Enizabẹti ọ ro suo otse oyi iMeli, ọmọ ni ọ la li elemhi ọ mu egbe nyene. Ayemhẹ-nọ-pfuase o bhale deba li.

42 Enizabẹti ọ khueghie unu a leghe, ọọ li, “Oni a khivose na u khi elemhi ikpotsọ. Oni a khivose na ọmọ ni u ya bia ọ khi.

43 Oghuo mhi khi, ni inyo Onomhue oyemhe ọ ko ya feli?

44 Abi mhi ro lese suo otse oye, ọmọ ni ọ la mhe elemhi ọ ri oghẹle mu egbe nyene.

45 Ikhivose o khi na oḡbo ni ọ mie ungmehi ni Eshineḡba ọ ngme khi ọ ya roli tse.”

Uwolo ikueghie ni iMeli ọ to

46 IMeli ọọ,

“Mhi ri ayemhe oyemhe kueghie Eshineḡba.

47 Mhi rote elemhi ayemhe oyemhe

kueghie Eshineḡba Omiepfuese oyemhe.

48 Irari khi ọ yele mhe ni mhia mu ẹlo le.

Rote ana vu, eḡbo kpa, e ya ke e lu mhe,

Oni a khi vose na.*

49 Ipfuase o khi eva oyi Eshineḡba nọ fune,

Irari khi ọ rieḡe eminiemhi na mhe.

50 Ọ mhue isomhelemhi na eḡbo nya ni ẹ na ulishi oyoli

rote agbhotu ya je agbhotu.

51 Ọ ri abọ eyoli

gbe ikanya onyaloa, ọ vese eḡbo ni e mhue itieg-benga

elemhi isamhi udu eyewe kua.

52 Ọ ti ighie tiemhile eke,†

ama ọ yase eḡbo ni e ti egbewe tiemhie nga idane.

53 Ọ ri eminete na eḡbo ni okiamhi ọḡ gbe le.

Ama eni e pfue, ọ ku we pfue abọ-a.

54 Ọ she ri ishiobọ ni ọ shi na itawa tse.

Ọ bhale ya kpaghie eḡbo iZireni

eni ẹ ga li obọ.

55 Abi ọ li shi ishobọ

§ 1:37 Li ze Igbae 18.14 * 1:48 Li ze 1 iSam 1.11 † 1:52 Li ze iJobu 5.11; 12.19 ‡ 1:55 Li ze Igbae 17.7

na agboagbo na Aburaamu
ali imimi ọli,‡
ni ọ gbo li nu
ititawa ngme ọli agboagbo.”§
56 IMeli ọ nu Enizabeti la iki
ese neni ọ je apfe.

*Abi a li bia iJoni Oni ọọ
batazi egbo*

57 Egheghe o ramhi ni Eniz-
abeti ọ ro ya bia, ọ ya bia ọmọ
ọmọse.

58 Idogbapfe ali egbo eyọli
e suọ abi Eshinegba ọọ somhi
elemhi ọli. E nu ọli ghele.

59 Ogbele-elele o ramhi ni a
ro ya shele oni ọmọ a, ee nono
ni e lu ọli iZakaraya ni o khi
eva oyi ita li.*

60 Inyọli ọọ we, “Iye! Eva
oyọli khi iJoni.”

61 Eni egbo e ọli, “Ogbokhoghuo
ọa la unuekpẹ oye ni ọ kpẹ le
eva onana ghue.”

62 Igho e ri abo nu ita oni
ọmọ ngme ro mhila li abi a ya
ke lu oni ọmọ.

63 Oọ we, e rue emini a keke
emhi e shi ali ugba na lue. Ọ
keke khi, “Eva oyọli khi iJoni.”
O ri abo sha we nya.

64 Utoghuokpe, unu oyọli
o khueghie-a, ọọ ngme, ọọ
kuęghie Eshinegba.

65 Ulishi oo mu idogbapfe
egho nya. Oni ungmehi
egbo nya e ke ngme asha kpa
eke iJudia.

66 O ri abo sha ogbokpa ni ọ
suọ oni ungmehi. Ee mhila,
“Omọ nabi se ọna ọ ya khi?”
Irari khi obọ oyi Eshinegba o
nu ọli la.

*Uwolo ikuęghie ni iZa-
karaya o to*

67 Ayemhe-no-pfuase ọ
tiemhile shi iZakaraya ita oni
omọ ọ. Oọ ngme ungmehi
aguele, ọọ lie,

68 “Ikuęghie o khi na
Eshinegba Onomhue oyi
iZireni,

itobo khi ọ she
bhale ya pfa
egbo iZireni eyọli shi eke.

69 O rote unuekpẹ
oyi iDefidi, omọ oyọli,
mu adenomọ Omiepfuese
vule na anye.

70 Abi ọ li rote
unu emekeguele
ni e pfuase eyọli
ena elele shobo,

71 khi loli ya tsumhi awa
obọ oyi ebe awa
ali eni e biselemhi awa.

72 Ali khi loli ya somhelemhi
itita awa,
ni sato ishobo oyọli ni ọ
shi na we,

73 ikhi isheli ni ọ romhi
shi emini ọ gueye ita awa
Aburaamu,

74 khi loli ya rue awa
obọ oyi ebe awa le,

ini awa khi ri
ulishi ga lue

75 elemhi ipfuase ali ingeli
enete,
agboagbo kpa.

76 Yeye omimhe,
a ya lue omekeguele oyi
Eshinegba no Yagha ne Nya;†
irari khi u ya ralo
ya be ode-a khe Onomhue.

77 Ni u ro gueye egbo eyọli khi
rote igbe-olamhe-kua na
we,

e te ya mhōli imiepfuese.

78 Irari khi Eshinegba oyawa
o o mhōli ilelemhi,
o ya ze ni ovo
imiepfuese oyōli
o te idane ngale shi awa
o.

79 Ali ni o rote idane ge
nga eni e la alo ebili egbe
ali eni e la okhena
eghuli.‡

Ni o ri awa te ode opfomhe.”

80 Igho oni omō o lii fu, o
lese ingme. O la ifui odagbe
ifufu ramhi eghēghe ni o ro
lasele tse abo ungmehi oyi
Eshinegba ye egbo iZireni.

2

Ubiamhi oyi iJesu (iMat 1.18-25)

1 Eghēghe agho, Oghie
Ogositōsi iSiza o shi ushi a
ka leli egbo ni e la ishishi ni
igometi iRomu e mhese shi
nya.

2 Ona o ya khi ileli egbo oni
odode ni a kpe me eghēghe
ni iKuirinusi o ro khi igovunō
shi eke iSiria.

3 Ogbogbo o je apfe oyoli ya
keke eva shi eke.

4 IJosefu o te eoli iNazareti
ona eke iGalili li je iBetilemu
ona eke iJudia apfe oyi itali ni
a bia oghie ni a lu iDefidi shi,
oni iJosefu o khi unuekpe oyi
iDefidi.

5 O rue iMeli ni o o gue
ughue mhue obo je oobo li ya
keke eva shi eke. Oni iMeli o
she me.

6 Abi e ro la oobo, oku oo to
iMeli.

7 O bia omō omose ni o khi
omodioli. O ri ide genō li yeshi
ukpeko ni a ri eminale e shi
na elamhako le. Ogba ni a
so elamhako shi o bia li shi,
itobo khi ea me asha kushi
ashini egbo e ku a shi.

Igeni e gueye erisumha-kia *khi a bia iJesu*

8 Eni e ri elamhako e kia
eghuo, e la oni ukiekie oni eoli
ri eloe e khu elamhako eyewe
eliyose.

9 Igho ageni oyi Eshinegba o
bhale deba we agho, ufumhi
oyi Eshinegba o ge nyanyanya
gase we, ulishi o mu we eg-
begbo.

10 Oni ageni o o we, “A khi
ze ni ulishi o mu e, irari khi
usomhi onete ni o ri oghelē
oniemhi ya ghi ogbokpa mhi ro
bhale ghi e.

11 Irari khi ogbe ni amo
ena, a she bia omiepfuese shi
eoli oyi iDefidi na e. IKirisiti
Onomhue lo.

12 Emini o ya rokhasē e khi,
a ya me khi a ri ide genō
omofe shi ukpeko ni a ri emi-
nale e shi na elamhako le.”

13 Udemhija, igeni ebubu e
lasele, e bhale ya ku ma oni
ageni, ee to uwolo kueghie
Eshinegba. E lie,

14 “Ufumhi o khi oyi
Eshinegba ni o la obini o yagha
ne. Opfomhe o la eke agbo na
ni o mhue isomhelemhi na.”

15 Abi eni igeni e ro pfi eni
e ri isumha e kia shi agho
nga idane se, e gueye egbewe,
“Awa je eke iBetilemu ya ri

ẹloe me onana ni Ẹshinẹgba o bhale ya gueye awa.”

16 Igho e nyanya rote agho vu ya je oobo. E bhale ya e iJosefu ali iMeli ali oni omọ khi a roli yeshi ukpeko ni a ri eminale e shi na elamhako le.

17 Abi eni e ri elamhako e kia e ro me o li se, ee gueye egbọ kpa emini oni aḡeni o gueye we idiegbe oyi oni omọ.

18 Egbọ nya ni e suọ emini eni e ri elamhako e kia egho e ngme, o ri abo sha we.

19 Ama iMeli o ri ingme enana nya shi udu, o sa o, o to ẹloe eke.

20 Eni e ri elamhako e kia ee je apfe, e to uwolo kuẹghie Ẹshinẹgba irari ungmehi ni e suọ ni e gbo ri ẹloe me, abi a li gue o li yewe te, igho e li ri ẹloe me o li.

A lu Ijesu eva

21 Efe eleli o ramhi ni a ro ya shele o li a, a lu o li eva iJesu, ni o khi eva ni aḡeni oyi Ẹshinẹgba o lu o li neni a me umemhi oyoli.*

A ri Ijesu lo Owa ugamhi

22 Abi eḡeḡe iropfuase oyi iJosefu ali iMeli o ro ramhi abi Ushi oyi iMosisi o ngme, iJosefu ali iMeli e rue oni omọ bhale iJerusalemu deba Ẹshinẹgba.

23 Abi o li la ushi oyi Ẹshinẹgba khi, “Omọ odode ni o khueghie okpotso elemhi a, o khada khi omose ne, a ri oni omọ ke nga Ẹshinẹgba obọ.†

24 A rue ipfeli inekhukhu aava ro riefe iluasobo na li abi Ishi eyi iMosisi o ngme.‡

25 Omose oghuo o la o ni a lu iSamọ ni o la eke iJerusalemu, Ayemhe-no-pfuase o la li egbe. O khi ogbọ ni o gue ngeli ni o migha khe Omiepfuese ni o ya mie egbọ iZireni pfuese.

26 Ayemhe-no-pfuase o she kpe gueye o li khi o ya ghua neni o ro ya me iKirisiti ni Ẹshinẹgba o shobo khi lo li ya ro bhale.

27 Ayemhe-no-pfuase o kpha li so, o rue o li lo elemhi apfe na owa oyi Ẹshinẹgba abi ita iJesu ali inyoli e ro rue iJesu bhale ni a ro riefe na li abi Ishi eyi iMosisi o ngme.

28 ISamọ o mu oni omọ shi abo, o kuẹghie Ẹshinẹgba, o o, 29 “Ita ni o fune,

abi u li shobo na mhe, ze ni u roli tse na mhe ni mhi ghu shi opfomhe.

30 Irari khi alo eyemhe, e she me Omiepfuese ni u ghie bhale.

31 Ni u she ro ghi agbo nya.

32 Ákpá ni o ri oghuemhe oyi Ẹshinẹgba a khasẹ egbọ iJeta na alo ebili,§ ni o ri ufumhi e na iZireni egbọ eye.”

33 Abo e sha ita ali inyọ oni omọ abi e ro suọ khi a ngme eni ingmemhi ena shi oni omọ egbe.

34 ISamọ o so iromhi na we, o o iMeli, “Eri ibhale oyi omọ onana o ya ri ebubu egbọ de,

* 2:21 Li ze iLev 12.3; iLuk 1.31 † 2:23 Li ze Okiali 13.2,12 ‡ 2:24 Li ze iLev 12.6-8 § 2:32 Li ze Aza 42.6; 49.6; 52.10

o ri ebubu vule eke iZireni, o gbo khi irokhase ni egbo e ya ke ngme emini ea ti shi egbe.

³⁵ Ni a ro bhale ya e khi osheli oyi isamhi eyi ebubu egbo e khueghie-a, yeye oye u ya me oya abi oni a so ogbhoru udu.”

³⁶ Okpotso oghuo ni o khi omekeguele ni a lu Ana, omi iFanueli na unuekpe oyi Asha, o li la akaghọ. Ikpe ishilua o nu odoli la ughue ni oni odoli o ro ghua.

³⁷ Oni okpotso ona o a gbo ye ughue ramhi ni o ro gbe ikpe egbhuene ali ene. O a gbo tigbe rote Owa oyi Eshinegba vu. Oo pfi azumhi ele oguota ali ele iyose.

³⁸ Abi o ro lole deba iJosefu ali iMeli oni eghenge, o kueghie Eshinegba, O gue ingme oyi oni omọ ye egbo kpa ni e la agho ni e migha khe ipfasheke oyi iJerusalemu.

³⁹ Abi iJosefu ali iMeli e ro riele abi Ishi eyi iMosisi o ngme se, ee je apfe oyewe obini iNazareti na eke iGalili.*

⁴⁰ Oni omọ oo fu, o mhue ekpabo, o mholi ileasingme khi ileasingme, ekpabo oyi Eshinegba o la li egbe.

Ijesu o bhale Owa ugamhi abi ozele

⁴¹ Ukpe kpa ita iJesu ali inyoli e ro je iJerusalemu ya li ukpe iPasova.†

⁴² Abi iJesu o ke ro gbe ikpe igbeva, e ye shi ukpe iPasova oyewe abi e kie kpe e li.

⁴³ Oni ukpe o pfo li se, itali ali inyoli ee je apfe, ama iJesu o kie la iJerusalemu, itali ali inyoli ea lese khi o kie la ukhokho.

⁴⁴ E dabi khi o nu wewe kia. E she kia eleghuo gbada ea me oli, e nono oli ifuabo apfewe ali emole we ni e ga kia.

⁴⁵ Abi e ro me khi wewe ea me oli, e nyene egbe ukhokho je iJerusalemu ya nono oli.

⁴⁶ Ele nuzi-ese, e tigbe me oli khi o la owa ugamhi nu esese Ishi eyi iMosisi shito, o ku eso-a a shi emini e sese, o mhila we omhila.

⁴⁷ Ilesingme oyoli ali abi o li i gbaghie ogbo-a, o ri abo sha ogbokpa ni o suo li.

⁴⁸ Abi itali ali inyoli e ro me oli, abo e sha we. Inyoli oo li, “Omọ elo o ze ni u ro li anye na? Ode o she nu e ni anye te e nono e.”

⁴⁹ Ijesu o mhila li, “Elo o ze ni a ro nono mhe? Aa lese khi mhi mema ya la owa oyi itamhe?”

⁵⁰ Ama o a ye we abi o li so we o.

⁵¹ Igho o li deba we je iNazarēti, o ri ungmehi oyi itali ali inyoli gbe akanya. Ama inyoli o gono ingme ena nya shi udu.

⁵² Igho iJesu oo womhelo elemhi egbhali ali idiegbe, egbo ali Eshinegba e nono ingme oyoli.‡

3

Itsabo oyi Ijoni Oni oo

* 2:39 Li ze iMat 2.23 † 2:41 Li ze Okiali 12.1-27; iDeut 16.1-8 ‡ 2:52 Li ze 1 iSam 2.26; Ekpi 3.4

batazi egbo

(iMat 3.1-12; iMak 1.1-8; iJon 1.19-28)

¹ Abi o ro gbe ikpe igbeshe ni oghie iSiza ni a lu iTiberusi o ro khi oghie, oni egheghe iPotiusi iPaleti o ro li khi igovuno shi eke iGalili ali eke iJudia. Egheghe agho Erodu o ro o mheshe shi eke iGalili. Inyoghwo oli, ikhi iFilipu o mheshe e shi eke Iturea ali eke iTirakonitisi. Oghie iLisiansi, o mheshe shi eke Abilini.

² Egheghe ni Anasi ali iKefasi e ro khi eni e kpeda nya na ekpodalo-ugamhi eyi Eshinegba, Oni egheghe ungmehi oyi Eshinegba o ro bhale deba iJoni omi iZakaraya, elemhi ifu odagbe ifufu.

³ O ro tse abo eke iJodani nya kiakia. O lie, "A mu nyene rote olamhe eye lasele ni a batazi ni a ro gbe olamhe eye e kua na e."

⁴ Abi a li keke oli shi ebe Azaya omekeguele, ni o re,

"A ya suo khi ogbo o la ifu odagbe ifufu e tsese.

Oo lie,
riele ode shi eke
khe Onomhue,
'Be ode ni o sheshe
na Onomhue'

⁵ A ka tsua eke suli igbilimhi eke nya, a gbomoo ute ogbogbo tiemhie eke,
e mele ugbereke-a.

A ka ri ode na genge-genge

mele eni sheshe-a,
ena fuonyo-fuonyo,
a ku we gbe leghe.

⁶ Ogbokpa o ya me

Imiepfuese oyi Eshinegba."*

⁷ Ebubu egbo e fie bhale deba iJoni ni o batazi we, iJoni o re we, "Ee enye ifue, oghuo o tse agua ye e a na, khi egheghe ofu oyi Eshinegba oo bhale?†

⁸ A ke ngeli angeli imunyene, a khi ke lie, 'Aburaamu o khi ita anye.' Irari khi abi o li mhi li gue oli e ye e khi, Eshinegba o dobe ya rote eche ena woloo eniye lasele na Aburaamu.‡

⁹ A she rue uze shi eke ni a ro ya rote imhili era te eni era gbe, oora kpa ni oa da mo udumhi onete ne, eri a ya toli gbe, a tose oia."§

¹⁰ Eni egbo e mhila iJoni, "Se anye ke li ya kia mena?"

¹¹ IJoni oo we, "Oni o mhue iwulu eva o ka rue oghuo o na ogbo ni oa mhue. Oni o mhue eminale o ka kemhi na oni oa mhue."

¹² Emionoga eghuo e li bhale deba li ni a batazi we. Ee oli, "Oses, se anye li ya kia?"*

¹³ Oo we, "A khi ke miono oga dose ingme ni ee a ke miono."

¹⁴ Ekholi-okhue eghuo e mhila li, "Se anye li ya kia?" Oo we, "A khi ri itoto rue ikpagho ni ea khi e ye e, a khi ke gbo gue ingme ni ea la ogbo egbe shi oli egbe. A ze ni ifata eye e e bu e."

* 3:6 Li ze Aza 40.3-5 † 3:7 Li ze iMat 12.34; 23.33 ‡ 3:8 Li ze iJon 8.33 § 3:9

Li ze iMat 7.19 * 3:12 Li ze iLuk 7.29

15 Egbe e mu eni egbo, e ri udu oyewe khokho ini ijoni o khi oni Omiepfuese ni áá ngme.

16 Ama ijoni oo we, "Ame mhi ro batazi e, ama ogbo oo bhale ni o toto dose mhe, ekue ni o so shi owe, mhi aa fu te ni mhia taghie oli-a. O ya ri Ayemhe-no-pfuase ali erali batazi e.

17 O mu ukpokpo ni a to akhuli ni o ze eafia so oyoli mhue obo. Loli o ro la ashini a la kpishi ado a ke pfie ado-a. Oo ti egbegbi ado ni e la o o gbili, o so we e shi ikpulu tsua ya shi owa eminale. Ama o ya ri erali ni ea ya a pfu ghue tose efuewe-a." 18 Ode ebubu ijoni o te tse abo ungemhi oyi Eshinegba ye we, oo lie we e mu ingeli eyewe pfi.

19 Ijoni o gue emhi ebubu ye oghie Erodu ni oo riele ni ea ti, ali o gbo gueye oli khi oa gue kia ni o rue Erodiasi ni o khi ughue iFilipu inyoghua oli shi.

20 Itobo ona, Erodu o riele ingmobe ni o rue nga o, o ya mu ijoni shi owa ighumha.†

Ibatizi oyi iJesu

(iMat 3.13-17; iMak 1.9-11)

21 Abi ijoni o ro batazi eni egbo o se, o li batazi iJesu. Abi iJesu o li so iromhi, idane o khueghie-a.

22 Ayemhe-no-pfuase o li abi anekhukhu rote idane tiemhile shi oli egbe. Uruli o rote idane ngme, oo, "Omimhe u khi. Mhi i nono ingme oye gba, irari khi u ma ri egbe e mu mhe."‡

Unuekppe oyi iJesu

(iMat 1.1-17)

23 Ikpe uye ali igbe iJesu o gbe ni o ro gbe ikanya eyoli eke le. O khi omi omose ni a lu iJosefu abi egbo e kie li khokho li shi, iJosefu ni o khi omi Eli.

24 Omi iMatati ni o khi omi iLevi, ni o khi omi iMelki, ni o khi omi iJana, omi iJosefu.

25 Ni o khi Omi iMatatiasi, omi Emosi, omi iNaumu, omi Esili, omi iNagai,

26 Omi iMaati omi iMatatiasi, omi iSemeini, omi iJosechi, omi iJoda,

27 Omi iJoana, omi iResa, omi iZerubabeli, omi iShaliteli, omi iNeri.

28 Omi iMelki, omi Adi, omi iKosamu, omi Emadamu, omi Eri,

29 omi iJoshua, omi Eliaza, omi iJorimu,

30 omi iSamu, omi iJuda, omi iJosefu, omi iJonamu, omi Eliakimu.

31 Omi iMelea, omi iMena omi iMatata, omi iNatani, omi iDefidi,

32 omi iJese, omi Obedi, omi iBoazi, omi iSamu, omi iNashoni,

33 omi Aminadabu, omi Adimi, omi Ani, omi Ezironi, omi iPerazi, omi iJuda,

34 Omi iGiekopu, omi Aziki, omi Aburaamu, omi iTera, omi iNaq.

35 Omi iSerugu, omi iReu, omi iPelegi, omi Eba,

† 3:20 Li ze iMat 14.3-4; iMak 6.17-18 ‡ 3:22 Li ze Igbae 22.2; Iwolo 2.7; Aza 42.1; iMat 3.17; iMak 1.11; iLuk 9.35

omi iShẹla,
 36 omi iKenani,
 omi Afazadi, omi iShẹmu,
 omi iNoa, omi iLameki,
 37 Omi iMẹtusẹla, omi Enọki,
 omi iJaređi, omi iMaalalẹli,
 omi iKena,
 38 omi Enọshi,
 omi iSẹti, omi Adamu,
 Omi Eshinegba.

4

Imufe oyi iJesu

(iMat 4.1-11; iMak 1.12-13)

1 Ijesu ọ rọte okẹ ijodani jele, Ayẹmhe-nọ-pfuase ọ voli egbe. Oni Ayẹmhe ọ rue ọli je ọdagbe ifufu,

2 Ọkphaghie ọ la oobo mu ọli fe elemhi ogbele egbhueva. Oa le emhikhoghuo ogbele ingme ni a ngme ena. Ikpukhokho ọ okiamhi oo gbe ọli.

3 Ọkphaghie ọọ li, “Ini u lese khi Omi Eshinegba u khi, weę oni eche ona o mele ibuledi-a.”

4 Ama iJesu ọọ li, “A she keke ọli shi Ebe-no-pfuase khi ọa khi eminale tse ọ ri agbo a na ogbo.”*

5 Igho ọkphaghie ọ rue ọli nga ashini o yagha egbegbo, ọ ri eghiele na agbo nya khase ọli.

6 Ọọ li, “Mhi ya ri itoto ali epfue ni e la agbo nya ne, irari khi a she rewe na mhe, oni ọ ghole mhe mhi ya rue we na.

7 Irarigho, lese nyese ukhomhi na mhe tse, eye ena nya e ke ya khi.”

8 Ijesu ọ rọ oli, “A she keke ọli shi ebe no pfuese. Ke ga Onomhue Eshinegba oye, lolighuo kpe u ya ke ga.”†

9 Oni ọkphaghie ọ ke rue ọli bhale iJerusalemu, ọ rọli migha ashini o yagha ne ukhomhi owa ugamhi oyi Eshinegba, ọọ li, “Ini Omi Eshinegba u khi, te akana ji tiemhi.”

10 Irari khi a she keke ọli shi Ebe-no-pfuase khi,

“ ‘Eshinegba ọ ya ghie igeni eyoli,
 e ka kpe abo rue.’‡

11 E ya ri abo tsua e idane, ini u khi khi owe shi eche.”§

12 Ijesu ọ oli, “A she keke oli shi Ebe-no-pfuase, ‘Khi mu Onomhue Eshinegba oye fe bino.’ ”*

13 Oni ọkphaghie ọ mu iJesu fe se, o ze ọli obo ne, ọ ke migha khe eghẹghẹ olese.

Ijesu ọ rọte iGalili gba akanya oyoli eke le

(iMat 4.12-17; iMak 1.14-15)

14 Ijesu ọ nyene egbe bhale iGalili, ekpabo eyi Ayẹmhe-nọ-pfuase e rọli gbe ikanya. A suọ eko ingme oyoli asha khi asha.

15 Ọ la owa ugamhi oyewe sese. Wewe nya e kuẹghie oli.

Egbo iNazareti e kie iJesu

(iMat 13.53-58; iMak 6.1-6)

16 Ọ je eke iNazareti obini ọ la fu vule, igho ogbele iyemhea, ọ lo owa ugamhi abi

* 4:4 Li ze iDeut 8.3 † 4:8 Li ze iDeut 6.13 ‡ 4:10 Li ze Iwolo 91.11 § 4:11 Li ze Iwolo 91.12 * 4:12 Li ze iDeut 6.16

o kie kpẹ ẹ li. Igho o vule migha a zẹ ebe.

17 A rue ebe oyi Omekeguele Azaya mholi obo. O naghie o-oli-a, O me ashini a keke o-oli shi khi.

18 “Ayemhe oyi Eshinegba o la mhe o,

irari khi o she zẹ mhe ni mhi ke gue usomhi onete oyi Eshinegba ye eni ẹa mhue.

O ghie mhe mhi guele khi mhi ya rue eni a mu shi owa ighumha lasele, ni mhi khueghie ezalo alo-a, mhi pfuese eni a na osoli.

19 Ni mhi ro gue le khi isomhelemhi oyi Eshinegba o she ramhi.”†

20 O zẹ se, o khili oni ebe, o rue o-oli na oni o ri eloe a khu oni ugamhi, O shito, igho ogbokpa ni o la oni owa ugamhi o wolọ alo shi o-oli egbe.

21 Igho o-oli gueye we, “Amo, emini mhi zẹ lena o bhale ya tse shi ẹ eso.”

22 Ogbokpa o ngme onete oyoli. Abi e ro bhale ya ẹ ingmemhi onyaloa ni e rote o-oli unu u lasele, e mhila, “Ona ọa she khi omi iJosefu?”

23 Ijesu ọọ we mhi lese khi a ya ri ekpita lie mhe, “Obo, ri egbe ẹ ze. ‘A ya gbo lie mhe la akana gbe ikanya onyaloa ni u gbe obini iKapanomu.’”

24 “Abi o li mhi li gue o-oli ẹ ye ẹ khi, aa mu ekpe ẹ na omekeguele ẹoli oyoli.‡

25 Mhi gueye ẹ khi esamhi-olimhi ebubu e la eke iZireni eghẹghe oyi Elaja, ni amẹ o ro mu ikpe ese ali ukhukhui ni ukpokpomhi okiamhi o ro pfi oni eke nya.§

26 Abi o tseku khi igho, aa ghie Elaja ghi ongewe okhoghuo, se ni osamhi-olimhi na iZarifati ni o la eke iSidoni.*

27 Ebubu egbọ ni efafe e mu e gbo la eke iZireni eghẹghe oyi Elasha Omekeguele, ni o ro khia khi aa me ongewe okhoghuo ni a ro ze, se ni iNamani ongi iSiria.”†

28 Igho elemhi e li bi eni e la elemhi oni owa ugamhi nya abi e ro suo ungmehi ona.

29 Igho e vule khu o-oli oni ẹoli ya fie. E rue o-oli bhale eseso ute oyi oni ẹoli, ni weye e ba pfi o-oli ya tiemhi.

30 Ama o rote we ifuabo ya lase, o vu.

Ijesu o khu omose oghuo ayemhe okphaghie egbe-a (iMak 1.21-28)

31 Igho ijesu o tiemhi ẹoli iKapanomu ni o la iGalili ele iyemhe, o sese eni egbọ.

32 Emini o sese we e ri abo sha we, irari khi ekpabo e la ungmehi oyoli.‡

33 Omose oghuo o la oni elemhi owa ugamhi ni o mhue ayemhe okphaghie. O tse se leghe.

† 4:19 Li zẹ Aza 61.1-2 ‡ 4:24 Li zẹ iJon 4.44 § 4:25 Li zẹ 1 Ighie 17.1 * 4:26 Li zẹ 1 Ighie 17.8-16 † 4:27 Li zẹ 2 Ighie 5.1-14 ‡ 4:32 Li zẹ iMat 7.28-29

34 “Ghi ẹ! Elo wa nono anye egbe, iJesu na iNazarẹti? Eri u bhale ya pfuse anye-a? Mhi lẹsẹ ọni u khi, yẹyẹ u khi ọni ọ pfuase ọyi Ẹshinẹgba.”

35 Igho iJesu ọ tsesẹ ku ọli, “Khukhu unu, rọte ọli egbe lasеле.” Igho oni ayemhẹ ọkphaghie o mu ọni ọmose pfi eke kpọ ukpelo ọyi eni ẹgbọ nya, ọ lase ọli egbe le, ama ọa kuale ọli utse.

36 Oni ingme o ri abọ sha eni ẹgbọ, e mhila egbe, “Obo áá mẹ osesẹ onana? Itobọ khi afu ali ekpabọ ọ rọọ mhese na iyemhẹ ọkphaghie, eni iyemhẹ e suọ esọ na li, e na ya lase!”

37 Igho eva oyọli o gbhiaku ashakpa.

Ijesu ọ ri ebubu ẹgbọ ze

(iMat 8.14-17; iMak 1.29-34)

38 Ijesu ọ te oni owa ugamhi fie, ọ je owa ọyi iSamọ, ọ bhale ya ẹ khi iba ne fune ee to ọgọ iSamọ ọni ọkpotso. E gueye iJesu ọ kpaghie ọni ọkpotso obọ.

39 Igho iJesu ọ nyese egbe ti mama li, ọ khu eni iba, igho eni iba e lase ọli egbe le. Aghoaghọ ọni ọkpotso ọ vule, ọọ feli wẹ epfese.

40 Abi ogbomhi o ke rọ mu eke, a tsua ebubu ẹgbọ ni e mholi ighuamhi ododa bhale ghi iJesu, ọ ri obọ nga wẹ ukhomhi, ọ rewe ze nya.

41 Iyemhẹ ebe e gbo li rọte ebubu ẹgbọ egbe ya lase, eni iyemhẹ e tsesẹ, e lie, “Omi Ẹshinẹgba u khi oo!” Ama iJesu ọ dese wẹ, ọa ze ni e

ngme, irari khi e lẹsẹ ọli khi Omiepfuese ọ khi.

Ijesu ọ tse abọ elemhi owa ugamhi

(iMak 1.35-39)

42 Ogbe o gbe-a, iJesu ọ te oni ẹoli je ashini o da-ya, eni ẹgbọ ee nono ọli. Abi e rọ mẹ ọli, ẹa ke ze ọli vu.

43 Ama ọ gueye wẹ, “Mhi mema ya gue ungmemhi onete ọyi Eghiele ọyi Ẹshinẹgba ye ẹoli eni e kpọle, itobọ khi emini o ze ni Ẹshinẹgba ọ rọ ghie mhẹ bhale na.”

44 Igho ọ kiele tse abọ kia eni owa ugamhi ni e la eke iJudia gase.

5

Ijesu ọ lu eniye odukhokho eni odode

(iMat 4.18-22; iMak 1.16-20)

1 Ogbeleghuo khi iJesu ọ nu ẹgbọ migha ukiekie oke ni o khishi na iGenesareti, eni ẹgbọ e le gase ọli ri esọ ọ shi ungmemhi ọyi Ẹshinẹgba*

2 Ọ mẹ ọko-oke eva epfepfe oni oke, ni ẹgbọ eni ẹ gbe ifele e ze obọ shi agho. Eni ẹgbọ ee yeghe iga ni e rọọ gbe ifele-a.

3 Ijesu ọ lo elemhi oghuo ni o khi ọyi iSamọ, ọọ iSamọ ọ gua li ti lase oni egele oni oke denẹ. Igho ọ shito oni ọko-oke oniemi, ọọ sese wẹ.

4 Abi ọ rọ sese wẹ se, ọọ iSamọ, “Pfi aga lo ashini o limhi ni ọ mu ifele.”

5 ISamọ ọọ li, “Ọga, a-ooyose anye te ẹ roshaka ini

* 5:1 Li ze iMat 13.1-2; iMak 3.9-10; 4.1

anye mu ifeḷe, anye a mu emhikhoghūo. Ama itobọ khi u ngme ghọ, mhi ya pfi aga lo.”†

6 Abi e rọ pfi aga lo oni okẹ, e mu ifeḷe ni e bububu, ni o ri aga eyewe kphuru-a.‡

7 Ighọ e ri obọ lu apfewe ni e ga rọ gbe ifeḷe, e e bhale ya kpaghie wewe obọ. E muno eni ifeḷe kulo okọ-okẹ eni e kpole. Eni okọ-okẹ e vọ ifeḷe ya ramhi unu, ni eni ifeḷe e rọ khose eni okọ-okẹ ramhi ni e rọ tiemhi udi okẹ.

8 Abi iSamọ iPita ọ rọ me ona, ọ de ya yeshi awe eyi iJesu, ọọ li, “Kpekpe ke vu ni u ze mhe obọ, irari khi ọna olamhe mhi khi.”

9 Abọ e sha li ali egbọ ni e nu ọli la aghọ, itobọ ifeḷe ebubu ni e mu.

10 Ighọ abọ e li sha iJemhisi ali iJoni imi iZebedi, ni e khi enuzava eyi iPita. Ighọ iJesu ọọ iSamọ, “Khi ke na ulishi. Rote amo vu, egbọ u ke e ke muno.”

11 Ighọ e tialọ okọ-okẹ oniemi eyewe ngale egele.

IJesu ọ ri omose ni efafe e mu toto

(iMat 8.1-4; iMak 1.40-45)

12 Abi iJesu ọ rọ la ọli oghuo, omose oghuo ni efafe e mu ọ bhale deba li. Abi oni omose ọ rọ me iJesu, ọ de ya yeshi ọli odalo, ọ lema li, ọọ li, “Onomhue, ini o ghole e, u dobe ya remhe ze.”

13 IJesu ọ nise obọ-a rọ ti oni omose, ọọ li, “O ghole mhe, khi oni ọ ze.” Aghoaghọ eni efafe e lase ọli egbe le.

14 Ighọ iJesu ọ tse agua ye ọli, ọọ li, “Khi gueye ọgbokhoghūo, eri-tse ka ri egbe e khase okpodalo-ugamhi ni u riḷe iluasobo ikhuepfuase ni iMosisi ọ mhesẹ na e, eghẹghẹ aghọ ni o khi otsẹle na we.”§

15 Ighọ ingme oyọli oo gbiaku shi ọ. Ebubu egbọ e bhale deba li ni e rọ me asha suọ ungmehi oyọli ali ni ọ gbo rewe ze elemhi iwali ighuamhi ododa.

16 Ama eri iJesu ọọ bi egbe-a je ashini o da-ya, ọ ya so iromhi.

IJesu ọ rọ omose ni ọ ghu abọ ali awe-a toto

(iMat 9.1-8; iMak 2.1-12)

17 Eleghuo abi iJesu ọ li sese, egbọ iFarisi ali eni e e sese Ishi eyi iMosisi ni e te ọli iGalili ali eke iJudia ali iJerusalemu bhale, e shito aghọ. Ighọ Eshinegba ọ li ri ekpabọ na li rọ ri eni e ghua toto.

18 Egbọ ni e tsua omose oghuo ni ọ ghu abọ ali awe a bhale, e nono abi e li ya roli lo oni owa bhale odalo oyi iJesu.

19 Abi e ke rọ me khi wewe ea me asha, itobọ khi egbọ e bu dose, e nga ukhomhi oni owa, e ri ili ge ọli abi ọ yeshi iya eghọ, e rote ekpha roli tiemhile shi iteva egbọ, e rọ li shi odalo oyi iJesu.

20 Abi iJesu ọ rọ me abi irudunga oyewe oo fu, ọọ oni omose, “Omue, a she gbe olamhe eye kua ne.”

21 Eni egbọ iFarisi ee sa udu oyewe, e lie, “Oghuo

† 5:5 Li ze iJon 21.3 ‡ 5:6 Li ze iJon 21.6

§ 5:14 Li ze iLev 14.1-32

oni ɔgbɔ ɔna ɔ khi ni ɔɔ pfi unu-a, ɔghuo ɔ doɓe ɛ gbe olamhe kua, seɛ ni Eshinegba lolighuo?"

22 Ijesu ɔ lese emini e sa, ɔ mhila we, "Elo o ze ni a ro sa isamhi enana a shi udu oyee.

23 Onoghuo o ya keɛ ɔgbɔ ngme ne? 'A she gbe olamhe kua ne,' ali, 'Vule ke kia,'

24 Emini o ze ni a ro me na khi ni a ro lese lo khi Omi Ogbɔ ɔ mhɔli afu shi elemhi agbɔ ni a ro gbe olamhe kua." Oɔ oni omose ni ɔ ghu abo ali awe-a egho, "Mhie u vule, rue iya oyee, ni u ke je apfe."

25 Utoghuo kpe ɔ vule migha odalo oyewe, ɔ rue iya ni ɔ ro yeshi mhuɛ obo, ɔ je apfe, ɔɔ kueghie Eshinegba.

26 Abo e sha eni egbɔ nya, ee kueghie Eshinegba. Abo e sha we, ulishi o mu we, ee lie, "Awa me oshabo amo."

*Ijesu ɔ lu iLiva ɔ deba lue
(iMat 9.9-13; iMak 2.13-17)*

27 Onana o dose se, ɔ fie lase, ɔ me omionoga ni a lu iLiva khi ɔ shito elemhi okholo oyoli ni ɔ la mie oga, ijesu ɔɔ li, "Deba mhe."

28 Igho iLiva ɔ vule, ɔ ze emini ɔɔ rieɛ obo, ɔ deba li.

29 Igho iLiva ɔ nye ekhe, ɔ lu ukpokpomhi ukue na ijesu shi apfe oyoli. Emionoga ebubu ali egbɔ elese ni e bu e li bhale shi oni ukue, e nu we le emhi.

30 Ama egbɔ iFarisi ali eni e sese ishi ee woloo khashe eniye odukhokho eyi ijesu, ee lie, "Elo o ze ni ɔ ro nu emionoga

ali ena olamhe ee le eminala?"*

31 Ijesu ɔ so we o, ɔɔ we, "Oni ɔɔ to, ɔɔ ye apfe obo.

32 Mhi aa bhale ni mhi ro ya lu egbɔ ni e pfuase ne, ama ena olamhe mhi bhale ya lu, ni e ro mhuɛ imiepfuese."

*A mhila ijesu ogbɔ ingme
azumhi*

(iMat 9.14-17; iMak 2.18-22)

33 Egbɔ eghuo e mhila ijesu, "Elo o ze khi eniye odukhokho eyi ifoni ali eniye odukhokho eyi iFarisi ɛ pfi azumhi, ni eye e ro le ni e ro da?"

34 Ijesu ɔ so we o, "A lie me ghoo khi a ri epfese ni e nu odo omueshi onogbo shito ɔ pfi azumhi, ini oni odo omueshi ɔ nu we la agho?"

35 Ama khi eghenge ɔɔ bhale ni a ro ya rue odo omueshi iteva oyewe le, eghenge agho, e ya pfi azumhi."

36 O ze okhe irokhokho onana khashe we, ɔɔ, "Ogbokhoghuo ɔa ya khi ode onogbo ya gbela ma ode onodio, ini ɔ ligo, eri ɔ mema ya khi oni ode onogbo-a shi afue. Ini a gbela ode onogbo ma onodio, ea ya li abeghuo.

37 Wekhi eri ogbɔ ɔ ya ku onyoo onogbo shi akpaba oyi ekuɛ-ɛlamhi onodio, ini ogbɔ ɔ li gho, eri oni akpaba o ya nyanoo-a, oni onyoo o ku kua, oni akpaba o li opfu-a. [Akpaba ekuɛ ɛlamhi egbɔ iJu e ku onyoo ɔ shi.]

* 5:30 Li ze iLuk 15.1-2

38 Onyọ onogbọ a ku ẹ shi akpaba onogbọ.

39 Aa mẹ ọgbọ ni ọ ya da onyọ onodiọ se, ni ọ tigbe ya mhila onyọ onogbọ, irari khi ọ ya liẹ khi onodiọ o ti ne.”

6

Ingme ogbele iyemhea oyi egbo iju

(iMat 12.1-8; iMak 2.23-28)

1 Ogbele iyemhea, iJesu ali eniye odukhokho eyoli e rote ifu ishemhi iakpa dose, e be eni iakpa mhue abo, e kphali ikpamhi we le.*

2 Egbo iFarisi eghuo, e mhila we, “Elo o ze ni a ro gbe ushi ona ogbele iyemhea-a?”

3 IJesu o so we o, oo we, “Aa kpe ze emini iDefidi o riyele abi okiamhi o ro gbe oli ali apfoli?”

4 Abi o li lo Owa oyi Eshinegba ya rue ibuledi ni a ro o ga Eshinegba le, ni o gbo ro na apfoli le. Eri a ghue oni ibuledi ogho, se ni ekpodalougamhi eyi Eshinegba tse ee le oli.”†‡

5 Loli iJesu o ro oo we, “Onomhue oyi ogbele iyemhea Omi Ogbọ o khi.”

Omose ni o ghu obo-a

(iMat 12.9-14; iMak 3.1-6)

6 Igho elelese ni o khi ogbele iyemhea, iJesu o la elemhi owa ugamhi sese egbo. Omose oghuo o la agho ni obo ita oyoli o ghua.

7 Eni egbo iFarisi ali esese Ishi eyi iMosisi e nono emini wewe e ro ya mu umhaguekia shi iJesu obo. Igho e li to oli okpe ini o ya ri ogbo ze ogbele iyemhea oyi egbo iju.

8 IJesu o lese isamhi eyewe oo oni omose ni o ghu obo oghuo-a egho, “Vule migha ana, ni ogbokpa o lolo ke me.” Igho oni omose o vule migha we iteva.

9 IJesu oo, “Mhie i, onoghuo ushi oyi awa o lama shi ogbo o riyele ogbele iyemhea? Ni a ro riyele onete abi ni a ro riyele onobe, ni a ro tsumhi agbo oyi ogbo, abi ni a ro pfuse oli-a?”

10 O bino we gase nya, oo oni omose o nise obo-a. O ligho. Oni obo o nise a.

11 Ama elemhi e bi we egbegbo, e gba ugbamhi abi e ya li iJesu.

Ijesu o ze ighiusomhi na kepe ogbava

(iMat 10.1-4; iMak 3.13-19)

12 Ogbeleghuo, iJesu o nga ute ya so iromhi. O la agho eliyose elegho nya oo so iromhi lema Eshinegba

13 Abi ogbe o ro gbe-a, o luno eniye odukhokho eyoli, o ze ogbava elemhi we, o lu we ighiusomhi na kepe

14 ISamo, ni o lu iPita ali inyoghuo Aduru, iJemhisi, iJoni, iFilipu ali iBatolomiu.

15 IMatiu ali iTomosi, iJemhisi omi Afeusi, ali iSamo, ni e lu iZiloti.

* 6:1 Li ze iDeut 23.25 † 6:4 Li ze iLev 24.9 ‡ 6:4 Li ze i1Sam 21.1-6

16 IJudasi omi iJemhisi, ali iJudasi Isikaroti ni o ri iJesu de.

IJesu o sese, o gbo ri egbo ze (iMat 4.23-25)

17 Abi iJesu ali eniye odukhokho eyoli e ro rote oni ute tiemhile, o migha ugbereke, eniye odukhokho eyoli ebubu e la agho. Ebubu egbo e la agho ni e rote ukiēkiē eke iJudia nya ali eoli iJerusalemu ali eoli iSidoni ali eoli iTai ni e ngeli epfepfe oke oniemi bhale.

18 Eri e bhale ya suo ingmemhi eyoli ali ni o gbo re we ze elemhi ighuamhi ododa. Eni ayemhe ebe e nase e li bhale, o rewe ze.

19 Eni egbo nya e roshaka ri obo ti oli, irari khi itoto e te oli egbe lasele, o re we nya ze.

Oghela ali oya (iMat 5.1-12)

20 IJesu o bino eniye odukhokho eyoli, oo we, "Ikhivose o khi na ee ni aa pfue,

irari khi ee a mholi Eghiele oyi Eshinegba.

21 Ikhivose o khi na eni okiamhi o gbe memena irari khi a ya me le khue.

Ikhivose o khi na ee ni a vie memena, irari khi a ya gia.

22 Ikhivose o khi na e, ini egbo e biselemhi e, ni e ro kie e, ni e ro tsue e, ni e ro kie e khi egbo ebe a khi, itobo oyi Omi Ogbo. S

23 "A ke ghele ini a da me gho. A gbe ishimhi irari khi a ri eleli ni o fune shi iloghie e khe e. Irari khi igho eni e bia we e li nase emekeguele eyi Eshinegba eghenge oyewe.*

24 "Ama, o ma kholo e egbe, ikhi ee ni a mhue epfue memena, irari khi a she mie eleli oyee se.

25 O ma kholo e egbe, ikhi ee ni a she le khue memena, irari khi okiamhi o ya gbe e.

O ma kholo e egbe, ikhi, ee ni a gia memena, irari khi a ya vie e vie oya.

26 O ma kholo e egbe, ikhi ee ni egbo ee ngme onete oyee, irari khi igho eni e bia we e li ngme onete oyi emekeguele eyi egbholi.

Awa mholi inono na obe awa (iMat 5.38-48; 7.12a)

27 "Mhi gueye e, ee ni a suo mhe, a nono ingme oyi obe ee. A ke ri ele onete na egbo ni ee biselemhi e.

28 A ke so iromhi na egbo ni ee tsue e, a so iromhi ke na egbo ni ea gue e ngeli deba e.

29 Ini ogbo o lase ukiēkiē eso oghuo, nyene oni o kpole gbo na li lase. Ini ogbo o ri itoto mhi awulu, gbo ze ni o rue oni u so kpoke ma o.

30 Ke ri emini ogbokpa o mhila e na li, ini ogbo o rue e

S 6:22 Li ze 1 iPit 4.14; iJon 9.22; 16.2 * Li ze iMat 7.12

6:23 Li ze 2 Okhe 36.16; Ika 7.52 † 6:31

emhi, zẹ ọli obọ na li, khi gbo mhila li luẹ.

31 Ngeli ke deba ọgbọ abi u liẹ nono ni a li ngeli deba ẹ.†

32 “Ini o khia khi ẹgbọ ni e nono ingme oyẹ u leşẹ a nono ingme oyewẹ, ighe ikhivose ni o la ọ ne? Irari khi ena olamhe e lili ẹ nono ingme oyi ẹgbọ ni e nono ingme oyewẹ to ọ.

33 Ini o khia khi eni e riẹle onete ne u leşẹ li ẹ riẹle na, ighe ikhivose ni o ke la ọ ne? Egbegbi ena olamhe e lili ẹ ligho.

34 Ini o khia khi eni e ngmomhi ẹ ne u leşẹ li ngmomhi ẹ na, ighe ikhivose ni o la ọ ne? Irari khi ena olamhe e li ngmomhi ẹ na egbewẹ.

35 Ama zẹ ni u nono ingme obe ẹ, ke riẹle onete na wẹ. Ke ngmomhi na wẹ, khi ngmomhi na wẹ ni u ke ri ẹloe shi ekẹ khi e ya fali ẹ ota to ọ. Eghẹghe agho ikhivose oyẹ o ya gbẹdi, u khi omi Eshinẹgba no Yagha ne Nya. Irari khi lẹli ọọ somhi elemhi eni ẹa leşẹ obode ali ena okhọlo.

36 Khi ọna ilelemhi, ẹzeze abi Ita ẹ ọ li khi ọna ilelemhi.

Igue ẹgbọese ẹzo
(iMat 7.1-5)

37 “Khi gue ọgbọ ẹzo ini a khi li gue yeye ẹzo, khi ri unu pfuẹche ọgbọ-a, ini a khi li ri unu pfuẹche-a. Gbekua na ọnuzava oyẹ, ni Eshinẹgba ọ li gbe kua ne.

38 Rona khi a ya ro ne. Ukiekie onete, oni a lolo mimi, ni a jighise ni o tsua

kua, a ya ro somhie opfa. Irari khi ukiekie ni u ro mhese na ẹgbọ, Eshinẹgba ọ li ro ya mhese ne.”

39 O gbo zẹ okhe irokhokho ona khasẹ wẹ, ọọ wẹ, “Ozalo ọ fe dobe ya ri ozalo nabi luẹ ke kia? Eri wewe aava e ya de pfilo uchoke.‡

40 Omọ ni ọ la owena ọa ya fu dose oni ọọ sese ọli, Eri-tse ini omọ ni ọọ ye owena ọ ye owena oyoli se, ọ ya li abi oni ọ sese ọli.§

41 “Elo o zẹ ni u ro me uku ni o la inyoghue ẹloe ni u waa ro meke me ufolo ọara ni o pfida ẹloe oyẹ?

42 Se u liẹ liẹ inyoghue, ‘Inyoghue zẹ ni mhi rue ẹ uku ẹloe a,’ ni yeye oyẹ waa ro me ufolo ọara ni o pfi da ẹloe oyẹ? Yeye ọgbọ ọrugamhi ku alo, kpẹ tode rue ufolo ọara ni o la ẹloe oyẹ-a ni u tigbe meke gboo rue uku ni o la inyoghue ẹloe a.

Ọra ali ikpamhi eyoli
(iMat 7.16-20; 12.33-35)

43 “Ọara ni ọa ti ọa dobe ya mo ukpamhi onete, u ke ya liẹ khi eri ọara onete o ya mo ukpamhi ni ọa ti.

44 Ikpamhi ni ọara ọọ mo, a ro ọ leşẹ ọara ni o khi. Aa rote okphekphe ẹ pfanọ okhua-eni.*

45 Eri ọgbọ onete ọ rote emini o ti ni ọ roshi udu ẹ rue emini e ti lasele, Ama ọgbọ obe, ọ rote udu obe oyoli rue emhi obe ni ọ roshi udu ẹ lasele. Irari khi isamhi ebubu

‡ 6:39 Li zẹ iMat 15.14 § 6:40 Li zẹ iMat 10.24-25; ifon 13.16; 15.20 * 6:44 Li zẹ iMat 12.33 † 6:45 Li zẹ iMat 12.34

ni e la ɔgbɔ udu, ɔ te ɛ ngme ungmemhi lasele.†

*Ɔgbɔ ɔtsegbhɛ ali oyeghe
(iMat 7.24-27)*

46 “Elo o zɛ ni a rɔ lu mhɛ, ‘Ɔnɔmhue, Ɔnɔmhue,’ ni aa rɔ ri emini mhia ngme gbe akanya?”

47 Mhi ya rokhasɛ ɛ abi ɔgbɔ ni ɔ bhale deba mhɛ, ni ɔ ri esɔ ɛ shi mhɛ ekɛ, ni ɔ gbo ri ingmemhi eyɛmhɛ a gbe ikanya ɔ li.

48 Eri ɔ li abi ɔgbɔ ni ɔ tɔ owa, ɔ tɔnɔ ekɛ-a limhi, ni ɔ ri owa gbe ukhomhi ɛchɛ. Abi ukpokpomhi amɛ o rɔ ruɛ, ochikpho o ri itoto ghi oni owa abɔ, ama ɔa doɔ nighise ɔli, irari khi eri a tɔli egbɔgbɔ.

49 Ama ɔgbɔ ni ɔɔ suɔ ungmemhi oyɛmhɛ ni ɔa rɔ li gbe akanya, eri ɔ li abi ɔgbɔ ni ɔ tɔ owa nga ekhasɛ. Abi amɛ o rɔ ruɛ, ochikpho o ri itoto tsua oni owa, oni owa o de, o khi oyese oniɛmhi.”

7

*Irudunga oyi ɔkhɔli-okhue
oyi iRomu
(iMat 8.5-13)*

1 Abi iJesu ɔ rɔ ngme enana nya shi esɔ eyi eni ɛgbɔ se, ɔ lo elemhi ɛoli iKapanɔmu.

2 Oobɔ a mɛ ɔmɔse ni ɔɔ ga ɔkhɔli-okhue ɔniɛmhi, ni ingme oyɔli o lolo mu ɔga oyɔli egbe. Ɔni ɔmɔse ɔɔ ghu ughuamhi ni o rɔli ramhi eghuli.

3 Abi ɔni ɔkhɔli-okhue ɔnɔfunɛ ɔ rɔ suɔ eko iJesu, ɔ ghie egbhali eyi ɛgbɔ iJu

ghi ɔli, ɔ bhale ya ri ɔni ɔɔ ga oyɛluɛ ze.

4 Abi e rɔ bhale deba iJesu, e lema li egbɔgbɔ, ɛɛ iJesu, “Ɔni ɔmɔse ɔna, ɔ khi ɔni u kha kpaghiɛ obo.

5 Irari khi ɔ ma nono ingme oyi ɛgbɔ eyi anye gba, ɔ gbo tɔ owa ugamhi na anye.”

6 Ighɔ iJesu ɔ deba wɛ vu. Ɔ she kia a ramhi owa oyi ɔni ɔkhɔli-okhue ni ɔ rɔ ghie emɔle ɔli e liɛ iJesu, “Khi ke nasɛ egbe ɛ, mhia somhi ramhi ni u wa lo owa oyɛmhɛ le.

7 Lolɔ o zɛ ni mhi rɔ bino khi mhiaa ti ramhi ni mhi a bhale deba ɛ. Lɛsɛ ngme oni ungmemhi khi ɔni ɔɔ ga mhɛ ɔ ya ze.

8 Irari khi mɛmhɛ oyɛmhɛ, ɔna omhɛsɛ mhi li khi, ni ekhɔli-okhue e li kpɔkɛ na. Mhia mhɛsɛ na ɔna, ‘Vu,’ ɔ vu. Mhi mhɛsɛ na ɔghɔ, ‘Bhale,’ ɔ bhale. Mhi gueyɛ oghumha oyɛmhɛ, ‘Riɛɛ ɔna,’ ɔ riɛɛ ɔli.”

9 Abi iJesu ɔ rɔ suɔ oni ungmemhi ona, abɔ e sha li. Ɔ nyenɛ alo ukhokho bino ebubu ɛgbɔ ni e deba li, ɔɔ wɛ, “Mhi gueyɛ ɛ khi mhia kie kpɛ mɛ irudunga ni o na fu ghue, mhia kpe mɛ ɔli ekɛ iZirɛni ne.”

10 Ighɔ eni a kpɛ ghie, e nyenɛ egbe je apfɛ oyi ɔni ɔkhɔli-okhue nɔ funɛ, e bhale ya ɛ khi ɔni ɔɔ ga li ɔ she ze.

*IJesu ɔ rɔte eghuli guise
omi Ɔsamhi-olimhi le*

11 Oo li deɛ, iJesu ɔ te aghɔ vu, ɔ je ɛoli ni a lu iNei, eniyɛ

odukhokho eyoli ali ebubu egbo elese e deba li.

12 Abi o li ti ramhi ode unuekpere ni a te e lo oni eoli le, o me khi a tsua ogbo ni o ghua a lasele. Lolighuo kpe inyoli o me bia. Oni okpotso o gbo khi osamhi-olimhi. Ebubu egbo e rote oni eoli ve deba li.

13 Abi Onomhue o ro me oni okpotso, o mhue ilelemhi na li. Elemhi o e ala li, oo li, "Khi ke vie."

14 Igho o vu ya ri obo ti oni akpati olimhi, egbo ni e tsua li e mu migha, iJesu o, "Oni ozexo mhiye ye vule."

15 Igho oni omose ni o ghua egho o vule shito, oo ngme. IJesu o mu oli obo na inyoli.

16 Ulishi o mu eni egbo nya, e kueghie Eshinegba, e lie, "Omekeguele oniemhi o she bhale iteva oyi awa. Eshinegba o she bhale ya kpaghie egbo eyoli obo."

17 Ingme oyi iJesu o gbhiaku eke iJudia nya ali eoli ni e la gasa oli.

IJoni Oni oo batazi o ghie usomhi ghi iJesu
(iMat 11.2-19)

18 Abi eniye odukhokho eyi ijoni e ro gue eni ingme enana nya ye ijoni, o lu aava elemhi we.

19 O ghie we e ka mhila iJesu, "Ye ye u khi oni o ya bhale abi anye ri eloe shi eke ke khe olese?"

20 Abi e ro bhale deba iJesu, e oli, "IJoni Oni oo batazi egbo o ghie anye ghi e, anye ka mhila e, Ye ye u khi oni o ya

bhale abi anye ri eloe shi eke ke khe ogboese?"

21 Eghenge agho te iJesu o ri ebubu egbo ni e mhue ighuamhi ali iyemhe okphaghie ze. O khueghie ebubu ezalo alo-a.

22 O ro gueye eniye odukhokho eyi ijoni, "A nyene egbe ukhokho ya gueye ijoni emini a me, ni a gbo ri esu suo. Ezalo ee me eke, eni e guoghwo awe-a, ee kia, eni efafe e mu e ze, eleso e suo esu. Eni e ghua e guale. A kiele e tse abo usomhi onete oyi iloghie ye egbo ni ea mhue.*

23 Oghelo o khi ni ogbo ni oa da de ode-a itobo khi oa mhue akhokhomhe shi mhe o."

24 Abi eniye odukhokho eyi ijoni e ro vu se, iJesu o gue ingme oyi ijoni ye eni egbo, oo we, "Abi a ro fe fie je odagbe ifufu ya bino oli, ogbo onabi onoghwo a dabi khi a ya me? Ogbwo oyeghe ni o li abi ebuli ifulo ni akpekpeli o kha pfi je ana, o pfi oli e je oobo a dabi khi a ya me oobo?"

25 Ini oa khi ogbo oghoghwo a dabi khi a ya me oobo, onabi ise a ke nono je oobo sho? Omose ni o so itsua ni e somhi otse? Egbo ni e so itsua ni e somhi otse, apfe oyi oghie e la.

26 Ogbwo nabise a dabi khi a je oobo ya me? Omekeguele? Abi o li mhi li gue oli e ye e khi oni o dose omekeguele lo.

27 Onana a keke ingme oyoli kpe shi eke, ni ee, "Ghe khe, mhi ya ghie

* 7:22 Li ze Aza 35.5-6; 61.1

aghiusomhi oyemhẹ ralo
ne,
ni ọ ya khueghie ode-a
shi eke khe.†

28 “Mhi gueye ẹ khi aa me
ogbo ni a bia bhale eke agbo
ona ni ọ fu dose ijoni, eri-
tse khi oni ọ ga she ne nya
shi Eghiele oyi Eshinegba ọ fu
dose oli.”

29 Egbọ nya, li shi
emionoga, abi e ro suo
ingmemhi eyi iJesu, e mie shi
ọ khi ode oyi Eshinegba o gbe
akanya, irari khi ijoni ọ she
batazi we.

30 Egbọ iFarisi ali eni e lese
emhi ingme ushi e kie ug-
bamhi ni Eshinegba ọ gba na
we, irari khi ẹa lama ni ijoni
ọ batazi we.‡

31 Agho iJesu ọ re, elo mhi
fe ri egbo ena agbhotu ona ya
khokho, se e fe ga li ena?

32 Eri e li abi eniye ni e shito
oki ni e nu egbe ẹ ngme ni e
lie,

“ ‘Anye pfi ofele na ẹ,
ama aa lama gbe
ishimhi,

anye vie vie olimhi khase ẹ,
ama aa lama nu anye vie.’

33 Itobo khi abi ijoni Oni oo
batazi egbo ọ ro bhale, ọa li
le emhi wekhi eri ọ da onyo,
eri ẹ khi, ‘Ayemhẹ okphaghiẹ ọ
mhue.’

34 Omi ogbo ọ bhale, oo le, oo
da, a ke lie khi, ‘Ogbo unu-
emhi ali ogbo odonyo ọ khi,
ali khi oni ọ nu emionoga ali
egbo ena olamhe ẹ mu omole
ọ khi.’

35 Eri egbhali oyi Eshinegba o
rote obọ oyi egbo ni e miesuo
ri egboli khase.”

*Okpotso ona olamhe ọ ku
ituale ni oo pfi shi iJesu awe*

36 Ogbo iFarisi oghuo oo
iJesu ọ bhale ka ko feli lue ni
ọ nu lue le eminale. Igho ọ je
owa oyi oni iFarisi, ọ shito, ọ
le emhi.

37 Igho okpotso oghuo, ongi
oni eoli ni ọ la agbo olamhe,
ọ suo khi iJesu ọ la oni owa
oyi ogbo iFarisi ogho. Ọ de
akanama ituale ni o ghale.

38 Ọ bhale, ọ de ya wugha
iJesu idi awe. Ọo vie ku
amevie shi oli awe. Ọ ri itsu
ni e la li ukhomhi shishi oli
wewe-a, ọ pfpfi oli awe. Ọ
gbo ku ituale ni oo pfi shi oli
awe. §

39 Abi oni iFarisi ni ọ lu iJesu
bhale apfe oyoli ya mu oli
epfese, ọ ro me onana, ọ la eke
elemhi udu lie, ini omekeguele
oyi Eshinegba omose ona ọ
kha khi lo, ọ kha lese uwali
okpotso ni ona ọ khi ni ọ ri
egbe a ti oli ena, khi ona
olamhe ọ khi.

40 IJesu oo, “ISamo mhi
mhue emini mhi ya gue ye.”

ISamo oo li, “Gueye mhe,
Osese.”

41 IJesu oo li, “Omose oghuo
ọ la ni egbo aava e lo oli ota,
oghuo ọ, ọ lo oli ekpa eva ali
ukhukhui, oni ọ kpole ọ lo oli
ipomhi uye ali ishe.

42 Abi ẹa ke ro dobe fali
oli ewe, ọ gbe eni ota kua na
we. Mena gueye mhe oni ọ ya

† 7:27 Li ze iMala 3.1 ‡ 7:30 Li ze iMat 21.32; iLuk 3.12 § 7:38 Li ze iMat 26.7; iMak 14.3; ijon 12.3

nono ingme oyi ọli nẹ elemhi wewe awa-awa?”

⁴³ ISamo ọọ li, khi ọni ọ lo ikpagho eni e bu nẹ lo. Ijesu ọọ li, “U gue so.”

⁴⁴ Ijesu ọ nyene alo ghue ọni ọkpotso, ọọ iSamo “Wa me ọni ọkpotso ọna, abi mhi ro bhale owa oye wa die ame na mhe ro kpe awe-a, eri ọni ọkpotso ọnana ọ ri amevie eyoli kpe mhe awe-a, ọ ri itsu ni e la li ukhomhi shishi we-a.

⁴⁵ Waa pfifi mhe unu egbe, rote eghẹghẹ ni mhi te lo ana le, ọni ọkpotso ọna ọ te pfifi mhe unu awe ramhi memena.

⁴⁶ Waa ku oili shi mhe ukhomhi, ọni ọkpotso ọna, ọ she ku ituale ni ọ pfie shi mhe awe.

⁴⁷ Itobo igho mhi gue e ye e khi a she gbe olamhe eyoli ni e bububu kua na li, irari khi ọni ọ nono emini e bu ọ khi. Ọni a gbe ukuku kua na, ukuku ọ nono.”

⁴⁸ Ọ gueye ọni ọkpotso, “A she gbe olamhe eye kua nẹ.”

⁴⁹ Egbọ ni e nu ọli shito e mhila egbewe “Oghuo ọnana ọọ dabi khi ọli khi ni ọọ gbe olamhe kua na ọgbọ.”

⁵⁰ Ijesu ọ gueye ọni ọkpotso “Irudunga oye o she mie e pfuese, ri opfomhe ke je.”

8

Ikpotso ni e kpaghie ijesu obo

¹ Ona o dose, ijesu ọ kia rote ẹoli je ẹoli. Ọọ gue usomhi onete oyi Eghiele oyi Eshinegba le. Eniye

odukhokho ogbava eyoli e nu ọli kia.

² Ikpotso eghuo ni e kpe mhue ayemhe okphaghie ali iwali ighuamhi ni ọ ro ze, e li la agho: IMeli ọngi iMagidalen ni ayemhe ishilua e rote egbe lasele;

³ IJoana ni ọ khi ughue iChuzo ni ọ gbe akanya na oghie Erodu; ISuzana ali ikpotso elese gho, e ga la akagho. Enana e rote ekuẹ oye we e kpaghie ijesu ali eniye odukhokho eyi ọli obo.*

Okhe irokhokho oyi oghiale (iMat 13.1-9; iMak 4.1-9)

⁴ Abi ebubu egbo e ro rote ẹoli ọdoda bhale ya lona kugbe, ni e ro le gasẹ ijesu, ijesu ọ ze okhe irokhokho khasẹ we, ọọ we,

⁵ “Oghiale ọ ya ri ikpamhi emhi ko. Abi ọ ro ku eni ikpamhi emhi kia ko, eghuo ọ e ku shi epfepfe ode. Eghuo ọ egbo e ri awe muno we. Ipfeli e bhale ya sanọ we le.

⁶ Eghuo ọ e de ku nga eche, abi e ro ze ngale, e khakha. Itobo khi ẹa me asha lolo pfi imhili lo eke.

⁷ Ikpamhi eghuo ọ e de shi ifu igba, eni igba e tono we.

⁸ Igho eghuo ọ e ku shi eke onete, e fu, e mo ikpamhi agbhagbhamhi egbhueshe. Abi ọ ro ngme ona se, ọọ li, Ọni ọ mholi esọ ọ ro suo.”

Emini o ze ni ọ ro ze oni okhe irokhokho (iMat 13.10-23; iMak 4.10-20)

* 8:3 Li ze iMat 27.55-56; iMak 15.40-41; iLuk 23.49

⁹ Eniye odukhokho eyoli e mhila li emini a ri oni okhe irokhokho ngme.

¹⁰ Oo we, "A she khueghie osheli ni o la Eghiele oyi Eshinegba-a khase e. Ama aa roli khase egbo ni e kpole. Loli o ze ni mhi ro ri okhe irokhokho nu we e ngme.

"Irari khi ini e ririe e fe,
ea ya me eke,
ee suo, oa lo we eso."[†]

Emini okhe irokhokho oyi oghiale ogho o ngme

(iMat 13.18-23; iMak 4.13-20)

¹¹ "Emini a ri oni okhe irokhokho ngme na. Oni ukpamhi emhi ogho, ungmehi oyi Eshinegba lo.

¹² Eni e de kua epfefefe ode egho, e khi egbo ni e kha suo ungmehi oyi Eshinegba, okphaghiye o bhale ya sano we oni ungmehi udu-a, ini e khi miesuo, ni e ba mhuwe imiepfuese.

¹³ Eni e ze nga okpegbhe e to eoli egbo ni e miesuo, ni e khia khi abi imufe o ro bhale ea ke dobe migha, e de ode-a.

¹⁴ Ikpamhi ni e ze shi ifu igba, wewe e khi egbo ni e suo oni ungmehi ama ea dobe migha shi o, isamhi eyi emhi agbo ali anasemhe ali epfue ni o la agbo ali oghuemhe ni o la o, oa ze ni e mhuwe iwomhelo shi irudunga.

¹⁵ Ikpamhi ni e ze shi eke onete ni e mo ikpamhi, wewe e khi egbegbi egbo ali udu

onete ni e kha suo oni ungmehi, e mu oli shi, e kha ri egbe mie o ri emini a ro ko o ze lasele.

Akpá ni a ro ru nga ukhomhi emhi
(iMak 4.21-25)

¹⁶ "Aa me ogbo ni o ri akpa ya ru, ni o ya rue oli sheli elemhi ukoko, wekhi ufu ukpho. Eri o ri ochogho ya rue oli nga asha na keghe ni eni ee lo le e ke me eke, ee me oni akpa."[‡]

¹⁷ Irari khi aa me emiemini a ro sheli ni aa ya ro lasele gboo, wekhi eri a me emini a khukhu shi elemhi, ni aa ya khueghie-a gboo. §

¹⁸ Itobo igho mhuwe egbhe shi emini u wa suo. Oni o mhuwe, a ya ro ma li o. Ama oni oa mhuwe a ya gbo mie oli ukuku oli ni o sa khi loli mhuwe."^{*}

Inyoghwo ifesu ali inyi ifesu
(iMat 12.46-50; iMak 3.31-35)

¹⁹ Igho inyoli ali inyoghwo oli e bhale deba li, ama ea me asha ramhi oli egbe, irari ebubu egbo ni e le gashe oli.

²⁰ Ogbō o ya gueye ifesu, oo li, "Inye ali inyoghue, e migha olase, ee nono ni wewe e me."

²¹ Ijesu oo we, "Inyemhe ali inyoghwo-mhe wewe e khi egbo ena ni ee suo ungmehi oyi Eshinegba, ni e gbo roli e gbe akanya."

[†] 8:10 Li ze Aza 6.9-10

[‡] 8:16 Li ze iMat 5.15; iLuk 11.33

§ 8:17 Li ze iMat

10.26; iLuk 12.2

* 8:18 Li ze iMat 25.29; iLuk 19.26

Ijesu o mu akpekpeli migha

(iMat 8.23-27; iMak 4.35-41)

²² Eḷeghuo iJesu oḷo eniye odukhokho eyoli, “A bhale ni awa da je ukiękię obinokpọle oyi oke ni o khishi.” E lo oko-oke e le.

²³ Abi e li le, iJesu o lese. Utoghuokpe ukpokpomhi akpekpeli o lo oni oko-oke o ku ya ramhi khi oni oko-oke o ku ya luę, wewę nya e la okhena.

²⁴ Eniye odukhokho eyoli e bhale ya guise oli le. Eę oli “Onomhue, Onomhue oke o ya ku awa luę.” O vule, o nu oni akpekpeli ali oke ni o zughuse ngme. Oni akpekpeli o mu migha. Oke ni o zughuse egho o dema, asha kpa oo tsuke.

²⁵ O mhila eniye odukhokho eyoli, “Ighe irudunga oyeę?” E ri ulishi ali oshabo mhila egbewe, “Oghuo onana o fe ga khi ena? Irari khi oḷo mhese na akpekpeli ali oke, e suo na li.”

Ijesu o ri omose no mhue ayemhe okphaghię toto

(iMat 8.28-34; iMak 5.1-20)

²⁶ E kia ramhi eke iGeraseseni ni o gbe oke ni o khishi na iGalili khi-a.

²⁷ Abi Ijesu oḷo da tiemhile eke, Omose ongi oni eoli, ni o mholi ayemhe okphaghię ni o she tese ni o te ke so awulu, wexhi eri o ke la owa ghue, ama atalimhi o ke la, o bhale ya o.

²⁸ Abi o ro me iJesu, o de yeshi oli awe, o tseş leghe, o lie, “Elo u remhe ya li,

iJesu Omi Eshinegba onofune, kpekpę khi nase mhe.”

²⁹ Eri o ngme ona irari khi iJesu o she mhese na oni ayemhe okphaghię ogho o rote oli egbe lasele. Iti-ingmi-ingme oni ayemhe o she mu oli, ni o khia khi ini a rie mu oli ri iwęghę shi oli abo ali awe, o pfanọ eni iwęghę-a, oni ayemhe okphaghię o tsua li je odagbe ifufu.

³⁰ Ijesu o mhila li, “Se a lu eva oye?” Oni ayemhe oḷo li, eva oyemhe khi, “ILigioni,” irari khi ayemhe okphaghię ebubu e she lo oli egbe.

³¹ Eni ayemhe okphaghię e lema iJesu o khi khu wewę je ilimhi na ningolo.

³² Igulu ebubu e la epfe ute le eminale. Igho eni ayemhe e lema li o kpekpę o ze ni wewę e ya lo eni igulu egbe. Igho o ze ni e ya lo eni igulu egho.

³³ Eni ayemhe okphaghię egho e rote egbe oyi oni omose lasele, e ya lo elemhi eni igulu egho. Eni igulu e rote oni epfe ute na ya kulo oke ni o khishi egho, oke o gbe we.

³⁴ Abi eni e ri eni igulu e kia e ro me emini a me, e na je ifu apfe ya gueye egbọ emini a me.

³⁵ Egbọ e le ya bino emini a me. Abi e ro bhale deba iJesu, e bhale ya e khi oni omose ni iyemhe okphaghię e te egbe lase khi o shito ufuęę oyi iJesu. O ga pfomhe, o ku egbe-a shito, ulishi o mu we.

³⁶ Egbọ ni e me oni ingme e gueye egbọ elese abi oni omose o li kia ni o ro ze.

³⁷ Igho eni egbo iGerasenesi e gueye iJesu o lase ewe eke le, irari khi ulishi o mu we. IJesu o lo oko-okę o vu.

³⁸ Oni omose ni eni iyemhe okphaghię e rote egbe lasele o o iJesu, "Kpekpe ze ni mhi deba e vu." Ama iJesu o o li, o ke vu.

³⁹ Nyene egbe je apfe ni u ya guele emini Eshinegba o rięle ne. Igho oni omose o vu ya gueye egbo ni e la oni eoli ogho nya, emini iJesu o rięle na li.

Omi iJarusi ali okpotso ni o ri obo ti iJesu awulu

(iMat 9.18-26; iMak 5.21-43)

⁴⁰ Abi iJesu o ro nyene egbe je ukiekie okę ni o kpole, egbo e tse oli o mu awe itobo khi o she tese ni e te migha a khe oli.

⁴¹ Igho omose oghuo ni a lu iJarusi ni o khi ogbo oni o mhesę shi owa ugamhi oyi egbo iJu, o de ya wugha iJesu awe. O o lema li o kpekpe o bhale apfe oyelue.

⁴² Irari khi omọ omueshi oghuo kpe ni o me bia ni o lese gbe ikpe igbeva o ya ghua. Abi iJesu o li le, egbo e le gase oli, e ma mu oli ashakpa.

⁴³ Okpotso oghuo o la ifuabo we ni o she ku oia egbe elemhi ikpe igbeva. O she ga pfuse emini o mhue-a nya na idokita, ama aa me oni o dobe dua oli egbe.

⁴⁴ Igho o rote ifuabo oyi eni egbo lase bena ya ri obo ti esọ ode ni iJesu o so, oia ni e ku oli egbe e pfa tee.

⁴⁵ IJesu o mhila, "Oghuo o ri obo ti mhe?"

Ogbokpa o tia. IPita o o li, "Onomhue, ebubu egbo e le gase ni e ma mu e."

⁴⁶ Ama iJesu o li, "Ogbo o ri obo ti mhe, mhi lese khi itoto e she rote mhe egbe ya lase, loli mhi ro lese."

⁴⁷ Oni okpotso o me khi loli a dobe ya vu ni a ro ya me lue, o ri ulishi fię lasele, o de ya wugha odalo oyi iJesu. Ukpeloe oyi eni egbokpa, o gueye iJesu emini o ze ni loli ro ri obo ti oli ali abi loli ze utoghuokpe.

⁴⁸ Igho iJesu o li, "Omimhe ke je khi irudunga oye o she re ze. Ri opfomhe ke je apfe oye."

⁴⁹ IJesu o kie ligho ngme, ogbo o rote owa oyi iJarusi ni o khi oni o mhesę elemhi owa ugamhi bhale. O o li, "Omie o she ghua-a. Khi ke bie nase osese."

⁵⁰ Abi iJesu o ro suo ona, o gueye iJarusi, "Khi ze ni ulishi o muę. Lese miesuo tse khi o ya toto."

⁵¹ Abi o ke ro ramhi apfe oyi iJarusi, o a ze ni ogbokhoghuo o nu lue lo agho, seę ni iPita ali iJoni ali iJemhisi ali inyọ oni omọ ali itali.

⁵² Ogbokpa e she kie kpe vie vie oyi oni omọ. IJesu o o we, "A khi ke vie irari khi oni omọ o a ghu, eri o lese."

⁵³ Wewe nya ee gia iJesu, irari khi e lese khi oni omọ o she ghua.

⁵⁴ Ama iJesu o mu oli obo o lu oli leghe, "Omimhe, vule."

⁵⁵ Ayemhe oyoli o nyene egbe bhale deba li. O vule migha utoghuokpe. Igho

iJesu ọọ wẹ, “A ri eminale na ọni ọmọ le.”

⁵⁶ Abọ e sha ita ali inyọli. IJesu ọ gueye wẹ e khi gueye ọgbọkhọghuo emini a mẹ.

9

Ijesu ọ ghie eniye odukhokho ogbava fiẹ

(iMat 10.5-15; iMak 6.7-13)

¹ Ijesu ọ lu eniye odukhokho ogbava eyọli kugbe, ọ ri itoto ali afu na wẹ ni e rọ ke khu ẹgbọ iyemhẹ ni ẹa ti egbe lasele, ali ni e gbo ri ẹgbọ ni e mhue ighuamhi ọdọda toto.

² Ọ ghie wẹ fiẹ e ke ya tse abọ ungmehi oyi Eghiele oyi Ẹshinẹgba kiakia ali ni e gbo ke ri ẹgbọ ze.

³ Ọọ wẹ, “A khi tsua emhikhọghuo abi a liẹ le ena, a khi tsua ukpokpo wẹkhi akpaba wẹkhi eminale wẹkhi ikpaghọ wẹkhi iku itsua eva ni a sọ.

⁴ Owa ni a da lo ne, a la aghọ ramhi ni a rọ ya te oni ẹoli vu.

⁵ Ini ẹgbọ ẹa da mie ẹ ne, a kpishi itutu ni e la ẹ awẹ-a shi oni eke ini a rọte oni ẹoli ẹ vu, ni o khi ọtsẹlẹ ni a ya pfi mu we.”*

⁶ Ighọ eni eniye odukhokho e vu, rọte ẹoli je ẹoli. E ri usomhi onete oyi Ẹshinẹgba tse abọ kiakia. E ri ẹgbọ ọ toto ashakpa.

Oghie Erodu ọọ khọkhọ ọni ijesu ọ khi

(iMat 14.1-12; iMak 6.14-29)

⁷ Ighọ Erodu ni ọ khi oghie shi eke iGalili ọ suọ ikanya ọnyaloa ni iJesu ọọ gbe. Abọ e sha li itobọ khi ẹgbọ eghuo e liẹ khi iJoni Ọni ọọ batazi ẹgbọ lọ ni ọ rọte eghuli guale.

⁸ Eghuo ẹ khi Elaja ọ khi ni ọ bhale, eghuo elese e liẹ khi ọghuo ọmekẹguele enediọ ọ khi ni ọ nyene egbe bhale agbọ.†

⁹ Ama, Erodu ọọ, “Mhemhẹ mhi khi iJoni ukhomhi ọ. Ọghuo ọnana ọ khi ni mhia suọ eko?” Ọọ dua abi ọ li ya mẹ ọli.

Ijesu ọ ri eminale na ẹgbọ agbẹle ishe (5,000) le

(iMat 14.13-21; iMak 6.30-44; iJon 6.1-14)

¹⁰ Abi eni ighiusomhi na kee e rọ jele, e gueye iJesu abi e li kia. Ighọ ọ rue wẹ vu je epfe ẹoli na lu iBẹtisaida,

¹¹ Ama eni ebubu ẹgbọ e suọ obini ọ je, e deba li. Ọ mie wẹ, ọ gue ungmehi Eghiele oyi Ẹshinẹgba ye wẹ, ọ ri eni e mhue ighuamhi toto.

¹² O te aghọ li dene abi ogbomhi o ke rọ mu eke, eniye odukhokho ogbava e bhale deba li, ẹẹ ọli. “Gueye eni ẹgbọ e vu je ẹoli ni e ti mama ana ni e ya nono ashini e ya ku shi ali eminale ni e ya le, irari khi ifui ọdagbe ifufu awa la.”

¹³ Ọ sọ wẹ ọ, ọọ wẹ, “A ri eminale na wẹ le.”

Ẹ ọli, “Ibuledi eva ali ifele aava e lese la ana, se ni awa vu ya de eminale ghi wẹ.”

¹⁴ Irari khi emose agbẹle asha ishe e la aghọ.

* 9:5 Li ze iLuk 10.4-11; Ika 13.51 † 9:8 Li ze iMat 16.14; iMak 8.28; iLuk 9.19

Ama ọ́ọ́ eni eniye odukhokho, “A rẹ wẹ shito ikui-iku ẹgbọ ẹgbhufe ali igbigbe.”

15 Eni eniye odukhokho e li ghọ, ọgbokpa ọ shito.

16 Ijesu ọ rue eni ibuleḍi ishe ali ifele aava eghọ, ọ bino idane, ọ kphemhi shi eni eminale, ọ kholo wẹ a. Ọ rue wẹ na eniye odukhokho eyọli ni e kemhi wẹ na eni ẹgbọ.

17 Ighọ wẹwẹ nya e le, e khue. Eni eniye odukhokho e wolọ eni e le kpọle shi ighughu igbeva.

IPita ọ guele oni ijesu ọ khi (iMat 16.13-19; iMak 8.27-29)

18 Eleghuo khi ijesu ọ la ashini ọ da-ya ẹ sọ iromhi, eniye odukhokho eyọli e nu ọli la aghọ, ọ mhila wẹ, “Oghuo ẹgbọ e fe ẹ lie khi mhi khi?”

19 E ọli, “Egbọ eghuo ẹ khi iḵoni Ọni ọọ batazi ẹgbọ u khi, elese ẹ lie Elaja, elese ghọ ẹ khi ọmekẹguele ọnọdiọ u khi ni u nyene ẹgbẹ bhale agbọ.”‡

20 Ọ rọ mhila wẹ “Oghuo ẹ ẹ khi mhi khi?”

IPita ọọ li, “Yeyẹ u khi Omiepfuese ọnayi Eshinegba.”§

Ijesu ọ gue ingme osoli, ali eghuli, ali iguale oyọli le

(iMat 16.20-28; iMak 8.30--9.1)

21 Ijesu ọ tse agua yẹ wẹ e khi gueyẹ ọgbokhoghuo.

22 Ighọ, Ọọ wẹ, “Omi Ogbọ ọ mema ya mẹ osue emhi ebubu. Eni egbhali ali ighie

eyi ekpodalo-ugamhi ali esese Ishi eyi iMosisi, e kie ọli. E mema ya gbe ọli-a, ama ẹlenuzi-esẹ, ọ ya guale.”

23 Ighọ ọ gueyẹ wẹ nya, “Ini ọgbokhoghuo ọ nono ni lọli khi ọmọ odukhokho oyemhe, ọ mema ya kie egbọli, ọ rue apfida oyọli ogbele kpa, ọọ deba mhe.*

24 Itobọ khi ọni ọ da nono ni lọli tsumhi agbọ oyọli ne, ọ ya wasẹ ọli-a, ama ọni ọ da wasẹ agbọ oyi ọli-a ne shi itobọ oyemhe, ọ ya tsumhi ọli.†

25 Ighẹ eleli ni ọgbọ ọ ya mẹ ini ọ mhue agbọ ona nya ni ọ rọ wasẹ ayemhe oyọli-a?

26 Ini ọgbọ ọ da na omama mhe ali ungmehi oyemhe ne, Mhemhe Omi Ogbọ mhi li ya na omama oyi oni ọgbọ, ini mhi bhale elemhi ufumhi oyemhe, ali ufumhi oyi Ita ali oyi igeni ni e pfuase

27 Mhi gue ọli ẹ yẹ ẹ abi o li, khi, ẹgbọ eghuo e la ana ni ẹa ya ghu ne, neni e rọ ya mẹ oni Eghiele oyi Eshinegba.”

Ijesu ọ mu imamachi (iMat 17.1-8; iMak 9.2-8)

28 Abi ogbele nuzi eleli o rọ gba abi ijesu ọ te ngme eni ingme, ọ rue iPita ali iḵoni ali ijemhisi nga ute ya lema.

29 Abi ọ li sọ iromhi eghọ, alo eyọli e mu nyene, itsua ni ọ sọ e ge nyanyanya abi akpa.

30 Ighọ Emose aava, iMosisi ali Elaja,

31 e li lasele e ge nyanyanya, e nu ijesu u ngme, e gheta

‡ 9:19 Li ze iMat 14.1-2; iMak 6.14-15; iLuk 9.7-8 § 9:20 Li ze iḵon 6.68-69 * 9:23 Li ze iMat 10.38; iLuk 14.27 † 9:24 Li ze iMat 10.39; iLuk 17.33; iḵon 12.25

eghuli ni iJesu o ya ghu obini iJerusalemu.

³² Olesẹ o mema rẹ IPita ali apfọli. Abi e rọ guale ni olesẹ o rọ kala wẹ alo-a, e mẹ ufumhi oyi iJesu ali emọse aava ni e nu ọli migha.

³³ Abi eni emọse aava e li vu, iPita ọọ iJesu, “Ọga, oo ga guẹ ti khi anye la akana. Zẹ ni anye tọnọ okholo esẹ, oghuo oye, oghuo oyi iMosisi, onokpọle oyi Elaja.” Eri o li ngme tse, ọa lese emini o ngme.

³⁴ O kie ligho ngme, otughunu o bhale ya khukhu wẹ-a. Ulishi o mu wẹ abi e rọ lo elemhi oni otughunu.

³⁵ Igho uruli o rọte oni otughunu ngme, ọọ, “Omimhẹ na ni mhi zẹ, a ri esọ shi emini o ngme.” †§

³⁶ Abi oni uruli o rọ ngme se, e mẹ khi iJesu lueghuo o ke migha. Eni eniye odukhokho e ri ingme ona shi udu, ẹa gueye ọgbokhoghuo emini e mẹ ẹghẹghẹ agho.

Ijesu o ri ozeo ni ughuamhi o mu ze

(iMat 17.14-18; iMak 9.14-27)

³⁷ Ogbeakolo abi e rọte ukhomhi ute tiemhile, ebubu ẹgbọ e bhale deba li.

³⁸ Igho omose oghuo o rọte elemhi eni ebubu ẹgbọ tsesẹ leghe, o li “Osesẹ, kpekpe bino omimhẹ, loli o khi omọ oghuo kpe ni mhi mẹ bia.

³⁹ Ayemhẹ obe o tsua mu ọli, eri ọọ mu ọli pfi eke, ọọ kpi

awẹ-a, o rọli ẹ chi ofulu unu. Oa ga nono ni loli rue ọli obọ-a kpa. Eri ọọ nono ni loli pfuse ọli ayemhẹ-a.

⁴⁰ Mhi she lema eniye odukhokho eye e khu ọli oni ayemhẹ egbe-a, ẹa dobe.”

⁴¹ Ijesu ọọ wẹ, “Eẹ ẹgbọ ni aa mhue irudunga wẹkhi ilẹse. Eẹ ingme mhi dobe ya ri egbe mie umhalẹse oye ẹ ramhi? Eẹ ingme mhi ke nu ẹ ya la akana?” Oọ oni omose, “Rue omiẹ bhale ana ghi mhẹ.”

⁴² Abi oni omọ o li bhale, oni ayemhẹ ọkphaghiẹ o mu ọli pfi eke jighise, ọọ chi ofulu unu. Igho iJesu o dese oni ayemhẹ ọkphaghiẹ, o ri oni omọ ze. O rue ọli na itali.

⁴³ Abọ e sha eni ẹgbọ nya shi ekpabọ oyi Eshinẹgba ni e fune.

Ijesu o gbo gue ingme eghuli oyoli le shi eke

(iMat 17.22-23; iMak 9.30-32)

Abọ e kie ligho sha eni ẹgbọ shi emini iJesu o riẹle, iJesu ọọ eniye odukhokho eyoli,

⁴⁴ “A ri esọ shi eke shi ingme ni mhi ya gueye ẹ ena. A ya ri Omi Ọgbọ na ẹgbọ de.”

⁴⁵ Eri-tse khi eni eniye odukhokho ẹa lese abi oni ungmehi o ngme. Irari khi eri a rọli sheli wẹ ini e khi lese emini a rọli ngme. Ama ulishi oo mu wẹ shi abi e liẹ mhila li.

Oghuo o fune

(iMat 18.1-5; iMak 9.33-37)

‡ 9:35 Li zẹ Aza 42.1; iMat 3.17; 12.18; iMak 1.11; iLuk 3.22 § 9:35 Li zẹ 2 iPit 1.17-18 * 9:46 Li zẹ iLuk 22.24

46 Ekhako o bhale iteva oyi eniye odukhokho eyoli shi oni o ya fune elemhi we.*

47 IJesu o lese emini ee sa udu oyewe, o rue ukuku omolasele migha we iteva.

48 Oo we, "Onini o da ri eva oyemhe mie omolona ne, mhemhe o mie. Onini o da mie mhe ne, oni o ghie mhe o mie. Irari khi onini o da ri egboli tiemhie-eke ne elemhi e, loli o khi oni o fune nya."†

Oni o da khi obe awa ne oyi awa o khi

(iMak 9.38-40)

49 IJoni oo, "Oga, anye me omose ni o ri eva oye e khu ayemhe okphaghiye lase, anye nono ni anye gueye oli o khi ke ligho irari khi o ya ya debe abi anye lie debe."

50 IJesu oo we, "A khi ke ligho, irari khi ogbo ni o da khi obe awa ne, onayi awa o khi."

Egbo iSameria e lama mie iJesu

51 Abi eghenge o ro ramhi ni a ro ya rue iJesu je iloghie, o mholi oli shi udu khi loli ya je iJerusalemu.

52 O ghie ighiusomhi ralo, ni e lo elemhi eoli nikeke na elemhi iSameria ni e ya mu egbe emhikpa shi eke khe oli.

53 Ama eni egbo iSameria e lama mie oli irari khi e lese khi iJerusalemu oo je.

54 Abi eniye odukhokho eyoli ikhi iJemhisi ali iJoni e ro me ghoo, e oli, "Onomhue, waa ke ze ni anye lu erali rote

idane tiemhie ro tose we a nya?"‡

55 IJesu o nyene alo ukhokho, o dese we, oo we, aa lese ayemhe ni a mhue. Oa khi eri omi ogbo o bhale ya yese egbo agbo-a, ama eri o bhale ya tsumhi we.

56 Igho iJesu ali eniye odukhokho eyoli e vu je eoli olese.

Emini ideba-iJesu-kia o ya mie ogbo o rue

(iMat 8.19-22)

57 Abi e li lese egho, omose oghuo oo iJesu, "Oga mhi ya ke debe je obiobini wa je kpa."

58 IJesu oo li, "Inyako e mhue ese, ipfeli e mhue eko, ama Omi Ogbo o mhue ashini o do ukhomhi e gbe."

59 IJesu o gueye omose olese, "Deba mhe." Oni ogbo oo li, "Oga, kpe ze ni mhi ya ri ita mhe to."

60 IJesu oo li, "Zobe ni eni e ghu-a e ri eni e ghu-a to. Yeye fie ke ya gue ungmehi Eghiele oyi Eshinegba le."

61 Olese oo li, "Oga mhi ya debe, kpe ze ni mhi ya tse apfemhe, okhila."§

62 IJesu oo li, "Ogbo ni o da ri oboo nga egba ni oo she e gua ese, ni o da bino ukhokho ne, o te ni o lo Eghiele oyi Eshinegba."

10

IJesu o ghie egbo egbhuese etuogbava fie

1 Ona o dose se, Onomhue o ze egbo egbhuese etuogbava,

† 9:48 Li ze iMat 10.40; iLuk 10.16; iJon 13.20 ‡ 9:54 Li ze 2 Ighie 1.9-16 § 9:61 Li ze 1 Ighie 19.20

o mu we ava-ava, o e ralo na lue ni e kia je ikpe ni o nono ni loli kia ramhi.

² Oo we, "Ikhiese oniemhi o la o, eri-tse eni e khiese we ea bu. Itobo igho, a so lema ita oni o mhue okhiese, ni o ghie eni e khiese bhale ishemhi oyoli.*

³ A ke le! Eri mhia ghie e abine isumha ne la ifuabo idumhi.†

⁴ A khi tsua eku ukpagho we khi akpulu we khi eku, a khi tse egbo ode.

⁵ "Ini a lo owa okhoghuo, a kpe to de lie 'Opfomhe o ka la oni owa ona.'

⁶ Ini ogbo opfomhe o la agho, opfomhe oye e o deba li, ini aa me, opfomhe oye e o nyene egbe deba e.

⁷ Apfe okhoghuo ni a da lo ne, a la agho le, a la agho da emiemini e da ro ya na e. Irari khi o ti ni ogbakanya o mie ifata. A khi ke kia te owa da je owa.‡

⁸ "Ini a da lo eoli le ni e ro da mie e ne, a le emini e roshi eke na e.

⁹ A ri eni ee ghua ni e la agho ze, a gueye we, 'Eghiele oyi Eshinegba o she ti mama e.'

¹⁰ Eoli ni a bhale kpa ni ea da mie e, a je ifu apfe ya lie,

¹¹ 'Itutu oyi eke oye ni e la anye awe, anye she kpishi we shi eke na e, ni e ya pfi otsele mu e. Ama ee oye e, a lese khi

Eghiele oyi Eshinegba o she ti mama e.'§*

¹² Mhi gueye e khi ogbele iso-ezo khi o ya somhi iSodomu egbe dose oni eoli ogho.†

*Eoli ni ea miesuo
(iMat 11.20-24)*

¹³ "O ma kholo e egbe, ikhi ee egbo iKorazi! O ma kholo e egbe, ee egbo iBetisaida! Irari khi ini ikanya onyaloa ni a la elemhi e gbe khi a la eke iTai ali iSidoni li gbe we lo, e kha mu nyene agboagbo. E so ide evie, e shito ukhomhi emue.‡

¹⁴ Eri-tse khi Eshinegba o ya mhue isomhelemhi na egbo iTire ali egbo iSodomu dose e ogbele iguezo.

¹⁵ Ee egbo iKapanomu, eri a dabi khi a ya ti e nga idane? Iye! Eri a ya ti e tiemhi ilimhi irierie.§

¹⁶ "Oo we, oni o da ri eso shi e o ne, mhemhe o ri eso shi o. Oni o da kie e, mhemhe o kie. Oni o da kie mhe ne, oni o ghie mhe o kie."*

*Ijele oyi egbo egbhuese
etuogbava*

¹⁷ Igho eni egbo egbhuese etuogbava egho e ri oghel jele. Ee oli, "Onomhue, eri egbegbi iyemhe okphaghi e ri irari eva oye nyese ukhomhi na anye."

¹⁸ Ijesu oo we, "Mhi me khi okphaghi o rote idane de pfile abi erali akphala.

* 10:2 Li ze iMat 9.37-38 † 10:3 Li ze iMat 10.16 ‡ 10:7 Li ze 1 iKori 9.14; 1 iTimo 5.18 § 10:11 Li ze Ika 13.51 * 10:11 Li ze iMat 10.7-14; iMak 6.8-11; iLuk 9.3-5 † 10:12 Li ze Igbae 19.24-28; iMat 11.24; 10.15 ‡ 10:13 Li ze Aza 23.1-18; Ezik 26.1-28.26; ijofe 3.4-8; Emo 1.9-10; iZaka 9.2-4 § 10:15 Li ze Aza 14.13-15 * 10:16 Li ze iMat 10.40; iMak 9.37; iLuk 9.48; ijon 13.20

19 A ghe khe! Mhi she ri afu na e, ni a ro lighi enye ali ikpi dose, ali ni a gbo mu itoto ali ekpabo alo ebili nyaa o le. Emhikhoghua ea ya li e.†

20 A khi ghele khi okphaghie o ri irari eva oyemhe nyese ukhomhi na e, ama a ke ghele khi a keke eva oye e shi ighie.”

Ijesu o ghele

(iMat 11.25-27; 13.16-17)

21 Egheghe agho, oghela o te elemhi Ayemhe-no-pfuase vo ijesu egbe, oo li, “Mhi tse uwegbe, Ita ni o mhu eke ali ukhuli. Irari khi u she ri emhi ena sheli egbo ni e fia alo-a ali eni e mema wena ebe. Ama u rewe khashe ikuku eniye. Igho lo Ita, irari khi abi o li ghole e shi gho.

22 “Itamhe o she ri emhikpa shi mhe obo. Aa me ogbo ni o lese oni omo o khi, se ni Ita. Aa me ogbo ni o lese oni Ita o khi, se ni omo. Eni e ghole oni omo o ri Ita a khashe.”‡

23 Igho o nyene alo ghue eniye odukhokho eyoli, o bena nu we ngme, oo we, “Ikhivose o khi na ikpalo ni e me emini ee a me.

24 Mhi gueye e khi emekeguele ali ighie ebubu e nono ni wewe e me emini ee a me ali ni e suo emini a suo ena, ama ea dobe.”

Ekpita oyi ongi iSamarita Onete

25 Igho osese Ishi eyi iMosisi oghuo o vule ya mu ijesu fe bino. O mhila li, “Elo mhi fe

ya li ni mhi ro ya mhu e agbo na agbo agbo?”

26 Ijesu o li, “Elo a keke shi ebe Ishi eyi iMosisi? Se u lie ze emini a keke shi o?”

27 O ijesu, “Rote ekelemhi udu oye nya ali ayemhe oye nya ali ekpabo eye nya ali isamhi eye nya nono ingme oyi Eshinegba. U gbo nono ingme oyi onuzava oyi e abi u nono ingme egbe e.”§

28 Ijesu oo li, “U ga gue gbaghie-a. Lina ke ngeli khi u ya mhu e agbo ona agbo agbo.”*†

29 Eri oni osese Ishi eyi iMosisi ona o nono ni loli rokhase khi loli lese enana nya. O mhila ijesu, “Oghuo o fe khi onuzava oyemhe?”

30 Ijesu o lina so oli o, “Omose oghuo o ke rote eoli iJerusalemu tiemhi eoli iJeriko. Igho o de ya pfilo ighiat o abo. E gbe oli banoa, e kese ukuku ayemhe shi oli o, e mie oli emini o mhu e nya.

31 A bhale ya e khi okpodalougamhi oyi Eshinegba o rote oni ode e dose. Abi o ro me oni omose ni ighiat o e gbe egho, o da je ukiekie ode ni o kpole ya dose vu.

32 Igho oni o la Owa oyi Eshinegba gbe akanya oghuo, eni a lu iLivaiti, o ramhi agho, o me oli, o li rote ukiekie ode ni o kpole ya dose.

33 Omose ongi iSameria oghuo ni o le asha, o ramhi ashini oni omose o la. O me oli, elemhi oli e lala li.

† 10:19 Li ze iwolo 91.13 ‡ 10:22 Li ze iJon 3.35; 10.15 § 10:27 Li ze iLev 19.18;

iDeut 6.5 * 10:28 Li ze iLev 18.5 † 10:28 Li ze iMat 22.35-40; iMak 12.28-34

34 Ọ lẹ deba li, ọ ku oili ali onyọ shi ọli ikpe ni ọ kuali utse. Ọ ri ide gẹnọ li ewẹ. Ọ tsua li nga akphẹrẹ ọyọli, ọ tsua li bhale owa ni a ku ẹ shi, ọọ gueyẹ wẹ e ri ẹloẹ khu ọli.‡

35 Ogbeakọlọ ọ ri ifata ogbẹlẹ eva na ọni ọ mhue oni ashini a ku ẹ shi. Ọ ọli, ‘Kpekpe ri ẹloẹ khu ọmọse ọna. Ingmẹ ni o ke ya gbe nya, ini mhia jele mhi ya fali ẹ wẹ.’

36 “Oghuo ọ elemhi ẹgbọ aase ena u sa khi ọ khi ọmuzava ọyi ọni ọmọse ọna ni ighiatọ e gbe?”

37 Ọni ọsẹshẹ ushi ọọ li, “Ọni ọ mhue ilelemhi na li.”

Ighọ iJesu ọọ li, “Li lighọ ke ngeli.”

IJesu ọ je apfẹ oyi iMata ali iMeli

38 Abi iJesu ali eniye odukhokho eyọli e li lẹ, e bhale ẹoli oyi ọkpotso ni a lu iMata. Ọni iMata ọ mie ọli shi owa.

39 Ọni iMata ọ mhue inyoghuo ọkpotso ni a lu iMeli ni ọ shitọ kpẹshẹ iJesu ri esọ shi emini ọ sẹshẹ. §

40 Abi a li ya mu iJesu epfese, o zu iMata alo, ọa mẹ asha ri esọ shi emini iJesu ọ sẹshẹ. Ighọ ọ bhale deba iJesu, ọọ li, “Wa mẹ khi inyoghuo-mhẹ ọ zobe ikanya nya na mhẹmhẹ-ghuo a gbe? Wẹ ọ bhale ya kpaghie mhẹ obọ.”

41 Ọnọmhuẹ ọọ li, “iMata, iMata, u ma kphakpha egbe ke nase egbe ẹ shi itobọ emhi ebubu.

42 Ama emhi oghuo o mema mu egbe. iMeli ọ she

zẹ oni o tine ni o laọ, ọgbọ ọa ya mie ọli lue.”

11

IJesu ọ sẹshẹ abi a liẹ sọ iromhi

(iMat 6.9-13; 7.7-11)

1 Ogbẹlẹghuo, iJesu ọ la asheghuo o sọ iromhi, Abi ọ rọ sọ se, ọmọ odukhokho ọyọli ọghuo, ọọ li, “Ọnọmhuẹ, sẹshẹ anye abi a liẹ sọ iromhi abi iJoni ọ li sẹshẹ eniye odukhokho eyọli.”

2 IJesu ọọ wẹ, “U kha sọ iromhi, ke liẹ:

“Ita anye ni ọ la iloghie, anye ri ufumhi

na eva oye no pfuase, Zẹ ni eghiele oye ọ bhale.

Zẹ ni a rieleş

ọghuẹmhẹ oye eke agbọ abi o li shi obini iloghie.

3 Ri eminale ona ogbe-namo na anye le.

4 Gbe olamhẹ kua na anye, abi anye li ẹ gbe kua na ẹgbọ ni e lamhẹ shi anye ọ.

Khi zẹ ni anye de pfilo imufẹ, ama tsumhi anye obọ oyi ọkphaghie.’ ”

5 IJesu ọọ wẹ, “Ini o khia khi ọngẹ ẹ ọ mhue ọmọle ni ọ rọ lẹ deba ọmọle ọli itsotso ogbie, ni ọ rẹ ọli, ‘Ọmuẹ kpekpe ngmomhi irui ibuledi esẹ na mhẹ,

6 Irari khi ọmọle mhẹ ni ọ la asha ọ bhale ya kushi na mhẹ, ama mhia mhue emini mhi ya rọ feli ọli epfese.’

7 “Ini ọni ọmọle ọ, ọ rọte elemhi owa liẹ ọli, ‘Khi ke nase mhẹ ghue irari khi mhi

‡ 10:34 Li zẹ 2 Okhẹ 28.15 § 10:39 Li zẹ iJon 11.1

she pfi okpe ode, mhemhe ali imimhe anye she yeshi, mhia ke ya dobe vule ya rue emhi okhoghuo ne.

⁸ Mhi gweye e khi ini omole oli o tseku ri itobo khi wewe e khi omole vule ya rue emini oo mhila li na li, ama itobo khi o mema kie le e mhila li tse, o mema ya vule ya rue emiemi ni o nono na li.

⁹ “Mhi gue e ye e: Mhila khi a ya ro ne, nono khi u ya me, kpheli obo ode khi a ya khueghie-a ne.

¹⁰ Irari khi oni o mhila loli a ro o na, oni o nono loli oo me, oni o kpheli obo ode loli a khueghie-a a na.

¹¹ “Ee ni a khi ita, oghuo elemhi e omioli o ya mhila li afele ni o ya rue enye na li, ocho ni o kha ro ri afele na li?”

¹² O ke khia khi ini o mhila li ekeli, ni u ya rue okpi na li?

¹³ Ini ee ni a khi egbo ebe a lese abi a lie ri egbegbi emhi somhi imie opfa, se Ita e ni o la iloghie o ke li ya ri Ayemhe-no-pfuase na eni e mhila li?”

Ijesu ali Okphaghi

(iMat 12.22-30; iMak 3.20-27)

¹⁴ Ele oghuo khi ijesu o khu ayemhe okphaghi ungmenu fie, o khu oni ayemhe fie lase, oni ungmenu oo ngme. Oni ingme o ri abo sha egbo ni e la agho.

¹⁵ Ama egbo eghuo e, “Ekpabo ebe oyi iBezeb ni o khi oghie oyi iyemhe ebe, o ro a khu iyemhe ebe fie lase.”*

¹⁶ Eghuo o, e mu oli fe bino, e oli o riele onyaloa ni o ri wewe ya mie shi oli o khi Eshinegba o mie shi oli o.†

¹⁷ Ama ijesu o she lese us-amhi oyewe, o, “Eghiele ni o da kemhi egboli o ya de, omhue-apfe ni o da kemhi egboli o ya de.

¹⁸ Ini Okphaghi o kemhi egboli, se eghiele oyoli o li ya migha? Eri mhi a ngme ona itobo khi e khi ekpabo oyi iBezeb mhi ro o khu iyemhe okphaghi kua.

¹⁹ Mena ini mhi ri ekpabo eyi iBezeb o khu iyemhe okphaghi kua, ekpabo onoghuo eniye eyi ee e ro a khu we kua? Eniye eyi ee e ya gue e ez o itobo ungmehi ni a ngme ena.

²⁰ Ama ini o khia khi ekpabo oyi Eshinegba mhi ro e khu iyemhe okphaghi kua, ogho o rokhase khi Eghiele oyi Eshinegba o she bhale e iteva.

²¹ “Omose ni o mhue ekpabo o kha ri itsua okholi gban o egbe egbegbo ni o roo khe owa oyoli ekhe, itsua eyoli e ya mhue akhukhu.

²² Ama omose ni o toto dose oli o kha tsua okholi mu oli ni o ro ne oli abo, eri oo miono oli itsua okhue nya ni o regbenga. O tsua oli epfue ni o mhue shi oni owa vu ya kemhi.

²³ “Oni o da ku ma mhe o ne, obe mhe o khi. Ogho ni o da da mu ma mhe o ti egbo gbili ne, eri oo vese egbo kua.‡

* 11:15 Li ze iMat 9.34; 10.25 † 11:16 Li ze iMat 12.38; 16.1; iMak 8.11 ‡ 11:23 Li ze iMak 9.40

*Abi ayemhe o lię kia
(iMat 12.43-45)*

24 “Ini ayemhe ọkphaghię ọ rọte ọgbọ egbe ya fię, eri ọ kpẹ a kia je ifu ọdagbe ifufu ni amẹ ẹa la ya nono ashini ọ kpẹ je ya yemhe-a, ama ini ọa mẹ asha, ọ egbeluę, ‘Mhi gbo lo a je owa ni mhi kpẹ te vu.’

25 Ini ọ bhale ọ ni ọ rọ bhale ya ẹ khi, a ga fuomhi oni owa muęę, emhikpa o ga guę la ayọli kuete.

26 Ighọ, ọ vu ya wolo iyemhe oshilua elese ni e khọlọ dọsẹ lọli, e bhale ya la ọni ọmọsẹ egbe, ikpukhokho oyi ọni ọmọsẹ o ke khọlọ dọsẹ abi ọ kpẹ li.”

27 Abi iJesu ọ li ngme oni ungmehi ona, ọkpotso ọghuo ọ rọte oni elemhi ebubu ẹgbọ tsẹsẹ leghe ọọ, “Ọni a khi vọsẹ na ọkpotso ni ọ bia ẹ, ni ọ kuęlẹ, ọ khi.”

28 IJesu ọọ li, “Egbọ ni e suọ ungmehi oyi Eshinẹgba ni e rọ ọli gbe akanya, wẹwe e mema mhue ikhivọsẹ nẹ.”

*Ọlẹlẹ oyi ijona
(iMat 12.38-42)*

29 Abi eni ẹgbọ e ke li bua shi ọ, iJesu ọọ, “Egbọ ebe, ẹgbọ agbhotu onana e khi. Ẹ mhila ọlẹlẹ ọnyaloa, ama aa ya mẹ ọnyaloa okhọghuo, sẹ ni ọlẹlẹ oyi ijona ọmekẹguele. §

30 Abi ijona ọ khi ọlẹlẹ na ẹgbọ iNinevẹ, ighọ Omi ọgbọ ọ gbo li ya khi ọlẹlẹ na ẹgbọ ena agbhotu ona.*

31 Oghie-ọkpotso ọyi eke iShẹba ọ ya shitọ ukpẹkhomhi ẹzọ ya gue agbhotu ona ẹzọ, ọ pfa ẹzọ mu wẹ, irari khi ọ ke rọte eke ọdonuę bhale ya ri esọ suọ ungmehi ẹgbhali oyi oghie iSolomoni, ama ọgbọ ni ọ fu dọsẹ iSolomoni ọ la akana.†

32 Egbọ iNinevẹ e ya mu ẹzọ vule shi agbhotu ona ọ, e pfa ẹzọ mu wẹ irari khi e mu pfi abi ijona ọ rọ ya ri ungmehi oyi Eshinẹgba tse abọ yẹ wẹ, memena ọgbọ ni ọ fu dọsẹ ijona ọ la akana.‡

*Egbegbi ákpá
(iMat 5.15; 6.22,23)*

33 “Aa mẹ ọgbọ ni ọ ya ri ákpá ru ni ọ ya ri ọli sheli, eri ọ ri ochoghọ ya rue ọli nga ashini o yagha, ni a bhale ya ẹ khi ẹgbọ ni ẹẹ lole ẹ mẹ eke. §

34 Ikpamhalo eyẹ e khi ákpá oyi idiegbe oyẹ. Ini ikpamhalo eyẹ ẹẹ mẹ eke egbegbọ, idiegbe oyẹ nya o khili ákpá. Ama ini u tase alo-a, idiegbe oyẹ nya o khili alo ebili.

35 Itobọ ona khi zẹ ni ákpá oyẹ o khi alo ebili.

36 Ini idiegbe oyẹ e khili ákpá ni obili ọa rọ la ashikhọghuo ọ, eri o ya ke ge nyanyanya abinẹ khi ákpá o nga ọgbọ egbe.”

*Epfua esesa
(iMat 23.1-36; iMak 12.38-40)*

37 Abi iJesu ọ rọ ngme se, iFarisi ọghuo ọ lu ọli ọ bhale ya

§ 11:29 Li zẹ iMat 16.4; iMak 8.12 * 11:30 Li zẹ ijona 3.4 † 11:31 Li zẹ 1 Ighie 10.1-10; 2 Okhẹ 9.1-12 ‡ 11:32 Li zẹ ijona 3.5 § 11:33 Li zẹ iMat 5.15; iMak 4.21; iLuk 8.16

nu luẹ le eminale. O lo deba li ya shito shi oni eminale.

38 Ama abo e sha oni iFarisi abi o ro me khi iJesu o a kpe abo a neni o le emhi.

39 Igho Onomhuẹ o o li, “Wa me mena khi eẹ egbo iFarisi khi eri a kpe ukhokho uko ali itasa eye-a, ama elemhi oyee o vo emhi ituegbe ali okholo.

40 Eẹ egbo eyeghe! Oa khi Eshinegba ni o riele ukhokho o o gbolo e riele elemhi o?

41 Ama a rue emini e la elemhi uko ali utasa na egbo ni ea mhuẹ, eghẹghẹ agho emhikpa e ya pfuase na e.

42 “O ma a kholo eẹ egbo iFarisi egbe gba, itobo khi a guẹ ze aze-oghuo-igbe ebe akhokho, ali ebe alagho ali ebe elese ni a rote ogba e khiesẹ, emini ea lolo mu eloe. Ama igue-so-ezo ali inono onayi Eshinegba, a ri obo gbe we shi. Ena e khi emini a kha mema ke riele, ma eni a riele egho.*

43 “O ma a kholo eẹ egbo iFarisi egbe gba, irari khi ukpekhomhi ni o yagha a nono elemhi owa ugamhi ali otse ekpe elemhi oki.

44 “O ma a kholo e egbe irari khi eri a li abi uji oyi egbo ni ogbo o a shi olele shi ni egbo e lighi e dose, ni ea lese.”

45 Osese ushi oghuo o soli o, oo, “Osese, ini u wa ngme enana, eri u li ri anye ma o me bie.”

46 IJesu o soli o, oo, “O ma a kholo eẹ ni a sese Ishi eyi iMosisi egbe, irari khi eri a so

itsua ni egbo ea dobe ya tsua na we tsua, ama ee aa lama ya tsua ugegemo.

47 “O ma a kholo e egbe irari khi ee a manọ iji na emekeguele ni itita e e gbolo-a.

48 Eri a pfi otsele shi o, a gbo mu ma emini ititae e riele irari khi wewe e gbolo emekeguele eyi Eshinegba a, ee a manọ iji na we.

49 Itobo ona, rote ileasingme oyi Eshinegba, o ro lie, ‘Mhi ya ghie emekeguele ali ighiusomhi na kee ghi we, e ya gbolo eghuo o-a, e mu okholi vule shi elese o.’

50 Itobo igho Eshinegba o ya mu ota so egbo ena agbhotu ona, shi oia eyi emekeguele nya, rote eghẹghẹ ni agbo ona o te gba eke le.

51 Rote oia eyi Ebeli ya ramhi oia eyi iZakaraya ni a gbe-a shi iteva Owa oyi Eshinegba ali atete. Igho lo! Mhi gueye e khi a ya na e osue to o.†

52 “O ma kholo eẹ ni a lese Ishi eyi iMosisi pfo egbe, irari khi a she rue okpe ni a ro e khueghie ode ileasingme sheli. Ee na, aa lama lo, egbo ni e nono ni wewe e lo, aa ze ni e me asha dose lo.”

53 Abi iJesu o ro rote agho vu, egbo iFarisi ali esese Ishi eyi iMosisi e mu okholi vule shi oli o egbegbo. E ri omhila ododa a khi oli ode.

54 Ini e ba me asha mu ungemhi mholi oli obo.

* 11:42 Li ze iL^{ev} 27.30 † 11:51 Li ze Igbae 4.8; 2 Okhe 24.20-21

12

Ijesu o tse agua shi iri-ugamhi-kualo

(iMat 10.26-27)

¹ Egehēghe ana ebubu egbo agbele agbele e legba, ni o ramhi ni e ro lighi egbewe, ijesu o nu eniye odukhokho eyoli ngme, oo we. “A mu egbe e shi iri-ugamhi ku alo oyi egbo iFarisi ni o li abi ifuma ni a ro ma ibuledi e nye.”*

² Irari khi aa me emini a ro sheli ni o ya yasele, wekhi eri a me emini a khukhu ni o ya khueghie-a.

³ Ungmemhi ni u ngme eliyose a ya so oli ele oquota. Emini u nyese ogbo eso gueye elemhi owa aza, a ya so oli eko ukhomhi owa.†

Oni a ya na ulishi

(iMat 10.28-31)

⁴ Emole mhe, abi o la mhi li gue oli e ye e, a khi na ulishi egbo ni o khia khi idiegbe e lese dobe ya gbe-a, ini e gbe idiegbe-a, ea ke mhue emhi oles ni e ke dobe ya li.

⁵ Ama mhi ya gueye e oni a ya na ulishi. A na ulishi Eshinegba ni o mhue itoto ni o kha gbe ogboa se, o gbo pfi oli lo ilimhi iriere. Abi o li mhi li gue oli e ye e, a na ulishi oyoli.

⁶ Oa khi ikobo eva a ri ipfeli isuesue oshe e de? Ama abi o rie khi igho, Eshinegba oa yele ongewe okhoghuo a. ⁷ Egbegbo lo khi, Eshinegba o she leli itsu ni e la e ukhomhi nya. Itobo

igho a khi ze ni ulishi o mu e, irari khi a mu eloe dose ipfeli isuesue ebubu.

Eni e migha na ijesu ali eni e kie oli

(iMat 10.32,33; 12.32; 10.19,20)

⁸ Abi o li mhi li gue oli e ye e khi, oni o da lama gue ingme oyemhe ye egbo ne, Omi ogbo o li ya gue ingme oyoli ye igeni eyi Eshinegba.

⁹ Ama oni o da kie mhe ukpeloe egbo, mhi ya li kie oli ukpeloe igeni eyi Eshinegba.

¹⁰ Ogbo ni o da ze emuebe na Omi ogbo ne, a ya gbekua na li. Ama ogbo ni o da pfi unu-a deba Ayemhe-no-pfuase, ogbo a ya gbekua na li.‡

¹¹ Ini a rue e bhale owa ugamhi oyi egbo iJu ali egbo eni ee mhes e ali enighie, a khi ze ni a yele abi a ya ngme, ali abi a li ya pfa egbe e shi eke.

¹² Irari khi Ayemhe-no-pfuase o ya sese e abi a ya ngme oni egehēghe.§

Okhe irokhokho oyi oyeghe

¹³ Ogbo oghuo elemhi eni ebubu egbo o lu ijesu, oo li, “Osese kpekpe gueye inyoghuo-mhe ni o kemhi ugu na mhe.”

¹⁴ Ijesu o so oli o, oo, “Oghuo o zemhe shi oni o re e a gue ezo ali oni oo kemhi ugu na egbo?”

¹⁵ Igho o gueye we nya, “A mu egbe e shi emhi ituegbe, irari khi agbo oyi ogbo oa migha nga ukhomhi epfue ni o mhue.”

* 12:1 Li ze iMat 16.6; iMak 8.15 † 12:3 Li ze iMak 4.22; iLuk 8.17 ‡ 12:10 Li ze iMat 12.32; iMak 3.29 § 12:12 Li ze iMat 10.19-20; iMak 13.11; iLuk 21.14-15

16 Ọ zẹ okhẹ irọkhọkhọ ona khasẹ wẹ, ọọ wẹ, “Ekẹ oyi ọmọse ni ọ pfue ọghuo, o lolo ti emhi na li.

17 Oni ọmọse ọ shitọ sa, Ọọ, ‘Sẹ mhi li ya kia eghọ? Mhi a mẹ asha ke ri emhi ya shi aka oyemhẹ.’

18 “Ighọ ọọ, ‘Emini mhi ya riẹlẹ na. Mhi ya guoghọ aka oyemhẹ-a, mhi ya tọ aka onofunẹ olese ni mhi rọ sọ iakpa ali itsua elese shi.

19 Eghẹghẹ aghọ mhiẹ egbemhẹ, Ọmuẹ u zẹ ukhomhi onete gba e! Irari khi u mhue ẹpfue ni e bububu, ni e ya tsua-ẹ ramhi ikpe ebubu. Ka yemhẹ-a, ke le, ke da. Wa li agbọ abi o ghọle ẹ.’ ”

20 “Ama Eshinẹgba ọọ li, ‘Yeyẹ oyeghẹ! U ya ghu-a amiọsẹ; mena ọghuo ọ ke ya mhọli eni ugu ni u she ti ma na egbe ẹ?’

21 “Ighọ o ya li ọgbọkpa egbe ni ọ da ti ẹpfue ma na egbọli, ni ọa mhue ẹpfue oyi emini o mu Eshinẹgba ẹloẹ.”

*A khi ke sa usamhi agbọ
(iMat 6.25-34)*

22 Ighọ iJesu ọ gueyẹ eniye odukhokho eyọli, ọọ wẹ, “Irarighọ, a khi zẹ ni usamhi emini a ya le ali usamhi emini a ya da, o nasẹ ẹ, wẹkhi usamhi idiegbe oyẹ emini u wa sọ.

23 Agbọ oyẹ o mu egbe dọsẹ eminale, idiegbe oyẹ o gbo mu egbe dọsẹ ode ni a sọ ẹ shi ọ.

24 A bino ipfeli na ukhomhi idane, ẹa rọ kọ wẹkhi eri ẹẹ khiesẹ, ẹa mhue ashini e tsua

eminale a shi wẹkhi eri e mhue aka, ama eri Eshinẹgba ọ rọ na wẹ a le. A mu ẹloẹ dọsẹ wẹ!

25 Ongeẹ ọnọghuo ọ ya dobe ri irari inyama-egbe oyọli khi ogbẹlẹ oghuo ma agbọ oyọli?

26 Aborọkhia khi u wa ya dobe riẹlẹ ukuku emhi onana, elọ o zẹ ni u rọ a nasẹ egbe ẹ shi emini e kpọle?

27 “Sa ọ bino abi ebuli idodo e li ẹ fu. Ẹa ya gbe akanya wẹkhi eri ẹẹ do ide. Ama mhi gue a yẹ ẹ khi egbegbi iSolomoni ni ọ tseku lighọ mhue itsua ni e somhi otse, ọa khue akhue nabi ebuli okhoghuo o khue.*

28 Ẹẹ ni a mhue ukuku irudunga, ini o khia khi ighọ Eshinẹgba ọ ri ide ku ebuli egbe, ni e kha laọ amo, akọ a tosẹ wẹ-a, sẹ u ke liẹ sa khi ọa ya li ri egbegbi itsua sọ ẹ?

29 “Irarighọ, a khi ke sa emini a ya le ali emini a ya sọ; a khi zẹ ni o nasẹ ẹ udu.

30 Irari khi ẹgbọ ena agbọ ona nya, wẹwẹ e na khu emhi enana, ama Ita ẹ ni ọ la iloghie ọ lesẹ khi e to ẹ.

31 Ochoghọ emi emini u wa riẹlẹ nya, zẹ ni Eghiele oyi Eshinẹgba o khi onodode, emhi elese ni u wa nono nya, ọ ya rẹwẹ ma ọ nẹ.

*Ẹpfue na obini iloghie
(iMat 6.19-21)*

32 “A khi zẹ ni ulishi o mu ẹ, ẹẹ ikuku isumha, irari khi ọghuemhẹ oyi Ita ẹ o khi ni ọ rọ ri oni eghiele na ẹ.

* 12:27 Li zẹ 1 Ighie 10.4-7; 2 Okhẹ 9.3-6

33 A ri emhikpa ni a mhue de, a kemhi eni ikpagho na eni ɛa mhue. A ze ni a mhue ɛkue ukpagho ni ɔa ya khakha, ali ni a gbo mhue ɛpfue shi iloghie ni ɔa ya pfo wekhi oghiatɔ ɔ me asha a ti bhale ɔ, wekhi ifu e me asha a towe,

34 Irari khi ashini ɛpfue oye o la, agho udu oye ɔɔ la.

A mu egbe shi eke khe ibhale oyi Onomhue

35 “A mu egbe shi ugamhi, a ze ni ikpa eye e e ke ge.†

36 Abi eni ɛ ga ɔgbɔ e migha khe ijale oyi oni ɔ mhue we ni ɔ ye ukue ni a ro a rue ɔkpotsɔ, ini ɔɔ bhale ni ɔ ro kpheli obɔ ode, e nyanya khueghie ode a na li aghoaghɔ.‡

37 O ma ti eni ɛ ga ɔgbɔ eghɔ egbe ini oni ɔ mhue we ɔ bhale ya ɛ khi e mu egbe migha khe lue. Abi o la mhi gue a ye ɛ khi, ɔ ya mu egbe akanya, ɔ lu we, ɔ nu we shito, ɔ ri eminale na we le.

38 Oghelɔ o ya khi na eni eni ɛɛ ga eghɔ ini oni ɔ mhue we ɔ bhale ya ɛ khi e mu egbe shi eke ini o tseku khi itsotso ogbie, o ke khi ini ogbe o ya gbe ɔ ro bhale.

39 A lesɛ ona khi ini oni ɔ mhue apfe ɔ lesɛ eghɛghɛ ni oghiatɔ ɔ ro ɔ bhale ɔli owa ya do lo, ɔa kha ze ni ɔ lo ɔli owa ya do.

40 Eɛ oyeɛ a ke mu egbe, irari khi Omi ɔgbɔ ɔ doɔe ya bhale eghɛghɛ ni aa sa shi.”§

Oni ɔ gue ɛɛ ga ali oni ɔa gue ɛɛ ga

(iMat 24.45-51)

41 IPita ɔ mhila li, ɔɔ, “Onomhue anye u kpe ekpita ona ye abi ɔgbɔkpa?”

42 Onomhue ɔɔ li, “Oghuo ɔ fe khi oni ɔreloekhu, ni ɔ mhɔli ilɛsingme, ni ɔɔ gbe akanya te ode igɛsikia, ni ɔga ɔyɔli ɔ ri apfe nga obɔ, ni ɔ gueye ɔli ɔ ri eminale na eni ɛ ga li ke le shi eghɛghɛ?”

43 Ikhivɔsɛ o khi na oni ɔ ga ɔgbɔ ɔghɔ, ini ɔga ɔyɔli ɔ bhale ya ɛ ɔli shi igue-rieɛ.

44 Mhi gue a ye ɛ khi eri ɔ ya ri emini ɔ mhue nya nga ɔli obɔ.

45 Ama ini oni ɔɔ ga ɔgbɔ ɔghɔ ɔ la udu ɔyɔli lie, ‘Oga ɔyemhe ɔ she tɛsɛ ɛ doɔe,’ ni ɔ ro gbe eni ɛɛ ga eni ikpotsɔ ali eni emɔse ni a ro shi ɔli obɔ, ɔɔ le, ɔɔ da, onyɔ ɔɔ gbe ɔli.

46 Eri oni ɔga ɔyɔli ɔ ya bhale ɛɛ ni ɔa sa shi ni ɔa ri ɛloe shi eke ɛ khe ɔli, ikhi eghɛghɛ ni ɔa sa shi. Oni ɔga ɔyɔli ɔ gbe ɔli, ɔ kuale ɔli utse, ɔ ghie ɔli abɔ pfilo deba ɛgbɔ umha-suesɔ.

47 “Ama oni ɔɔ ga ɔgbɔ ɔghɔ, ni ɔ lesɛ ɔghuemhe oyi ɔga ɔyɔli, ni ɔa mu egbe ni ɔ ro rieɛ ɔghuemhe ɔyɔli, a ya gbe ɔli itali, a nali osoli egbegbɔ.

48 Ama oni ɔ ga ɔgbɔ ni ɔa lesɛ ɔghuemhe oyi ɔga ɔyɔli ni ɔɔ rieɛ emini o ye ni a gbe ɔli shi, a ya gbe ɔli ukukuɔ. Irari khi oni a ri emini e bu na, emini e bu a ya mhila li. Oni

† 12:35 Li ze iMat 25.1-13 ‡ 12:36 Li ze iMak 13.34-36 § 12:40 Li ze iMat 24.43-44

a ri emini e lolo bu nga obọ, emini e lolo bu a ya mhila li.

Ijesu ọa ri opfomhẹ bhale ama okemhi
(iMat 10.34-36)

49 “Erali mhi bhale ya pfi shi ekẹ agbọ ona. Abi a khẹ khi e she a lala.

50 Mhi mhue ibatizi ni mhi ya mie shi egbe. Egbe ẹa ke sheshe mhẹ ne ini mhia li mie ọli se.*

51 Eri a dabi khi opfomhẹ mhi rọ bhale ekẹ agbọ? Ilye! Okemhi mhi rọ bhale.

52 Rọte memena vu, ẹgbọ oshe ni e la omhue-apfẹ oghuo e ya kemhi egbe. Aasẹ ọ e mu okhọli vule shi aava ọ, aava ọ e mu okhọli vule shi aasẹ ọ.

53 Ita ali omiọli ọnọmọse e ya mu okhue vule shi egbe wẹ ọ. Inyọ ali omiọli ọnọkpotoso e mu okhue vule shi egbe wẹ ọ. Inyọdọ ali ọsami ọli, e ya mu okhue vule shi egbe wẹ ọ.”†

Ilesẹ emini ẹghẹghẹ o ngme
(iMat 16.2,3)

54 Ijesu ọ gueyẹ eni ẹgbọ nya, ọọ, “Ini a da mẹ khi otughunu o gbe shi obini ovọ o te ẹ tiemhi eko ne, aghọaghọ a liẹ khi amẹ o ya ruẹ, amẹ o ruẹ esheshighọ.

55 Ini akpekpeli o rọte ukiẹkiẹ ọgobọ ini a sọ alo ghue obini ovọ o te ẹ lo eko ẹ li ne, ẹ khi ogbe o ya nye amo, esheshighọ o lighọ.

56 Ẹẹ erugamhi-ku-alo, a lesẹ abi a liẹ bino abi ekẹ ali ukhui o ngme, a guele abi ogbe o ya li. Elo o zẹ khi

aa lesẹ abi ẹghẹghẹ o ngme memena?

Yeyẹ ali ọbe ẹ a rọ nu egbe riẹlẹ
(iMat 5.25-26)

57 “Elo o zẹ khi a gueyẹ egbe ẹ emini o te ode ni a ke riẹlẹ ọli?”

58 Abi yeyẹ ali ọni ọ luẹ ẹzọ a liẹ ke lẹ ikọtu, rọshẹka ni a rọ riẹlẹ neni a ramhi ikọtu. Ini ọa khi ighọ, eri ọ ya ti ẹ bhale ufuegẹ oyi ọsọ-ẹzọ, ọni ọsọ-ẹzọ ọ muẹ ghi ọni ọ omhẹsẹ, ọni ọ mhẹsẹ eghọ muẹ ya pfilo owa ighumha.

59 Mhi gueyẹ ẹ khi u wa ya tigbe lase aghọ le, ini u wa li falı oko ni a ya fiẹ pfo nya.”

13

Ini ẹẹ aa li mupfi eri a li ya pfua

1 Ẹghẹghẹ aghọ, ẹgbọ eghuo ni e la aghọ e gueyẹ ijesu abi oghie iPaleti ọ ku ọlia eyi ẹgbọ iGalili eghuo ni ọ gbolo-a ma ọlia eyi elamhako ni a rọ luasẹ obo.

2 Ijesu ọọ wẹ, “Eri a dabi khi olamhẹ eyi eni ẹgbọ iGalili eghọ e dọsẹ olamhẹ eyi ẹgbọ iGalili ni e kpọle, ni o zẹ khi e ghọ na wẹ osue?”

3 Ilye! Aa khi ighọ, ini ẹẹ aa li mupfi, ighọ ẹẹ a ya li pfua.

4 Abi khi eri a dabi khi ẹgbọ ogbalale ni owa atonga ni o la ekẹ iSiloamu o de mu gbolo-a eghọ, khi olamhẹ eyẹwẹ e khọlọ dọsẹ eyi ẹgbọ ni e kpọle ni e la iJerusalemu?

* 12:50 Li zẹ iMak 10.38 † 12:53 Li zẹ iMika 7.6

5 Iye! Mhi gue ẹ ye ẹ khi ini ẹẹ aa li mu pfi, igho a li ya pfua.”

6 Agho iJesu o la ze okhe irokhokho oyi oara okhua-eni ni o a ya mo. Oo we, “Omose oghuo o ko okhua-eni shi ogba upfonu. O je o ya bino ini loli me udumhi o pfa, ama o a me emhikhoghuo o.

7 O gueye omose ni o ri eloe a khu oni ogba upfonu, oo li, ‘Oonokpe-ese na ni mhi te ẹ kiasẹ oni oara ona ini mhi me udumhi o, mhia me okhoghuo. Ka khi oli-a, elo o ze ni o ro le eke shi afue?’

8 “Oni omose o lema oni o mhuẹ oni ogba ipfonu, oo li, ‘Oga kpekpe ze oli obọ ukpe ona bino ni mhi gua gasẹ udi oli, ni mhi ku ifatalaza shi o bino.

9 O kha mo idumhi ishukpe, o ti, ama ini o a ke mo, u khi oli-a.’”

Ijesu o ri okpotso ni o guogho-a ze ele iyemhea.

10 Ele iyemhea, iJesu o la owa ugamhi u sese egbo.

11 Okpotso oghuo o la agho ni o khia khi o gbe ikpe igbelele ni ayemhe okphaghiẹ o te mu oli gon-o-a. Eri o ke nyese, o a ke dobe ẹ vule migha.

12 Abi iJesu o ro me oli, o lu oli lasese, oo li, “Kpotso, ughuamhi oye o she pfo.”

13 O ri abo nga oli egbe, aghoagho oni okpotso o vule migha, o kuẹghie Eshinegba.

14 Elemhi e bi oni o mhese shi oni owa ugamhi khi iJesu o ri oni okpotso ze ele iyemhea.

Oni omose oo egbo ni e le gba, “Ogbele esesa e la efo uka ni awa ro o gbe ikanya, a ke bhale eni ogbele esesa egho ni a la o re ẹ ke ze, ama a khi ke bhale ele iyemhea.”*

15 Onomhue o so li o, oo, “Eẹ egbo eri ugamhi ku alo, o a khi eri a taghiẹ ichi ali ikphere eye-a shi ashini a gono we shi, a rue we je okẹ ya da amẹ ele iyemhea?”

16 Elo o ke ze ni okpotso ona ni o li khi omiomi Aburaamu ni okphaghiẹ o she gono ikpe igbelele, ni aa ro li ya taghiẹ oli-a ele iyemhea?

17 Abi iJesu o ro ngme ona se, omama o mu egbo ni e mu okhọli vule shi oli o, ama ikanya onyaloa nya ni o gbe o ri egbe e mu eni egbo.

Okhe irokhokho oyi ukpamhi oara iMositadi (iMat 13.31-32; iMak 4.30-32)

18 Ijesu o mhila we, oo, “Se Eghiele oyi Eshinegba o fe li? Elo mhi fe ya ri oli khokho?”

19 Eri o li abi ukpamhi oara iMositadi ni ogbo o rue ya ko ogba. Oo fu, o mele ukpokpomhi oara ni ipfeli e ku eko shi iguabo eyoli a.”

Okhe irokhokho oyi ifuma (iMat 13.33)

20 O gbo ro mhila we, “Elo mhi fe ya ri Eghiele oyi Eshinegba khokho?”

21 Eri o li abi ifuma ni okpotso o ro ma italabi ifulawa ese wushe ni o fuma shio.”

* 13:14 Li ze Okiali 20.9-10; iDeut 5.13-14

*Ode na pfi**(iMat 7.13,14,21-23)*

22 Eghẹghẹ agho, iJesu o kikiakia eoli khi eoli, o sese egho abi o li je iJerusalemu.

23 Ogho oghuo o mhila li, oo, "Onomhue, ikuku egho tse Eshinegba o ya mie pfuese?"

Ijesu oo we,

24 "A roshẹka ni a rote unuode na pfi lo. Mhi gue a ye e khi ebubu egho e ya roshẹka ni wewe e lo, ama, ẹa ya dobe.

25 Itobo khi ini oni o mhue owa o da vule ya pfi okpe ode ne, eri a mema migha olase ke kpheli ode shi afue, a lema, a lie, 'Oga kpekpe khueghie ode a na anye.'

"Ama o so we o, oo, 'Mhi aa lese e wekhi eri mhi lese obini a te bhale.'

26 "Eghẹghẹ agho, a ya lie, 'Anye nu e le, anye nu e da, u gbo la ifu apfe eyi anye e sese.'

27 "Ama o ya gbo lie, 'Mhia lese obini a te bhale. Ee nya a vu mhe ana lasese, ee egho okholo.†

28 Agho egho e la ke vie, ee gbe ako ako, ini a me Aburaamu ali Aziki ali iGiekopu ali emekeguele obini Eghiele oyi Eshinegba ama a khu e ya lase.

29 Eghẹghẹ agho egho e ya rote obini ovo o te e ngale ali obini ovo o te e lo eko, ali ukiekie obita ali ukiekie ogobo ini a so alo ghue obini ovo o te e lo eko bhale, e ya shito shi ukue na Eghiele oyi Eshinegba.‡

30 A bino khi a ya me egho eghuo ni e kpe kpe ukhokho e ya kpe odalo, egho ni e kpe kpe odalo e ya ke kpe ukhokho."§

Ingme oyi iJerusalemu o to iJesu egbe

(iMat 23.37-39)

31 Eghẹghẹ agho egho iFarisi eghuo e bhale deba iJesu, e oli, "Vu ana lasese irari khi oghie Erodu o nono ni loli gbe-a."

32 Ijesu oo we, "A ka gueye oni anyako ogho, 'Khi mhi ya khu ayemhe okphaghie egho egbe lasese ali mhi gbo ri egho ya ze amo ali ako, ama akopfua mhi ya gbe akanya oyemhe pfo.'

33 Abibi o rie li, mhi mema ya ti okiali ke je odalo, amo ali ako ali akopfua, irari khi omekeguele okhoghuo o a khi oni o me asha a ghu shi eoli oboese se ni iJerusalemu.

34 "Eekhue-oo! iJerusalemu, iJerusalemu. Ee ni a gbolo emekeguele-a, ni a gbolo e tono eni a ghie ghi e eche, iti-ingme o ghole mhe ni mhi kono imie kugbe, abi okhokho o lie kono imi oli shi ifu ipfua, ama o a ghole e!

35 A bino khi apfe oye e khi ikpukpu igbe e ke khi. Khi ogho o a ke la o, mhi gue a ye e khi aa ke ya me mhe, se ini oni eghẹghẹ o ramhi ni a ke ro a lie, 'Eshinegba o khi vose na oni o ri eva oyi Onomhue obhale.' **

† 13:27 Li ze Iwolo 6.8 ‡ 13:29 Li ze iMat 8.11-12; 22.13; 25.30 § 13:30 Li ze iMat 19.30; 20.16; iMak 10.31 * 13:35 Li ze Iwolo 118.26; ijere 22.5

14

Ijesu o gbo ri ogbo ze ele iyemhea

¹ Ogbelęghuo ele iyemhea, ijesu o je apfe oyi okhemhue iFarisi oghuo ya le eminale, egbo e ri eloe mema shi oli egbe ni e me emini o ya li.

² Itobo khi omose oghuo o la agho ni o fumhi abo ali awe.

³ Ijesu o mhila eni iFarisi ali eni e sese Ishi eyi iMosisi, "O fe ti elemhi Ishi eyi iMosisi ni ogbo o ro ri ogbo ze ele iyemhea, abi khi o a ti?"

⁴ Ama ea pfa shi oli eke. Igho o pfi obo rue oni omose, o roli ze, o rue oli obo-a, oli o ke je.

⁵ O mhila we, oo we, "Ongęę onoghuo o ya mholi omo, o ke khi ena ni o ya de pfilo ilija ni o a ya nyanya mu oli o lasele, ini o riękhi ele iyemhea?"*

⁶ Ea me so shi oli o.

Ijesu o sese osese iregbe-tiemhi eke

⁷ Ijesu o me abi egbo eni a lu bhale oni ukue, e li ya shito ashini o mhue ekpe shi oni ukue, o ze okhe irokhokho khase we, oo we,

⁸ "Ini ogbo o lu e bhale ukue ni a la rue omueshi khi kpe tode ya shito ashini o mhue ekpe, itobo khi, otse a she li kpe lu ogbo ni o mu eloe dose li shi oni ukue.

⁹ Ini a me gho, oni o lu e shi ukue, o ya bhale deba e, oo, 'Kpekpe vule ni omose ona o shito.' Eghęghę agho u ri

omama ya shito ukpekhomhi onikeke.

¹⁰ Ama ini a lu e shi ukue, kpe ya rue ukpekhomhi onikeke shito na ro bhale ya e khi oni o lue shi oni ukue o bhale deba e, oo 'Omuę, vule je ukpekhomhi ni o yagha.' Eghęghę agho u mhue ekpe shi ukpeloe oyi ogbokpa ni o ga la oni ukue.†

¹¹ Irari khi oni o da ti egboli nga, a ya ti oli tiemhi, ama oni o da ti egboli tiemhi, a ya ti oli nga."‡

¹² Igho ijesu o gueye oni o lu oli shi oni ukue, "Ini u ya nye ekhe feli egbo, khi lese lu emole e, ali inyoghuo e, ali egbo eye ali eni e pfue tse, irari khi e li dobe e ghie lu e shi ekhe ni e nye elelese, ni o li abine khi e she fali e ota to o.

¹³ Ama ini u mholi ukue, luno egbo eni ea mholi ali egbo eni ea mholi awe e kia ali eni e guoghwo awe-a ali ezalo.

¹⁴ Eghęghę agho u mholi ikhivose. Itobo khi ea ya dobe fali e oru to o. U ya me eleli ogbele ite-eghuli-guale oyi egbo ni e pfuase."

Okhe irokhokho oyi ukue Ontiemhi

(iMat 22.1-10)

¹⁵ Abi omose oghuo ni e ga shito shi eni ekhe, o ro suo abi ijesu o ngme, oo li, "Oghęle o ya khi na ogbo ni o ya la ukue na Eghiele oyi Eshinegba le emhi."

¹⁶ Ijesu o so oli o, oo li, "Omose oghuo o mu egbe ni o

* 14:5 Li ze iMat 12.11 † 14:10 Li ze Ekpi 25.6-7 ‡ 14:11 Li ze iMat 23.12; iLuk 18.14

rọ ya mhuẹ ukue oniẹmhi. O lu ebubu ẹgbọ shi oni ukue.

17 Eghẹghẹ oni ukue o ramhi, ọ ghie ọni ọọ ga li ghi ẹgbọ ni ọ lu shi oni ukue, ọ ọli ọ ka gueyẹ wẹ, ọ liẹ, 'A bhale khi mhi she mu egbe se.'

18 "Ama ọgbọgbọ ọ guele emini o zẹ khi lọli a ya mẹ asha bhale. Oni odode ọọ li, 'Mhi lẹsẹ dẹ eke ishemhi, mhi ya lẹ ya bino ọli. Kpẹkpẹ khi wola.'

19 "Olese ọọ li, 'Mhi lẹsẹ dẹ ena agbhaghbamhi ishe ni a gẹ toma aava aava kugbe, ni a rọ gua ishemhi. Mhi ya lẹ ya rẹwẹ gbe akanya bino. Kpẹkpẹ khi wola.'

20 "Ighọ ọlese ọọ, 'Mhi lẹsẹ rue ọkpotso mhi aa ya mẹ asha bhale.'

21 "Ighọ ọni ọọ ga ni a ghie eghọ, ọ nyenẹ egbe ukhokho ya gueyẹ ọga ọyọli, abi eni ẹgbọ e ngme nya. Ighọ elemhi e li bi ọni ọdapfẹ. Ọọ ọni ọ ga li, 'Nyanya fiẹ je olase, ka kia ode ni e je ifu apfẹ nya, wolo ẹgbọ eni ẹa mhuẹ. Eni e ghu abọ ali awẹ-a ali ezalo ali eni ẹa dobe a kia bhale.'

22 "Ighọ ọni ọọ ga ọgbọ ọ bhale, ọọ 'Ọga mhi she ye usomhi ni u ghie mhe, ama owa ọa kie vọ ẹgbọ ne.'

23 "Ighọ ọni ọga ọ gueyẹ ọni ọọ ga ọgbọ ọghọ, ọọ, 'Je ode ali ifu apfẹ ya lu wẹ lole ni owa oyemhe o vọ.'

24 Mhi gueyẹ ẹ khi ọgbọkhoghuo ọa la ẹgbọ ni mhi ri ebe ghi ni ọ ya ri unu mu eminale ni mhi nye.' "

Emini o ya gbe ẹ, ni u rọ khi ọmọ odukhokho

(iMat 10.37,38)

25 Ebubu ẹgbọ e deba iJesu lẹ iJerusalemu, iJesu ọ nyenẹ alo gueyẹ wẹ, ọọ wẹ,

26 "Ini ọgbọ ọkhoghuo ọ da nono ni lọli bhale deba mhe ni ọa rọ da kie itali ali inyọli ali ughue ọli ali imiọli, ali inyoghuo ọli, ali agbọ ọyọli ne, ọa ya dobe khili ọmọ odukhokho oyemhe. S

27 Ọgbọ ni ọa da tsua apfida oyọli ke deba mhe ne, ọa ya dobe khi ọmọ odukhokho oyemhe.*

28 "Ongeẹ ọnoghuo ọ ya tọ owa atonga ni ọa ya kpẹ tode shito ta ingme ni o ya gbe ọli, ni ọ mẹ ini lọli ya mhuẹ ikpaghọ tọ li pfo?

29 Ini ọa khi ighọ, ọ kha ri ọli gbe ni ọa ke rọ dobe tọ li pfo, eri ẹgbọkpa ni e da mẹ oni owa e ri ọni ọmọse ya ke li egia.

30 E liẹ, 'Omọse ọna ọọ tọ owa ama ọa ke dobe tọ li pfo.'

31 "Oghie ọnoghuo ọọ nono ni lọli ri okhuẹ ghie oghie ọlese ni ọa kpẹ tode ya shito sa bino ini lọli ya dobe ri ẹgbọ agbele igbe 10,000 ya nu ọni oghie ọghọ ni ọ mhuẹ ẹgbọ agbele uye 20,000 khọli?

32 Ini ọ mẹ khi lọli aa ya tẹ ọli ọ, eri ọ ya nyanya ghie ẹgbọ ghi ọni oghie abi ọa li ramhi ọli egbe ne, ọọ li zẹ ni wẹwẹ e rọ riele.

33 "Ighọ khi ọgbọ ni ọa rue emhikpa ni ọ mhuẹ obọ-a, ọa

ya doḅe khi ọmọ odukhokho ọyemḅe.

Ugbheli

(iMat 5.13; iMak 9.50)

³⁴“Ugbheli o ma ti gba, ama ini ugbheli ọa ke mhuẹ iviọlọ oyọl, sẹ a ka gbo doḅe ya ri ọl ke gbo mhuẹ iviọlọ oyi ugbheli?”

³⁵Egḅegḅe aghọ aa ke ri ọl ya riẹḅe emhi okhọghuo, wẹkhi eri a ya ku ọl shi eke ni o ri eke wọghọ, ama eri a ke ya ku ọl kua.

“Ọni ọ mhuẹ esọ ọ rọ suọ.”

15

*Okḅe irokhokho oyi os-
umha ni ọ wa-a*

(iMat 18.12-14)

¹Ighọ ebubu emionoga ali ena olamḅe e bhale ti mama iJesu ni e rọ suọ ingmemhi ni ọ ngme.

²Ama egbo iFarisi ali esesẹ Ishi eyi iMosisi ẹ, “Ọni ọmọse ọna ọ kpe abọ ẹ mie egbo olamḅe, ọ gbo nu wẹ ẹ le eminale.”*

³Ighọ iJesu ọ zẹ okḅe irokhokho khasẹ wẹ, ọ,

⁴“Ini o khia khi ọngẹ ẹ ọ mhuẹ isumha egbhueshe, ni a rọ bhale ya ẹ khi ọghuo ọ wa ọ a, sẹ ọ ya li? Aa khi eri ọ ya zẹ ọghuo ọa la egbhueshe eni e kpọle obọ shi ifu ọdagbe ifufu, ọ vu ya nono ọghuo ni ọ wa egḅo, ramhi ni ọ rọ ya mẹ ọl mu?”

⁵Ini ọ mẹ ọl, egbe ẹ mu ọl, ọ mu ọl ta ike.

⁶Ini ọ ramhi apfẹ, ọ luno emọle ọl ali idogbapfẹ eyọl, ọọ wẹ, ‘A bhale ya nu

mḅe gḅẹḅe irari khi osumha ọyemḅe ni ọ wa, mhi she mẹ ọl mu.’

⁷Mhi gueye ẹ khi ini ọgbo olamḅe ọ mu pfi, oghẹḅe o la iloghie doḅe ọgbo ọghuo ọa la egbhueshe ni e she pfuase ni ẹa ke nono imupfi.

Ukpagho ni o waa

⁸“Ini o khia khi ọkpotso ọ mḅoli ikpẹkhuli igbe, ni ọ rọ wasẹ oghuo ọ-a, sẹ ọ ya li? Ọa khi eri ọ ya ri akpá ru, ọ fuomhi owa nguẹḅe, ọ kuegbe-a nono ọl ramhi ni ọ rọ ya mẹ ọl rue?”

⁹Ini ọ mẹ ọl rue, ọ luno emọle ọl ali idogbapfẹ eyọl, ọọ wẹ, ‘A bhale ya nu mḅe gḅẹḅe irari khi ukpẹkhuli oni o wa mḅe-a, mhi she mẹ ọl rue.’

¹⁰Mhi gueye ẹ khi ighọ igeni eyi Eshinegba e liẹ gḅẹḅe ini ọgbo olamḅe ọghuo ọ mu pfi.”

Omọ oni ọ wa-a

¹¹IJesu ọ gbo zẹ okḅe irokhokho ona khasẹ wẹ, ọọ wẹ, “Omọse ọghuo ọ ya laọ ni ọ mhuẹ eniyẹ emọse aava.

¹²Onikeke ni ọ laọ, ọọ itali, ‘Itamḅe, kemhi ugu ni o ya khi oyemḅe na mḅe.’ Ighọ oni itali ọ kemhi oni ugu na wẹ.

¹³Ọa teḅe ne, oni ọmọ ọghọ ọ tsua ugu eyọl. Ọ vu je ẹoli odonuẹ oboese, ọ ya pfuse ẹpfue egḅo kua.

¹⁴Ọ pfuse ẹpfue egḅo nya kua se, ukpokpomhi okiamhi o lo oni ushishi egḅo nya le. Ọyemḅe o gbe ọl.

* 15:2 Li zẹ iLuk 5.29-30

15 Igho o le deba omose ni o khi omo eke agho. O ri egboli mele oni oo ga oni omose-a. O ghie oli je ishemhi oyoli ni o ri eminale na igulu eyoli ke le.

16 O nono ini loli me asha ke le eminale ni eni igulu e le kpole. Ama ogbokhoghuo o a bo eminale na li.

17 Abi egbhali eyoli e ro tiemhile, o mhila egboli, 'Oa khi eri ighumha eyi itamhe nya e me eminale a le, e keshi, ni mhi ro la ana ri egbe na okiamhi a gbe ya ghua!

18 Mhi nyene egbe ya je apfe deba itamhe, ni mhi ya lie oli, Ita mhi she lamhe na Eshinegba ali yeye.

19 Mhia ke te oni abi a lu omie, rue mhe abi oghumha oghuo oye.'

20 Igho o vu ya je deba itali. Ama abi o li bhale ni o kie nuata shi apfe egho, itali o me oli, o mhue ilelemhi na li. O na ya mu oli, o pfi abo gege oli uruli, o pfi oli elemhi egbe.

21 Oni omoo oo itali, 'Ite, mhi she lamhe shi Eshinegba ali yeye o, mhia ke te ni a lu omie, ke riele mhe abi eni ee ga e otuoghuo.'

22 Ama itali o luno eni ee ga li, oo, 'Okuekhoogo! A nyanya a rue egbegbi itsua ni e somhi otse nya bhale so li. A rue ukhui shi oli obo, ni a ri eku so li.

23 A mu ena ni o khobo bhale ni a gbe oli-a ni awa mhue ukue ke ghele gbii.

24 Irari khi eri omimhe ona o kpe ghu-a ama o she guale. Eri o kpe wa ama a she me oli rue.' Igho e lu ukue, e ghele

gbii.

25 Egheghe agho omioli onogbhali ni o kpe la ifui ishemhi o rote ishemhi jele. Abi o ro ti mama apfe, o suo eko ebola ali ishimhi.

26 Oni omioli ogho o lu oni oo ga oyi itali oghuo, o mhila li, o, 'Elo a me?'

27 Oni oo ga oo li, 'Inyoghuo e o jele, ni ite o ro gbe ena ni o gbedi oghuo-a. Irari khi o jele shi itoto ali oghel.'

28 Igho elemhi e bi oni inyoghuo oli onogbhali ogho, o a ke lama lo owa le. Igho itali o le deba li, o lema li o lo le.

29 Ama oo itali, 'Bino oonokpe-ingme ni mhi te la ana a ge, ni mhia a tigbe da ushi oye okhoghuo ghue, ama agboagbo wa tigbe mu elamhi okhoghuo na mhe ghue, ni emole mhe e li nu mhe ghele.

30 Ama abi omie ona ni o tsua itsua epfue eye ya pfuetcha kua na idegbe o ro jele, u ya gbe ena ni o gbedi-a na li.'

31 Itali oo li, 'Omimhe, egheghe kpa u te nu mhe la akana, emhikpa ni mhi mhue eye e khi.

32 Ama o ti ni awa ghele, irari khi eri inyoghue ona o kpe ghua, ama o she nyene egbe bhale agbo; eri o kpe wa ama a she me oli rue.' "

16

Okhe irokhokho oyi oreloekhu ona ikpamhika

1 Ijesu o ze okhe irokhokho khasa eniye odukhokho eyoli, oo we, "Omose oghuo ni o pfue o la o, o mhue

or̄eloekhu ep̄fue enayoli. A gueye ɔni ɔmɔse khi ɔni or̄eloekhu ɔ pfuse luɛ ep̄fue-a.

² Igho ɔ lu ɔli, ɔ mhila li, 'Elo ona o khi ni mhi a suɔ idiegbe oye? Rokhasɛ mhe ghue abi u li gbe akanya oye irari khi waa ke gbolo ya khi or̄eloekhu oyemhe.'

³ Igho ɔni or̄eloekhu ɔ sa ɔ, 'Se mhi li ya kia abi oga oyemhe ɔ ro ya khu mhe akanya ena? Mhi aa mhue itoto ni mhi ro dobe ya gua ishemhi. Omama omhila kia-kia ɔɔ mu mhe.

⁴ Mhi lese abi mhi ya li ini egbo e zemhe lo apfe oyewe le ini a khu mhe akanya.'

⁵ "Igho ɔ lu egbo ni e lo oga oyoli ota. O mhila ɔnodode, 'Ingme u lo oga oyemhe?'

⁶ "Oo li, 'Igalo oili olivu egbhuɛshe asha elele.' ɔni or̄eloekhu ɔɔ li, 'Mo ebe, shito khi we-a, ni u keke igalo egbhuɛshe asha ene.'

⁷ O mhila ɔnuzava, 'Ingme yeye u lo?'

"Oo li, 'Ikpulu ado agbele.'

" 'Oo li, mo ebe shito khi we-a ni u keke egbhuɛshe asha eleli.'

⁸ "ɔni oga ogho ɔ kuɛghie ɔni or̄eloekhu ɔna ikpamhika ogho, irari khi ɔ rieɛ ingme ikpamhika ni o li abi ileingme. Irari khi egbo ena agbo ona e lese abi e li ri ikpamhika nu egbe e ngeli dose abi egbo ni e khi ena akpa e li.

⁹ Mhi gue ɔli e ye e, a ri ep̄fue ni a mhue mu emole shi agbo ona ni a ro bhale ya e khi ini e pfo, a ya ze e lo iloghie.

¹⁰ "Ogbo ni a da dobe ri egbe e nga shi ukuku emhi ni a ro nga li obone, ɔ ya ze regbenga shi eminiemhi, ini a roli nga ɔli obo. ɔni ɔa da ze ri egbe e da shi ukuku emhi ne, ɔa ya ze ri egbe da shi eminiemhi.

¹¹ Ini u wa ze ni a regbenga shi ep̄fue na agbo ni a ro shi e obo, se a li ya ri egbegbi ep̄fue nge obo?

¹² Ini o khia khi u wa ze ri egbe e nga shi ep̄fue oyi ogboese, oghuo ɔ ya ri oye ne?

¹³ "Aa me ɔni ɔɔ ga ogbo ni ɔ dobe ya ke ga ega aava utoghuo. Eri ɔ ya nono ingme oyi oghuo, ɔa nono ingme oyi ɔnokpole. Oo suɔ esɔ na oghuo dose ɔnokpole. Wa dobe ya ke ga Eshinegba u gbolo e ga ukpagho."*

Osesɛ eyi iJesu eghuo

(iMat 11.12,13; 5.31,32; iMak 10.11,12)

¹⁴ Abi egbo iFarisi ni e nono ingme ukpagho dose e ro suɔ ona, e do iJesu okonyo.

¹⁵ IJesu ɔɔ we, "Eri a ngeli ukpeloe agbo ni a ro ke khasɛ khi eni angeli oyewe o migha shi ipfuase a khi, ama Eshinegba ɔ lese usamhi udu oyeɛ. Emini egbo ee bino khi oo mu eloe gba, eri ɔɔ kpasɛ Eshinegba.

¹⁶ "Eri a ri Ushi oyi iMosisi ali emini emekeguele e keke gbe akanya ramhi eghɛghɛ oyi iɔni ɔni ɔɔ batazi egbo. Rote eghɛghɛ agho vu ya ramhi memena, eri a ri ungmemhi oyi Eghiele oyi

* 16:13 Li ze iMat 6.24

Ɛshinegba a tse abo, ogbokpa o roshaka ini loli dobe lo o.†

17 O ya keḷe ni eke ali ukhuli ni e kelea, ama ukpamhi ungemhi okhoghua kpele o ya de Ishi eyi iMosisi pfi-a.‡

18 “Omose ni o da khu ughue oli pfi ni o ya rue okpotso olese ne, o she kia okia. Omose ni o da rue okpotso ni a khu ughue, o she li kia okia. §

Omose ni o pfue ali iLazarosi

19 “Omose oghuo o ya la o ni o mema pfue. O o so itsua enete ni e somhi otse ni e ghale, o li agbo nyafunyafu ogbele kpa.

20 Omose oghuo ona umhame ni a lu iLazarosi, o li ya la o. Igboko e ge oli. A tsua li bhale ode unuekpe oyi oni omose ni o gh o pfue ogho egheghe kpa.

21 Eri oni iLazarosi o shito oni ode unuekpe oyoli ini loli me eminale ni e rote oli ukhomhi itebu de kua rue le. Eri ewa e gbolo bhale ya lalo oli eni igboko.

22 “Egheghe o bhale ni oni iLazarosi o ro ghua. Igeni eyi Eshinegba e bhale ya tsua li je ashini Aburaamu o la. Omose ni o ligho pfue egho, o li ghua, a ri oli to.

23 Ilimhi iriere ni o la me osue, o yase alo idane, o me Aburaamu khi o nuata shi lue egbe, iLazarosi o shito mama li.

24 Igho o lu leghe, ‘Aburaamu ita! Kpekpe mhu e ilelemhi na mhe. Ghie iLazarosi ni o to obo ame to

mhe elemhi, itobo khi mhi la ukpokpomhi osoli elemhi ere memena.’

25 “Ama Aburaamu o o li, ‘Om o sato khi abi u ro la agbo, u she mie eminete eye, ama iLazarosi o mie emini ea ti eyoli. Mena egbe e pfomhi oli shi ana, yeye u la ukpokpomhi osoli.

26 Ini a ri obo rue ona o shi eke, rote ashini u la bhale ana ugbilimhi eke o pfa awa a. Irarigho, eni ee nono ni wewe e rote ana da je obini u la, ea ya dobe wekhi eni e la obini u la e dobe ya da bhale deba anye oola.’

27 “Oni omose o o oli, ‘kpekpe mhia lema e, ghie iLazarosi je apfe oyi itamhe,

28 irari khi mhi mhu e inyoghua emose oshe. Zobe ni o ya tse agua ye we ini e khi bhale asha osoli ona.’

29 “Aburaamu o so oli o, o o li, ‘E mhu e Ishi eyi iMosisi ali emekeguele, e ri eso shi we eke.’

30 “Oni omose o o li, ‘Iye, Aburaamu ita, ini ogho o rote eghuli guale ya tse agua ye we, e ya mu nyene.’

31 “Aburaamu o o li, ‘Ini ea ri eso shi emini Ishi eyi iMosisi ali emekeguele e ngme, ea ya ri eso shi eke ini ogho o tseku rote eghuli guale.’ ”

17

Olamhe ali igbekua

(iMat 18.6,7,21,22; iMak 9.42)

1 Ijesu o o eniye odukhokho eyoli, “Emini e ri ogho o lamhe

olamhe e mema ya bhale, ama o ma kholo oni ogbo ni o rote obo oyoli bhale egbe.

² O ti ne ini a mu eche iko zu ogbo oghoghohu uruli tsua pfilo oke oniemi, dose ni o ro ya ze ni otuoghuo ikuku eniye enana ke lamhe olamhe.

³ A mholi egbhe shi emini a rihe.*

“Ini inyoghuo e o lamhe, gue oli ye oli. Ini o mu nyene, gbekua na oli.

⁴ Ini o lamhe ne iti ishilua ogbele, ni o ro bhale ya lema e eni iti ishilua egho, ni o re, ‘Mhi mu nyene.’ U mema ya gbekua na li.”

Irudunga

⁵ Eni ighiusomhi na kee ogbava ni iJesu o ze, ee, “Onomhue, zese irudunga oyanye-a.”

⁶ Onomhue oo we, “Ini u mhue irudunga ni o she abi ukpamhi imositadi, u ya lie oara oaghie ona, ‘Oo eke-a, ni u ya gbola shi elemhi oke oniemi!’ O ya suo ne.

Akanya oyi oni o ga ogbo

⁷ “Ini ongee o fe mhue oni oo ga li ni o gua ishemhi e nali, okekhi isumha o ri eloe e khu nali. Eri o ya lie oli, ‘Nyanya bhale ya le eminale ini o rote ishemhi jele?’

⁸ Oa khi eri o ri ochoghohu ya kpe lie oli, ‘Ka nye emhi ogbomhi na mhe, u kpha li na mhe ni mhi le. Mhi kha le se, ni mhi ro da se, u tigbe ya le oye?’

⁹ O ya tse oni o ga ogbo ogho o mu ikanya irari khi o da ye usomhi ni o ghie oli?

¹⁰ Igho khi ee, ini a rihe abi a ghie e se, a ke lie, ‘Eni e ga ogbo tse anye khi, akanya khi akanya oyi anye, anye e gbe.’”

IJesu o ri emose ishoma ze

¹¹ Abi iJesu o ro je iJerusalemu, o rote iteva eoli iSameria ali eoli iGalili ii dose.

¹² Abi o li lo eoli oghuo le, emose ogbe ni efafe e mu e bhale deba li, e ta pfia migha.

¹³ E tseshe leghe, ee lie, “IJesu Onomhue, mhue ilemhi na anye!”

¹⁴ Abi iJesu o ro me we, oo we, “A ka ri egbe e khashe ekpodalo-ugamhi eyi Eshinegba.” Abi e li le egho, eni efafe e kala we egbe-a, e ze.†

¹⁵ Igho oghuo o elemhi we, abi o ro me khi loli ze, o nyene egbe ukhokho bhale, o kuaghie Eshinegba leghe.

¹⁶ O bhale ya de yeshi iJesu odalo, o tse oli uwegbe. Ongi iSameria oni omose o khi.

¹⁷ Igho iJesu o mhila we, “Oa khi egbo ogbe a ro ze? Igho otiale ni e kpole?”

¹⁸ Aa me ongewe okhoghohu ni o nyene egbe ukhokho bhale ya kuaghie Eshinegba, se ni ofese onana?”

¹⁹ IJesu o li, “Vule ke je, irudunga oye o she re ze.”

Ibhale oyi Eghiele oyi Eshinegba
(iMat 24.23-28,37-41)

* 17:3 Li ze iMat 18.15 † 17:14 Li ze iLev 14.1-32

20 IFarisi eghuo e mhila iJesu eghẹghẹ ni Eghiele oyi Eshinegba o rọ ya bhale. IJesu ọọ wẹ, “Eghiele oyi Eshinegba ọa ya bhale ni a ke me alo gbugbugbu.

21 Oa khi oni a liẹ, ‘Ghe ọli ana.’ Wẹ khi, ‘Ghe ọli aghọ.’ Irari khi Eghiele oyi Eshinegba o la iteva oye ẹ.”

22 Igho o eniye odukhokho eyoli, “Eghẹghẹ o bhale ni a ya nono ogbele oghuo oyi omi ogbo, ama a ya me ọli.

23 Egbọ e ya ke gueye ẹ, ‘Bino khi o la aghọ.’ Ali khi, ‘O la ana.’ Ama a khi na deba we.

24 Irari khi ele ni Omi Ogbo o ya bhale, eri o ya li abi erali akphala ni o nyamhise alo rote ukiẹkiẹ ukhui oghuo ya je ukiẹkiẹ ni o kpole.

25 Ama o mema kpe ya me osue egbegbo, egbo agbhotu ena e kie ọli.

26 “Abi o ke lese li eghẹghẹ oyi iNoa, igho o ya li ogbele ni Omi Ogbo o ya bhale.‡

27 Eri egbo e le, e da, e rue ikpotso, a ri ikpotso ye ughue ya ramhi ni iNoa o ro lo oko-oke oniemi. Igho amẹ ni ofunẹ o rote idane tiemhile ya pfuse we-a nya. §

28 “Igho o gbo li eghẹghẹ oyi iLoti. Egbọ e le, e da. E de, e ro de. E ko, e to apfe.

29 Ama ele ni iLoti o lase eke iSodomu le, erali ali ingamhi e rote idane ze kule ya pfuse we-a nya.*

30 Igho o ya li ele ni Omi Ogbo o ya bhale.

31 Ele ni a ngme ena, oni o la ukhomhi owa, o khi tiemhile ya wolọ itsua eyoli. Igho o khi oni o la ishemhi, o khi nyene egbe je apfe shi emhi khoghuo.†

32 A sato ingme oyi ughue iLoti!‡

33 Ogbo ni o da nono ni loli tsumhi agbo oyoli ne, o ya de ọli obo-a, ama ogbo ni rue agbo oyoli obo-a shi eke itobo oyemhe ne, o ya me ọli rue. §

34 Eliyose ni a ngme ena, emose aava e ya lese shi ukpho oghuo, a ya rue oghuo o vu, o kpe otuoghuo o le.

35 Ikpotso aava e ya ke mhele emhi kugbe, a ya rue oghuo o vu, o kpe otuoghuo o le.”

36 [Emose aava e ya la ishemhi, a ya rue otuoghuo o vu, o kpe otuoghuo o le.]

37 Eniye odukhokho eyoli e mhila li, e ọli, “Obo lo Onomhue?” IJesu ọọ wẹ, “Ashini idiegbe olimhi o la, agho ighuli eẹ legba.”

18

Okhe irokhokho oyi osamhi-olimi ali osọ-ezọ

1 IJesu o ze okhe irokhokho khasẹ eniye odukhokho eyoli, ni o ro sese we khi o ti ni a ke lema eghẹghẹ kpa, ali e khi ze ni o lose we.

2 Oo wẹ, “Elemhi ẹoli oghuo, omose osọ-ezọ o ya la o ni ọa li

‡ 17:26 Li ze Igbae 6.5-8 § 17:27 Li ze Igbae 7.6-24 * 17:29 Li ze Igbae 18.20; 19.25 † 17:31 Li ze iMat 24.17-18; iMak 13.15-16 ‡ 17:32 Li ze Igbae 19.26

§ 17:33 Li ze iMat 10.39; 16.25; iMak 8.35; iLuk 9.24; iJon 12.25

na ulishi Eshinegba wexhi eri o mu ekpe na ogbo.

³ Osamhi-olimhi o li la oni eoli ni o bhale deba oni ososozo, oo li, 'Kpekpe pfa ezona mhe shi ingme ni o de mhemhe ali ogbo.'

⁴ O ga tese oni omose oake kie pfa shi oli eke. Ama ikpukhokho o, oni omose oo egbeoli, 'Ini o rie khia khi mhi aa ya na ulishi Eshinegba wexhi eri mhia mu ekpe na ogbo,

⁵ ni o ro khia khi oni okpotso ona o lina bhale ya nase mhe ena, mhi ya pfa ezona li, ini o khi ya ri ibhale oyoli ona kie ke nase mhe!' "

⁶ Onomhue oo we, "Aa suo abi ososozo ona okholo ona o ngme?"

⁷ Eshinegba o ya li pfa ezona eniye eyoli ni e vie e lu oli, ghe ele-oguota, ghe ele-iyose?"

⁸ Mhi gueye e khi o ya pfa ezona we pia. Abi o li ena, ini Omi Ogbo o nyene egbe bhale, o li bhale ya e irudunga eke ogbo?"

Okhe irokhokho oyi iFarisi ali omionoga

⁹ Ijesu o gbo ze okhe irokhokho ona kase egbo eghuo ni e regbenga khi wewe e mholi igue-ngeli dose egboese, ni e ri eloe a gbe egboese.

¹⁰ "Emose aava e je Owa Oyi Eshinegba ya so iromhi. Oghuo o o khi iFarisi, onokpole o khi omionoga.

¹¹ Oni iFarisi o vule, o so iromhi, o kueghie egboli, oo

lie, 'Eshinegba, mhi kphemhi ne khi mhi aa li abi egboese ni e khi ighiato ni ee li ingmobe, ni ee kia okia abi omose omionoga onana.

¹² Iteva mhia pfi azumhi elemhi efo uka. Mhi a ze azeghualo-igbe elemhi emini mhi mhue kpa.'

¹³ "Ama oni omionoga ogho, o tapfia migha o gbudu yase alo fei idane, ama o lese gbe abo nga aye, o lie, 'Eshinegba mhue ilemhi na mhe, mhemhe ogbo olamhe.'

¹⁴ Mhi gue egbegbi ingme a ye e khi oni omionoga ona Eshinegba o bino khi o pfuase dose oni omose ni o kpole. Egbe e mu oli je apfe. Itobo khi ogbo ni o da ti egboli nga ne, eri a ya ti oli tiemhi eke, ama oni o da ti egboli tiemhi eke, a ya ti oli nga."*

Ijesu o khi vose na ikuku eniye

(iMat 19.13-15; iMak 10.13-16)

¹⁵ Eleghuo, egbo e li mu eniye enikeke bhale ghi ijesu ni o ri obo ti we. Abi eniye odukhokho eyoli e ro me we, ee e khi bhale ya nase oli.

¹⁶ Ama ijesu o lu eni eniye, oo we, "A ze ni ikuku eniye e bhale deba mhe, a khi ke mu we migha irari khi enabi wewe e mhue Eghiele oyi Eshinegba.

¹⁷ Abi o li mhi li gue oli ye e khi, oni o da mie Eghiele oyi Eshinegba abi ukuku omoo o li mie oli ne, o ya lo oli le."

* 18:14 Li ze iMat 23.12; iLuk 14.11

Oghie ni o pfue
(iMat 19.16-30; iMak
10.17-31)

18 Oghemhue oghuo o mhila iJesu, oo, "Osesē onete, se mhi ya li ni mhi ro ya mhue agbo na agboagbo?"

19 IJesu o mhila li, "Elo o ze ni u ro o lu mhe osese onete? Ogbokhoghuo o la o ni o khi onoti, se ni Eshinegba."

20 U lese abi ishi eyi Eshinegba e ngme, "Khi kia okia, khi gbe ugbeli, khi do ughiatō, khi pfi otsese egbhue mu ogbō, mu ekpe na ite ali inye."†

21 Oo iJesu, "Rote abi mhi te khi omō mhi te ri ishi ena nya a gbe akanya."

22 Abi iJesu o ro suo ona, oo li, "O kpo e emhi oghuo le, le ya ri emini u mhue nya de, u kemhi eni ikpagho na egbo ni ea mhōli khi u ya mhue epfue shi iloghie. Ni u tigbe bhale ke deba mhe."

23 Abi oni omose o ro suo ona, egbe e pfo li-a itobo khi o pfue gba.

24 IJesu o me abi egbe e pfo li-a shi o, Oo, "O ma mu unu ni egbo ni e lolo pfue ni e ro lo Eghiele oyi Eshinegba."

25 Ni ogbō ni o pfue o ro lo Eghiele oyi Eshinegba, o ya munu dose, ni ogbō ke dua ni lōli ri alakumi rote ese asuge ya fie."

26 Egbo ni e suo ona e mhila, "Oghuo o ke ya mhue imiep-fuese sho?"

27 IJesu oo we, "Emini o a ze ogbō a rieḷe lōli o ze Eshinegba a rieḷe."

28 IPita oo iJesu, "Bino, anye she tsua emhi eyanye nya kua se, anye bhale deba e."

29 IJesu oo we, "Abi o li mhi li gue oḷi e ye e khi, aa me oni o ya tsua apfe-ḷi, okekhi ughue-ḷi pfia, ni o tsua inyoghuo oḷi, ghe itali ghe inyōli ali imiōli pfia, itobo Eghiele oyi Eshinegba,

30 ni o a ya mhue eleli ni e bu dose eghoghō, elemhi agbo ona ali agbo oni o ke e bhale."

IJesu o gbo gue ingme
eghuli oyoli le

(iMat 20.17-19; iMak
10.32-34)

31 IJesu o rue eniye odukhokho ogbava eyōli je asha eghuo, o gueye we. "A ri esō shi eke, awa ya nga obini iJerusalemu. Emini emekeguele e keke shi Omi Ogbō egbe nya, e bhale ya tse oobo.

32 A ya mu oḷi, a rue oḷi na egbo iJeta. E ya roli li egia, ee tsue oḷi, e tono ete ku oḷi, e gbe oḷi itali, e tigbe gbe oḷi-a.

33 Ele onuzi-ese, o ya guale."

34 Eniye odukhokho eyōli ea lese udi ingme ena irari khi eri a ri ingme enana sheli we, ali khi ea gbo lese emini oo ngme.

IJesu o khueghie ozalo alo-a
(iMat 20.29-34; iMak
10.46-52)

† 18:20 Li ze Okiali 20.12-16; iDeut 5.16-20

35 Abi iJesu o li ti i mama iJeriko, ozalo oghuo o shito epfe ode, o mhila.

36 Abi o ro suo okeke egbo ni e dose, o mhila we emini a me.

37 A gueye oli khi iJesu na iNazareti oo dose.

38 O lu leghe, oo li, "iJesu Omi iDefidi mhue isomhelemhi na mhe."

39 Egbo ni e ralo na li e oli o khukhu unu. Ama igho o kie li tsese oo lie, "Omi iDefidi mhue isomhelemhi na mhe."

40 iJesu o migha, o e lu oni omose ghi lue. Abi o ro ti mama li, iJesu o mhila li.

41 "Elo wa nono ni mhi riye ne?" Oo iJesu, "Onomhuele mhi a nono ni mhi ke me eke."

42 iJesu oo li, "Alo eye e khueghie-a, irudunga oye o she re ze."

43 Aghoagho alo eyoli e khueghie-a. O deba iJesu kia, o kueghie Eshinegba. Abi eni egbo nya e ro me oli e li li kueghie Eshinegba.

19

iZakiosi omionoga

1 iJesu o rote eoli iJeriko dose.

2 Omose oghuo o la oni eoli ni a lu iZakiosi, loli o khi oga oyi emionoga. O ga mema mhue epfue egbegbo.

3 O nono ni loli me oni iJesu o khi, ama oa dobe. Oa me asha itobo khi egbo e bu dose. Ali khi ogbo ni oa yagha o khi ni o lolo she.

4 Igho o na ya ralo ode ni iJesu o te ya dose, o ya nga

oara ugbele shito, ini loli me asha me oli.

5 iJesu o ramhi agho, o yase alo idane lu oli, Oo li, "iZakiosi, nyanya tiemhile, mhi mema ya kushi apfe oye amo."

6 Igho o nyanya tiemhile. Egbe e mu oli, o ri oghelē kpe abo mie iJesu.

7 Egbo nya ni e me ona, e wolo, e lie, "O she ya kushi na ogbo ona olamhe."

8 O ke lese li denē tee, iZakiosi o ti vule, oo, "Onomhuele ghe i, mhi ya khi epfue eyemhe shi asha eva, mhi ri asheghuo o na egbo ni ea mhue. O kha kha khi mhi li ogbokhoghuo le ghue, mhi ya fali oli eni ota agbhagbhamhi ene."

9 iJesu oo li, "Amo ena imiepfuese o she bhale apfe ona, itobo khi omi Aburaamu, omose ona o li khi.

10 Irari khi eri Omi Ogbo o bhale ya nono egbo ni e waa, ali ni o gbo ro ya mie we pfuese."*

Okhe irokhokho igue-ri emini a ro ne kia

(iMat 25.14-30)

11 Abi e kie li suo ingmemhi ena, iJesu o ze okhe irokhokho khasē we irari khi o she ti i mama iJerusalemu. Eni egbo e dabi khi utoghuokpe Eghiele oyi Eshinegba o ro ya bhale.

12 Oo we, "Omose okhemhuele oghuo o ye ushishi odonue ni a ro ya ri oghie na li, ikpukhokho, o gbo jele.

* 19:10 Li ze iMat 18.11

13 Igho o luno eni eę ga li ogbe, o kemhi ikpaghọ eyi igolu na wẹ. Oọ wẹ, 'A ri ikpaghọ ena du oki ramhi ni mhi rọ ya jele.'

14 "Eri tse khi eri apfoli e biselemhi ọli, e ghie usomhi ghi eni e ya gbanọ ọli ukhomhi khi wewe ẹa nono ni oni omose ọna, ni o khi oghie ọyi wewe.

15 "A kie ri oghie na li, o jele. Igho o luno eni e ga li egho ni o ri ikpaghọ na, ni loli mhila wẹ abi e ri eni ikpaghọ kia.

16 "Oni odode o bhale, oọ li, 'Oga, ukpaghọ igolu oye o she bia igbe elese.'

17 "Oni oga oọ li, 'Mu akanya, oni oọ ga onete oyemhe. Itobo khi u khi oni a ri egbe e nga shi ukukuọ ni a rọ shi e obo, mo ẹoli igbe ke mhese shi.'

18 "Onuzava o bhale, oọ li, 'Oga ukpaghọ igolu oye o she bia ishe elese.'

19 "Oni oga oọ li, 'Yeye mo ẹoli ishe ri ẹoli ke khu.'

20 "Onuzase o bhale, oọ, 'Oga ghe ukpaghọ igolu oye. Eri mhi gono li shi ode ya shi ne.

21 Eri ulishi oye o mu mhe itobo khi ogbo ni o ze alo u khi. Ashini u waa roshi u te e rue, ashini u wa rọ kọ shi u te a khiese.'

22 "Oni oga oyoli oọ li, 'Mhi ya rote emini yeyeghuo u ngme se unu ingme ikhi yeye oni o ga ogbo obo ọna. Abi u rọ lese khi omose ni o ze alo mhi khi, khi ashini mhia rọ shi mhi te a rue, mhi gbo rote ashini mhia rọkọ shi a khiese.'

23 Elo o ze ni u waa rọ ri ukpaghọ oyemhe ya shi owa ukpaghọ na mhe ni e la agho ke gbe nga o, ni mhi me ọli ali eleli eyoli mie ini mhi nyene egbe jele?'

24 "Igho o gueye eni e migha, 'A mie ọli oni ukpaghọ igolu ona na oni o mhuẹ eleli asha igbe.'

25 "Eni egbo e ọli, 'Oga, o she kpe mhuẹ igbe.'

26 "Oni oga oọ wẹ, 'Abi o li mhi li gue ọli e ye e khi, ogbo ni o da kpe mhuẹ ne, a ya rọ ma li o. Ama oni ọa kpe mhuẹ a ya gbo mie ọli oni o kpe mhuẹ.†

27 Ama ebe mhe egho ni ẹa nono ni mhi le eghiele shi wẹ ukhomhi, a wolọ wẹ lase ana, a gbolo wẹ-a ukpeloe mhe.' "

Ijesu o lo iJerusalemu le (iMat 21.1-11; iMak 11.1-11; iJon 12.12-19)

28 Abi ijesu o rọ ngme ona se, o ya ralo na wẹ. E nga iJerusalemu.

29 Abi o rọ ti mama ẹoli iBetifagi ali iBetani obini ukhomhi ute ni o khi ẹera olivu, o ghie eniye odukhokho eyoli aava ralo, oọ wẹ,

30 "A je ẹoli ni o la e odalo. Ini a ramhi agho, a ya me omi akphere ni ogbo ọa nga ghue khi a mu ọli zu. A taghie ọli-a, a mu ọli ghi mhe ana.

31 Ini ogbokhoghuo o mhila e, khi oọ, 'Elo o ze ni a rọ taghie ọlia?' A lie ọli, 'Onomhuẹ o mhuẹ emini o ri ọli ya li.' "

† 19:26 Li ze iMat 13.12; iMak 4.25; iLuk 8.18

32 Eni ọ ghie, e bhale ya ẹ ọni akphẹrẹ tee abi iJesu ọ li gueye wẹ.

33 Abi e li taghie ọlia, eni e mholi ọli e mhila wẹ, “Elo ọ ze ni a rọ taghie ọni akphẹrẹ a?”

34 E wẹ, “Ọnọmhue ọ mhue emini ọ rọli ya li.”

35 E mu ọli ghi iJesu. E ri ide ku ọli egbe, e mu iJesu nga ọ.

36 Abi ọ li lẹ, ẹgbọ e naghie ide ku ode.

37 Abi ọ rọ ti i mama ashini ute Olivu o te pfi ukhomhi kpọkẹ, eni eniye odukhokho nya ee kuẹghie Ẹshinẹgba leghe shi ikanya ọnyaloa ni e mẹ.

38 Ee liẹ,

“Ikhivose o khi oyi oghie ni o ri eva oyi Ọnọmhue bhale.”

“Opfomhe o la iloghie, ufumhi o la obini o yagha ne nya.”‡

39 Igho iFarisi eghuo ni e la ifuabọ eni ẹgbọ ẹẹ iJesu, “Osese, gueye eniye odukhokho eye e khukhu unu.”

40 Oo wẹ, “A ri esọ shi eke, ini e khukhu unu, echẹ e ya ke tsesẹ leghe.”

Ijesu ọ viẹ na iJerusalemu

41 Abi ọ rọ ti i mama iJerusalemu ni ọ rọ mẹ oni eoli, ọ viẹ na li.

42 Oo, “Abi a khe khi u lese emini o ya ri opfomhe ghi ẹ amo ena lo! Eri tse khi a she ri ọli sheli na ẹ mena.”

43 Ogbẹle ọọ bhale ni ebe ẹ e rọ ya gbe ogba gasẹ ẹ, e khi ẹ

shi iteva, e rọte ashakpa gasẹ ẹ shi.

44 E ya khọli ẹ pfuse-a. Ẹa ya kesẹ ọmọ wẹkhi ọdiọ le, e shashe ẹ apfe-a. Ẹa ya kesẹ ukpolo nga ukpolo, itobọ khi aa lese ẹghẹghẹ ni Ẹshinẹgba o rọ bhale ya tsumhi ẹ.

Ijesu o je Owa Oyi Ẹshinẹgba (iMat 21.12-17; iMak 11.15-19; iJon 2.13-22)

45 Igho ọ lo Owa Oyi Ẹshinẹgba, ọ khu ẹgbọ ni e la agho ẹ du oki fie.

46 Oo wẹ, “A she keke ọli shi Ebe-no-pfuase khi, ‘Owa oyemhe owa iromhi lo.’ Ama, a she ri ọli mele egbha ighiatọ a!”§

47 Ogbẹleka iJesu ọ la Owa oyi Ẹshinẹgba sese, ama eni ighie eyi ekpodalo-ugamhi ali esese Ishi eyi iMosisi ali eni e ralo na eni ẹgbọ, ee nono ni wewe e gbe ọli-a.*

48 Ama ẹa mẹ ode ni e te ya riele ọli, itobọ khi eni ẹgbọ e ri esọ shi osese oyọli, ẹa nono ni ungmehi oyọli okhoghuo o de wẹ esọ-a.

20

A mhila iJesu ọni ọ ri afu na li

(iMat 21.23-27; iMak 11.27-33)

1 Ẹleghuo khi iJesu ọ la Owa Oyi Ẹshinẹgba tse abọ usomhi onete oyi Ẹshinẹgba, ighie eyi ekpodalo-ugamhi ali esese Ishi eyi iMosisi, ali eni egbhali e bhale deba li.

‡ 19:38 Li ze *Iwolo* 118.26 § 19:46 Li ze *Aza* 56.7; *iJere* 7.11 * 19:47 Li ze *iLuk* 21.37

2 E ọli, “Gueye anye afu oyi oni u ro o gbe ikanya enana. Oghuo o ri eni afu ena ne?”

3 Ijesu oo we, “Mhi ya li mhila e ogbo, a so mhe o!

4 Ibatizi ni iJoni oo batazi egbo, obo oyi Eshinegba o te bhale abi obo oyi ogbo?”

5 E lu egbe we ochi, e ke, “Awa khe, ‘Obo oyi Eshinegba o te bhale.’ O ya mhila awa, ‘Elo o ze khi aa mie oli suo?”

6 Ini awa ke, ‘Obo oyi egbo.’ Egbo nya e ya tono awa eche irari khi ogbokpa o lese khi omekeguele iJoni o khi.”

7 Igho ee iJesu, “Anye aa lese obini o te bhale.”

8 Ijesu oo we, “Mhia li ya gueye e afu ni mhi ro a gbe ikanya enana.”

Okhe irokhokho oyi eghiale ena okhola

(iMat 21.33-46; iMak 12.1-12)

9 Ijesu o ze okhe irokhokho ona khashe eni egbo, oo we, “Omose oghuo o gua ipfonu shi ogba, o roli ye ongmomhi na eghiale. O vu eoli ni o la tese.*

10 Eghheghe ikhieshe o ramhi, o ghie oni oo ga li ghi we e rote oni ogba pfanu idumhi ghi lue. Ama eni eghiale e gbe oni a ghie ogho. O pfino abo efue je.

11 Oni omose o gbo ghie oni oo ga li onuzava ghi we. E gbe oli, e yeghe oia. O gbo pfino abo efue ya je.

12 Oni omose o gbo ghie onuzase. E kuale oli utse, e khu oli ya fie.

13 “Oni o mhue oni ogba ipfonu ogho, oo, ‘Se mhi fe ya li egho? Mhi ya ghie omimhe ni mhi nono ingme oyoli egbegbo, otse, e ya mu ekpe na li.’

14 “Ama abi eni eghiale e ro me oli, ee, ‘Egbegbi omi oli na ni o ya le ugu ogba ona, awa gbe oli-a ni awa rue oni ugu le.’

15 Igho e ti oli je olase oni ogba ipfonu, e gbe oia.

“Se oni o mhue oni ogba ipfonu egho o fe ya li we?”

16 Eri o ya bhale ya gbolo eni eghiale egho-a, o tigbe rue oni ogba na eghiale elese.” Abi eni egbo e ro suo oni ingme, e, “Eshinegba o gbe etse kua!”

17 Ijesu o bino we alo ukhomhi, oo we, “Se emini a keke ona o fe ngme, ni oo,† “Eche ni itsona e kie pfia, o tigbe ya mele eche ebe ni o mu eloe ne nya-a?”

18 “Oni o da ya de nga oni eche ne, o guogh-a, ali oni eche o da ya de mu ne, o mhele oia.”

Ingme oga izeze
(iMat 22.15-22; iMak 12.13-17)

19 Eni e sese Ishi eyi iMosisi ali ighie eyi ekpodalougamhi e nono ode ni e te ya mu oli aghoagh, irari khi wewe o ze oni okhe irokhokho tsue. Ama ulishi oyi egbo oo mu we.

20 Igho e li ri eloe shi oli egbe egbegbo. E ze egbo ni e riele abi egbo ni ee mie shi iJesu o deba li, e ke de oli awe, ini

* 20:9 Li ze Aza 5.1 † 20:17 Li ze Iwolo 118.22

e me ushi mu shi ọli obo, ni e mu ọli ghi ena omhesẹ eyi igovunọ.

²¹ Ighọ eni a zẹ eghọ ee mhila li ogbo, “Ọsẹsẹ, anye ga lesẹ khi abi ungmehi oyi Eshinẹgba o li u liẹ ngme ọli, u gbolo a sẹsẹ emini e te ode, waa ya gbe ogbọkhoghuo azẹba, ama eri wa sẹsẹ egbegbi ingme oyi Eshinẹgba.

²² O fẹ ti ni anye zẹ oga na oghie iSiza abi anye khi zẹ?”

²³ Ijesu ọ she lesẹ oshili eyewẹ.

²⁴ Ọọ wẹ, “A ri ukpaghọ ẹlomho khasẹ mhe. Alo eyi ọghuo a fẹ mu shi ọ?”

²⁵ E ọli, “iSiza.”

Ijesu ọọ wẹ, “A ri emini e khi eyi iSiza na iSiza, a ri emini e khi eyi Eshinẹgba na Eshinẹgba.”

²⁶ Eẹ dobe ọte emini ọ ngme igbaa me emhikhoghuo mu shi ọli obo. Abọ e sha wẹ shi abi ọ li gbaghiẹ oni ogbo-a, e khukhu unu.

Egbo iSadusi e mhila li ogbo irote-eghuli guale

(iMat 22.23-33; iMak 12.18-27)

²⁷ Egbọ iSadusi eghuo ni ẹa lama shi ọ khi a ya me irote eghuli guale, e ri omhila bhale deba ijesu.‡

²⁸ E ọli, “Ọsẹsẹ, iMosisi ọ keke shi eke na awa khi ini omose ọ ghu-a pfi ughue ọli shi eke agbo ni ọa ọ bia eniye, inyoghuo oni omose ọ rue oni ọkpotso ughue ni ọ bia eniye shi agbo na inyoghuo ọli ni ọ ghu-a egho. §

²⁹ Inyoghuo egbe etu-oshilua e ya la ọ. Oni odode ọ rue ọkpotso, ọ ghua, ọa bia omọ.

³⁰ Onuzava ọ rue oni ọkpotso.

³¹ Ighọ onuzase ọ gbo rue ọli. Ighọ wewẹ nya e rue ọli, e ghulo-a, ẹa bia omọ.

³² Ikpukhokho ọ, oni ọkpotso ọ li ghua.

³³ Mena, ogbele ni egbo e ya te eghuli guale, ughue oghuo oni ọkpotso ọ ya khi, aborokhia khi wewẹ oshilua e ga rue ọli ughue egho?”

³⁴ Ijesu ọọ wẹ, “Egbọ ena agbo ona ẹ rue ikpotso, wewẹ e gbo ri ikpotso a ye ughue.

³⁵ Ama egbo ni a leli shi eni e mhue okemhi shi agbo ogho ali irote eghuli guale, ẹa ya rue ikpotso, wexhi eri a rewe ya ye ughue.

³⁶ Eẹ ke ke ghu, irari khi eri e ke ya li abi igeni eyi Eshinẹgba. Imi Eshinẹgba e ke ya khi, irari khi e she ọte eghuli guale.

³⁷ Ashini a keke ingme oyi ebuli ni oo to shi, iMosisi ọ te rokhase ẹ gboo khi eni e ghua, ẹ guale, irari khi ọ lu Onomhue, ‘Eshinẹgba oyi Aburaamu ali Eshinẹgba oyi Aziki ali Eshinẹgba oyi iGiekopu.’*

³⁸ Eshinẹgba oyi egbo ni e la agbo ọ khi. Ọa khi Eshinẹgba oyi egbo ni e ghua.”

³⁹ Esese Ishi eyi iMosisi eghuo ni e la agho ẹẹ ọli, “Ọsẹsẹ, u ga gue ngme!”

⁴⁰ Ogbokhoghuo ọa ke gbo gbudu mhila li ogbo olese.

‡ 20:27 Li zẹ Ika 23.8 § 20:28 Li zẹ iDeut 25.5 * 20:37 Li zẹ Okiali 3.6

Omi oghuo oni Omiepfuese o khi

(iMat 22.41-46; iMak 12.35-37)

⁴¹ Igho iJesu o mhila we, “Se ee a lie lie khi oni Omiepfuese khi omi iDefidi o khi?”

⁴² Irari khi oni iDefidi o ngme oli shi ebe Iwolo, ni o re, “ ‘Onomhue oo Onomhue oyemhe:

Shito mhe ukiekie obita

⁴³ ramhi ni mhi ro ya

ri ebe e shi e ekoawe

ni u kpha awe ukhomhi.”†

⁴⁴ Ini iDefidi o lu oli, ‘Onomhue.’ Se o ke gbo lie khi omi iDefidi?”

Ijesu oo e mhue egbhe shi esese Ishi eyi iMosisi egbe

(iMat 23.1-36; iMak 12.38-40)

⁴⁵ Abi eni egbo e kie ku esoa shi eke egbo, iJesu oo eniye odukhokho eyoli,

⁴⁶ “A mhue egbhe shi esese Ishi eyi iMosisi egbe. O ma ghole we ni e ke so itsua na dolodolo ke kia gasa, ni egbo e ba ke tse we otse ekpe atu oki. Ee shito ashini o mhue ekpe elemhi owa ugamhi, e gbolo e shito ashini o yagha ni o fune ukue. ⁴⁷ Ee lo apfe oyi esamhi-olimhi ya ri itoto miono we emini e mhue. Ee so iromhi ni e nuwe eyi abamemhe. A ya na egbo eghoghohosue egbegbo.”

21

Isomhopfa oyi osamhi-olimhi
(iMak 12.41-44)

¹ Ijesu o bino gasa, o me khi egbo ni e mhue epfue e

phi ukpagho lo akpati ni a phi ukpagho a lo elemhi Owa oyi Eshinegba.

² Igho osamhi-olimhi ni o mhue emhi o li phi ikpamhi inini eva lo oni akpati.

³ Ijesu oo eniye odukhokho eyoli, “Mhi gueye e khi osamhi-olimhi ona o ga rona dose egbo eni e kpole nya.

⁴ Eri egbo eni e kpole ena e rote epfue eyewe rona, ama osamhi-olimhi ona o rote umhame ri ukuku ni o mhue rona.”

Ijesu o guele emini a ya me ikpukhokho agbo

(iMat 24.1-2; iMak 13.1-2)

⁵ Eniye odukhokho eyoli eghuo e ngme abi a li ri echere ni e somhi otse li atsona shi ugbe oyi oni Owa Oyi Eshinegba, li shi itsua isomhopfa ni a ro ma o na Eshinegba. Ama iJesu oo we,

⁶ “Emini a bino ena ii, eghoghe oo bhale ni o khia khi echeli okhoghuo o ke ya nga olese egbe, irari khi a ya bighi we kua.”

Ozughu ali Ajilimhe

(iMat 24.3-14; iMak 13.3-13)

⁷ E mhila li, ee oli, “Osese, eghoghe onoghuo a ro ya me ona. Elo a ya me ni o ro ya khasa khi oni eghoghe o she ramhi?”

⁸ Ijesu oo we, “A mhue egbhe ini ogbo o khi di e. Ebubu egbo e ya ri eva oyemhe bhale, ee lie, ‘Mhemhe mhi khi Omiepfuese,’

† 20:43 Li ze Iwolo 110.1

ali khi, 'Oni eghẹghẹ o she ti bhale.' A khi deba wẹ.

⁹ Ini a suọ eko okhue ali ozughu, a khi zẹ ni egbe e guoghọ ẹ a, irari khi emhi enana e mema bhale ya tse, eri-tse khi ukpese agbo ọa kie ramhi ne oni eghẹghẹ."

¹⁰ Oọ wẹ, "Ishishi e ya mu okhue vule shi ishishi ọ, eghiele e mu okhue vule shi eghiele ọ.

¹¹ Eke e ya ke de kulue. Okiamhi ali ighuamhi ebe e ya la asha ododa. A ya me ebemulishi ali ukpokpomhi irokhase khi e te idane bhale.

¹² "Eri-tse khi neni a ya me ena, a ya muno ẹ a nase ẹ, a muno ẹ je owa ugamhi ali owa ighumha. A mu ẹ ghie enighie ali igovunọ irari oyemhe.

¹³ Ona o ya khi eghẹghẹ ni a ro ya me asha pfi otsele na mhe.

¹⁴ A mholi oli shi udu memena, a khi zẹ ni udu o nighise ẹ shi emini a ya me so we ọ.

¹⁵ Mhi ya ri ungmehi shi ẹ unu ali egbhali ni ọ khia khi ebe ẹ ẹa ya dobe nu ẹ khe ako.*

¹⁶ Ita ẹ, ali inyoghuo ẹ, ali egbo eye ẹ, ali emole ẹ, e ya ri egbhue re ẹ de, e gbolo eghuo elemhi ẹ-a.

¹⁷ Egbokpa e ya ri itobo oyemhe kie ẹ.

¹⁸ Ama, etsui okhoghuo oyi ongege ọa ya pfua.

¹⁹ Ini a migha egbegbo, a ya tsumhi ẹ.

Ijesu o guele shi eke khi a ya guoghọ iJerusalemu a

(iMat 24.15-21; iMak 13.14-19)

²⁰ "Ini a me khi ekholi-okhue e pfi gase iJerusalemu, a lese khi ipfueche-a oyoli o shi ti ramhi.

²¹ Eghẹghẹ agho, egbo ni e la eke iJudia, e na nga ikhomhi ite. Egbo ni e la ifu apfe, e na ifu apfe ọ vu. Eni e la oboese e khi ke gbo nyene egbe bhale ifu apfe.

²² Irari khi eghẹghẹ iso-ezo ni a she kpe keke shi eke na ni o bhale ya tse.†

²³ Eghẹghẹ agho o ma kholo ikpotso ni ẹ me umemhi egbe, ali eni e ri eniye shi egbe. Osue onofune o ya la oni eke. Ofu oyi Eshinegba o ya de rughu eni egbo.

²⁴ Eghuo ọ e ya ghu eghuli ogbhoro, a muno eghuo ighumha je ishishi ododa. Egbo iJeta e ya guoghọ iJerusalemu-a ya ramhi, ni eghẹghẹ oyi egbo iJeta e ro ya dose.

Ibhale oyi Omi Ogbo

(iMat 24.29-31; iMak 13.24-27)

²⁵ "A ya ke me irokhase el-emhi ovọ ali uki ali ikpetata. Ishishi e ya le oya eke agbo, abo e sha we abi oko oniemhi o li ya ke vuna.‡

²⁶ Ubi o ya rue egbo, irari ulishi ẹ sa usamhi emini ọ a bhale eke agbo itobo khi ekpabo ni e la ukhui e ya ke nighise.

* 21:15 Li ze iLuk 12.11-12 † 21:22 Li ze Osia 9.7 ‡ 21:25 Li ze Aza 13.10; Ezik 32.7; iJoę 2.31; Iro 6.12-13

²⁷ Eghēghē agho, e ya me khi Omi Ogbō o la elemhi otughunu tsua ekpabō ali ufumhi oniēmhi, rōte idane ẹ tiemhile. §

²⁸ Ini a da me na ne, a vule a yase ukhomhi eke irari khi eghēghē ipfasheke oye ẹ o she ti bhale.”

Owena ni a rōte okhua-eni rue

(iMat 24.32-35; iMak 13.28-31)

²⁹ Ijesu o ze okhe irokhokho ona khasē we, oo we, “A ke bino oara okhua ali eera nya.

³⁰ Ini e da ta ebe enegbo ne, a lese khi oruame o shi ti e bhale.

³¹ Igho o li khi ini a da me emhi enana ne, a lese khi Eghiele oyi Eshinegba o she ti ramhi.

A mu egbe shi eke

³² “Abi o li mhi li gue oli e ye e khi, agbhotu ona o ya dose ne neni a me eni emhi ena nya.

³³ Eke ali ukhuli e kha bhale ya dose, ingmemhi eyemhe e mema bhale ya tse.

³⁴ “A kuegbe-a ini ukue iditse, ali onyo idada ali usamhi agbo e khi ya rue e egbhali, ini ogbele ibhale oyemhe o khi ya de shi eghēghē ni a sa shi.

³⁵ Irari khi oni ibhale ona ogbokpa ni o la agbo o ya bhale na.

³⁶ A ke mu egbe eghēghē kpa, a lema ni a toto migha, ni a pfue okhena ni oo bhale, ali ni a ro dobe migha odalo oyi Omi Ogbō.”

³⁷ Ogbelekpa iJesu o ro la Owa oyi Eshinegba ii sese. Ini obili oo bi, o fie nga Ute Eera Oliyū.*

³⁸ Eluzogbe kpa, eni egbo nya e bhale Owa Oyi Eshinegba ya ri esō shi oli eke ni e suo ungmemhi oyoli.

22

Ijudasi o lama khi loli ya ri ijesu de

(iMat 26.1-5,14-16; iMak 14.1-2,10-11; iJon 11.45-53)

¹ Ukpe ni a la le ibuledi ni ogbo ri ifuma ma nye na lu iPasova o ti bhale.*

² Ighie eyi ekpodalougamhi eyi Eshinegba ali eni e sese Ishi eyi iMosisi, e nono abi e li ya gbe iJesu a, ama ulishi oyi egbo o mu we.

³ Igho Okphaghie o lo iJudasi ni a gbolo a lu Isikaroti udu, ni o khi oghuo eniye odukhokho ogbava eyi iJesu.

⁴ Oni iJudasi o fie deba ighie eyi ekpodalougamhi ali eni e khe ekhe Owa Oyi Eshinegba. O nu we ye ochi abi o li ya ri iJesu na we de.

⁵ Egbe e mu we, e lama khi wewe e ya fali oli ikpagho.

⁶ O lama shi we o, o nono abi loli ri ya me asha ri oli na we mu ini ebubu egbo ea la akagho.

Eminale ni o kpukhokho

(iMat 26.17-25; iMak 14.12-21; iJon 13.21-30)

⁷ Ukpe ni a la le ibuledi ni aa ri ifuma shi nye, ni a ro omi osumha e luase obo, o ramhi.

§ 21:27 Li ze iDan 7.13; iRo 1.7

* 21:37 Li ze iLuk 19.47

* 22:1 Li ze Okiali

⁸ Igho iJesu o ghie iPita ali iJoni ralo, oo we, "A ka mu egbe eminale iPasova oyi awa."

⁹ E mhila li, "Obo wa nono ni anye je ya mu egbe?"

¹⁰ IJesu oo we, "Abi a lie ke lo iJerusalemu le te, a ya me omose oghuo ni o tsua ubene amē. A deba li je owa ni oo je.

¹¹ Ini a ramhi agho, a lie oni o mholi oni owa ogho, 'Osese oo, ighe elemhi owa oye ni epfese e ku e shi, ni mhemhe ali eniye odukhokho eyemhe anye la ya le eminale iPasova?"

¹² O ya ri ukpokpomhi agbala khasē e ukhomhi owa atonga ni a lolo riēle somhi otse. A mu egbe oni eminale shi agho."

Eminale ni o kpe ukhokho ni iJesu o nu eniye odukhokho eyoli le

¹³ Igho e bhale ya e khi abi iJesu o li ngme oli te o khi. Igho e mu egbe oni eminale iPasova shi agho.

Abi e ro le eminale oyi Onomhue

(iMat 26.26-30; iMak 14.22-26; 1 iKori 11.23-25)

¹⁴ Oni eghēghe o ramhi, iJesu ali ighiusomhi na kee eyoli e shito shi gasē ni e ro ya le eminale.

¹⁵ Oo we, "O kie kpe ghole mhe egbegbo ni mhi nu e le eminale iPasova ona neni mhi ya me osoli.

¹⁶ Mhi gueye e khi, mhi aa ke gbo ya le eminale ona, se

ni awa ke le oni o khi egbegbo obini Eghiele oyi Eshinegba."

¹⁷ O rue oni uko, o kphemhi. Oo we, "A mo uko ona, a kemhi oli da.

¹⁸ Mhi gue oli e ye e khi, mhia ke gbo ya da onyo oora upfonu ona, se ni Eghiele oyi Eshinegba o bhale."

¹⁹ Igho o rue ibuledi mhue obo, o kphemhi, o khi oli a, o ro na we, oo, "Idiegbe oyemhe na ni mhi ro na e. A lina ke riēle oli ro sato mhe egbe."

²⁰ Igho o gbo rue uko abi o ro le emhi se, oo, "Uko ona o khi ishobo onogbo ni o rote oia eyemhe bhale, ni a ku shi eke na e.†

²¹ A ghe i, obo oyi oni o ya remhe de o nu mhe shito e le emhi memena.‡

²² Abi e khi omi ogbo o li ya kia, igbo a li ya me oli, ama epfua o khi ni ogbo ni o ya roli de."

²³ Ee mhila egbewe oni o khi ni o ya gbe ikanya enana.

²⁴ Igho ekhako o gbo li lasēle shi iteva oyewe shi oni o fune nya shi elemhi we.§

²⁵ IJesu oo we, "Eri ighie eyi egbo iJeta ee jili we. E kha jili we se, e lie we khi eri we we e kpaghie we obo.*

²⁶ Ama a khi li abi we we, ochogho, oni o nono ni loli fune elemhi e, o ri egboli tiemhie eke nya, oni o ralo o ke ga enekpole.†

²⁷ Oghuo o fu ne, oni o shito ukhomhi itebu e le emhi, abi oni oo kphanō eminale ghi

† 22:20 Li ze iJere 31.31-34 ‡ 22:21 Li ze Iwolo 41.9 § 22:24 Li ze iMat 18.1;

iMak 9.34; iLuk 9.46 * 22:25 Li ze iMat 20.25-27; iMak 10.42-44 † 22:26 Li ze iMat 23.11; iMak 9.35

eni e shito ọ le? Ọa khi ọni ọ shito le? Ama eri mhemhe mhi le ẹ iteva abi ọni ọ ga ẹ.‡

28 Ẹẹ a nu mhe migha abi mhi ro la imufe.

29 Mhi ri eghiele na ẹ, abi itamhe ọ li ri eghiele na mhe.

30 Ni a ro bhale ya ẹ khi a nu mhe le, a nu mhe da obini iloghie oyemhe. A ya shito ukpekhomhi oghie, a gue unuekpẹ igbeva eyi iZireni ẹzo.§

Ijesu ọ guele shi eke khi iPita ọ ya kie lue

(iMat 26.31-35; iMak 14.27-31; iJon 13.36-38)

31 “ISamo, iSamo, ghe i, Ọkphaghiẹ o she mhila khi loli ẹ nono ni loli kpishi ẹ-a nya abi a lie kpishi ado.

32 Ama mhi she so iromhi ne, iSamo, ini irudunga oye o khi nighise. Ini u pfue o se, ri udu shi inyoghuo ẹ enekpole ọ.”

33 Ama iPita ọọ li, “Onomhue, mhi ga mu egbe ni mhi ro deba ẹ ya lo owa ighumha, ali ni mhi nu ẹ ya ghua.”

34 Ijesu ọ ọli, “Mhi gue ẹ ye, khi, ye ye iPita ọna, neni ọkpa ọ ya gbiẹghẹ amo u ya kie mhe itese khi u waa lese mhe.”

Egheghe ingme o she ramhi

35 Ijesu ọ ro mhila we, “Abi mhi ro ghie ẹ fiẹ lase, ni aa ro tsua ẹkuẹ ukpagho wekhi akpaba wekhi ekuẹ, emhikhoghuo o fe to ẹ?”*

Ẹ ọli, “Iiye.”

36 Ọọ we, ama memena, ọgbọ ni ọ mhue ẹkuẹ ukpagho ọ rue ọli, ọni ọ mhue akpaba ọ tsua li, ini u waa kpẹ mhue ọgbhoro, ka ri awulu oye de, ni u ya de oghuo.

37 Mhi gueye ẹ khi emini a keke shi mhe egbe ni o la Ebeno-pfuase, ni ọọ, “A leli ọli ma ẹgbọ ni e lue,” o mema bhale ya tse shi mhe egbe. Irari khi emini a keke shi mhe egbe o she ramhi ni e ro bhale ya dose.†

38 Eniye odukhokho eyoli ẹ ọli, “Bino, Onomhue, ọgbhoro eva e la ana.” Ọọ we, “O somhi agho.”

Ijesu ọ la ute olivu so iromhi

(iMat 26.36-46; iMak 14.32-42)

39 Ijesu ọ fiẹ lase, e je Ute Ẹera Olivu, abi ọ kpẹ li. Eniye odukhokho eyoli e deba li.

40 E ramhi agho, ọọ we, “A ke so iromhi ini a khi de pfilo imufe.”

41 Ọ tikia na we de ne, ọ wugha, ọ so iromhi, ọọ,

42 “Ita, ini o ghole ẹ, mie mhe uko osoli imeme onana, ama ọa khi abi o ghole mhe, ama abi o li ghole ẹ.”

43 Igho aḡeni ọ ro te idane bhale ya ri ekpabo na li.

44 Ro te otomhe, ọ so iromhi egbegbo ramhi ni ọpfọ ni e ro te ọli egbe e ku shi eke, e kho tikpo abi ọlia.

45 Abi ọ ro te iromhi isoso vule, ọ nyene egbe bhale deba eniye odukhokho eyoli.

‡ 22:27 Li ze iJon 13.12-15 § 22:30 Li ze iMat 19.28 * 22:35 Li ze iMat 10.9-10; iMak 6.8-9; iLuk 9.3; 10.4 † 22:37 Li ze Aza 53.12

Ọ mẹ khi osoli ni e viẹ o ri ọlọsẹmhe shi wẹ egbe, e lese. 46

Ọ mhila wẹ. “Elo o ze khi a lese-a? A vule ni a ke so iromhi ini a khi de pfilo imufe.”

A mu ijesu

(iMat 26.47-56; iMak 14.43-50; iJon 18.3-11)

47 Abi ọ kie li ngme egbo, egbo e ve lole gbii. Omose ni a lu iJudasi ni ọ li khi otuoghuo eniye odukhokho ogbava eyi ijesu ọ rewe kia. Ọ le deba ijesu ni loli ya pfi ọli elemhi egbe.

48 Ijesu ọ mhila li, ọọ li, “IJudasi, eri u ri otse ri Omi Ogbo ọ de ena?”

49 Eni eniye odukhokho eyi ijesu e me emini a ya me ena, e mhila li, “Onomhue anye ri itakobi ni e la anye abo kholi?”

50 Igho oghuo ọ, ọ ri itakobi fia oni ọọ ga oni ọ kpeda nya oye ekpodalo-ugamhi eso a.

51 Ijesu ọọ li, “Taa! Khi ke gbo li igho.” Ọ ri obo ti oni omose oni eso, oni eso o gbela.

52 Ijesu ọ mhila ighie eyi ekpodalo-ugamhi, ali eni e kekhe Owa Oyi Eshinegba, ali eni egbhali ni e bhale ya mu ọli, “Eri mhia pfi ozughu ni a ro tsua epia ali itakobi ali ikpokpo bhale e deba mhe?”

53 Ele kpa mhi ro la Owa Oyi Eshinegba e sese, ongee ọa ri obo ti mhe, ama eghẹghẹ oye na ni ekpabo alo ebili e ro mhesẹ.”‡

IPita ọ tia khi loli ẹa lese ijesu

(iMat 26.57-58,69-75; iMak 14.53-54,66-72; iJon 18.12-18,25-27)

54 Igho e mu ọli vu ya je owa oyi Okpodalo-ugamhi oyi Eshinegba ni ọ kpeda nya. IPita ọ tapfia a deba wẹ.

55 Abi e ke ro pfi erali shi iteva oyi oni atukpapfe ni e ro shito, iPita ọ li bhale ya nu wẹ shito.

56 Abi okpotso oni ọọ ga oghuo ọ li me khi iPita ọ nu wẹ shito, ọ bino ọli tsuke, ọọ li, “Omose ọna ọ li nu ijesu kia.”

57 Ama iPita ọ tia. Ọọ li, “Kpotso, Mhia fe ga lese ọli.”

58 O denẹ, omose olese ọ ke gbo me iPita, ọ mhila li, “U li nu ijesu u kia.”

IPita ọ ke, “Mose mhia nu ọli kia.”

59 O ke te agho ri emhi abi agogo oghuo dose, omose olese ọ ge ma ọ gue, ọọ, “Mhi lese gboo khi omose ọna ọ nu ijesu u kia, irari khi onge iGalili ọ li khi!”

60 Ama iPita ọ so li ọ, ọọ li, “Mose, mhi a lese emini u wa ngme ena.” Utoghuo kpe abi ọ kie li ngme, okpa ọ gbieghe

61 Onomhue ọ pfi alo bino iPita chii. IPita ọ tode sato ungmehi ni ijesu ọ ngme ni ọ khi, “Neni okpa ọ ya gbieghe, u ya tia itese, wẹ khi u waa lese mhe.”

62 IPita ọ fi je olase, ọ ya vie oya.

Eni e khe ekhe e ri ijesu li egia

(iMat 26.67-68; iMak

‡ 22:53 Li ze iLuk 19.47; 21.37

14.65)

⁶³ Eni emose ni e khe iJesu ekhe, e roli li egia, e gbe oli.

⁶⁴ E gexoli alo, e mhila li, "Bogobog! Oghuo o ri emhi lie?"

⁶⁵ Igho e ngme iwali ingmemhi emube ebubu deba li.

E mu iJesu bhale igbaa iSahediri

(iMat 26.59-66; iMak 14.55-64; iJon 18.19-24)

⁶⁶ Ogbe o gbe-a, eni egbhali ali ighie eyi ekpodalougamhi, ali esese Ishi eyi iMosisi e legba. E rue iJesu lasele migha iteva oyewe.

⁶⁷ E lie oli, "Ini yeye u khi oni omiagbopfuese, gueye anye."

IJesu o o wex, "Ini mhi tseku gueye e, aa ya mie shi mhe o.

⁶⁸ Ini mhi mhila e, aa ya gbaghie a na mhe.

⁶⁹ Ama rote memena vu, omi ogbo o ya shito obita oyi Eshinegba obini iloghie."

⁷⁰ Wewe nya e mhila li, "Omi Eshinegba u khi?"

O o wex, "A gue ngme ni e khi Omi o mhi khi."

⁷¹ E egbewe, "Awa ke gbolo e nono otsese olese, awa-eghuo awa she ri eseyawa su o abi o ri unu oyoli ngme."

23

A rue iJesu bhale odalo oyi iPaleti

(iMat 27.1,2,11-14; iMak 15.1-5; iJon 18.29-38)

¹ Igho eni igbaa nya e vule, e pfi oli ukhomhi ralo ghi iPaleti.

² Wewe nya e gue ez o shi oli egbe, e lie, "Anye she me omose ona khi o sese egbo ode egholi. O o egbo e khi ke ze

oga na oghie iSiza, o gbolo a lie khi loli khi Omiepfuese ni o gbo khi oghie."

³ Igho iPaleti o mhila li, "Su o khi yeye u khi oghie oyi egbo iJu?" IJesu o o li, "Abi o li gho."

⁴ Igho iPaleti o gueye ighie eyi ekpodalougamhi ali eni igbaa, "Mhi a me ushi mu mhue omose ona obo."

⁵ Wewe nya e lie, "Eri o ri osese oyoli pfi ozughu e shi eke iJudia nya. Eke iGalili o te gba li eke le ni o ro ramhi ana ena."

A rue iJesu bhale odalo oyi Erodu

⁶ Abi iPaleti o ro su o ona, o mhila wex ini ongi iGalili o khi.

⁷ Abi o ke ro su o khi eke ni Erodu o mhese shi iJesu o khi, o e rue oli ghi Erodu ni o li la iJerusalemu oni eghenge.

⁸ Abi Erodu o ro me iJesu, egbe e mu oli, itobo khi o she tese ni o te nono ni loli me oli, irari khi o she kpe su o eko oli, o gbolo nono ni o la ukpeloe lue gbe ikanya onyaloa eghuo.

⁹ O mhila iJesu ogbo ebubu ama iJesu o a pfa shi oli eke.

¹⁰ Eni Ighie eyi ekpodalougamhi eyi Eshinegba ali esese Ishi eyi iMosisi e migha agho, e pfi oni o nga o shi o

¹¹ Igho Erodu ali ekholi-okhue eyoli e gia li e gbo roli li egia. E son o li itsua ni e somhi otse ni e ghale. E gbo rue oli nyene egbe ukhokho ghi iPaleti.

¹² Elegho, iPaleti ali Erodu e ro somhi irari khi o be e kpe khi.

IPaleti o pfa ezo mu iJesu a gbe oli-a

(iMat 27.15-26; iMak 15.6-15; iJon 18.39-19.16)

13 IPaleti o luno ighie eyi ekpodalo-ugamhi ali eni e mhesẹ ali eni egbo nya,

14 Oo we, "A rue omose ona ghi mhe, a lie khi o pfi ozughu shi egbo iteva. Ama ukpelo e mhi la mhila li ogbo lena, mhi aa me emhi khoghuo ni a ro gue ezo shi oli egbe.

15 Wexhi eri Erodu o pfa ezo mu oli, irari khi o nyene oli egbe ukhokho ghi awa. A ga me oli gboo khi oni omose ona oa li ingme okhoghuo nabi a ro ya lie a gbe oli-a.

16 Irari ghọ mhi ya nase oli, mhi rue oli obọ-a."

17 [Ini a li ukpe iPasova, iPaleti, o o mema rue ogbo ogghuo ighumha lasela na we.]

18 Wewe nya e ku unu a nyogho, "A rue oli vu ya gbe-a! A ri ochoghọ rue iBarabasi obọ-a na anye!"

19 Eri a kie kpe mu iBarabasi shi owa ighumha irari onyaghu ni o pfi shi oni eoli ali khi o gbo gbe ugbe.

20 IPaleti o nono ni lue rue iJesu obọ-a, o gbo lema we.

21 E kiele tsesẹ nyoghoo, "A ta li ma oora apfida gbe-a! A ta li ma oora apfida gbe-a!"

22 Utonuzese, o gbo nu we ngme, oo, "Elo o ze, Ingmobe onoghuo o ri ele? Irari khi mhia me emini o ze ni a ro ya gbe oli-a. Itobo igho, mhi lese ya nase oli, mhi rue oli obọ-a."

23 E kiele tsesẹ nyoghoo, a ta iJesu ma oora apfida gbe-a. Atsesẹ oyewe o roli tse na we.

24 Igho iPaleti o lama shi we o.

25 O rue iBarabasi ni a mu shi owa khi o pfi ozughu shi oni eke, ni o gbo gbe ugbe, obọ-a na we. Igho o ri iJesu na we, e ka li oli abi o ghole we.

A ta iJesu ma apfida

(iMat 27.32-44; iMak 15.21-32; iJon 19.17-27)

26 Abi e li rue oli lee, e me omose ogghuo ni a lu iSamogngi iZireni ni o rote eoli odonue lo oni eoli le. E ri itoto mu oli, sheli oli oni oora apfida ogho, o tsua li nga ike deba iJesu.

27 Ebubu egbo e deba iJesu, shi ikpotso ni e vie e vie oya na li.

28 IJesu o nyene alo ghue we, oo we, "Ikpotso iJerusalemu, a khi ke vie na mhe. A ke vie na egbe e ali imi e,

29 Irari khi oni eghẹghẹ oo bhale ni a ro ya ke lie, 'Ikhivose o khi na ikpotso ni ea bia eniye, ni ea me umemhi ghue, wexhi e ri e mu enyeli shi omọ unu ghue.'

30 E ya lie ute, 'De mu anye,' ee ite enikeke, 'A de khukhu anye a.'*

31 Irari ini egbo ee li na ini egua o vo ebuli-a zughu, se e ke e li ini o khakha?"

32 A li muno ighiatọ aava ni a li ya gbe-a toma li egbe.

33 Abi e ro ramhi ashini a lu, "Ugua ukhomhi olimhi," agho e gbe oli ali ighiatọ egho

* 23:30 Li ze Osia 10.8; Iro 6.16

a shi. E ta oghuo ma oora shi oḷi ukiękię obita, e ta oṅokpọle shi ukiękię obọ ogho.

³⁴ IJesu oḷi, “Ita, gbekua na wẹ irari khi ẹa leṣe emini ẹẹ li.”†

E ri amukpaghọ pfi onolo rọ kemhi itsua eyọli.

³⁵ Eni ẹgbọ e migha bino, enighie e dọli oḷonyo. E liẹ, “Oo tsumhi ẹgbọese, o tsumhi ẹgbọli ini lọli o khi Omiepfuese oyi Eshinẹgba ni a zẹ.”‡

³⁶ Eni ekhọli-okhue e li bhale ya rọli li egia. E ri onyo ni o yala nali o mọ da.§

³⁷ E oḷi, “Ini o khia khi yeyẹ u khi oghie oyi ẹgbọ iju, tsumhi egbe ẹ shọ.”

³⁸ E kẹkẹ emhi tama kpeda na li ni o ngme khi, “Ona o khi Oghie oyi Ẹgbọ iju.”

³⁹ Oghiatọ oghuo ni a li tama oara, o tsue iJesu. O liẹ oḷi, “Óa khi yeyẹ wẹ khi Omiepfuese u khi? Tsumhi egbe ẹ, ni u li tsumhi anye.”

⁴⁰ Ama oghiatọ oṅokpọle, o dese oḷi, oṅo li, “Ulishi Eshinẹgba oḷa ya muẹ, aborokhia khi eri ushi oghuo o ga mu awa?”

⁴¹ Akanya ni awa gbe awa mie ifata to e na. Ama oṅose oṅa, oḷa li emhikhoghuo ni o mẹ osue a shi.”

⁴² Ighọ oṅo iJesu, “Sato mhẹ egbe ini u bhale ukpẹkhomhi eghiele oye.”

⁴³ IJesu oṅo li, “Mhi gueye khi, ogbe-namo ena, u ya nu mhẹ la Apfẹ oyi Eshinẹgba na iloghie.”

Eghuli oyi iJesu
(iMat 27.45-56; iMak 15.33-41; iJon 19.28-30)

⁴⁴ Agogo igbeva ẹlẹ oḷuota o leṣe nu, obili o te bi oni eke nya ya ramhi agogo ese ẹlẹ ogbomhi.

⁴⁵ Irari khi ovọ oḷa ke to, ode ugbakpi ni a rọ pfa ode a shi elemhi Owa Oyi Eshinẹgba o te iteva kięse-a eva ya to eke.*

⁴⁶ IJesu o lu leghe, oṅo, “Ita, mhi ri ayemhẹ oyemhẹ mhọli ẹ obọ.” Abi o rọ na ngme se, o ghua.

⁴⁷ Abi oḷa okhọli-okhue ni o la aghọ o rọ mẹ emini a mẹ, o kuęghie Eshinẹgba, oṅo li, “Egbegbọ lọ khi oṅose oṅa oṅi o pfuase o khi!”†

⁴⁸ Abi ẹgbọ ni e le gba aghọ ni wewẹ e ri ukpẹloe mẹ emini a mẹ, e rọ mẹ emini a mẹ, ee viẹ osue, e je.

⁴⁹ Ama ẹgbọ nya ni e leṣe oḷi ali ikpotso ni e rọte iGalili deba li, e migha tapfia bino emini a ga mẹ nya.‡

Irotọ oyi iJesu
(iMat 27.57-61; iMak 15.42-47; iJon 19.38-42)

⁵⁰ Oṅose oghuo o la o na lu iJosefu. O khi oghuo emose ni ẹẹ mhẹse. O khi oṅose onete ni o pfuase.

⁵¹ Oḷa lama shi o a ka gbe iJesu a. Oṅi ẹoli Arimatia na eke iJudia o khi. O migha khe Eghiele oyi Eshinẹgba.

⁵² O lẹ deba oghie iPaleti ya mhila li olimhi oyi iJesu.

† 23:34 Li zẹ Iwolo 22.18 ‡ 23:35 Li zẹ Iwolo 22.7 § 23:36 Li zẹ Iwolo 69.21

* 23:45 Li zẹ Okiali 26.31-33 † 23:47 Li zẹ Iwolo 31.5 ‡ 23:49 Li zẹ iLuk 8.2-3

⁵³ Ọ rọte ọọra apfida rue ọli tiemhile, ọ ri ide enegbo khuli ọli. Ọ ya rọli shi uji ufueche ni a to-a, ni ọgbọ ọa kpe ri olimhi to ghue.

⁵⁴ Ogbẹle ni o mama ele iyemheya oyi egbo iJu lo. Ele iyemheya o she lese ya ramhi.

⁵⁵ Eni ikpotso ni e rọte iGalili deba iJesu bhale e deba li ya me uji ni ọ ri iJesu to. Ali abi ọ li rọli to.

⁵⁶ Igho e nyene egbe je apfe ya rue ituale ni a ku e shi olimhi egbe. §

Ama e yemhe-a ogbẹle iyemheya. E ri ona ri ushi ogbẹle iyemheya gbe akanya.

24

*Ite-eghuli-guale oyi iJesu
(iMat 28.1-10; iMak 16.1-8;
iJon 20.1-10)*

¹ Ele ni odode na elemhi efo uka, ogbie fiefie, eni ikpotso e bhale uji ni a ri iJesu to.

² E me khi eche ni a ro khukhu oni uji, khi a gheghele ọli ode-a.

³ Ama abi e ro lo elemhi oni uji, ẹa me idiegbe oyi iJesu.

⁴ Abọ e sha we, abi e li migha a sa ọ egho, e me khi emose aava ni e so itsua epopfo ni e ge nyanyanya e nu we migha.

⁵ Ulishi oo mu we, e nyese ukhomhi so alo ghue eke. Ama eni emose e mhila we, "Elo o ze ni a ro nono ogbo ni o la agbo ifuabo oyi egbo ni e ghua?"

⁶ Ọa ke la ana, ọ she guale. A sato emini ọ gueye e abi ọ ro la iGalili khi:

⁷ 'Omi Ogbọ ọ mema ya me osue obọ oyi egbo olamhe, e gbe ọli-a shi apfida, ama elenuzi-esẹ ọ ya guale.' **

⁸ E tigbe yele eni ingme eyoli le.

⁹ E rọte atalimhi bhale, e gueye eniye odukhokho ogbaghuo enekpole ali egbo else ni e la agho.

¹⁰ IMeli ongi iMagidaleni ali iJoana ali iMeli inyi ijemhisi ali ikpotso ni e nu we kia e gueye eni ighiusomhi na kee.

¹¹ Ama eni eniye odukhokho e dabi khi ingmemhi afue eni ikpotso ee ngme, ẹa pfi eso shi we ọ

¹² Ama iPita ọ vule, ọ na ya je oni atalimhi, ọ ramhi agho, ọ nyese egbe bino elemhi oni uji, ọ lese me ide ni a ro khuli ọli egho agho, ama ọa me idiegbe oyi iJesu. Igho ọ li je apfe, abo e sha li.

*Okiali na ode Emausi
(iMak 16.12-13)*

¹³ Oni ogbẹle ni e ngme ena, eniye odukhokho aava eyi iJesu e je eoli Emausi ni o khi imali igbaghuo rọte iJerusalemu.

¹⁴ E nu egbewe ngme ingme enana ni a me.

¹⁵ Abi e li ngme ni e li le egho, iJesu ọ khu we e, e ga kia le e.

¹⁶ E me ọli ama ẹa lese oni ọ khi.

§ 23:56 Li ze Okiali 20.10; iDeut 5.14 * 24:7 Li ze iMat 16.21; 17.22-23; 20.18-19; iMak 8.31; 9.31; 10.33-34; iLuk 9.22; 18.31-33

17 Ijesu o mhila we, “Elo a nu egbe a ngme abi a li kia lewe ena?” E mu migha, alo eyewe e khi osoli-osoli.

18 Oghuo elemhi we ni a lu iKilopasi o mhila li, “Opfese oshēbhe u khi shi eke iJerusalemu ni o a lese emini a me eke ona aenelwe?”

19 “Emhi eneghuo a me?” Ijesu o mhila we. Eni emose e oli, “Emini e li ijesu ona iNazarēti. Omekeguele omose ona o khi, o mhue ekpabo oyi Eshinegba. Egbō e lese oli shi emini o riele ali ingmemhi ni o gbolo o ngme.

20 Ighie eyi ekpodalougamhi eyi Eshinegba ali enighie e rue oli lasele ni a gbe-a shi oora apfida.

21 Eri anye dabi khi loli o ya pfa egbo iZireni shi eke. Amo li ele ese abi a te me ingme ena.

22 Ikpotsō eghuo eyi anye e ri abo sha anye. E je uji oyoli amo uzogbe fiefie,

23 Ama e a me idiegbe oyoli. E nyene egbe bhale ya gue khi wewe e me igeni ni e gueye wewe khi o she guale.

24 Egbō eghuo elemhi anye e she je obō ya bino e me khi abi e ngme o khi, ama e a me ijesu.”

25 Ijesu o o we, “A khi eyeghe e, ni udu oyee o a nyanya mie emini emekeguele e ngme suo.

26 Aa lese khi ina oni Omiepfuese o li ya me osue neni o lo ufumhi oyoli?”

27 Oni ijesu o tigbe ri emini a keke shi Ebe-no-pfuase lo we eso ni e la ebe Ushi

oyi iMosisi ali eyi emekeguele nya.

28 Abi e li ti ramhi ukuku eoli ni e je, ijesu o riele abine khi loli ti okiali oyelwe ya je odalo.

29 Ama ee ti oli, ee oli, “Nu anye kushi ana irari khi ogbe o she vu, obili o she gbolo-a bi.” Igho o deba we o ya kushi na we.

30 Abi e kerō shito ya ke le eminale, o rue oni ibuledi, o kphemhi, o khi oli-a, o kemhi na we.

31 Eghēghe ana, alo eyewe e khueghie-a, e tigbe lese khi loli lo. Eri-tse o kele-a, e a ke me oli.

32 E egbewe, “Oo khi eri o li abi erali shi awa udu abi o ro la ode nu awa ngme ni o gbo ro gue abi Ebe-no-pfuase o ngme ye awa?”

33 Aghoagho e vule nyene egbe ukhokho je iJerusalemu. E bhale ya e eniye odukhokho ogbaghuo ali egbo enekpole ni e ga legba,

34 ni e lie, “Egbegbi ingme lo khi Onomhue o she guale, o ri egboli gbo khasē iSamō.”

35 Igho eni etuava egho e guele emini a me ode, ali abi e lese ijesu eghēghe ni o ro khi ibuledi-a na we.

Ijesu o ri egboli khasē eniye odukhokho eyoli

(iMat 28.16-20; iMak 16.14-18; iJon 20.19-23; Ika 1.6-8)

36 Abi e ro kie ghō ngme oni ungmemhi, ijesu o migha we iteva o o we, “Opfomhe o nu e la.”

37 E yila, ulishi óó mu wẹ, e dabi khi ayemhẹ olimhi ọ khi.

38 Ọọ wẹ, “Elo o zẹ ni udu oye ẹ o rọ nighise, ni a rọ gbo mhọli akhọkhomhẹ shi udu oye ẹ?”

39 A bino abọ ali awẹ eyemhẹ. Mhemhẹ lo. A ri obọ timhẹ ni a mẹ khi olimhi ọgbo ọa ya mhọli idiegbe ali igua, nabi a mẹ khi mhi mhọli ena.”

40 Abi ọ rọ ngme na se, ọ ri abọ ali awẹ eyọli khasẹ wẹ.

41 Abi oghẹlẹ ali ọshabọ ni o vọ wẹ udu ọa kie zẹ wẹ mie shi ọ ne, iJesu ọ mhila wẹ, “A li mhọli emhikhoghwo shi akana ni a le ghọ?”

42 E rue afele ni a nye na li,

43 Ọ rue ọli la akpewẹ rọli le.

44 Ọọ wẹ, “Ena e khi emini mhi gueye ẹ abi mhi rọ kie nu ẹ la. Ingme eyemhẹ nya ni a kẹkẹ shi Ushi oyi iMosisi ali, ebe eyi Emekeguele eyi Eshinegba ali Ebe Iwolo, e mema bhale ya tse.”

45 Ighọ ọ khueghie wẹ udu-a ni e mẹ asha lẹsẹ emini a kẹkẹ shi Ebe-no-pfuasẹ.

46 Ọ gueye wẹ, “Emini a kẹkẹ shi eke na. Omiepfuese ọ ya mẹ osoli, ọ rọte eghuli guale ẹlenuzi-esẹ,

47 ẹghẹghẹ aghọ a ya ri eva oyọli ri imupfi ali irolamhẹ-topfa tse abọ ushishi nya, rọte iJerusalemu gba eke le.

48 A ga mẹ eni emhi enana nya.

49 Mhi ya ri emini Itamhẹ ọ shobọ ghie usomhi ghi ẹ, eri-tse a la elemhi ẹoli iJerusalemu ramhi ni a rọ ya

ri itoto rọte obini o yagha ghi ẹ ni o ya kpha ẹ sọ.”†

Inga idane oyi iJesu

(iMak 16.19-20; Ika 1.9-11)

50 Abi ọ rọ rue wẹ vu ya fiẹ, ni e rọ kia ramhi iBẹtani, ọ tsua abọ idane, ọ ku isemhẹ na wẹ.

51 Abi ọ li ku isemhẹ na wẹ, ọọ zẹ wẹ obọ, a rue ọli nga idane.‡

52 Ighọ e nyese ukhomhi ga li. E mu egbe pfi ri ukpokpomhi oghẹlẹ je iJerusalemu.

53 E kiele la owa ugamhi no funẹ tse, e kuẹghie Eshinegba.

† 24:49 Li zẹ *Ika 1.4* ‡ 24:51 Li zẹ *Ika 1.9-11*

Usohmi Onete oyi iJesu iKirisiti ni iJoni O keke

Ungmemhi Oni o khi agbo

¹ Igbaekele, Ungmemhi O she kpẹ la o. Oni Ungmemhi o nu Eshinegba la. Oni Ungmemhi O khi Eshinegba.

² Igbaekele loli ali Eshinegba e te ga la.

³ Obo oyoli a te ma emhikpa. Aa me emhikhoghuo ni a ma ni aa rote obo oyoli ma.

⁴ Loli o mholi agbo na agboagbo. Oni agbo oyoli, o ri akpa na egbo na agbo.

⁵ Oni akpa o ge nga alo ebili, ama alo ebili o do be pfuse oli a.

⁶ Eshinegba o ghie omose oghuo ni a lu iJoni ghi egbo na agbo.*

⁷ Loli o bhale ya pfi otsela shi oni ogbo ni o khi oni akpa, ni egbo nya e rote oni otsela miesuo.

⁸ Oa khi oni iJoni o khi oni akpa; eri o li bhale ya pfi otsela shi oni akpa.

⁹ Loli o khi oni egbegbi akpa, ni o ya bhale agbo ni o ya ri imeke na egbo nya.

¹⁰ Oni Ungmemhi o la agbo, egbo ea lese oli, abi o ri rie khia khi loli a rote obo oyoli ma agbo.

¹¹ O bhale deba egbo eyoli, ea lama mie oli.

¹² Ama, ebubu ni e da lama mie oli, ni e lese mie eva oyoli suo, wewe o ri afu na e ro mele imi Eshinegba a.

¹³ Oa khi abi ita ali inyọ e lie bia ogbo alo-gbugbugbu a ri ona ngme, ama Eshinegba o khi ita we.

¹⁴ Oni Ungmemhi o mele ogbo-a, o nu awa la agbo ona, awa me ufumhi oyoli, ikhi ufumhi oyi omi Ita otuoghuo kpe ni Ita o mholi, oni o rote obo oyi Ita bhale, oni o mholi isomhelemhi ali igesikia gbeku o.

¹⁵ IJoni o kia tse abo ingme oyoli ye egbo, o tse, o tse, o tse, "Ona mhi gweye e khi o ya bhale odukhokho oyemhe, ama o fu dose mhe itobo khi o kpe la agbo neni a bia mhe."

¹⁶ Rote isomhelemhi oyoli ni o gbeku o, awa te mholi ikhivose ododa.

¹⁷ Obo oyi iMosisi Eshinegba o te ri ushi na awa, ama obo oyi iJesu iKirisiti isomhelemhi ali igesikia e te bhale.

¹⁸ Ogbokhoghuo o me Eshinegba ghue. Ama, Omi Eshinegba otuoghuo kpe, ni loli ali Eshinegba e khi oghuo, ni loli ali Ita e ga la, loli o ze ni agbo e ro lese Ita.

IJoni oo khi loli e khi Omiepfuese

(iMat 3.1-12; iMak 1.1-8; iLuk 3.1-18)

¹⁹ Egbhali eyi iJu ni e la iJerusalemu e ghie eni ee ralo ugamhi oyi Eshinegba ali eni

* 1:6 Li ze iMat 3.1; iMak 1.4; iLuk 3.1-2

ẹ nu wẹ gbe ikanya owa-ugamhi, e ka mhila iJoni oni ọ khi.

²⁰ IJoni ọa rọ sheli wẹ, ọ nyanya sọ wẹ ọ, ọ gueyẹ wẹ gboo khi ọa khi lọli khi oni Omiepfuese.

²¹ E mhila li, “Oghuo u ke khi shọ? Elaja u khi?”†

IJoni ọọ, “Iiye.” E gbo mhila li.

“Omekẹguele ọyi Ẹshinẹgba u khi?”

Ọ ọ “Iiye.”

²² E gbolo ẹ, “Gueyẹ anye oni u khi shọ, ni anye mẹ emini anye ya gueyẹ eni e ghie anye, elọ yeyẹ u khi shọ?”

²³ IJoni ọ rọte ungmehi ni Azaya omekẹguele ọyi Ẹshinẹgba ọ ngme sọ wẹ ọ, ọọ, “Mhẹmhẹ mhi khi uruli ọyi ọgbọ ni o la ọdagbe ẹ tsesẹ, ni ọọ liẹ, ‘A riẹlẹ udu oyẹ ẹ shi ekẹ khẹ Ọnọmhue ni ọ ọ bhale.’”‡

²⁴ Egbọ ni ẹgbọ iFarisi e ghie ghi iJoni, e mhila li,

²⁵ “Abi u a rọ khi Omiepfuese, ni u a rọ khi Elaja, wẹkhi oni omekẹguele ọyi Ẹshinẹgba u khi ena, elọ ọ zẹ ni u rọ ọ batazi ẹgbọ shọ?”

²⁶ IJoni ọ sọ wẹ ọ, ọọ, “Amẹ mhi rọ batazi ẹgbọ memena, ama ọgbọ ọghuo ọ la ẹ iteva memena ni aa lesẹ ne.

²⁷ Lọli ọ ke ya bhale odukhokho oyemhẹ, ni o khia khi mhia fu ramhi oni ọ ọ taghiẹ uli ọyi ẹkuẹ ni ọ rọ sọ a.”

²⁸ Obini iBẹtani ni o la ukiẹkiẹ obini ovọ o te ẹ ngale shi okẹ iJodani, ashini iJoni

ọ la batazi ẹgbọ, a la mẹ eni ingme ena nya.

Omi osumha ọyi Ẹshinẹgba

²⁹ Ogbeakọlọ iJoni ọ mẹ khi iJesu ọọ bhale, iJoni ọ gueyẹ ẹgbọ, ọọ, “Omi Osumha ọyi Ẹshinẹgba ni ọ rue olamhẹ eyi agbọ vu na!

³⁰ Ona mhi ngme abi mhi rọ liẹ, ‘Omọse ọghuo ọ ya bhale ni ọ fu dọsẹ mhẹ, itobọ khi ọ she kpẹ la ọ neni a bia mhẹ.’

³¹ Egbegbi mhẹmhẹ mhia kpẹ lesẹ ọli ghue, ama eri mhi bhale ri amẹ ẹ batazi ẹgbọ ini mhi mẹ asha ri ọli khasẹ ẹgbọ iZireni.”

³² Ighọ iJoni ọ pfi ọtsele ona khi, “Mhi mẹ khi Ayemhẹ ọ li abi anekhukhu rọte idane tiemhie ya ma li egbe.

³³ Mhia kha kpẹ lesẹ ọli, ama oni ọ ghie mhẹ mhi ri amẹ ke batazi ẹgbọ, ọọ mhẹ, ‘Oni u da mẹ khi oni Ayemhẹ ọ tiemhie shi ọ khi ọ migha li egbe ne, lọli ọ khi oni ọ ya ke ri Ayemhẹ-nọ-pfuase batazi ẹgbọ.’

³⁴ Ighọ eni emini a gueyẹ mhẹ ena e li de shi ukpẹloe oyemhẹ, ni o remhẹ gueyẹ ẹ khi Omi Ẹshinẹgba ọ khi.”

Eniye odukhokho eni odode ni iJesu ọ zẹ

³⁵ Ogbeakọlọ iJoni ali eniye odukhokho eyọli etuava e gbo migha akaghọ.

³⁶ Abi iJoni ọ rọ mẹ khi iJesu ọọ dọsẹ, ọọ, “Bino Omi osumha ọyi Ẹshinẹgba.”

† 1:21 Li zẹ iDeut 18.15,18; iMala 4.5 ‡ 1:23 Li zẹ Aza 40.3

37 Abi eniye odukhokho etuava egho e ro suo ona te, e deba iJesu vu.

38 IJesu o pfi alo ukhokho, o me we khi ee deba lue, o mhila we, "Elo a nono."

Ee oli, "Osese, obo wa la?"

39 Oo we, "A bhale ya bino." Igho e deba li, e me obini o la. Agho e ke nu o la elegeho nya rothe agogo ene ee oghuota vu.

40 Otuoghuo eniye odukhokho etuava ni e suo emini iJoni o ngme ni e deba iJesu vu o khi Aduru, inyoghuo iSamọ iPita.

41 Igho Aduru o nyanya kpe te odode nono iSamọ inyoghuo oli gueye, oo, "Anye she me Omiepfuese." (Emini a ri iKirisiti ngme khi, Omiepfuese.)

42 Aduru o rue iSamọ bhale ghi iJesu.

IJesu o bino oli, oo, "Yeye u khi iSamọ omi iJoni, iKefasi a ke e ke lu e. iPita ali iKefasi emhi oghuo a rewe ngme."

IJesu o lu iFilipu ali iNatanię

43 Ogbeakolo, iJesu o ke mu egbe khi loli rothe agho vu ya ke je iGalili. O me iFilipu, oo li, "Deba mhe."

44 Onge iBetisaida ni Aduru ali iPita e khi iFilipu o li khi.

45 IFilipu o ke nono iNatanięli me. Oo li, "Anye she me oni iMosisi o keke ingme oyoli shi ebe ushi, ni emekeguele e gbo keke ingme oyoli shi Ebe-no-pfuase, ikhi iJesu onge iNazaręti Omi iJosefu."

46 INatanięli oo, "INazaręti we, eminete o li rothe iNazaręti e lase?"

IFilipu oo, "Lese bhale ya bino tse."

47 Abi iJesu o ro me iNatanięli khi oo bhale obini lue la, iJesu oo, "Egbegbi onge iZireni na, oni oa ya lo egholi."

48 INatanięli o mhila li, "Se u gho lese mhe?" IJesu oo, "Mhi she me abi u ro la udi okhua eni neni iFilipu o lu e."

49 INatanięli oo, "Osese, Omi Eshinegba u khi, oghie oyi iZireni!"

50 IJesu oo, "Itobo khi mhię khi mhi me e udi okhua eni u ro tigbe miesuo, u ya me emini e dose ona."

51 O gbo gueye we, "A ya me khi idane o khueghie-a, a me khi igeni eyi Eshinegba e rothe idane e tiemhile ya nga shi mhemhe Omi Ogbo o."§

2

IJesu o ri amę mele onyo a

1 Ogbele onuzi-ese, a la iKena na eke iGalili ri omueshi ya ngeli. Inyo iJesu o la agho,

2 A li lu iJesu ali eniye odukhokho eyoli shi oni ilegba ni a la ri omueshi ngeli.

3 Abi onyo ni a la agho da o ro pfo, inyo iJesu oo iJesu, "Onyo e pfo we ro da."

4 IJesu oo, "Inyo, khi ke gueye mhe emini mhi ya li, itobo khi egehe oyemhe oa ramhi ne."

5 Inyo iJesu o gueye eni e so onyo, "A ri emini o da gueye e gbe akanya."

6 Ikpokpomhi idubo eche esesa e la epfe agho na die amẹ ẹ shi ni egbo iJu e ro kpe egbe a abi ushi oyewe o ngme. Udubo oghuo oghuo, oo mie italabi amẹ ene.

7 Ijesu o gueye eni e so onyo, "A ka die amẹ vo eni idubo esesa." Igho e die amẹ vo ewe nya te unu tsue.

8 Igho oo, "A die o ghi oni o ri ukpeloe ẹ khu oni ilegba." Igho e die o ghi o.

9 Oni o ri ukpeloe ẹ khu ilegba o rote eni amẹ ni a she ro mele onyo a da bino, oa kpe lese obini a me we, ama eni ẹ so onyo e lese obini a me we. Igho oni omose o lu ughue-omueshi je epfe ete,

10 oo li, "Ashini a la ri ele emhi onana kpa, onyo onete onana a kpe ro lasele na egbo da khue neni a ri onyo oni o kpo-a lasele, Elo o ze ni a ro ri onyo ona kpe shi agho?"

11 Ona o khi akanya onyaloa oni odode ni ijesu o gbe. Eoli iKena na eke iGalili o la ri ele o. Onana o ro ri ufumhi oyoli khasẹ, ni eniye odukhokho eyoli e ro mie oli suo.

12 Ona o dose se, ijesu ali inyoli, ghe inyoghua oli eni emose ali eniye odukhokho eyoli e tiemhi obini iKapanomu. E la oobo ukuku ogbele.*

Ijesu o lo elemhi Owa oyi Eshinegba le

(iMat 21.12-13; iMak 11.15-17; iLuk 19.45-46)

13 Abi eghẹghẹ ukpe oyi egbo iJu ni a lu iPasova o ro ti bhale, ijesu o nga obini iJerusalemu.†

14 O bhale ya ẹ khi egbo e la elemhi apfe oyi Owa oyi Eshinegba ri ena ali isumha ali inekhukhu ẹ de. Eghuo e shito pfa ikpagho na egbo.

15 Igho ijesu o rue ili ro lali utali ulumhekie ro khu we ya lase nya, ghe eni ena ali isumha; o miatse we ikpagho kua, o ghi we abo okphe kpha ku-a.

16 Oo eni e ri inekhukhu ẹ de, "A muno we ana-a! Se a li ri owa oyi Ita mhemhe ẹ mele oki a."

17 Eniye odukhokho eyoli e ya yelele emini a kpe keke shi Ebe-no-pfuase khi, "Ingme owa oye o mu mhe egbe gba."‡

18 Igho enighie eyi iJu e mhila ijesu ini o mholi ikanya onyaloa ni o ya gbe ni o ya rokhase ewe khi o mholi afu ni o ro ri ele enana nya.

19 Ijesu oo we, "A bighi oni Owa oyi Eshinegba ona nya gbe, mhi ya gbo ri ele o to ogbele ese."§

20 Enighie eyi iJu e ke mhila, "Owa ni a ri ikpe egbhueva ali esesa to wa lie khi u ri ogbele ese tse ya ri ele to?"

21 Ama egbe oyoli o ri oni Owa oyi Eshinegba ni o ngme khokho.

22 Abi o ro ghu-a ni Eshinegba o ro gbo guise o le, eniye odukhokho eyoli

* 2:12 Li ze iMat 4.13 † 2:13 Li ze Okiali 12.1-27 ‡ 2:17 Li ze Iwolo 69.9 § 2:19 Li ze iMat 26.61; 27.40; iMak 14.58; 15.29

e ro tigbe sa ya to emini o ke ngme. Ona o rewe mie ungmehi oni o la Ebe-nopfuase, ali ingme oyi iJesu lolo suo.

²³ Eghēghe ni iJesu o ro la iJerusalemu, ikhi eghēghe ukpe iPasova, ebubu egbō e ro mie oḷi suo itobō khi e me ikanya onyaloa ni o gbe.

²⁴ Ama iJesu o ya regbenga we obō itobō khi o leṣe emini egbō e khi pfo nya.

²⁵ Oa khi ogbō o ke gbo ya gue ingme oyi egbō ye ḷi, itobō khi o she leṣe emini o la we udu.

3

Ijesu ali iNikodemosi

¹ Omoṣe oghuo o la o ni o la otu iFarisi, o khi okhemhue ni o mu eloe shi elemhi iJu, a lu ḷi iNikodemosi.

² Oni omoṣe ona o bhale deba iJesu eliyose eleghuo, oo li, “Oseṣe, anye leṣe khi oni oo seṣe ni o roṣe obō oyi Eshinegba bhale u khi. Itobō khi ogbōkhoghūo o ya ya doḃe ke gbe ikanya onyaloa enabi u wa gbe ena ini Eshinegba o nu ḷi la.”

³ Ijesu oo li, “Mhi gue igesikia ye khi, ini aa li riḷe ogbō bia, o ya ya me Eghiele oyi Eshinegba.”

⁴ INikodemosi oo li, “Se a li gbo riḷe ogbō ni o womhe se bia? Eri o gbo ya lo inyoli elemhi ni o gbo riḷe ḷi bia?”

⁵ Ijesu o solī o, oo li, “Mhi gue igesikia ye khi, aa me ogbōkhoghūo ni o ya lo Eghiele

oyi Eshinegba ini aa bia li elemhi amē ali elemhi Ayemhe.

⁶ Omoṣe ali okpotso ee bia ogbō alo gbugbugbu, ama Ayemhe oyi Eshinegba a ro riḷe ogbō o bia elemhi ayemhe.

⁷ Khi ze ni ungmehi ni mhiye khi, ‘A mema riḷe e ya bia,’ o ligho ri abo she.

⁸ Obini o ghole akpekpeli o li e je, eri awa lie suo abi o lie li, ama awa aa ya me ḷi. Igho ingme oyi eni a riḷe bia elemhi Ayemhe oyi Eshinegba e li.”

⁹ INikodemosi o mhila iJesu, “Se a lie me ghō?”

¹⁰ Ijesu oo, “Ye ye ukpokpo-ogbō oḡuebe ni u lie seṣe egbō eke iZireni waa leṣe ona?”

¹¹ Abi o li mhi li gue ḷi e ye khi emini anye leṣe, anye e ngme. Emini anye me, anye e gueye agbō. Ama aa nono ni a mie usomhi oyi anye suo.

¹² Ini waa mie mhe suo ini mhi gue ingme ena agbō ona ye, se u lie mie mhe suo ini mhi gue ingme iloghie ye?

¹³ Ogbōkhoghūo o kpe ye iloghie jele ghue, se ni mhemhe Omi Ogbō ni mhi roṣe iloghie tiemhie.

¹⁴ Abi iMosisi o ke li ge enye ni a ri igolu lumhi shi ukpokpo, ni o tsua li idane obini odagbe ifufu, igho a mema li tsua Omi Ogbō idane.*

¹⁵ Eghēghe agho, onini o da mie ḷi suo, o ya mholi agbo na agboagbo.

* 3:14 Li ze iNoba 21.9

16 “Irari khi Eshinegba ọ ọ nono ingme oyi agbo gba, loli ọ ro rue Omioli oni omose otuoghuo kpe na agbo, egheghe agho onini ọ da mie oli suo ne, ọa ya pfua, ama ọ ya mholi agbo na agboagbo.

17 Eshinegba ọa ghie omi oli bhale agbo, ni ọ bhale ya pfa ezọ mu egbo na agbo, eri ọ ghie oli, ọ bhale ya mie agbo pfuese.

18 Aa ya pfa ezọ mu oni ọ da mie Omi Eshinegba suo, ama oni ọa da mie oli suo, a she pfa ezọ mu oli se, itobo khi ọa mie Omi Eshinegba otuoghuo kpe suo.

19 Abi a lie so oni ezọ na. Akpá o bhale agbo, ama egbo e nono alo ebili ne, itobo khi ikanya ebe e e gbe.

20 Oni ọ gbe ikanya ebe ọa ya nono akpá, ọa tigbe e bhale akpá itobo khi ikanya eyoli e ya ri udi lasese ini e bhale akpá.

21 Ama oni ọ da ri ungememhi oyi Eshinegba ni o khi igesikia a gbe akanya ne, ọ bhale akpá ashini a te e me eke, ni ikanya eyoli e rokhase khi ode oyi Eshinegba ọ rote.”

Otsẹle ni iJoni ọ pfi shi ingme oyi iJesu

22 E lese iJesu ali eniye odukhokho eyoli e je eke iJudia. Ọ nu we la oobọ ukuku egheghe, ọọ batazi egbo.

23 IJoni ọ la Ainoni ni ọa nuẹ shi iSalimu li batazi egbo, itobo khi amẹ e lo bu shi agho.

Egbo e je agho deba li ni ọ batazi we.

24 Egheghe agho aa mu IJoni shi owa ighumha ne.†

25 Eniye odukhokho eyi iJoni eghuo e nu ogbo iJuoghuo khako shi ingme ikpegbe a ona ugamhi.

26 Igho e le deba iJoni, ee, “Osesẹ, u ke ye lele omose oghuo ni u ke batazi, oni u ngme ingme oyoli epfe oke iJodani elegeho, ọ li e batazi egbo, loli egbo nya e ke na deba memena.”

27 IJoni ọọ we, “Aa me emhikhoghuo ni ogbo ọ mholi ni ọa khi Eshinegba ọ roli na.

28 Ee ena a ga suo abi mhi ro lie khi ọa khi mhemhe mhi khi Omiepfuese, khi eri a li ghie mhe ralo na li.‡

29 Omose oni ọ rue omueshi ọ khi ughue omueshi. Eri omole oni omose oni ọ rue omueshi ọ ri esọ shi eke migha ke khe ughue omueshi. Ọ kha da suo khi omole ọ da ngme ne, egbe ee mu oli. Igho egbe e lie mu mhe memena, igho oghelẹ oyemhe o gbo vọ.

30 Ufumhi oyoli o mema ke nga shio, ufumhi oyemhe ọ ọ ke tiemhi.

31 “Oni ọ rote ilimhi tiemhie ọ fu dose egbo nya. Oni ọ rote agbo ana lasese, ọna agbo ona ọ khi. Irarigho, ingmemhi eyi agbo ana a ke ngme. Ama oni ọ rote ilimhi tiemhie ọ fu dose egbo nya.

32 Emini ọ me ali emini ọ suo ilimhi, ọ gue e ye egbo, ama ogbokhoghuo ọa mie oli suo.

† 3:24 Li ze iMat 14.3; iMak 6.17; iLuk 3.19-20 ‡ 3:28 Li ze iJon 1.20

33 Oni o da mie emini o gueye agbo suo ne, eri o rokhasẹ khi igesikia Eshinegba o ngme.

34 Oni Eshinegba o ghie, oo ngme ungmehi oyi Eshinegba, itobo khi eri Eshinegba o ri Ayemhe oyoli na li gbe ku o.

35 Eri Eshinegba Ita o nono ingme oyi Omioli oni omose, irarigho o ro ri emhikpa nga li obo. §

36 Oni o da mie Omioli suo ne, eri oo mholi agbo na agboagbo, ama oni o da kie oli ne, o a ya mholi agbo, eri ibiselemhi oyi Eshinegba oo deba li agboagbo.”

4

Ijesu o nu okpotso onge iSameria ngme

1 Egbọ iFarisi e suo khi ebubu egbo e deba iJesu, ali khi o gbo batazi eniye odukhokho bu dose iJoni.

2 Oa khi iJesu o ri obọ oyoli mema batazi egbo, ama eniye odukhokho eyoli e batazi egbo.

3 Igho abi iJesu o ro suo ingme ni egbo e ngme, o rote eke iJudia vu, o mu egbe pfi je iGalili.

4 O ya rote ode iSameria dose abi o ro le iGalili.

5 Igho o bhale eoli na lu iSicha ni o la eke iSameria, ni o a nuẹ shi eke ni iGiekopu o ro na iJosefu omioli oni omose.*

6 Agho ilijia oni a lu ilijia oyi iGiekopu o la. O lose iJesu

itobo okiali ni o kia ramhi agho, igho o shito epfe oni ilijia. Oguota o lese mu eke oni egheghe.

7 Okpotso onge iSameria oghuo o bhale ya a amẹ. Ijesu oo li, “Diẹ amẹ na mhe da.”

8 Eghẹghe agho eniye odukhokho eyoli e she lo ifuapfe ya de eminale.

9 Oni okpotso onge iSameria oo iJesu, “Onge iJu u khi, mhemhe mhi khi onge iSameria, se u ke li a lie mhi diẹ amẹ ne da?” Emini o ze ni o ro ngme na khi, egbo iJu ali egbo iSameria ea ri egbe e ti emhi egbe.†

10 Ijesu o li, “Ini u lese isomhopfa ni Eshinegba o ro na ogbo lo, ni u gbo ro lese emini ogbo ni oo mhila e amẹ o khi lo, u kha mhila li o ri amẹ ne da. Eghẹghe agho ni o ri amẹ ni e ri agbo o na ogbo ne da.”

11 Oni okpotso o ke mhila iJesu, oo, “Oga, waa mholi emhi ni a ro o a amẹ, oni ilijia o limhi. Obo u ke te ya me eni amẹ ni e ri agbo o na ogbo na a mhe da?”

12 Eri u ke lie khi ye ye u fu dose iGiekopu ita anye kpa?” Loli o to oni ilijia ona, ni o ri oli na anye, ni loli ali imioli ali elamhako eyoli e gbo te o da.

13 Ijesu o ya so li o, o li, “Onini o da da amẹ eyi ilijia ena, okiamẹ o gbo ya gbe oli.

14 Ama okiamẹ o a tigbe ke e gbe onini o da da amẹ ni mhi ya ro na li da. Itobo khi amẹ eyemhe e ya mele oke ni

o a ke ya khakha ghue shi o li elemhi, ni o ya ke sha kule ri agbo na agboagbo na li.”

15 Oni okpotso oo, “Oga Kpekpe ri eni ame na mhe da ini okiamē o khi ke gbo gbe mhe, ini mhi khi ke gbo bhale akana ya a ame.”

16 Ijesu oo, “Ka lu omose ni o rue e shi bhale.”

17 Oni okpotso oo, “Mhia mholi omose.” Ijesu oo li, “Igesikia lo, ni u we khi u a mholi omose,

18 itobo khi u she kpe mholi emose oshe ni u kpe ngeli na. Oni u ga na la memena, o a khi loli o re shi.”

19 Oni okpotso oo, “Kie! Oga, mhi she me o li khi omekeguele oyi Eshinegba u khi.

20 Ukhomhi ute onana eni e bia anye egbo iSameria, e kpe la ga ugamhi, ama ee egbo iJu, e khi iJerusalemu awa mema la ke ga ugamhi.”

21 Ijesu oo li, “Mie mhe suo khi eghēghē oo bhale ni u a ke ro la ukhomhi ute ona, we khi iJerusalemu ya ga Ita.

22 Emini ee egbo iSameria aa lese, a ga, ama anye lese emini anye e ga itobo khi obo oyi iJu imiepfuese o te bhale.

23 Ama, eghēghē oo bhale, oni eghēghē o she ramhi ni egbo eni e ri igesikia e ga Eshinegba e ro ya ke ga li abi Ayemhe oyoli o li rokhasē we, e gbo te ode igesikia ga li, itobo khi egbo eni e ligo o ga li, oo nono.

24 Ayemhe oyi Eshinegba o khi, eni ee ga li e mema ya ke ga li abi Ayemhe o rokhasē we, ali rote ode igesikia.”

25 Oni okpotso oo iJesu, “Mhi lese khi Omiepfuese (oni a lu iKirisiti) o o bhale. O kha bhale, o ya khueghie emhikpa gueye anye.”

26 Ijesu o so oni okpotso o, “Loli mhi khi ni mhi nu e ngme ena.”

27 Abi e kie li ngme, eniye odukhokho eyoli e bhale ya e khi o nu okpotso o ngme, o ri abo sha we. Ongewe o a mhila li, “Elo wa nono?” Wexhi e ri e mhila li, “Elo o ze nu u ro nu o li e ngme?”

28 Igho oni okpotso o ze akhe ame oyoli obo shi agho, o je ifuapfe kia gueye egbo, oo lie,

29 “A bhale ka ghe omose oghuo ni o gue emini mhi ga riefe ghue nya ye mhe. Omiepfuese o fe ya khi?”

30 Egbo e ve gbii te ifuapfe bhale ashini iJesu o la.

31 Eghēghē agho, eniye odukhokho eyoli e ke lema li, “Osefe, waa ke le eminale.”

32 Ijesu oo we, “Mhi mholi eminale ni mhia le ni aa lese.”

33 Eniye odukhokho eyoli e mhila egbe we, “Eri ogbokhoghuo o kpe ri eminale ghi o le?”

34 Ijesu oo we, “Eminale oyemhe khi, ni mhi riefe oghuemhe oyi oni o ghie mhe, ni mhi ro gbo gbe akanya oyoli pfo.

35 Aa she ngme o khi, ‘Tki ene e ke kpole ni a ro ke ya khiese emhi ekomhi?’ Mhi gue e ye e memena, a bino khi emhi ekomhi na ishemhi e she bie ni a khiese.

36 Memena a she e fali eni e khiese ishemhi ota akanya, ni

e ke khiëşë ikhiëşë ni o ri agbo na agboagbo o bhale. Eghëghë agho ni a bhale ya e khi eni e ro ko ali eni e khiëşë e ga kugbe ke ghele.

37 Onana o rokhase khi emini egbo e ngme khi igesikia o khi, ikhi ungmehi ni oo, 'Oni o ro ko, o kioda shi oni o khiëşë.'

38 Eri mhi ghie e a ka khiëşë emini aa ro ko. Egbo elese e ya gbe ikanya ni e toto rewe ko, ama ee a me eleli ikanya eyewe.

Ebubu egbo iSameria e miesuo

39 Ebubu egbo iSameria ni e la oni eoli e ri itobo emini oni okpotso ogho o gueye we mie iJesu suo, ikhi emini o ngme ni oo, "A bhale ya ghe oni o gue emini mhi ga riele ghue nya yemhe."

40 Abi eni egbo iSameria e ro bhale deba iJesu, e lema li o kpekpe o ku shi na ewe. Igho iJesu o ku shi na we ogbele eva.

41 Ebubu egbo elese e gbo mie iJesu suo itobo ingmemhi ni o nu we ngme.

42 Eni egbo e ke oni okpotso, "Anye she miesuo memena. Oa khi itobo emini u gueye anye tse anye ro miesuo, ama itobo khi anye she suo emini o ngme, anye gbo lese egbegbo khi oni omose ona o ga khi oni Omiepfuese."

IJesu o ri omi oni o gbe akanya igometi ni o fu ze (iMat 8.5-13; iLuk 7.1-10)

43 IJesu o la iSameria ramhi ogbele eva. O rote agho vu je iGalili.

44 O she kpe lie khi egbo ea la eoli oyi omekeguele oyi Eshinegba a mu ekpe na li.[‡]

45 Abi o ro lo eke iGalili le, egbo iGalili e mie oli egbegbo, itobo khi ukpeloe oyewe iJesu o la gbe ikanya onyaloa ni o la iJerusalemu gbe abi e ro riele ukpe iPasova. §

46 Igho iJesu o gbo nyene egbe je iKena ni o la eke iGalili, ashini o ke la ri ameh mele onyo a. Omose oghuo ni o gbe akanya igometi o la akagho, ni omi oli o la iKapanomu ghua.*

47 Oni omose o suo khi iJesu o rote eke iJudia e bhale iGalili. Igho o bhale ya lema iJesu o kpekpe o deba lue ya nu loli ri omi lue, ni oa ze ni o la akho eghuli ze.

48 IJesu oo, "Ini aa li me olele onyaloa ali oshabo, aa ya miesuo."

49 Oni omose ni o gbe akanya igometi, oo, "Onomhue, kpekpe bhale neni omimhe oo ghua."

50 IJesu oo li, "Ke je khi omie o ya ze, oa ya ghu." Oni omose o mie emini iJesu o gueye o suo, o o je.

51 Abi o ro je, eni ee ga li, e bhale ya lona li ode, e gueye oli, "Omie o she ze."

52 Oni omose o mhila we, "Eghëghë onoghuo oni omoo o la ze?" E gueye oli khi, "Agogo oghuo oguota oode oni omoo o la ze."

‡ 4:44 Li ze iMat 13.57; iMak 6.4; iLuk 4.24
iJon 2.1-11

§ 4:45 Li ze iJon 2.23 * 4:46 Li ze

⁵³ Oni ita oni omọ o sato khi egheghe agho tee ijesu o la gueye lue, "Omiẹ o ya ze." Lọli ali apfe ọli nya e mie ijesu suọ.

⁵⁴ Onana o khi akanya onyaloa onuzi-eva ni ijesu o gbe abi o ro rote eke iJudia bhale iGalili.

5

Ijesu o ri omose oghuo ni oo ghua ze

¹ Abi a ro me ingme ena se, ijesu o nga obini iJerusalemu shi ukpe ni egbo iJu e riefe.

² Mena, ode unuekpe ni a lu Isumha o la iJerusalemu. Ateke ni oke o chocho shi o la agho. IBetisaida a ri elemhi Iburu ee lu oni oke. Ikuku ikholo ishe ni a ghi e la gase oni oke.

³ Ebubu egbo ni ea ze, ikhi ezalo, ali eni ea dofe e kia ali eni e ghu egbe-a, e yeshi gase oni oke. Eri e migha khe egheghe ni a ro o wushe oni oke-a.

⁴ [Irari khi o mhọli egheghe ni agheni oyi Eshinegba o roo tiemhi elemhi oni oke ya wushe ọli-a. Egheghe agho onini o da kpe te odode ya tiemhi oni oke ini oni agheni o lese wushe ọli-a se, a roli ze, ughuamhi onini o tseku yese ọli e ngme]

⁵ Omose oghuo o la agho ni o she gba ikpe uye-ali-igbelelele abi o te e ghua.

⁶ Ijesu o bhale ya e oni omose shi agho, o lese khi o she la agho tese. Ijesu o mhila li, oo li, "Wa nono ni u ze?"

⁷ Oni omose ni o ghua o so li o, oo, "Oga mhi aa mhọli ogbo ni o ya kpaghie mhe obo mu mhe tiemhi elemhi oke. A kha da lese wushe oke-a se, ni mhi ro da mu egbe ni mhi tiemhi ne, ogbo lese o kpe tiemhi khe mhe."

⁸ Igho ijesu oo li, "Vule! Rue iya oye mhue obo ni u ke kia."

⁹ Igho oni omose o ze agho agho, o rue iya oyoli, oo kia. Elegeho o khi Ogbefe iyemhea oyi egbo iJu.

¹⁰ Enighie eyi iJu ee oni omose ni a ro ze, "Kieeee! Amo o khi Ogbefe iyemhea oyi egbo iJu. Eri u gbe ushi ni Eshinegba o ro na iMosisi-a. Ighuighue lo ni u ro tsua iya oye efe iyemhea."*

¹¹ Oni omose oo, we, "Omose ni o re mhe ze oo mhe, 'Rue iya o ye, u ke kia.'"

¹² E mhila li, "Oghuo o khi oni ogbo ni o gueye u rue ọli eke u ke kia?"

¹³ Oni omose ni a she ro ze, oa ke lese ogbo ni o ro li ze, itobo khi ijesu o she lo ifuabo egbo oni egheghe.

¹⁴ Abi a ro me ena se, ijesu o bhale ya e oni omose ni o ro ze elemhi Owa oyi Eshinegba. Ijesu oo li. "Ghekhe, abi u ro da ze se ena, khi ke gbo lamhe, ini emhi obe olese ni o dose ana o khi ya li e."

¹⁵ Igho oni omose o vu, o ya gueye egbo iJu khi ijesu o re lue ze.

¹⁶ Itobo khi ijesu o gbe ikanya enana Ogbefe iyemhea oyi egbo iJu, egbo iJu ee jili ọli.

* 5:10 Li ze iNee 13.19; iJere 17.21

17 Ijesu o gueye we, oo, “Egheghe kpa Itamhe o ro gbe akanya, igho mhemhe mhi li lie gbe akanya.”

18 Itobo ungmehi onana egbo iJu e ro mema gba li abi e li ya gbe oli-a. Oa khi itobo khi o gbe ushi oyi Ogbelẹ iyemhea oyi egbo iJu tse e ro ye ug-bamhi oyoli, ama itobo khi o o khi Eshinegba o khi Ita loli. E lie khi e li o ri onana a lie khi otu loli ali Eshinegba e khi.

Eshinegba o ri afu na Omi oli

19 Ijesu o gueye we, oo, “Abi o li mhi li gue oli e ye e, khi mhemhe Omi Eshinegba mhi aa dobe ya rieḷe emhikhoghuo ootsobo oyemhe, ama emini mhi me khi Eshinegba itamhe oo rieḷe, mhi ya ke rieḷe.

20 Irari khi Ita o nono ingme oyi omioli o ro ri emini o rieḷe nya khaḷe oli. O ya gbo ri emini e fu doḷe ena khaḷe mhe ni o ya sha e abo.

21 Abi Ita o li guise eni e ghu-a le ni o gbo ri agbo na we, igho mhemhe omi oli mhi li ya ri agbo na oni o ghole mhe.

22 Ita oa ya ri ogbokhoghuo gue ezọ, ama omioli o ri afu na, ni o ro ri egbo gue ezọ.

23 Ni a bhale ya e khi ogbokpa o mu ekpe na oni Omọ abi a li mu ekpe e na Ita. Oni oa da mu ekpe na oni Omọ oa mu ekpe na oni Ita ni o ghie oni Omọ.

24 “Abi o li mhi li gue oli e ye e khi, oni o da suọ ungmehi oyemhe ni o da gbo mie oni o ghie mhe suọ, o she mholi

agbo na agboagbo. Ogbo oa ya pfa ezọ mu oli, itobo khi o she roḷe ode eghuli lasele bhale ode agbo.

25 Abi o li mhi li gue oli e ye e khi egheghe oo bhale, oni egheghe na, ni eni e ghu-a e ro ya suọ ungmehi oyi Omi Eshinegba, eni e da suọ ungmehi oyoli, e ya la agbo.

26 Abi Ita o li khi oni o ri agbo o na ogbo, igho o ri oni agbo na Omioli, ni o li ke ro na egbo.

27 O she gbo ri afu ni a ro so ezọ na Omi oli, itobo khi loli o khi Omi Ogbo.

28 “Emini mhi gueye e, o khi sha e abo, itobo khi egheghe oo bhale ni ilimhi nya ni a she ro to e ya suọ uruli oyoli.

29 E kha da suọ oni uruli ne, e ya guale, e te uji fiḷe lase, eni e da rieḷe onete, e ya mholi agbo, ama egbo ebe e ya guale shi epfua.†

30 Emhikhoghuo oa la o ni mhi dobe ya rieḷe ootsobo oyemhe. Abi itamhe o gueye mhe mhi li so ezọ mhi lie so ezọ. Iso-ezọ oyemhe oni o migha lo, itobo oa khi abi o ghole mhe mhi lie gbe ikanya, ama emini o ghole Itamhe ni o ghie mhe mhi ro gbe akanya.

A pfi otselẹ shi oni iJesu o khi

31 “Mhi aa ya pfi otselẹ na egbe mhe. Mhi kha pfi otselẹ na egbe mhe, egbo ea ya rue oni otselẹ shi egbegbo.

32 Ogboese o la o ni o pfi otselẹ na mhe. Mhi lese otselẹ

† 5:29 Li ze iDan 12.2

oyoli ni o pfi e na mhe khi egbegbo lo.

33 “A she kpe ghie usomhi ghi iJoni, o pfi otsela shi oni o khi igesikia.”

34 Ama o a khi eri mhi mu ma otsela oyi ogbo, eri mhi mema gue otsela ni iJoni o pfi na mhe ye e ini a mholi imiep-fuese.

35 Eri iJoni o ge abi akpa ni o ro ode e kase e. Ukuku eghenge a lama mie oni akpa ni o ri egbe mu e.

36 “Mhi mholi otsela ni o fu dose otsela ni iJoni o pfi na mhe. Ika ni Itamhe o ro na mhe mhi gbe pfo ni mhi kiele e gbe, e pfi otsela khi Itamhe o ghie mhe.

37 Itamhe ni o ghie mhe o she pfi otsela shi ingme oyemhe. Aa tigbe kpe suo uruli oyoli wekhi eri a tigbe kpe me abi oli. §

38 Ungmemhi oyoli o a la el-emhi oye e, itobo khi aa mie oni o ghie suo.

39 A rosheka wena Ebe-nopfuase, ni a dabi khi loli o ya ri agbo na agbo agbo na e. Oni ebe ona loli o gbo pfi otsela shi ingme oyemhe.

40 Ama aa nono ni a bhale deba mhe, ini a mholi agbo.

41 “Oa khi ikueghie oyi egbo mhia nono.

42 Ama mhi lese e. Mhi lese khi aa mholi inono oyi Eshinegba shi udu o ye e

43 Eva oyi Itamhe mhi ro bhale, ama aa mie mhe, ogboese o kha ri eva oyoli bhale deba e, a ya mie oli.

44 Emini o ze khi aa miesuo khi, ikueghie ni o rote obo oyi egbo bhale a nono, ocho ni a kha ro ke nono oni o rote obo oyi Eshinegba bhale.

45 “A khi sa khi mhia ya pfa ez o mu e odalo oyi Itamhe. Oni o pfa ez o mu e khi iMosisi ni a regbenga.

46 Ini a mie iMosisi suo lo, a kha mie mhe suo itobo khi o keke ingme oyemhe shi ebe.

47 Ama abi aa ro mie emini o keke shi ebe suo, see a ke li ya mie emini mhi gueye e suo?”

6

Ijesu o ri eminale na ebubu egbo le

(iMat 14.13-21; iMak 6.30-44; iLuk 9.10-17)

1 Abi a ro me ingme enana se, ijesu o da oke oniemhi no khishi na lu iGalili lasele je egele o. (ITiberiasia a gbolo e lu oni oke.)

2 Igho ebubu egbo e ve deba li gbii, itobo khi e me ikanya onyaloa ni o ri eni e ghua ze.

3 Igho ijesu ali eniye odukhokho eyoli e nga ukhomhi ute ya shito.

4 Eghenge agho ukpe iPasova oyi iju o she ramhi.

5 Abi ijesu o yase alo, o me ebubu egbo ni e bhale deba li, igho o mhila iFilipu, o o li. “Obo awa te ya de eminale ni e ya lo egbo ena le?”

6 Eri ijesu o mema mhila li ni o ro mhesa oli bino, itobo khi o she kpe lese emini loli ya rieleshi shi udu.

7 IFilipu o so iJesu o, oo li. "O kha tseku khi ifata iki elele, ɛa ya lo ni a ro de eminale ni a me ya kemhi pfiɛɛ-pfiɛɛ na we tono unu!"

8 Otuoghua eniye odukhokho eyoli ni a lu Aduru ni o khi inyoghua iSamu iPita, oo li,

9 "Ukuku omoo la akana ni o tsua irui ibuledi ishe ali ifele aava. Ashi enana e kia ya ramhi, ni aa kemhi na egbo ena nya?"

10 IJesu oo li, "A ri eni egbo shito." Ebuli iyeye e vo agho egbegbo. Eni egbo nya e shito, emose ni e lao tse, e khi egbo agbele asha ishe.

11 IJesu o rue eni ibuledi, o tse Eshinegba uwegbe shi o, o kia kemhi na we. O gbo ligho rue eni ifele, o tse Eshinegba uwegbe shi o, o kemhi na we. Eni egbo e le, e khue.

12 Abi e ro le khue se, iJesu o gueye eniye odukhokho eyoli, oo, "A kia sanoo iku we eni e le kpole, a khi ze ni e li opfu-a."

13 Abi e ke ro sanoo we gbili, ighughu igbeva e vo iku ibuledi ni egbo e le kpole.

14 Abi eni egbo e ro me ikanya onyaloa ni iJesu o gbe, ee li, "Igesikia lo khi omose ona o khi omekeguele ni e khi o ya bhale agbo."

15 IJesu o lese khi eni egbo e she gba abi e li ya ri itoto roli khi oghie, igho, lolighuo o te we ifuaboo vu ya nga ukhomhi ute.

IJesu o kia ukhomhi oke
(iMat 14.22-33; iMak 6.45-52)

16 Abi ogbomhi o ro mu eke elegho, eniye odukhokho eyoli e tiemhi oke ni o khishi.

17 Agho e te lo oko-oké oniemi ni o tsua we da lase je iKapanomu. Oni eghenge obili o she bi, iJesu o a nu we la akagho.

18 Igho akpekpeli oniemi o tsua rughu we, oke o wushe kugbe.

19 Abi e ro kia ukhomhi oke ramhi abi imali ese ali ene gho, e me khi iJesu o kia ukhomhi oke e bhale. Ulishi oo mu we.

20 IJesu oo we, "Mhemhe lo, ulishi o khi ke mu e."

21 Igho, o ghole we ni e tsua iJesu shi elemhi oko-oké oniemi. Aghoagho oni oko-oké oniemi o ramhi egele obini e je.

Egbo e nono iJesu u gase

22 Ogbeakolo eni ebubu egbo ni e kpe la olase egele oke ukiekie obini o kpole ni eniye odukhokho e kpe te vu. E lese khi oko-oké oniemi oghuo tse o kpe la agho, eni egbo e lese khi eniye odukhokho eyoli tse e la oni elemhi oko-oké oniemi, ali khi iJesu o a nu we lo oni oko-oké oniemi abi o rote agho vu.

23 Iko-oké elese e rote obini iTiberiasia bhale epfepfe ashini iJesu o la ri eminale ni ebubu egbo le, ni o la tse Eshinegba uwegbe shi eni eminale.

24 Abi eni egbo e me khi iJesu ali eniye odukhokho eyoli ɛa la akagho, e dose lo iko-oké, ni e tsua we je

iKapanomu, ni e ya nono iJesu gasẹ.

Ijesu ni o khi Eminale ni o ri agbo o na ogbo

²⁵ Abi e ke ro me iJesu ukhomhi egele olase oke ukiekie obini uzeva, ee oli, "Oseşe, egheghe onoghwo u ro ramhi oola?"

²⁶ Ijesu o so we o, oo we, "Egbegbi-ingme mhi gue e ye e, o a khi itobo khi a me ikanya onyaloa ni mhi gbe a ro nono mhe, ama itobo eminale ni mhi ro na e le khue.

²⁷ A khi ke kuęęa nono eminale oyi agbo ona ni oo yese-a, ama a ke kuęęa nono eminale ni oo la o agboagbo ni Omi Ogbo o ro ya na e le. Itobo khi Eshinęba Ita o she ri obo nga li ukhomhi o mie shi oli o."

²⁸ Igho, e ke mhila li, e o li, "Elo anye ya ke li ni anye ro ya ke gbe akanya ni o ghole Eshinęba?"

²⁹ Ijesu oo we, "Akanya oyi Eshinęba khi ni a ro mie oni o ghie suo."

³⁰ E gbo mhila li, ee oli, "Ikanya onyaloa eneghuo u ya rieęę khasẹ ni anye me ni anye ro ya mie e suo? Elo u ya rieęę?"

³¹ Eni e bia awa e le eminale ni e rote idane de kule, Abi Ebe-no-pfuase o ngme khi. 'O ri eminale ni e te idane de kule na we le.' ^{*}

³² Ijesu o so we o, oo. "Egbegbi-ingme mhi gue e ye e, a khi iMosisi o ri eminale te idane tiemhile na e le, ama Itamhe lolighuo o rote idane ri

egbegbi eminale tiemhile ni e le.

³³ Itobo khi eminale ni Eshinęba o ro na ogbo, loli khi oni o rote iloghie bhale ya ri agbo na egbo na agbo."

³⁴ Ee oli, "Onomhue, kpekepe rote ana vu, ke ri oni eminale ona na anye le."

³⁵ Ijesu o so we o, oo we. "Mhemhe mhi khi eminale ni o ri agbo o na ogbo. Onini o da bhale deba mhe, okiamhi o a ke gbe oli ghue, oni o da mie mhe suo okiam e o a tigbe ke ya gbe oli.

³⁶ Ama mhi gueye e khi a she me mhe, ama aa kie mie mhe suo.

³⁷ Egb o ni Itamhe o ro na mhe nya e ya bhale deba mhe, oni o da bhale deba mhe ne mhia ya khu oli vu.

³⁸ Itobo khi eri mhi rote iloghie ilimhi tiemhile ni mhi ro rieęę oguęmhe oyi oni o ghie mhe, a khi ni mhi rieęę oguęmhe oyemhe.

³⁹ Oguęmhe oyi Ita ni o ghie mhe khi, ni a bhale ya e khi okhoghuo eni o ro na mhe o a wa mhe-a, ali ni mhi ro guise we le ri agbo na we, ogbeę ni o kpukhokho.

⁴⁰ Oguęmhe oyi Itamhe khi ni ogbokpa ni o da pfi alo bino omioli, ni o gbo mie oli suo o ya mholi agbo na agboagbo. Mhi ya guise oli le mhi gbo ri agbo na li ogbeę ni o kpukhokho."

⁴¹ Itobo khi iJesu oo we, "Mhemhe mhi khi eminale ni o rote iloghie ilimhi

* 6:31 Li ze Okiali 16.4,15; Iwolo 78.24

tiemhile,” eḡbọ iju e wọlọ shi ọ.

42 Ighọ e liẹ, “Onana ọa she khi iJesu omi iJosefu, ni anye leṣe itali ali inyọli? Seṣe ọ ke liẹ liẹ khi, ‘Mhemhe khi ibuledi ni o rọte iloghie ilimhi tiemhile.’”

43 IJesu ọ sọ wẹ ọ, ọọ, “A khi ke wọlọ.

44 Ogbokhoghuo ọa la ọ ni ọ ya bhale deba mhe ini ọa li khia khi Ita lẹlighuo ni ọ ghie mhe ọ ti ọ bhale, mhi ya guise ọli le gbo ri agbo na li ogbele ni o kpukhokho.

45 Omekeḡuele ọyi Eshineḡba oghuo ọ kpẹ keḡe ọli shi Ebe-no-pfuase khi, ‘Eshineḡba lẹli oghuo ọ ya seṣe eḡbọ eyọli nya.’ Ogbokpa ni ọ da ku esọa na Ita, ni ọ rọte obọ oyọli wena, ọ ya bhale deba mhe.†

46 Aa me oḡbọ ni ọ me Eshineḡba Ita ghue, ini ọa li khi oni ọ rọte obọ oyọli bhale. Lẹlighuo tse ọ me ọli.

47 Egbegbi ingme mhi gueye e, oni ọ da mie mhe suọ, ọ she mhọli agbo na agboagbo

48 Mhemhe mhi khi eminale ni o ri agbo ọ na oḡbọ.

49 Eni e bia e, e le eminale ni e rọte idane de kule obini ọdagbe-ifufu, e kie ghulua.

50 Ama ọna ọ khi eminale ni o rọte iloghie tiemhile, oni ọ da le ọli, ọa ya ghu.

51 Mhemhe mhi khi eminale ni o ri agbo ọ na oḡbọ, ni o rọte iloghie tiemhile. Onini ọ da le eminale ona, ọ ya mhọli agbo na agboagbo. Oni eminale ona, idiegbe oyemhe

lo, ni mhi ya rọ shi eke na agbo ni e rọ mhọli agbo.”

52 Abi iJesu ọ rọ ngme ona se, eḡbọ iju e nu egbe wẹ khako ekhako oniemi, ikhi. “Seṣe omose ọna ọ li ri idiegbe oyọli na awa ya le?”

53 IJesu ọọ, “Egbegbi ingme mhi gueye e, ini u a li le idiegbe, ni u gbo da ọlia eyi Omi Oḡbọ, wa ya mhọli agbo.

54 Oni ọ da le idiegbe oyemhe ni ọ gbo da ọlia eyemhe, ọ ya mhọli agbo na agboagbo. Ọ ya mhọli agbo itobọ khi mhi ya guise ọli le gbo ri agbo na li ogbele ni o kpukhokho.

55 Idiegbe oyemhe khi egbegbi eminale, ọlia eyemhe e gbo khi egbegbi emini a da.

56 Oni ọ da le idiegbe oyemhe ni ọ gbo da ọlia eyemhe, ọ la elemhi oyemhe, mhemhe mhi li la elemhi oyọli.

57 Abi Ita ni ọ mhọli agbo ọ ghie mhe, mhi li mhọli oni agbo, Ighọ oni ọ da le idiegbe oyemhe ọ li ya mhọli agbo itobọ oyemhe.

58 Onana lẹli khi eminale ni o te iloghie tiemhile, ọa li abi eminale ni e rọte idane de kule ni eni e bia e e kpẹ le, ni e rọ kie ghua. Ama oni ọ da le idiegbe oyemhe ọ ya la agbo agboagbo.”

59 Eni ingmemhi ena iJesu ọ ngme abi ọ li la elemhi owa ugamhi ni o la iKapanomu seṣe.

Ingmemhi eyi iJesu ni e ri agbo na agboagbo ọ na oḡbọ

† 6:45 Li ze Aza 54.13

60 Abi e rọ suọ eni ingmemhi ni iJesu ọọ ngme, ebubu eniye odukhokho eyi iJesu e ke, “Oseṣe, ena e ma ze doṣe e. Oghuo ọ doṣe ya mie shi ọ?”

61 Abi iJesu ọ rọ leṣe khi eniye odukhokho eyọli e wọlọ, ọọ, “Eri ingmemhi eyemhe e yese e udu-a?”

62 Seṣe a ke e ngme ini a me Omi Ogbọ khi ọ nga iloghie ya shito obini ọ kpe te tiemhile?

63 Ayemhe oyi Eshinegba ọ ri agbọ eṣe na ogbọ, ama ogbọ ọa doṣe ri agbọ eṣe na ogbọ. Ingmemhi ni mhi nu e ngme, obọ oyi Ayemhe e te eṣe bhale, wewe e ri agbọ eṣe na ogbọ

64 Abi o riye khi igho, eghuo elemhi e, eṣa miesuo.” Itobọ khi iJesu ọ she kpe te eke leṣe eni eṣa mie ọli suọ ali oni ọ ya ri ọli de.

65 IJesu ọ gbo gueye we, ọọ we, “Ona o ze khi mhi gueye e khi ogbọ lolighuo ọa doṣe ya bhale deba mhe seṣe ini Ita ọ ri oni afu na li.”

66 Rọ te ana vu eniye odukhokho eyọli ebubu e mu egbe pfi eṣa ke lama deba li.

67 IJesu ọ mhila eniye odukhokho etuogbava eyọli, ọọ we, “Eri a nono ni a li vu?”

68 ISamọ iPita ọ sọ ọli ọ, ọọ li, “Onomhue, oghuo anye ya le deba? Yeyeṣe u mhọli ungmehi ni e ri agbọ na agboagbo ọ na ogbọ.

69 Anye miesuo, anye gbo leṣe khi yeyeṣe u khi Oni ọ pfuase oyi Eshinegba.”‡

70 IJesu ọ sọ li ọ, ọọ, “Oa khi eṣe ogbava mhi ze? Ama oghuo elemhi e, okphaghie ọ khi!”

71 IJudasi ni ọ khi omi iSamọ Isikaroti lolu iJesu ọ la ana ngme ingme oyọli. IJudasi ọ khi oghuo eniye odukhokho Ogbava ni ọ kie te ikpukhokho ri ọli de.

7

IJesu ali inyoghuo ọli

1 Abi a rọ me ona se, iJesu ọ kia gase eke iGalili. Oa lama je eke iJudia itobọ khi eni e mheṣe eyi eṣe iju e nono abi e li ya gbe ọli a.

2 Oni eṣeṣe ukpe okholo oyi iju o ti bhale.*

3 Igho Inyoghuo iJesu, eṣe ọli, “Wa ke rọte ana lase, ni u ke je obini eke iJudia ni eniye odukhokho eye e me ikanya onyaloa ni u wa gbe?”

4 Ogbọ ni ọ nono ni agbọ e leṣe luṣe ọa ya riye ingme sheli. Abi u rọ gbe ikanya oshabọ ena, ri egbe e khaṣe agbọ gbo ni e leṣe oni u khi.”

5 Egbegbo inyoghuo ọli eṣa mie ọli suọ.

6 IJesu ọọ, “Eṣeṣe oyemhe ọa ramhi ne, Eṣeṣe ni a me kpa o ti e eṣe.”

7 Egbọ na agbọ eṣa doṣe ya biselemhi e, ama eṣe biselemhi mhe itobọ khi mhia gueye we khi emini eṣe riye khi eṣa ti.

8 A ke je obini a la riye ukpe, mhemhe mhia vu ne, itobọ khi eṣeṣe oyemhe ọa ramhi ne.”

‡ 6:69 Li ze iMat 16.16; iMak 8.29; iLuk 9.20 * 7:2 Li ze iLev 23.34; iDeut 16.13

⁹ Abi iJesu o ngme gho se, o a ke te iGalili je ashikhoghhuo.

¹⁰ Abi inyoghhuo oli e ro je obini oni ukpe okholo se, o li je oobo, ama o a ze ni egbo e me lu.

¹¹ Eni e khi enighie eyi egbo iJu e la agho nono iJesu gasa, e mhila, “Ige oni omose ogho?”

¹² Ebubu egbo e la oni igbaa khe ako shi ingme oyi iJesu. Eghuo e lie khi iJesu khi ogbo onete lo, eghuo e khi eri o mema di egbo.

¹³ Ama ogbokhoghhuo o a ngme ingme oyoli lase gboo, itobo khi e na ulishi enighie eyi egbo iJu.

IJesu o la olele oyi oni ukpe sese

¹⁴ Abi a ro li oni ukpe ramhi ode, iJesu o lo elemhi owa oniemhi oyi Eshinegba, o sese egbo ungmehi oyi Eshinegba.

¹⁵ Enighie eyi iJu ni e suo oni osese, abo e sha we, e lie, “Obo omose ona ni o a ye owena okhoghhuo ne o te mholi ilese enana?”

¹⁶ IJesu o so we o, o li, “Osese ni mhia sese, e a khi obo oyemhe o te bhale, ama obo oyi oni o ghie mhe bhale.

¹⁷ Oni o ghole ni o riela oghuemhe oyi Eshinegba o ya lese khi osese ni mhia sese ini obo oyi Eshinegba o te bhale, abi khi ungmehi ni o ghole mhe mhia ngme.

¹⁸ Oni o da ngme ungmehi oyi egboli, ekpe oo nono ni egbo e ke mu na loli, eri-tse khi oni o da gbe

akanya ni o ro ti oni o ghie o nga ne, loli o khi ogbo ni o ti, o a ga khi ogbo egbholi.

¹⁹ IMosisi o a ri ishi na e? Ama onge e, o a ri eni ishi gbe. Elo o ke ze khi a nono ni a gbe mhi a?”

²⁰ Eni egbo e so oli o, ee oli, “Ayemhe okphaghe o la e egbe! Oghuo o nono ni loli gbe-a?”

²¹ IJesu oo, “Mhi riela onyaloa oghuo, o ro abo sha e nya.

²² Ama abi o riela khi iMosisi o ri ushi ishele-a na e (o a mema khi obo oyi iMosisi o te bhale, ama rote obo oyi eni e bia awa, o rote bhale), eri a kiele e shele omo a ogbele iyemhea oyi egbo iJu.†

²³ Ini a shele omo a ogbele iyemhea oyi egbo iJu, ini a khi gbe Ushi oyi iMosisi a, elo ze khi a wola khi mhi ro oni oo ghua ze ogbele iyemhea?‡

²⁴ A khi ke bino ogbo alo gue ogbo ezoo, a ke so ezoo shi abi o li.”

Egbo e mhila ini iJesu o khi Oni Omiepfuese?

²⁵ Eghenge agho egbo eghuo ni e la iJerusalemu e lie, “O a khi omose ona enighie eyi iJu ee dua abi e li ya gbe a?”

²⁶ Ghe oli sho! O a khi loli o la ana ngme gbo ena ni ogbokhoghhuo o a li oli emhikhoghhuo! Abi khi eri enighie e she lama egbegbo khi loli o khi iKirisiti?

²⁷ Awa aa lese obini omose ona o te bhale. Ama eghenge ni iKirisiti o ro ya bhale,

† 7:22 Li ze Igbae 17.10; iLev 12.3 ‡ 7:23 Li ze iJon 5.9

ogbo khoghwo o ya lese obini o te ya bhale.”

28 Abi iJesu o ro la elemhi Owa oyi Eshinegba sese, o tsele lasele, oo, “A lese mhe, a gbo lese udi-apfe ni mhi te lasele, o khi mhemheghwo mhi ghie egbemhe bhale akana, ama oni o ghie mhe, ona igesikia lo. Aa lese oli.

29 Ama mhi lese oli itobo khi obo oyoli mhi te bhale, lolighwo o ghie mhe bhale.”

30 Itobo ona e nono abi e li ya mu oli. Ama ogbo khoghwo o khu oli, e ri obo ti oli, itobo khi eghheghwe oyoli o ramhi ne

31 Ama ebubu egbo e kie mie oli suo, e ke, “Ini oni iKirisiti o bhale, o ya gbe ikanya onyaloa ni e dose eni omose ona oo gbe ena?”

A ghie eni e khe ekhe e ka mu iJesu bhale

32 Egbo iFarisi e suo ingme ni egbo e ngme shi iJesu egbe. Eni iFarisi ali ighie eyi ekpodalo-ugamhi e ghie eni e la Owa Oyi Eshinegba e khe ekhe e ka mu oli bhale.

33 IJesu oo li, “Ukuku eghheghwe mhi mholi ya nu e la akana, mhi ya nyene egbe je oyi Ita ni o ghie mhe.

34 A ya nono mhe, ama aa ya me mhe, ashini mhi ya la aa dobe ya ramhi agho.”

35 Enighie eyi iJu e nu egbe we e ngme, e lie, “Obo omose ona oo le ni o ro lie khi awa aa ke ya me lue? Eri o vu e je ifui eoli oyi egbo iGiriki, obini

egbo eyawa e kia miatseku, ni o la obo ke sese egbo iGiriki?

36 Elo iJesu o ro li ngme, abi o ree, a ya nono mhe aa me mhe, ali obini mhi ya la aa dobe ya ramhi agho?”

37 Ogbele ni o kpukhokho oni ukpe, ni khi khi ogbele ni o mu eloe ne nya, iJesu o vule, o rue unu leghe, oo li, “Oni okiamwe oo gbe o bhale deba mhe ya mo amwe da.S

38 Ebe-no-pfuase o ngme ghwo khi oni o mie mhe suo khi okwe ni o mholi amwe eni ri agbo a na ogbo o ya rote agbo oyoli ke tu lasele.”*

39 Ayemhe ni eni mie oli suo e ya mie elese, iJesu o ri oni amwe agbo o na a ngme. Ramhi oni eghheghwe, oni Ayemhe o bhale ne, itobo khi aa yase iJesu nga ufumhi oniemhi ne.

Eni egbo e ke lama shi egbe o

40 Abi eni egbo e ro suo ingmemhi eyoli, egbo eghwo e ke, “Omekeguele omose ona o khi egbegbo.”

41 Egbo elese e ke, “Loli o khi oni Omiepfuese.” Elese ee, “Se e Omiepfuese o li rote iGalili lasele?”

42 Ebe-no-pfuase o guele khi oni Omiepfuese, khi unuekpe oyi iDefidi o ya te lasele, iBetilemu a ya bia li shi, eoli oyi iDefidi.”†

43 Ighwo okemhi o ri itobo iJesu lo we iteva.

44 Egbò eghuo e nono ni ewe e mu òli, ama ogbòkhoghuo ọa ri obò ti òli.

Umha mie iJesu suo oyi Enighie eyi egbo iju

45 Abi eni e la Owa oyi Eshinegba oniemi e e khe ekhe e ro je deba iFarisi ali ighie eyi ekpodalo-ugamhi, e mhila we, "Elo e ze khi a mu iJesu bhale ghi anye?"

46 Eni egbo ni e khe ekhe, e so we o, e li. "Ogbòkhoghuo ọa tigbe ngme abi omose ọna o lie ngme ghue."

47 IFarisi e mhila we, ee, "Eri iJesu o she li di e?"

48 "Aa tigbe me ogbo iFarisi ali enighie eyi egbo iju ni e mie oli suo?"

49 Iye! Ama eni egbo ebubu ena ẹa lese Ishi eyi iMosisi. Itobo igho egbo ni Eshinegba o pfi unu na e khi."

50 INikodemosi ni o li khi otuoghuo eni e mhesẹ elemhi egbo iju ni o kpe ya me iJesu eliyose, o mhila eni egbo, oo,‡

51 "Ushi oyawa ọa fe ngme ghọ a khi pfa ezọ umha-gueli mu ogbo ini aa li suo ezọ ni o ya gue, ali a gbo guanọ emini ọọ riele?"

52 E ke o li, "Onge iGalili yeye u li khi? Ka riele ebe ze egbegbo khi u ya me khi omekeguele ọọ ya rote iGalili bhale."

53 Igho ogbogbo nya ni o la agho, o je apfe oyoli.

8

Okpotso ni a gazu okia

1 IJesu o je ukhomhi ute oyi ẹera olivu.

2 Eluzogbe fiefie, iJesu o gbo bhale elemhi Owa oyi Eshinegba, ebubu egbo e bhale deba li, o shito o sese we.

3 Esese Ishi eyi iMosisi ali iFarisi e mu okpotso ni a gazu okia obo-obo bhale ghi iJesu, e ro oli migha odalo igbaa.

4 Ee iJesu, "Osese, eri a ga okpotso ọna zu okia.

5 IMosisi o she kpe ro oni ushi shi eke na anye, khi, okpotso ni a da ligho gazu okia, a ke tono oli eche gbe-a. Elo u mhuẹ ya ngme shi ona mena?"*

6 Eri e ri ona kpe igha khe iJesu ini o ngme ungmehi ni e ya ro ri ingme de o. Igho iJesu o nyese egbe, o ri umiesobo o keke emhi shi eke.

7 Abi e kie li mhila iJesu oni ogbo ona, iJesu o vule, oo, "Oni o lese khi loli ẹa kpe lamhe olamhe ghue o kpe to oli eche."

8 O gbo nyese egbe, o keke emhi shi eke.

9 Abi e ro suo ingme ni iJesu o ngme, e gbhiaku-a otuoghuo-oghue rote eni eghali. O ke lese kpe iJesu ali oni okpotso le shi agho ni o kie migha.

10 IJesu o vule, oo oni okpotso, "Ighe eni egbo ni e pfa ezọ mu e?"

11 Oni okpotso oo li, "Mhi aa me ogbogbogho, Onomhuẹ." IJesu oo li, "Mhemhe mhi aa li

‡ 7:50 Li ze iJon 3.1-2

* 8:5 Li ze iLev 20.10; iDeut 22.22-24

pfa ẹzọ mu ẹ, ama ke le, khi ke gbo lamhe.”

12 Ijesu o gbo nu iFarisi ngme, oo we, “Mhemhe mhi khi akpa oyi agbo. Oni o da deba mhe ne, o ya tigbe kia alo ebili, o ya mholi akpa ni o ri ode agbo a khasẹ ogbo.”†

13 Eni iFarisi ee oli, “Egbe e u pfi otselẹ na, egbo ẹa ya rue otselẹ oye shi igesikia.”‡

14 Ijesu oo, “Iye, ini mhi tseku pfi otselẹ na egbemhe, egbegbi otselẹ lo ni mhi pfi na egbemhe, itobo khi mhi lese obini mhi te bhale ali obini mhia je. Ee, aa lese obini mhi te bhale wekhi obini mhia je.

15 Abi egbo na agbo e li e so ezọ ee a lie so ezọ, ama mhemhe mhi aa pfa ezọ mu ogbokhoghuo.

16 Ini mhi ya so ezọ, egbegbo ezọ mhia so, itobo khi o a khi mhemheghuo mhi la. Ita ni o ghie mhe o nu mhe la.

17 A keke oli shi ebe ushi oyeẹ khi otselẹ oyi egbo aava, o migha shi egbegbi otselẹ. §

18 Mhi pfi otselẹ na egbe mhe, Ita ni o ghie mhe o gbo pfi otselẹ na mhe.”

19 Eghẹghẹ ana eni egbo e mhila li, “Ighe Itẹ?”

Ijesu oo we, “Aa lese mhe wekhi Itamhe a lese. Ini a lese mhe lo, a kha li lese Itamhe.”

20 Elemhi Owa oyi Eshinegba o la ngme eni ingmemhi ena abi o kie li sese egbo, epfe ashini a ri ikpati ni a ri ikpagho isomhopfa a shi o migha. Ogbokhoghuo o a kie

mu oli, itobo khi eghẹghẹ oyoli o a ramhi ne.

21 Ijesu o gbolo lie we, “Mhi ya vu, a ya nono mhe, a ya ghu shi olamhe oye e. Aa ya dobe ramhi obini mhia je.”

22 Egbo iJu ee, “O khi awa aa dobe ya a ramhi obini loli a je. Eri o fe ri ona a lie khi loli ya gbe egbeoli-a?”

23 Ijesu oo, “Egbo ena ooke-ola a khi, mhemhe mhi rote iloghie tiemie. Egbo ena agbo ona ee a khi, mhemhe mhia khi onge agbo ona.

24 Itobo igho mhi ro lie khi a ya ghu shi olamhe oye e ini a da miesuo khi mhemhe mhi khi oni mhiẹ khi mhi khi.”

25 Egbo iJu e mhila li, “Oghuo u khi?”

Ijesu oo, Oni mhi kie kpe rote igbaekele lie khi mhi khi, mhi khi.

26 Mhi mholi ebubu ingme ali ebubu umha-guekia ni mhi kha gue shi e egbe. Oni o ghie mhe, ona igesikia o khi, ingmemhi ni o gueye mhe, mhi gue e ye agbo.

27 Ee lese khi ingme oyi Ita li iJesu o gueye we.

28 Ijesu oo, “Ini a da tsua Omi Ogbọ idane shi ukhomhi oora apfida a ya lese khi oni mhiẹ khi mhi khi, mhi khi. Oni eghẹghẹ a ya lese khi o a khi itoto oyemhe mhi ro riele emini mhia riele, ama emini Ita o sese mhe, mhia gueye agbo.

29 Oni o ghie mhe o nu mhe la, o a pfi mhe shi eke tse, itobo

† 8:12 Li ze iMat 5.14; iJon 9.5 ‡ 8:13 Li ze iJon 5.31 § 8:17 Li ze iDeut 19.15

khi oghuëmhe oyoli mhia riële eghëghe kpa.”

³⁰ Ebu bu egbò ni e suò khi iJesu o ngme eni ingmemhi ena e mie òli suò.

Igesikia o ya rue e o le

³¹ IJesu o gueye egbò iJu ni e mie òli suò, oò wë, “Ini a ri emini mhia sese e gba akanya, egbegbi eniye odukhokho eyemhe a khi.

³² A ya lese igesikia ni o la ingme oyi Eshinegba, oni igesikia o ya rue e o le.”

³³ Eni egbò iJu e e òli, “Imi Aburaamu anye khi, anye aa tigbe kpe lo ighumha oyi ogbokhoghuo ghue! Elo u ro li e ngme, ini u wa lie khi anye ya khi eni a rue ighumha lasele?”*

³⁴ IJesu o so wë o, oò, “Egbegbi-ingme mhi gue e ye e, khi ogbokpa ni o da lamhe olamhe, oghumha oyi olamhe o khi

³⁵ Oghumha o ya la apfe oyi oni o mhòli òli agbòagbò, ama, omi omhue-apfe oò la apfe agbòagbò.

³⁶ Ini Omi Eshinegba o da rue e ighumha le, egbegbò a rue e ighumha le.

³⁷ Mhi lese khi imi Aburaamu a khi, ama a nono ode ni a te ya gbe mhe a, itobò khi aa nono ingme ni mhi gueye e.

³⁸ Emini Itamhe o rokhase mhe mhi gueye e, ama emini Ita e o gueye e, a riële.”

³⁹ E o li, “Aburaamu khi Ita anye.” IJesu o ke, “Ini imi Aburaamu a kha khi egbegbò

lo, a kha ke riële emhi enabi o riële.

⁴⁰ Abi o ri rië khia khi egbegbò ingmemhi ni Eshinegba o gueye mhe mhi gueye e, ama a dua abi a li ya gbe mhe a. Aburaamu o a riële emhi eghoghò!

⁴¹ Abi a li ena, ighò ita e o kpe li.” E e òli, “Anye a khi eniye ni a bia shi ukhomhi okia, Eshinegba o khi Ita oghuo kpe ni anye mhòli.”

⁴² IJesu oò wë, “Ini Eshinegba o khi Ita e lo, a kha nono ingme oyemhe, itobò khi obò oyi Eshinegba mhi te bhale, ni mhi ro la akana, o a khi omhese oyemhe o re mhe bhale, ama loli o ghie mhe bhale.

⁴³ Elo o ze khi ingmemhi ni mhi ngme khi ea lo e esò? Itobò khi aa lama ri egbe mie ingme ni mhi gueye lo.

⁴⁴ Eniye eyi Okphaghië ni o khi ita e a khi, oghuëmhe oyi ita e a nono ni a ke riële. Rote igbaekele o te khi ogbolo-egbò-a ali oloegbhue. Igesikia o a li unu. Ingmemhi eyi òli, egbhòli e khi nya, itobò khi eri oò lo egbhòli abi o li. Loli o khi ita egbhòli nya.

⁴⁵ Ama igesikia mhi gueye e khi, itobò ighò aa ro lama mie mhe suò

⁴⁶ Oghuo elemhi e o dobe ya guele khi mhi mhòli ipfido? Ini igesikia mhi gueye e, elo e ze khi aa mie mhe suò?

⁴⁷ Oni o da khi oyi Eshinegba o mema ya ri esò shi ingmemhi eyi Eshinegba, ama e e aa khi eyi Eshinegba loli o ze

* 8:33 Li ze iMat 3.9; iLuk 3.8

khi aa lama rọ shi ungmehi oyi Eshinegba.”

Emini iJesu ọọ khi lọli khi

48 Eni egbo iJu e sọ ọli ọ, “Anye a guę ngme ọli mena ni anye rọ ye khi ọnge iSameria u khi, ali khi ayemhe okphaghię o la e egbe?”

49 Ijesu ọ ke we, “Mhi aa mhọli ayemhe okphaghię. Ama mhi ri ekpe na Itamhe, ama eę a ri ęloe gbe mhe.

50 Aa khi eri mhia nono ni egbo e ri ufumhi na mhe; ama ọni ọọ nono ni a rọ ekpe na mhe, lọli ọ khi ọni ọ sọ ęzọ ti ęloe.

51 Egbegbi-ingme mhi gue e ye e, ọni ọ da rọ shi osese oyemhe ne, ọa tigbe ya ghu ghue.”

52 Egbo iJu eę ọli, “Eena anye tigbe lese khi ayemhe okphaghię o la e egbe. Aburaamu ọ she ghua, emekeguele e she ghua, ama wa guele khi ọni ọ da rọ shi osese eye ọa tigbe ya ghu ghue.

53 Ita awa Aburaamu ọ she ghua, eri u ke e lie khi u fu dose Aburaamu? Emekeguele e she li ghua. Oghuo u fe sa khi u khi?”

54 Ijesu ọọ li, “Ini mhi ti egbe mhe nga, oni itinga o khi afue. Itamhe ọni eę a lu Eshinegba oye e, lọli ọ khi ọni ọ ti mhe nga.

55 Eę a kpe tigbe lese ọli, ama mhi lese ọli. Ini mhię khi mhia lese ọli, oloegbhue ọni abi eę ena mhi kha khi.

Ama mhi lese ọli, mhi gbo ri ungmehi oyọli gbe akanya.

56 Eri o ri egbe mu Abu-raamu ita e, abi ọ rọ sa us-amhi abi lọli ya li me ogbele ibhale oyemhe. Abi ọ rọ me ibhale oyemhe, ọ ghele.”

57 Egbo iJu eę ọli, “Waa gbe ikpe egbhueva ali igbe ne, wekhi eri u me Aburaamu!”

58 Ijesu ọ li, “Abi o li mhi li gue ọli ye e, neni a bia Abu-raamu, mhi she kpe la!”

59 Igho e sanọ eche khi wewe ya tono ọli, ama, ọ ri egbo sheli, ọ rọte we ifuabọ wa, ọ ya fię Owa oyi Eshinegba lase.

9

Ijesu ọ khueghie ọzalo alo a

1 Abi ijesu ọ li kia ode le, ọ me omose oghuo ni a bia shi ọzalo.

2 Eniye odukhokho eyi ijesu e mhila li, “Osese, oghuo ọ lamhe ni o ze khi a bia omose onana ọzalo? Olamhe oyọli lo, abi eyi eni e bia li?”

3 Ijesu ọọ we, “Ọa khi olamhe oyọli, wekhi eni e bia li, ama eri ọ ze alo ni Eshinegba ọ ri ekpabo eyọli khasę elemhi agbo oyi ọni ọzalo.

4 Ogbe o kha da kie laọ ne, awa mema ya ke gbe ikanya eyi ọni ọ ghie mhe, ele iyose ọọ bhale ni ogbokhoghuo ọa ke rọ dobe ya gbe akanya.

5 Abi mhi li la agbo ena, mhemhe mhi khi ọni ọ ri akpa a na egbo ni e la agbo.”*

* 9:5 Li ze iMat 5.14; iJon 8.12

6 Ijesu o ngme ona se, o tono ete shi eke fose igbolọ ro ma li alo.

7 Oo oni omose, "Ke je oke ni a lu iSiloamu ni u ya kpe alo a." Usomhi ni a ghie, a ri iSiloamu ngme. Igho oni omose o li vu ya kpe alo-a. Oo jele apfe, oo me eke.

8 Egbọ eni e ga la kugbe ali egbo ni e kpe me oli khi oo ye omhila, ee. "Onana o she khi ozalo ni o kpe e shito akana mhila?"

9 Egbọ eghuo ee, "Loli lo," ama eghuo ee, "Iiye o! Oa khi lolli, eri ona o li khi li." Ama oni omose oo, "Mhemhe o khi gueguegue."

10 E mhila li, "Se o li kia ni u ro ke e me eke?"

11 O we, "Omose oghuo ni a lu ijesu o fose igbolọ ma mhe alo, o mhe mhi je oke iSiloamu ya kpe alo a. Igho mhi le ya kpe alo-a, lolli mhi ro o me eke."

12 E oli. "Ighe oli?" Oo we, "Mhi aa lese."

Egbọ iFarisi e de udi iroze oyi oni omose

13 E rue oni omose ni o kpe ze alo ghi egbo iFarisi.

14 Ogbelẹ iyemhea oyi egbo iju ijesu o ro fose igbolọ ro khueghie oni omose alo-a.

15 Eni iFarisi e mhila oni omose abi o li kia ni o ro ke e me eke. Oo we, "Ijesu o ri igbolọ ma mhe alo, mhi kpe alo-a, mhi ro o me eke memena."

16 Eghuo eni iFarisi ee, "Omose ni o riele ona o ro te obo oyi Eshinegba bhale, itobo khi o ri ushi oyi ogbele

iyemhea oyi egbo iju gbe akanya." Egbọ iFarisi elese ee, "Se ogbo olamhe o li dobe ya gbe akanya onyaloa onana?" Ingme ona o pfi umhalama shi egbe o na we.

17 Igho eni egbo iFarisi e mhila oni omose, "Yeye ni ijesu o khueghie alo-a, elo u me ya ngme shi ingme oyoli?"

Oo we, "Omekeguele lo."

18 Eni egbo iju ea kie miesuo khi oni omose o kpe ze alo, ali khi eri a khueghie oli alo-a. O ya ramhi ni e ro ghie ya lu eni e bia oni omose,

19 E mhila we, "Omi e na? Onana e khi ozalo a bia li? Se o ke li kia ni o ro ke e me eke?"

20 Eni e bia li ee we, "Anye lese khi omi anye lo, anye gbo lese khi ozalo anye bia li.

21 Ama anye aa lese abi o li kia ni o ro ke e me eke, anye aa gbo lese oni o khueghie oli alo-a. A mhila li, o ke khi omọ, o dobe ya ngme na egboli."

22 Itobo khi ulishi egbo iju o mu eni e bia li e ro ngme na. Irari khi eni egbo iju e she kpe ngme oli shi oghuo, khi ogbo ni o da mie shi o khi ijesu khi iKirisiti, khi eri a khu oli owa ugamhi ya fie.

23 Itobo ona eni e bia li e ro lie, "O fu te ni o ngme e na egboli, a mhila li."

24 Utonuzeva, e gbo lu omose ni o kpe ze alo, ee oli, "Romhi Eshinegba khi u ya gue igesikia ye anye. Itobo khi anye lese khi omose ni o re ze khi ogbo olamhe lo."

25 Oo we, "Mhi aa lese ini ogbo olamhe lo, ama emhi

oghuo ni mhi lẹsẹ khi, ọzalo mhi kpẹ khi, ama memena mhi she ẹ me eke.”

²⁶ E mhila li, “Sẹ ọ fẹ li ẹ? Sẹ ọ li khueghie-a ẹ alo a?”

²⁷ Ọ́ọ wẹ, “Mhi kpẹ gueye ẹ, aa lama shi mhẹ ọ, elọ o ke zẹ ni a rọ ọ nono ni a gbo suọ oni ungmehi? Eri a li ẹ nono ni a li khi eniye odukhokho eyọli?”

²⁸ E tsue ọli, ẹẹ ọli, “Ọmọ odukhokho ọyi ọni ọmọse ọna yeye u khi, ini itse lọ, ama eniye odukhokho eyi iMosisi anye khi.

²⁹ Anye lẹsẹ khi Eshinegba ọ nu iMosisi ngme, ama anye aa lẹsẹ obini ọmọse ọna ọ te bhale.”

³⁰ Ọni ọmọse ọọ wẹ, “Uza lọ e, ni aa rọ lẹsẹ obini ọ te bhale, ama lọli ọ khueghie mhẹ alo-a.

³¹ Awa lẹsẹ khi Eshinegba ọa ya suọ iromhi oyi ẹgbọ olamhẹ, ama iromhi oyi eni e ri ekpe na li ọọ suọ, ali eni ẹ rieḷe emini ọọ nono e rieḷe.

³² Rọte igbaekele agbọ, aa tigbe suọ ọgbọ ni ọ khueghie ọzalo ni o khia khi ighọ a bia li alo a ghue.

³³ Ini ọa khia khi ọmọse ọna khi obọ oyi Eshinegba ọ te bhale lọ, ọa kha doḅe li emhikhoghuo.”

³⁴ E ọli, “Elemhi olamhẹ a bia ẹ shi, ni a la kuẹḷe, sẹ u li a nono ni u ke sẹsẹ anye?” Ighọ e khu ọli elemhi owa ugamhi ya lase ọ khi ke gbo bhale ọ ghue.

Itase-alo-a ona ayemhẹ

³⁵ Abi iJesu ọ rọ suọ khi a khu ọni ọmọse owa ugamhi ya

lase, ọ nono ọli me, ọ mhila li, ọọ li, “U mie Omi Ọgbọ suọ?”

³⁶ Ọni ọmọse ọ li, “Ọga, gueye mhẹ ọni Omi Ọgbọ ọ khi, ni mhi mie ọli suọ!”

³⁷ IJesu ọọ li, “U she me ọli, lọli ọ ga nu ẹ ngme ena.”

³⁸ Ọni ọmọse ọ li, “Ọnonmhuẹ mhi miesuọ.” Ọ wugha ọ kuẹghie iJesu.

³⁹ IJesu ọli, “Eri mhi bhale agbọ ona ya gue ẹgbọ ẹzọ, isheghọ ni ẹgbọ ni e zalo e ke me eke, ni eni e kpẹ ẹ me eke ni e zẹ alo.”

⁴⁰ Ẹgbọ iFarisi eghuo ni e la akaghọ e suọ ingme ni ọ ngme, e mhila li, “Eri u wẹ khi ezalo anye li khi?”

⁴¹ IJesu ọọ wẹ, “Ini ezalo a khi lọ, aa kha mhọli umhaguekia, ama abi ẹẹ a ke rọ ye khi a me eke na, onana o rọkhasẹ khi ena olamhẹ a khi.”

10

Okhẹ oyi ọrisumhafia

¹ IJesu ọọ, “Abi o li mhi li gue ọli ẹ ye ẹ, khi, ọgbọ ni ọa da rọte ode unuekpẹ lo ogba ni a ri isumha shi, ni ọ rọte oboese nga fiala lo ne oghiatọ ali ọni ọ li iko ọ khi.

² Ọgbọ ni ọ rọte ode unuekpẹ lo, lọli ọ khi ọrisumhafia oyi isumha.

³ Eri ọni ọọ khẹ ekhẹ ode unuekpẹ ọ khueghie ode-a na li, eni isumha ẹ suọ uruli oyọli ini ọ lu isumha eyọli eva abi ọ ri eva na wẹ, ọ rẹ wẹ kia lase.

⁴ Ọ kha da rẹ wẹwẹ nya fiẹ lase ne, eri ọọ ralo na wẹ, eni isumha ẹẹ deba li, itobọ khi e lẹsẹ uruli oyọli.

⁵ Ɛ a ya deba oḡboḡese, eri Ɛ ri ochogho me ɔli ya ke na, itobo khi Ɛa leḡe uruli oyoli.”

⁶ Eri iJesu o ze okhe ona ro nu we ngme, ama Ɛa leḡe emini o ri ɔli ngme.

Ijesu ni o khi orisumhafia onete

⁷ Igho iJesu o gbo le, “Egbegbi-ingme mhi gue Ɛ ye Ɛ, mhemhe mhi khi ode unuekpe ni isumha e rote Ɛ lo, ni e gbo te Ɛ dose fiƐ.

⁸ Egbɔ ni e kpe bhale khe mhe, ighiatɔ ali eni Ɛ li iko e khi, ama eni isumha Ɛa ri esɔ shi we o.

⁹ Mhemhe mhi khi ode unuekpe, onini o da rote mhemhe egbe ne, a ya mie ɔli pfuse, o ya fiƐ, o lo le, o me emhi le.

¹⁰ Eri oghiatɔ o leḡe bhale ya do, o gbe-a, o pfuse-a tse, ama mhi she bhale ni a mhɔli agbo, ni a mhɔli ɔli gba pfo.

¹¹ “Mhemhe mhi khi orisumhafia onete. Eri orisumhafia onete o ri agbo oyoli shi eke ni eni isumha eyoli.

¹² Oni a mie shi akanya irisumhafia o a khi lo li o mhɔli eni isumha, ini o me khi akpogene oo bhale, o na tsua isumha kua, oni akpogene o tsua rughu eni isumha, o vese we kua.

¹³ Oni a mie shi oni akanya irisumhafia o na vu, itobo khi eni isumha Ɛa khi eyoli, ali khi Ɛa mu ɔli egbe.

¹⁴ “Mhemhe mhi khi orisumhafia onete, mhi leḡe

isumha eyemhe, eni isumha e leḡe.

¹⁵ Abi Ita o li leḡe mhe, igho mhemhe mhi leḡe ɔli, igho mhi ro ri agbo oyemhe shi eke na eni isumha.*

¹⁶ Isumha elese e lao ni Ɛa la elemhi ogba oyi isumha ona memena. Mhi mema fiƐ ya wolɔ we ma o. E ya suo uruli oyemhe. E ya kugbe khi oghuo, e mhɔli orisumhafia oghuo. ¹⁷ Ita o nono ingme oyemhe, itobo khi mhi lama ri agbo oyemhe shi eke, ni a ro bhale ya Ɛ khi mhi ya gbo me ɔli rue.

¹⁸ Aa me oḡbokhoghuo ni o ya do be mie mhe agbo oyemhe. Mhemhe oghuo mhi ro li shi eke. Mhi mhɔli afu ni mhi ro o ze ɔli obo, mhi gbo do be ya rue ɔli ini o ghɔle mhe. Omhesɛ ona Itamhe o gueye mhe mhi riƐle.”

¹⁹ Eni ingmemhi enana e gbo pfi umhalama shi egbe o na egbo iJu.

²⁰ Ebubu egbo e lie, “Ayemhe okphaghiƐ o la li egbe, ujili oo kpha li. Elo e ze khi a ri esɔ o shi ɔli o?”

²¹ Ama egbo elese, ƐƐ ɔli, “Ingmemhi enana Ɛa do be ya rote unu oyi oḡbo ni o mhɔli ayemhe okphaghiƐ lasele! Ayemhe okphaghiƐ o do be ya khueghie ozalo alo a?”

²² Oni egheghe o khi egheghe oruame ni a ro li ukpe ni a ro yelele abi a li ri Owa oyi Eshinegba riƐle nga Eshinegba obo. Egheghe ulili lo.

* 10:15 Li ze iMat 11.27; iLuk 10.22

23 Ijesu o la atukpapfe oyi Owa oyi Eshinegba kia, ashini a lu arakpha oyi iSolomoni.

24 Ebubu egbo iju e le gase oli, e mhila li, "Efe u ri anye ya shi alo ebili ramhi? Khueghie igesikia ni o la o-a khashe anye ini yeye u khi iKirisiti!"

25 Ijesu oo we, "Mhi she kpe gueye e, ama aa lama mie mhe suo. Ikanya onyaloa ni mhi ri itoto oyi Ita a gbe, wewe e pfi otsese na mhe.

26 Ama aa lama miesuo, itobo khi aa la elemhi isumha eyemhe.

27 Isumha eyemhe ee suo uruli oyemhe, mhi lese we, ee deba mhe.

28 Mhi ri agbo na agboagbo na we, ea tigbe ya pfua. Aa me oni o ya dobe mie mhe ewe obo.

29 Itamhe ni o ri eni isumha nga mhe obo, o fu dose ogbokpa. Aa me oni o dobe ya mie Ita ewe obo.

30 Mhemhe ali Itamhe oghuo anye khi."

31 Eni egbo iju e gbo sano echese eke e tono oli.

32 Ijesu oo we, "Mhi she gbe ikanya ebubu ukpeloe oye e, ni o khia khi Itamhe o ri itoto na mhe ni mhi ro gbe we, onoghuo a tono mhe echese e shi o?"

33 Eni egbo iju ee oli, "Oa khi itobo ikanya enete e ze ni anye ro a tono e echese, ama, itobo khi u pfi unu-a! Se yeye ogbo afue-afue u li e ke lie khi Eshinegba u khi?"†

34 Ijesu oo we, "A she kpe keke oli shi ebe Ishi eyi iMosisi khi Eshinegba oo lie khi, ishinegba ee a khi.‡

35 Anye she kpe lese khi emini ebe onopfuase o ngme khi igesikia o khi agboagbo, khi egbo ni a she kpe gue ingme oyi Eshinegba ye, Eshinegba o lu ishinegba.

36 Ita o she ze mhe oda kee neni o ghie mhe bhale agbo, ini mhi ngme ghoo khi Omi Eshinegba mhi khi, se a ke li a lie khi mhi a pfi unu-a?

37 A khi mie mhe suo, ini mhi aa ya rieles emini Itamhe o rieles.

38 Ama ini mhia rieles we, ini aa ro tseku mie mhe suo, a mie ikanya onyaloa ni mhia gbe suo, ni a ro lese khi Ita o la elemhi oyemhe, mhemhe mhi li la elemhi oyi Ita."

39 Igho e ke gbo li dua ni wewe e mu ijesu, ama o pfue we, oa ze we mu.

40 Ijesu o da oko ijodani je ukiekie ashini iJoni o ke la batazi egbo. Igho o bie ya la akagho.§

41 Ebubu egbo e bhale akagho deba li. Efe, "Ijoni oa gbe ikanya onyaloa okhoghuo, ama ingmemhi ni ijoni o ngme shi ingme eyi ijesu, e bhale ya tse nya."

42 Ebubu egbo ni e la akagho e mie ijesu suo.

11

Eghuli oyi iLazarosi

1 Omose oghuo ni a lu iLazarosi ni o la eoli iBetani,

† 10:33 Li ze iLev 24.16 ‡ 10:34 Li ze iWolo 82.6 § 10:40 Li ze iJoni 1.28

Ọọ ghua. IḂetani iMeli ali inyoghuo ọli ni ọkpotoso ni a lu iMata e la.*

² IMeli ọna ọ ke ku ituale ni ọ pfi ku Ọnọmhuẹ awẹ, ni ọ gbo ri itsu ni e la li ukhomhi shishi ọ ewẹ-a. Lọli ọ khi inyoghuo iLazarọsi ni ọ yẹshi i ghua.†

³ Inyoghuo ọli eni ikpotso e ghie usomhi ghi iJesu, ẹ ọ li, “Ọnọmhuẹ, ọmọle ẹ ọọ ghua.”

⁴ Abi iJesu ọ rọ suọ ona, ọọ li, “Ughuamhi ona, ọa ya gbe ọli, ama, eri a mẹ onana ni a mẹ asha khi ufumhi na Eshinẹgba ali Omi Eshinẹgba.”

⁵ IJesu ọọ nono ingme oyi iMata ali iMeli ali iLazarọsi.

⁶ Abi ọ rọ tseku suọ khi iLazarọsi ọ ghua, ọ kie la ashini ọ la ramhi ogbele eva.

⁷ Ighọ ọ gueye eniye odukhokho eyọli, ọọ wẹ, “A zẹ ni awa mu egbe pfi je obini eke iJudia.”

⁸ Eniye odukhokho eyọli ẹ ọ li, “Ọsẹsẹ, ode ọ a nuẹ ne ni ẹgbọ iJu e rọ ọ nono ni wẹwẹ tonon ẹ eche. Oobọ wa nono ni u gbo nyenẹ egbe je?”

⁹ IJesu ọọ wẹ, “Ọa khi te ẹle uzogbe ramhi ẹle ogbomhi awa rọ ọ mẹ eke? Oni ọọ kia ini ogbe o la ọ, ọa ya khi owẹ, itobọ khi ákpá oyi agbọ ona ọ rọ ọ mẹ eke.”

¹⁰ Ama ini ọ ri alo ebili ẹ kia, ọ ya khi owẹ, itobọ khi ọa mholi ákpá ni ọ rọ ọ mẹ eke.”

¹¹ Abi ọ ke rọ ngme onana se, ọ gueye wẹ, ọọ wẹ, “iLazarọsi ọmọle awa ọ she lese, ama mhia le ni mhi ya guise ọli le.”

¹² Eniye odukhokho eyọli ẹ ọ li, “Abi ọ rọ da lese-a eghọ, ọ ya ze.”

¹³ Eri iJesu ọ rọ li liẹ khi iLazarọsi ọ she ghua, ama e dabi khi egbegbi olese ọ ngme.

¹⁴ Ighọ iJesu ọ guele gboo khi iLazarọsi ọ she ghua-a.

¹⁵ Ama itobọ oye ẹ, egbe ẹ mu mhe shi ọ khi mhi aa nu ọli la akaghọ ni ọ rọ ghu-a, ni a rọ mie mhe suọ. A zẹ ni awa le deba li.

¹⁶ ITomọsi ni a gbo li ẹ lu iDidimọsi, ọọ eniye odukhokho enekpọle, “A zẹ ni awa li deba Ọsẹsẹ je oobọ ni awa nu ọli ghu-a.”

¹⁷ Eghẹghẹ ni iJesu ọ ke rọ ramhi aghọ, ọ bhale ya ẹ khi o she ramhi ẹle ene abi a te ri iLazarọsi to.

¹⁸ Rote iḂetani je iJerusalemu ọa ramhi imali eva.

¹⁹ Ighọ ebubu ẹgbọ iJu e she kpẹ bhale iḂetani ya tse iMeli ali iMata e mu opfu shi inyoghuo wẹ ni ọ ghua-a.

²⁰ Abi iMata ọ rọ suọ khi iJesu ọọ bhale, ọ fiẹ lase ya lona li ode, ama iMeli ọ la elemhi owa.

²¹ IMata ọọ iJesu, “Ọnọmhuẹ, ini u la akana lo, inyoghuo-mhe ọa kha ghua.

²² Ama mhi lese khi memena khi Eshinẹgba ọ ya ri emiemini u wa mhila li ne.”

²³ IJesu ọọ li, “Inyoghuo ẹ, ọ gbo ya guale bhale agbọ.”

²⁴ IMata ọ li, “Mhi lese khi ọ ya te eghuli guale ogbele iguale ni o khi ogbele ni o kpukhokho.”

* 11:1 Li zẹ iLuk 10.38-39 † 11:2 Li zẹ iJom 12.3

25 IJesu ọọ ọli, “Mhẹmhe mhi rọte eghuli ya guise eni e ghu-a le, ni mhi ri agbọ ya na wẹ, ọni ọ da mie mhẹ suọ ọ ya mhọli agbọ, ini ọ tseku ghu-a.

26 Ọni ọ la agbọ ni ọ da mie mhẹ suọ, ọa tigbe ya ghu-a. U fẹ mie ona suọ?”

27 Ọọ li, “Ii Ọnọmhue! Mhi miesuọ khi yeyẹ u khi iKirisiti, Omi Eshinegba ni ọ ya bhale ekẹ agbọ ona.”

28 Abi iMata ọ rọ ngme gho se ọ lẹ ya ri ofiẹ gueyẹ iMeli, ọọ, “Ọsẹsẹ ọ she bhale, ọọ nono ẹ.”

29 Abi iMeli ọ rọ suọ ona ọ ti vule, ọ nyanya fiẹ lase je ashini iJesu ọ la.

30 IJesu ọa kie ramhi oni ẹoli ni ọọ je ne, ama ọ kie la ashini ọ kia ramhi ni iMata ọ rọ lona li ode.

31 Egbọ iJu ni e la elemhi owa yese ọli, e vule deba li je olase abi e rọ mẹ khi ọ ti vule je olase. E dabi khi eri ọ je obini uji ya viẹ.

32 Abi iMeli ọ rọ ramhi ashini iJesu ọ la ni ọ mẹ ọli, ọ de ya wugha li odalo, ọọ li, “Ọnọmhue, ini u la akana lọ, inyoghuo-mhẹ ọa kha ghu!”

33 Abi iJesu ọ mẹ khi lọli ali egbọ iJu ni e kphase ọli khi ee viẹ, o rọ obọ ti iJesu udu, egbe e guoghọ ọli a.

34 IJesu ọ mhila wẹ, ọọ, “Ashi a rọ li tọ?”

Ẹ ọ li, “Ọnọmhue bhale ya ghe ọli.”

35 IJesu ọ viẹ.

36 Egbọ iJu ni e la aghọ, ẹẹ, “A ghe abi ọli nono ingme oyi ọli khe.”

37 Ama eghuo ọ e liẹ, “Lọli ni ọ khueghie ọzalo alo-a ọọ kha dobet tsumhi iLazarosi ini ọ khi ghua?”

IJesu ọ guise iLazarosi gbo bhale agbọ

38 O gbo ri obọ ti iJesu udu. Ọ kia je obini uji ni o khi irui, ni a gheghele ẹche zuse unu.

39 IJesu ọọ, “A gheghele oni ẹche unu oni uji-a.”

IMata inyoghuo ọni ọmose ni ọ ghu-a ọọ, “Ọnọmhue, ọ she ya ke wẹ! Amo o li ẹlẹ onuziene abi a te rọ li tọ!”

40 IJesu ọ li, “Mhi a kpẹ gueyẹ khi u ya mẹ ufumhi oyi Eshinegba ini u miesuọ?”

41 Ighọ e gheghele oni ẹche unu uji lase. IJesu ọ yase alo idane, ọ li, “Mhi kphemhi ne Ita, khi u suọ mhẹ.

42 Mhi lese khi u ma suọ oyemhe, itobọ oyi egbọ ena mhi rọ ọ ngme ona ni e miesuọ khi yeyẹ u ghie mhẹ.”

43 Abi ọ rọ ngme ona se, ọ lu ọli leghe, “ILazarosi e! Fiẹ lasele!”

44 Ọni ọmose ni ọ ghu-a ọ fiẹ lasele, a ri ide olimhi genọ li abọ ali awẹ, ghe eni a rọ ku ọli alo. IJesu ọọ wẹ, “A taghiẹ ọli a ni a zẹ ọli vu.”

Ugbamhi abi a li ya gbe iJesu-a

(iMat 26.1-5; iMak 14.1-2; iLuk 22.1-2)

45 Ebubu egbọ iJu ni e bhale ya tse iMeli ọ mu opfu e mẹ emini iJesu ọ riẹlẹ, e mie ọli suọ.

46 Ama eghuo elemhi wẹ e vu ya gueyẹ egbọ iFarisi emini iJesu ọ riẹlẹ.

47 Ighie eyi ekpodalougamhi ali iFarisi e ya lu eni ẹ mhẹsẹ ni a lu iSaẹdiri ya nu wẹ mhọli ilegba.

E mhila egbewẹ, “Elo awa li ena? Aa mẹ ikanya ọnyaloa ni ọmọsẹ onana ọ gbe?”

48 Ini awa lina zẹ ọli obọ, ọgbọkpa ọ ya mie ọli suọ. Egbọ iRomu e ya shashe Owa oyi Eshinẹgba oyawa-a.”

49 Ọmọsẹ ọghuo elemhi wẹ ni a lu iKefasi, ni ọ ralo ugamhi oni ukpe oghọ, ọọ li, “Aa lẹsẹ ingme!”

50 A lẹsẹ khi ọgbọ ọtuoghuo ọ kha ghu-a na egbo kpa, khi o ti dọsẹ ni egbo nya e pfua?”

51 Oa khi ibe eyọli ọ rọ sa ngme oni ungmehi ona, ama ungmehi angme-shike ni o ya tse ogbe na ako, khi iJesu ọ ya ghu-a na egbo iJu o khi ni ọ ngme, itobọ khi lọli ọ ralo ugamhi oni ukpe.

52 Oa khi oyi iJu tse, ama ni ọ sanọ egbo eyi Eshinẹgba ni e kia miatse ku agbo nya gbili re wẹ khili oghuo.

53 Rote ele gho vu, egbo iJu e te gba ugbamhi abi wewe e li ya gbe iJesu a.

54 Itobọ igho, iJesu ọa ke kia lase gboo iteva oyi egbo iJu. O ri ochoghọ vu je ẹoli ni a lu Efuremu, ni o ti mama ọdagbe ifufu. Agho loli ali eniyẹ odukhokho eyoli e ke ga la.

55 Abi eghẹghẹ ukpe iPasova oyi egbo iJu o rọ ti i bhale, ebubu egbo e te ẹoli ọdoda je iJerusalemu ya ri egbe wẹ khi eni e pfuase, abi

ushi oyewe ọọ e ke li neni oni ukpe o ramhi.

56 Ee nono iJesu. Abi e rọ la elemhi Owa oyi Eshinẹgba, e mhila egbewẹ, e liẹ, “A li sa khi ọ ya bhale? Otse ọa ya bhale shi oni ukpe ona.”

57 Ama ighie eyi ekpodalougamhi ali iFarisi e she kpe mhẹsẹ na eni egbo, oni ọ da lẹsẹ obini iJesu ọ la, oni ọgbọ ọ guele ni wewe e mẹ asha mu ọli.

12

IMeli ọ la obini iBẹtani ku ituale ku iJesu

(iMat 26.6-13; iMak 14.1-9)

1 Abi o rọ kpo ogbele esesa oni ukpe iPasova le, iJesu ọ nyenẹ egbe bhale obini iBẹtani, obini iLazarosi ni iJesu ọ rọte eghuli guise le ọ la.

2 E nye akhe na iJesu, iMata ọ kphanọ eni eminale ghi wẹ. iLazarosi ọ li nu wẹ shitọ shi ilele oyi eni ekhe.

3 Igho iMeli ọ rue egbegbi akanama ituale ni ọ pfie ni o lolo ghale. O ku ọli shi iJesu awe, ọ ri itsu ni e la li ukhomhi shishi ọ awe a. Upfiemhi oyi oni ituale o kphela vọ oni elemhi owa nya.*

4 IJudasi Isikaroti ni ọ khi ọtuoghuo eniyẹ odukhokho eyi iJesu, ni ọ rọte ikpukhokho ya ri iJesu de, ọ mẹ emini iMeli ọ riẹle, ọọ.

5 “Elo o zẹ ni aa rọ ri oni ituale de ni a kemhi eni ikpagho na eni ẹa mhue? Oni ituale o ghale ramhi ifata ukpe oyi ọgbọ ọghuo.”

* 12:3 Li zẹ iLuk 7.37-38

6 Oa khi itobọ khi ọ mhọli udu iamhẹ na eni ẹa mhue, ọ rọ ngme ungmehi ona. Ama itobọ khi oghiatọ ọ khi, ali khi lọli ọ tsua ikpaghọ ọ mhue na wẹ, ni ọ rọte muno epfia.

7 Ama iJesu ọọ li, “Zẹ ọli obo riẹlẹ emini o la li udu, eri ọ mu mhẹ egbe ẹ khẹ irọtọ oyemhẹ.

8 Eghẹghẹ kpa ẹgbọ ni ẹa mhue e rọ nu ẹ a la, ama mhemhẹ mhia nu ẹ ya la ana ẹghẹghẹ kpa.”†

9 Ebubu ẹgbọ iJu e suọ khi iJesu ọ la iBẹtani, ighọ e je oobọ. Oa khi itobọ iJesu tse e rọ je oobọ, ama ni e ba me iLazarọsi ni iJesu ọ te eghuli guise le.

10 Ighọ ighie eyi ekpodalougamhi ee gba ugbanhi abi e li ya li gbe iLazarọsi a,

11 itobọ khi ingme oyọli o zẹ khi ebubu ẹgbọ iJu e ku ma iJesu ọ, ni e rọ mie ọli suọ.

Egbọ e ri ufumhi na iJesu abi ọ rọ lo elemhi iJerusalemu (iMat 21.1-11; iMak 11.1-11; iLuk 19.28-40)

12 Ogbeakọlọ ebubu ẹgbọ ni e bhale shi oni ukpe iPasova e suọ khi iJesu ọọ je iJerusalemu.

13 Ighọ e yanọ eyamhi mhue abọ fiẹ ya ẹẹ ọli. E kpe okeke gbii, e liẹ, “Tsumhi anye. Awa kuẹghie Ẹshinegba. Ẹshinegba ọ khivọse na ọni ọ ri eva oyi Ẹshinegba Ọnọmhue ẹ bhale! Ẹshinegba ọ ka khivọse na oghie iZirẹni!”‡

14 IJesu ọ me ozele akphẹre. Ọ nga li shitọ abi Ebe-nopfuase o ngme ọli, ni ọọ,

15 “Egbọ iJerusalemu, ulishi o khi mu ẹ!

Oghie ọye ẹ ọọ bhale ena, ọ nga ozele akphẹre ẹẹ bhale.”§

16 Eniye odukhokho eyi iJesu ẹa kpẹ rọte eke lẹse obini eni ingme ena e je. Ama abi Ẹshinegba ọ rọte eghuli guise iJesu le ni ọ ri ufumhi na li, e rọ tigbe sato khi a kpẹ keke eni ingme eyọli ena shi Ebe-nopfuase, ali khi e ke riẹlẹ eni ingme ena deba li ghue.

17 Olele ẹgbọ ni e nu ọli la aghọ abi ọ rọ rọte uji lu iLazarọsi lasele, ni ọ rọ rọte eghuli guise ọli le, e kie kia gueye ẹgbọ abi a li me oni ingme.

18 Itobọ khi ebubu ẹgbọ e suọ khi iJesu ọ gbe akanya ọnyalọa ona e rọ vẹ lasele ya me ọli.

19 Ighọ ẹgbọ iFarisi e nu egbe wẹ ngme ọli, e liẹ, “Awa aa mhọli emini awa dobe ya li ona. Aa me khi ẹgbọ nya e ke ẹ deba li!”

IJesu ọ ngme ingme eghuli oyọli shi eke

20 Egbọ iGiriki e li la eni e je iJerusalemu ya ga ẹghẹghẹ oni ukpe iPasova.

21 E ya mhila iFilipu (ni ọ khi ọnge iBẹtisaida ni o la iGalili) ẹ ọ li “Oga, anye ẹ nono ni anye me iJesu, ni anye nu ọli ngme.”

† 12:8 Li ze iDeut 15.11 ‡ 12:13 Li ze iWolo 118.25,26 § 12:15 Li ze iZaka 9.9

22 IFilipu o vu ya gueye Aduru, wewę aava e ya gueye iJesu.

23 IJesu o, “Oni eghęghę o she ramhi ni a rọ ri ufumhi onięmhi oyi Omi Ogbọ ya khase.

24 Abi o li mhi li gue ọli e ye e khi, ini aa li ri ukpamhi ado kọ eke ni o ghua, eri o kie ya li abi o kie kpe li. Ini a rọli kọ eke ni o rọ ze, o ghua, o fu, o ri imomhi ni e bu lasele.

25 Onini o da nono ingme agbọ oyọli dọse ode ne, o ya de ọli obọ a, ama oni ọa da nono ingme agbọ oyọli el-emhi agbọ ona ne, eri o kesę o shi e khe agbọ na agbọagbọ.*

26 Oni o nono khi lọli ya ga mhe, ọọ mema ya ke deba mhe. Ashini mhi da la kpa, o li la akaghọ. Itamhe o mu ekpe na li.

27 “Memena udu oyemhe ọa ke sheshe. Elo mhi ke ya ngme? ‘Eri mhi ke ya lie, Ita, khi ze ni eghęghę ona o bhale deba mhe?’ Iiye, oni eghęghę ni o ze ni mhi rọ bhale agbọ na!

28 Ita ri ufumhi ni o la eva oyę khase.”

Igho Eshinęba o rọte idane ngme lase, ọọ, “Mhi she kpe ri ufumhi ni o la eva oyemhe khase egbọ na agbọ, mhi ya gbo lighọ rięle ọli.”

29 Ebubu egbọ ni e migha epfepfe aghọ e suọ khi uruli oyi Eshinęba o ngme. Egbọ eghuo eę, “Akphala o de!” Egbọ elese eę, “Aęeni o nu ọli ngme!”

30 Ama iJesu o, “Ọa khi itobọ oyemhe uruli oyi Eshinęba oghọ o rọ ngme ungmemhi oghọ, ama itobọ oyę e lọ.

31 Oni eghęghę o she ramhi ni a rọ ri agbọ e gue ezo. Memena, a ya khu Okphaghię oni o kpe e mhesę shi agbọ ona ukpękhomhi pfa.

32 A kha da yase mhe nga idane ọora apfida ne, mhi ya ti ogbokpa bhale deba mhe.”

33 Eri o ngme ona ni o rọ rokhasę we uwali eghuli ni o ya ghu.

34 Eni egbọ eę ọli, “Ushi ni Eshinęba o rọ na iMosisi na awa o gue ọli ye anye khi agbọagbọ Omiepfuese o ya la o. Seę u ke li a lie khi a mema ya yase Omi Ogbọ nga idane? Oghuo o khi oni Omi Ogbọ ọna?”†

35 IJesu o we, “Akpa o ya la e iteva ukuku eghęghę. A ke kia okiali abi oni akpa o kie la e iteva memena, ini obili o khi ya bi e, itobọ khi oni o la alo ebili ọa lese obini ọọ je.

36 A regbenga oni akpa ni o ri akpa na e abi o kie li la e iteva, ni a li khi egbọ ni e ri imeke e na egbọ.” Abi iJesu o li ngme ona se, o lase we iteva le, je ashini ęa ke te e me ọli.

Umha-miesuo oyi egbọ ifu

37 Abi iJesu o tseku gbe ikanya onyaloa ena ukpeloe oyewe, ęa kie lama mie ọli suọ.

38 Onana o ri emini Azaya ni o khi Omekeęuele o kpe ngme shi eke ya tse, ni ọọ,

* 12:25 Li ze iMat 10.39; 16.25; iMak 8.35; iLuk 9.24; 17.33 † 12:34 Li ze iWolo 110.4; Aza 9.7; Ezik 37.25; iDan 7.14

“Onomhue, oghuo o lama mie usomhi oyanye suo? Oghuo Onomhue o mema khueghie ekpabo eyoli-a khase?”‡

39 Onana o ze khi ea dobe miesuo, itobo khi Azaya o gbo ngme oli shi ashese khi,

40 “Eshinegba o she tase we alo a, o gbo zuse we udu ini e khi me eke ali ini udu oyewe e khi lese ingme. Ini e khi ya mu pfi, ni mhi me asha re we ze.”§

41 Eri Azaya o ngme ona itobo khi o she kpe me ufumhi oyi iJesu, o gbo kpe ngme ingme oyoli.

42 Abi o tseku khia khi ebubu eni ee ralo eyi egbo iju e mie iJesu suo eghenge ni a ngme ena, ea ngme oli lasele, itobo khi e na ulishi oyi iFarisi ini e khi khu ewe owa ugamhi ya lase.

43 Irari khi e nono ikuoghi ni o rote obo oyi egbo bhale dose oni o rote obo oyi Eshinegba bhale.

Ungmemhi oyi iJesu a ro ya ri egbo na agbo gue ezọ

44 IJesu o tse se leghe guele, oo, “Oni o da mie mhe suo, oa khi mhemhe tse o miesuo, ama oni o ghie mhe o li miesuo.

45 Onini o da me mhe, o she li me oni o ghie mhe.

46 Mhi she bhale agbo ya ri akpa ge na egbo na agbo, ini eni e mie mhe suo okhoghuo o khi la alo ebili.

47 Oni o suo ungmehi oyemhe ni oa da ro shi o, oa

khi mhemhe mhi ya pfa ezọ mu oli. Oa khi eri mhi bhale ya ri egbo na agbo gue ezọ, ama eri mhi bhale ya mie agbo pfuese.

48 Oni oo pfa ezọ mu oni o da kie mhe ali ungmehi oyemhe, o la agho. Eni ingmemhi ni mhia ngme e ya pfa ezọ mu oli ogbele ni o kpukhokho.

49 Itobo khi oa khi ungmehi ootsobo oyemhe mhia ngme, ama ungmehi ni Ita ni o ghie o mhesa na mhe mhi ngme mhia ngme.”

50 Mhi lese khi oni ushi oyi Eshinegba, o ri agbo na agbo agbo o na ogbo. Irarigho, eri mhi e ngme emini Ita o gueye mhe mhi ngme.

13

IJesu o kpe eniye odukhokho eyoli awe-a

1 Abi o ro kpe eleghuo ukpe iPasova le, iJesu o lese khi oni eghenge o she ramhi ni o ro ya te agbo lasele je oyi Ita. O ma kie kpe nono ingme oyi egbo eyoli ni e la agbo, o roli khase we khi eri loli nono ingme oyewe pfo.

2 IJesu ali eniye odukhokho eyoli e la ashini e la le eminale ele ogbomhi. Okphaghiye o she roli shi udu oyi iJudasi omi iSamọ Isikaroti o ka ro iJesu de.

3 IJesu o lese khi Ita o she ro ekpabo nga lue obo, o lese khi obo oyi Eshinegba loli kpe te bhale, ali khi obo oyoli loli gbo nyene egbe ya je.

4 Igho iJesu o rōte ashini o shito ti vule, ikhi ashini e la le eminale, o gueghie awulu ni o so kpeda, o ri ode ni a ro o muno amē egbe-a mu oku.

5 Igho o ku amē shi atalabi, o kpe eniyē odukhokho eyoli awē-a. O rue ode ni a ro o muno amē egbe a ni o ro mu oku shishi wē amē awē-a.

6 Abi o ro kpe ramhi iSamō iPita o, iPita oo, “Kie! Onomhue yeyē u kha ke kpe mhē awē a?”

7 IJesu oo li, “Wa lēšē emini mhia riēlē memena, ama u ya lēšē okhēse.”

8 ISamō iPita oo, “Onomhue, atsobo ogho! Wa ya tigbe kpe mhē awē-a.”

IJesu oo, “Ini mhia kpe e awē-a, wa aa ke khi oyemhē.”

9 ISamō iPita oo, “O kha khi igho, Onomhue, o kha awē tse u ke lēšē ya kpe mhē-a! Ama kpe mhē abo ali ukhomhi-a ma o.”

10 IJesu oo li, “Ogbō ni o da khue se, o she pfuasē, o kha oni o ke gbo ya khue-a, ama awē o ke lēšē e yeghē-a. Eē nya a she pfuasē, sē ni oṭuoghūo elemhi e.”

11 Irari khi iJesu o she kpe lēšē oni o ya ro oḷi dē, loḷi o zē ni o ro liē, “Eē nya a she pfuasē, sē ni oṭuoghūo elemhi e.”

12 Abi iJesu o ro kpe wē awē a se, o riēlē awulu ni o kpe gueghie ro so, o ya shito ashini o kpe te vule. Oo mhila wē, “A li lēšē akanya ni mhigbe na e lēna?”

13 “A lu mhē ‘Ošesē’ ali ‘Onomhue.’ A ga guē ngme, itobo khi emini mhi khi gho.

14 Memena ni mhemhē ni mhi khi Onomhue ali Ošesē oyēē mhi she kpe e awē-a, eē a li ke kpe egbe e awē-a.

15 Mhi she ri irokhokho khase e, ni a li ke riēlē emini mhi riēlē na e.*

16 Egbegbi ingme mhi gueyē e, khi oni o ga oḡbo, o a ya fu došē oni oo ga, oni a aghiusomhi o a ya fu došē oni o ghie oḷi usomhi.†

17 Abi a ro lēšē eni ingme ena egho, a ya khivošē na e, ini a ro li gba akanya.

IJesu o guele shi ekē khi a ya rē luē dē

(iMat 26.20-25; iMak 14.17-21; iLuk 22.21-23)

18 “Aa khi eē nya mhi nu e ngme. Mhi lēšē abi ingeli eyi eni mhi zē e li. Ama, emini Ebe-no-pfuasē o ngme, o mema bhale ya tse, ikhi oni oo, ‘Ogbō ni o nu mhē e le eminale o ya nyenē egbe mu okhōli vule shi mhē o.‡

19 “Eri mhia gue ona yē e shi ekē neni a ligho mē oḷi, ishegho ini a ligho mē gho, a ya miesuo khi ‘Mhemhē mhi khi oni mhi khi.’

20 Abi o li mhi li gue oḷi e yē e, khi oni o da kpe abo mie aghiusomhi ni mhi ghie, mhemhē o li mie, oni o da mie mhē, oni o ghie mhē o li mie.”§

21 Abi iJesu o ro ngme ona se, udu o a ke sheshe oḷi,

* 13:15 Li zē iLuk 22.27 † 13:16 Li zē iMat 10.24; iLuk 6.40; iJon 15.20 ‡ 13:18

Li zē iWolo 41.9 § 13:20 Li zē iMat 10.40; iMak 9.37; iLuk 9.48; 10.16

o guele gboo, oo, “Egbegbi ingme mhi gueye e, khi otuoghuo elemhi e, o ya remhe de.”

²² Eniye odukhokho eyoli e bino egbe alo gasa, o lolo sha we abo oni iJesu o ngme.

²³ Oghuo omoo odukhokho ni iJesu o mema nono ingme oyoli, o shito mama iJesu.

²⁴ ISamoo iPita o ro ikpialo nu oni omoo odukhokho ngme, oo li, “Mhila iJesu, oghuo oni ogbo o fe khi elemhi awa.”

²⁵ Igho oni omoo odukhokho ni o shito mama iJesu o mhila li, oo, “Onomhue, oghuo oni ogbo o khi elemhi anye?”

²⁶ IJesu o so li o, oo, “Oni mhi ya ri ibuledi ona somhi utasa oni awa te e le emhi enana na ne, loli lo.” Igho o so oni ibuledi elemhi utasa, o ro na iJudasi omi iSamoo Isikaroti.

²⁷ Abi iJudasi o lese mie oni ibuledi se, Okphaghie o lo oli udu. IJesu o gueye oli, “Nyanya ya rieler emini wa nono ni u rieler.”

²⁸ Ogbokhoghuo abi e ga li shito o le eminale, oa la ni o lese emini o ze ni iJesu o ro ngme oli gho.

²⁹ Aborokhia khi iJudasi o tsua ikpagho o mhue na we, eghuo e dabi khi eri iJesu o gueye oli o ka de emini e ro o li ukpe iPasova. Elese e dabi khi otse eri oo o ka somhi eni ea mhue opfa.

³⁰ Abi iJudasi o mie oni ibuledi se. O fie lase aghoagho. Eliyose o she ramhi.

IJesu o ri ushi onogbo na we

³¹ Abi iJudasi o ro vu se, iJesu oo, “Eena egbo e ya me ufumhi oyi mhemhe Omi Ogbo, e ya te idiegbe oyi Omi Ogbo me ufumhi oyi Eshinegba.

³² Ini egbo e rote idiegbe oyi Omi Ogbo me ufumhi oyi Eshinegba, eghenge agho Eshinegba lolighuo o ya nyanya ri ufumhi oyi Omi Ogbo khase egbo.

³³ “Eniye eyemhe, mhia ke nu e ya la akana tese. A ya nono mhe, aa ke me mhe. Mhi gue ona ye e memena, abi mhi kpe li gueye eni ee mhesa eyi egbo iJu, ni mhi, Aa dobe ya ramhi obini mhi-aje.”*

³⁴ “Memena mhi ro ushi onogbo na e: A nono ingme oyi egbe e. Abi mhi li nono ingme oye e, a mema li ya nono ingme oyi egbe e.†

³⁵ A kha da mholi inono na egbe e ne, egbo kpa e ya lese khi eniye odukhokho eyemhe a khi.”

IJesu o ngme o shi eke khi iPita o ya kie lue

(iMat 26.31-35; iMak 14.27-31; iLuk 22.31-34)

³⁶ ISamoo iPita o mhila li, oo, “Onomhue, obo wa le?”

IJesu oo li, “Waa ya dobe deba mhe je obini mhia je, ama u ya deba mhe okhesa.”

³⁷ IPita o mhila li, oo “Elo e ze ni mhi aa ro dobe ya deba e? Mhi mu egbe ni agbo oyemhe o li opfu-a!”

* 13:33 Li ze iJon 7.34 † 13:34 Li ze iJon 15.12,17; 1 iJon 3.23; 2 iJon 5

38 Ijesu o ke gbo so li o, "U ga mema mu egbe agbo oye o ro lie opfu-a na mhe? Mhi gueye khi, neni okpa o gbieghe, u ya lie khi u waa lese mhe ramhi itese!"

14

Ijesu khi ode ni a te e bhale deba Eshinegba

1 Ijesu o gueye eniye odukhokho eyoli, oo we, "Aa khi ze ni udu o yese e-a, a mie Eshinegba suo, a gbo li mie mhe suo.

2 Elemhi owa ni a la e kpoku shi apfe oyi Itamhe. Ini o a khi igho lo, mhi kha gueye e. Mhia ya vu ni mhi ya mu egbe asha shi eke khe e.

3 Mhi kha vu ya mu egbe shi eke khe e se, mhi ya gbo nyene egbe bhale ya wolo e ma egbe vu, ishegho ashini mhi ya la, ni a li nu mhe la akagho.

4 A lese ode ni a te e je ashini mhia je."

5 ITomosi oo li, "Onomhue, anye ea lese obini u wa je. See anye li ya lese ode je obini u wa je?"

6 Ijesu oo li, "Mhemhe mhi khi ode ni a te e je obini oyi Eshinegba. Mhemhe mhi ri igesikia ni o la Eshinegba a khashe. Mhemhe mhi ri agbo o na ogbo. Ogbo khoghuo o a me asha ya je obini oyi Ita ini o a li rote obo oyemhe.

7 Eri a kha lese mhe lo, a kha li lese oni Ita. Ro te memena vu, a she lese oli, a gbo me oli."

8 IFilipu oo, "Onomhue, ri oni Ita khashe anye, emini anye lese nono ghoh."

9 Ijesu o soli o, o, "IFilipu, mhi she nu e la tese, waa kie lese oni mhi khi? Oni o da me mhe, o she me oni Ita. See u kiele e lie 'Ri oni Ita khashe anye?'

10 Filipu, waa miesuo khi mhi la elemhi oyi Ita, ali khi Ita o la elemhi oyemhe? Ingmemhi ni mhi gueye e nya ea khi eyemhe. Ita ni o la mhe elemhi o ga gbe ikanya ena nya.

11 A mie emini mhi ngme suo ini mhi khi mhi la elemhi oyi Ita ali khi Ita o li la elemhi oyemhe. Ini aa mie emini mhi ngme suo, a ri itobo ikanya onyaloa ni mhia gbe miesuo.

12 Egbegbi-ingme mhi gueye e, oni o da mie mhe suo, o ya gbe ikanya enabi mhia gbe. O ya gbe ikanya eni e fu dose eni abi mhia gbe, itobo khi mhia je oyi Ita.

13 Emini a ro eva oyemhe mhila nya mhi ya ri ele o, eghoghe agho ni om o ri ufumhi oyi Ita khashe egbo.

14 Emini a ro eva oyemhe mhila nya, mhi ya ri ele na e.

Ijesu o shobo khi loli ya ghi Ayemhe-no-pfuase bhale agbo

15 "A kha nono ingme oyemhe, a ya ri omhese oyemhe gba akanya.

16 Eghoghe agho, mhi ya lema Ita, o ri Okpaghiobo olese na e, ni o ya nu e la agbo agbo.

17 Loli o khi Ayemhe ni o ri igesikia ni o la Eshinegba a khashe agbo. Egbo na agbo ea dobe mie oli itobo khi ea me oli wekhi eri e lese oli. Ama, ee

ena a leşe ọli, itobọ khi ọ nu ẹ la, ọ la elemhi oye ẹ.

18 “Mhia ya zẹ ẹ obọ shi eke abi omi-olimhi, mhi ya gbo nyene egbe bhale deba ẹ.

19 O kha deṅe, ẹgbọ na agbọ ẹa ke ẹ mẹ mhe, ama ẹẹ ena, a ya mẹ mhe. Itobọ khi mhi ya gbo la agbọ, a ya li la agbọ.

20 Ini ogbe ni ẹlẹghọ o ramhi, a ya leşe khi mhi la elemhi oyi Itamhe, khi ẹẹ a la elemhi oyemhe, abi mhi li la elemhi oye ẹ.

21 “Oni o mie ishi eyemhe ni o ri ewe gbe akanya, o nono ingme oyemhe. Itamhe o ya nono ingme oyi oni oda nono ingme oyemhe, mhi ya li nono ingme oyi oni ogbo, mhi ri egbe mhe khasẹ ọli.”

22 IJudasi (ọa khi oni a lu Isikaroti) oo, “Onomhue, elo o zẹ khi u fe ya ri egbe ẹ khasẹ anye tse, ni u wa ro ya ri egbe ẹ khasẹ agbọ kpa?”

23 IJesu o so li o, oo, “Oni o da nono ingme oyemhe, o ya ri osese oyemhe gbe akanya. Itamhe o ya nono ingme oyi ọli, mhemhe ali Itamhe, anye bhale ya nu ọli la.

24 Oni ọa da nono ingme oyemhe, ọa ro osese oyemhe ya gbe akanya. Eni osese ni mhia sese ẹ, ẹa khi eye mhe, ama obọ oyi Itamhe ni o ghie mhe e te bhale.

25 “Mhi she gue ena ye ẹ, abi mhi kie li nu ẹ la.

26 Ama oni, Ayemhe-nopfuase ikhi Okpaghioḃo, ni Ita o ya ro eva oyemhe ro ghi ẹ, o ya sese ẹ emhikpa. O ya gbo re ẹ yelele emhikpa ni mhi gueye ẹ.

27 Mhi ze ẹ obọ shi agbọ ona shi opfomhe, mhi ri opfomhe oyemhe na ẹ. Oa khi oni abi ẹgbọ na agbọ e ro o na ogbo mhi ro na ẹ. A khi ze udu yese ẹa, ali a khi ze ni ulishi o mu ẹ.

28 “A suọ abi mhi ro gueye ẹ khi mhi ya rote iteva oye ẹ vu, khi mhi ya gbo bhale deba ẹ. Ini a nono ingme oyemhe lo, a kha ke ghele khi mhia je oyi Itamhe, irari khi lolu o fu dose mhe.

29 Mhi she gue ingme ena ye ẹ shi eke neni a mẹ we, ishegho ini a da kie ligho mẹ we, a mie mhe suọ.

30 Mhia ke nu ẹ ngme tese, itobọ khi okphaghie ni o kpe mhesẹ shi agbọ ona, oo bhale. Oa mholi ekpabọ shi agbọ oyemhe,

31 ama ẹgbọ na agbọ e mema ya leşe khi mhi ma nono ingme oyi Ita, ali khi emini Itamhe o mhesẹ na mhe mhi ri ele, mhia ri ele tee.

“A bhale ni awa vu ana le.

15

IJesu o khi egbegbi ọora upfonu

1 “Mhemhe mhi li abi oni upfonu ni o mo umomhi onete, Itamhe o ri ele ẹ shi o.

2 Lolu oo kanọ uguabọ oyemhe ni ọa ya mo umomhi a. Oo ri ele uguabọ oyemhe ni oo mo umomhi, ni o gbo mo imomhi eni e bu.

3 Ungmemhi ni mhi she nu ẹ ngme o she ri ele ẹ ti ni a ro doḃe mo imomhi enete. 4 A toma mhe idiegbe, mhemhe mhi ya toma ẹ idiegbe. Uguabọ ọora okhoghuo ọa

dobe ya mo umomhi ootsobo oyoli, o mema ya to ma idiegbe oora. U ke neta khi eri a dobe ya rielle eminete ini aa toma mhe egbe.

5 “Mhemhe mhi khi oora upfonu, ee a li abi iguabo. Ini u toma mhe egbe ni mhi ro li toma e egbe, u ya mo imomhi eni e bu. Ini a ro oborue mhe o le, aa dobe ya rielle emhikhoghuo onete.

6 Ini u waa da toma mhe egbe ne, eri a ya khi e pfi. Eri u ya li abi iguabo ekhakhani, a ti e ma ri erali tose-a.

7 Ini u toma mhe egbe, ni ingmemhi eyemhe e ro la elemhi oye, emiemini o ghole e kpa wa mhila, a ri oli ne.

8 Eminete ni a rielle o ri ufumhi ghi Itamhe. Ona o rokhase khi eniye odukhokho eyemhe a khi.

9 “Abi Ita o nono ingme oyemhe, igho mhi li nono ingme oye. A la elemhi inono oyemhe.

10 Ini a ro ishi eyemhe gbe akanya, a ya la inono oyemhe, abi mhi li ri ishi eyi Itamhe gbe akanya ni mhi li la inono oyoli.

11 Eri mhi gue ona ye e ni oghelle oyemhe o vo e udu, ni oni oghelle oye e o gba pfo.

12 Ushi ni mhi ro na e khi, a nono ingme oyi egbe e, abi mhi nono e.*

13 Aa me inono olese ni o fu dose oni ogbo o ro ghu-a na emole oli.

14 Emole mhe a khi ini a da ri ishi eyemhe gbe akanya.

15 Mhi aa ke lu e eni e ga mhe, itobo khi oni o ga ogbo oalese akanya ni oga oyoli o gbe. Ochogho, emole mhi ke e lu e, itobo emini mhi rote oborue Itamhe wena nya mhi gueye e.

16 Oa khi ee a ze mhe, mhemhe mhi ze e ni mhi ri akanya na e, a ka gbe ikanya enete ni ikanya eyee e migha. Ishegho Ita o ya ro emini a ro eva oyemhe mhila nya na e.

17 Ushi oyemhe ni mhi shina e khi, a nono ingme oyi egbe e.

Egbo na agbo ee biselemhi eniye odukhokho eyi Ijesu

18 “Ini egbo na agbo e biselemhi e, a sato khi igho e kpe li biselemhi mhe.

19 Ini a khi eyi egbo na agbo lo, e kha nono ingme oye e abi enayewe. Abi o ke li memena khi, aa ke khi eyi egbo na agbo itobo khi mhi she rote elemhi agbo ze e, loli o ze khi egbo na agbo e ro biselemhi e.

20 A sato ingme ni mhi gueye e, ‘Oni oo ga ogbo oalese fu e dose oga oyoli.’ Ini e kpe mu okholi vule shi me o ghue, e ya mu okholi vule shi e o. Ama ini e ro osese ni mhi sese gbe akanya, e ya ro osese oye e li gbe akanya.†

21 E ya lina ngeli deba e itobo khi enayemhe a khi, ali itobo khi ea lese oni o ghie mhe.

22 Ini mhi aa bhale ya nu we ngme lo, ea kha mholi umha-guekia oyi olamhe. Ama ea ke mholi emini e gue oli ya

* 15:12 Li ze iJon 13.34; 15.17; 1 iJon 3.23; 2 iJon 5 † 15:20 Li ze iMat 10.24; iLuk 6.40; iJon 13.16

nga egbe khi o rewe a lamhe olamhe.

²³ Oni o da biselemhi mhe, Itamhe o li lie biselemhi.

²⁴ Ini mhi aa la akpewe gbe ikanya ni ogboese o dobe gbe ghue lo, ea kha mholi umha-guekia oyi olamhe. Ama memena e she me eni ikanya onyaloa, ama e kiele e biselemhi mhe ali Itamhe.

²⁵ Ama ona o ze ni emini a keke shi ebe ushi oyewe o ro bhale ya tse, oni o khi, 'Afu e biselemhi mhe.'[‡]

²⁶ "Ini oni Okpaghiobo o bhale, oni mhi rote obo oyi Itamhe ya ghie ghi e, loli o khi Ayemhe no o ri igesikia ni o la Ita a khas e, o ya pfi otsese shi ingme oyemhe.

²⁷ E e ya li mema pfi otsese na mhe, itobo khi rote igbaekele a te nu mhe la.

16

¹ "Eri mhi gue ona a ye e ini a khi tsua irudunga pfi a.

² Egb o e ya khu e owa ugamhi fie lase, eghenge o ga ya ramhi ni ogbo o kha gbe ongee a, o dabi khi eri loli e ga Eshinegba.

³ E ya ri ele eni emhi ena deba e, itobo khi ea lese Ita, wekhi mhemhe.

⁴ Ama, eri mhi gue ona ye e, ini oni eghenge o ramhi, a ya sato khi mhi kpe tse agua ye e. Itobo khi mhi kie nu e la mhi aa ro kpe gue ingme ena ye e.

Akanya ni Ayemhe-no-pfuase oo gbe

⁵ "Memena, mhia le deba oni o ghie mhe, ama ongee o kie mhila mhe, 'Obo wa je?'

⁶ Itobo khi mhi gue ingme ena ye e, udu oyee o she yese-a.

⁷ Ama igesikia mhi gueye e, ni o ro ti e egbe mhi ro rote e iteva a vu. Itobo khi ini mhi aa vu, oni Okpaghiobo o ya bhale. Ama ini mhi da vu mhi ya ghie oli ghi e.

⁸ Ini O da bhale, O ya rewe lese umha-guekia ni o la ingme olamhe, o gbo rewe li lese ipfuase oyi Eshinegba ali isozezo oyoli.

⁹ O ya rewe lese khi umha-guekia ni o la olamhe o khi, umha mie mhe suo.

¹⁰ O ya rewe lese khi e ya mholi ipfuase oyi Eshinegba, itobo khi mhi je oyi Ita ni aa ke te tigbe ya me mhe

¹¹ O ya rewe lese emini isozezo oyi Eshinegba o khi. Itobo khi a she pfa ezo mu okphaghi e oni o mhes e shi agbo ona.

¹² "Mhi mholi emini e bububu ni mhi kha gbo gueye e, ama e bu dose ni a dobe ya mie.

¹³ Ama ini Ayemhe ni o ri igesikia a khas e o da bhale, o ya ri igesikia ni o la ingme oyi Eshinegba nya khas e. Oa ya ngme ungmehi ootsobo oyoli, ama emini o suo o ya ke ngme. O gbo gueye e ingme ni a ya me.

¹⁴ Mhemhe o ya ke ti nga, itobo khi o ya mie mhe ungmehi ni mhi ngme gueye e.

¹⁵ Emini Itamhe o mhue

nya, eyemhe lo, loli o ze khi mhi kpe gueye e khi emini mhi ro na Ayemhe-no-pfuase, o ya gueye e.

Oya oye e o ya mele oghela a

16 “O kha den e, aa ke me mhe, o kha ke gbo den e a gbo me mhe.”

17 Eniye odukhokho eghuo ee mhila egbewe, “Elo o ri ona a ngme, ni oo lie awa khi, o kha den e khi awa aa ke a me lue, ali khi o kha ke gbo den e khi awa gbo lo ya me lue? O gbolo e, ‘Itobo khi mhi ya je obini oyi Ita.’

18 Elo o ri ‘O kha den e’ ngme? Awa aa lese ingme ni o ro oli ngme!’ E kie lina mhila egbewe.

19 Ijesu o she lese khi ee nono ni e mhila lue oni ungememhi ona, o mhila we, “Eri a mhila egbe e abi mhi ri oni ungememhi ngme, ni mhi ro lie, ‘O kha den e aa ke ya me mhe ali khi o kha gbo den e a ya me mhe?’

20 Egbegbi ingme mhi gue e ye e, a ya vie, a vie oya. Ama egbo na agbo e ya ke ghele, ee a mhu e iyeseudu-a, oni iyeseudu-a o ya mele oghela-a na e.

21 Ini okpotso o ya bia, udu o yese oli a itobo khi eghenge osue o she bhale, ama ini o bia oni om o se, oo ghele, o ye osue ni o me a. Irari khi oo ghele khi loli bia om o shi agbo.

22 Igho o li li e egbe, memena udu o yese e a, ama mhi ya gbo me e. Eghenge

agh oghela o vo e udu, oghela ni ogbo o do be ya mie.

23 Ini oni ogbele o ramhi, aa ke e mhila mhe emhikhoghuo. Mhi gue igesikia a ye e khi Itamhe o ya ro emini a ri eva oyemhe mhila kpa na e.

24 Ga ramhi memena, aa kie ri eva oyemhe mhila emhikhoghuo. A mhila khi a ya me mie, ishegho ni oghela oye e o gba pfo.

Ijesu o kholi okholi agbo mu o le

25 “Mhi aa lolo kpe khueghie ingme-a gue e ye e. Ama eghenge oo bhale ni mhi aa ke ro ligho nu e ngme, ama mhi ya gue ingme oyi Ita ye e gboo.

26 Ini oni ogbele o ramhi, a ya ri eva oyemhe mhila Ita emini o ghole e. Mhi aa lie khi mhemhe mhi ya mhila na e.

27 Ita oo nono ingme oye e, itobo khi a nono ingme oyemhe, a gbo miesuo khi ob oyi Eshinegba mhi te bhale.

28 Ob oyi Ita mhi te bhale ya lo elemhi agbo, memena mhi gbo te elemhi agbo ya vu je deba Ita.”

29 Eniye odukhokho eyoli ee oli, “Ena u tigbe e khueghie ingmemhi eye-a gueye anye gboo, waa ke e bi bi eni ingme-a gueye anye.

30 Eena anye lese khi u lese emhikpa, o ke khi ogbo o ke gbo ya ke mhila e ogbo. Onana o ze khi anye miesuo khi ob oyi Eshinegba u te bhale.”

31 Ijesu o so we o, o, “A she miesuo memena?”

³² Eghēghe ọọ bhale, oni eghēghe o she ramhi, ni eẹ nya a rọ ya miatse ku, ọgbọgbọ ọ je apfe oyoli. Mhemhe-ghuo tse mhi ke ya la. Ama ọa khi mhemheghuo tse mhi la, itobọ khi Ita ọ nu mhe la.

³³ Eri mhi gue ingme ena ye e, ni a ri itobọ khi a kugbe mhe ọ mhue opfomhe. Egbọ na agbọ e ya ri osue na e me. Ama a mholi udu, itobọ khi mhi she mu agbọ ọ le.”

17

Ijesu ọ sọ iromhi na eniye odukhokho eyọli

¹ Abi ijesu ọ rọ nu eniye odukhokho eyọli ngme se, ọ yase alo bino idane, ọ sọ iromhi, ọọ, “Ita, oni eghēghe o she ramhi. Ri ufumhi oyi Omie khasẹ agbọ, ni Omie ọ li ri ufumhi oye khasẹ agbọ.

² Itobọ khi u she ri ekpabọ na li, shi ukhomhi oyi egbọ na agbọ kpa, ni ọ ri agbọ na agbọagbọ na egbọ ni u rọ na li.

³ Agbọ na agbọagbọ khi, ni a rọ lese e, ikhi yeye ni u khi egbegbi Eshinegba oghuo kpe. Ni a gbo rọ lese mhe ijesu iKirisiti, ni u ghie.

⁴ Mhi she ri ufumhi oye khasẹ egbọ na agbọ, abi mhi rọ ọ gbe akanya ni u rọ na mhe, ni mhi gbe ọli pfo.

⁵ Ita, gbo ri ufumhi ni mhi kpe mholi na mhe memena, ikhi ufumhi ni mhi rọte eke mholi neni a ma agbọ.

⁶ “Mhi she ri e khasẹ egbọ ni u te elemhi agbọ rọ na mhe.

Egbọ eye e khi ni u rọ na mhe. E she ri ungmemhi oye gbe akanya.

⁷ Memena e she lese khi emhikpa ni u rọ na mhe khi obọ oye e te bhale.

⁸ Mhi she gueye we usomhi ni u rọ na mhe, we we e she mie oni usomhi. E she lese egbegbọ khi obọ oye mhi te bhale, e gbo miesuo khi yeye u ghie mhe.

⁹ “Mhi sọ iromhi na we, ọa khi egbọ na agbọ nya mhi sọ iromhi na, ama eni u rọ na mhe irari khi egbọ eye e khi.

¹⁰ Emhikpa ni mhi mholi eye e khi, emini u mholi eyemhe e li khi. We we e ri ufumhi oyemhe khasẹ egbọ na agbọ.

¹¹ Memena mhia bhale deba e, mhia ke la elemhi agbọ, ama we we e kie la elemhi agbọ. Ita ni ọ pfuase, ri itoto ni o la eva oye ni u rọ na mhe, khukhu we, ni e khi oghuo abi mhemhe ali yeye awa khi oghuo.

¹² Eghēghe ni mhi rọ nu we la, mhi ri itoto ni o la eva oye ni u rọ na mhe, khukhu we, mhi khe we ekhe. Okhoghuo ọ ọa pfua, se ni oghuo elemhi we ni ọ khi ọni ọ ya pfua, ni emini a keke shi Ebe-no-pfuase o bhale ya tse.*

¹³ “Memena mhia bhale deba e, mhia ngme ingmemhi ena, abi mhi kie li la elemhi agbọ, ini eniye odukhokho eyemhe e mholi oghelẹ ni o gba pfo, onabi oyemhe.

* 17:12 Li ze Iwolo 41.9

14 Mhi she gue usomhi oye ye we, ama agbo e biselemhi we, itobọ khi ẹa ke khi enayi agbo abi mhia li khi ọnai agbo.

15 Mhi aa lie u wolo we elemhi agbo lasese, ama tsumhi we obo oyi Ọna okhọlo.

16 Ẹa khi enayi agbo abi mhi aa li khi ọna agbo.

17 Ri igesikia oye rewe pfuase. Irari khi egbegbi ungmehi ungmehi oye o khi.

18 Abi u li ghie mhe je elemhi agbo, igho mhi li ghie we je elemhi agbo.

19 Itobọ ewe mhi ro ri egbe mhe ne, ini wewe ee li ligho ri egbe we ne egbegbo.

Ijesu o lema na igbaa oyi eni e mie ijesu iKirisiti suo nya

20 “Oa khi itobọ oyi eniye odukhokho eyemhe tse mhi ro so iromhi ona. Mhi li so iromhi na egbo ni e li ya te otsele oyewe mie mhe suo.

21 Mhi so iromhi e ga kugbe khi oghuo. Ita! Mhi so iromhi e la elemhi oyi awa, ezeze abi u li la elemhi oyemhe ni mhemhe mhi li la elemhi oye. Mhi so iromhi e khi oghuo ini agbo e mie we suo khi yeye u ghie mhe.

22 Mhi ri ufumhi ni u ro na mhe na we ini e kugbe khi oghuo abi mhemhe ali yeye awa khi oghuo.

23 Mhemhe mhi la elemhi oyewe, yeye u la elemhi oyemhe, ni e ga kugbe khi oghuo, ishegho ni agbo e lese khi yeye u ghie mhe, ali khi u

nono ingme oyewe abi u nono ingme oyemhe.

24 “Ita, yeye u ri we na mhe. Mhia nono ni e nu mhe la ashini mhi ya la kpa, ishegho ni e me ufumhi ni u ro na mhe itobọ khi u nono ingme oyemhe neni a ma agbo.

25 “Ita ni o pfuase! Agbo ẹa lese oni u khi, ama mhemhe mhi lese oni u khi, enana e lese khi yeye u ghie mhe.

26 Mhemhe mhi ri oni u khi khasẹ, igho mhi kie li ya ke riele ọli, ishegho inono ni u mhọli na mhe, o la we egbe, ni mhemhe mhi li la elemhi oyewe.”

18

Abi a li ri ijesu de

(iMat 26.47-56; iMak 14.43-50; iLuk 22.47-53)

1 Abi ijesu o ro so iromhi ona se, lo li ali eniye odukhokho eyoli e da uchoke ni a lu iKidironi lase. Ogba ni a ko ẹera na lu olivu shi o la epfe agho, ijesu ali eniye odukhokho eyoli e lo elemhi oni ogba oyi ẹera olivu.

2 Ijudasi oni o ri ọli de o lese oni ogba, itobọ khi ijesu ali eniye odukhokho eyoli e kele lona akagho.

3 Igho ijudasi o tsua ekhọli-okhue eyi iRomu, ali egbo ni e la Owa oyi Eshinegba e khe ekhe ali ighie eyi ekpodalougamhi eyi iju ali iFarisi ma egbe. E tsua itsua okhọli, ali igbili igolo ali ikpa. E lo ogba oyi ẹera olivu le.

4 Ijesu o she kpe lese emini lo li ya me, o mhila we, oo. “Oghuo a nono?”

5 Eẹ ọli, “Ijesu ọnge iN-azarẹti!”

Ijesu ọọ, “Mhẹmhẹ na.”

Ijudasi ni ọ ri ọli dẹ ọ migha mama wẹ.

6 Abi Ijesu ọ rọ gueyẹ wẹ khi, “Mhẹmhẹ na,” ighọ e ti je ukhokho, e de ya gbe.

7 Ijesu ọ gbo mhila wẹ, ọọ, “Ọghuo ẹ khi a nono wẹ?”

E gbo liẹ ọ li, “Ijesu ọnge iNazarẹti.”

8 Ijesu ọọ, “Mhi she kpe gueyẹ ẹ khi mhẹmhẹ na. O kha khia khi mhẹmhẹghuo a nono, a zẹ ni eni e kpọle e vu.”

9 Eri ijesu ọ ngme ona ni emini ọ kpẹ ngme o bhale ya tse, ni ọọ: “Ita! Mhi aa wase ọkhọghuo elemhi ẹgbọ ni u rọ na mhẹ a.”

10 Ighọ iSamọ iPita, ni ọ tsua itakobi shi emhi ọ ji ọli lasele rọ bẹ ọni ọ gbe akanya a deba ọga ọyi ekpodalo ugamhi esọ na obita ukhomhi pfi-a. IMakọsi a lu ọni ọmọse.

11 Ijesu ọọ iPita, “Rue itakobi oghọ shi ashini u kpẹ te ji ọli lasele. Eri u dabi khi mhia ya rọte uko osue ni Itamhẹ ọ mhẹsẹ na mhẹ ya da?”*

A mu ijesu bhale odalo iguezọ ọyi ẹgbọ iju

12 Ighọ ekhọli-okhue eyi iRomu ali eni e kpeda na wẹ ali eni e khẹ ekhẹ owa ugamhi ni o funẹ eyi ẹgbọ iju, e gba ijesu mu, e gẹ ọli abọ je ukhokho.

13 E te ododẹ rue ọli bhale ayi Anasi, ni ọ khi ọgọ iKefasi.

IKefasi ọ khi ọkpodalo-ugamhi ọyi Eshinẹgba ọni ọ kpeda ọyi ẹgbọ iju oni ukpe oghọ.

14 IKefasi ọ ke kpẹ ye ẹgbọ iju ude, khi ini ọgbọ ọtuọghuo ọ ghu-a na ẹgbọ ni e bu, o ti dọsẹ ni ẹgbọ ni e la ẹoli nya e pfua.†

IPita ọ kie ijesu

(iMat 26.69-70; iMak 14.66-68; iLuk 22.55-57)

15 ISamọ iPita ali ọmọ odukhokho ọyi ijesu ọlese, e deba ijesu. Ọni ọmọ odukhokho ali oni ọ kpeda nya na ekpodalo-ugamhi eyi Eshinẹgba e kpẹ lẹsẹ egbe. Ighọ ọni ọmọ odukhokho ọ deba ijesu lo elemhi apfẹ ọyi oni ọ kpeda nya na ekpodalo-ugamhi eyi Eshinẹgba.

16 Abi iPita ọọ migha olase epfẹ odẹ unuẹkpẹ, ọni ọmọ odukhokho ọghọ ọ nyenẹ egbe je olase, ọ ya nu ọni ọmueshi ni ọ la aghọ ngme, ọ rue iPita lo elemhi apfẹ.

17 Ọni ọmueshi ni ọ la odẹ unuẹkpẹ ọ mẹ iPita, ọ ọ li, “Oa khi ọmọ odukhokho ọyi ọni ọmọse ọghọ u li khi?”

IPita ọọ, “Iye, mhia khi lọli.”

18 Ulili o gbe. Eni ẹ khẹ ekhẹ ali ighumha e migha gase er-ali ingamhi ni e pfie, e khase erali. IPita ọ li nu wẹ migha a khase erali.

Ọga ọyi ekpodalo ugamhi ọ mhila ijesu ogbọ

(iMat 26.59-66; iMak 14.55-64; iLuk 22.66-71)

* 18:11 Li zẹ iMat 26.39; iMak 14.36; iLuk 22.42 † 18:14 Li zẹ iJon 11.49-50

19 Oni oga oyi ekpodalo ugamhi eyi Eshinegba o mhila iJesu ogbo oseṣe eyoli ali eniye odukhokho eyoli.

20 IJesu o solli o, o, “Mhi aa tigbe na sheli seṣe oseṣe elemhi Owa Oyi Eshinegba ali owa ugamhi ni mhi la a seṣe gboo eghẹghẹ kpa, ikhi ashini egbọ iJu e legba.

21 Elo o ze khi áá mhila mhe ogbo? A ka mhila egbọ ni e suo oseṣe oyemhe. E leṣe emini mhi ngme.”

22 Abi IJesu o ngme ona se, oghuo eni e khe ekhe o lase iJesu eso, o li, “Elo o ze ni u ro ligho nu Oga oyi ekpodalo ugamhi a ngme?”

23 IJesu oo, “Ini u leṣe khi mhi aa gue ngme, gue emini o a ti ni mhi ngme le, ni egbọ e suo. Ama o kha khia khi mhi guẹ ngme, elo o ze ni u ro lase mhe eso?”

24 Ana Anasi o la lie e rue oli ghi iKefasi ni o khi Oga oyi ekpodalo ugamhi, abi a kie li ge oli abo je ukhokho. Eghẹghẹ ona, iKefasi ali Anasi e ga khi ekpodalo-ugamhi eyi Eshinegba ni e kpeda.

IPita o gbo kie iJesu
(iMat 26.71-75; iMak 14.69-72; iLuk 22.58-62)

25 IPita o kie migha akaghọ, oo khaṣe erali. Egbọ elese e mhila li, “Wa she khi oghuo eniye odukhokho eyi omoṣe ogho?” IPita o so we o, oo, “Iiye! Oa khi mhemhe.”

26 Oghuo oni o gbe akanya a deba oni o kpeda nya na ekpodalo-ugamhi eyi

Eshinegba, ni o khi ogbo oyi omoṣe ni iPita o be eso ukhomhi a, o gbo mhila iPita, “Oa khi yeye mhi she me khi u nu omoṣe ogho la elemhi ogba?”

27 IPita o gbo le, “Iiye!” Uto-ghuokpe, okpa o gbieghẹ.

A rue iJesu bhale odalo oyi iPaleti ya gue ezo

(iMat 27.1-2,11-14; iMak 15.1-5; iLuk 23.1-5)

28 Ele uzogbe fiefie, e rue iJesu fie owa oyi iKefasi je apfe oyi igovuno oyi egbọ iRomu. Enighie eyi egbọ iJu ea lama lo elemhi oni apfe, itobo khi ea nono ni ichimhi umha-pfuase ni o mu we, ini ee doṣe le eminale iPasova.

29 Itobo igho oni igovuno na lu iPaleti o fie je olase deba eni egbọ iJu, oo we, “Umha-gueli onoghua a gue shi omoṣe ona egbe?”

30 Ee oli, “Ini o a mhue umha-gueli lo anye ea kha rue oli bhale ghie.”

31 IPaleti oo we, “A rue oli vu ya gue ezo egbe-a abi ushi oyeṣe o ngme sho.”

Egbọ iJu ee oli, “Anye aa mholi afu ni a ro o lie a ka gbe ogbo.”

32 Eri a lina me onana ni emini iJesu o kpe ngme ni o bhale ya tse, ikhi ungmehi ni o la guele uwali eghuli ni loyi ya ghu.‡

33 IPaleti o nyene egbe je elemhi apfe oyoli, o lu iJesu mhila, oo, “Yeye u khi oghie oyi egbọ iJu?”

‡ 18:32 Li ze iJon 3.14; 12.32,33

34 IJesu ọọ. “Udu oye ogbo ona ni u mhila mhe o te bhale abi khi ogbo o gue ingme oyemhe ye e?”

35 IPaleti ọọ li, “Onge iJu we khi mhi khi? Egbọ eye ali ighie eyi ekpodalo-ugamhi e rue e bhale ghi mhe, Elo u li?”

36 IJesu ọọ li, “Eghiele oyemhe ọa khi onayi agbo ona. Ini igho o khi lo, eni e deba mhe e kha ye okholi na mhe, ini a khi dobe mu mhe ghi eni e mhesẹ eyi egbo iju. Ama memena, eghiele oyemhe ọa khi onayi agbo ona.”

37 Igho iPaleti o mhila li, “Oghie u ti e khi?”

IJesu ọọ, “U gue ga ngme oli ni u ro khi oghie mhi khi. Onana o ze khi a bia mhe bhale elemhi agbo, ni mhi ro ri emini o khi igesikia khase egbo na agbo. Oni o da khi ona igesikia ne, ọọ suo oyemhe.”

38 IPaleti o mhila li, “Elo o khi igesikia?”

A pfa ezo igbea mu ijesu
(iMat 27.15-31; iMak 15.6-20; iLuk 23.13-25)

Igho iPaleti o gbo fiẹ je olase, o gueye egbo iju, ọọ, “Mhi aa me umha-guẹli shi oli obo ni o remhe ya pfa ezo mu oli a gbe oia

39 Ama, abi a li ini a da li ukpe iPasova khi, ukpe khi ukpe kpa, eri mhia rue ogbo oghuo egbo eye e eni a mu shi owa ighumha abo-a na e. A nono ni mhi wolọ oghie iju abo a na e?”

40 Igho e tsesẹ gbii, eẹ oli, “Iiye! Ri Ochoghọ rue iBarabasi obo a na anye.”

(iBarabasi iko o li, oni o gbe ogbo a o khi ni a mu shi owa ighumha.)

19

A pfa ezo igbea mu ijesu
(iMat 27.15-31; iMak 15.6-20; iLuk 23.13-25)

1 Igho iPaleti ọọ a gbe iJesu itali egbegbo.

2 Eni ekholi-okhue e nyanọ iguabọ eera igba riẹle arula oghie rughu iJesu ukhomhi, e rue awulu ni o khi egholi ni o li abi oyile nabi a ro o so oghie so oli.

3 E gbo bhale deba li, e ro oli li egia, e lie oli, “A yase obo eke na oghie oyi iJu!” Elase oli alo.

4 IPaleti o ke gbo fiẹ je olase deba egbo iju, ọọ, “A ghe oli e, mhi rue oli lasese na e ni a ro lese khi mhi aa me umha-guẹli shi oli obo ni o re mhe ya lie a ka gbe oli a.”

5 Abi iJesu o ro fiẹ lasese ni o ro rughu arula igba, o gbo so awulu egholi oyile ni oghie o so, iPaleti ọọ, “A ghe oni omose!”

6 Abi ighie eyi ekpodalo-ugamhi ali eni e khe ekhe Owa oyi Eshinegba e ro me oli, e tsesẹ, eẹ, “A ta li ma ọọra apfida! A ta li ma ọọra apfida!”

IPaleti ọọ, “Eẹ a rue oli vu ya ta ma ọọra. Mhi aa me umha-guẹli shi oli obo.”

7 Egbọ iju eẹ oli, “Anye mhue ushi ni o guele a gbe oia, itobọ khi ọọ lu egboli Omi Eshinegba.”

8 Abi iPaleti o ro suo ona, ulishi o tigbe mema lolo mu oli.

9 O nyene egbe je elemhi apfe oyoli, ya mhila iJesu, “Ongbe obo u khi?”

Ama iJesu o tsaghię oli-a.

10 IPaleti oo, “Wa ya mie mhe unu? Wa lese khi mhi mholi ekpabo ni mhi ro dobe ya pfa e shi eke, ali khi mhi gbo dobe ya lie a ka te ma oora apfida gbe-a?”

11 IJesu oo oli, “Wa kha mholi afu shi mhe idiegbe ini oa khi Eshinegba o ri oli ne lo, ama ogbo ni o mu mhe bhale ghi e, loli o mholi umha-gueli oyi olamhe ni o fu ne.”

12 Abi iPaleti o ro suo ona se, o nono ode ni o te ya wolo iJesu abo a, ama eni egbo iJu e kiele tseşe, e lie oli, “Ini u ze oli obo, wa khi omole iSiza oghie oniemi oyi iRomu. Onini o da guele khi oghie loli khi, obe iSiza o khi.”

13 Abi iPaleti o ro suo ingmemhi ena, o rue iJesu je olase, iPaleti o ya shito ukpho eche ni o shito la so ezọ, ni a lu Eteşe eche (iGabata a ri elemhi Iburu ee lu oli)

14 Eghęghę agho ovo o lese ramhi iteteva ukhomhi elegho, ikhi ogbele ni a mu egbe e shi ukpe iPasova. IPaleti oo eni egbo iJu, “Oghie oyeę ghọ o!”

15 Ama e tseşe, “A rue oli ya gbe-a! A rue oli ya gbe-a! A ta li ma oora apfida!”

IPaleti o mhila we, oo, “A nono ni mhi ta oghie oye e ma oora apfida?” Ighie eyi ekpodalo-ugamhi ee o li, “Anye aa mholi oghie olese dose oghie iSiza.”

16 Igho iPaleti o ri iJesu na ekholi-okhue e ka ta li ma oora apfida.

A ta iJesu ma oora apfida (iMat 27.32-44; iMak 15.21-32; iLuk 23.26-43)

Ro te agho vu ekholi-okhue e te rue iJesu vu.

17 IJesu o fie lasele, lolighuo o tsua oora apfida oyoli, o je ashini a lu “Ukhomhi olimhi ni o ku igua-a.” (IGogota a ri elemhi Iburu e lu akagho.)

18 Agho e tali ma oora apfida shi, e ta egbo aava ma eera mama li. Oghuo epfe obita, onokpole epfe obogobo, iJesu o la we iteva.

19 IPaleti o keke emhi ro kphase oni oora-apfida. Emini o keke shi o khi, “IJesu Ongbe iNazaręti, Oghie oyi Egbo iJu.”

20 Ehubu eni egbo iJu e ze oni emhi, itobo khi ashini a ta iJesu ma oora apfida shi oa nuata shi apfe. Elemhi Iburu, ghe iLatini ali iGiriki a ro keke oni emini a ro kphase oora apfida ni a ta iJesu ma.

21 Ighie eyi ekpodalo-ugamhi eyi egbo iJu ea lama shi emini iPaleti o keke. E ya gueye oli, ee oli, “Anye ea nono ni u keke oghie oyi iJu shi o, emini u kha keke shi o khi, Oghie oyi egbo iJu omose ona o khi loli khi.”

22 IPaleti oo we, “Mhi she keke emini mhi keke.”

23 Abi eni ekholi-okhue e ro ta iJesu ma oora apfida se, e wolo ide eyoli kemhi shi asha ene. Ogbogbo o rue asha eghuo o, e gbo rue awulu oyoli ni a do ni aa rote ashikhoghuo gbela toma.

24 Eni ekhōli-okhue e gueye egbe wẹ, “Awa khi nyanọ li-a, awa ti ebe shi ọ, ni awa mẹ ọni o ya mu, ni ọ rue ọli.” Eri a mẹ onana ni emini a keke shi Ebe-no-pfuase o bhale ya tse, ni ọọ, “E kemhi ide eyemhe, e gbo ti ebe shi awulu oyemhe.”

25 Inyo iJesu, ali inyoghuo inyoli nokpotso, ali iMeli ughue iKilopasi, ali iMeli onge iMagidalen i migha mama oni ọọra apfida ni a ta iJesu ma.

26 IJesu ọ mẹ inyoli ali ọmọ odukhokho oyoli ni ọ nono ingme oyoli, khi ọ migha epfe agho, iJesu ọọ, “Inyo! Omi-egho.”

27 O gueye oni ọmọ odukhokho, ọọ li, “Inye gho.” Ro te agho vu oni ọmọ odukhokho ọ te rue oni inyo iJesu je apfe ni ọ te nu ọ la.

Eghuli ni iJesu ọ ghu

(iMat 27.45-56; iMak 15.33-41; iLuk 23.44-49)

28 IJesu ọ lese khi emhikpa e she ze ukhomhi, ọọ, “Okiamẹ ọa gbe mhe.” Onana o ri emini a keke shi Ebe-no-pfuase bhale ya tse.*

29 Ubene ni o vo onyo ni o khe-a o la epfe agho, e so isoso† elemhi oni onyo e ro oni isoso kphase ukpokpo oyi ọọra ni a lu isopu ni o nue, e nise ọli je iJesu unu.

30 Abi iJesu ọ ro to unu oni onyo, ọ, “O she pfo.”

O do ukhomhi gbe, ọ ghua.

31 Ekhemhue eyi egbo iJu e vu ya mhila iPaleti ọ ze ni wewe e ya pfi emhi shi awe eyi emose ni a ta ma ẹera apfida guoghọ-a. Ali ni wewe e taghie wẹ te eni ẹera apfida tiemhile. Emini o ze ni e ro ligho mhila khi, ẹlegho khi ogbele ni ala mu egbe khe ogbele iyemhea oyi egbo iJu. Eri ẹa nono ni e la ikhomhi ẹera apfida ramhi ogbele iyemhea, itobo khi oni ogbele iyemhea ogho, ogbele ipfuase na ke o khi.

32 Eni ekhōli-okhue e vu ya pfi emhi shi ogbo oni odode ni a ta ma ọọra apfida mama iJesu awe guoghọ a. E gbo ligho ya guoghọ eyi oni o kpole a.

33 Ama abi e ro ramhi ayi iJesu, e bhale ya ẹ khi ọ she ghua, itobo igho ẹa ke pfi emhi shi iJesu awe guoghọ a.

34 Oghuo eni ekhōli-okhue ọ so iJesu ogbhorọ epfe, utoghuokpe, ọlia ali amẹ e te ọli egbe ku lasele.

35 Ogbo ni ọ ri ẹloe mẹ ona ọ pfi otsele shi ọ, otsele ni ọ pfi o khi igesikia itobo khi ọ lese gboo khi igesikia ona o khi. Eri ọ pfi otsele ona ni a khi eni e miesuo.

36 Onana o ri emini a kpe keke shi Ebe-no-pfuase bhale ya tse, ni o guele khi, “Ogbokhoghuo ọa ya khi ugua shi ọli idiegebe.”‡

37 Ebe-no-pfuase o gbo ngme gho shi asha olese khi, “E ya ke bino oni e ya to

* 19:28 Li ze iwolo 69.21; 22.15 † 19:29 isoso egbo eghuo ẹ lu isoso ukodo.

‡ 19:36 Li ze Okiali 12.46; iNoba 9.12; iwolo 34.20 § 19:37 Li ze iZaka 12.10

ogbhoro gbese a.”[§]

20

Iroto oyi iJesu

(iMat 27.57-61; iMak 15.42-47; iLuk 23.50-56)

³⁸ Abi a ro me ona se, iJosefu onge Arimatia, ni o khili otuoghwo eniye odukhokho ni e bena e deba iJesu itobo khi o na ulishi oyi ekhemhue eyi egbo iJu, o le ya mhila iPaleti olimhi oyi iJesu. iPaleti o lama na li o rue olimhi oyi iJesu ya ro to. Igho iJosefu o bhale ya rue oli vu.

³⁹ INikodemosi ni o ke ya me iJesu ele iyose o kphase iJosefu. O tsua ikhumhi ni a ro o to olimhi egbe ini o khi kele kea. Eni ikhumhi e bu ramhi akpulu ikoko oghuo. O gbo tsua ituale ni e pfi mhue.*

⁴⁰ Eni emose aava e tsua olimhi oyi iJesu, e ri ide epopfo geno oli. Abi e li i geno oni olimhi, igho e pfi ituale shi oli egbe, ni e ri ikhumhi na ro o shi olimhi egbe ma o, abi egbo iJu e lie mu olimhi egbe shi iroto, abi ushi oyewe o ngme.

⁴¹ Ukuku ogba o la ashini a ta iJesu ma ora apfida shi, uji ona ufuegbhe onogbo ni aa ri ogbo to ghue o li la agho.

⁴² Itobo khi elegho o khi ogbele ni a ro mu egbe e shi eke ke ogbele iyemhea oyi egbo iJu, ali khi oni uji na ufuegbhe o ti mama we, e ri olimhi oyi iJesu yeshi agho.

IJesu o rote eghuli guale
(iMat 28.1-8; iMak 16.1-8; iLuk 24.1-12)

¹ Ele uzogbe fiefie ele ni oo deba ogbele iyemhea oyi egbo iJu, obili o kie la ogbe. IMeli onge iMagidalen i je uji ashini a ri iJesu yeshi, o bhale ya e khi a she gheghele eche unu oni uji-a.

² Igho o so awe unamhi na je ayi iSam o iPaleta ali om odukhokho ogho ni iJesu o nono ingme oyoli, o gueye we, oo, “E tsua olimhi oyi Onomhue elemhi uji ufuegbhe a! Anye aa lese obini e tsua li je.”

³ Igho iPaleta ali oni om odukhokho ogho e vu ya je oni uji ufuegbhe.

⁴ Wewe aava ee na, ama oni om odukhokho ogho o na dose iPaleta, o kpe ramhi oni uji ufuegbhe ke iPaleta.

⁵ O nyese egbe bino elemhi oni uji ufuegbhe, ama o la elemhi o. O me ide ni a kpe ro khuli idiegbhe oyi iJesu.

⁶ Igho iSam o iPaleta ni o kpukhokho ramhi agho o dose ya lo elemhi oni uji ufuegbhe. O me eni ide khi e la elemhi uji ufuegbhe.

⁷ Ode olimhi ni a ro ge iJesu ukhomhi o li la agho. Oni ode o khili shi ashaoda shi ide enekpole o. O kie khili shi agho abi a kie kpe li roli khili olimhi oyi iJesu, o taghie a.

⁸ Igho oni om odukhokho ogho ni o kpe ramhi oni uji, o

* 19:39 Li ze iJon 3.1-2

li lo elemhi ọli, ọ ri ẹloe me, ọ miesuọ.

⁹Oni ẹghẹghẹ ẹa kie lẹsẹ emini a kekẹ shi ebe khi iJesu ọ ya te ẹghuli guale.

¹⁰Ighọ eni eniye odukhokho e nyenẹ egbe je apfe.

Ijesu ọ ri egbọli khasẹ iMeli ọnge iMagidaleni

(iMat 28.9-10; iMak 16.9-11)

¹¹IMeli ọ migha olase oni uji ufuegbhẹ ọọ viẹ. Abi ọ li kie le viẹ, ọ nyẹsẹ egbe bino elemhi oni uji ufuegbhẹ.

¹²Ọ me khi igeni aava ni e sọ itsua epfopfo e shito elemhi oni uji ufuegbhẹ ni a ri olimhi oyi iJesu yeshi. Oghuo ọ shito obini iJesu ọ kpẹ ri ukhomhi shi, ọni ọ kpọle ọ shito obini ọ kpẹ ri awẹ shi.

¹³Ẹ mhila li, ẹẹ ọli, “Nọ kpotso, elọ u viẹ ẹ shi?” Ọọ wẹ, “E she tsua Ọnọmhuẹ ọyemhẹ vu, mhi aa lẹsẹ obini e rọli shi.”

¹⁴Ighọ ọ nyenẹ egbe ọ me khi iJesu ọ migha aghọ, ama ọa lẹsẹ khi iJesu lọ.

¹⁵Ijesu ọ mhila li, ọọ li, “Nọ kpotso elọ u viẹ ẹ shi, oghuo wa nono?”

IMeli ọ dabi khi ọni ọ riẹle shi oni ogba ni o la aghọ lọ, ọ, “Ọga ini yeyẹ u tsua li vu kpẹkpẹ gweye mhe obini u rọli shi ni mhi je aghọ ya tsua li.”

¹⁶Ijesu ọ li, “Meli.” Ọ sọ alo ghue ọli, ọ tsesẹ leghe ri ẹlemhi oyi ẹgbọ iJu yemhẹ ọli, ọọ, “Raboni!” Ọsesẹ a ri ona ngme ẹlemhi Iburu.

¹⁷Ijesu ọ gweye ọli, “Khi mu mhe mhuẹ, itobọ khi mhi aa nyenẹ egbe je oyi Ita ne. Ama ka gweye inyoghuo-mhe khi mhi ya nyenẹ egbe je oyi Itamhe ni ọ li khi Ita wẹ, ali Ẹshinẹgba ọyemhẹ ni ọ li khi Ẹshinẹgba ọyewẹ.”

¹⁸Ighọ iMeli ọnge iMagidaleni ọ vu ya gweye eniye odukhokho khi lọli me iJesu Ọnọmhuẹ. Ọ gweye wẹ ingme ni Ọnọmhuẹ ọ gweye ọli.

Ijesu ọ ri egbọli khasẹ eniye odukhokho eyọli

(iMat 28.16-20; iMak 16.14-18; iLuk 24.36-49)

¹⁹Abi ogbomhi o rọ mu eke ẹleghọ ni o khi ogbeakọlọ oyi ẹle iyemhẹa oyi ẹgbọ iJu, ni o khi ẹle ni odode elemhi ẹfo uka, eniye odukhokho eyọli e le gba elemhi owa, e sọnọ okpẹ ode itobọ khi ee na ulishi oyi ẹgbọ iJu eni ẹẹ mhese. Udemhija, iJesu ọ bhale ya migha wẹ iteva bia, ọọ, “Opfomhẹ o ka nu ẹ la.”

²⁰Abi ọ rọ ngme ona se, ọ ri abọ ali epfe khasẹ wẹ. Oghẹle o vọ wẹ elemhi shi abi e li me Ọnọmhuẹ.

²¹Ijesu ọ gbo liẹ wẹ, “Opfomhẹ o ka nu ẹ la. Abi Ita ọ li ghie mhe mhi li liẹ ghie ẹ.”

²²Ighọ ọ yemhẹ ku wẹ, ọọ, “A mie Ayemhẹ-nọ-pfuase,

²³Ogbọ ni a da gbe olamhẹ kua na, a she gbe kua na li, ama ini aa da gbe kua na wẹ ne, aa gbe kua na wẹ.”*

Ijesu ọ ri egbọli khasẹ iTomosi

* 20:23 Li zẹ iMat 16.19; 18.18

24 Otu oghuo elemhi eni eniye odukhokho ogbava ni a lu iTomosi ni a gbolo eḡ lu itsema, ọa nu wẹ la agho ni iJesu o ro bhale wẹ iteva.

25 Eniye odukhokho eni e kpole e gueye ọli, e ọ li, “Anye me Onomhue!”

ITomosi oo, “Ini mhi aa li me emeli ni o la ashini a te ta itse shi ọli abo ni mhi ri umiesobo oyemhe ti ọli, ni mhi aa ro ri obo shio oni o la li epfe, mhi aa ya miesuo khi o she guale.”

26 Abi o ro gbe utui, eniye odukhokho eyoli e gbo lona elemhi owa, iTomosi o nu wẹ la agho, e so okpe ode. Udemhija iJesu o gbo bhale ya migha wẹ iteva bia, oo wẹ, “Opfomhe o ka nu e la.”

27 O gueye iTomosi, oo li, “Ri umiesobo ti ana, bino mhe abo, gbo nise obo ti mhe epfe. Khi ke mholi akhokhomhe, miesuo!”

28 ITomosi o li, “Onomhue oyemhe, ali Eshinegba oye mhe!”

29 IJesu oo li, “Itobo khi u me mhe u ro miesuo? Ikhivose o khi na eni ea me mhe ne ni e miesuo.”

Emini o ze ni a ro keke ebe ona

30 IJesu o la ukpeloe oyi eniye odukhokho eyoli gbe ikanya onyaloa ni e bububu elese ni ogbo ọa keke shi ebe ona.

31 Ama eri a keke ena shi ebe ini a miesuo khi iJesu khi iKirisiti, ikhi Omiepfuese Omi Eshinegba, ali, ini a mholi

irudunga, a ya mholi agbo itobo eva oyoli.

21

IJesu o ri egboli khasẹ eniye odukhokho eyoli etuoshilua

1 Abi a ro me ingme ena se, iJesu o gbo ri egbe ọli khasẹ eniye odukhokho eyoli, epfe okẹ oniemi ni a lu iGalili. Ina a li me ọli.

2 ISamo iPita, ali iTomosi na lu itsema, ali iNatanieli onge iKena na eke iGalili, ghe IJoni ali iJemhisi imi iZebedi, ali eniye odukhokho eyi iJesu aava elese e ga legba asheghuo nya.

3 ISamo iPita oo, “Mhia vu ya mu ifele.”*

Eḡ ọli, “Anye ya deba e ye.” Igho e lo elemhi oko-oke oniemi oni ikeke. Ama eliyose elẹgho nya, ea mu emhikhoghuo.

4 Eḡ uzogbe fiefie, iJesu o migha egele oyi okẹ oniemi, ama wewe ea lese khi iJesu o nu wẹ ngme.

5 IJesu o mhila wẹ, oo, “Emole mhe, aa kie me afele okhoghuo mu?”

Eḡ ọli, “Anye ea me emhikhoghuo mu.”

6 Oo wẹ, “Pfi aga oye je epfe obita oyi oko-oke oniemi khi a ya me ifele mu.” Igho e pfi aga je obini o ngme, ea ke dobe ti oni aga lo elemhi oni oko-oke oniemi itobo khi o she mu ifele ni e bu.†

7 Igho oni omọ odukhokho ni iJesu o nono ingme oyoli, o o iPita, “Onomhue lo!”

* 21:3 Li ze iLuk 5.5 † 21:6 Li ze iLuk 5.6

Abi iSamọ iPita ọ suọ khi Ọnọmhue lọ ni ọ nu wẹ ngme lẹna, ọ nyanya rọ itsua sọ (itobọ khi eri ọ kpẹ taghie ide eghuo egbe-a), ọ ji pfilo elemhi amẹ.

8 Eniye odukhokho eni e kpọle e gua oni ọkọ-okẹ oniemi bhale esọ okẹ, e e ti oni aga bhale epfe egele. Ekẹkẹ ọa ke lolo nuẹ shi wẹ ọ, emhi nabi ete-awẹ egbhuẹshe o ke rọte aghọ khi.

9 Abi e rọ ramhi egele, e me ingamhi erali aghọ, a ri afele to ọ, ibuledi e li nga ọ.

10 Ijesu ọọ wẹ, “A rọte ifele ni a mu lẹna rue bhale.”

11 IPita ọ nga egele le, ọ ya tialọ oni aga ni o vọ ifele enieniemi ngale egele, eni ifele e kugbe khi egbhuẹshilua ali igbese. Abi eni ifele e rie lighọ bu, oni aga ọa nyanọ a.

12 Ijesu ọọ wẹ, “A bhale ya le emhi.” Ogbokhoghuo eni eniye odukhokho ọa mhila li, “Oghuo u khi?” Itobọ khi e lese khi Ọnọmhue lọ.

13 Ighọ iJesu ọ ya rue oni ibuledi kemhi na wẹ, ọ gbo kemhi oni afele na wẹ.

14 Onana o khi utonuzi-ese ni iJesu ọ ri egbọli yaa khase eniye odukhokho eyọli abi ọ te rọte eghuli guale.

Ijesu ọ nu iPita ngme

15 Abi e rọ le se, iJesu ọọ iSamọ iPita, “Samọ omi iJoni! U fe nono ingme oyemhe dose emhi enana nya?”

IPita ọ sọ li ọ, ọ Ii, “Ọnọmhue, u lese khi mhi nono ingme oye.”

Ijesu ọọ, “Ri eminale na imi isumha eyemhe le.”

16 Utonuzeva, iJesu ọọ li, “Samọ omi iJoni, u fe nono ingme oyemhe?”

IPita ọọ Ii, “Gueguegue Ọnọmhue, Ulese khi mhi nono ingme oye.”

Ijesu ọọ, “Ri eminale na isumha eyemhe le.”

17 Utonuzese iJesu ọọ li, “Samọ omi iJoni, u fe nono ingme oyemhe?”

Oni ingme o to iPita egbe, itobọ khi iJesu ọ mhila li itese, “U fe nono ingme oyemhe?” Ighọ iPita ọ sọ li ọ, ọ, “Ọnọmhue, u lese emhikpa, u lese khi mhi nono ingme oye.”

Ijesu ọọ li, “Rọ eloẹ khu isumha eyemhe.”

18 Ijesu ọọ, “Igesikia mhi gue ye khi, abi u rọ khi ozele, eri u ri itsua sọ u fiẹ je obini o ghọle ẹ, ama ini u womhe, ogboese ọ ke ya ri itsua ke sọ ẹ, ọ mu ẹ obọ je obini ọa ghọle ẹ ni u je.”

19 Eri iJesu ọ ngme ona ni ọ rọkhasẹ abi iPita ọ li ya ghua ni o ya rọ ufumhi ghi Eshinegba. Ighọ ọọ iPita, “Ke deba mhe.”

20 IPita ọ nyene egbe, ọ me oni omọ odukhokho ni iJesu ọ nono ingme oyọli, oni ọ shitọ mama iJesu abi e rọ nu iJesu le eminale ni o kpukhokho khi ọọ deba wewe. Lọli ọọ ke mhila iJesu ogbọ ni ọọ, “Ọnọmhue, oghuo ọ ya re de?”

21 Abi iPita ọ rọ me ọli, ọ mhila iJesu, ọọ, “Se egbo na agbo e fe ya li oni omose ọna?”

22 Ijesu sọ li ọ, ọ, “Ini mhia nono ni ọ la agbo ramhi ni

mhi rọ ya gbo nyenę egbe bhale agbọ, onoghuo o khi oyę shi ọ? Ke deba mhe.”

²³ Ona o zę ni e rọ bęna ngme ọli iteva oyi eniyę odukhokho eyi iJesu, khi ọni ọmọ odukhokho ọna ọa ya ghu ghue. Ama iJesu ọa lię khi ọa ya ghu ghue. Eri ọ leşę lię, “Ini mhia nono ni ọ la agbọ ramhi ni mhi rọ ya gbo mu egbe nyenę bhale, onoghuo o khi oyę shi ọ?”

Ungmemhi ni o kpukhokho

²⁴ Lọli khi ọmọ odukhokho ni ọ pfi ọtsęle shi eni ingmemhi ena, lọli ọ gbo kẹkẹ wẹ shi ebe. Awa gbo leşę khi emini ọ ngme khi igęsikia lọ.

²⁵ Ikanya ebubu e laọ ni iJesu ọ gbe. Ini ęę a kẹkẹ wẹ nya ukpamhi oghuo-oghuo lọ, mhi sa khi agbọ ona nya ọa kha luşę ebe ni a kha kẹkẹ wẹ shi.

Ikanya Eyi Ighiusomhi eyi iKirisiti

A rue Ijesu nga idane

¹ Elemhi ebe oni odode ni mhi kpe keke ghi yeye iTiofilosi,* mhi keke ikanya ni Ijesu oḡ gbe ali emini o sese roṭe igbaekele,

² ya ramhi ogbeḷe ni a ro rue oḷi nga idane. Neni a rue oḷi nga idane, o roṭe Ayemhe-nḡ-pfuase ri omheṣe na ighiusomhi na keḷe ni o ze.

³ Abi o ro ghu-a se, ogbeḷe egbhueva o la elemhi agbo o ri egboḷi kia khasḷe ighiusomhi eyoḷi, ni o rokhasḷe gboo khi akhokhomhe oḷa la o khi o la agbo. E me oḷi, oḡ gue ungmehi oyi Eghiele oyi Eshinegba ye we.

⁴ Eḷeghuo khi e legba asheghuo, khi o nu we e le eminale, o ri omheṣe ona na we, oḡ we, “A khi roṭe iJerusalemu vu, a migha khe isomhopfa ni mhi gueye e, ikhi isomhopfa ni itamhe o shobo.†

⁵ Amḷe iḶoni o ro o batazi egbo, ama oḷa ke ya teṣe neni a ri Ayemhe-nḡ-pfuase ya batazi e.”‡

A rue ijesu nga iloghie

(iMak 16.19-20; iLuk 24.50-53)

⁶ Abi ighiusomhi e ro nu ijesu legba kugbe, e mhila

li, eḷe oḷi, “Oḡomhue, u ya la eghēghe ona rue eghiele oyi egbo iZireni nyene gbo na we?”

⁷ Oḡ we: “Aa khi eni e leṣe oni eghēghe ali oni ogbeḷe ni Ita o ri afu eyoḷi mheṣe.

⁸ Ama ini Ayemhe-nḡ-pfuase o bhale e idiegbe, a ya mhōli ekpabo, a ya ke pfi oṭseḷe na mhe elemhi eke iJerusalemu, ali eke iJudia, ali iSameria ali elemhi eke agbo ona nya.”§

⁹ Abi o ro ngme eni ingmemhi enana se, a rue oḷi nga idane abi e kie li ghō feli oḷi. Otughunu o khukhu oḷi-a, o rue oḷi odalo oyewe le.*

¹⁰ E bino idane chii abi o li vu, utoghuokpe emose aava ni e so ide epfopfo e migha we iteva.

¹¹ Eḷe we, “Egbo iGalili, elo o ze ni a ro migha a feli idane chii? Oni ijesu ona ni a rue odalo oyewe vu nga idane, abi a li rue oḷi vu, igho o li ya gbo nyene egbe bhale.”

A ze iMatayasi to eloli iJudasasi

(iMat 27.3-10)

¹² Igho, eni ighiusomhi na keḷe e roṭe oni ukhomhi Ute Eḷera Olivu ni e migha vu je iJerusalemu, agho oḷa lolo nuḷe shi iJerusalemu, okiali imali oghuo lo, ni Ishi eyi iMosisi o lama shi ogbo ke kia ogbeḷe iyemheḷa.

¹³ Abi e ro ramhi iJerusalemu, e nga ukhomhi atonga, e lo elemhi owa

* 1:1 Li ze iLuk 1.1-4 † 1:4 Li ze iLuk 24.49 ‡ 1:5 Li ze iMat 3.11; iMak 1.8; iLuk 3.16; iḶon 1.33 § 1:8 Li ze iMat 28.19; iMak 16.15; iLuk 24.47-48 * 1:9 Li ze iMak 16.19; iLuk 24.50-51

ni ee legba. Eni e la akaghọ khi iPita, iJoni, iJemhisi ali Aduru, iFilipu ali iTomosi, iBatolomiu ali iMatiu, iJemhisi olese ni o khi omi Afeusi, iSamioni ni o la otu iZiloti ali iJudasi omi iJemhisi.†

14 Wewẹ nya e lona a kugbe egheghe kpa a so iromhi. Ghe eni ikpotso ali, iMeli inyo iJesu, ali inyoghuo iJesu.

15 Ogbelẹ ni a ngme ena, iPita o vule migha iteva oyi igbaa oyi eni e mie iJesu iKirisiti suo. Egbọ egbhuesesa e la agho (120)

16 Igho oo, "Inyoghuo, a mema ya ri emini ebe-nopfuase o ngme tse, ni Ayemhe-nopfuase o rote unu oyi iDefidi ngme shi eke shi iJudasi egbe, loli oni iJudasi ni o ri ode khasẹ egbo ni e mu iJesu.

17 Otuoghuo elemhi awa o khi ni o nu awa gbe akanya abi aghiusomhi."

18 IJudasi o wolo ikpagho ni o mie shi ikanya okholo ni o gbe ya de eke. Agho o de tu ukhomhi eke ku ito-a shi.

19 Ogbokpa ni o la iJerusalemu o suo ona, e ri irarigho ri unu eoli oyewe lu akaghọ Akedama, ni o migha shi Eke Olia. †

20 IPita oo, "Irari khi, a keke oli shi ebe iwolo khi, "A tsua owa oyoli pfa.

A khi me ogbokhoghuo ni o gbo la oni owa,

"A gbo li keke oli:

"Ogboese o rue asha omhese oyoli.'S

21 "Itobo onana, o ti ni awa ze ogbo oghuo ni o to elolo iJudasi, oni ogbo o mema ya khi ogbo ni o nu awa la o rote egheghe ni iJesu o ro la iteva oyi awa,

22 rote egheghe ni iJoni o ro batazi egbo ya ramhi ogbele ni Eshinegba o ro rue iJesu lasela elemhi iteva oyi awa nga idane. Ogbọ ni awa ya ze o mema ya nu awa gbe akanya aguele irote eghuli guale oyi iJesu."

23 Igho e khokho emose aava. Omose oghuo ni a lu iJosefu ni a lu iBasabasi, ni a gbolo e lu iJositosi, ali omose olese ni a lu iMatayasi.

24 Igho e lema, e li, "Onomhue, u lese udu oyi ogbokpa, kpekpe rote elemhi egbo etuava ena ze

25 oni o ya rue ikanya aghiusomhi na keke ni iJudasi o ze obo je obini o khili oyoli."

26 Igho e bo shi o, obo o mu iMatayasi, Igho e li ya rue oli ma aghiusomhi na keke ogbaghuo ni iJesu o ze.

2

Ayemhe-nopfuase o bhale ogbele iPetikosi

1 Abi ogbele ukpe iPetikosi o ro ramhi, igbaa oyi eni e mie iJesu iKirisiti suo nya e lona kugbe asheghuo.*

2 Utoghuo-kpe, okeke o rote idane tiemhile abi akpekpe

† 1:13 Li ze iMat 10.2-4; iMak 3.16-19; iLuk 6.14-16 † 1:19 Li ze iMat 27.3-8

S 1:20 Li ze iwolo 69.25; 109.8 * 2:1 Li ze iLev 23.15-21; iDeut 16.9-11

ni o toto, oni okeke o vọ el-
emhi oni owa ni e shitọ.

³ Ighọ e mę emini e li
abi ẹlẹmhi erali khi e rọte
ashakhasha a tiemhile shi wẹ
ọ.

⁴ Ighọ Ayẹmhe-nọ-pfuase ọ
vọ wẹwẹ nya egbe, ee ngme
ẹmuẹ oyi ẹoli ọdọda abi ọni
Ayẹmhe ọ li khueghie wẹ unu-
a.

⁵ Ẹgbọ iJu ni ẹ na ulishi
Ẹshinẹgba ni e rọte ushishi
ọdọda na ekẹ agbọ jele, e la
elemhi iJerusalemu.

⁶ Abi e rọ suọ oni okeke ona,
ebubu ẹgbọ e kpeli bhale. O
nya wẹ alo-a abi e rọ suọ khi
eni ẹgbọ ni e miesuọ khi ẹ
ngme ẹmuẹ ọdọda eyi wẹwẹ.

⁷ Ighọ abọ e sha wẹ eg-
begbọ, e liẹ egbe. “Eni ẹgbọ
ena, ni ẹẹ ngme ẹmuẹ eyawa
ena, ọa khi ẹgbọ iGalili e she
khi?”

⁸ Sẹ awa ke liẹ suọ wẹ khi ẹẹ
ngme ẹmuẹ ọdọda eyawa?

⁹ Ẹoli ọdọda awa te lasele,
eghuo e rọte iPafia bhale,
eghuo ọ, iMedisi ali Elamu,
eghuo ọ, iMesopotemia, eghuo,
ekẹ iJudia ali iKapadosha,
eghuo, iPotusi ali Esha,

¹⁰ eghuo, iFirigia ali
iPafia, eghuo, iJipiti ali
ukiẹkiẹ ekẹ iLibiya ni o ti
mama ekẹ iSairin, eghuo e
rọte iRomu bhale,

¹¹ li shi ẹgbọ iJu ali ẹgbọ iJeta
ni e mu pfi bhale irudunga
oyi ẹgbọ iJu. Eghuo elemhi
awa e rọte iKireti ali Arebia
bhale. Abi o riẹ khi ighọ,
awa kie ga suọ khi ẹ ngme
ẹmuẹ eyawa, ẹẹ guele ikanya
eniẹmhi ni Ẹshinẹgba o gbe.”

¹² Eni ingme ni a mę e sha
ogbọkpa abọ, ẹa leşẹ udi wẹ, e
mhila egbe wẹ. “Sẹ onana o
ngme?”

¹³ Ẹgbọ eghuo e rẹwẹ ẹ li
egia, ẹ liẹ, “Onyọ ọọ gbe wẹ.”

*IPita ọ nu eni ebubu ẹgbọ
ngme*

¹⁴ Ighọ iPita ọ vule migha,
lọli ali ogbaghuo ni e kpọle,
ọ khueghie unu-a leghe, ọ
nu eni ebubu ẹgbọ ngme, ọọ,
“Apfẹmhe iJu, ali ẹẹ ẹgbọ nya
ni a la elemhi iJerusalemu, a
rọ esọ shi mhe ekẹ ni mhi gue
ingme ni a mę ena yẹ ẹ.

¹⁵ Ọa khi onyọ ọọ gbe eni
ẹgbọ ena abi a dabi. Irari khi
ogbe ọa dala ne, agogo itili ẹlẹ
uzogbe awa la!

¹⁶ Iiye! Emini a mę ena o
khi emini ọmekẹguele iJoel ọ
guele ẹghẹghẹ ni o dọsẹ ni ọ
rẹ:

¹⁷ “Ẹshinẹgba ọọ,
Ogbele ni e kpukhokho,
mhi ya ri Ayẹmhe oyẹmhe
na ẹgbọkpa.

Imi ẹ eni emọsẹ ali eni ikpotso
e ya ke gue usomhi ni
mhi ghie wẹ le.

Izeọ eyẹ ẹ, e ya ke
mekẹguele,
egbhali eyẹ ẹ, e ya ke la ẹlena.

¹⁸ Shi eni ẹ ga ogbọ
eni emọsẹ ali eni ikpotso
eyẹmhe,

Mhi ya ri Ayẹmhe oyẹmhe
na wẹ ogbele ni a ngme
ena,
e ya gue emini mhi rọkhasẹ
wẹ le.

¹⁹ Mhi ya rọ ọnyaloa khase,
obini irarogbe,
ali khi mhi ya gbo ri
irọkhasẹ khase ekẹ agbọ.”

Mhi ya pfi okhōli shi elemhi
agbō,
ni ẹgbō e mē ọlia
ali erali ali ewōli

20 Ovō o ya bi obili a,
mhi ya ri uki yilẹ-a rarara
abi ọlia,
neni ogbeḽe ni o funẹ
oyi Onomhūe o ya bhale
ni o rō ya gue ọgbokpa
ẹzọ.

21 Ọgbokpa ni o da pfi lu
eva oyi Onomhūe ne, a ya
tsumhi ọli.†

22 “Eẹ ẹgbō ni a la eke
iZireni, a rō esọ shi ung-
memhi onana. Eẹ a leṣe khi
iJesu ọngi iNazareti, o khi
ọgbō ni Eshinẹgba o ri egbe
khasẹ, o gbo ghie ọli, itobọ khi
Eshinẹgba o ri ekpabọ na li o
ke gbe ikanya ọnyaloa elemhi
iteva o ye ẹ.

23 Abi o rō tseku khia khi a
leṣe ona, a kie zẹ ni ẹgbō ebe
e mu ọli ghi ẹ ni a gbe ọli-a.
Ama Eshinẹgba o she kpẹ gba
onana o leṣe ọli.‡

24 Ama Eshinẹgba o rōte
eghuli guise ọli le. Eghuli ọa
dobe ri ekpabọ oyọli mu ọli
mama, abi ọkpotsọ ni oku ọọ
to ọa li dobe a mu omọ o khi
lasele.§

25 Itobọ khi oghie iDefidi ọọ
ngme ingme oyi iKirisiti ni o
rẹẹ,

“ ‘Mhi mē khi Onomhūe
o migha kpẹṣe mhe
egheghe kpa,
o la ukiekie obita oyemhe,
udu ọa ya nighise mhe.

26 Itobọ ona udu oyemhe o rō
o gheḽe,
mhi ri uruli oyemhe ẹ
kuẹghie-ẹ,
mhi ri egbe deẹ.

27 Itobọ khi waa ya
zẹ mhe obọ shi elemhi uji,
wekhi eri u ya zẹ ni
Oni o pfuase ọye o ke-a.

28 U she kpẹ gueye mhe
khi mhi ya la agbọ ini
u guise mhe te eghuli le.*
U ya ri oghẹle oniemi na mhe
odalọ oye.’

29 “Inyoghūo, mhi mema ya
ri igbedu gueye ẹ khi oghie
iDefidi ni o khi itita awa, o she
kpẹ ghu-a ni ẹgbō e rō tọ, oni
uji ni a rō ọli tọ o kie la akaghọ
ramhi ogbe na amo.

30 Awa leṣe khi iDefidi
o ngme aguele-shi-eke shi
iKirisiti egbe, irari khi o
leṣe khi Eshinẹgba o she kpẹ
shobọ na luẹ ni o mema rō
ya tṣe, khi lọli ya ri ọgbọ
oghūo unuekpẹ oyelue shito
ukpekhomhi oghie oyelue.†

31 Eri Eshinẹgba o rọli khasẹ
iDefidi emini a ya mē og-
benako, lọli o rō ngme ọli
khi Eshinẹgba o ya rōte eghuli
guise iKirisiti le. Ọọ khi
Eshinẹgba ọa ya zẹ ọli ghua ni
idiegbe oyọli o kea shi elemhi
uji.

32 Eshinẹgba guise iJesu le
bhale agbō. Awa nya awa ri
ukpeloe oyawa pfi otselẹ shi o
khi iJesu o she guale.

33 Eshinẹgba o she ri ekpẹ
oniemi na iJesu, o shito

† 2:21 Li zẹ iJofẹ 2.28-32 ‡ 2:23 Li zẹ iMat 27.35; iMak 15.24; iLuk 23.33; iJofn 19.18

§ 2:24 Li zẹ iMat 28.5-6; iMak 16.6; iLuk 24.5 * 2:28 Li zẹ iWolo 16.8-11 † 2:30
Li zẹ iWolo 132.11; 2 iSam 7.12-13

ukiekię obita oyi Eshinegba. IJesu o she rote obo oyi ita mie Ayemhe-no-pfuase, abi Eshinegba o kie kpe li shobo na li. Oni iJesu o she rue oni Ayemhe-no-pfuase tutu vo anye egbe, lohi o khi emini a me, ni a gbolo a suọ memena.

³⁴ Ama lese khi iDefidi o nga iloghie. Itobo igho, aa khi ingme egboli iDefidi oo ngme abi o ro lie,

“Onomhue o gueye Onomhue oyemhe:
Shito ukiekię obita oyemhe,

³⁵ ramhi ni mhi ro ya ri ebe e mele akphawe-nga oye-a[‡]

³⁶ “Itobo ona, mhia nono ni ee egbo iZireni nya a lolo lese onana khi, Eshinegba o ze oni iJesu onana ni a gbe-a shi apfida o khi Onomhue ali iKirisiti.”

³⁷ Abi eni egbo e ro suọ eni ingmemhi ena se, oo nase we udu. Igho e li mhila iPita ali ighiusomhi na kee eni e kpole, ee we, “Inyoghwo, See anye li ya kia ni Eshinegba o ro o gbe olamhe kua na anye?”

³⁸ IPita oo, “Ee nya a mupfi ni anye ri eva oyi iJesu iKirisiti batazi e, ishegho ni Eshinegba o gbe olamhe kua na e, itobo khi eni e mie iJesu suọ a ke khi, ni a mie isomhopfa Ayemhe-no-pfuase.

³⁹ Emini Eshinegba o shobo ena, oye e lo ali oyi imi e, ali oyi ogbokpa ni Eshinegba o ya ze obiobini e la.”

⁴⁰ IPita o ngme ingmemhi ni e bu, o tse agua ye we, oo

we, “A na pfue anasemhe ni egbo ikpamhika ena e ya me.”

⁴¹ Igho a li batazi eni e mie oni ungmehi suọ. Egbo agbele ese e khi ni e kuma igbaa oyi eni e mie iJesu iKirisiti suọ o elegeho.

Ilakugbe oyi ighiusomhi eyi iKirisiti

⁴² Eni egbo e ri emini ighiusomhi na kee e sese we gbe akanya, e ga kugbe, e le eminale kugbe (e le eminale no pfuase kugbe), e so iromhi kugbe.

⁴³ Ogbokpa o mu ekpe ni o fune e na Eshinegba irari olee onyaloa ali oshabo ebubu ni eni ighiusomhi na kee e gbe.

⁴⁴ Eni e mie iJesu suọ nya e kudugbe, e kemhi emini e mholi nya na egbe. §

⁴⁵ Eni e mholi eke e ri eke eyewe de, elese eni e mholi itsua, e re we de, e wolo ikpagho kugbe kemhi ni eni ea mholi.

⁴⁶ Ogbele kpa e ro o legba elemhi apfe ni i la Owa Oyi Eshinegba. E ri oghela ali udu ni o pfuase nu egbe la apfe egbe e le eminale. E le eminale no pfuase.

⁴⁷ Ee kuęhie Eshinegba, igho egbo e li somhi elemhi we. Ogbele kpa Eshinegba o ro ri egbo ni a mie e pfuese ma we o.

3

A ri ochegele-awe-a ni oo lema ze

¹ Ogbeleghuo khi iPita ali iJoni ee je Owa Oyi Eshinegba

‡ 2:35 Li ze Iwolo 110.1 § 2:44 Li ze Ika 4.32-35

egheghe agogo ese oguota ni a la so iromhi.

² A tsua omose ni o rote abi a te bia li guoghō-a bhale ya shi ode unuekpe ni a lu Isomhotse oyi Owa Oyi Eshinegba. Akaghō a tsua li bhale ya shito ni o te me asha mhila egbo ni e lo oni Owa Oyi Eshinegba le ikpagho.

³ Abi o ro me iPita ali ijoni khi e lo oni Owa Oyi Eshinegba, o mhila we ikpagho.

⁴ Igho iPita o bino oli alo tatata, igho li khi ijoni. iPita o o li, “Bino anye!”

⁵ Igho o li bino we, o ri udu sa khi loli ya me we emhi obomie.

⁶ Ama iPita o o li, “Mhi aa mhue ukpagho ya ne, ama mhi ri emini mhi mholi ne. Irari eva oyi iJesu iKirisiti onge iNazareti, vule ni u ke kia!”

⁷ Igho iPita o mu oli obo-ita vule. Udemhija, awe ali ili awe eyoli e na ya to.

⁸ Igho o ti vule migha, o o kia gase. O nu we lo elemhi oni Owa Oyi Eshinegba, o kia, o jino, o kueghie Eshinegba.

⁹ Abi egbo ni e la akaghō nya e ro me oli khi o kia gase, khi o kueghie Eshinegba,

¹⁰ e lese oni o khi, khi loli o kpe e shito ode unuekpe ni a lu Isomhotse e lema, oni ingme o sha ogbokpa abo, ea lese abi o li kia.

IPita o nu eni e migha a fe ngme

¹¹ Abi oni omose o li mu iPita ali ijoni mhue egbo, oshabo o sha eni ebubu egbo, e kpikpi fie deba we ya lo arakpha ni a lu Arakpha oyi iSolomoni ni o la oni Owa Oyi Eshinegba.

¹² Abi iPita o ro me abi eni egbo ee li, o o we. “Ee egbo iZireni, elo o ze ni onana o ro ligho ri abo sha e ni a ro lina a bino anye abine khi ekpabo ali ipfuase eyi anye, anye ro roli ze?”

¹³ Eshinegba oyi Aburaamu, ali Aziki ali iGiekopu, ni o khi Eshinegba oyi itita awa, o she ri ufumhi oyoli na iJesu, Oni o o ga li. Ama eri a rue oli na ena omhese, a kie oli odalo oyi iPaleti abi o tseku mholi oli shi udu khi loli ya rue oli obo-a.*

¹⁴ A kie iJesu oni o pfuase ali oni o gue e ngeli, a ri ochoghō lie iPaleti o rue ogbo ni o gbe ugbeli abo-a na e.†

¹⁵ Ama a gbe ogbo ni o ri ogbo a je agbo-a. Ama Eshinegba o gbo guise oli le abi o ro ghua. Anye aava anye me oli abi o ro guale, anye ro pfi otsese shi o.

¹⁶ Itobo ekpabo ni e la eva oyi iJesu anye ro dobe ri omose ona ni a lese ni a fele ena ze, oni irudunga oyi oni omose loli o ze khi o ga ze pfo nya ni a ga me memena.

¹⁷ “Inyoghuo-mhe, mhi lese khi emini ee ali eni e ralo na e a riele iJesu, khi elemhi umhalese a te riele we.

¹⁸ Ina Eshinegba o li ri ungmemhi oyoli ya tse, oni o rote

* 3:13 Li ze Okiali 3.15 † 3:14 Li ze iMat 27.15-23; iMak 15.6-14; iLuk 23.13-23; ijon 19.12-15

ekę rōte unu oyi emekęguele ngme khi iKirisiti ọ ya mę osoli.

¹⁹ A zọnọ khase Ẹshinęgba khi a pfiđo, ni a mu pfi deba Ẹshinęgba, ni ọ shishi olamhe eye ę a, Ini a ligho, eghęghę iyemhe a o ya rōte obọ oyi Onomhuę bhale deba ę.

²⁰ Ini ọọ ghie oni ọ shobọ bhale agbọ ghi awa kpa, ikhi iJesu, oni Omiepfuese.

²¹ IJesu ọ mema ya kie la obini iloghie ramhi eghęghę ni Ẹshinęgba ọ rọ ya mu emhikpa pfi gbo mele enegbọ-a, abi Ẹshinęgba ọ li rōte unu oyi emekęguele eni e pfuase eyoli shobọ na awa eghęghę ni o dose.

²² IMosisi ọ ngme ọli, ọọ, 'Onomhuę Ẹshinęgba oyęę ọ ya rōte iteva oyęę mu Omekeguele nabi mhemhe vule na ę. A ya mema ri esọ shi ingmemhi ni ọ ya gueye ę.‡

²³ Oni ọa da ri esọ shi ọli ọ, Ẹshinęgba ọ ya khi ọli ęgbọ eyoli ku-a.'§

²⁴ "Egbegbọ lo khi emekęguele nya rōte iSamuę ya je odalo, e kpe ngme emini a ya mę eghęghę oyawa shi ekę.

²⁵ Emini eni emekęguele enana e ngme, ęę o gọ lu, a li mholi okemhi shi ishobọ ni Ẹshinęgba ọ shi na itita ę, ni ọ la lię Aburaamu, 'Mhi ya rōte obọ oyi imimi ę khi vose na ęgbọ na agbọ nya.'*

²⁶ Abi Ẹshinęgba ọ rọ mu Oni ọọ ga oyoli vule, Ọ te odode

ghie ọli ghi ę ni ọ khi vose na ę abi ọ rọ mu ę nyene lase ingmobe eye ę le."

4

IPita ali iJoni e migha odalo oyi Enighie shi ęzo

¹ Abi iPita ali iJoni e kie nu eni ęgbọ ọ ngme, eni ęę khekhe oni Owa Oyi Ẹshinęgba ali ęgbọ iSadusisi eghuo e bhale deba iPita ali iJoni.

² Elemhi e bi wę itobọ khi eni ighiusomhi na keę eyi iJesu ee se se eni ęgbọ khi iJesu ọ rōte eghuli guale. Eri onana guele khi ęgbọ eni e ghu-a khi e gbo ya rōte eva oyi iJesu guale.

³ Igho eni ęgbọ e li mu iPita ali iJoni, irari obili o she bi ęlegho, e mu wę shi owa ighumha ramhi ogbeakolo.

⁴ Ama ebubu ęgbọ ni e suọ ingme ni iPita ọ ngme e mie iJesu suọ. Emose ni e ke miesuọ e ya khi ęgbọ agbele ishe.

⁵ Ogbeakolo, eni ęę mhesę eyi iJu ali eni egbhali ali esese Ishi eyi iMosisi eyi ęgbọ iJu e legba iJerusalemu.

⁶ E ya mę Oga oyi ekpodalo ugamhi ni a lu Anasi ali iKefasi, ali iJoni ali Alezada ali ena omhuę-apfe oyi Oga oyi eni ęę ralo ugamhi.

⁷ Igho e mu iPita ali iJoni bhale iteva oyewe migha. E mhila wę, "Ekpabọ nabise ali eva oyoghuo a rọ gbe akanya ona?"

‡ 3:22 Li ze iDeut 18.15,18 § 3:23 Li ze iDeut 18.19 * 3:25 Li ze Igbae 22.18

⁸ Igho iPita ni Ayemhe-no-pfuase o vọ egbe o wẹ: “Eẹ enighie eyi egbo ali egbhali,

⁹ A mhila anye amo akanya onete ni a gbe na oni o guoghọ-a ona, ali abi a li rọ ọli toto.

¹⁰ Emhi oghuo o la o ni anye ya gueye ẹ ali egbo iZireni nya. Itobọ eva oyi iJesu iKirisiti onge iNazarẹti, omose ona o rọ migha iteva oyeẹ ni o rọ toto ngmala ena. Lọli o khi oni iJesu ni a ta ma apfida, ni Eshinẹgba o rọte eghuli guise le.

¹¹ IJesu khi ogho ni Ebe-no-pfuase o ngme ni ọọ,*

“Eche ni itsona e kie pfa,
o tigbe mele oni echeli ebe
ni o mu eloe ne nya-a.’

¹² Imiepfuese ọa la obọ oyi ogholese, irari khi eva olese ọa la ni Eshinẹgba o rọ na oghokhoghuo elemhi agbo onana ni awa ya te mhọli imiepfuese.”

¹³ Abi eni eẹ mhese na egbo iju e rọ me igbedu ni iPita ali iJoni e mhọli, ni e rọ ya lese khi egbo tse ni ẹa ye owa ebe e khi, abo e sha wẹ, e me-wẹ-me khi e kpe nu iJesu u kia.

¹⁴ Ama, abi e rọ me omose ni a rọ ze khi o nu wẹ migha agho, ẹa ke mhue abi e ya ngme.

¹⁵ E gueye wẹ e vu wewe iteva lase ne, igho e li nu egbewe ye ochi.

¹⁶ Eẹ, “Se awa ya li eni emose ena?” Egbokpa ni e la iJerusalemu e she lese ikanya

onyaloo ni e gbe, ọa ze awa ya tia.

¹⁷ Ini ingme ona o khi gbekẹ-a, awa mema tse agua ye wẹ e khi gbo gbudu ri eva oyi iJesu nu oghokhoghuo ngme.

¹⁸ Igho e lu iPita ali iJoni nyene egbe bhale elemhi oni owa ugamhi, e gueye wẹ e khi me emini o re wẹ gbo gbudu ri eva oyi iJesu nu oghokhoghuo ngme wekhi irọli sese.

¹⁹ Ama iPita ali iJoni eẹ wẹ, “Eẹ a so o ghue, ini o ya ti Eshinẹgba eloe, ini eẹ o fe ti ni anye suo eso na, ocho ni anye kha rọ suo eso na Eshinẹgba.

²⁰ Irari khi aa tigbe ya me khi anye ẹa ya gueye egbo emini anye me ni anye suo.”

²¹ Abi e rọ nyamhise wẹ alo se, e zewe obọ vu. E me khi ẹa ze wẹ ya nase itobọ khi egbo ni e la agho nya ee kueghie Eshinẹgba shi itobọ omose ni ọa kpe dobe ẹ kia ni e rọ ze.

²² Irari khi oni omose ni a ri akanya onyaloo rọ ze o dose ikpe egbhueva.

Olema ni igbaa eni e mie iKirisiti suo e lema shi igbedu

²³ Abi a rọ rue iPita ali iJoni abo-a, e le deba apfewe. E gueye wẹ abi ighie eyi ekpodalo-ugamhi ali egbhali e ngme ewe.

²⁴ Abi e rọ suo ona, e ku unu a nyogho lema Eshinẹgba, eẹ, “Onomhue, yeye u ma eke ali ukhuli ali oke oniemi ali emini e la elemhi wẹ nya.†

* 4:11 Li ze Iwolo 118.22 † 4:24 Li ze Okiali 20.11; iNee 9.6; Iwolo 146.6

25 Yeye u ri Ayemhe-nō-pfuase rōte unu oyi oghie iDefidi ita anye ni o khi oni o o ga oye lie,

“ ‘Elo o ze ni ishishi egbo e ro o nyaghu

ni egbo e ro o domhi mhe shi afue?’

26 Ni ighie ni e la agbo e ro mu egbe shi okholi, egbo eni ee mhesē e tigbili ni e ro mu okholi vule shi Eshinegba Onomhue o, ali iKirisiti ni o she ze.[‡]

27 Esheshi ghō Erodu ali iPotiusi iPaleti e ya nu egbo iJeta ali egbo iZireni lona kugbe elemhi oni eoli ona. E gba kugbe, e gbe iJesu oni o o ga oye-a, oni u ze.[§]

28 E riele emini u ri ekpabo ali oghuemhe oye gba shi eke khi a ya me.

29 Ama memena, Onomhue, bino abi e lie domhi, ni u ri ekpabo na anye eni ee ga eye, ni anye gbe udu ke ngme ungememhi oye.

30 Nise obo-a ri egbo ke ze, u gbolo e gbe olele onyaloa ali oshabo rōte eva oyi iJesu Oni o o ga ni o pfuase oye.”

31 Abi e ro lema se, elemhi owa ni e la oo jighise, Ayemhe-nō-pfuase o tiemhie shi we o, o ri igbedu na we e ngme ungememhi oyi Eshinegba.

Igbaa oyi eni e mie iJesu iKirisiti suo ee kemhi itsua na egbe

32 Igbaa oyi eni e mie iJesu iKirisiti suo e mhōli udu

ali usamhi oghuo. Ongewe o a ke lie khi eri loli mhōli emhikhoghuo otso bo oyele, ama eri e ku emhikpa gbe ke mhōli.*

33 Eni ighiusomhi na kee e ri ekpabo o pfi otsele je odalo shi ungememhi irote-eghuli guale oyi iJesu Onomhue. Egbo nya e mu ekpe e na we.

34-35 Aa me ongewe ni emhikhoghuo o to. Irari khi egheghe kpa, eni e mhōli eke ali apfe e ro rewe e de, e rue eni ikpagho ni e re we de bhale ufuēge oyi ighiusomhi na kee. E kemhi we na ogbogbo abi o li to oli.

36 Igho iJosefu ni o khi unuekpe oyi iLiva, ni a bia shi eke iSapurosi. IBanabasi, eni ighiusomhi na kee ee lu oli. Emini a ri eva ona ngme khi Orudushi-egbo o.

37 IBanabasi o ri eke ni o mhōli de, o rue eni ikpagho ni o roli de bhale ya shi ufuēge oyi ighiusomhi na kee.

5

Ananayasi ali iSafira

1 Omose oghuo o la o ni a lu Ananayasi ali ughue oli iSafira, e ku abo gbe ri eke oye we de.

2 O te eni ikpagho ni o ri oni eke de rue sheli na egboli, ughue o lama shi oli o. O tsua ikhukhui eni ikpagho ghi ighiusomhi na kee.

3 Igho iPita o o, “Ananayasi, elo o ze ni u ro ze ni okphaghie o lo e udu, ni u ro lo egbhōli

‡ 4:26 Li ze iwolo 2.1-2 § 4:27 Li ze iMat 27.1-2; iMak 15.1; iLuk 23.1,7-11; iJon 18.28-29 * 4:32 Li ze Ika 2.44-45

khase Ayemhe-no-pfuase, ni u ro rote eni ikpagho ni u ri oni eke de rue shi na egbe e?

4 Óa khi oye oni eke o khi neni u roli de? Abi u ro roli de se, eni ikpagho e a kie khili eye? Elo o ree sa us-amhi onana? Oa khi ogbo u lo egbholi khase ama Eshinegba!”

5 Abi Ananayasi o ro suo ungmehi ona se, o de eke, o ghua. Ulishi oniemi o ku rughu egbo kpa ni e suo emini a me.

6 Igho izo e rote iteva oyewe fie lasele ya ri ide khuli olimhi oyoli, e tsua li fie je olase ya ro to.

7 Iwakati ese e lese na dose te, ughue oli o lole, o a lese emini a me.

8 IPita o mhila li, oo, “Gueye mhe ghue, ingme ni yeye ali Ananayasi odoe a ri oni eke de na?”

Oo li, “Ii.” “Igho anye ri oni eke de.”

9 IPita oo, “Se ee ava-ava a li yemhe shi oghuo ni a mheshe Ayemhe-no-pfuase bino? Emose ni e tsua odoe ya to lena e la ode kia bhale. Wewe e gbo li tsue ya to!”

10 Utoghuokpe o de eke, o ghua. Eni emose e bhale, e ya e khi o she ghua, igho e tsua li ya to mama odoli.

11 Ulishi oniemi o mu igbaa oyi eni e mie iJesu iKirisiti suo nya ni e suo emini a me.

Eni Ighiusomhi na ke e ri eni ee ghua ebubu ze

12 Eni ighiusomhi na ke e gbe ebubu olele onyaloa

ali oshabo ododa iteva oyi eni egbo. Igbaa oyi eni e mie iJesu iKirisiti suo e lona Arakpha oyi iSolomoni na elemhi Owa Oyi Eshinegba elemhi ikudugbe.

13 Ogbokhoghuo o a gbudu kugbe we o aboriekhia khi egbo nya e ri eke na we.

14 Abi o rie khi igho, eri ebubu emose ali ikpotso elese e mie Onomhue suo, a ku we ma igbaa oyi eni e mie iJesu iKirisiti suo.

15 Irari ikanya onyaloa ni ighiusomhi na ke e gbe, egbo e tsua egbo ni e a ze bhale ode ifu apfe rewe yeshi ukpho ali iya, ini akphakpha oyi iPita oo nga we egbe ini oo dose.

16 Olele egbo e rote eoli ni e la gashe iJerusalemu bhale. E tsua egbo ni e a ze ali eni e mholi ayemhe okphaghie bhale, igho a ri wewe nya ze.

A mu okholi vule shi Ighiusomhi na ke o

17 Oga oyi ekpodalo ugamhi ali apfali ni e ga ro la otu oghuo ni a lu otu iSadusisi, e kpe ofuma a deba ighiusomhi na kee.

18 E muno eni ighiusomhi na kee ku lo owa ighumha.

19 Ama eliyose, ageti o khueghie ode oyi oni owa ighumha-a na we, o rue we ya lase.

20 Oo we, “A ke vu, a je elemhi ogba na Owa Oyi Eshinegba ya migha ni a gueye egbo usomhi onete oyi agbo onogbo ona.”

21 Abi ogbe o ro gbe-a, eni ighiusomhi na kee e dose

lo Owa oyi Eshinegba, ee sese. Abi Oga oyi ekpodalo ugamhi ali apfoli ni e ro ga la otu oghuo e ro bhale, e lu ilegba oyi eni egbhali eyi egbo iZireni (ni a lu iSaediri), igho e lu eni e ri eloe e khu owa ighumha e ka wolof eni ighiusomhi na kee igha ghi ewe.

²² Ama abi e ro ramhi agho, e bhale ya e khi eni ighiusomhi na kee ea la oni owa ighumha, igho e nyene egbe je ya gueye eni e ghie we.

²³ E li, "Anye bhale ya e khi a so okpe owa ighumha gba-i! Khi ekhekhe e migha unu ode. Ama abi anye ro khueghie eni ode-a lo elemhi agho, anye ea me ogbokhoghuo elemhi agho."

²⁴ Abi e ro suo ona, abo e sha oghie oyi eni e khe ekhe Owa Oyi Eshinegba, ali ighie eyi ekpodalo-ugamhi, itobo khi ea dobe lese udi emini a me ena idiegbe oyi ighiusomhi na kee. Oni ingme oa ze we sa.

²⁵ Igho omose oghuo o bhale we iteva, oo we, "A bino! Egbo ni a mu shi owa ighumha e la Owa Oyi Eshinegba a sese egbo!"

²⁶ Igho eni e khe ekhe e vu ya mu eni ighiusomhi na kee. Ea ri itoto riele oli itobo khi ulishi eni egbo o mu we ini e ya tono we eche.

²⁷ E muno eni ighiusomhi na kee bhale ya migha agbala, oni oghie oyi ekpodalo-ugamhi eyi Eshinegba o mhila we ogbo.

²⁸ "Anye tse agua gueye e aa khi ke ri eva ona sese egbo. Ama a kiele e sese egbo, osese oyee o gbhiaku eke iJerusalemu nya. A yese ni egbo e ya ke dabi khi anye gbe iJesu-a!"*

²⁹ IPita ali ighiusomhi na kee eni e kpole e we, "Anye mema ya ri oyi Eshinegba gbe dose oyi egbo."

³⁰ Eshinegba oyi itawa o rote eghuli guise iJesu le, oni a solia shi oora gbe-a.

³¹ Eshinegba o she yase oli nga obita ni o pfaase oyoli abi Omi Oghie ali Omiepfuese, ni oo ri egheghe na iZireni gbo mholi imupfi ali igbekua shi olamhe.

³² Anye khi otsese shi eni ingme ena nya, igho li khi Ayemhe-no-pfaase, ni o khi isomhopfa ni Eshinegba o rona eni e suo eso na li.

³³ Abi e ro suo ona, e pfaa, e nono abi e li ya gbolo we-a.

³⁴ Ama iGamalie ni o khi otu iFarisi ni oo sese Ishi eyi iMosisi, ni o khi oni egbo e ri ekpe e na, o vule migha elemhi oni igbaa oyi eni egbhali, o a wolof we fie ne ukuku egheghe.

³⁵ Igho oo we, "Ee emose iZireni a kuegbe-a sa emini a nono khi a ya riele eni emose ena.

³⁶ Egheghe ni o dose, omose oghuo ni a lu iTeudasi o lasese, oo lu egboli emhi, egbo egbhuеше asha ene e kpikpi deba li. Abi a ro gbe oli-a, egbo eyoli e gbhiaku-a, oni okiali oyoli o mele afue-a.

* 5:28 Li ze iMat 27.25

³⁷ IJudasi ɔngi iGalili ɔ gbo lasele eghẹghẹ ni a rọ leli egbọ, loli ali egbọ eyoli e pfi onyaghu. Abi a rọ gbe ọli a egbọ eyoli e gbhiaku-a.

³⁸ Irarigho, mhi ye e ude shi idiegbe oyi egbọ ena, a zẹ wẹ obọ! Zẹ wẹ obọ ni e vu! Ini emini e rọ bhale khi obọ oyi ogbọ o te bhale, e ya de.

³⁹ Ama ini o khi obọ oyi Eshinegba o te bhale, aa ya tigbe dobe mu wẹ gba, ama khi Eshinegba a nu e khọli.”

⁴⁰ Oni ungmehi ni ɔ ngme o lo wẹ udu. E lu eni ighiusomhi na kee lasele, e gbe wẹ itali, e gueye wẹ e khi ke ngme ingme oyi iJesu, e zẹ wẹ obọ vu.

⁴¹ Eni ighiusomhi na kee e rọte agho vu, ee ghele khi wewe e li te ɔ na ri omama a mu shi eva oyi iJesu.

⁴² Ea tigbe yemhe-a, ogbele kpa e rọ ɔ sese, ni e gbo rọ ɔ tse abo usomhi onete khi iJesu ɔ khi Omiepfuese, elemhi ogba na Owa oyi Eshinegba ali rọte owa ya je owa.

6

Emose oshilua ni a zẹ

¹ Eghẹghẹ ni a ngme ena khi igbaa oyi eni e mie iJesu iKirisiti suọ khi ee ke bu shi ɔ, egbọ iJu eni ee ngme elemhi iGiriki elemhi wẹ, ee wọlo khi egbọ iJu eni ee ngme elemhi Iburu, e ri ukpeloe e gbe esamhi-olimhi eyi wewe ini ee kemhi eminale ogbele kpa.

² Igho ighiusomhi ogbava e luno igbaa oyi eni e mie iJesu iKirisiti suọ nya kugbe,

ee wẹ, “Oa ti ni anye pfi akanya itsabo ungmehi oyi Eshinegba shi eke, ni anye so alo ghue eminale ikemhi.

³ A zẹ emose oshilua elemhi iteva oye e, ni a lese khi e mhọli Ayemhe-no-pfuase ali ile singme. Ni awa ri akanya ireloe-khu ingme eminale ali itsua ikemhi na wẹ.

⁴ Ishegho, ni anye me asha ri eloe shi iromhi isoso ali itsabo usomhi onete.”

⁵ Oni akhokhomhe ona o ga ghole egbọ kpa ni e le gba. E zẹ iSitivini ni ɔ mhọli irudunga ali Ayemhe-no-pfuase, ali iFilipu, ali iPirokorusi, ali iNikanọ, ali iTimoni, ali iPamenasi, ali iNikolasi ni ɔ khi ɔngi Atioki ni a mu pfi je irudunga oyi egbọ iJu.

⁶ E ri egbọ ena khasẹ eni ighiusomhi na kee, eni ighiusomhi na kee e ri abo nga wẹ ukhomhi lema na.

⁷ Igho ungmehi oyi Eshinegba oo ge shi ɔ. Igbaa oyi eni e mie iJesu iKirisiti suọ e bu shi ɔ elemhi iJerusalemu. Ebubu ekpodalo-ugamhi eyi Eshinegba e lama shi oni irudunga.

A mu iSitivini

⁸ ISitivini, omose ni Eshinegba ɔ khivose na, ɔ mhọli ekpabo oyi Eshinegba rọ gbe ikanya onyaloa ali oshabo iteva oyi egbọ.

⁹ Ama egbọ eghuo ni e khi igbhoghbo na owa ugamhi oyi eni e kpe khi ighumha, e nu iSitivini i khako. IJu eni egbọ ena e khi ni e rọte eke iSairini, ali Alezadira bhale

ali eni e rōte ekē iSilisha ali Esha bhale, ni e ke ngeli iJerusalemu.

¹⁰ Ama ẹa doḅe nu ilẹsingme ali Ayemhe ni o rō o ngme khe abo.

¹¹ Igho e bena tanō shi ẹgbō eghuo elemhi, e liẹ, “Anye suō abi iSitivini o rō pfi unu-a deba iMosisi ali Eshinegba.”

¹² Igho e ngmiase eni ẹgbō ali eni egbhali ali eni e sese Ishi eyi iMosisi. E mu iSitivini bhale ilegba oyi eni ẹẹ mhesẹ ali esọ-ẹzọ eyi ẹgbō iJu ni a lu iSaḗdiri.

¹³ E wolo ẹgbō lasele ni e pfi oṣṣe ẹgbhali khi, “Omose ọna ọa tigbe yemhe-a ingme-ingmemhi ipfiunu-a ni o ngme e deba Owa Oyi Eshinegba no pfuase ali ushi.

¹⁴ Irari khi anye suō khi oḅo li khi iJesu onge iNazareti ọna, o ya guoghō Owa oyi Eshinegba oyi ẹgbō iJu-a, o ya gbo mu ighuighue ni iMosisi o rō shi ekē na anye pfi.”

¹⁵ Egbō ni e la oni ilegba nya ee bino iSitivini, e me khi alo eyoli e ge nyanyanya abi alo eyi aḡeni.

7

Ungmemhi ni iSitivini o ngme

¹ Igho Oga oyi ekpodalo ugamhi o mhila li, oḅo li, “Iḡesikia ingme ni a gue shi e ẹgbe ena e khi?”

² ISitivini oḅo li, “Inyoghuo ali ita ni e le gba, a ri esọ shi

mhe ekē! Eshinegba ni o mholi ufumhi, o ri egbe khase ita awa Aburaamu abi o rō kie la ekē iMesopotemia, neni o tigbe je ẹoli Arani ya la.

³ Eshinegba oḅo li, ‘Lase ekē ali iteva oyi ẹgbō eye le, ke je ekē ni mhi ya rōkhase e.’*

⁴ “Igho o rōte oni ekē iKadia vu ya la ẹoli Arani. Abi itali o rō ghu-a se, Eshinegba o ghie ọli je ekē ni a ngeli ogbe namo.†

⁵ Oa ri ugu okhoghuo akana na li, wekhi ukuku ekē okhoghuo o khi na li. Ama khi Eshinegba o she kpe shobo na li khi ọli ali imimi ọli, e ya le ugu oni ekē, abi o rō tseku khia khi eghẹghẹ agho Aburaamu ọa bia omo okhoghuo ne.‡

⁶ Ina Eshinegba o li nu ọli ngme. ‘Imimie e ya khi epfese shi ekē ni ọa khi oyewe, e ya khi ighumha, a nase we elemhi ikpe egbhueshe asha ene.

⁷ Eshinegba oḅo, ama mhi ya nase ushishi ni e ya muno we ighumha. Ini mhi nase we na we se, e ya rōte ushishi ogho lasele bhale ekē ona ya ngeli, e gbo la akana a ga mhe.Š*

⁸ Igho Eshinegba o nu Aburaamu shobo ishele-a ni o ya khi irokhase khi oḅo o mhue obo shi oni ishobo. Igho Aburaamu o bia Aziki, o shele ọli-a abi o rō gbe ogbele elele. Igho Aziki o gbo li khi ita iGiekopu, iGiekopu o gbo li khi ita emose ogbava ni e khi

* 7:3 Li ze Igbae 12.1 † 7:4 Li ze Igbae 11.31; 12.4 ‡ 7:5 Li ze Igbae 12.7; 13.15; 15.18; 17.8 Š 7:7 Li ze Igbae 15.13; Okiali 3.12 * 7:7 Li ze Igbae 15.13-14 † 7:8 Li ze Igbae 17.10-14; 21.2-4; 25.26; 29.31-35.18

ititawa.†

9 “Itobo khi eni imi iGiekopu ee do iJosefu okonyo, e roli de abi oghumha ya je eke ijipiti. Ama Eshinegba o nu oli la.‡

10 O tsumhi oli obo ikphakphamhe nya. O ri ileasingme na iJosefu, o gbo kpaghie oli obo ni ingme oyoli o ro ghole iFero ni o khi oghie oyi eke ijipiti. Igho oni oghie o roli leghie ukhomhi ijipiti ali agbala oyoli nya. §

11 “Igho okiamhi oniemi o la eke ijipiti ali iKena a pfi ni o pfi osoli oniemi na ititawa ni ea ke ro me eminale e le.*

12 Abi iGiekopu o ro suo khi eminale e kpoku shi eke ijipiti, o ghie imioli ni e khi ititawa je oobo ya bino odode.

13 Utonuzeva ni e ke ye, oni iJosefu o gueye inyoghua oli oni loli khi, agho iFero o la lese egbo eyi iJosefu.†

14 Igho iJosefu o ghie ya rue itali iGiekopu ali egbo eyoli nya ni e kugbe khi oshe ea la egbhue.‡

15 Igho iGiekopu o je eke ijipiti, ashini loli ali ititawa e ghu-a shi. §

16 A tsua ilimhi eyewe nyene egbe je iShekemu ya ro to uji ni Aburaamu o ri ikpagho nu unuekpe oyi Amoni de.*

17 “Abi oni egheghe o ro ti ramhi ni Eshinegba o ro ya

ri ishobo oyoli tse na Abu-raamu, egbo eyawa ni e la ijipiti e lolo bu shi o.

18 Igho oghie olese ni oa lese emhikhoghua ingme oyi iJosefu o ke la ukpekhomhi shi eke ijipiti.†

19 Oo na egbo eyawa osoli obe, o jili ititawa, o ri itoto lie we, e pfino imiwe kua ni eni eniye e ba ghulua.‡

20 “Oni egheghe a ro bia iMosisi, ni oa khi omoo na tse. A la owa oyi itali kuele oli iki ese. §

21 Abi ee ke ro dobe roli sheli, e rue oli ya shi epfe oke. Omi iFero ni okpotso o me oli rue, o kuele oli abi omi oli.*

22 iMosisi o wena owena ali ileasingme oyi ijipiti, ekpabo o la emue oyoli ali emini oo riele.

23 “Abi iMosisi o ro gbe ikpe egbhueva, o mholi shi udu khi loli le ya bino egbo eyoli ni e khili egbo iZireni.

24 Igho o me khi ongi ijipiti oo nase ongi iZireni. Igho o li ye odose, o gbe ongi ijipiti-a.

25 Eri iMosisi o dabi khi egbo eyelu e ya me oli me khi eri Eshinegba o re lue e tsumhi egbo eyoli, ama ea ligho me oli me.

26 Ogbeakolo khi iMosisi o bhale ya e khi egbo iZireni aava e nu egbewe e kholi, oo nono ni loli rewe riele. Oo we, ‘Elo o ze ni ee ni a gbo li khi

‡ 7:9 Li ze Igbae 37.11,28; 39.2,21 § 7:10 Li ze Igbae 41.39-41 * 7:11 Li ze Igbae 42.1-2 † 7:13 Li ze Igbae 45.1,16 ‡ 7:14 Li ze Igbae 45.9-10,17-18; 46.27

§ 7:15 Li ze Igbae 46.1-7; 49.33 * 7:16 Li ze Igbae 23.3-16; 33.19; 50.7-13; iJosh 24.32 † 7:18 Li ze Okiali 1.7-8 ‡ 7:19 Li ze Okiali 1.10-11,22 § 7:20 Li ze

Okiali 2.2 * 7:21 Li ze Okiali 2.3-10

inyoghuo egbe a ro nu egbe e a kholi?

27 “Ama oni o a gueli ni o la o o ghi iMosisi abo pfa, o o li, ‘Oghuo o re khi oni o o mhesa na anye ali oni o o so ezo na anye?’

28 Eri u wa nono ni u li gbe mhe-a abi u li gbe ongi ijipiti a oode?’

29 Abi iMosisi o ro suo ona, o na pfa je eke oyi iMidiani ya la abi ofese, o bia eniye aava shi agho.†‡

30 “Ikpe egbhueva e dose se, agheni o ri egbe khasa iMosisi elemhi elemhi erali ni oo to ukhomhi ebuli.

31 iMosisi o me oli, o sha li abo. O o le ni o ya bino, uruli oyi Onomhue o lu oli, o o li,

32 ‘Mhemhe mhi khi Eshinegba oyi itita e, Eshinegba oyi Aburaamu ali oyi Aziki, ali oyi iGiekopu.’ iMosisi o o guo elemhi ulishi, o a ke gbudu bino oobo.

33 “Onomhue o o li, ‘Gueghie eku e ni u so, eke ni o pfaase u migha.

34 Mhi she me ajilimhe ni egbo eyemhe ni e la ijipiti e me memena. Mhi she suo ekperumhe oyewe, mhi she bhale ya mie we pfuese. Bhale memena khi mhi ya ghie e nyene egbe je eke ijipiti.’§

35 “Oni iMosisi ona egbo eyoli e ke ekpe kie, ni ee o li, ‘Oghuo o re khi oni o mhesa e na anye ali oni o o so ezo oyi anye?’ Eshinegba lolighuo

o ri agheni ni o ri egbe khasa oli elemhi elemhi erali ni e to ghie iMosisi o ka khi oni o o mhesa ali omiepfuese oyewe.*

36 Loli o rewe ya fie lase eke ijipiti, o la eke ijipiti ali obini Oke Ifulo ali udu oyemhi elemhi ikpe egbhueva gbe akanya onyaloa ali irokhasa.†

37 “iMosisi lolighuo o o egbo iZireni, ‘Eshinegba o ya rote elemhi e ghie emekeguele onabi mhemhe ghi e.’‡

38 O la iteva ebubu egbo elemhi udu oyemhi, li shi agheni ni o ke nu oli ngme ukhomhi ute iSinai, li she ititawa, o mie ungmehi ni o ri agbo o na ogbo, o rue oli na awa.§

39 “Ama eni ititawa e a nono ni wewe e suo eso na li, eri e kie iMosisi, e ri udu oyewe nyene egbe ukhokho je eke ijipiti.

40 Ee Eroni, ‘Mama ikhumhi na anye ni e ya ri anye ke kia, irari khi anye e a lese abi iMosisi ni o rue anye te ijipiti lasela o ke li kia.’*

41 Oni eghegehe eni egbo e ro mama ikhumhi ni o li abi ozele ena, ee luase oli, e ghele shi oni ikhumhi ni e ri abo eyewe mama.†

42 Igho Eshinegba o so ukhokho gbe we, o ze ni e ga ovo, ali uki, ali ikpetata abi a li keke oli shi ebe emekeguele, ni o o:

“‘Ee egbo iZireni,

abi a ro la udu oyemhi

ikpe egbhueva a luasobo,

† 7:29 Li ze Okiali 18.3-4 ‡ 7:29 Li ze Okiali 2.11-15 § 7:34 Li ze Okiali 3.1-10

* 7:35 Li ze Okiali 2.14 † 7:36 Li ze Okiali 7.5; 14.21; iNoba 14.33 ‡ 7:37 Li ze

iDent 18.15,18 § 7:38 Li ze Okiali 19.1-20.17; iDent 5.1-33 * 7:40 Li ze Okiali

32.1 † 7:41 Li ze Okiali 32.2-6

mhemhe a ri iluasobo na?
 43 A yase okula oyi
 ikhumhi iMoleki
 ali ukpetata oyi iRefani,
 ni e khi ikhumhi ni
 a ri abo mama ni a ga.
 Irarigho, mhi ya ri egbo bhale
 ya mu e okholi vu,
 e tsua e dose obini eke iBa-
 bilo.[‡]

44 “Ititawa e mholi igholo
 oyi otsela obini elemhi udu
 oyemhi. Abi Eshinegba o li
 khokho li ye iMosisi, igho o li
 riele oli.[§]

45 Abi e ro le oni igholo
 ugu se, iJoshua o tsua li ma
 egbe bhale eke oyi ishishi ni
 Eshinegba o khu kua na we. O
 nu we la ramhi eghenge oyi
 iDefidi.*

46 IDefidi ni Eshinegba o ri
 afu na o mhila li ini loli to owa
 na Eshinegba oyi iGiekopu[†]

47 Ama iSolomoni o to owa
 na Eshinegba.[‡]

48 “Abibi o ririe li, a lese khi
 Eshinegba no Yagha ne Nya o a
 ya la owa ni egbo e ri abo to.
 Loli o ze khi Azaya omekeguele
 o guele khi.

49 “Eshinegba oo, ‘Iloghie o khi
 ukpekhomhi ni mhia shito.
 Eke agbo o khi
 akphawe-nga oyemhe.
 Owa nabise ee egbo

a ya tigbe to na mhe?
 Asha no ghuo o ya gua mhe
 la?

50 Oa khi mhemhe-ghuo
 mhi ma eni emhi ena nya?[§]

51 “Ee egbo usueso-akhue ni
 e zese udu oyewe-a khali igba

zuse eso. A li abi itita e, ni e
 kie Ayemhe-no-pfuase.*

52 A famhi me omekeguele
 okhohuo ni itita e ea mu
 okholi vule shi o? Eri e
 gbo gbolo eghuo-a, ni e me
 eke guele khi, Oni oo suo
 eso na Eshinegba o ya bhale.
 Memena ee a she ro oni
 iKirisiti ona de, a gbe oli-a.

53 Ee ni a rote obo oyi ageni
 ni Eshinegba o ghie mie ishi,
 ee aa kie gbo ri eni ishi gbe
 akanya.”

A tono iSitivini eche

54 Abi eni igbaa eyi
 iSahediri e ro suo ingmemhi
 ena, e pfaa na li ramhi ni e ro
 gbe ako ako.

55 Ama iStivini ni o mholi
 Ayemhe-no-pfuase o yase alo
 idane, igho o me ugemhi
 oyi ufumhi oyi Eshinegba, ali
 iJesu khi o migha obita oyi
 Eshinegba.

56 Igho iSitivini oo, “Mhi me
 khi iloghie o khueghie-a, mhi
 gbo me iJesu oni Omi Ogbo khi
 o migha obita oyi Eshinegba.”

57 Abi eni igbaa eyi eni
 iSahediri e ro suo ona, e ri abo
 khukhu eso. E tse se leghe, e
 ve rughu oli.

58 E tialo oli fie ifuapfe je
 ukhokho oni eoli, ee tono oli
 eche. Eni ee tono oli eche e
 gueghie itsua ni e so na omose
 oghuo ni a lu iSolu muhe.

59 Abi e ro o tono iSitivini
 eche, o so iromhi, oo, “Ijesu
 Onomhue, kpekpe kpe abo
 mie ayemhe oyemhe.”

‡ 7:43 Li ze Emo 5.25-27 § 7:44 Li ze Okiali 25.9,40 * 7:45 Li ze iJosh 3.14-17

† 7:46 Li ze 2 iSam 7.1-16; 1 Okhe 17.1-14 ‡ 7:47 Li ze 1 Ighie 6.1-38; 2 Okhe 3.1-17

§ 7:50 Li ze Aza 66.1-2 * 7:51 Li ze Aza 63.10

⁶⁰ O de wugha, o tseṣe, o o li, “Onomhue, kpekpẹ khi ri olamhe ona mu ota so we.” Abi o ro ngme ona se, o ghua.

8

¹⁻² Igho iSolu o migha we ukhokho shi igbe-a oyi iSitivini. Abi iSitivini o ro ghua se, egbo eghuo ni e mholi ulishi oyi Eshinegba e ya roli to. E vie evie oyoli egbegbo.

Igbaa oyi eni e mie iJesu iKirisiti suo e gbhiaku-a irari ajilimhe

Elegbo ukpokpomhi ajilimhe o lasela shi igbaa oyi eni e mie iJesu iKirisiti suo ni e la eke iJerusalemu o. Eni ighiusomhi na kee egho e miatse ku eke iJudia ali iSameria.

³ Ama iSolu o rosheka a yese igbaa oyi eni e mie iJesu iKirisiti suo-a. O kia owa khi owa muno we shi owa ighumha, ghe emose, ghe ikpotso.*

Abi iFilipu o ro la iSameria

⁴ Igbaa oyi eni e mie iJesu iKirisiti suo egho ni e kia miatse ku, e kia a gue ungemhi oyi iJesu le asha ni e ramhi kpa.

⁵ IFilipu o je eke iSameria. O la oobo o gueye egbo khi iJesu o khi iKirisiti ni a shobo.

⁶ Abi ebubu egbo e ro me ikanya oshabo ni iFilipu o gbe, e nyanya mie shi emini o ngme.

⁷ IFilipu o kha da lema na eni e mholi ogbho ne, eni egbo e kpa oni ogbho pfa. Ebubu

eni e guogh-o ali eni e ghua e toto nya.

⁸ Ukpokpomhi oghela o la oni eoli ogbo.

ISamo ni o o li obo

⁹ Omose oghuo o la o ni a lu iSamo. Egbegbi obo o la iSameria e li. O kia ri obo ni o li tono obo udu.

¹⁰ Egbo nya e ri ekpe e na li. Egbo ododa ee lie li, “Omose ona Eshinegba o ri ekpabo nali a gbe ikanya.” E lu oli ekpabo ni o fu.

¹¹ Ingme ni o ngme kpa, e ro o shi itobo oshabo ni o ri ogbho oyoli i gbe ni o she tese.

¹² Ama iFilipu o gueye we ingme oyi Eghiele oyi Eshinegba ali iJesu iKirisiti, e mie shio. O batazi we, ghe ikpotso ghe emose.

¹³ ISamo o li miesuo, iFilipu o li batazi oli. O deba iFilipu u kiakia irari ikanya onyaloa ali oshabo nefune ni o me khi iFilipu o gbe.

¹⁴ Abi ighiusomhi na kee ni e la iJerusalemu e ro suo khi egbo iSameria e mie ungemhi oyi Eshinegba suo, e ghie iPita ali iJoni ghi we.

¹⁵ Abi iPita ali iJoni e ro ramhi iSameria, e so iromhi na eni e miesuo ni e la oobo Ayemhe-no-pfuase o tiemhile shi we egbe.

¹⁶ Ayemhe-no-pfuase o kie kpe tiemhile shi onge we egbe ne, eri a kpe lese ri eva oyi iJesu Onomhue batazi we.

¹⁷ Abi iPita ali iJoni e ro ri abo nga we ukhomhi,

* **8:3** Li ze Ika 22.4-5; 26.9-11

Ayemhẹ-no-pfuasẹ ọ tiemhile shi wẹ egbe.

¹⁸ Abi iSamọ ọ rọ mẹ khi egbọ ni eni ighiusomhi na kẹẹ e ri abọ nga ukhomhi kpa khi e mie Ayemhẹ-no-pfuasẹ, ọ nise obọ-a ni lọli ri ikpaghọ na wẹ.

¹⁹ Oọ wẹ. “A li ri oni itoto na mhẹ ni mhi ke ri Ayemhẹ-no-pfuasẹ na ogbọ ini mhi da ri obọ nga li ukhomhi ne.”

²⁰ Ama iPita oọ li, “Yeye ali ikpaghọ eyẹ a li opfu-a, itobọ khi u sa khi u ya dobe ri ikpaghọ dẹ isomhopfa oyi Eshinegba.

²¹ Itobọ khi u waa mhọli obọ shi akanya onana, irari khi udu oyẹ ọa pfuasẹ deba Eshinegba.

²² Irarighọ, mu udu pfi deba Eshinegba. U lema li ni ọ gbe olamhẹ kua nẹ, otse ọ ya gbe isamhi ebe ni u mhọli shi udu kua nẹ.

²³ Itobọ khi mhi she mẹ khi wa a kpe ofuma irari akanya ni anye a gbe ali khi olamhẹ o she dẹ ẹ ighumha.”

²⁴ ISamọ oọ wẹ. “A kpekpe a sọ iromhi na mhẹ ini emini a ngme ena e khi tse shi mhẹ egbe ni mhi pfua.”

²⁵ Abi iPita ali iḡoni e rọ ngme ingmemhi eyi iJesu se, e mu egbe pfi je iJerusalemu, ee gue ungmehi eyi iJesu kiakia elemhi ebubu inuekpe ni e la iSameria.

IFilipu ọ gue ungmehi oyi iJesu yẹ ọngi Etiopia

²⁶ Aḡeni oyi Eshinegba ọ gueyẹ iFilipu, oọ li, “Ke

tiemhi ukiẹkiẹ ọgobọ ini a sọ alo ghue obini ovọ o te ẹ lo eko je ode ọdagbe ifufu ni o rọte iJerusalemu je iGaza.”

²⁷ Ighọ iFilipu ọ mu egbe oọ lẹ. Abi ọ li lẹ eghọ, lọli ali omose ọghuo ọngi Etiopia ni ọ khi ọwali e ya lona. Omose ọna okhemhue ọ khi ni ọ ri ẹloe ẹ khu epfue eyi iKadakhẹ ni ọ khi ọlele oyi oni eke. Ọ rọte iJerusalemu ni ọ je ya ga ugamhi i jele.

²⁸ Abi ọ li i je apfẹ eghọ, ọ nga okọ ni ichi e rọ ọ na. Oọ zẹ ebe ni Azaya omekẹguele ọ keke. ²⁹ Ayemhẹ-no-pfuasẹ ọ gueyẹ iFilipu, oọ li. “Je okọ oghọ ni u timama li migha.”

³⁰ Abi iFilipu ọ rọ ramhi aghọ, ọ suọ khi oni omose oọ zẹ ebe oyi Azaya omekẹguele. IFilipu ọ mhila oni omose. “Ebe ni u wa zẹ eghọ o fẹ lo ẹ esọ?”

³¹ Oọ iFilipu, “Iiye oo. Ọa ya lighọ lo mhẹ esọ ini ọgbọ ọa li gueyẹ mhẹ abi o ngme.” Ọ iFilipu ọ nga oni okọ le ni ọ nu luẹ shito.

³² Ashini oọ zẹ oni elemhi Ebe-no-pfuasẹ o khi, asha ni oọ:

“Eri a mu ọli abi omi osumha ni a ya fa uruli.

Ezeze abi omi osumha ni a ya va kemhi, ni ọa khueghie unu-a.

³³ E ri omama mu ọli, e gbe ọli azẹba, e pfa ezọ mu ọli a gbe ọli-a.

Ọghuo ọ ya mie shi ọ khi ọ ya dobe mhọli akhemhẹ-ukhokho,

irari khi eri e mie ọli agbọ?”†

34 Oni ọmọse ọwali ọọ iFilipu, “Kpẹkpẹ gueye mhe oni ọmekeguele ọnana ọọ ngme, ingme oyi egbọli ọọ ngme abi ingme oyi ọgbọese?”

35 IFilipu ọ gueye ọli emini oni Ebe-no-pfuase ni ọọ ze egbo o ngme. Ọ gue ungmehi oyi okhale oyi iJesu ye ọli.

36 Abi e kie li kia lefe egbo, e me oke. Oni ọmọse ọwali ọgho ọọ li, “Bino, ghe oke ana, bie batazi mhe.”

37 IFilipu ọọ li, “Ini u mie iJesu suo mhi ya batazi e.” Oni ọmọse ọọ li, “Mhi she miesuo khi iJesu iKirisiti ọ khi Omi Eshinegba.”

38 Igho oni ọmọse ọọ oni ọ gua oni oko ogho ọ mu ọli migha. Lọli ali iFilipu e kia tiemhi oni oke, iFilipu ọ batazi ọli.

39 E lese rote oni oke nga egele le, Ayemhe-no-pfuase ọ kele iFilipu-a je oboese. Oni ọmọse ọa ke tigbe me iFilipu, ama oghelẹ o la li elemhi i je apfe.

40 Ama iFilipu ọ me egbọli ẹoli Azotusi. Ọ rote oobọ ri oni ungmehi i tse abọ kia kia ẹoli khi ẹoli ya ramhi ni ọ ro ramhi ẹoli iSizeria.

9

Imupfi oyi iSolu
(Ika 22.6-16; 26.12-18)

1 ISolu ọ kiele tse ekha abi loli li ya gbolo eni e mie iJesu suo-a. Ọ le deba Okpeda na ekpodalo-ugamhi eyi Eshinegba,

2 Ọ mhila li ọ ri ebe na lue ghi eni e la owa ugamhi na eke iDamasikosi. Ni loli ro mhọli afu dobe muno ikpotso ali emose ni e mie iJesu suo ighumha je obini iJerusalemu.

3 Abi iSolu ọ li ri okiali ti i ramhi iDamasikosi, utoghuokpe, akpa o rote idane mi nga li egbe nyagha.

4 Ọ de ta alo mu eke. Ọ suo khi ogbo ọ nu lue ngme, ọọ li, “ISolu, iSolu, elo o ze ni u ro mu okhọli vule e shi mhe ọ?”

5 ISolu ọ mhila li, ọọ, “Onomhue, oghuo u khi?” Oni uruli ọli, “IJesu mhi khi, ni u mu okhọli vule shi ọ.”

6 “Memena, vule ni u lo elemhi ẹoli ona. U ya me ọmose ni ọ ya gueye emini u mema ya riefe.”

7 Egbọ ni e nu iSolu kia e gbe eruẹ unu-a, e ga suo oni ungmehi, ama ẹa me oni ọọ ngme.

8 Ikpukhokho ọ, iSolu ọ rote eke vule, abi ọ ro khueghie alo-a ọa ke dobe e me eke. Egbọ ni e nu ọli kia e ke mu ọli obọ kia lo elemhi iDamasikosi.

9 Ogbelẹ ese iSolu ọ ga zalo shi agho. Ọa le eminale wexhi amẹ ọ da.

10 Ọmose oghuo ni ọ miesuo ni a lu Ananayasi, ọ la elemhi iDamasikosi. Ọ la imeke, ọ suo khi Onomhue ọ lu lue, “Ananayasi!”

Ọọ li, “Ee o.”

11 Onomhue ọọ li, “Ke je owa oyi iJudasi, ni o la ode ifuapfe ni a lu Isheshe, ni u ya mhila

ogbo oyi ongi iTasosi ni a lu iSolu, o la agho o so iromhi.

12 Rote elena iSolu o li kpe me irokhase khi omose ni a lu Ananayasi o ri obo nga lue egbe so iromhi na, alo eyelue e khueghie-a.”

13 Ananayasi oo Onomhue, “Mhi she kpe suo eko ebubu eyi omose ona abi o li e nase egbo ni e miesuo, o la iJerusalemu gbolo eghuo-a.

14 Ighie eyi ekpodalougamhi eyi Eshinegba e ri afu na li o ka muno egbo ni ee lu eva oye.”

15 Ama Onomhue oo Ananayasi, “Ke le, irari khi mhi she ze iSolu ni o tsua ungmehi oyemhe ghi egbo iJeta ali ighie eyewe ali egbo iZireni nya.”

16 Mhi ya rokhase oli khi o mema ya me osoli shi ungmehi oyemhe.

17 Abi Ananayasi o ro me oni owa, o dose lo ya ri obo nga iSolu egbe, oo li, “iSolu inyoghuo-mhe, iJesu Onomhue ni o lone ode abi u ro o bhale oola, loli oo mhi ka nono e me, ni u gbolo ke me eke ali ni Ayemhe-no-pfuase o bhale egbe oye.”

18 Utoghuokpe, emini e li abi ipfiapia afele o rote oli ikpamhi alo de pfia, o gbolo o me eke. O vule migha, Ananayasi o batazi oli.

19 Abi o ro le eminale se, o tigbe mholi ochi.

iSolu o ri igbedu u ngme ungmehi oyi Eshinegba

Ebubu ogbele iSolu o nu eni e miesuo la elemhi iDamasikosi.

20 Eloawe iSolu o la elemhi owa ugamhi gueye egbo khi iJesu Omi Eshinegba o khi.

21 Egbo kpa ni e suo ungmehi oyi iSolu ee mhila, “Oa khi omose onana oo nase eni e miesuo ni e la iJerusalemu? Oa khi eri o bhale ya muno we abi ighumha ghi ighie eyi ekpodalougamhi?”

22 Eshinegba o ri ekpabo na iSolu ni o ro ya ke gue oni ungmehi le. Ama egbo iJu ni e la iDamasikosi ea dobe mu iSolu ekhako o le. O sha egbo iJu abo abi e ro me ileasingme ni o ro o guele khi iJesu o khi oni iKirisiti ni a shobo.

23 Ebubu ogbele iSolu o ga la iDamasikosi. Egbo iJu e gba abi e li ya gbe oli-a.

24 Ama iSolu o suo khi egbo e gba abi e li ya gbelue-a. Eri e shito unu ode unuekpe ni a te a lo oni eoli le ni e me asha mu oli.

25 Ama egbo ni e miesuo e pfi uli rote oni ugbe roli shi ughughu bena ya tiemhi oni ugbe eliyose. *

26 Abi iSolu o ro ramhi iJerusalemu, oo dua ni loli ya kuma egbo ni e miesuo o, ama ulishi oli o mu we. E khokho ini o she mie iJesu suo.

27 Ama iBanabasi o rue oli bhale deba eni ighiusomhi na kee. O gueye we abi iSolu o li me Onomhue ode abi o ro le iDamasikosi ali abi Onomhue o li nu oli ngme. O gbo gueye we abi o li la eke iDamasikosi

* 9:25 Li ze 2 iKori 11.32-33

ri eva oyi iJesu tse abo ni ulishi o a li mu oli.

²⁸ Igho ISolu o nu we la iJerusalemu kia kugbe. O ri igbedu ri eva oyi Onomhue e tse abo gboo.

²⁹ Igho o nu egbo iJu ni ee ngme elemhi iGiriki i khako, ama ee dua ni wewe e gbe oli-a.

³⁰ Abi eni e miesuo e ro suo ugbamhi ni eni egbo ee gba, e rue oli je eke iSizeria, e te agho rue oli ya je iTasosi.

³¹ Igbaa eyi eni e mie iJesu iKirisiti suo ni e la eke iJudia ali iGalili ali iSameria nya e mholi opfomhe, e toto-a, Ayemhe-no-pfuase o ri udu shi we o, ee bua shi o, ee ngeli angeli ni o pfuase ri ekpe e na Eshinegba.

IPita o ri Eniasi ze

³² Abi iPita o li i kia oni eke gase, o ko ya feli eni e miesuo ni e la eoli iLida.

³³ O bhale ya e omose ni a lu Eniasi ni o guogh-a, o she gba ikpe elele abi o te yeshi a ghua.

³⁴ iPita oo, "Eniasi, iJesu iKirisiti o re ze. Vule migha khili iya oye ni u ke kia." Uto-ghuo kpe Eniasi o vule migha, o toto.

³⁵ Abi egbo ni e la eoli iLida ali iSharo e ro me khi Eniasi o toto, e mu pfi deba Onomhue.

IPita o guise iDokasi le

³⁶ Okpotso oghuo ni o miesuo ni a lu iTabita o la eoli iJopa, abi iTabita o ngme emue iGiriki khi "Erue," O khi ogbo onete. O gbolo mema e kpaghie eni ea mhue obo.

³⁷ Eghenge ni a ngme ena, oo ghua, igho o ghua. Abi a ro khuese olimhi oyoli-a se, a roli yeshi elemhi owa atonga.

³⁸ Abi eni e miesuo e ro suo khi iPita o la iLida, e ghie emose aava ghi oli, e oli, "Kpekpe bhale pia." Irari khi eoli iLida ali eoli iJopa e ti mama egbe.

³⁹ Igho iPita o deba we. A ri oli ya khase asha ni a roli yeshi. Esamhi-olimhi e la agho o vie. E ri itsua ni iDokasi o fia na we khase oli abi o ro la agbo.

⁴⁰ iPita o egbo ni e la agho nya e fie je atukpape. O de wugha so iromhi. O so alo ghue oni olimhi, oo li, "Tabita, guale!" Oni olimhi o khueghie alo-a, abi o me khi iPita o migha mama lue, o vule shito.

⁴¹ iPita o mu oli obo vule. O luno eni e miesuo ali eni esamhi-olimhi, o ri oli khase we.

⁴² Iguisele oyi iDokasi o gbek-a shi eoli iJopa. Itobo igho, ebubu egbo e mie iJesu suo.

⁴³ iPita o la iJopa ogbele ni e bu. O la owa oyi iSimoni ni o ri eku e lamhako o gbe akanya.

10

IKonilusi o ghie ya lu iPita

¹ Omose oghuo o la eoli iSizeria ni a lu iKonilusi. O khi oga oyi ekholi-okhue eyi Itili.

² Loli ali apfoli e khi egbo ni e na ulishi Eshinegba. O khi ogbo ni o pfo elemhi i somhi egbo ni ea mhue opfa.

Ọ gbo khi ọgbọ ni ọ sọ iromhi ẹghẹghẹ kpa.

³ Ẹlẹghuo elemhi agogo ese ẹlẹ ọguota, ọ mẹ ime-alo, ọ mẹ khi aḡeni oyi Ẹshinẹgba ọ bhale ọ lu ọli, “IKonilusi!”

⁴ Ọ sọ alo ghue oni aḡeni, ulishi o mu ọli. Ọọ li, “Onomhue elọ o zẹ khi u bhale.”

Oni aḡeni ọọ li, “Iromhi eye ni u wa sọ ali isomhopfa ni u wa somhi e she bhale deba Ẹshinẹgba, Ọ she mu egbe ni ọ rọ ya yele ẹ le.

⁵ Memena nyanya ghie ẹgbọ je ẹoli iJopa ni e ya lu iSamọ ni a gbolo ẹ lu iPita, ni ọ bhale.

⁶ Ọ kushi ayi iSamọ ni ọ ri ekuẹ elamhi ẹ gbe akanya. Oni owa oyọli o la epfe okẹ.”

⁷ Abi oni aḡeni ọ rọ vu se, iKonilusi ọ lu eni ẹ ga li etuava ali ọkhọli-okhue ni ọ khi adogeli oyọli ni ọọ ga Ẹshinẹgba.

⁸ IKonilusi ọ gueye wẹ emini a mẹ nya. Ọ ghie wẹ je obini iJopa.

Ime-alo ni iPita ọ mẹ

⁹ Ogbeakọlọ khi itsotso ọguota o mu eke, khi e lese ri okiali ramhi epfefẹ iJopa, iPita ọ nga owa atonga ya sọ iromhi.

¹⁰ Okiamhi oo gbe ọli. Ọọ nono emini ọ ya le. Abi a rọ ọ nye eminale ni ọ ya le, ọ mẹ ime-alo.

¹¹ Ọ mẹ khi emini e li abi ode ni o zẹ igo ene o rọte idane e tiemhile.

¹² Ighọ ọ mẹ khi iwali elamhako e laọ, ghe eni e zẹ awẹ ene ali eni ẹẹ tialọ idi eke ali ipfeli.

¹³ Ighọ uruli o ngme, ọọ li, “Vule iPita, gbe ni u le.”

¹⁴ Ama iPita ọọ, “Iiye e, Onomhue! Mhia kpẹ tigbe le eminale ni ẹa pfuase ni a ghue ghue, a ti ẹ bia mhe.”

¹⁵ Oni uruli o gbo nu ọli ngme, ọọ li, “Emini Ẹshinẹgba ọ da rọ khi oni o pfuase se, khi ke lu ọli emini ọa pfuase.”

¹⁶ Itese o lighọ mhesẹ abọ ri egbọli khasẹ neni a rue oni emhi nga idane.

¹⁷ Abi iPita ọ kie li i sa ingme ime-alo ni ọ mẹ, emose ni iKonilusi ọ ghie usomhi, e nono owa oyi iSamọ mẹ. E migha odalo ode unuekpẹ oyi oni apfe.

¹⁸ E lu mhila, “A mhọli ọpfese shi ana ni a lu iSamọ iPita?”

¹⁹ Abi iPita ọ kiele khọkhọ emini oni ime-alo ona o ngme, Ayemhe ọ rọ gueye ọli, “Ri esọ kpẹ emose aase ẹẹ nono ẹ.

²⁰ Nyanya mu egbe ni u deba we vu, khi mhemhe mhi ghie wẹ.”

²¹ Ighọ iPita ọ tiemhi deba wẹ, ọọ wẹ, “Mhemhe a nono, elọ e rẹ ẹ bhale?”

²² Ẹẹ ọli, “Ọga oyi ekhọli-okhue ni a lu iKonilusi ọ ghie anye ghi ẹ. Ọgbọ oniemi ni ẹgbọ iju e mu ekpe a na ọ khi. Ọ gbo khi ọgbọ ni ọ pfuase ni ọọ ga Ẹshinẹgba. Aḡeni ọ gueye ọli ọ ghie ghi ẹ, u bhale owa oyọli, ni ọ suọ ingme ni u ya gueye ọli.”

²³ Ighọ iPita ọ lu eni emose lo owa oyọli, e gbhe aghọ ni ogbe o gbe.

IPita ọ la apfe oyi iKonilusi

Ogbeakọlọ, lọli ali eni e miesuọ eghuo e rọte ijopa deba wẹ vu.

²⁴ Ogbeakọlọ, e lo elemhi ẹoli iSizeria le, ashini iKọnilusi ali apfọli ali egbegbi emọle ọli, e legba migha ẹ khẹ wẹ.

²⁵ Abi iPita ọ rọ ramhi aghọ, iKọnilusi ọ lo ọ li ode, ọ wugha, ọ nyẹsẹ ukhomhi tse ọli.

²⁶ Ama iPita ọ mu ọli vule, ọọ li, “Vule khi ọgbọ ọnabi yeye mhi khi.”

²⁷ IPita ọ nu ọli ngme, ọ lo owa, ọ bhale ya ẹ ẹgbọ ni e bu shi aghọ.

²⁸ Oọ wẹ, “Eẹ a she lesẹ khi eri Ishi eyi iMosisi ọọ ẹgbọ iJu e khi kugbe ẹgbọ iJeta ọ, wẹkhi eri e kọ ya feli ọgbọ ni ọa khi iJu. Ama Eshinẹgba ọ rọli khase mhe mhi khi leli ọgbọkhoghuo shi ọni ọa pfuase ali ọni a ghue.”

²⁹ Irarighọ, abi u rọ ghie lu mhe, mhia mhọli akhọkhomhe shi ọ. Elo u mema lu mhe shi?”

³⁰ IKọnilusi ọọ li, “Amo o li ele ene, eghẹghẹ agogo ese ọguota, mhi rọ la owa oyemhe ẹ sọ iromhi. Udemhija mhi me khi omose ọghuo ọ sọ itsua ni eẹ ge nyanyanya ọ migha mhe odalo.

³¹ Oọ li, ‘IKọnilusi, Eshinẹgba ọ she suọ iromhi eye, ọ she gbo me ikanya isomhelemhi ni u gbe ẹ deba ẹgbọ eni ẹa mhue.”

³² Ghie ọgbọ ghi omose ni a lu iSamọ iPita ni ọ la ijopa. Opfese ọ khi shi owa oyi iSamọ ni ọ ri ekuẹ elamhi ẹ

gbe akanya, ni ọ la epfe oke oku.’

³³ Lọli mhi rọ ghie ọgbọ ghi ẹ pia. Oo guẹ ti, abi u bhale. Memena awa nya awa la odalo oyi Eshinẹgba ni anye suọ emini Onomhue o gueye u gueye anye.”

Ungmemhi ni iPita ọ ngme

³⁴ IPita ọọ, “Mhi she me ọli me khi igesikia o khi, khi Eshinẹgba ọa mhọli khi ọna ọ kpe ọli ne,*

³⁵ ama ẹgbọ kpa ni e da a na ulishi oyi Eshinẹgba, ni e gbolo ẹ riele emini o rọte ode, Eshinẹgba ọ kpe obọ ọọ mie.

³⁶ Eẹ a lesẹ usomhi ni ọ ghie ghi ẹgbọ iZireni, ni o khi usomhi onete oyi opfomhe ni o rọte obọ oyi iJesu iKirisiti ni ọ khi Onomhue oyi agbo kpa bhale.

³⁷ Eẹ a lesẹ ingme ni a me elemhi eke ijudia nya, ni o rọte iGalili gbaekele, abi iJoni ọ rọ ọ tse abọ usomhi gueye ẹgbọ, khi a mema batazi wẹ,

³⁸ abi Eshinẹgba ọ li ri Ayemhe-no-pfuase ali ekpabọ kpha iJesu onge iNazareti sọ, ali abi ọ li i kiakia ashakpa riele onete, ni ọ mie ẹgbọ pfuese obọ oyi ekpabọ eyi okphaghiẹ, itobọ khi Eshinẹgba ọ nu ọli la.

³⁹ “Anye ri eloe me ikanya ni ọ gbe nya, elemhi ẹoli eyi ẹgbọ iJu ali iJerusalemu. Wewẹ e tali ma ọora apfida gbe ọli-a.

⁴⁰ Ama ele nuzi-ese, Eshinẹgba ọ rọte eghuli guise ọli le ni a me ọli.

* 10:34 Li ze iDeut 10.17

41 Oa khi ogbokpa o me oli, seş ni anye ni Eshinegba o she kpe ze, anye khi otsele, anye ni anye nu oli le eminale ni anye gbo nu oli da abi o ro rote eghuli guale se.

42 O mheshe na anye, anye kia ke gueye egbokpa ali anye gbo ke pfi otsele shi o khi loli iJesu, Eshinegba o ze, loli khi ososozu oyi eni e lao ali eni e ghu-a.

43 Emekeguele nya e kpe ngme ungmehi oyoli khi eni e da mie oli su o khi a ya gbe olamhe kua na we, rote ekpabo ni o la eva oyoli."

Egbo iJeta e mie ayemhe ni o pfuase

44 Abi iPita o kie li i ngme, Ayemhe-no-pfuase o tiemhile na egbo ni e su o oni ungmehi.

45 Ab o sha eni e miesuo ni e shele-a, ni e rote eoli iJopa kphase iPita bhale agho, khi Eshinegba o li ri Ayemhe-no-pfuase na egbo iJeta.

46 Irari khi e su o khi e ngme emue ododa eyi Ayemhe no pfuase, e kueghie Eshinegba.

Igho iPita o ri irarigho lie,

47 "Ogbokhoghuo o dobe ya lie egbo khi ri am e batazi egbo ena mena? E she li mie Ayemhe-no-pfuase abi awa li mie oli."

48 Igho iPita oo a ka ri eva oyi iJesu iKirisiti batazi we. Igho e gueye oli o nu wewe la agho ikukumi ogbele.

11

IPita o gueye eni e miesuo emini o ri ele

1 Eni ighiusomhi na keş ali eni e miesuo ni e la eke iJudia nya e su o khi egbo iJeta e li mie ungmehi oyi Eshinegba su o.

2 Abi iPita o ro nga obini iJerusalemu, eni e miesuo ni e shele-a, ee shi iPita unu.

3 Eş oli, "Yeye u lo owa oyi egbo iJeta ni ea shele-a, u gbo la agho le eminale!"

4 Igho iPita o rote eke roli lo we es o abi a ga li me oni ingme nya. Oo we,

5 "Eoli iJopa mhi la a so iromhi, ni ukuku oles o ro kia mhe alo-a, ni mhi ro me ime-alo, mhi me khi emini o li abi ode ni o ze igo ene, o te idane tiemhile ashini mhi la.

6 Mhi bino elemhi oli, mhi me elamhako ni e ze awe-ene, ali elamhako ebuli, ali elamhako ni e tialo idi eke, ipfeli na idane e li la elemhi oli.

7 Igho mhi su o khi uruli o nu mhe ngme, oo mhe, 'Vule, iPita gbe elamhi ena, ni u le.'

8 "Ama, mhi e oli, 'Iiye e, Onomhue! Mhi aa le eminale ni ea pfuase ni a ghu e ghue abi a te bia mhe.'

9 "Oni uruli o gbo nu mhe ngme, oo mhe, 'Emini Eshinegba o she ro pfuase, khi ke roli shi emhi ni oa pfuase.'

10 Itese o li igho mheshe abo ri egboi khase neni a rue oni ode nga idane.

11 "Agho agho, eni emose aase ni e te iSizeria nono mhe bhale, e lo owa ni mhi la le.

12 Ayemhe o gueye mhe mhi deba we vu, mhia aa keş ak o. Egbo osasa ena e te eoli iJopa

kphase mhe je eoli iSizeria ni anye ro ga bhale owa oyi iKonilusi.

¹³ Loli o gueye anye abi o li me agheni elemhi owa oyoli, ni o oli, 'Ghie ogbo je ijopa ya lu omose ni a lu iSamon ni a gbolu a lu iPita.

¹⁴ Loli o ya gueye abi yeye ali apfe a li ya mholi imiep-fuese.'

¹⁵ "Abi mhi li i ngme, Ayemhe-no-pfuase o tiemhile shi we o abi o li rote igbaekela li tiemhile shi awa o.

¹⁶ Igho mhi yelele emini Onomhue o ngme ni oo, 'Ame ijoni o ro batazi egbo, ama Ayemhe-no-pfuase a ke ro ya batazi e.*

¹⁷ Abi o ro khia khi Eshinegba o she ri isomhopfa enabi o ro na awa abi awa ro mie iJesu iKirisiti Onomhue suo li na egbo ni e a khi iju. Oghuo o khi mhemhe ni mhi ya nu Eshinegba khabo?"

¹⁸ Abi e ro suo ona se, e yemhe awolo-a, ee kueghie Eshinegba, ee lie, "Eshinegba o li ze ni egbo ijeta e li mu pfi ni e li mhue agbo na agboagbo."

Igbaa oyi eni e mie iJesu iKirisiti suo ni o la Atioki

¹⁹ Eni e mie iJesu iKirisiti suo e kia gbhiaku eke iFonisha ali eke iSapurosi ali eoli Atioki itobo okholi ni a mu vule shi we o eghenge ni a ro gbe iSitivini-a. E kia gue oni usomhi ye egbo iju weweghuo tse.†

²⁰ Eghuo o e rote eke iSapurosi ali eke iSairini bhale, e vu je eoli Atioki, e lili gue usomhi onete oyi Onomhue ye egbo iGiriki

²¹ Ekpabo oyi Onomhue o nu we la, Ebubu egbo e miesuo, e mu udu pfi deba Onomhue.

²² Igbaa oyi eni e mie iJesu iKirisiti suo ni e la iJerusalemu e suo oni ingme, igho e ghie iBanabasi je eoli Atioki.

²³ Abi o ro ramhi agho, ni o ro me abi Eshinegba o li somhi-elemhi eni egbo, egbe e mu oli. O ri udu shi we o e ri udu oyewe nya na Onomhue.

²⁴ IBanabasi o khi egbegbi ogbo onete ni o mhue Ayemhe-no-pfuase ali irudunga oniemhi. Ebubu egbo e ri itobo emini o rielle mie Onomhue suo.

²⁵ Igho iBanabasi o je eoli iTasosi ya nono iSolu.

²⁶ Abi o ro me oli, o rue oli je eoli Atioki, e la agho ukpe oghuo, ee sese ebubu egbo. Elemhi eoli Atioki a la te odode kpe lu eni e miesuo, iKirisiti enikeke.‡

²⁷ Oni eghenge, emekeguele eghuo e rote eoli iJerusalemu je Atioki.

²⁸ Oghuo elemhi eni emekeguele ni a lu Agabusi o vule, o guele abi Ayemhe o ghie oli, khi ukhumi o ya pfi ushishi na eke iRomu nya. (Eghenge ni iKiladiusi o ro khi

* 11:16 Li ze Ika 1.5 † 11:19 Li ze Ika 8.1-4 ‡ 11:26 Egbo eni e ngeli a bi iJesu iKirisiti a lu iKirisitiani. § 11:28 Li ze Ika 21.10

Oghie iRomu nya ona o ro bhale ya tse.)⁸

²⁹ Eniye odukhokho eyi iJesu ni e la Atioki e gba ugbamhi, abi e li ya ri ikpaghiobo ghie usomhi ghi eni e miesuo ni e la eke iJudia, abi ogbogbo o mhue ekpabo ramhi.

³⁰ Igho e zela ikpagho kugbe, e rewe ghie iBanabasi ali iSolu usomhi ghi eni egbhali ni e la igbaa oyi eni e mie iJesu iKirisiti suo na iJerusalemu.

12

Imhese-bino onofune

¹ Oni eghenge agho, oghie Erodu o muno egbo eghuo ena igbaa oyi eni e mie iJesu iKirisiti suo, oo nono ni loli nase we shi afue.

² O ri unu bhale a ri uwere gbe iJemhisi ni o khi inyoghuo iJoni-a.

³ Abi o ro me khi o ti egbo iju eloe, o gbo mu iPita shi owa. Oni eghenge e ro li ukpe ibuledi ni aa ri ifuma ma nye.

⁴ O mu oli se, o roli shi owa ighumha, o ze ekholi-okhue ikuwe asha ene ni e ogghie egbe, e ri eloe shi oli egbe. Erodu o mholi oli shi udu khi a kha da li oni ukpe se, loli rue oli lasele gboo, ni a gue oli ezọ.*

⁵ Igho a ri iPita shi owa ighumha, ama igbaa oyi eni e mie iJesu iKirisiti suo e toto obo o so iromhi lu Eshinegba na li.

⁶ Eliyose ni Erodu o kha ro rue iPita lasele ogbeakolo, iPita o lese-a shi ifuabo eyi iku ekholi-okhue aava, a ri iweghe eva ge oli. Eni e khe ekhe aava elese e la ode unuekpe oni owa ighumha e khe ekhe.

⁷ Udemhija, ageni oyi Onomhue o lole, igho akpa o la elemhi oni owa ighumha a ge. Oni ageni o pfi iPita emhi epfe, guise oli le. Oo li, "Nyanya vule!" Utoghuokpe, iweghe ni a so li e ku oli abo kua.

⁸ Igho oni ageni oo li, "Ri ogbene oye mu oku, ri ekue so." iPita o nyanya ligho. Oo li, "Ri itsua eye so, ke deba mhe."

⁹ Igho iPita o deba li je olase oni owa ighumha, ama oa lese khi emini oni ageni o rieles khi egbegbi ingme lo, o dabi khi elena loli ii la.

¹⁰ E dose eni e khe ekhe eni odode ali enuzava. E bhale ode unuekpe akhuli ni a rote a lasele shi ifui apfe. Oni ode unuekpe akhuli lolighuo o khueghie-a. E rote o dose. Abi e ro kia ifui apfe le deno, oni ageni o kele-a.

¹¹ Igho egbhali eyi iPita e na ya to. Oo, "Ena mhi lese, ni oa mhue akhokhomhe khi Onomhue o ghie ageni oyoli, o ka pfa mhe shi eke obo oyi Erodu ali emini egbo iju ee sa khi mhi ya me nya."

¹² Abi egbhali eyoli e ro na ya to se, o je owa oyi iMeli ni o khi inyọ iJoni ni a gbolo e lu

* 12:4 Li ze Okiali 12.1-27

iMaki. Agho eni e miesuo e legba la a so iromhi.

¹³ IPita o kpheli ode na olase. Igho omueshi ni oo ga ogbo ni a lu iRoda o bhale ya mie oli unu.

¹⁴ Abi o ro suo uruli oyi iPita, oghela o vo oli udu. Oa je okpe ode-a ne, o nyanya nyene egbe ukhokho ya tseşe gueye we, "IPita o she jele!"

¹⁵ Ee oli, "Ujili oo kphe!" Ama o li khi egbegbi ingme loli e ngme. Igho e oli, "Ayemhe olimhi oyoli lo!"

¹⁶ Ama iPita o kiele kpheli obode. Abi e ke ro khueghie oni ode-a, e me khi loli lo. Abode sha we.

¹⁷ O ri obode gbe we akhiakhia. O tigbe gueye we abi Onomhue o li rue lue owa ighumha le. Oo we, "A gueye ijemhisi ali eni e miesuo eni e kpole." Igho o vu je oboese.

¹⁸ Ogbeakolo, ozughu o lo iteva oyi eni ekholi-okhue le shi abi iPita o li kia.

¹⁹ Abi Erodu o ro o e lolo nono iPita kia gasa, ni ea ro me oli. O ri eni ee khe ekhe egho gue ezo. Oo a gbolo we-a.

Eghuli oyi Erodu

Abi a ro me enana se, Erodu o rote eke iJudia je iSizeria ya la ukuku eghenge.

²⁰ Elemhi e lolo bi Erodu deba egbo iTai ali iSidoni. Igho eni egbo e to ukhomhi ma, ee dua abi e li ya me asha nu oni oghie shito ngme. Abi iBilasitosi ni o khi adogeli oyi oghie o ro lama shi we o, e tigbe lama khi wewe e ya lema oghie ni wewe e ro riela.

Itobo khi eoli oyi oni Erodu eni egbo e rote me eminale e de.

²¹ Oni ogbele o ramhi Erodu o gban o itsua oghie eyoli, o shito ukpekhomhi oghie oyoli. O nu eni egbo o ngme.

²² Eni egbo e ku unu-a nyoghoo, e li, "Uruli oyi Eshinegba na, oa ke khi oyi ogbo."

²³ Utoghoo kpe agheni oyi Onomhue o pfi Erodu emhi, itobo khi oa ri ekpe na Eshinegba. Ekholi e ri oli le. O ghu eghuli osoli.

²⁴ Ungmemhi oyi Eshinegba o gbhiaku ashakpa, oo ge sho.

²⁵ IBanabasi ali iSolu e rote iJerusalemu, obini a ri ikpagho ghie we usomhi je jele. Abi e ro o jele, e rue ijoni ni a gbolo e lu iMaki mhue obode.

13

A ze iBanabasi ali iSolu ghie usomhi

¹ Emekeguele ali eni e seşe e la igbaa oyi eni e mie iJesu iKirisiti suo ni o la Atioki, ni e khi iBanabasi, ali iSamoni o khi ogbo obishi, ali iLushosi ongi iSairini, iMaini oni a ga kuela oli ali oghie Erodu, ali iSolu.

² Abi e li i kuoghiye Onomhue ni e li i pfi azumhi, Ayemhenopfuase oo we, "A ze iBanabasi ali iSolu-o lase na mhe ni e ya gbe akanya ni mhi lu we shi."

³ E pfi azumhi, e ri abode nga we ukhomhi so iromhi na, e ghie we vu.

Elemhi iSapurosi

⁴ Ayemhenopfuase o ghie iBanabasi ali iSolu je iSelusha

aghọ e te lo ọkọ okẹ je eke ni oku o khi shi na lu iSapurọsi.

⁵ Abi e rọ ramhi ẹoli iSalamisi, e la owa ugamhi oyi ẹgbọ iJu gue ungmehi oyi Eshinegba le. IJoni ni a gbolo ẹ lu iMaki ọ la aghọ ri obọ da wẹ oni akanya.

⁶ E kia je ukiẹkiẹ iSapurọsi ni o kpọle nya, e bhale ẹoli iPafọsi. Aghọ e ya ẹ ọbo ni a lu iBajisọsi ọngi iJu ni ọọ li ẹboli, ni ọ khi ọmekẹguele oyi ẹgbhọli.

⁷ Lọli ọ khi ọmọle oni igovunọ ni ọ la oni eke, eva oyi oni igovunọ khi iSajọsi iPọlọsi ni ọ khi ọtsegbhe. Oni igovunọ ọ lu iBanabasi ali iSọlu itobọ khi ọ nono ni lọli suọ ungmehi oyi Eshinegba.

⁸ Ama oni iBajisọsi ni ọ liẹ Elimasi ni ọọ li ọbo, ọ tsua ozughu lo aghọ le ini oni igovunọ ọ khi mẹ asha miesuọ.

⁹ Ighọ iSọlu ni a liẹ lu iPọlu, ni Ayemhe-nọ-pfuase ọ vọ egbe, ọ fẹli oni ọbo chii.

¹⁰ Oọ li, “Yeye omi ọkphaghie! Yeye ọbe eminete ni u wa li ikenege. Eẹ u ya rọte imu-ungmehi oyi Eshinegba pfi ukhomhi kpọke lasele?”

¹¹ Memena Eshinegba ọ ya nise obọ oyọli ti ẹ, u ya zẹ alo, waa kẹ gbo dobe ya mẹ ugemhi oyi ovọ ukuku ẹghẹghẹ ne.”

Aghoaghọ, Elimasi ọ mẹ khi alo eyelue e bi obili-a, Oọ bibi, ọọ nono oni ọ ya mu ọli obọ ke

kia.

¹² Abi oni igovunọ ọ rọ mẹ ingme ni a mẹ, ọ miesuọ, irari khi osese ingme oyi Onomhue o ri abọ sha li.

Atioki ni o la elemhi iPisidia

¹³ IPọlu ali apfọli e rọte iPafọsi lo ọkọ okẹ da okẹ oniemi je iPeriga, ni o khi ẹoli ni o la iPafilia. Ana iJoni ni a gbolo ẹ lu iMaki ọ pfi wẹ shi nyene egbe je iJerusalemu.

¹⁴ E rọte iPeriga je ẹoli Atioki ni o la eke iPisidia. Ogbẹle iyemhe oyi iJu, e lo owa ugamhi ya shito.

¹⁵ Abi e rọ rọte ebe ishi oyi iMosisi ali ebe eyi emekẹguele zẹ se, eni ẹẹ mhesẹ shi oni owa ugamhi e ghie usomhi ya gueye iPọlu ali iBanabasi, ẹẹ wẹ, “Inyoghuo anye, ini a mholi ungmehi ni a mẹ ya guele ni o ya ri udu shi ẹgbọ ọ, a ke ngme.”

¹⁶ IPọlu ọ vule migha ọ ri obọ nu wẹ ngme. Oọ, “Eẹ ẹgbọ iZireni ali ẹẹ iJeta ni a ga Eshinegba a ri esọ shi mhe eke!

¹⁷ Eshinegba oyi ẹgbọ iZireni ọ zẹ eni e bia awa, lọli ọ rewe khi ẹgbọ eniemhi, oni ẹghẹghẹ e khi epfese shi eke iJipiti. Eshinegba ọ ri ekpabọ eyoli wolọ wẹ eke iJipiti lasele.*

¹⁸ Elemhi ikpe egbhueva ọ ri abọ mu udu na ẹ elemhi ọdagbe ifufu.†

¹⁹ Edele ishilua ọ pfusea eke iKena. Ọ ri eke oyewe na ẹgbọ eyọli le ugu.‡

* 13:17 Li zẹ Okiali 1.7; 12.51 † 13:18 Li zẹ iNọba 14.34; iDeut 1.31 ‡ 13:19 Li zẹ iDeut 7.1; iJosh 14.1 § 13:20 Li zẹ iDeut 7.1; iJosh 14.1

20 Elemhi ikpe egbhue-uye ali eva ali ikpe igbe (450) a me ingme enana. §

“Abi a ro me ena se, o ri esọ-ẹzọ na we ni ee mhesẹ, ya ramhi egheghe oyi iSamueni omekeguele.

21 Igho eni egbo e mhila Eshinegba o ri oghie na wewe, Eshinegba o rue iSolu omi iKishi oyi unuekpe oyi iBejami na we. Loli o khi oghie oyewe elemhi ikpe egbhueva.*

22 Abi Eshinegba o ro rue iSolu oghie le, o ri iDefidi le oghie na we. Ingme ni Eshinegba o ngme shi iDefidi egbe na, ‘Mhi she me khi iDefidi omi iJese o khi omose onabi udu oyemhe oo nono, o ya riele oghumhe oyemhe nya.’†

23 “Rote unuekpe oyi oni iDefidi, iJesu ni o khi Omiepfuese oyi egbo iZireni o te bhale, abi Eshinegba o li roli shobo.

24 Neni iJesu o bhale, iJoni o she kpe gueye egbo iZireni e ti olamhe le, e mupfi deba Eshinegba, egheghe agho ni a batazi we.‡

25 Abi iJoni o ro gbe akanya se, o mhila eni egbo, oo, ‘Oghuo a khokho mhe shi? Mhi aa khi oni a migha a khe. Oni o ya bhale ini mhi gbe akanya oyemhe se, mhi aa fu te ni mhia taghie uli ekuẹ ni o so-a.’§

26 “Inyoghuo-mhe imi Abu-raamu, ali ẹẹ iJeta ni a na ulishi Eshinegba ni a la akana, oni ungmehi imiepfuese ona, oyawa lo!

27 Egbo ni e la iJerusalemu ali eni ẹẹ mhesẹ na we, ẹa lese iJesu shi Omiepfuese. Ama igbe-a ni e gbe iJesu-a, o ri emini emekeguele ee ngme, ni ee ze khase we ele iyemhea kpa bhale ya tse.

28 Abi o tseku khia khi ẹa me ezọ gue shi oli egbe, ẹẹ li ipaleti o ze ni a gbe oli-a.*

29 Abi e ro riele emini Ebe-no-pfuase o ngme shi oli egbe se, e rue oli apfida tiemhile, e roli to uji.†

30 Ama Eshinegba o rote eghuli guise oli le.

31 Ogbele ebubu o ri egboli khase egbo eni e nu oli rote iGalili je iJerusalemu. Wewe e ke pfi otsele shi ingme oyoli khase egbo eyawa.‡

32 “Eri anye bhale akana ni anye ya ri oni usomhi onete na e, ikhi ishobo ni Eshinegba o shi na eni e bia awa.

33 O she ri oni ishobo ona tse na awa imi we, abi o li guise iJesu le. Abi a li keke oli shi ebe Iwolo ni uzeva, khi,

“ ‘Omimhe u khi, ogbe namo, mhemhe mhi khi Ite.’

34 Abi Eshinegba o rote eghuli guise oli le, ni ọa ze oli ghu ke-a, o mu ma ungmehi oyoli ni o la lie, §

* 13:21 Li ze 1 iSam 8.5; 10.21 † 13:22 Li ze 1 iSam 13.14; 16.12; Iwolo 89.20

‡ 13:24 Li ze iMak 1.4; iLuk 3.3 § 13:25 Li ze iMat 3.11; iMak 1.7; iLuk 3.16;

iJon 1.20,27 * 13:28 Li ze iMat 27.22-23; iMak 15.13-14; iLuk 23.21-23; iJon 19.15

† 13:29 Li ze iMat 27.57-61; iMak 15.42-47; iLuk 23.50-56; iJon 19.38-42 ‡ 13:31

Li ze Ika 1.3 § 13:34 Li ze Aza 55.3

“ ‘Mhi ya ri ikhivose no
pfluase,
ni a ri egbe e nga egbegbo
ni mhi shobo na iDefidi
ne.’

35 Igho o kie gbo li ngme o li shi
ashese.*

“ ‘Waa ya ze ni
oni o pfluase oye
o ghu ke-a.’

36 “Irari khi eri iDefidi o
ga Eshinegba abi o ro la agbo,
igho o ghu-a, a ri o li to mama
eni e bia li. O ke-a shi elemhi
uji.

37 Ama idiegbe oyi iJesu ni
Eshinegba o rote eghuli guise
le, o a ke-a.

38 “Irarigho, inyoghuo, anye
tse abo ye e khi obo oyi iJesu a
te ya mholi igbe olamhe kua.

39 Onini o da mie o li suo
ne, a she pfa na li, o a ke lue
shi emini Ushi oyi iMosisi o a
dobe pfa na we shi.

40 A mhue egbhe, ini emini
emekeguele e ngme o khi ya
tse shi e egbe, ni ee,

41 “ ‘A ghe i, ee ni
a ri Eshinegba a li egia
Qshabo o sha e, a pfua.
Irari khi mhi ya rieje
emhi eghenge oye e

ni aa ya mie shi ghue,
ini ogbo o tseku gue o li ye
e.’ ”†

42 Abi iPolu ali iBanabasi e
ro rote oni owa ugami vu,
eni egbo e gbo lu we e nyene
egbe bhale ogbele ugami
olese ya nu wewe ngme oni
ungmemhi.

43 Abi oni ilegba o ro gb-
hia khuse, egbo iJu ali egbo

iJeta eni e she mu pfi bhale
ugami oyi egbo iJu, e kpiki
i deba iPolu ali iBanabasi.
iPolu ali iBanabasi e ye we
ude, e kie ke deba okhale ni
ea fu te ni Eshinegba o rieje na
we.

44 Ele iyemhe na ni o deba li,
egbo ni e la oni eoli nya e legba
ni e ri eso shi ungmehi oyi
Eshinegba.

45 Abi egbo iJu e ro me
oni ilegba, ee kpe ofuma,
ee kholo ingmemhi zu iPolu
unu, e tsue o li.

46 Ama iPolu ali iBanabasi
e ngme ungmehi igbedu, e
li, “Ee a khi eni anye kha
mema kpe gue ungmehi oyi
Eshinegba ye neni o ramhi
egboese egbe. Ama abi a ke
ro kie oni ungmehi ni aa ro
sa khi o ti ni a mholi agbo na
agbo agbo egho, mena, anye
ya ze e obo, anye deba egbo
iJeta.

47 Irari khi ona khi omheshe
ni Onomhue o mhese na anye,
ni o ree.‡

“ ‘Mhi she re e khi
akpa na egbo iJeta,
ni agbo nya e mhue
imiepfuese.’ ”

48 Abi egbo iJeta e ro suo
ona, ee ghele, ee kuoghi
Eshinegba shi oni ungmehi,
egbo eni a she ze shi agbo na
agbo agbo, e mie iJesu suo.

49 Oni ungmehi oyi
Onomhue o gbhiaku asha kpa
oni eke.

50 Ama egbo iJu e tano
shi ikpotso ni ee na ulishi
Eshinegba ni a mu ekpe a

* 13:35 Li ze Iwolo 16.10 † 13:41 Li ze Abak 1.5 ‡ 13:47 Li ze Aza 42.6; 49.6

na ali ekhemhwe eyi oni ɛoli. E sese ɛgbɔ ni e mu okhɔli oniɛmhi vule shi iPɔlu ali iBanabasi ɔ, e khu wɛ fiɛ lase oni ɛoli.

⁵¹ Ama eni eniyɛ odukhokho eyi iJesu e kpishi itutu awɛ shi ekɛ, ni e pfi ɔtsɛlɛ mu eni ɛgbɔ. E rɔte aghɔ dɔsɛ je ɛoli iKoniɔmu. §

⁵² Oghɛlɛ ali Ayemhɛ-nɔ-pfuasɛ ɔ lo eni e miesuɔ eghɔ egbe.

14

Emini a mɛ iKoniɔmu

¹ IPɔlu ali iBanabasi e lo owa ugamhi oyi ɛgbɔ iJu obini iKoniɔmu, abi e kie kpɛ ɛ li. E lolo guɛ ɛ ngme ungmehi ni o lo ɛgbɔ esɔ, ni o ri ebubu ɛgbɔ iJu ali iJɛta miesuɔ.

² Ama ɛgbɔ iJu ni ɛa lama miesuɔ, e tanɔ ɛgbɔ iJɛta abɔ ni elemhi o yese wɛ-a deba eni e miesuɔ.

³ Ighɔ iPɔlu ali iBanabasi e kushi aghɔ tɛsɛ, e ri igbedu u ngme ungmehi oyi Onɔmhwe ni ɔ pfi ɔtsɛlɛ shi ungmehi okhale oyɔli, rɔte ekpabɔ ni ɔ rɔ na wɛ ɛ gbe akanya ɔnyaloa ali ɔshabɔ.

⁴ Okemhi o lo oni ɛdɛli le, ɛgbɔ eghuo e kugbe ɛgbɔ iJu ɔ, eghuo ɔ e la ukhokho oyi ighiusomhi na kɛɛ.

⁵ Ighɔ ɛgbɔ iJɛta eghuo ali ɛgbɔ iJu ali enighie eyewɛ, e

gba abi e li ya gbe wɛ ali abi e li ya tono wɛ eɛɛ.

⁶ Abi eni ighiusomhi e rɔ suɔ ona, e na je ɛoli iLisitira ali iDɛbi ni o la ekɛ iLikaonia ali ɛoli elese ni e mama wɛ.

⁷ Aghɔ e la a gue usomhi onete le.

Elemhi iLisitira ali iDɛbi

⁸ Omɔse oghuo ɔni a bia ɔkhomhi ni ɔa kia ghue abi a te bia li, ɔ li la oni iLisitira.

⁹ O shitɔ aghɔ ri esɔ shi ungmehi ni iPɔlu ɔɔ ngme. IPɔlu ɔ mɛ khi ɔ mɔli irudunga ni o doɛɛ ya rɔ li ze, iPɔlu ɔ bino ɔli chii.

¹⁰ O tɛsɛ leghe, ɔɔ, “Vule migha!” ɔni omɔse ɔ ti vule, ɔɔ kia gasɛ.

¹¹ Abi eni ɛgbɔ e rɔ mɛ akanya ni iPɔlu ɔ gbe, e ngme ɛlemhi iLikaonia, ee tɛsɛ, ee liɛ, “Ilitsa e mele ɛgbɔ-a bhale iteva oyawa o!”

¹² Eva ni e lu iBanabasi khi iZeusi,* itobɔ khi iPɔlu khi ɔni ɔ mema e ngme, e lu ɔli Amɛsi.†

¹³ ɔni ɔɔ luasɛ oni olitsa iZeusi, ni okula oyɔli o la ukhokho apfɛ oni ɛoli, ɔ muno ena enokpo ali idodo je oni odɛ unuɛkpɛ oyi oni ɛoli, itobɔ khi lɔli ali eni ɛgbɔ ee nono ni wɛwɛ ya luasɛ iBanabasi ali iPɔlu abi ilitsa.

¹⁴ Abi iBanabasi ali iPɔlu e rɔ suɔ emini eni ɛgbɔ e mu egbe khi e ya riɛlɛ, e nyanɔ it-sua shi egbewɛ uruli, e nanɔ lo eni ɛgbɔ ifuabɔ. Ee tɛsɛ liɛ,

§ 13:51 Li zɛ iMat 10.14; iMak 6.11; iLuk 9.5; 10.11 * 14:12 iZeusi: IZeusi o khi ɔa iyemhɛ ni ɛgbɔ iGiriki e ga. Isheghuo a lu ɔli iJupita. Olitsa ɔlese ni a lu Amɛsi ɛɛ khi ɔ khi aghiusomhi oyɔli † 14:12 Amɛsi: Amɛsi o khi eva oyi olitsa ni ɛgbɔ iGiriki e ga. Eri ɛgbɔ iGiriki ena e liɛ khi aghiusomhi oyi iyemhɛ elese

15 “Elo e ze khi a li na?” Egbọ enabi e e anye khi! Ungmemhi usomhi onete anye ro tse abo khasẹ e, ni a rote ugamhi afue mu pfi deba Eshinegba ni o lao, ni o ma eke ali ukhuli ali oke oniemi ali emini e la elemhi we nya.‡

16 Eghẹghẹ ni o dose, Eshinegba o ze ni ushishi ogbogbo o ngeli abi o ghole oli.

17 Ama o kie rote akanya onete oyoli ri o lele khasẹ khi loli lao, loli o rote idane e ruese ame shi emhi ekomhi shi eghẹghẹ, loli o ri eminale na e e le, o ri oghẹle e shi e udu.

18 Abi iPolu ali iBanabasi e rie lina nu we ngme ingmemhi ena, ea kie dobe mu we gba e khi luase ewe abi ilitsa.

19 Egbọ iJu eghuo e rote Atioki ali iKoniomu bhale, e ri eta-olelemhunu ti eni egbo mama egbe, e tono iPolu eche, e tialo oli eke fie je ukhokho oni eoli, e dabi khi o she ghua.

20 Ama abi eni e miesuo e ro le gasẹ oli, o vule, o nyene egbe je ifuapfe ni a la tono oli eche. Ogbeakolo, loli ali iBanabasi e je eoli iDebi.

21 IPolu ali iBanabasi e gue usomhi onete le elemhi iDebi, ebubu egbo e miesuo. Igho e nyene egbe je iLisitira ali iKoniomu ali Atioki ni o la iPidisia,

22 e ri udu shi eni e miesuo o e ri igesikia migha shi oni irudunga. Ee we, “Neni awa lo Eghiele oyi Eshinegba, awa ya me anasemhe.”

23 Elemhi igbaa nya eyi eni e mie iJesu iKirisiti suo ododa, ee ze egbhali shi, ee pfi azumhi so iromhi na we rewe nga Onomhue ni e regbenga abo.

24 Abi e ro kia gasẹ eke iPidisia se, e je eke iPafia.

25 Abi e ro la eoli iPega gue usomhi onete le se, e te agho je eoli Atalia.

26 Agho e te lo oko-okẹ oniemi nyene egbe jele obini Atioki; Ashini eni e miesuo e ke la so iromhi na we re we nga okhale oyi Eshinegba abo shi akanya ni e ye ya gbe se.

27 Abi e ro jele Atioki, e lu eni e miesuo tighbili, e gueye we ikanya ni Eshinegba o re we gbe ali abi o li khueghie ode-a na egbo iJeta ni e miesuo.

28 E nu eni e miesuo la akgho tese.

15

Ilegba ni a mholi shi iJerusalemu

1 Egbọ eghuo e rote eke iJudia bhale Atioki, ee sese eni e miesuo khi, Ini aa li shẹle we-a abi Ushi oyi iMosisi o ngme ea ya khi eni a miepfuese.*

2 Onana o pfi ingme ni o ze khi iPolu ali iBanabasi e nu eni egbo ni e rote iJudia bhale e khako. Irarigho, a ze iPolu ali iBanabasi ali eni e miesuo elese e nga iJerusalemu ya me ighiusomhi na kee ali eni egbhali shi oni ingme.

‡ 14:15 Li ze Okiali 20.11; Iwolo 146.6

* 15:1 Li ze iLev 12.3

³ Igho e ghie wẹ e ke lẹ, abi e li rọte ekẹ iFonisha ali iSame-ria dọsẹ ẹ lẹ, ee gueyẹ ẹgbọ abi ẹgbọ iJeta e li mu pfi deba Eshinegba. Onana o pfi oghẹle oniēmhi na eni e miesuo.

⁴ Abi e rọ ramhi iJerusalemu, eni e miesuo ali eni egbhali ali ighiusomhi na kẹ, e mu wẹ epfese. Eni a ghie usomhi e gueyẹ wẹ ikanya ododa ni Eshinegba o rọte obọ oyewe gbe.

⁵ Ama eni e miesuo eghuo ni e la otu iFarisi e vule, ẹẹ li, “Egbọ iJeta e mema shele-a. A gueyẹ wẹ e ri Ushi oyi iMosisi ke gbe akanya.”

⁶ Ighiusomhi na kẹ ali eni egbhali e ye ochi shi oni ingme ona.

⁷ Abi e rọ khako shi o tẹse se, iPita o vule, oọ wẹ, “Inyoghuo, a lẹsẹ khi ẹghẹghẹ ni o dọsẹ, Eshinegba o rọte iteva oyẹ ẹ zẹ mhẹ mhi ka gue oni usomhi onete yẹ ẹgbọ iJeta ni e mẹ asha suo, ni e miesuo.†

⁸ Eshinegba ni o lẹsẹ isamhi ni e la ogbokpa udu, o ri Ayemhe-no-pfuase na ẹgbọ iJeta, rọ rọli khasẹ khi lolli li mie wẹ, ẹzeze abi o li li mie awa.‡

⁹ Oa ri ikhioda shi iteva oyawa ali wewe, irari khi o khuese udu oyewe-a pfuase itobọ khi e imiesuo.

¹⁰ Memena, elo o zẹ khi a nono ni a mhese Eshinegba bino, ni a rọ o sheli iJeta ni e miesuo itsua ni awa ali eni e bia awa ẹa dobe tsua?

¹¹ Iiye e! Awa lama shi o khi okhale oyi iJesu iKirisiti Onomhue o mie awa pfuese, igho li khi wewe.”

¹² Oni igbaa e tsaghie-a tsuke, abi e rọ suo oḣele eyi onyaloa ali oshabo nya ni Eshinegba o rọte obọ oyi iPolu ali iBanabasi gbe iteva oyi ẹgbọ iJeta.

¹³ Abi e rọ ngme se, iJemhisi oọ, “Inyoghuo, a ri eso shi mhẹ ekẹ!

¹⁴ ISamo iPita o lẹsẹ guele abi Eshinegba o li mhọli omuegbe shi ingme oyi ẹgbọ iJeta, ni o rọte elemhi wẹ sano ẹgbọ, rọ mele ẹgbọ eyoli-a.

¹⁵ Onana o ri emini emekẹguele e kẹkẹ shi Ebe-nopfuase bhale ya tse, ni oọ,

¹⁶ “ ‘Ini a mẹ enana se, mhi ya nyene egbe bhale, mhi rue eghiele oyi iDefidi gbo nyene egbe bhale, mhi riẹle ikpukpu-igbe ni e de kua oyoli ma, mhi gbo zese oli-a.

¹⁷ Ishegho ẹgbọ ni e kpole nya e nyene egbe bhale deba Onomhue, ẹgbọ iJeta nya ni mhi lu, e bhale ya khi eyemhe,

Onomhue o ngme gho, ni o riẹle emhi ena.’

¹⁸ Lolli o she kpe zẹ ni a lẹsẹ ona shi ekẹ agboagbo. §

¹⁹ “Abi mhi so o shi khi, awa khi pfi ẹgbọ iJeta ni e nyene egbe bhale deba Eshinegba lo omunu.

† 15:7 Li ze Ika 10.1-43 ‡ 15:8 Li ze Ika 2.4; 10.44 § 15:18 Li ze Emo 9.11-12

²⁰ Awa ri ochoghō kēkē ebe ya gueye wē, e khi ke le eminale ni a rō luase ikhumhi. Awa gbo gueye wē e khi ke ku itseḅo, e khi ke le ɛlamhi ni aa fa uruli, e khi ke da ɔlia.*

²¹ Irari khi o she tēḅē ni a te la owa ugamhi ɛ zē ebe Ushi oyi iMosisi ɛlɛ Iyemhēa kpa, a ri ingme oyoli ɛ tse abo ifui ɛoli kpa.”

²² Igho ighiusomhi na kēḅ ali eni egbhali ali eni e miesuo nya e te eni ɛgbō zē emōḅe aava ni a mu ekpē ɛ na ma iPōlu ali iBanabasi egbe, je Atiōki. IJudasi iBasabasi ali iSalasi e zē.

²³ Ebe ni e kēkē rō ghie wē usomhi na:

Anye ighiusomhi na kēḅ ali eni egbhali ni anye khi inyoghuo ɛ, anye tḅē ɛḅ Inyoghuo anye ni a khi ɛgbō iJeta ni a la Atiōki ali iSiria ali iSilisha.

²⁴ Anye suo khi ɛgbō eghuo e rōte anye iteva vu ni o khia khi ɔa khi anye ghie wē, ni e bhale ya nu ɛ ngme ingmemhi ni oo yese ɛ elemhi-a ali ni oo nase ɛ udu.

²⁵ Irarigho, anye rō kugbe ghie emōḅe eghuo ghi ɛ, e deba iBanabasi ali iPōlu emole anye bhale.

²⁶ Emōḅe ena e she ri agbo oyewē shi okhena itobō eva oyi iJesu iKirisiti Onomhū.

²⁷ Irarigho, anye rō ghie iJudasi ali iSalasi ni e ri unu gue emini anye kēkē shi ebe ye ɛ.

²⁸ O ti Ayemhē-nō-pfuase ali anye ɛloe, ini anye khi ri it-

sua elese nase ɛ tsua doḅe ishi enana.

²⁹ A ti egbe eminale ni a rō luase ikhumhi le, a khi ke da ɔlia, a khi le ɛlamhi ni aa fa uruli. A khi ku itseḅo. O ma a ti ɛ egbe ini a lase emhi enana le.

Eshinegba o nu ɛ la.

³⁰ Eni emōḅe ni a ghie usomhi e vu ya tiemhi Atiōki. E ti eni e miesuo nya gbili, e ri oni ebe na wē.

³¹ Abi eni ɛgbō e rō zē oni ebe se, oghelē o vō wē elemhi itobō khi usomhi onete ni o ri udu ɛ shi ɔgbō o o tsua.

³² IJudasi ali iSalasi ni e khi emekeḅeuele e nu wē ngme ebubu ingmemhi ri udu shi wē o, e zese wē-a.

³³ E nu wē la agho ukuku eghēghē, eni e miesuo e tḅē wē okhila. Wewē ni a ghie usomhi e nyenē egbe je iJerusalemu deba eni e ghie wē.

³⁴ [Ama iSalasi o lama nu wē la agho.]

³⁵ IPōlu ali iBanabasi e la Atiōki, wewē ali ɛgbō elese e la agho o seḅe, ee tse abo ungemhi oyi Onomhū.

IPōlu ali iBanabasi e vase egbe-a

³⁶ Abi ebubu oghelē e rō doḅe, iPōlu o gueye iBanabasi, oḅ li, “Awa nyenē egbe je ɛoli ni awa te doḅe ni awa ya bino ɛgbō ni awa gue ungemhi oyi Onomhū ye, ni awa mē abi e ke laḅ shi.”

³⁷ O ghole iBanabasi ni e tsua iJoni ni a gbolo ɛ lu iMaki ma egbe vu.

* 15:20 Li zē Okiali 34.15-17; iLev 17.10-16; 18.6-23

38 Ama ọa ghole iPọlu ni e tsua li. Itobọ khi ọni iJọni ni a gbolo ẹ lu iMaki ọa nu wẹ gbe ikanya ramhi ukpẹse ni ọ rọ tsua wẹ kua eke iPafilia vu, ọ sọ ukhokho gbe wẹ.[†]

39 IPọlu ali iBanabasi e mholi ekhako ni o toto shi ingme ona, e kemhi egbe. IBanabasi ọ rue iJọni iMaki ma egbe, e lo oko-okẹ oniemi da je iSapurosi.

40 Ama iPọlu ọ pfi obọ rue iSalasi, e vu abi eni e miesuọ e rọ sọ iromhi na wẹ, rẹ wẹ nga okhale ireloekhu oyi Onomhuẹ se.

41 E kia rọte eke iSiria ali iSilisha, e ri udu u shi igbaa nya eyi eni e mie iKirisiti suọ ọ.

16

ITimoti ọ deba iPọlu ali iSalasi

1 IPọlu ọ bhale ẹoli iDẹbi ali iLisitira, ashini omọ odukhokho ni a lu iTimoti ọ la. Inyọli ni ọ li miesuọ ọ khi ọngi iJu, ama itali ọ khi ọngi iGiriki.

2 Igbaa oyi eni e mie iJesu iKirisiti suọ ni e la iLisitira ali iKoniomu nya e ngme onete oyi iTimoti.

3 IPọlu ọọ nono ni lọli ri iTimoti ma egbe vu, ighọ ọ shẹlẹ ọli-a. Itobọ khi ẹgbọ iJu ni e la oobọ e ga lẹse khi ita iTimoti khi ọngi iGiriki lọ.

4 Abi e li kia ẹoli i gase, e seşe eni e miesuọ ilamashi ni ighiusomhi na keşe ali eni egbhali ni e la iJerusalemu e keşe

shi ebe na wẹ, e gueye wẹ, e rẹwẹ gbe akanya.

5 Ighọ igbaa nya eyi eni e mie iKirisiti suọ, e fu u shi irudunga, ee bua shi ọ ẹlekpa.

IMeke ni iPọlu ọ mẹ obini iTiroasi

6 IPọlu ali eni e ga kia, e rọte eke iFirigia ali iGalesha, itobọ khi Ayemhe-no-pfuase ọa zẹ wẹ gue usomhi onete le eke Esha.

7 Abi e rọ ramhi eke iMisia, ee nono ni wẹwẹ e lo elemhi eke iBitinia, ama Ayemhe oyi iJesu ọa zẹ wẹ lo.

8 Ighọ e rọte eke iMisia dọse je iTiroasi.

9 Elijose ẹlẹghọ iPọlu ọ mẹ ime-alo, ọ mẹ khi ọngi iMasidonia ọ migha a lema, "Bhale iMasidonia ni u ya kpaghie anye obọ!"

10 Abi iPọlu ọ rọ mẹ oni imeke se, anye mu egbe e lẹ iMasidonia, itobọ khi anye lẹse khi Eshinegba ọ she lu anye, anye je aghọ ya gue usomhi onete le.

ILidia ọ mu pfi

11 Anye rọte iTiroasi lo oko-okẹ oniemi da okẹ oniemi je iSamotirasi, ogbeakolo, anye te aghọ je iNiapolisi.

12 Aghọ anye te je ifuapfe oyi iFilipi ni o khi ẹoli ni o mu ẹloe shi eke iMasidonia ni ebubu ẹgbọ iRomu e ngeli. Anye ga la aghọ ebubu ogbele.

13 Ogbele iyemhea oyi ẹgbọ iJu, anye te oni ẹoli vu je oni okẹ, ashini anye khokho khi ẹgbọ iJu ee lona shi iromhi

[†] 15:38 Li zẹ Ika 13.13

isoso. Anye shito nu ikpotso ni e legba agho ngme.

¹⁴ Okpotso oghuo elemhi we ni o ri esọ shi eke khi iLidia ongi iTiatura, oni o ri ide eyile e de. O khi okpotso ni oo na ulishi Eshinegba. Abi iPolu o li i ngme, Eshinegba o khueghie oli udu-a shi oni ungemhi.

¹⁵ Abi a ro batazi oli ali apfoli se, o lu anye je owa oyoli, oo anye, "A kha lese khi egbegbi oni o miesuo mhi khi, a bhale ya ku shi na mhe." O ti anye shi o ramhi ni anye ro lama shi oli o.

A mu iPolu ali iSalasi shi igha

¹⁶ Eleghuo abi anye li i je ashini anye la a so iromhi, omueshi oghumha oghuo ni o mholi ayemhe obe ni o ro o meke guele emini a ya me, o ya to anye ukhomhi. Eri o ri oni ekpabo imeguele ona a gbe ikpagho na eni e mholi oli.

¹⁷ Oo deba iPolu ali anye, oo tsesẹ, oo lie, "Eni e ga Eshinegba ni o fune eni egbo ena e khi! Eri e tse abo guele abi a li ya mholi imiepfuese!"

¹⁸ Ina o li i rielle oli ogbele kpa ya ramhi ni oni ingme o ro ri elemhi i bi iPolu, igho iPolu o nyene egbe gueye oni ayemhe, oo li, "Mhi ri eva oyi iJesu mhese ne, fie oli idiegbe ya lase!" Aghoagho oni ayemhe o fie oli idiegbe ya lase.

¹⁹ Abi eni e mholi oli e ro me khi ea ke me ikpagho afa ni e kpe te e oli obo o me, e

mu iPolu ali iSalasi tialo ghi enighie obini agbala oyewe.

²⁰ E wolo we bhale odalo oyi esọ-ezo, ee we, "Emose ena, egbo ifu e khi ni e pfi ozughu e shi awa ifuapfe.

²¹ E kia a sese egbo imu ni e khi oda shi eyi awa. Awa ni awa khi iRomu, awa aa ya dobe ri osese oyewe gbe akanya."

²² Eni ebubu egbo e kuma we o gue ezọ shi iPolu ali iSalasi egbe. Igho eni esọ-ezo e gueye we e banọ we a, e gbe we itali.

²³ Abi e ro gbe we egbegbo se, e tigbe pfi we lo owa ighumha. E gueye oni oo khe-ekhe o pfi okpe ashini o rewe shi egbegbo.

²⁴ Abi a ro ri oni omhese na li se, o mu we kulo owa aza elemhi oni owa ighumha, o so we awe igha.

²⁵ Abi itsotso ogbie o ro mu eke, iPolu ali iSalasi ee so iromhi, ee to uwolo kueghie Eshinegba. Ighumha eni e kpole e ri esọ shi we eke.

²⁶ Udemhija, eke o ri itoto nighise. Oni owa ighumha o rote eke jighise egbegbo. Eloawe eloawe, ode nya ni e lo oni owa le e khueghie-a. Iweghe ni e ro ge eni ighumha nya e ku we awe-a.

²⁷ Abi oni oo khe ekhe agho o ro me khi ode ni e la oni owa ighumha nya khi e khueghie-a, o dabi khi ighumha ni e la agho nya e she pfue. Igho o ji itakobi emhi lasele ni lue ro gbe egbelue-a.

²⁸ Ama iPolu o tsesẹ leghe, oo li, "Khi gbe egbe e-a! Anye

nya anye la ana.”

29 Oni ọọ khẹ ekhẹ ọghọ ọ lu ọgbọ ọ nyanya rue ugbili bhale. Ọ ri ulishi-ulishi na buẹ buẹ, ọ de ya wugha odalo oyi iPọlu ali iSalasi.

30 Ighọ ọ rue wẹ lasele, ọ mhila wẹ, “Elo mhi ya li ni mhi rọ ya mhọli imiepfuese?”

31 Eẹ ọli, “Yeyẹ ali apfẹ nya a mie iJesu Onomhue suọ khi a ya mhọli imiepfuese.”

32 Ighọ e gue ungememhi oyi Onomhue ye ọli ali apfẹ ọli.

33 Ighọ oni omose ọ wolọ wẹ, ọ dua wẹ utse ni a kuali wẹ. IPọlu ali iSalasi e rue ọli ali apfọli ya batazi na aghoaghọ.

34 Ighọ ọ rue iPọlu ali iSalasi nga owa oyọli ya ri eminale na le. Oghẹlẹ o vọ ọli ali apfọli nya udu irari khi e she mie Eshinegba suọ.

35 Eẹ uzogbe ogbeakọlọ, eni esọ-ẹzọ e ri unu na ipolisi e ka gueyẹ oni ọọ khẹ-ekhẹ ọghọ, “Zobẹ emose eghọ obọ ni e vu.”

36 Ighọ oni ọọ khẹ ekhẹ ọghọ ọọ iPọlu, “Esọ-ẹzọ e she ri unu bhale a wolọ ẹ abọ-a ni a ke vu. Opfomhẹ o ka nu ẹ kia.”

37 Ama iPọlu ọọ li, “Anye a li ingme okhọghuo ni a rọ mu anye gbe itali ukpẹloe oyi ẹgbọ nya, aboriẹkhia khi ẹgbọ iRomu anye khi! Ama e mu anye kulo owa ighumha. Memena, eẹ nono ni wẹwẹ e bẹna rue anye abọ-a, ọa ya tse e! Eni esọ-ẹzọ wẹwẹ-ghuo e bhale ya wolọ anye lasele.”

38 Eni ipolisi e lẹ ya gueyẹ eni enighie abi e ngme. Abi e rọ suọ khi ẹgbọ iRomu iPọlu

ali iSalasi e khi, ulishi o mu wẹ.

39 Ighọ e vu ya kuegbe-a lema wẹ, e wolọ wẹ owa ighumha le, e lema wẹ e kpekpe e lase ewẹ ifuapfẹ le.

40 Ighọ iPọlu ali iSalasi e lase oni owa ighumha le, e ya je apfẹ oyi iLidia. E bhale ya ẹ eni e miesuọ aghọ. E ri udu shi wẹ ọ, e rọte aghọ vu.

17

Obini iTesalonika

1 IPọlu ali iSalasi e rọte Afipolisi ali Apolonia dọsẹ e bhale iTesalonika ashini owa ugamhi oyi ẹgbọ iJu o la.

2 IPọlu ọ dọsẹ je owa ugamhi abi ọ kie kpe ẹ li. Efo uka esẹ ọ la aghọ nu wẹ rọte Ebe-no-pfuase ku ochi.

3 Ọ rọte Ebe-no-pfuase rọli khase gboo, khi oni Omiepfuese, ọ mema ya mẹ osoli, ọ rọte eghuli guale. IPọlu ọ gueyẹ wẹ, “Ijesu ni mhi rọ ọ tse abọ ye ẹ ọ khi oni Omiepfuese ni Eshinegba ọ shobọ khi lọli ya rọ bhale.”

4 Egbọ iJu eghuo e mie shi emini iPọlu ali iSalasi e ngme, e ku ma wẹ ọ ọ ga Eshinegba. Ighọ li khi ẹgbọ iGiriki eni ẹ na ulishi Eshinegba ali ebubu ikpotso ni e fialo-a e li miesuọ.

5 Ama ẹgbọ iJu ee kpe ofuma, e kia ya luno ẹgbọ usuesọ-akhue tiggibili shi okhọli. E pfi ozughu shi oni edẹli nya. E tsua okhọli lo owa oyi omose ni a lu iJasi ya nono iPọlu ali iSalasi ni wẹwẹ e muno wẹ lasele na eni ẹgbọ.

6 Ama abi ɛa rɔ mɛ wɛ, e tialɔ iJasi ali eni e miesuɔ elese ghɔ je odalo oyi enighie eyi oni ɛoli, e tsɛsɛ leghe, e liɛ, “Emɔsɛ ena e she pfi ozughu shi asha kpa! Memena e gbo bhale ifuapfɛ eyi awa,

7 IJasi ɔ mie wɛ shi owa oyoli. Ɛ da ishi eyi iSiza, ɛɛ khi oghie ɔlese ɔ laɔ ni a lu iJesu.”

8 Abi e rɔ suɔ eni ingmemhi ena, elemhi e te ododɛ yese eni ebubu ɛgbɔ ali enighie eyi oni ɛoli-a.

9 E ri iJasi ali eni a ga muno wɛ eghɔ zɛ oko, neni a tigbe zɛwɛ vu.

Elemhi iBɛrea

10 Obili o lɛsɛ bi ɛlɛghɔ, eni e miesuɔ e ghie iPɔlu ali iSalasi je iBɛrea. Abi e rɔ ramhi aghɔ, e je owa ugamhi oyi ɛgbɔ iJu.

11 Ɛgbɔ ni e la aghɔ e mɔhɔli udu ni o khueghie-a dɔsɛ eni e la iTɛsalonika. E ri esɔ shi oni usomhi onete egbegbɔ. Ogbɛlɛ kpa e rɔ wɛna Ebe-nopfuasɛ ni e mɛ ini emini iPɔlu ɔ gueyɛ wɛ ini igɛsikia lɔ.

12 Ɛgbɔ iJu ebubu e miesuɔ, ikpotso iGiriki ni e fia alo-a, ali emɔsɛ iGiriki e li miesuɔ.

13 Ama abi ɛgbɔ iJu ni e la iTɛsalonika e rɔ suɔ khi iPɔlu ɔ la iBɛrea a tse abɔ ungmehi oyi Ɛshinɛgba, e bhale aghɔ ya ngmiasɛ ɛgbɔ e ka pfi ozughu.

14 Eloawɛ eloawɛ, eni e miesuɔ ɛɛ iPɔlu vu ke je egele

okɛ oniɛmhi, ama iSalasi ali iTimoti e kie la iBɛrea.

15 Eni emɔsɛ ni e kphase iPɔlu, e rɔ li bhale Atɛni, e gbo nyenɛ egbe je iBɛrea. IPɔlu ɔ ghie wɛ ghi iSalasi ali iTimoti e kɛlɛ bhale ya ɛ luɛ shi aghɔ.

Abi iPɔlu ɔ rɔ la obini Atɛni

16 Abi iPɔlu ɔ li migha Atɛni i khɛ iSalasi ali iTimoti, ɔ mɛ ilitsa ɔdɔda ni e la oni ekɛ, o nighise ɔli ayɛmhɛ.

17 Ighɔ ɔ nu ɛgbɔ iJu ali ɛgbɔ iJɛta ni ɛɛ na ulishi Ɛshinɛgba ku ochi elemhi owa ugamhi. Ighɔ ɔ li gbo nu ɛgbɔ kpa ni e rɔte olele e dɔsɛ ɛ ngme ogbɛlɛ kpa.

18 Ɛgbɔ eghuo ni ɛ sɛsɛ, ni e khi Ɛpikuria ali iSitoiki e nu ɔli i khɛ akɔ.* Abi iPɔlu ɔ rɔ ngme ungmehi oyi iJesu ali irɔte eghuli guale, eghuo ɔ e liɛ, “Elɔ oyɛghɛ ɔna ɔ mɛ ɛ ngme?” Eghuo ɛɛ li, “Abi khi eri ɔɔ liɛ awa ke ga ilitsa eyi ɛoli oboese?”

19 Ighɔ e rue iPɔlu bhale owa ni a lu Aropagɔsi. (Owa ona eguebe ni e la ɛoli Atɛni ɛɛ legba.) “Anye ɛ nono ni u gueyɛ anye abi osɛsɛ onogbɔ ona o ngme.

20 Ingmehi ni u wa ngme, enegbɔ e khi shi anye esɔ, gueyɛ anye abi e ngme.”

21 Irari khi ɛgbɔ Atɛni nya, ali epfɛsɛ ni e la ɔ, e ma pfuse ɛghɛghɛ-a ke ngme ingmemhi ali ke ri esɔ shi owɛna ali ilɛsɛ

* **17:18** Ɛgbɔ Ɛpikuria ali iSitoiki ena, e deba osɛsɛ ni ɛa te odɛ, eyi ɔ ni a lu Ɛpikurosi ali iZɛno. Eri Ɛpikurosi ɔɔ sɛsɛ ɛgbɔ e zobɛ ni oghɛlɛ ɔ khi emini e na khu agbɔ oyɛwɛ, a na ke na emini e ya pfi osoli ali ulishi na wɛ. Ɛgbɔ iSitoiki e deba osɛsɛ ni ɛa te odɛ eyi iZɛno, ni ɔɔ ɔgbɔkpa ɔ ke li agbɔ oyoli abi usamhi oyoli o lama na li shi. Ɔgbɔ khi zobɛ ni usamhi agbɔ aruele okekhi oyi osoli, ni o nasɛ ɔli.

enegbọ ni e she lasele ẹ gbighi eke.

²² IPọlu ọ vule migha we iteva ọ we, “Emose Ateni, mhi me ẹ me khi ẹgbọ ni e mhue ulishi oyi Eshinegba a khi.

²³ Irari khi abi mhi rọ ọ kia ifuapfe eye ẹ gasẹ mhi bino ikhumhi ebubu ni aa ga. Mhi me okula oghuo ni a keke emhi shi, ni ọọ, ‘Oyi olitsa ni aa lese.’ Emini a ga ni ẹẹ khi aa lese, mhi ya gue ingme oyọli ye ẹ ena.

²⁴ “Eshinegba ni ọ ma agbọ ali emhikpa ni e la elemhi we, lọli ọ khi Onomhue oyi eke ali ukhuli ni ọa ya la Owa ugamhi ni ẹgbọ e ri abọ to.

²⁵ Wẹkhi eri ọ nono emhikhoghuo ali ikpaghiobọ oyi ẹgbọ. Itobọ khi lọli ọ ri agbọ ali ayemhe ali emhikpa na ẹgbọ nya.†

²⁶ Ogbọ oghuo ọ te ma ẹgbọ ọdoda na ushishi ni e la agbọ nya, Lọlighuo ọ ri eghẹghẹ shi eke na ushishi ni e rọ ya la agbọ ali khi ọ shi ughuli oyi ọgbogbọ nali.

²⁷ Lọli ọ lighọ riẹle ona ini ẹgbọ e rọsheka ke nono ọli, ini e me asha ramhi ọli egbe. Ama Eshinegba ọa nuata shi onge-awa ọ.

²⁸ ‘Lọli ọ ri ekpabọ na awa la agbọ ni awa rọ ọ kia, ni awa rọ khi oni awa khi,’ ali khi, ‘imi ọli awa khi,’ abi ekekebe eye ẹ eghuo e li ngme ọli.

²⁹ “Irarighọ, aborokhia khi imi Eshinegba awa khi, awa khi ke rọli khokho isheli ni ẹgbọ e ri eneli ri igolu ali

elomho ali eche ma.

³⁰ Eghẹghẹ ni o dọse, eri Eshinegba ọ mu alo kua shi umhalẹse oyi ẹgbọ. Memena ọ she ri omhese ni ọgbokpa ni ọ la ashakpa ọ mu nyene.

³¹ Irari khi ọ she shi ogbele shi eke ni ọ rọ ya ri omose oghuo gue agbọ kpa ẹzọ. Eshinegba ọ she rọkhasẹ agbọ khi igesikia onana o khi ni ọ rọ rọte eghuli guise oni omose ona le.”

³² Abi e rọ suọ khi iPọlu ọ ngme ramhi irote eghuli guale, e ri ọli i li egia, ama elese ẹẹ ọli, “Anye a nono ni anye gbo suọ ungmehi ona elelese.”

³³ Ighọ iPọlu ọ rọte oni ilegba vu.

³⁴ Emose eghuo e deba li, e mie ọli suọ. IDionisusi ni ọ khi oghuo oni igbaa Aropagosi ọ li deba li. Ighọ li khi ọkpotoso oghuo ni a lu iDamarisi ali ẹgbọ eghuo elese e li laọ.

18

Abi iPọlu ọ rọ la iKoriti

¹ Abi a rọ me eni ingme ena se, iPọlu ọ rọte ẹoli Ateni vu je ẹoli iKoriti.

² Aghọ ọ bhale ya ẹ ongi iju oghuo ni a lu Akuila ni a bia shi eke iPotusi. Oni lọli ali ughue ọli ni a lu iPisila e lese rọte eke Itili bhale, irari khi oghie iRomu nya ni a lu iKiladiusi ọ shi ushi na ẹgbọ iju nya ni e la ẹoli iRomu nya e lase ẹoli iRomu le. IPọlu ọ le ya bino we,

† 17:25 Li ze 1 Ighie 8.27; Aza 42.5; Ika 7.48

³ Irari khi akanya oni o ri ide e ghi okholo o o gbe, o nu Akuila ali iPisilia a gbe oni akanya ni ee gbe. O nu we la agho.

⁴ Ogbelẹ Iyemhẹa oyi egbo iJu kpa o ro je owa ugamhi oyi egbo iJu ya nu we ku ochi ini o dobe ri oni ungmehi lo egbo iJu ali egbo iGiriki esọ.

⁵ Abi iSalasi ali iTimoti e ro rote eke iMasidonia bhale, iPolu o ri egheghe ni o mholi nya gue oni ungmehi ye egbo iJu, khi iJesu o khi Omiepfuese ni Eshinegba o shobo khi o ya bhale.

⁶ Abi eni egbo iJu e ro nu oli khe akoni e ro ze emue ebe na li, o a lama shi we o, o kpe abo shi we o, Oo, "Mhi kpe abo shi e o. Ini a pfua, ee a ya mu ota so. Oa khi mhemhe a ya mu ota so shi oia eyeeye. Rote memena vu, mhia je eke oyi egbo iJeta."

⁷ O pfi we shi agho vu, o je owa oyi ogbo iJeta ni a lu iTatosi iJositosi ni oo ga Eshinegba, ni owa oyoli o la mama owa ugamhi oyi egbo iJu.

⁸ IKirisipusi ni o khi oga shi oni owa ugamhi ali apfoli e mie Onomhue suo; ebubu egbo ni e la iKoriti ni e suo oni usomhi e miesuo, a batazi we.

⁹ Eliyose eleghuo, iPolu o me ime-alo ni Onomhue o la nu oli ngme, oo li, "Ulishi o khi mu e, ama kie ke gue ungmehi le, khi tsaghi-a.

¹⁰ Irari khi mhi nu e la. Ogbọ o a la o ni o ya kuali e utse. Irari khi mhi mholi

ebubu egbo shi eoli ona ni e khi egbo eyemhe."

¹¹ Igho iPolu o la iKoriti ukpe oghuo ali ukhukhui, oo sese eni egbo ungmehi oyi Eshinegba.

¹² Abi iGalilio o ro khi igovuno ni iRomu e ze shi obini eke Akhaya, egbo iJu eghuo e kugbe mu okholi vule shi iPolu o, e mu oli je ikotu.

¹³ Ee li, "Eri omose ona oo sese egbo ode egbholi ni a te e ga Eshinegba abi ushi oyi awa o a ngme."

¹⁴ Abi iPolu o li i nono ni loli ngme, igho iGalilio o nu egbo iJu ngme, oo, "Ini ezọ ni a lu ena o khia khi oyi umhagueli lo okekhi oyi ingmobe okhoghuo lo, mhi kha kuegbe-a ri esọ shi e ee egbo iJu o.

¹⁵ Ama abi o ro khi ungmehi ekhako ni o la ingmemhi ali eva ali ushi oyee egho, ee-ghuo a ya so oni ingme, mhi aa ya so o."

¹⁶ Oo a khu we ikotu ya fe.

¹⁷ E gamhi iSositenisni ni o khi oga shi owa ugamhi mu. E la odalo oni ikotu gbe oli. Ama iGalilio o a fe pfi esọ shi we o.

¹⁸ IPolu o nu eni e miesuo la iKoriti ogbele ni e bu, igho o li tse we okhila, loli ali iPisilia ali Akuila e lo oko-oke oniemhi da oke oniemhi je iSiria. Neni iPolu o rote iKengkhiria da oke oniemhi, o yamhi itsu ukhomhi-a itobo ironga ni o ro nga.*

¹⁹ E ramhi Efesosni, ashini iPolu o pfi iPisilia ali Akuila

* 18:18 Li ze iNoba 6.18

shi. O je owa ugamhi ni o nu egbo iJu ku ochi.

²⁰ Eni egbo e o nu wewe la agho tese, ama oa lama.

²¹ Ochoghō, o gueye we abi o ro o vu, oo, “Ini o da khi oghuemhe oyi Eshinegba, mhi ya nyene egbe bhale deba e.” Igho o rote Efesosi lo oko-okē oniemi vu da okē oniemi.

²² Abi o ro ramhi iSizeria, o te agho je iJerusalemu ya tse eni e miesuo, o ke te agho je eoli Atioki.

²³ Abi o ro la agho ukuku egheghe, o te agho vu, o rote eke iGalesha ali iFiria ya ri udu shi eni e miesuo o.

Abi Apolosi o ro la Efesosi ali iKoriti

²⁴ Oni egheghe, omose onge iJu ni a lu Apolosi ni a bia shi Alezadira ni o khi oni o mema gue ebe, o gbo lolo lese ebe no pfuase, o bhale Efesosi.

²⁵ O khi ogbo ni a rote eke sese ode oyi Onomhue. O mholi omuegbe ni o fu ni o ro sese ingme oyi iJesu. Emi ni oo sese o rote ode igesikia. Ama osese oyi iJoni Oni oo batazi egbo o lese gue.

²⁶ Igho o li la owa ugamhi oyi egbo iJu ri igbedu u ngme. Abi iPisila ali Akuila e ro suo emue ni o la li unu, e rue oli ma egbe je apfe, e kuegbe-a sese oli ode oyi Eshinegba shi o egbegbo.

²⁷ Apolosi o roli shi udu khi loli ya je Akhaya, eni e miesuo ni e la Efesosi e kpaghie oli obo, e keke ebe ghi eni e miesuo ni e la Akhaya. E

gueye we e kpe abo mie oli. Abi o ro ramhi akagho, o khi ikpaghiobo oniemi na eni e rote okhale oyi Eshinegba miesuo.

²⁸ Irari khi o nu egbo iJu khe ako egbegbo, o ro mu we o le. O rote Ebe-no-pfuase rokhase we khi iJesu o khi Omiepfuese ni a shobo.

19

Abi iPolu o ro la Efesosi

¹ Abi Apolosi o li la elemhi iKoriti, iPolu o rote elemhi oni eke kia rote ugbogbode ni o khi ute ute e dose, o bhale Efesosi. Agho o bhale ya e eni e miesuo eghuo,

² o mhila we, oo we, “Abi a ro miesuo, a li mie Ayemhe-no-pfuase?”

Ee oli, “Anye a fe suo khi a me emini a lu Ayemhe-no-pfuase ghue.”

³ IPolu oo we, “Ibatizi onabi onoghuo a kpe mie?”

Ee oli, “Ibatizi oyi iJoni.”

⁴ IPolu oo we, “Ibatizi oyi iJoni, ibatizi ona imupfi lo. Ama oni iJoni o gueye egbo iZireni e mie oni o ya bhale ikpukhokho oyeluwe suo, ikhi iJesu.”*

⁵ Abi e ro suo ona se, a ri eva oyi iJesu Onomhue batazi we.

⁶ IPolu o ri abo nga we ukhomhi, Ayemhe-no-pfuase o tiemhile shi we o, ee ngme emue onogbo. E gbolo o ngme ungmehi ni Eshinegba o ro shi we unu.

⁷ Wewe nya e khi emose ogbava.

* 19:4 Li ze iMat 3.11; iMak 1.4,7-8; iLuk 3.4,16; iJon 1.26-27

⁸ IPọlu ọ lo elemhi owa ugamhi, ọ la agho iki ese, ọ ri igbedu nu eni egbọ ngme. Ọ nu wẹ ku ochi, ọọ sese wẹ ni e mie shi ingme Eghiele oyi Eshinegba.

⁹ Ama eghuo ọ e khi issueso-akhue ni ẹa lama miesuo. E la ukpelo oni igbaa ngme ingmemhi ebe deba oni ode. Igho iPọlu ọ pfi wẹ shi agho vu, ọ rue eni e deba li je owa oyi iTiranosi. Ọ la agho nu wẹ ẹ ku ochi ingme iloghie ogbele kpa.

¹⁰ Ikpe eva ọ la agho sese wẹ, ghe egbọ iJu ali egbọ iGiriki ni e la eke Esha, e suo ungmehi oyi Onomhue.

Imi iSikiva

¹¹ Eshinegba ọ te obọ oyi iPọlu u gbe ikanya oshabo ododa.

¹² O ya ramhi khi ibede ali ogbene ni a rote iPọlu egbe wolọ, e ri egbọ ni ẹa ze e toto, ali e khu egbọ ayemhe okphaghie idiegbe ya lase.

¹³ Egbọ iJu eghuo ni ee kia ukhomhi ẹoli gase ri imajiki i khu ayemhe obe kua, e li nono ni e ri eva oyi iJesu Onomhue riẹle abi imajiki khu ayemhe obe. E liẹ, "Anye ri eva oyi iJesu ni iPọlu ọ rọ tse abo mhesẹ ne, fiẹ lase!"

¹⁴ Imi oga oyi ekpodalo ugamhi onge iJu oghuo ni a lu iSikiva etuoshilua, ee li ona.

¹⁵ Igho, oni ayemhe obe, ọọ wẹ, "Mhi lese iJesu, mhi lese iPọlu, eghuo a khi?"

¹⁶ Oni omose ni ọ mhọli oni ayemhe obe ogho, ọ kpha

rughu wẹ, ọ gbe wẹ kualituse. E ri irumheba na kua.

¹⁷ Abi egbọ iJu ali iJeta ni e la eke Efesosi e rọ suo emini a me, ulishi oo mu wẹ. E ri ekpẹ na eva oyi iJesu Onomhue.

¹⁸ Igbaa oyi eni e mie iJesu iKirisiti suo e fiẹ lasele gboo, e zono olamhe eyewe le nya.

¹⁹ Ebubu wẹ ni e kpe ẹ li eboli, e wolọ ebe ni e rọ ọ li eboli nya lasele tose-a. Abi a rọ ta ingme ni a rọ de eni ebe ni e tose-a, e ya khi eka udududu.

²⁰ Igho ungmehi oyi Onomhue oo ge shi ọ tse, oo toto-a.

²¹ Abi a rọ me ingme ena se, iPọlu ọ sa ọ khi lolu ya rote eke iMasidonia ali Akhaya dose je iJerusalemu. Ọọ eni egbọ, "Mhi kha ramhi agho se, mhi ya rote oobo je ẹoli iRomu."

²² Igho ọ ghie iTimoti ali Er-asitosi ni e nu ọli a gbe akanya je iMasidonia. Lolli ọ la eke Esha ukuku eghẹghẹ.

Onyaghu ni a me Efesosi

²³ Oni eghẹghẹ, ukpokpomhi onyaghu o ya de shi ẹoli Efesosi irari osese ni iPọlu ọọ sese.

²⁴ Omose oghuo ọ la ọ, ni a lu iDemetiriusi ni ọọ lumhi igolu rọ riẹle irokhokho okula oyi olitsa Atemisi. Ọ tsua oki oniemi ghi eni e gbe oni akanya.

²⁵ Igho oni omose ọ luno wewe nya kugbe, ọọ wẹ, "A lese khi egbegbi eleli awa rote oni oki ona me.

²⁶ Mena a she me, a gbolo suo ikanya ni iPọlu ọọ gbe. Lolli ọọ gueye egbọ khi ilitsa ni

a ri abo mama khi afue e khi. Ebulu ebo ni e la eoli Efesosi ali eke Esha nya e she mie oli suo.

²⁷ Oki oyawa o she la okhena ni o ro le eva obe. Ali khi ekpe oniemhi ni a ro na olitsa Atemisi ali okula oyoli o ya mele afue-a. Olitsa ona ebo ni e la eke Esha ali agbo nya ee ga.”

²⁸ Abi eni ebo e ro suo ona, elemhi ee bi we. E ri ofu tseşe e gase eke gbii, ee lie, “Olitsa onofune, Atemisi o khi ni anye ebo Efesosi anye ee ga.”

²⁹ Oni okeke o gbhiaku oni eoli. Eni ebo e mu iGayusi ali Arisitakusi ni e khi engi iMasidonia ni e nu iPolu kia a gase. E rue we bhale olele.

³⁰ IPolu oo nono ni loli je odalo oyi oni igbaa, ama eni e miesuo ea ze oli obo.

³¹ Ekhemhue eghuo ni ee mhese shi oni eke ni e khi emole iPolu e li ghie usomhi ya lema li o khi bie je elemhi olele ya ri eboi khase.

³² Oni eghenge, okeke oniemhi o de elemhi oni igba. Eghuo e kha ngme e je ola, elese e ngme e je oobo. Ebo eghuo ni e la agho ea lese emini o pfi oni ozughu.

³³ Eni ee ralo na ebo iJu eghuo e tanole Alizada abo je odalo o ka ngme na ewe. E gueye oli emini o ya ngme. Igho oni Alizada o ri abo gbe we akhiakhia. O guele emini a me.

³⁴ Ama abi eni ebulu ebo e ro lese khi ongi iJu o khi, e ri uruli oghuo tseşe gbii, elemhi iwakati eva, ee lie, “Olitsa

onofune Atemisi o khi ni anye ebo Efesosi ee ga.”

³⁵ Ikpukhokho o, okoke-ebe oyewe o fie lasele, o ri abo gbe we akhiakhia. Oo we, “Inyoghuo-mhe ebo Efesosi, obo kpa o lese khi awa khi eni e kheke okula Atemasi, ali echeli oyoli ni o rote idane de tiemhile?

³⁶ Aa me obo khoghuo ni o dobe ya tia onana. Itobo igho a die oili lalo ni udu oye e o pfomhe. A khi ri inyanya-dose riele emhikhoghuo.

³⁷ Eri a muno emose ena bhale abi o rie khia khi ea rote oni owa ugamhi do ughiat, wekhi eri e ze emuebe na olitsa ni awa a ga.

³⁸ Ini idemetiriusi ali apfoli e mhue obo khoghuo ni o li we ingme, a lese khi awa mholi ikotu ali eso-ezo, o ka lu eni ebo ezo.

³⁹ Ama ini a me emhese ni a nono ni a ro lasele, a ze ni a la igba ni a la gue ezo so o.

⁴⁰ Irari khi ini a bino emini a me amo, awa la okhena ipfa ezo mu khi awa, awa pfi ozughu. Awa aa ya me ezo gue pfa egbe awa shi eke, irari khi awa aa mholi emini o pfi oni ozughu onana.”

⁴¹ Abi o ro ngme se, oo oni igba o ve-a.

20

IPolu o rote eke iMasidonia ali Akhaya dose

¹ Abi oni okeke o ro pfomhe, iPolu o ghie ya lu eni e miesuo. O ye we ude se, o tse we okhila. O je eke iMasidonia.

² Ọ rọte oni eke dọse. Ọ kia ri ingmemhi ni e bu ri udu shi eni e miesuo ni e la oni eke ọ. Ikpukhokho, ọ ramhi eke iGirisi.

³ Ọ la agho iki ese. Irari khi egbo iJu e gba ugbamhi obe khe ọli, abi ọ li nono ni loli lo oko-okẹ oniemi je iSiria, ọ ri ochoghọ mu egbe pfi rọte ode iMasidonia vu.

⁴ ISopata omi iParosi ongi iBerea ọ deba li, li shi Aristakusi ali iSekudosi ni e khi engi iTesalonika, ghe iGayusi ali iTimoti engi iDebi, gbo li shi iTakikosi ali iTirofimosi ni e khi engi eke Esha.

⁵ Etuava ni a ngme kpukhokho enana, e je odalo ya migha khe anye obini ẹoli iTiroasi.

⁶ Anye rọte iFilipi kia ukhomhi okẹ oniemi ogbele ishe, abi a rọ li ukpe ibuledi ni aa ri ifuma shi nye se. Anye bhale ya e eni e migha e khe anye ẹoli iTiroasi, anye la agho ogbele ishilua.

IPolu ọ rọte eghuli guise Iyutikosi le

⁷ Ogbele nodode elemhi ẹfo uka, anye bhale kugbe ni anye ya le eminale ni o pfuase. IPolu ọ nu eni egbo ngme tese irari khi ọ ya vu ogbeakolo. Ọ ngme ya ramhi itsotso ogbie.

⁸ A ri igbili ni e bu ru shi elemhi owa ukhomhi atonga ni anye legba.

⁹ Ozeo oghuo ni a lu Iyutikosi ọ shito okele ni o la oni atonga. Ukpokpomhi olese o do li rue abi iPolu ọ rọ ngme e tese dọse. Abi iPolu ọ kie li i

ngme, oni olese o lo ọli egberamhi ni ọ rọ rọte ukhomhi atonga nuzi-ese de ya tiemhi eke. Abi e rọ mu ọli vule, ọ she ghua.

¹⁰ Ama iPolu ọ tiemhi eke, ọ mu ọli ko elemhi, ọ to ọli etuli, ọọ, "A li tsuke, ayemhe oyoli ọ kie lao."

¹¹ Igho, ọ nyene egbe nga atonga, e le eminale ni o pfuase. Ọ nu we ngme ramhi ni ovo o rọ ngale. IPolu ọ vu.

¹² Eni egbo e rue oni ozeo je apfe, ọa mholi ikuatse okhoghuo. Onana o ri udu pfohmẹ we egbegbo.

IPolu ọ tse eni eghali Efisha okhila

¹³ Anye lo oko-okẹ oniemi je odalo ya migha khe iPolu Asosi, asha ni iPolu ọ te ya deba anye lo oko-okẹ oniemi. Loli ọ mhesẹ ona itobo khi awe ọ rọ ya bhale.

¹⁴ Abi ọ rọ bhale ya e anye shi Asosi, anye ga lo oko okẹ oniemi oghuo je iMitileni.

¹⁵ Ogbeakolo, anye lo oko okẹ oniemi te agho ya je iKhiosi, ogbele ni o de bali, anye rọte agho da je iSamosi, ogbeakolo anye ramhi iMiletusi.

¹⁶ IPolu ọa nono ni loli migha ẹoli Efesosi itobo ini loli khi pfuse eghẹghẹ a shi eke Esha, irari khi inyanya ọ la ini loli keke ramhi iJerusalemu shi ogbele iPetikositi.

¹⁷ Ẹoli iMiletusi iPolu ọ te ghie usomhi ghi eghali ni e la igba oyi egbo eni e miesuo ni e la ẹoli Efesosi e bhale ya e lue.

18 Abi e rọ ramhi agho, ọọ we, “A lese abi mhi li nu e ngeli abi mhi rọ la iteva oyeę, rọ te ogbele onodode ni mhi te lo eke Esha le.

19 Rote iregbemhe-tiemhile ali amę evię mhi rọ gbe ikanya eyemhe abi oni ọọ ga oyi Onomhue, eghęghę ni o rọ ze mu mhe ni egbo iju e rọ gba khe mhe.

20 Ea lese khi mhi aa ri emhikhoghuo ni o ya kpaghie e obọ sheli e abi mhi rọ o tse abọ ali ni mhi rọ o sese e elemhi igbaa ali ifuapfe.

21 Mhi she kpe gueye egbo iju ali egbo ijeta khi e mema a te olamhe eyewe mu pfi deba Eshinegba ni e mie ijesu Onomhue oyawa suo.

22 “Memena, ni mhi rọ suo esọ na Ayemhe-nọ-pfuase, mhia le iJerusalemu, ni o khia khi mhi aa lese emini mhi ya me oobo.

23 Mhi lese khi asha kpa ni mhi je, Ayemhe-nọ-pfuase o she kpe gueye mhe khi owa ighumha ali anasemhe e migha a khe mhe.

24 Ama eri mhi leli agbo oyemhe shi afue, ini mhi lese me asha gbe akanya ni ijesu Onomhue o mhese na mhe pfo. Ikhi itsabo usomhi onete isomhelemhi oyi Eshinegba.*

25 “Mhi she kia rote asha je asha tse abọ ungmehi Eghiele oyi Eshinegba ye e. Memena mhi lese khi ongee, ọa ke tigbe ya me mhe ghue.

26 Irarigho, mhi gueye e amo khi ini ongee o pfua, ọa

ke la obọ oyemhe.

27 Irarikhilishi ogbokhoghuo ọa mu mhe ni mhi rọ gue ungmehi oyi Eshinegba ye e.

28 Igho, a ri eloe khu egbe e, ali ogbokpa ni Ayemhe-nọ-pfuase o rọ nga e obọ. Khi orisumha-kia oyi igbaa oyi eni e mie ijesu iKirisiti suo oyi Eshinegba ni o ri ọlia eyoli de.

29 Mhi lese khi ini mhi da vu se, egbo ni e kholo abi ekpe ali idumhi e ya lo e iteva le, ẹa ya ze eni isumha obọ khi ẹa kualii we utse.

30 Eghęghę o ya ramhi ni egbo eghuo elemhi e e rọ ya ri ingmemhi egbhue di eni e miesuo, e rue iteva oyeę lasele.

31 Irarigho, a ri eloe shi o, a gbo sato khi elemhi ikpe ese mhi aa tigbe yemhe-a itse agua ye e, shi ele oquota ghe eliyose, elemhi evię.

32 “Memena, mhi re e nga Eshinegba obọ, ali ungmehi isomhelemhi oyoli, ni o ya re e fu shi irudunga, ni o ya re e mholi ugu ni eni Eshinegba o she khuese pfuase e ya mholi.

33 Mhi aa do ogbokhoghuo okonyo elomho ali igolu wekhi ode oyoli.

34 Ee a lese khi abọ eyemhe ena mhi rọ gbe akanya rọ de emini mhemhe ali eni e nu mhe kia ee nono kpa.

35 Elemhi emini mhi riele kpa, mhi rokhasę e khi awa mema ya ri akanya igbegbe onana kpaghie eni ẹa mholi obọ. A sato ungmehi oyi ijesu Onomhue, ni ọọ,

* 20:24 Li ze 2 iTimo 4.7

'Ikhivose o la irona dose imiemie.' ”

³⁶ Abi iPolu o ro ngme se, loli ali ewe e wugha, o so iromhi.

³⁷ Ee vie abi e li i tse oli okhila, e mu oli, ni e pfipfi oli egbe.

³⁸ Oni o lolo ri egbe pfo we-a khi oni o gueye we khi ea ke tigbe ya me lue ghue. Igho e kphase oli ya lo oko-okе oniemi.

21

IPolu o vu iJerusalemu

¹ Anye tse we okhila se, anye kia oke oniemi talala a je eoli iKosi. Ogbeakolo anye je eke iRodisi, anye rote agho je eoli iPatara.

² Anye lo oko-okе oniemi ni oo je eke iFonisha, igho anye lo o vu.

³ Anye nise alo me iSapurosi, anye rote ukiekie ogobo ini a so alo ghue obini ovo o te e lo eko. Anye je eke iSiria. Anye migha eoli iTai, agho oko oyi anye o la tiese itsua shi eke.

⁴ Anye me egbo eni e miesuo eghuo, anye nu we la agho ogbele ishilua. Ayemhe-n-pfuase o gueye we iPolu o khi je eke iJerusalemu.

⁵ Anye nu we la agho ramhi egheghe ni anye nu we ya la akaghо ramhi se, anye rue okiali eke. Igbaa oyi eni e mie iJesu iKirisiti suo nya ali ighuwe ali imiwe e kphase anye fie lasela oni eoli, anye ramhi eseso oke oniemi, anye wugha so iromhi.

⁶ Anye tse egbe okhila se, anye ya lo oko-okе, wewe e nyene egbe ukhokho, e je apfe.

⁷ Anye rote iTai vu, anye bhale iTolemasi. Anye la agho tse eni e miesuo, anye nu we la agho ogbeleghuo.

⁸ Anye vu ogbeakolo, anye ramhi iSizeria. Anye kushi owa oyi iFilipu oni o kia gue ungmehi oyi Eshinegbale, ni o khi oghuo egbo oshilua ni a la iJerusalemu ze.*

⁹ O mholi eniye imueshi aane ni ea ye ughue ne, ni e me eke e guele.

¹⁰ Abi anye ro la agho ogbele ni e bu, omekeguele ni a lu Agabusi o rote eke iJudia bhale.†

¹¹ Igho o rue ugbhogbho ni a ro o mu oku oyi iPolu. O roli genogeboli abo ali awe. Oo, “Ayemhe-n-pfuase oo khi, ‘Ina egbo iJu ni e la iJerusalemu e li ya ge oni o mholi ugbhogbho ona, e mu oli na egbo iJeta.’ ”

¹² Abi anye ro suo ona, anye ali egbo elese ni e la agho, anye lema iPolu o khi je iJerusalemu.

¹³ Ama iPolu oo, “Elo o ze ni a ro o vie, ni a ro o yese mhe udu-a. Aa khi eri mhi lese mu egbe ni a ro ya ge mhe tse, ama mhi ga mu egbe ni mhi ro ya ghu-a shi iJerusalemu, irari eva oyi iJesu Onomhue.”

¹⁴ Abi anye aa ro dobe zu oli ode, anye yemhe-a, anye e oli, “O ka tse abi o ghole Onomhue.”

* 21:8 Li ze Ika 6.5; 8.5 † 21:10 Li ze Ika 11.28

15 Onana o dọse se, anye mu egbe, anye nga iJerusalemu.

16 Eniye odukhokho eghuo ni e la iSizeria, e kphase anye, e ri anye bhale owa oyi iMinaso, ni o khi ongi iSapurosi ni o khi oghuo eni e kpe todode miesuo.

Abi iPolu o ro ramhi iJerusalemu

17 Abi anye ro ramhi iJerusalemu, eni e miesuo e kpe abo mie anye egbegbo.

18 Ogbeakolo iPolu ali anye enekpole anye ya me ijemhisi, eni egbhali eni e miesuo nya e li la agho.

19 IPolu o tse we, o kuegbe-a gueye we ikanya ni Eshinegba o gbe shi iteva oyi egbo iJeta rote akanya oyi Eshinegba ni o gbe.

20 Abi e ro suo ingmemhi ni iPolu o ngme se, e kueghie Eshinegba. Igho e iPolu, "Inyoghuo, wa a me egbo agbele-agbele eyi iju ni e mie ijesu suo, wewe nya e mholi omuegbe shi iri ushi gbe akanya.

21 E she kpe suo khi eri u wa sese egbo iju nya e tsua Ishi eyi iMosisi kua, khi u we e khi shele imi we-a ali e khi ke deba ighuighue eyi egbo iju.

22 Se awa ya li, irari khi e mema ya suo khi u she bhale.

23 Ina anye nono u li, emose aane e nu anye la ana ni e she ro nga.

24 Rue emose ena, ni a ga ya rieler ikhue-pfuase. U gbo fali

ota na we ni a ro ya ta we itsua. Ishegho, ogbokpa o ya lese khi egbhali a kie me, khi u ri Ishi eyi iMosisi e gbe akanya.‡

25 Ama anye she ri ebe ghi egbo iJeta eni e miesuo ro gueye we abi anye ngme, khi e ti egbe eminale ni a ro luase obo le, ali e khi ke da o lia ali e khi le elamhi ni aa fa uruli, ali e lase itsebo ikuku le."§

26 Ogbeakolo, iPolu o rue eni emose, e ga ya rieler ikhue-pfuase. Igho o je Owa Oyi Eshinegba ya gueye we ogbele ni oni ikhue-pfuase o ya pfo ali emini a ro ya rieler iluasobo na ogbogbo.

A mu iPolu

27 Abi eni ogbele ishilua e ro ya gba, egbo iju eghuo ni e rote eke Esha bhale e me iPolu elemhi Owa Oyi Eshinegba. E tan o shi eni ebubu egbo elemhi, e mu iPolu.

28 E tse se leghe, ee li, "Egbo iZireni, a kpaghie anye obo. Eri oni omose ona o kia sese egbo ashakpa, mu okholi vule shi egbo eyawa o, ali ishi eyawa ali Owa Oyi Eshinegba onana. Oa khi ena tse, o she gbo rue egbo iGiriki lo Owa oyi Eshinegba oyawa ya ri ichimhi mu asha ni o pfuase onana."

29 (Eri e ngme ona itobo khi e me iTirofimosi ongi Efesosi ali iPolu ifuapfe, e dabi khi o she roli lo Owa Oyi Eshinegba.)*

30 Onyaghu o lo oni ifuapfe nya le, eni egbo e rote

‡ 21:24 Li ze iNoba 6.13-21 § 21:25 Li ze Ika 15.29 * 21:29 Li ze Ika 20.4

ashakhasha na a bhale. E mu iPọlu, e rọte oni Owa oyi Eshinegba ti ọli lasele, aghoaghọ, e sọ okpẹ ode nya.

³¹ Abi eni egbo e li nono ni wewe gbe ọli-a, oni ingme o ramhi esọ oyi oni ọọ mhese na ekhọli-okhue eyi iRomu khi edeli iJerusalemu nya o la onyaghu oniemi.

³² Eloawe eloawe, o wolo ekhọli-okhue ma egbe e na tiemhi deba eni ebubu egbo. Abi eni e nyaghu egho e ro me ọli ali eni ekhọli-okhue, e mu mhue, e a ke gbe iPọlu.

³³ Oni o mhese na ekhọli-okhue ogho o mu iPọlu, o e ri iweghe eva ge ọli. O mhila eni egbo oni o khi ali emini o li.

³⁴ Egbo eghuo ni e la oni igba ee tsese, ogbogbo o ngme oyoli. Abi oni oga okhọli-okhue ogho o ro lese emini ee ngme, ọọ a mu iPọlu ya shi apfe ekhọli-okhue.

³⁵ Abi e ro ramhi unu owa, eni ekhọli-okhue e mu iPọlu tsua irari khi eni e domhi ọli e bu dose.

³⁶ Igho e li kpikpi deba li, ee tsese gbii, e lie, "A gbe ọli-a, a gbe ọli-a."

IPọlu o pfa egboli shi eke

³⁷ Abi eni ekhọli-okhue e li mu iPọlu lo apfe eyi ekhọli-okhue, ọọ oga oyewe, "Mhia nono ni mhi nu e ngme?"

Oni oga ọọ li, "U gu e ngme elemi iGiriki?"

³⁸ "Oa khi yeye u khi ongi ijipiti ni o ke gba onyaghu eke le? Ni u wolo egbo agbele ene ni ee gbolo ekhọli-okhue

eyi iRomu-a, ni u rue we je odagbe ifufu ya mu we egbe shi onyaghu?"

³⁹ IPọlu o so li o, ọọ li, "Oni iju ni a bia shi eoli iTasosi ni o la eke iSilisha mhi khi. Omọ eke eoli ni o mu eloe. Kpekpe ze mhe nu eni egbo ena ngme."

⁴⁰ Abi oga oyi ekhọli-okhue o ro ri oni eghoghe na li, iPọlu o migha atete unu ode, o ri abo nu we ngme e tsaghie-a. Abi e ro tsaghie-a, iPọlu o ri elemhi Iburu nu we e ngme.

22

¹ "Inyoghuo-mhe ali itamhe ni a mu ekpe e na, a ri esọ shi eke ni a suo ezọ ni mhi ya gue pfa egbemhe shi eke ena."

² Abi e suo khi o nu we ngme elemhi Iburu, e ga lolo tsaghie-a.

Igho iPọlu ọọ,

³ "Oni iju mhi khi, ni a bia shi eoli iTasosi ni o la eke iSilisha. Eoli iJerusalemu ona mhi la fu vule. Ayi iGamalie a la sese mhe egbegbo abi a lie deba ishi eyi ititawa. Eri mhi mhọli omuegbe shi ingme oyi Eshinegba egbegbo ezeze abi e e a ke li ogbe na amo.*

⁴ Eri mhi mu okhọli vule shi egbo ni e rọte Ode oyi Onomhue o, ramhi ni mhi ro gbolo eghuo-a. Mhi mu emose ali ikpotso kulo owa ighumha.

⁵ Okpeda na ekpodalougamhi eyi Eshinegba ali enighie e ya pfi otsele shi o khi igesikia mhia ngme. Mhi mie we ebe ghi eni eralo na

* 22:3 Li ze Ika 5.34-39

egbo iJu ni e la iDamasikosi, ni mhi ro ya ri iweghe shi eni e miesuo ni e la oobo abo, ni mhi muno we je iJerusalemu ya nase.†

IPolu o guele abi loli li mupfi

(Ika 9.1-19; 26.12-18)

6 “Eleghuo khi mhi i le iDamasikosi, itsotso oguota khi mhi lese ti ramhi oni eoli, akpa ni o lolo ge nyanyanya o rote irarogbe mi nga mhe egbe udemhija.

7 Igho mhi de ya gbe, mhi suo khi uruli oo mhe, ‘ISolu! ISolu! Elo e ze ni u ro mu okholi vule shi mhe o?’

8 “Mhi mhila li, ‘Oghuo u khi, Onomhue?’

“Oo mhe, ‘Mhemhe khi iJesu onge iNazareti ni u mu okholi vule shi o.’

9 Emose ni e nu mhe kia, e me oni akpa, ama ea suo uruli ni o nu mhe ngme.

10 “Mhi mhila li, ‘Elo mhi ya ri ele, Onomhue?’

“Onomhue oo mhe, ‘Vule ni u lo elemhi eoli iDamasikosi, a ya la agho gueye emini a mhesa ne nya ni u ya ri ele.’

11 Mhi ze alo itobo ugemhi akpa ni o mi nga mhe alo. Eni anye ga kia e ke mu mhe obo lo elemhi eoli iDamasikosi.

12 “Omose oghuo o la agho ni a lu Ananayasi. Oni o ga ugamhi, ni o ri ushi e gbe akanya o khi. Egbo iJu nya e mu ekpe a na li.

13 Loli o bhale ya migha mama mhe, ni oo, ‘Inyoghuo-mhe iSolu, alo eye e khueghie-a,’ utoghuo kpe, alo eyemhe e khueghie-a, mhi me eke me oli.

14 “Oo mhe, ‘Eshinegba oyi ititawa o she ze kee, ni u lese oghuemhe oyoli, ni u me Oni o suo eso na Eshinegba, ni o ri unu oyoli nu e ngme.

15 Irari khi u ya khi otsele oyoli, ni u ke ngme emini u suo ali ni u gbo ri alo me, gueye egbo nya.

16 Memena, elo u ke migha khe? Vule ni mhi batazi e, ni a gbe olamhe eye kua ne, rote eva oyi Onomhue.’

17 “Agho mhi te mu egbe pfi je eoli iJerusalemu. Abi mhi ro la Owa Oyi Eshinegba lema, mhi me ime-alo,

18 igho mhi me Onomhue, o gueye mhe, ‘Nyanya rote eoli iJerusalemu vu, itobo khi eni egbo ena, ea ya mie shi otsele oye ni u ya pfi na mhe.’

19 “Mhie oli, ‘Onomhue, eni egbo ena e ga lese khi mhemhe mhi kia kia owa ugamhi muno egbo ni e mie e suo kulo owa ighumha, mhi gbe we egbegbo.

20 Ali, ele ni e gbe iSitivini-a ni o li khi otsele, mhemhe mhi la agho, mhii mie obo shi oni eghuli, mhi ri eloe khu itsua na eni e tonon oli echegbe-a.‡

21 “Oni Onomhue oo mhe, ‘Ke le, mhi ya ghie e je odonue ghi egbo iJeta.’ ”

IPolu omoo-ekẹ iRomu

† 22:5 Li ze Ika 8.3; 26.9-11 ‡ 22:20 Li ze Ika 7.58

²² Eni ebubu ẹgbọ e ku esọ-a na iPọlu kie ramhi ana ni ọ rọ ngme na, ighọ e li tsesẹ leghe, ẹẹ li, “A mu ọli vu, A gbe ọli-a. Ọna ọa ke khi ọni ọ́ọ la agbọ!”

²³ E tsesẹ, ee pfi ide idane wiliwili, e yalọ ifufu ku nga idane.

²⁴ Oni ọọ mhẹsẹ na ekhọli-okhue, ọọ a rue iPọlu lo apfe oyi ekhọli-okhue. Ọọ wẹ, e gbe ọli itẹ ni e mhila li ini e lesẹ emini o zẹ khi ẹgbọ iJu e lina a tsesẹ ku ọli.

²⁵ Ama abi e rọ gẹ iPọlu, ni wẹwẹ e gbe ọli, iPọlu ọ mhila ọni ọga oyi ọkhọli-okhue ni ọ migha aghọ, “Ushi o lama a shi ọ u gbe ọmọ eke iRomu itali ini aa mẹ umhaguẹli ọli obọ ne?” ²⁶ Abi ọni ọga oyi ọkhọli-okhue ọ rọ suọ ona, ọ lẹ ya gueyẹ ọni ọọ mhẹsẹ na wẹ ni ọ kpeda na li. Ọọ, “Gue kia e, seẹ u wa li ena? Ọmọse ọna ọmọ-ekẹ iRomu ọ khi e.”

²⁷ Ighọ ọni ọọ mhẹsẹ na wẹ ọ lẹ deba iPọlu ọ mhila li, “Mhiẹ i, ọmọ-ekẹ iRomu u khi?”

iPọlu ọọ, “Ii, ọmọ-ekẹ mhi khi.”

²⁸ Oni ọọ mhẹsẹ na ekhọli-okhue ọọ, “Ọmọ-ekẹ ni mhẹmhe mhi khi, ikpokpomhi ikpaghọ mhi fali rọ mie ebe rọ khi ọmọ eke.”

iPọlu ọọ, “Ama mhẹmhe oyemhe, ọngi iRomu a bia mhe.”

²⁹ Eloawẹ-eloawẹ, eni ekhọli-okhue ni e nono ni wẹwẹ e mhila iPọlu ingme unu, e ti egbe je ukhokho, abi ọni ọọ mhẹsẹ na ekhọli-okhue ọ rọ

lesẹ khi ọngi iRomu iPọlu ọ khi, ulishi oo mu ọli, irari khi ọ she gueyẹ wẹ e ri iwẹghẹ shi ọli abọ, e gbe ọli.

Abi a rọ rue iPọlu bhale odalo oyi iSaẹdiri

³⁰ Ogbeakọlọ, ọni ọọ mhẹsẹ na ekhọli-okhue ọọ nono ni lọli lesẹ emini ẹgbọ iJu e nu iPọlu ẹ gue, ọ taghiẹ iPọlu iwẹghẹ-a. Ọ gueyẹ ighie eyi ekpodalo-ugamhi ali iSaẹdiri e legba. Ọ rue iPọlu bhale ya migha odalo oyewẹ.

23

¹ IPọlu ọ bino oni ig-baa iSaẹdiri tatata, ọọ wẹ, “Inyoghuo-mhe, mhi she rọte udu onete oyemhe nya gbe akanya oyemhe pfo na Eshinegba ya ramhi amo.”

² Abi ọ rọ ngme ona, Ọga oyi ekpodalo ugamhi ni a lu Ananayasi ọọ eni e ti mama iPọlu e lase ọli unu.

³ IPọlu ọọ li, “Eshinegba ọ ya ri emhi liẹ, yeyẹ ugbe ni a ri ẹtseli gboloa. Yeyẹ u shito aghọ a gue mhe ẹzọ egbe-a, ama yeyẹ oye u gbe ushi-a abi u li ri unu bhale a ri emhi li mhe.”*

⁴ Eni e ti mama iPọlu ẹ ọli, “Ú ga gbudu ri unu a ghi ọga oyi ekpodalo ugamhi eyi Eshinegba?”

⁵ IPọlu ọọ wẹ, “Inyoghuo-mhe, mhi aa lesẹ khi lọli ọ khi ọga oyi ekpodalo ugamhi eyi Eshinegba! A keke ọli shi ebena-pfuase, ‘Khi gbudu ngme onobe oyi ọni ọ mhẹsẹ na ẹgbọ eye.’”†

* 23:3 Li zẹ iMat 23.27-28 † 23:5 Li zẹ Okiali 22.28

6 Abi iPọlu ọ rọ lẹsẹ khi eghuo eni ẹgbọ khi iSadusi e khi, eni e kpọle e khi iFarisi, ọ la oni igbaa ngme lasеле leghe, ọọ, “Inyoghuo-mhẹ, otu iFarisi mhi la, mhi gbo khi omi iFarisi. Eri a la ana a gue mhẹ ẹzọ itobọ khi mhi mhọli irudushọ khi eni e ghu-a e ya gbo guale.”‡

7 Abi ọ li ngme ona se, uwola o de ni otu iFarisi ali otu iSadusi, oni igbaa o kemhi.

8 (Irari khi otu iSadusi ẹa lama shi ọ khi ẹgbọ e ya rọte eghuli guale, ẹa gbo lama khi igeni ali iyemhẹ e la ọ, ama otu iFarisi e lama shi enana nya.)§

9 Ukpokpomhi okeke o de, esesẹ Ishi eyi iMosisi eghuo ni e khi otu iFarisi e vule e khẹ akọ ni o toto, ẹẹ li, “Anye aa mẹ emhikhoghuo obọ oyi omọse ọna,” e gbolo ẹ, “Ini o fẹ khi-a khi ayemhẹ, o ke khi aḡeni ọ nu ọli ngme?”

10 Oni ekhako o pfuse toto-a shọ, ulishi o mu ọni ọga ọyi ekhọli-okhue khi e tigbe khẹre iPọlu-a. Ighọ ọ mhẹsẹ na eni ekhọli-okhue e tiemhi ya ri itoto mie wẹ iPọlu obọ ni e rọli bhale apfẹ oyi eni ekhọli-okhue.

11 Eḡe iyosẹ ni oo deba li, Onomhue ọ migha mama iPọlu, ọọ li, “Mhue igbedu! Abi u li la iJerusalemu pfi ọtsẹle na mhẹ, ighọ u li mema ya li pfi ọtsẹle na mhẹ ẹoli iRomu.”

Ugbamhi igbe-a ni a gba

khẹ iPọlu

12 Ogbeakọlo, ẹgbọ iJu eghuo e ya mhẹsẹ kugbe, e romhi isheli khi wẹwẹ ẹa ya le eminale wẹkhi eri wẹwẹ e ya da amẹ, ini ẹa li gbe iPọlu-a.

13 Ẹgbọ ni e gba ugbamhi onana, e dọsẹ ẹgbọ egbhueva.

14 E lẹ deba ọga ọyi ekpodalo ugamhi eyi Eshinegba ali eni egbhali, ẹ li, “Anye she romhi ukpokpomhi isheli khi anye aa ya le emhikhoghuo sẹ khi anye gbe iPọlu-a.

15 Memena, yeyẹ ali igbaa iSaḡdiri a kẹkẹ ebe ghi ọga ọyi ekhọli-okhue, a liẹ khi a nono ni a lolo suọ oni ingme bie. Anye mu egbe ni anye rọ ya gbe ọli-a neni a rọli ya ramhi ana.”

16 Ama abi omọ omọse ni ọ khi omi inyoghuo iPọlu oni ọkpotso ọ rọ suọ oni ugbamhi, ọ je oni apfẹ ekhọli-okhue ya gueyẹ iPọlu.

17 Ighọ iPọlu ọ lu ọga ọyi ekhọli-okhue oghuo, ọọ, “Rue ọzẹo ona ghi ọni ọọ mhẹsẹ na ẹ, ọ mhọli emini ọ ya gueyẹ ọli.”

18 Ighọ ọ rue ọli ghi ọni ọọ mhẹsẹ na wẹ.

Ọ li, “IPọlu ni a mu shi igha ọọ mhi rue ọzẹo ọna ghi ẹ, itobọ khi ọ mhọli emini ọ ya gueyẹ.”

19 Ọni ọọ mhẹsẹ oghọ, ọ mu ọni ọzẹo obọ, e ti je olase, ọ mhila li, “Elọ wa nono ni u gueyẹ mhẹ?”

20 Oọ li, “Ẹgbọ iJu e she gba li khi wẹwẹ e ya ghie ghi ẹ akọ, ni u rue iPọlu bhale odalo

‡ 23:6 Li zẹ Ika 26.5; iFili 3.5 § 23:8 Li zẹ iMat 22.23; iMak 12.18; iLuk 20.27

oyi iSaḗdiri khi ẹẹ nono ni e te unu oyọli suọ oni ingme bie.

²¹ Khi lama shi wẹ ọ, itobo khi e bu dọsẹ ẹgbọ egbhueva ni e kpe odẹ khẹ ọli. E she romhi ishe khi wẹwẹ ẹa ya le, wẹkhi eri wẹwẹ e ya da ini wẹwẹ ẹa li gbe iPọlu-a. E migha a khẹ ni e suọ emini u ya sọ shi emini e mhila ẹ ena.”

²² Oni ọọ mhẹsẹ na eni ekhọli-okhue ọ gueyẹ ọli, ọọ, “Khi gueyẹ ọgbọ ọkhoghuo khi u she gueyẹ mhẹ.” Ọọ li ọ ke lẹ.

A rue iPọlu te aghọ je ẹoli iSizeria

²³ Ighọ oni ọ mhẹsẹ ọghọ ọ lu ega ekhọli-okhue aava eyọli, ọ mhẹsẹ na wẹ, ọọ wẹ, “A wolọ ekhọli-okhue egbhuegbe, ali eni ẹ nga ichi egbhueşẹ ali ogbe, ali epfi-ote egbhuegbe ni a ke lẹ iSizeria agogo itili amişẹ.

²⁴ A ri achi na iPọlu nga ni a rọli je oobọ ini emhikhoghuo e khi li ọli, ni a rue ọli ghi iFẹlisi ni ọ khi igovunọ.”

²⁵ Ọ lina kẹkẹ ebe na wẹ.

²⁶ Mhẹmhẹ iKiladiusi iLisi-asi mhi kẹkẹ ebe onana ghiẹ:

Yeşẹ igovunọ iFẹlisi ni a mu ekpẹ ẹ na,

Mhia tşẹ.

²⁷ Ẹgbọ iJu e mu ọmọşẹ ọna, e nono ni wẹwẹ e gbe ọli-a. Ama eri mhi ri ekhọli-okhue eyẹmhẹ bhale ya pfa li shi eke irari khi mhi suọ khi ọmọ-ekẹ iRomu ọ khi.

²⁸ Mhi i nono ni mhi lẹşẹ emini e zẹ ni e rọ gue ẹzọ ọ shi ọli egbe, mhi rue ọli je igbaa iSaḗdiri oyẹwẹ.

²⁹ Mhi bhale ya ẹ khi ẹzọ ingme ishi eyẹwẹ e rọ nali i gue, ama ọa mhue emini ọ li ni abi a gbe ọli-a shi, wẹkhi imuọli shi ọgba igha.

³⁰ Abi a rọ gueyẹ mhẹ ug-bamhi ni e gba khẹ ọni ọmọşẹ, mhi rọ nyanya rue ọli ghi ẹ, mhi gbo gueyẹ eni e gue ẹzọ a shi ọli egbe e bhale deba ẹ ni e guele emini ọ li.

³¹ Oni ẹliyọşẹ ẹlẹghọ, eni ekhọli-okhue e rue iPọlu mhọli obọ vu, abi a li mhẹsẹ ọli na wẹ, e ramhi Atipatirisi.

³² Ogbeakọlọ, eni ekhọli-okhue e rọli na eni e nga ichi ni e rue ọli kie ke lẹ, wẹwẹ e nyenẹ egbe ukhokho je apfẹ ekhọli-okhue oyẹwẹ.

³³ Abi eni e nga ichi eghọ e rọ ramhi ẹoli iSizeria, e rue oni ebe na ọni igovunọ iFẹlisi, e rue iPọlu na li.

³⁴ Oni igovunọ ọ zẹ oni ebe, ọ mhila iPọlu ukiẹkiẹ obini ọ khi. Abi ọ rọ bhale ya lẹşẹ khi eke iSilisha ọ te bhale,

³⁵ ọọ, “Mhi ya suọ ẹzọ oye ini eni e gue ẹzọ shi ẹ egbe e ramhi ana.” Ighọ ọ mhẹsẹ a ri iPọlu nga ekhe-khẹ obọ ni e la agbala oyi Erọdu.

24

Ẹzọ ni iPọlu ọ gue odalo oyi iFẹlisi

¹ Abi ogbeleş ishe e rọ dọşẹ, Ọga ọyi ekpodalo ugamhi ni a lu Ananayasi ọ je iSizeria, lọli ali egbhali eghuo ali ilọya ni a lu iTatulọsi. E bhale odalo oyi igovunọ ni a lu iFẹlisi ni e ya gue ẹzọ shi iPọlu egbe.

² Abi a rọ lu iPọlu bhale, iTatulọsi ọ gue ẹzọ oyọli shi

eke khase iFelisi: Oo, “Ireloe-khu oye o she ri anye mholi opfomhe ali emhi enegbo ukhomhi eke ona.

³ Ashakhasha ali odekhode anye te e kuoghi e, anye e nono ni anye kphemhi ne shi ona, ye ye iFelisi oghie.

⁴ Ini anye khi pfuse e egheghe-a, mhi lema e u kpekpe u ku esq-a shi anye eke ukuku egheghe.

⁵ “Eri anye me omose ona shi ogbo ingme, ni o tsua okholi e lasele ke tanogbo iju ni e la eke agbo nya, e ke pfi onyaghu ali umha-sueso. Loli o ralo na egbo otu iN-azarini

⁶ O gbolo o nono ni loli ri ichimhi mu Owa oyi Eshinegba, loli anye ro gba li mu. [Anye e nono ni anye gue oli ezogbo abi ushi oyanye o ngme.

⁷ Ama iLisiasi oni o mhesa na ekholi-okhue, o bhale ya ri itoto ti anye lue abo mie rue vu.

⁸ Oo eni e me umha-gueli oyi omose ona e bhale odalo oye.] Ini u mhila omose onana ogbo u ya me igesikia ni o la ezogbo ni anye gue shi oli egbe ena.”

⁹ Eni egbo iju ni e la agho e kugbe lama shi ezogbo ni a gue shi eke, khi igesikia lo.

¹⁰ Abi oni igovunogbo o ri obogbo ni iPolu ngme o gue shi oli o.

IPolu oo, “Mhi lese khi ikpe ni e bu u te la ukhomhi eoli ona a sq ezogbo, itobogbo ona egbe e mu mhe ni mhi ro migha

odalo oye ya gue ezogbo pfa egbemhe shi eke.

¹¹ Abi u kie kpe lese, amo o gbe ele igbeva ni mhi ro je iJerusalemu ni mhi ya ga ugamhi.

¹² Egbo iju ni e gue ezogbo shi mhe egbe ea bhale ya e mhe shi elemhi Owa Oyi Eshinegba khi mhi nu ogbokhoghuo e khe ako, wekhi eri mhi la owa ugamhi, wekhi ifuapfe ashikhoghuo tanogbo ebubu egbogbo shi onyaghu.

¹³ Ea mholi abi e li dobe ro ya migha pfi otsele shi ezogbo ni e gue shi mhe egbe khi igesikia lo.

¹⁴ Mhi lama shi o khi, eri mhia ga Eshinegba oyi eni e bia awa, mhi khi oni o rote oni Ode ona, ni ee khi egbholi o khi. Ama mhi mie shi Ushi oyi iMosisi ali emini a keke shi ebe eyi emekeguele.

¹⁵ Mhi miesuo abi egbogbo enana e li miesuo, khi Eshinegba o ya rote eghuli guise ogbo nya le, ghe eni e gue ngeli ghe ena okholo.

¹⁶ Irarighogbo mhi ro roshaka, emini mhia rieler nya, ini udu ni ogo gue ogbogbo ezogbo oyemhe o pfuase shi odalo oyi Eshinegba ali ogbogbo.

¹⁷ “O she gba ikpe eni e bu abi mhi te lase eoli iJerusalemu le. Eri mhi jele aghogbo ni mhi ya rue ikpaghogbo khi egbogbo ni ea mhue ali ni mhi ri isomhopfa khi Eshinegba.

¹⁸ Emini mhii rieler na ni e ro bhale ya e mhe shi Owa oyi Eshinegba abi mhi la ipfuase abi ushi o ngme.

Ɛgbọ ekhọghuo ẹa le gasẹ mhe, wẹkhi eri a mẹ onyaghu.*

19 Ama ẹgbọ iju eghuo ni ẹ rọte ekẹ Esha bhale e ga li la akaghọ. E kha bhale odalo oyẹ ẹ ya gue ẹzọ oyewẹ, ini e mhọli emini e ya gue shi mhe egbe.

20 Okekhi emọse ni e la akana ena, a mhila wẹ e guele umhaguẹli ni e gue shi mhe egbe abi a rọ rue mhe bhale odalo iSaẹdiri.

21 Ama emhi oghuo mhi la akpewẹ tsesẹ ngme khi, 'Eri a gue mhe ẹzọ itobọ khi mhi mie shọ khi eni e ghu-a e ya gbo guale bhale agbọ.' †

22 Ighọ iFẹlisi ni ọ ga lolo lẹsẹ emhi oni Odẹ ona, ọọ, a yemhe oni ẹzọ-a ne. Ọọ, "Ini iLisiasi oni ọ mhẹsẹ na ekhọli-okhue ọ da bhale mhi rọ ya sọ ẹ oni ingme."

23 Ọ gueyẹ ọga ekhọli-okhue ọghọ ọ lolo ri ẹloe shi iPọlu egbe, ama e zẹ ọli pfi ẹfo-a ukukuọ. E zẹ ni emọle ọli e ke bhale ya tse ọli ali ni e ke ri emini ọ nono bhale ghi ọli.

IPọlu ọ bhale odalo oyi iFẹlisi ali iDurusila

24 Abi ikuku ogbele e rọ dọsẹ se, iFẹlisi ọ tsua ughue ọli ni a lu iDurusila ni ọ khi ọngi iju ma egbe bhale. Ọ ghie ya lu iPọlu, ọ ri esọ shi ekẹ suọ abi iPọlu ọ li ngme ungmehi irudunga ni o la ijesu iKirisiti.

25 Ama abi iPọlu ọ li ngme ungmehi igue-ngeli, ali ikuegbe-a ali isọ-ẹzọ oyi Ẹshinẹgba ni ọ bhale, ulishi oo

mu iFẹlisi, ọọ, "Osomhi ghọ ne! Ke vu. Mhi ya ghie lu ẹ ini mhi ke mẹ asha."

26 Oni ẹghẹghẹ ọ dabi khi iPọlu ọ ya vi ufa na lue, itobọ ighọ ọ rọ kele ẹ ghie lu ọli, ọ bhale ni wewẹ e ngme.

27 Abi ikpe eva e rọ dọsẹ, iPọshusi iFẹsitọsi ọ ke khi igovunọ ni iFẹlisi ọ kpẹ khi. Ama itobọ khi iFẹlisi ọ nono ni lọli gue riele ti ẹgbọ iju ẹloe, ọ zẹ iPọlu obọ shi owa ighumha.

25

IPọlu ọ bhale odalo oyi iFẹsitọsi

1 A liẹ amo o li ẹle esẹ abi iFẹsitọsi ọ te khi igovunọ, ọ rọte ẹoli iSizeria nga ẹoli iJerusalemu.

2 Oobọ ighie eyi ekpodalougamhi ali enighie eyi ẹgbọ iju e la gue ẹzọ shi iPọlu egbe.

3 E nyanya lema iFẹsitọsi ọ rue iPọlu je iJerusalemu ni ọ rọli kpaghie ewẹ obọ. Irari khi e she gba khi ewẹ e ya kpẹ odẹ gbe iPọlu-a ini ẹẹ le.

4 IFẹsitọsi ọọ wẹ, "A she ri iPọlu shi owa ighumha obini ẹoli iSizeria, mhẹmhe mhi ya nyenẹ egbe kele je oobọ.

5 A zẹ ni eni ẹẹ ralo na ẹ e deba mhe je iSizeria ya gue ẹzọ shi oni omọse egbe, ini o khia khi eri ọ lue."

6 Ogbele elele ya ramhi ogbele igbe iFẹsitọsi ọ nu wẹ la aghọ, ni ọ rọ kia tiemhi ẹoli iSizeria. Ogbeakọlọ ọ khueghie ikotu-a, ọọ a rue iPọlu bhale odalo oyelue.

† 24:21 Li zẹ Ika 23.6

⁷ Abi iPölu o rọ bhale, egbo iju ni e rọte iJerusalemu bhale e migha gase ọli, e gue ezọ ni o toto shi ọli egbe, ama ẹa dobe to eni ezọ migha.

⁸ Ama iPölu o gue ezọ pfa egbọli shi eke, ọọ, “Mhi aa riẹle emhikhoghuo ni o da ushi oyi egbo iju, wẹkhi Owa Oyi Eshinẹgba, wẹkhi eri mhi lue na iSiza iRomu.”

⁹ Ama iFesitọsi o nono ni lọli riẹle oguẹmhe oyi egbo iju, igho o mhila iPölu, “O ghọle ẹ ni a rue ẹ je iJerusalemu, ni a la agho gue ezọ oyẹ ukpeloe mhe?”

¹⁰ IPölu ọọ, “Iiye. Ikotu oyi iSiza ni a kha mema la gue ezọ oyemhe mhi la ena. Mhi aa mhọli onobe ni mhi li egbo iju ni yeye u lese gboo.

¹¹ Ini o khia khi mhi lue nabi a gbe ogbo-a shi, mhi mu egbe ni mhi rọ ya ghua. Ama o kha da khia khi ezọ ni egbo iju ena e gue ẹ shi mhe egbe khi egbholi lo, ogbokhoghuo ọa dobe ya rue mhe na we. Irarigho, mhi lema a ze ni iSiza lueghuo o remhe gue oni ezọ ona.”

¹² IFesitọsi o ri eni e nu ọli ẹ so ezọ ye ochi se, ọọ iPölu, “U she lema a rue ezọ ona je ayi iSiza ya gue, ayi iSiza u mema ya je.”

IPölu o migha odalo oyi Agiripa ali iBenisi

¹³ Ogbẹle ingme-na e dose, oghie Agiripa ali iBenisi e bhale eke iSizeria ni e ya tse iFesitọsi.

¹⁴ Aborokhia khi e la akaghọ ogbẹle ebubu, iFesitọsi o gue ingme oyi iPölu ye oni oghie,

ọọ, “Omose oghuo o la owa ighumha shi ana ni iFelisi ni o kpẹ khi igovunọ o ze obọ shi agho.

¹⁵ Abi mhi rọ ye iJerusalemu, ighie eyi ekpodalo-ugamhi ali egbhali eyi egbo iju e tsua ezọ bhale ya gue shi ọli egbe, ẹẹ mhi pfa ezọ igbe-a mu ọli.

¹⁶ “Ama mhi gueye we khi awa egbo iRomu awa aa ya pfa ezọ mu ogbo ni a gue ezọ shi egbe, ini ogbo a ri eghẹghẹ nali gue shi ezọ ni a gue shi ọli egbe ne.

¹⁷ Abi e rọ deba mhe bhale ana, mhi nyanya shi oni ezọ shi ogbeakolo, mhi shito el-emhi ikotu, mhiẹ a lu oni omose bhale.

¹⁸ Abi eni ẹẹ gue ezọ shi ọli egbe e rọ vule ngme, ẹa gue ezọ umhaguẹli ni mhi dabi khi e ya gue.

¹⁹ Ochoghọ ezọ ekhakọ tse e lese me gue shi ọli egbe, ni o khi ingme oyi ugamhi oyewe, ali ekhakọ ni o khi ingme oyi omose ni a lu iJesusu, ni o ghua, ni iPölu o khi o kie la agbo.

²⁰ Mhi aa lese abi mhi li ya tonọ udi oni ingme onana. Mhi ri irarigho mhila li ini o nono ni a rue oli je iJerusalemu ya gue eni ezọ ni a gue ẹ shi ọli egbe enana, oobo.

²¹ Ama iPölu o lema a kie mu lue shi igha ne, ni a ri oni ingme ghi iSiza ni o so o. Irarigho mhi rọ lie a rọ ọli shi owa ighumha ramhi ni mhi rọ ya rue ọli ghi iSiza.”

²² Igho Agiripa o gueye iFesitọsi, ọọ li, “Mhi kha nono ni mhemhe-ghuo ni mhi li ri

esọ suọ ungmehi oyi ọni ọmọse.” IFẹsitọsi ọọ li, “U ya suọ ọli ako.”

²³ Ogbeakọlọ, a ri ebọla kphase Agiripa ali iBẹnisi lo elemhi ikọtu le. Ega ekhọli-okhue ni e lolo fu, ali ẹgbọ eniemhi ni e la oni ẹoli e deba li lo. IFẹsitọsi ọ ghie ya rue iPọlu bhale.

²⁴ IFẹsitọsi ọọ, “oghie Agiripa ali ẹgbọ ni e la ana nya, a bino ọmọse ọna. Ẹgbọ iJu ni e la ana ali iJerusalemu ali iSizeria e she bhale deba mhe, ẹẹ tsese a khi ke ze ni ọ la agbọ.

²⁵ Mhi me khi ọa li emhikhoghuo onabi a ya gbe ọli-a shi, ama abi ọ rọ da lema a rue luẹ ghi Oghie iRomu nya eghọ, mhi ya rue ọli je iRomu.

²⁶ Ama mhi aa me ingme nabi mhi kha keke shi ọli egbe ghi Oghie iRomu nya. Irarighọ, mhi rọ rue ọli bhale ghi ẹ ẹẹ nya, yeye oghie Agiripa kpaashi, ni a bhale ya ẹ khi ini a bino oni ingme se, otse mhi ya me emini mhi ya keke shi ọli egbe.

²⁷ Irari khi mhia sa khi o gbe akanya ni a rọ rue ọni a mu shi igha ke ghi Oghie iRomu nya, ini aa me ushi okhoghuo keke shi ọli egbe gboo.”

26

IPọlu ọ pfa egbọli shi eke odalo Agiripa

¹ Ighọ Agiripa ọọ iPọlu, “A she lama ne u ngme na egbe

ẹ.” Ighọ iPọlu ọ tsua obọ eke, ọ bele ẹ gue ẹzo, ọọ,

² “Agiripa ni oghie, mhi me egbe mhe shi ọni ọ me afa ni mhi rọ migha odalo oye amo, ni mhi rọ ọ gue ẹzo pfa egbe mhe shi eke shi ingme nya ni ẹgbọ iJu e gue shi mhe egbe.

³ Oo guẹ ti gba irari khi u ga lese imu eyi ẹgbọ iJu nya ali emini e mie shi. Irarighọ, mhi lolo leme u mhọli irabomudu na mhe ni mhi ngme.

⁴ “Ẹgbọ iJu nya e lese abi mhi laọ shi abi mhi te khi ọmọ, rọte igbaekele agbọ oyemhe obini ushishi ẹgbọ iJu eyemhe ali ẹoli iJerusalemu.

⁵ Ode o she nuẹ ni e te lese mhe, e ya dobe pfi otsele shi ọ ini o ghọle we, khi abi ugamhi oyawa o ngme khi eri mhi mhọli ọmuegbe egbegbọ shi ọ abi ọna otu iFarisi ni mhi khi.*

⁶ Ama mena, itobo khi mhi mhọli iregbeda shi emini Eshinegba ọ shi na itita awa mhi rọ migha shi imufe amo.

⁷ Ona o khi ishobo ni unuekpẹ igbeva eyawa e migha a khe, abi e li rosheka a ga Eshinegba ghe ẹleogwota ali ẹle iyose. Oghie, irari oni iregbeda onana ẹgbọ iJu e gue ẹzo shi mhe egbe ẹ shi.

⁸ Elo e ze ni a rọ lama shio khi Eshinegba ọ dobe ẹ guise ọni ọ ghu-a le?

⁹ “Mhemhe mhi kpẹ mhọli ọli shi udu khi eri o ye ni mhi mu okhọli vule shi oni eva oyi iJesu ọngi iNazarẹti ọ.

* 26:5 Li ze Ika 23.6; iFili 3.5

¹⁰ Igho mhi li i rieḷe ḷi obini ḷoli iJerusalemu. Irari afu ni oḡa oyi ekpodalo ugamhi eyi Eshineḡba o ro na mhe, mhi muno ebubu eni e miesuo shi owa ighumha, abi a ro o gbolo we-a, mhii mie obo shi o.

¹¹ Ebubu eḡheḡhe mhi te owa ugamhi je owa ugamhi ya nase we, mhi gbolo ri ajil-imhe rewe ngme ungmehi ipfiunu-a deba Eshineḡba. Irari elemhi we ni e bi mhe. Mhi gbolo je ḷoli oboese ya mu okhḷi vule shi we o.†

IPolu o guele abi ḷoli li mupfi

(Ika 9.1-19; 22.6-16)

¹² “Eḷeḡhuo mhi i le ḷoli iDamasikosi, rote afu ali omhesē ni oḡa oyi ekpodalo ugamhi eyi Eshineḡba o ro na mhe.

¹³ Itsotso oḡuota o mu eke, oghie, abi mhi la ode, mhi me khi akpa ni o ge dose ovo o rote idane mi gase mhe ali eni anye ga kia.

¹⁴ Anye nya, anye de eke, igho mhi suo khi uruli o nu mhe ngme elemhi Iburu, oo, ‘ISolu, iSolu, elo o ze ni u ro mu okhḷi vule e shi mhe o, ooyeghe wa li ini u nu mhe e khḷi.’

¹⁵ “Igho mhi mhila, ‘Oḡhuo u khi Onomhue?’

“Oo mhe, ‘Mhemhe iJesu lo ni u mu okhḷi vule shi o.’

¹⁶ ‘Memena, vule migha. Mhi she ri egbe mhe khasē irari khi mhi she ze shi oni oo ga mhe ali ni u ke pfi otsēle

oyemhe shi emini u ri ukpeḷoe oye mhe, ali emini mhi ya rokhasē okhesē.

¹⁷ Mhi ya tsumhi e obo oyi eḡbo eye ali obo oyi eḡbo iḡeta. Mhi ghie e ghi we,

¹⁸ ni u khueghie we alo-a, ni u mu we pfi lase alo ebili le bhale akpa, ali u rue we ekpabo eyi okphaghiē lasele bhale deba Eshineḡba, ni a gbe olamhe kua na we, ali ni e kugbe eḡbo eyi Eshineḡba eni e pfuase o, itobo irudunga ni e mhḷi na mhe.’

¹⁹ “Irarigho, oghie Agiripa, mhia ro ri ukpeḷoe gbe eke ni mhi rote iloghie me.

²⁰ Mhi kpe te odode gue ḷi ye eḡbo iDamasikosi, mhi ke gbo gue ḷi ye eḡbo iJerusalemu ali eḡbo ni e la eke iJudia nya ali eḡbo iḡeta. Mhi roḷi tse abo, e lase olamhe le ni e mupfi deba Eshineḡba, e rokhasē khi wewe e she mu nyene rote ikanya ebe eyewe lasele.‡

²¹ Ona o ze ni eḡbo iJu e ro bamhe rue Owa Oyi Eshineḡba ni e ro rosheka ini wewe e gbe mhe-a.

²² Ama mhi she mhḷi ikpaghiobo oyi Eshineḡba ramhi ogbe na amo, ali mena mhi migha akana a pfi otsēle ye oḡbo onofune ali onikeke abeghuo. Mhi aa ngme dose emini emekeḡuele ali iMosisi e khi a ya me,

²³ khi oni Omiepfuese ni a shobo khi oo bhale o ya me osue, ali khi ḷoli ni o kpe te odode rote eghuli guale khi o

† 26:11 Li ze Ika 8.3; 22.4-5 ‡ 26:20 Li ze Ika 9.20, 28-29 § 26:23 Li ze Aza 42.6; 49.6; 1 iQri 15.20

ya ri ákpá ru na ẹgbọ eyọli ali ẹgbọ ijẹta.”⁵

²⁴ Abi iPọlu ọ rọ ngme ramhi ana, iFesitọsi ọ mu ọli migha, ọọ li, “Eri waa ke lẹsẹ emini u wa li? Ebe ni u zẹ dọsẹ e she ri ujili ẹ kphe.”

²⁵ IPọlu ọọ li, “Ujili ọa kpha mhe, iFesitọsi ọgbegbedu, emini mhia ngme egbegbingme lo ni o tsua ẹgbhali.

²⁶ Oghie Agiripa ọ ga lẹsẹ eni ingme enana nya, emhikhoghuo ena, ẹa lase ọli ẹgbhali-a irari khi aa riẹlẹ wẹ osheli. Ona o zẹ khi mhi ga dobe nu ọli a ngme oni ingme ona gboo.

²⁷ Oghie Agiripa, u fe mieshi emini emekeguele e ngme? Mhi lẹsẹ khi u mie sho ọ.”

²⁸ Ighọ Agiripa ọọ iPọlu, “Eri u dabi khi u dobe ya ri oni ukuku ẹghẹghẹ ona ti mhe ni u remhe mele oni ọ miesuọ-a?”

²⁹ IPọlu ọọ li, “O kele, o tẹse oo, mhi lema Ẹshinegba o khi khi yeye-ghuo tse, ama li shi ọgbokpa ni ọ ri esọ shi mhe eke ogbenamo, ni e li abi mhi li, ini a da ri obọ rue iweghe ni e lamhe abọ ena ọ le.”

³⁰ Ighọ oni oghie ọ vule, li shi oni igovunọ ali iBenisi ali eni e nu wẹ shito.

³¹ E rọte oni agbala vu, ee ngme, ẹẹ, “Omose ona ọa li ingme ni a ya gbe ọli-a shi wẹkhi oni a rọ ọ mu ọli shi owa ighumha.”

³² Agiripa ọọ iFesitọsi, “Áá kha wolọ omose ọna abọ-a ini ọa she lema a ri oni ingme je ayi iSiza lo.”

27

A rue iPọlu je iRomu

¹ Abi e rọ lama shi ọ, anye lo ọkọ-okẹ oniẹmhi je Itili, e rue iPọlu ali ighumha ni e kpole mhọli obọ oyi ọga ekhọli-okhue ni a lu iJuliosi, ni ọ khi ọghuo oyi ekhọli-okhue eyi Oghie iRomu nya, ni a zẹ ọda ke.

² Anye lo ọkọ-okẹ oniẹmhi rọte Adiramitiomu, ikhi ọkọ-okẹ ni o ya kia migha ikpe eghuo ni ọkọ-okẹ ẹẹ migha, ni e la epfepfe okẹ ni e la eke Esha. Arisitakusi ni ọ khi ọngi iMasidonia ọ nu anye kia.

³ Ogbeakọlọ anye migha iSidoni. IJuliosi ọ mhọli isomhelemhi na iPọlu, ọ zẹ ọli obọ ya me emole ọli, ni e ri emini ọọ nono na li.

⁴ Anye ke gbo rọte aghọ mu oni ọkọ nga, anye rọte odane ukiẹkiẹ eke ni okẹ oniẹmhi o khi shi ni a lu iSapurosi irari khi akpekpeli oo nase anye.

⁵ Abi anye rọ gua ọkọ ọ da je ọdada iSilisha ali iPafia, anye migha ẹoli iMara na eke iLisia.

⁶ Aghọ oni ọga ekhọli-okhue ọ te me ọkọ-okẹ oniẹmhi oyi ẹoli Alẹzadira ni oo je Itili, ọ ri anye lo ọ.

⁷ Anye e kia fiẹ, ogbele ebubu, anye mhọli ọmunu neni anye ramhi iKinidusi. Abi akpekpeli ọa rọ zẹ anye rọte ashini anye kha rọte, anye gua ọkọ-okẹ je ukiẹkiẹ eke ni okẹ oniẹmhi o khi shi iKireti ni o sọ alo ghue ẹoli iSalimo.

⁸ Anye mhọli ọmunu rọte oni okẹ oniẹmhi. Ikpukhokho,

anye bhale ashini oko-okę ęę migha ni a lui opfomhęge ni o ti mama ęoli iAsia.

⁹ ęęęęęę o she pfu anye-a. Oni okiali o de shi ęęęęęę ni a rọ lęęę pfi azumhi se, ni o khi ęęęęęę ni okhęna o la la okiali na ukhomhi oke onięmhi. Igho iPolu o tse agua ye wę, oę wę,

¹⁰ "Emoęe, mhi she me khi okiali oyawa o ya khi okhęna ali khi o ya ri ukpokpomhi opfu ghi oni oko ali itsua ni o tsua ali agbo oyawa."

¹¹ Ama, ocho ni oni oga ekholi-okhue o kha rọ ri esọ shi emini iPolu o ngme, o deba abi oni o gua oni oko o ngme ali emini oni o mholi oni oko o ngme.

¹² Aborokhia khi ashini anye migha o a ya ti egbe ęęęęęę orue; ebubu ęgbọ e yemhe anye gua ke le, e dabi khi anye ya ramhi ęoli iFonisi, ni anye la agho ęęęęęę orue. Agho oko oke onięmhi nya ęę migha yemhe-a. Eke ni oke onięmhi o khishi ni a lu iKireti ni o so alo ghue obini ovo o te lo eko o khi.

Akpekpeli onięmhi

¹³ Abi akpekpeli oke o rọ ri ofię rote ukiękię ogobo o pfiolo, eni emoęe e dabi khi okiali o ya ze we kia ke je odalo, igho e leli uli ali akhuli ni a rọ gba oko oę zu. Ee kia eseso oni oke onięmhi na iKireti.

¹⁴ Ama o li deņę, akpekpeli onięmhi, o li rote ukiękię obita ini a so alo ghue obini ovo o te ę tiemhi eko pfiolo rote oni

eke ni o la iteva oke onięmhi i doęe.

¹⁵ Oni akpekpeli o tsua rughu oko-okę oyanye, o a dobe ke kia je obini akpekpeli o te pfiolo o bhale. O loęę anye. Anye bie ze oli ovo na akpekpeli lolighuo oo tsua.

¹⁶ Anye kia rote ukiękię ukuku eke ni o la iteva oke onięmhi ni a lu iKauda, ikhi ukiękię obini oni akpekpeli o a ri egbe ramhi. Iroshęka anye rọ dobe tialo oko onikeke ni a rọ o tsumhi ęgbọ lo elemhi oni oko-okę onięmhi.

¹⁷ Abi eni emoęe e rọ tialo li lo se, e ri ili ge oni oko-okę onięmhi gase, ini eni ili e dobe mu oli mhue toto. Irari khi ee na ulishi ini oni oko o ya gbe aye shi ugbe eke, ni o la egele eke iLibiya, ni o so alo ghue we. Igho e gbaghie ode na kpishi oyi oni oko-a, irari khi ęa bie ke mhue abi e ya li o. Ishegho ni oni akpekpeli o bie tsua we ke le.

¹⁸ Oni akpekpeli o kie ri itoto tsua oni oko-okę ramhi ogbeakolo, ramhi ni, eni emoęe e rọ tino itsua ni e tsua shi oni oko o pfino kulo oni oke.

¹⁹ Ogbeakolo e pfino ikhuli ni oni oko o rọ o gbe akanya kulo oni oke.

²⁰ Aborokhia khi ogbele ebubu ni e doęe khi anye a ri eloe ti ovo wekhi ukpetata, ni oni akpekpeli o kiele rọ ri itoto o pfiolo, anye a ke ri udu shi o khi anye me ode ni anye te ya pfue o.

²¹ Abi eni emoęe ęa rọ le

eminale ogbele ebubu, iPolu o vule, o we, "Emose a kha suo ude ni mhi ye e lo, a kha migha iKireti, Eghēghē agho, a kha tsumhi egbe e oyese onana ali ofpu.

22 Ama mena mhi gueye e a mhōli udu, itobo khi ongeē okhoghūo oya ya pfua se ni oni oko.

23 Ooyose aḡeni oyi Eshineḡba ni o mhōli mhe ali ni mhi a ga o migha mama mhe,

24 o o mhe, 'Khi ze ni ulishi o muē, iPolu. U mema ya migha ezō odalo oyi iSiza ali khi Eshineḡba o she rote ilelemhi ri agbo oyi eni a ga kia mhōli e obo.'

25 Irarigho, a mu igbedu oye mhōli, emose, irari khi mhi mhuē irudunga khi Eshineḡba o ya riele oli abi o gueye mhe.

26 Ama oko oyawa o mema ya gbe aye shi ugbe eke okhoghūo ni o la iteva oke oniēmhi, o tigbe migha."

Oni oko o de ya khere-a

27 Eliyose elenuzi-igbene, akpekpeli o kie tsua anye e kiakia oke oniēmhi Adiriatiki. Itsotso ogbie, o li eni ee gbe akanya oni oko eloe abine khi e she ti e mama eke.

28 E mhesē oni oke bino, e me khi ilimhi oyoli o khi ete-awē egbhuesesa. O gbo li denē, e gbo mhesē oli, o ke khi ete-awē egbhūene ali igbe.

29 Ulishi o mu we khi oni oko o ya gbe aye shi eche, e rote ukhokho pfi ikhuli ene ni a ro a mu oko o gbashi lo

oni oke oniēmhi, ee so iromhi ogbe o gbe a.

30 Eni e la oni oko o gbe akanya e dua abi e li me asha a na kua. Ee tiese ukuku oko ni e tialo lole egho nga oke oniēmhi, abine khi eri e nono ni e rote odalo ya pfi ikhuli lo oke oniēmhi.

31 Ama iPolu oo oni oga ekhōli-okhuē ali eni ekhōli-okhuē, "Ini emose enana ea li la elemhi oni oko, ongeē, oya ya pfue o."

32 Igho eni ekhōli-okhuē e pfa uli ni o mu oni oko onikeke mhuē-a. E ze oli de tiemhi elemhi oke.

33 Neni ogbe o maghie-a, iPolu o lema we nya e le eminale. O o we, "O she ramhi ogbele igbene ni udu oya ke te sheshe e, ni a le eminale kpe.

34 Mena mhia lema e, a le eminale. A lemhi ini a nono ni a kie dobe la agbo, A lemhi khi emhikhoghūo oya ya li ongeē."

35 Abi o ro ngme na se, o rue ibuledi laselle, o kphemhi na Eshineḡba ukpeloe we nya, o khi oli-a, oo le.

36 Wewe nya e mhōli udu, e le eminale.

37 Anye nya ni anye la oni oko, egbo egbhuegbese ali ogbasasa 276 anye khi.

38 Abi e ro ga le eminale se abi e nono, e tino ikpulu ikpamhi emhi ni e tsua kulo oke oniēmhi, ini oni oko o kpe li fue.

Oni oko oke oniēmhi o kulue

39 Abi ogbe o ro gbe-a se, eni ee gua oni oko ea ke lese egele oke oniēmhi bie, ama e

mẹ ashini ekhashe e kpi gbili shi. Agho e ke bie roli shi udu khi wewe e ya gua oni oko ya migha ini o ze we e riele.

⁴⁰ Igho e pfanon eni ili ni e mu ukpokpomhi akhuli ni o mu oko-okẹ oniemi e gbashi kulo udi okẹ oniemi. Eghẹghẹ agho e taghie uli ni a ro mu emini a ro mu oni oko ukhomhi e nyene-a. E taghie ugbakpi oyi oni oko-a nga idane, ni e dobe ramhi ashini e nono.

⁴¹ Ama oni oko-okẹ o ya to aye so ugbe eke ni o la elemhi okẹ oniemi, o migha, akpekpeli o kie ri itoto o li, o tseke udi oni oko-a.

⁴² Eni ekholi-okhue ee gba abi e li ya gbolo eni ighumha nya a, ini e ya gua okẹ ramhi egele ni e na vu.

⁴³ Ama oni oga ekholi-okhue, oo nono abi loli li ya tsumhi iPolu, o a ze we riele emini e gba. Ochoghon o gueye eni e gue e gua okẹ e kpe danon kulo okẹ ni e ramhi egele.

⁴⁴ Eni e kpole nya e mu ikiye eera mhue okekhi izaga oyi oni oko-okẹ. Igho wewe nya e ramhi ekekhe emhikhoghuo o a li we.

28

Eke ni a lui iMota

¹ Abi anye ro ri epfua-epfua ramhi egele se, anye bhale ya e khi iMota a lu oni eke ni o la iteva okẹ oniemi.

² Egbon ni e ngeli oni eke e somhelemhi anye ode ni anye aa sa shi. E pfi avueron ro mu anye epfese irari khi eri amon oo rue, ogbe o pfo.

³ IPolu o ya nu iguagha eera, o rewe kpe eni erali, igho enye afue o te eni iguagha lasele ya tsakon shi iPolu obon, itobon khi erali e she base oli.

⁴ Abi egbon ni e la oni eke ee me khi oni enye o ngomhi iPolu obon, e gueye egbe, ee, "Omose ona, ogbon ugbeli ni o gbolo egbon-a o fe khi memena. Aa me khi abi o ririen na pfue eghuli okẹ oniemi, odeba oyi iguezon o a kie ze oli obon ni o la agbon."

⁵ Ama iPolu o kpishi oni enye pfilo elemhi erali. Ingomhi ni oni enye o ngomhi oli, o a li oli abikhoghuo.

⁶ E migha ri eloe shi eke e khe abi o li ya fumhi, okekhi abi o li ya fiagbe eke ghua. Ama abi e ro khe oli ramhi ni ea ro me khi emhikhoghuo e li oli, e mu udu pfi, ee khi olitsa o khi.

⁷ Epfe-aghon iPolibiosi ni o khi ogbon igomoti oyi oni eke ni okẹ oniemi o khi shi, o mholi apfe shi. O rue anye je apfe oyoli, o feli anye epfese egbegbon ogbele ese.

⁸ Ita iPolibiosi o yeshi i ghua, iba ali ukpokpomhi elemhi ofu e to oli. IPolu o lo elemhi owa ya so iromhi na li, o ri abon nga li egbe, o roli ze.

⁹ Abi a ro me ghon se, egbon elese ni e ghua ni e la oni eke ni okẹ oniemi o khishi e bhale, a rewe ze.

¹⁰ Eni egbon e lolo mu ekpe na anye, e somhi anye opfa. Abi anye ro ya lo oko-okẹ oniemi ke vu, e wolon itsua ododa ni e to anye na anye.

Rote ɛoli iMota je iRomu

11 Abi o rọ gbe iki eṣe dọṣe, anye lo ọkọ-okẹ oniēmhi ni o migha aghọ khẹ ni oruẹ o dọṣe. Ẹoli Alẹzadira oni ọkọ o te e bhale, isheli itsema iKa-sito ali iPolukisi a lu oni ọkọ.

12 Anye ramhi ɛoli iSir-akusi, anye la aghọ ẹlẹ eṣe.

13 Anye rọte aghọ kia okẹ-oniēmhi ramhi ɛoli iRegiumu. Ogbeakọlọ, akpekpeli o rọte ukiẹkiẹ ọgobọ ini a sọ alo ghue obini ovọ o te ẹ lo eko e pfiolo. Ogbeṣe onuzi-eva, anye lo ɛoli iPuteoli.

14 Anye ya ẹ eni e miesuọ ni ẹẹ anye nu wẹwẹ la aghọ elemhi ẹfo uka oghuo. Anye rọte aghọ vu, anye ramhi iRomu.

15 Igbaa oyi eni e mie iJesu iKirisiti suọ ni e la iRomu e she suọ khi anye ẹ bhale. Ighọ eni e miesuọ eghuo e bhale ya lu anye ode, e kia ramhi Oki Apiọsi ali Owa Eṣe ni a ku ẹ shi. Abi iPọlu ọ rọ mẹ wẹ, ọ tṣe Ẹshinegba uwegbe, o ri udu shi ọli ọ.

iPọlu ọ la elemhi iRomu tse abo

16 Abi anye rọ ramhi iRomu, a zẹ ni iPọlu lọlighuo ọ la owa ni o ghọle ọ, a zẹ ọkhọli-okhuẹ ọghuo ọ ri ukpẹloe ke khu ọli.

17 Abi o rọ gba ẹlẹ eṣe dọṣe, iPọlu ọ lu eni e ralo na ẹgbọ iJu shi ilona. Abi e rọ bhale shi oni ilona, ọọ wẹ, “Inyọghuo-mhẹ, mhi aa li ẹgbọ eyawa emhikhọghuo wẹkhi eri mhi gbe ushi ni eni e bia awa, e rọ nga awa obọ-a, ni e rọ

la iJerusalemu mu mhẹ, rue mhẹ na igomẹti iRomu.

18 Abi e rọ gue mhẹ ẹzọ egbe-a se, e nono abi wẹwẹ e liẹ rue mhẹ obọ-a, itobọ khi mhia lue, ni a ya gbe mhẹ-a shi.

19 Ama abi ẹgbọ iJu ẹa rọ lama shi ọ, lọli mhi rọ lema a tsua oni ẹzọ bhale odalo oyi iSiza. Ọa khi eri mhi mhue emini mhi bhale ya gue shi ẹgbọ eyemhẹ egbe.*

20 Onana o zẹ khi mhie a bhale ni awa ngme. Itobọ irudushi ni ẹgbọ iZireni e mhọli a rọ ri iwẹghẹ shi mhẹ awẹ ena.”

21 Ẹ ọli, “Anye a mẹ ebe okhọghuo ni a kẹkẹ ingme oye shi, rọte eke iJudia bhale, ghi anye, wẹkhi inyọghuo awa ni e rọte oobọ bhale e gue ingme oye okhọghuo ni ọa ti ye anye.

22 Ama anye ẹ nono ni anye suọ unu oye, itobọ khi ashakpa ẹgbọ e la ngme onobe shi oni otu onogbọ ona.”

23 Ighọ e shi ogbeṣe na iPọlu. Ebubu ẹgbọ e bhale asha ni iPọlu ọ la oni ogbeṣe. Rote ẹlẹ uzogbe ya ramhi ẹliyosẹ iPọlu ọ te gue ungmehi oyi Eghiele oyi Ẹshinegba ye wẹ. Ọ rọte ebe Ushi oyi iMosisi ali eyi Emekeguele rọli lo wẹ esọ ini e lama mie iJesu suọ.

24 Ingmehi ni ọ ngme e lo ẹgbọ eghuo esọ, ama ẹgbọ eghuo ẹa mie shi ọli ọ.

25 Ighọ e li nu egbe e khako, e vu, abi iPọlu ọ rọ ngme ungmehi ona ni o kpọli ukhokho unu se

* 28:19 Li zẹ Ika 25.11

ni ọọ, “Ayemhe-nọ-pfuase ọ
she kpẹ rọte unu oyi Azaya
ọmekeguele gueye eni e bia
awa:

26 “Lẹ deba ẹgbọ ena
ni u gueye wẹ,
“A ya ri esọ shi eke khue,
ama ọa ya tigbe lo ẹ esọ,
a fẹli ofẹli khue,
ama aa mẹ emhikhoghuo.”

27 Udu oyewẹ o bi obili-a,
esọ eyewẹ e zuse,
e gbo guese alo.

Ini ọa khi ighọ lọ,
e kha ri alo eyewẹ ke mẹ
eke,

e ri esọ eyewẹ ẹ suọ,
udu oyewẹ o kha mhọli
ilẹsingme,

e kha mu pfi bhale deba mhe,
mhi rewe ze.”†

28 “Irarighọ, mhia nono
ni a lẹsẹ khi imiepfuese oyi
Eshinegba khi a she rọli ghi
ẹgbọ iJeta. E ya ri esọ shi ọ!”

29 [Abi ọ rọ ngme oni ung-
memhi ona se, eni ẹgbọ iJu e
vu, e nu egbewẹ khakọ ni o
toto.]

30 Ikpe eva gbada iPọlu ọ
la owa ni lọlighuo ọ ngmomhi
shi. Aghọ ọ la a mu ẹgbọ ni e
bhale ya fẹli ọli epfese.

31 Igbe-udu ni ọ mhue ya,
ọ rọ ọ gue ungemhi Eghiele
oyi Eshinegba le, ọ gbolo sẹsẹ
ẹgbọ ingme eyi iJesu iKirisiti
Ọnọmhue, emhikhoghuo ọa zu
ọli ode.

† 28:27 Li zẹ Aza 6.9-10

Ebe ni iPọlu o keke ghi egbo iRoma Eni e miesuo

Otse oyi iPọlu

1 Mhemhe iPọlu, oni oọ ga oyi iJesu iKirisiti ni a lu mhi khi aghiusomhi na kee, ni a ze o le mhi ke tsabo usomhi onete oyi Eshinegba. Mhemhe mhi keke ebe ona.

2 Oni usomhi onete ona khi, oni Eshinegba o shobo shi eke, rote unu oyi emekeguele eyoli ni a keke shi Ebe-no-pfuase.

3 Oni usomhi onete o ya khi, ingme oyi omi oli ni o rote unuekpe oyi iDefidi lasese el-emhi idiegebe.

4 A rote ekpabo oyi Ayemhe-no-pfuase roli khase, ikhi iJesu iKirisiti Onomhue oyawa, khi, Omi Eshinegba o khi, abi o ro rote eghuli guise oli le.

5 Rote obọ oyi iKirisiti ali eva oyoli anye te mie afu ro khi ighiusomhi na kee eyoli, ni anye ro ri egbo iJeta nya bhale ya sueso na Eshinegba. Isueso ni o rote irudunga bhale.

6 Ee egbo iRomu a li la eni Eshinegba o lu, ni a li khi enayi iJesu iKirisiti.

7 Ee ni a la iRomu nya a keke ebe ona ghi. Ee ni Eshinegba o nono ingme oyewe ni o ze, ni a khi egbo eyoli.

Okhale ali opfomhe e ka khi eye e, rote obọ oyi Eshinegba

ita awa ali rote obọ oyi iJesu iKirisiti Onomhue.

8 Onodode, mhi ri eva oyi iJesu iKirisiti tse Eshinegba oyemhe uwegbe shi agbo oye e nya, irari khi a she la ashakpa elemhi eke agbo suo eko irudunga ni a mholi.

9 Eshinegba ni mhi ri udu oyemhe nya a ga, ni mhi a tse abo usomhi onete oyi omi oli, o khi otsele oyemhe, khi igesikia mhia ngme, khi egheghe kpa mhi ro o sa to e egbe ini mhia so iromhi.

10 Mhia lema Eshinegba o khueghie ode-a na mhe ni mhi me asha bhale ya me e ikpukhokho abi o ghole oli shi.

11 O ma ghole mhe gba ni mhi ro me e, ni mhi ri osese eyi ayemhe na e, ni o re e ya toto irudunga.

12 Emini mhi ri ona ngme khi ni a ro bhale ya e khi awa mhu e ikpaghiobo na egbe. Mhi kha zese e-a, ee a zese mhe-a.

13 Emole mhe, mhia nono ni a lese khi, ebubu egheghe mhi she gba li khi mhi bhale ya feli e, ni mhi gbo ri egbo bhale irudunga abi mhi kpe lie ri ele oli ifuabo egboese ni e khi iJeta, ama, ozuode o zu mhe ode.*

14 Egboli oyemhe o khi ni mhi ro tse abo ona ye egbo kpa, ghe egbo iGiriki ali eni ea khi iGiriki, ene fialo-a ali eni ea fialo-a, shi eni mholi egbhali ali eni ea mholi egbhali.

15 Igho, o gbo lie kphakpha mhe egbe ni mhi ro li gue

* 1:13 Li ze Ika 19.21

oni usomhi onete ye ɛ ni a la iRoma.

Ekpabɔ ni o la oni usomhi onete

16 Omama oni usomhi onete ɔa ya mu mhe, irari khi ɔli o khi ekpabɔ oyi Eshinegba ni a ro ɔ tsumhi ɔgbɔkpa ni ɔ miesuo, ɛgbɔ iju o kpe ramhi egbe, neni o tigbe ramhi ɛgbɔ ijeta egbe.†

17 Oni usomhi onete ona o guele abi Eshinegba ɔ lie mie ɔgbɔkpa ni ɔ mhɔli irudunga. Ezeze abi Ebe-no-pfuase ɔ ngme khi, "Oni Eshinegba ɔ ri irari irudunga oyɔli pfa na, ɔ ya la agbo."‡

Elemhi ibibi oyi Eshinegba

18 Idane elemhi ibibi oyi Eshinegba o te ɛ tiemhile shi ɛgbɔ ni ɛa miesuo ali ena ɔkhɔlo nya ɔ, ni e ri ɔkhɔlo oyewe ɛ khukhu ɛgbɔ alo ini e khi lese igesikia oyi Eshinegba.

19 Aborokhia khi e lese emini a dobe a lese ingme oyi Eshinegba, itobo khi ɔ khueghie ɔli-a khasewe gboo.

20 Irari khi rote igbaekele agbo a te me ekpabɔ ali ufumhi ali abi Eshinegba ɔ li gboo. Emini ɔ ma nya o ri awa mhɔli ilese abi ɔ li. Onana o ze khi ɛgbɔ ɛa mhue emini e ya lie khi o ze ni wewe ɛa ro miesuo.

21 E lese Eshinegba, ama ɛa kueghie ɔli abi Eshinegba, wekhi eri e kphemhi ɔli. Ochoghɔ, isamhi afue ɛ ɛ sa, igho udu ɔoyeghe oyewe o bishi-a.§

22 E khi, eni e fialo-a wewe e khi, ama e mele eyeghe-a.

23 E ya oghie ufumhi ni a ro na Eshinegba ni ɔ la agboagbo na ikhumhi ni a mama ro khokho ɔgbɔ ni ɔo ghu ali ipfeli ali elamhako ali emini ɛ ɛ ti akpidi eke.*

24 Irarigho, Eshinegba ɔ ro rue we obɔ-a na oghuemhe olamhe oyi udu eyewe ali itsebo ni e nu egbewe ɛ li.

25 E ri ɛgbhɔli oghie igesikia oyi Eshinegba. Ee ga emini a ma, ocho ni e kha ro ke ga Ima, oni ɔ khi oni a kueghie ya ramhi ele ni agboagbo. Atse.

26 Itobo ona, Eshinegba ɔ ro rue we obɔ-a na oghuemhe omama. Egbegbi ikpotso eyewe, e nu egbe we ɛ gbhe.

27 Igho li khi eni emose, ocho ni e kha ro le ke deba ikpotso, emose na abi wewe ɛ ɛ ghɔle we inu-gbhe. Emose ɛ gbe ikanya omama ke deba emose, irarigho, e she mie ifata ikanya ebe eyewe.

28 Irari khi ɛa lama ri egbegbi ilese oyi Eshinegba ni e mhue shi udu, Eshinegba ɔ ro ze we obɔ na isamhi ebe udu oyewe ni e ke riɛle emini ɛa kha riɛle.

29 Okhɔlo khi ɔkhɔlo nya o kesewe-a, ghe ingmobe, ghe emhi ito-egbe, ghe ubogbo. Ofuma ikpekpe o vo we egbe, ghe ugbeli, ghe okhɔli, ghe ikpamhika, ghe obe-imumu. Eni ɛ tsue ɛgbɔ kiakia e khi.

30 E ri unu ɛ yese ɔgbɔ-a, ɛ ɛ biselemhi Eshinegba, ezunu-

† 1:16 Li ze iMak 8.38 ‡ 1:17 Li ze Abak 2.4 § 1:21 Li ze Efi 4.17-18 * 1:23 Li ze iDeut 4.16-18

obe, ni ẹa mhuẹ ekpe, ni ẹẹ tonon obọ udu. Ode ebe ni a ro li okholo enegbo, ẹẹ sa ro lasela eghẹghẹ kpa. Ẹa ya suo esọ na itawẹ.

³¹ Ẹa mhuẹ ilẹsingme, ẹa ri ishobọ oyewẹ a gbe akanya, ẹa ya ti elemhi oḡbọ wẹkhi eri e mhuẹ ilẹlemhi na oḡbọ.

³² E lẹsẹ khi ushi oyi Ẹshinẹgba, oḡ khi, ẹḡbọ ni e li na ngeli, eni e ya pfua e khi, oḡa khi eri e lẹsẹ ẹ riẹlẹ emhi eghoḡho tse, ama ẹẹ mie obọ shi eni ẹ gbe ikanya eghoḡho o.

2

Iḡeḡo oyi Ẹshinẹgba

¹ Yeye ni u wa gue ẹḡboḡese ẹzo, waa mholi obini u pfue o ya je, irari khi eghẹghẹ kpa ni u ro gue oḡboḡese ẹzo ne, egbe ẹ wa gue ẹzo, itobọ khi yeye oye u lili ẹ riẹlẹ eni emhi.*

² Awa lẹsẹ khi ẹzo ni Ẹshinẹgba o gue ẹḡbọ ni ẹẹ riẹlẹ emhi eghoḡho, khi iḡesikia o deba gue oḡi.

³ Eri u dabi khi ini yeye oḡbo afuafuafue u gue ẹḡboḡese ẹzo, khi yeye u li riẹlẹ oni emhi oghoḡho, khi u ya pfue ẹzo oyi Ẹshinẹgba?

⁴ Abi khi eri u ri ẹloe ẹ gbe isomhelemhi ali iregbemie ali irabomudu eniemhi eyoli, nu waa lẹsẹ khi isomhelemhi oyi Ẹshinẹgba o re ramhi imupfi?

⁵ Ama irari igbiti ali udu ni oḡa mhuẹ imupfi ni a mhuẹ, a ro khi ma ofu oyi Ẹshinẹgba, ni o ro ya na ẹ osoli, eghẹghẹ ni

igwezo oyoli ni oḡa mhuẹ azẹba o ro ya feli lasela.

⁶ Ẹshinẹgba, “O ya fali oḡboḡbo ota abi o li gbe.”†

⁷ O ya ri agbo na agboagbo na ẹḡbọ ni e mhuẹ irabomudu ẹ riẹlẹ onete, ni ẹẹ nono ufumhi ali agbo ni oḡa mhuẹ ukpesẹ.

⁸ Ama ẹḡbọ ni ẹẹ na shi oyewẹ tse, ni ẹa ri esọ shi iḡesikia ni o la unḡmemhi oyi Ẹshinẹgba, ni e deba onobe vu, Ẹshinẹgba o ya tiese ofu ali elemhi ibibi oyoli le shi we o.

⁹ Ẹḡbọ eni ẹẹ riẹlẹ onobe nya e ya me osoli ali oya. Okekhi ẹḡbọ iJu, okekhi ẹḡbọ iJeta.

¹⁰ Ama Ẹshinẹgba o ya ri ufumhi ali itinga ali opfomhe na ẹḡbọ nya ni ẹ riẹlẹ onete. Okekhi ẹḡbọ iJu, okekhi ẹḡbọ iJeta

¹¹ Irari khi Ẹshinẹgba oḡa ya zoḡo oḡboḡkḡoghuo.‡

¹² Ẹḡboḡkpa ni e lamhe olamhe ni ẹa me ebe ushi deba, oḡbọ oḡa roḡe ebe ushi ya gue we ẹzo, ama ẹḡboḡkpa ni e mhuẹ ushi deba ni e lamhe olamhe, a ya roḡe ushi gue we ẹzo.

¹³ Irari khi oḡa khi ẹḡbọ ni e suo abi ushi o ngme tse Ẹshinẹgba o ya lie khi e pfuase, ama eni e suo abi ushi o ngme ni e roḡi ẹ gbe akanya, Ẹshinẹgba o ya pfa na khi e pfuase.

¹⁴ Eghẹghẹ kpa ni ẹḡbọ iJeta, ni ẹa mholi ushi, e ro roḡe angeli oyewẹ ri ushi gbe akanya ne, eri e roḡhasẹ khi e lẹsẹ

* **2:1** Li ze iMat 7.1; iLuk 6.37 † **2:6** Li ze Iwolo 62.12; Ekpi 24.12 ‡ **2:11** Li ze iDeut 10.17

emini ọa ti ali emini o ti ni a riẹlẹ, ini ẹa ririẹ mhue ushi.

¹⁵ Eri angeli oyewe o rokhase khi emini ushi ọọ a ke riẹlẹ, khi e keke ọli shi udu, udu oyewe o pfi otsele shi o, isamhi eyewe ni e gue we ezọ isheghuo, e gbo khe we shi eke.

¹⁶ Igho o ya li ogbele ni Eshinegba o ya rote obọ oyi iJesu iKirisiti gue we ezọ ri osheli oyewe lasela abi mhi li ri usomhi onete tse abọ.

Egbo iJu ali ushi

¹⁷ Ini a lu egbe e egbo iJu, a ri egbe da ushi ri Eshinegba a tono obọ udu,

¹⁸ Ini a ze Ebe-no-pfuase lese oghuemhe oyi Eshinegba, ni a gbo lese emini o gbe akanya,

¹⁹ ini a lese khi ee a khi eni ee sese ezalo ode, ni a ro gbo khi akpa na egbo ni e la alo ebili,

²⁰ a ye egbo ni e khi eyeghe ude, a sese eni ea lese. A mholi ọli shi udu khi ilese ali igesikia o gba pfo shi elemhi ushi.

²¹ Ee ni a sese egboese, elo o ze khi aa ya sese egbe e? Ee ni a lie ogbo o khi do ughiatọ, aa lie do?

²² Ee ni a lie ogbo o khi kia okia, aa lie kia okia? Ee ni ikhumhi igaga ọọ kpare, aa lie do ughiatọ elemhi Owa oyi Eshinegba?

²³ Ee ni a tono obọ udu khi a mhue ishi eyi Eshinegba, aa ri omama mu Eshinegba abi a lie gbe eni ishi-a?

²⁴ Ebe-no-pfuase ọọ khi: "Irari ee ni a khi egbo iJu egbo iJeta e ro o ze emuebe na eva oyi Eshinegba."§

²⁵ Ini a ri ishi a gbe ikanya, oshelẹ oye e o ro mu eloe, ama ini a gbe ushi-a, eri a li abine khi aa shelẹ-a.

²⁶ Ini ogbo ni ọa khi iJu ni ogbo aa shelẹ-a o ri ushi oyi Eshinegba gbe akanya, Eshinegba ọa ya leli ọli shi oni aa shelẹ-a?

²⁷ Itobọ igho, egbo iJeta e ya pfa ezọ mu e iJu itobọ khi a gbe ushi-a, aboriekhia khi a keke oni ushi shi ebe na e ni a gbo shelẹ-a, ama wewe e ri ushi e gbe akanya ini aa ririẹ shelẹ we-a.

²⁸ Ọa khi itobọ khi ogbo ọọ ngeli abi ogbo iJu ali itobọ khi a da shelẹ ọli-a o ro khi egbegbi iJu.

²⁹ Ama oni o khi egbegbi iJu o khi oni o ri ushi e gbe akanya, Oshelẹ na ekelemhi udu o khi igesikia oyi oshelẹ, ọa khi ona ekuẹ idiegbe oye. Ogbo oghogho Eshinegba ọọ kuẹghie ọli, aa khi egbo ee kuẹghie ọli.*

3

¹ Ighe eleli ni egbo iJu, ikhi eni a lu eni a shelẹ-a, e mholi dose egbo iJeta? Ighe eleli ni o la o na egbo ni e lu egbewe eni a shelẹ-a?

² Eleli o la o na ogbogbo ode khi ode. Odode, egbo iJu Eshinegba o kpe ri oni ungmemhi nga obọ.

§ 2:24 Li ze Aza 52.5 * 2:29 Li ze iDeut 30.6

3 Ini o fe khia khi eghuo o eamhue irudunga? Eri umha mhue irudunga oyewe o ya lie khi Eshinegba oake zeri egbe engang?

4 Iiye e! Ini ogbokpa o tseku khi oloegbhue, igesikia Eshinegba o khi. Abi Ebe-nopfuase o ngme, ni oo.*

"A mema me khi yeye u te ode ini u ngme, ali khi u ya mu o le ini a gue e ezoo."

5 Ama ini umha gue e ngeli oyawa o ri ipfuase oyi Eshinegba khase gboo, see awa ke fe ya ngme? Eri awa ya lie khi Eshinegba o gbe awa azeba ini o na awa osoli to onobe ni awa li? Eri mhi la ana ngme abi ogbo o lie ngme.

6 Emini a so shi ona khi, Iiye o, ini o khia khi Eshinegba oo gbe azeba lo, se o kha li dobe gue agbo ezoo?

7 Egbog eghuo e ya ke khako, ee li, "Ini o khia khi egbholi ni mhi lo o ri izeri-egbenga oyi Eshinegba khase, ni o khi ma ufumhi oyoli, se a ke gbo lie pfa ezoo mu mhe abi ogbo ona olamhe?"

8 Elo o ke zeri ni awa a ro lie khi o tine ni awa ke li ingmobe ni onete o rote o lasele? A ya gue ogbogbo eni e ngme na ezoo. Ezeze abi egbo eghuo e she kpe li kieno egbholi ma mhe khi emini mhia sese egbo ghoo.

Aa me oni o gue e ngeli

9 Ini a fe bino o bie, eri awa iju awa fe ti dose ijeta? Iiye

o! Mhi she kpe roli khase khi egbo iju ali egbo ijeta nya elemhi olamhe awa la a kia.

10 Abi Ebe-nopfuase o ngme ni oo:

"Ogbokhoghuo oala o ni o gue e ngeli, ogbo aa me,

11 Aa me oni o mhue ilese, wekhi eri ogbokhoghuo oo ga Eshinegba.

12 Egbog nya e she so ukhokho gbe Eshinegba.

Weewe nya e she rote ode oboese ni oati.

Ogbokhoghuo oala ni oo riele onete,

ogbo aa me oghuo kpe!"†

13 "Eri ukokoluulo oyewe o li abi uji ni o khueghie-a shi eke.

Eri elemhi oyewe

O ri udimhi e pfi itsee."‡

"Osue enye afue o la we unu."

14 "Inu eyewe o vo

itse ebe ikuku ali oyala."§

15 "Oa ya mu we unu ni e ro gbe ugbeli,

16 epfua ali oyese ee pfi shi obini e je kpa,

17 Ea lese abi a lie la opfomhe."*

18 "Wekhi eri e mholi ekpe na Eshinegba."†

19 Mena, awa lese khi emini a keke shi ushi nya, khi eni e deba ushi e ngeli a keke oli na. Ni a ro bhale ya e khi ogbo okhoghuo oala ya lie khi emini o zeri ni lue ro gbe ushi-a na, ini Eshinegba o gue agbo nya ezoo.

20 Ogbog oala o ni a ya pfa na khi o pfuase irari khi o ri ushi

* 3:4 Li ze Iwolo 51.4 † 3:12 Li ze Iwolo 14.1-3; 53.1-3 ‡ 3:13 Li ze Iwolo 5.9; 140.3 § 3:14 Li ze Iwolo 10.7 * 3:17 Li ze Aza 59.7-8 † 3:18 Li ze Iwolo 36.1

ẹ gbe akanya. Ochoghọ eri ushi o zẹ awa lẹsẹ khi olamhẹ o la ọ.‡

Igue-ngeli ni o rọte irudunga bhale

21 Ama Ẹshinẹgba ọ she ri ode onogbo ni ọ te pfa na awa khasẹ awa ni ọa khi abi ushi o sesẹ awa. Ni ebe Ushi ali emekeguele e pfi otsẹlẹ shi.

22 Oni ode onogbo ona ni Ẹshinẹgba ọ rọ bhale, irudunga iJesu iKirisiti o te ẹ bhale deba eni e mie ọli suo nya. Ikhioda ọa la ọ na eni e khi iJu ali iGiriki. §

23 Irari khi ogbokpa ọ she lamhẹ, ẹgbọ e she nuata shi Ẹshinẹgba ni ọọ tsumhi ọ.

24 Ama afue afue ọ ri okhale oyoli pfa na awa khi awa pfuase, rọte ipfasheke ni o te obọ oyi iJesu iKirisiti bhale.

25-26 Eri Ẹshinẹgba ọ ri iKirisiti khasẹ agbo nya, khi loli ọ khi oni ọ dobe ya ri olamhẹ topfa agbo, abi ọ li ku ọlia eyoli kua ukhomhi apfida. Awa kha regbenga emini iKirisiti ọ rieḽe, awa mhọli ipfasheke ni o rọ rọkhasẹ khi Ẹshinẹgba ọa ya gbe azẹba. Itobọ khi Ẹshinẹgba ọ mhọli irabomudu ali khi ọa ya gbe azẹba, ọ rọọ gbe olamhẹ kua na ẹgbọ, ọ guele khi ogbokpa ni ọ ri udu nga iJesu, khi oni a pfa na ọ khi.

27 Elo awa ke tono obọ udu ẹ shi? Afue! Elo o zẹ ona? Itobọ khi awa ma rọ ri ushi a gbe lọ? Iiye o, ama itobọ khi awa miesuo.

28 Irari khi awa zoli ukhomhi khi eri Ẹshinẹgba ọọ pfa na ẹgbọ ni e mhue irudunga ni ọa khi irari iri-ushi-gbe akanya.

29 Ẹshinẹgba oyi ẹgbọ iJu tse ọ lẹsẹ khi, ọa ke li khi Ẹshinẹgba oyi ẹgbọ iJeta? Oyewe ọ khi gueguegue.

30 Ẹshinẹgba oghuo ọ khi, oni ọọ pfa na ẹgbọ eni e shẹlẹ-a rọte irudunga oyewe ali eni áá shẹlẹ-a rọte oni irudunga oghuo.*

31 Eri ona o ke lie khi itobọ irudunga oyawa, khi awa a ke mhue emini awa ri ushi ẹ li? Iiye e. Ochoghọ awa kie mu ushi mhue.

4

Irudunga o ri Aburaamu migha shi ipfuase

1 Sẹ awa ke ya ngme shi ingme oyi Aburaamu ni ọ khi ititawa? Elo ọ fe me eni ingme ipfana rọte irudunga onana?

2 Ini o khia khi ikanya ni Aburaamu ọ gbe a rọ pfa na li lọ, ọ kha me emhi rọ ke tono obọ udu, ama ọa khi odalo oyi Ẹshinẹgba.

3 Eri Ebe-no-pfuase ọọ, “Eri Aburaamu ọ mie Ẹshinẹgba suo, loli a rọ leli ọli na li shi ipfuase.”*

4 Ini ogbọ gbe akanya, ogbọ ọa ya lie khi ifata ni ọ mie khi isomhopfa lọ, ama eri ọ gbe akanya shi ọ.

5 Ama ogbọ ni ọa ri egbe da ikanya obọ oyoli ni ọ gbe, ni ọ

‡ 3:20 Li zẹ Iwolo 143.2; iGal 2.16 § 3:22 Li zẹ iGal 2.16 * 3:30 Li zẹ iDeut 6.4; iGal 3.20 * 4:3 Li zẹ Igbae 15.6; iGal 3.6

regbenga Eshinegba ni oṣ pfa na ọna ọkhọlọ, oni irudunga ni ọ mhọli eghọ a deba guele khi ọ pfuase.

6 Abi iDefidi ọ rọ ngme nga ikhivose oyi ọni Eshinegba ọ pfa na, ni ọa khi itobọ ikanya obọ oyi lẹlighuo, ọ mu ma ingme ena, abi ọ reṣe,

7 “Oghẹlẹ o khi na eḡbọ ni Ọnọmhuẹ ọ gbe umha guẹli oyẹwẹ kua, ni a ri olamhẹ oyẹwẹ topfa wẹ.

8 Oghẹlẹ o khi na oḡbọ ni Ọnọmhuẹ ọa kẹkẹ olamhẹ eyọli shi na li.”†

9 Oni ikhivose ona, eḡbọ ni a shẹlẹ-a e lẹṣe mhọli ọli? Abi khi eḡbọ ni aa shẹlẹ-a e li mhọli ọli? Awa kie kpe ẹ ngme ọli khi irudunga ni Aburaamu ọ mhuẹ, lẹli a rọ guele khi ọ pfuase.

10 Eḡheḡhe onoghuo a rọ leli ọli na li? Abi a rọ shẹlẹ ọli-a se lọ, abi khi neni a shẹlẹ ọli-a? Ọa khi abi a rọ shẹlẹ ọli-a se, ama abi aa rọ shẹlẹ ọli-a ne lọ.

11 Itobọ khi ọ mhọli irudunga, Eshinegba ọ rọ pfa na li khi ọ mhọli ipfuase neni ọ shẹlẹ-a. Irarighọ, ọ rọ khi ita oyi eḡbọ nya ni e miesuo, ini aa tseku shẹlẹ wẹ-a. Eḡheḡhe aghọ ni e khi eni a pfa na khi e pfuase.‡

12 Ita oyi eḡbọ eni e shẹlẹ-a ọ li khi. Aa khi itobọ khi a shẹlẹ wẹ-a tṣe, ama irari khi e deba ẹtẹ-awẹ agbọ irudunga nabi itawa Aburaamu, neni a shẹlẹ ọli-a.

Irudunga a te a mie ishobọ eyi Eshinegba

13 Ọa khi iri ushi gbe akanya Aburaamu ali imimi ọli e te mie oni ishobọ khi lẹli ọ ya le ugu agbọ nya, ama rọte angeli ipfuase ni o rọte irudunga bhale oyọli lọ.§

14 Irari khi ini eni e ri ushi gbe akanya e le oni ugu lọ, irudunga ọa kha ke mu ẹloe, oni ishobọ o mele afue-a.*

15 Eri ushi o ri ofu oyi Eshinegba bhale, irari khi ini ushi ọa la ọ, igbushi-a ọa kha la ọ.

16 Irarighọ, oni ishobọ, irudunga o te ẹ bhale, isheghọ ni o khi oyi okhale, ali ni o migha na imimi Aburaamu. Ọa khi oyi eḡbọ ni e ri ushi ẹ gbe akanya tṣe, ama li shi oyi eni e miesuo abi Aburaamu. Irari khi Aburaamu ọ khi ita awa nya elemhi ayemhẹ.†

17 Abi Ebe-no-pfuase o ngme ni ọṣ, “Mhi she re mele ita oyi ushishi ebubu-a.” Irudunga ni Aburaamu ọ mhuẹ Eshinegba ọ rọ shobọ na li. Eshinegba ni ọṣ ri eni e ghu-a guale bhale agbọ, ni ọ ma emhi enegbọ.‡

18 Eri Aburaamu ọ miesuo, ọ mhuẹ irudushi, abi ọa rọ tseku mẹ emini ọ ri udu shi ne, itobọ ighọ ọ rọ khi, “Ita ishishi ebubu.” Abi a kie kpe li gue ọli ye ọli khi, “Imimiẹ e ya bu abi ikpẹtata.”§

19 Ọa tigbe lẹṣe Aburaamu shi irudunga oyọli, aboriẹkhia

† 4:8 Li zẹ Iwolo 32.2 ‡ 4:11 Li zẹ Igbae 17.10 § 4:13 Li zẹ Igbae 17.4-6; 22.17-18; iGal 3.29 * 4:14 Li zẹ iGal 3.18 † 4:16 Li zẹ iGal 3.7 ‡ 4:17 Li zẹ Igbae 17.5 § 4:18 Li zẹ Igbae 15.5

khi ọ she gbe ikpe egbhueshe, ni ọ gbo leşe khi lọli she womhe ramhi eghuli ali khi iSera ughuọli ọ she li womhe doşe ni ọ ke dobe ya bia eniye.*

²⁰ Irudunga oyọli ọa mhue ọlosemhe wekhi eri ọ khokho udu shi emini Eshinegba ọ ngme. Oni irudunga oyọli o ri itoto na li, ọ kueghie Eshinegba.

²¹ Eri ọ lama shi ọ egbegbo khi Eshinegba ọ ya dobe riele emini ọ shobo na lue.

²² Lọli o ze khi, “A pfa na li khi ọ pfuase.”

²³ Ungmemhi khi, “A leli ọli na li shi angeli ipfuase,” ọa khi lolighuo tse a keke ọli na.

²⁴ Ama a li keke ọli na awa, eni Eshinegba ọ lie leli angeli ipfuase na, ni awa mie ọli suo ikhi lọli ni ọ rote eghuli guise iJesu Onomhue oyawa le.

²⁵ Eri Eshinegba ọ rue ọli obọ-a ni ọ ghu-a shi ingmobe eyawa. O guise ọli le bhale agbo ni ọ khuşe awa pfuase.†

5

Opfomhe ali Oghelẹ

¹ Irarigho, aborokhia khi a she pfa na awa egho khi awa pfuase rote irudunga oyawa, awa she mhue opfomhe odalo oyi Eshinegba rote obọ oyi iJesu iKirisiti Onomhue oyawa.

² Lọli awa rote obọ oyọli mhọli ode lo isomhelemhi oyi Eshinegba, te irudunga ni awa migha nga memena. Awa ke

ghelẹ shi irudushi oyi ufumhi oyi Eshinegba.

³ Ọa khi igho tse, ama awa lie ghelẹ shi osoli oyawa, irari khi awa leşe khi eri osoli ọo seşe ogbo iregbemie.

⁴ Iregbemie o ri ogbo ọ mhue egbegbi angeli, egbegbi angeli o ri ogbo ọ mhue irudushi.

⁵ Oni irudushi ona, ọa ya ze awa me omama. Irari khi Eshinegba ọ she tutu inono oyọli ku awa udu rote Ayemhe-no-pfuase, ni ọ ro na awa.

⁶ Irari khi eghẹghẹ ni awa aa ro mhọli ekpabo ni awa ro khi ena olamhe, iKirisiti ọ bhale ya ghu-a na awa.

⁷ O ma munu ni ogbo ọ ro ghu-a na ogbo ni ọ gue ẹ ngeli, otse ogbo ọ ya roshẹka ni lue ghu-a na ogbo onete.

⁸ Ama eri Eshinegba ọ ri inono ni ọ mhọli na awa kase. Lọli o ze khi eghẹghẹ ni awa ro kie khi ena olamhe, iKirisiti ọ ro bhale ya ghu-a na awa.

⁹ Aborokhia khi a she rote ọlia eyọli pfa na awa mena, seşe ọa lie tsumhi awa ofu oyi Eshinegba!

¹⁰ Irari khi ini eghẹghẹ ni awa ro khi ebe Eshinegba khi a rote eghuli ni omiọli ọ ghu ri awa nu ọli mhue irọ-riele, seşe awa ni a she ro nu Eshinegba somhi awa aa li gbo ya rote agbo oyọli mhue imiepfuese!

¹¹ Ọa khi igho tse, ama awa li mhọli oghelẹ ayi Eshinegba rote iJesu iKirisiti Onomhue oyawa, ọni awa rote obọ oyọli mhue irọsomhi.

* 4:19 Li ze Igbae 17.17 † 4:25 Li ze Aza 53.4-5

Adamu o ri eghuli bhale, iKirisiti o ri agbo bhale

¹² Olamhe ni Adamu o lamhe o ri eghuli lo agbo le. Olamhe oyoli o ze khi ogbokpa o khi ona olamhe, irarigho ogbokpa o ro ya ghua.*

¹³ Irari khi neni a ri ushi bhale olamhe, o she kpe lo agbo le, ama ashini ushi o la, aa ya leli olamhe na ogbokhoghuo.

¹⁴ Aboriekhi igho, eri eghuli o kie rote eghenge oyi Adamu gbe egbo ya ramhi eghenge oyi iMosisi, li shi egbo ni ea gbe ushi-a abi Adamu o li da omhese oyi Eshinegba. Adamu o khi irokhokho oyi oni o ya bhale.

¹⁵ Ama wewe aava ea li abeghuo irari khi isomhopfa onayi Eshinegba o la abi olamhe oyi Adamu. Igesikia o khi, khi ebubu egbo e ghua irari olamhe oyi ogboghuo ogho. Ama okhale oyi Eshinegba o fune. Igho khi isomhopfa ni o ro na ebubu egbo rote isomhelemhi oyi ogbo oghuo, ikhi iJesu iKirisiti.

¹⁶ Ikhioda o la isomhopfa oyi Eshinegba ali olamhe oyi Adamu. Oni olamhe oghuo ogho o ri ina-osoli bhale. Ama isomhopfa oyi Eshinegba o ri ipfana bhale ghi awa aboriekhia khi eni e lamhe awa khi.

¹⁷ Igesikia o khi, khi rote olamhe oyi ogbo oghuo, eghuli o te bhale agbo. Ama emini ogbo oghuo o riele, ikhi iJesu iKirisiti, o fune. Egbo nya ni e mie okhale oniemhi

ali isomhopfa afue afue oyi ipfuase oyi Eshinegba, e ya mu olamhe o le, rote obo oyi iKirisiti.

¹⁸ Abi olamhe oyi Adamu o li ri ina-osoli ghi ogbokpa, igho ipfuase oghuo oyi iKirisiti o li ri ipfana ali isomhopfa agbo oyi Eshinegba na ogbokpa.

¹⁹ Irari khi, abi umha-sueso oyi ogbo oghuo o ri egbo nya khi ena olamhe, igho a li ya pfa na ebubu egbo shi ode oyi Eshinegba irari isueso oyi ogbo oghuo.

²⁰ Eri ushi o bhale ni egbo lese ashini e khi ena olamhe ramhi, ama abibi olamhe e tseku li bu, ilelemhi oyi Eshinegba o bu dose we.

²¹ Eghenge agho ni a bhale ya e khi ezeze abi olamhe o ri eghuli bhale, okhale oyi Eshinegba o ri ipfuase leghie, o ri agbo na agbo agbo bhale, rote obo oyi iJesu iKirisiti Onomhue oyawa.

6

Ghu pfa Olamhe, u nu iKirisiti la agbo

¹ Se awa ya ngme mena, eri awa ya ke li ingmobe le tse ni okhale oyi Eshinegba o ke bua shi o dose agho?

² Iiye o! Awa ni idiegbe oyawa o ghu pfa olamhe, see awa ke gbo lie ke lamhe?

³ Abi khi aa lese khi awa nya ni a batazi shi iJesu iKirisiti, khi eri awa batazi shi eghuli oyoli?

⁴ Irarigho, eri a ri awa nu oli to abi a ro so awa oke batazi awa shi eghuli oyoli,

* 5:12 Li ze Igbae 3.6

ni a bhale ya ẹ khi abi a li rọte eghuli guise iKirisiti le rọte ufumhi oyi Ita, ni awa li mhọli agbọ onogbọ.*

⁵ Abi a rọ ku awa ali lọli gbe she eghuli oyọli eghọ, ighọ a gbo liẹ ku awa ali lọli gbe shi iguisele oyọli.

⁶ Awa lẹsẹ ona khi idiegbe oyawa onodiọ khi eri o nu iJesu ghu-a shi apfida, ni a rọ bhale ya ẹ khi idiegbe olamhẹ oyawa o mele afuẹ-a. Ini awa khi ke gbo khi ighumha olamhẹ.

⁷ Itobọ khi ini ọgbọ ọ ghu-a, ọ she pfue ekpabọ olamhẹ.

⁸ Mena, ini awa she nu iKirisiti ghua, awa miesuọ khi awa ya li nu ọli la agbọ.

⁹ Irari khi awa lẹsẹ khi abi a she rọte eghuli guise iKirisiti le eghọ, ọa ke gbo ya ghu ghue, eghuli ọa ke gbo mhọli ekpabọ shi ọli egbe.

¹⁰ Eghuli ni ọ ghu, uto-ghuokpe ọ ghu ọli rọ mu ekpabọ eyi olamhẹ ọ le. Agbọ ni ọ la, ọ la ọ na Ẹshinẹgba.

¹¹ A li lighọ leli egbe ẹ shi eni e ghu pfa olamhẹ, ama a la agbọ na Ẹshinẹgba elemhi iJesu iKirisiti.

¹² Irarighọ, a khi zẹ ni olamhẹ o le eghie shi ẹ egbe ni a ri ọghuẹmhẹ ebe eyọli ke gbe akanya.

¹³ A khi ri ukiẹkiẹ idiegbe okhọghuo oyẹẹ na olamhẹ, wẹkhi eri u rẹ wẹ shi ekẹ shi akanya ọkhọlọ, ochoghọ, a ri egbe ẹ na Ẹshinẹgba abi eni a she rọte eghuli nyenẹ bhale agbọ, ama a ri idiegbe oyẹẹ

na li abi itsua ipfuase.

¹⁴ Irari khi olamhẹ ọa ke ya khi ọga oyẹẹ, itobọ khi ushi ọa kẹ ẹ ke mhẹsẹ na ẹ, ama elemhi okhale oyi Ẹshinẹgba a ke la.

Ighumha eyi angeli ipfuase a ke khi

¹⁵ Sẹ o ke li mena? Awa ke lamhẹ itobọ khi ushi ọa ke mhẹsẹ ẹ na awa, sẹ ni okhale oyi Ẹshinẹgba? Iiye o!

¹⁶ Aa lẹsẹ khi oghumha oyi emini a suọ esọ ọ na a khi? U dobẹ ya khi oghumha oyi olamhẹ ni o ri eghuli ẹ bhale, u gbo dobẹ ẹ zẹ isuesọ na Ẹshinẹgba ni o ri ọgbọ ọ bhale angeli ipfuase.

¹⁷ Ama awa tse Ẹshinẹgba uwegbe, irari khi eghẹghẹ ni o doşẹ, a kpe khi ighumha eyi olamhẹ, eghẹghẹ aghọ a ga ri udu oyẹ ẹ nya a suọ esọ na osesẹ ni a sesẹ ẹ.

¹⁸ A she pfuese ẹ olamhẹ, ama ighumha eyi Ẹshinẹgba a ke khi, ni a ke rieleş emini o ghọle Ẹshinẹgba.

¹⁹ Eri mhi ngme ona abi ọgbọ liẹ ngme, itobọ khi aa lolo toto. Abi a kpe li ri idiegbe eyẹ ẹ shi ighumha na ikanya ichimhi ali ọkhọlọ, a li lighọ ri egbe ẹ shi ighumha angeli ni o ghọle Ẹshinẹgba, ni o ri ipfuase ẹ bhale.

²⁰ Abi a rọ khi ighumha olamhẹ, aa mhue emini a ri angeli ni o ghọle Ẹshinẹgba rieleş.

²¹ Ighe eleli ni a mhue oni eghẹghẹ shi ikanya ni e ke tigbe ri omama a mu ẹ ena? Emhi eghọghọ eghuli ẹẹ pfi.

* 6:4 Li zẹ iKolo 2.12

22 Ama mena ni a she rōte olamhẹ pfuese ẹ, ni a ke rọ khi ighumha eyi Eshinegba egho, eleli ni a khişẹ, ipfuase o rẹ ẹ ya khuẹ pfuase, o ri agbọ na agbọagbọ o na ẹ.

23 Irari khi ifata oyi olamhẹ khi eghuli lo, ama isomhopfa oyi Eshinegba agbọ na agbọagbọ lo rōte obọ oyi iJesu iKirisiti Onomhue oyawa.

7

Abi a liẹ ngeli elemhi ughue

1 A leşẹ inyoghuo, khi eri mhi nu ẹ ngme abi ẹgbọ ni e leşẹ ushi, khi ushi o mhọli ekpabọ shi ogbọ egbe ini oni ogbọ o kie da la agbọ ne.

2 Ezeze abi ushi o ngme khi okpotso ni o la ughue o gbudu vu odọ li obọ ini oni omose o kie da la agbọ ne, ama khi ini o ghu-a oni ushi o ke mu o li.

3 Irarigho, ini o vu ya ngeli na omose olese, abi odoli o li kie la agbọ egho, a ya lu o li okiokia. Ama ini odọ li o ghua, oni ushi ogho o ke mu o li, o ke khi okiokia, ini o tseku ngeli na omose olese.

4 Igho o li khi shi ẹ o inyoghuo-mhe. Idiegbe oyi iKirisiti a ke khi, ẹẹ a she li ghu-a pfa ekpabọ oyi ushi. A she ga li mhọli eghẹghẹ ni a rọ mele oyi ogbọese-a, ikhi oni a rōte eghuli guise le, ni a me asha ke gbe akanya enete na Eshinegba.

5 Irari khi abi idiegbe olamhẹ o rọ o mhesẹ na awa,

igho oghuẹmhe oyi olamhẹ ni ushi o zese-a o la awa idiegbe gbe akanya, ena e ri awa ngeli angeli ni o o pfi eghuli.

6 Ama mena, abi awa rọ she ghu pfa emini e ke kpe genọ awa egho, a she pfuese awa obọ oyi ushi, ni awa me asha rōte ode onogbọ oyi Ayemhe ke ga, ni o ke ke khi ode oyi ushi ni a keke.

Inu-olamhẹ khe abo

7 Se awa ke ya ngme mena? Olamhẹ oni ushi o ke khi sho? Iiye o. Egbegbo lo khi, mhi aa kha leşẹ emini olamhẹ o khi, ini o ke khi ushi lo. Irari khi mhi aa kha leşẹ emini ivie shi emhi ogbọ o khi ini ushi o ke liẹ, "Khi vie shi emhi ogbọ."*

8 Rote oni ushi ogho, olamhẹ o te me asha guise iwali oghuẹmhe ukphe nya ni e la mhe egbe le. Ini a rue ushi ode-a eri olamhẹ o ghua.

9 Eri mhi kpe la agbọ tse abi mhi aa rọ leşẹ ushi ne, ama abi ushi o ke rọ bhale, olamhẹ o gbo bhale agbọ, lo li mhi rọ ghua.

10 Mhi me khi ushi ni o kha ri agbọ bhale, khi eghuli o rọ bhe.

11 Olamhẹ o me asha migha rōte ushi di mhe. Rote oni ushi, eghuli o gbe mhe.†

12 Abokielu khi, oni ushi o pfuase, omhesẹ o pfuase, e migha, e ti.

13 Eri emini o ti ogho o ke ri eghuli ghi mhe egho? Iiye o! Ama ni a rọ leşẹ olamhẹ shi olamhẹ o rọ pfi eghuli na mhe, rōte emini o ti, ni a

* 7:7 Li ze Okiali 20.17; iDeut 5.21 † 7:11 Li ze Igbae 3.13

bhale ya ẹ khi rọte oni ushi, olamhẹ o mema khi olamhẹ egbegbo.

¹⁴ Irari khi awa lẹsẹ khi ushi emhi Ayemhẹ o khi, ama mhemhẹ ogbo tse, mhi khi oni a ro na olamhẹ de.

¹⁵ Mhi aa lẹsẹ emini e li mhe, irari khi emini mhia nono ni mhi ke riẹle, mhi aa dobe riẹle oli. Ama emini ọa ghole mhe, mhia riẹle.‡

¹⁶ Ini mhi riẹle emini mhi aa nono ni mhi riẹle, mhi lama shi ọ khi ushi o ti.

¹⁷ Abi oli khi, ọa ke khi mhemhẹ mhia riẹle oli ama olamhẹ ni o la mhe egbe lo.

¹⁸ Mhi lẹsẹ khi emhikhoghuo ni o ti ọa lamhẹ egbe, ikhi idiegbe olamhẹ oyemhẹ. Irari khi ini o tseku ghole mhe ni mhi riẹle emini o ti, mhia dobe ẹ riẹle oli.

¹⁹ Irari khi emini mhia riẹle ọa khi emini o ti ni mhia nono ni mhi riẹle, ochoghọ onobe ni mhi aa nono ni mhi riẹle, mhi kiele ẹ riẹle.

²⁰ Mena, ini mhia riẹle emini mhi aa nono ni mhi riẹle, ona o rokhasẹ khi ọa khi mhemhẹ mhi riẹle oli, olamhẹ ni o la agbo oyemhẹ ọọ riẹle oli.

²¹ Ina o ga limhẹ egbe ẹghẹghẹkpa. Ini mhia nono ni mhi riẹle onete, onobe o nu mhe la agho.

²² Irari khi ekelele mhi udu oyemhẹ, ushi oyi Eshinẹgba o te ẹ ghole mhe.

²³ Ama mhi me khi ushi olese o la mhe egbe ẹ gbe akanya, ni o mu okholi vule shi ushi ni o la mhe udu ọ,

o remhẹ mele oghumha ushi oyi olamhẹ-a, ni o la mhe egbe a gbe akanya.

²⁴ Ogbo umẹobinuje nabise mhi fe khi ena. Oghuo ọ ya tsumhi mhe idiegbe eghuli ona lasese?

²⁵ Mhi kphemhi na Eshinẹgba rọte obọ oyi iJesu iKirisiti Onomhue oyawa.

Irarigho, mhemhẹ oyemhẹ, oghumha oyi ushi oyi Eshinẹgba mhi khi udu oyemhẹ, elemhi idiegbe olamhẹ, mhi khi oghumha oyi ushi olamhẹ.

8

Angeli na Ayemhẹ

¹ Irarigho, ipfezo-mu ọa ke la ọ na egbo ne mie iJesu iKirisiti suo, ni ẹa ke ngeli rọte ode olamhẹ, ama eni ẹ ngeli rọte ode Ayemhẹ-nọ-pfuase.

² Ayemhẹ ni o ri agbo a na awa itobo khi awa mie iJesu iKirisiti suo, ọ she taghie mhe obọ oyi ushi olamhẹ ali eghuli-a.

³ Emini Ushi oyi iMosisi ọa dobe riẹle irari khi idiegbe olamhẹ o mie oli ekpabo, Eshinẹgba lolighuo ọ ke ya pfuese awa abi ọ ghie Omi oli, ni ọ li abi awa egbo olamhẹ ali ni ọ ya khi iluasobo shi olamhẹ eyawa. Oni idiegbe ogbo ni oni iKirisiti ọ ze ọ ro pfueche olamhẹ-a shi idiegbe ogbo olamhẹ.

⁴ Eri Eshinẹgba ọ riẹle ona ni ipfuase ni ushi oo nono ni awa mholi o tse shi awa egbe, ini awa khi ke ngeli te ode

‡ 7:15 Li ze iGal 5.17

olamhẹ, ama ni awa ke ngeli rọte ode Ayemhẹ.

⁵ Egbo ni ẹ ngeli rọte ode olamhẹ, eri e ri udu shi emini idiegbe oyewẹ oṣo nono. Eri egbo ni ẹ ngeli rọte ode Ayemhẹ, e ri udu shi emini Ayemhẹ oṣo nono.

⁶ Irari khi udu oyi ogbo eghuli o tsua. Ama udu o riele emini Ayemhẹ o gueye ọli, eri o ya la agbo o mhue opfomhẹ.

⁷ Obe Eshinẹgba ogbo oṣo khi, ini udu olamhẹ oyoli oṣo mhese na li, irari khi ọa ya suo eso na Eshinẹgba. Irari khi ọa ze ni ushi oyi Eshinẹgba o mhese ke na li, wekhi eri o tigbe ya lama ghue ni o mhese na li.

⁸ Egbo ni idiegbe olamhẹ oyewẹ o mhese ẹ na, ẹa dobe riele emini o ghole Eshinẹgba.

⁹ Yeye oye idiegbe olamhẹ ọa ke mhese ẹ ne ama Ayemhẹ o ke mhese ẹ ne, ini Ayemhẹ oyi Eshinẹgba o da la agbo oye ne. Ogbo ni ọa da mhue Ayemhẹ oyi iKirisiti ne, ọa khi onayoli.

¹⁰ Eri-tse khi ini iKirisiti o da la agbo oye ne, idiegbe oye o fu pfa olamhẹ, ayemhẹ oye o kie la agbo irari ipfuase ni awa rọte obọ oyi iKirisiti mhue.

¹¹ Ini Ayemhẹ oyi oni o rọte eghuli guise iJesu le o da la agbo oye ne, loli ni o rọte eghuli guise iJesu le o ya rọte Ayemhẹ oyoli ni o la agbo oye ri agbo na idiegbe ni oṣo ghu oye.*

¹² Irarigho, inyoghuo-mhẹ, awa mema ya ke ngeli abi ayemhẹ Eshinẹgba o gueye awa. Awa khi ke ngeli abi o ghole idiegbe olamhẹ.

¹³ Irari khi, ini u wa ngeli abi idiegbe olamhẹ o gueye, eri u ya ghu-a, ama ini u wa ngeli abi Ayemhẹ o gueye, eri u wa gbe ekpabo olamhẹ a shi idiegbe oye, u la agbo.

¹⁴ Egbo ni Ayemhẹ oyi Eshinẹgba o mhese ẹ na imi Eshinẹgba e khi.

¹⁵ Irari khi Ayemhẹ ni Eshinẹgba o ro ne, ọa khi oni o gbolo re khi oghumha ulishi, ama Ayemhẹ ni o ro re khi Omọ oyoli u mie. Oni Ayemhẹ o ri awa mhue itoto ẹ vie lu Eshinẹgba, awa lu ọli Itamhẹ, Itamhẹ.†

¹⁶ Oni Ayemhẹ lolighuo o pfi otsele shi ayemhẹ oyawa khi eniye eyi Eshinẹgba awa khi.

¹⁷ Ayemhẹ oyoli o ze ni awa lese khi awa ya nu iKirisiti mhọli okemhi shi emini Eshinẹgba o ro shobo khi loli ya riele. Eghẹghẹ agho awa nu iJesu mhọli okemhi ufumhi oyoli ini awa li me osoli.‡

Ufumhi na ogbenako

¹⁸ Mhi me ọli me khi osoli ni awa a me memena khi ọa khi oni a ro khokho emini a ro ya khasẹ elemhi agbo oyawa ikpukhokho.

¹⁹ Irari khi eri emini Eshinẹgba o ma nya e ri ikphakpha-egbe migha khe eghẹghẹ ni Eshinẹgba o ro ya

* 8:11 Li ze 1 iKori 3.16 † 8:15 Li ze iMak 14.36; iGal 4.6 ‡ 8:17 Li ze iGal 4.5-7

ri eni e khi egbegbi imioli khase.

²⁰ Irari khi emini a ma nya, a ro mele afue-a, ni o a khi oghuemhe oyewe, ama abi o li ghole oni Eshinegba lo, ni o rewe mele afue-a, elemhi irudushi, §

²¹ khi o ya tsumhi emini o ma nya ini e khi ke ke-a ali khi e ya nu imi Eshinegba kemhi epfua ni o mholi ufumhi.

²² Awa lese khi emini a ma nya e kiele e lomhe memena e la otomhe, abi okpotso ni oku o to.

²³ Oa khi emini a ma weweghuo tse, ama li shi awa ni awa mie Ayemhe-nopfuase ni o khi igbaekele agbo onogbo oyi Eshinegba. Awa lie lomhe abi awa li ri eloe shi eke e khe ogbele ni Eshinegba o ya la ukpeloe ogbokpa guele khi imi Eshinegba awa khi ali ni a ro ya pfa awa ike-a shi eke.*

²⁴ Irari khi rote irudushi ona a te mie awa pfuese. Eri-tse khi irudushi ni aa me gboo o a fe khi irudushi. Oghuo o gbo ri eloe shi eke e khe emini o she me eloe ne?

²⁵ Eri-tse khi ini awa ri udu shi emini awa aa me ne, irabomudu awa ro ke e khe oli.

²⁶ Igho Ayemhe o lie kpaghie awa obo umhagbapfo oyawa, Irari khi awa aa lese abi a lie so iromhi, oni Ayemhe lolighuo o ri ilomhe e so iromhi na awa shi emini unu o a dobe e ngme.

²⁷ Oni Eshinegba ni o o me elemhi udu oyi egbo, o lese

usamhi eyi Ayemhe. Irari khi eri oni Ayemhe o so iromhi na egbo eyi Eshinegba abi o li de shi oghuemhe oyi Eshinegba.

²⁸ Awa lese khi eri Eshinegba o o riele emhi nya te ode onete na egbo ni e nono ingme oyoli. Egbo ni o khia khi o lu shi omhese oyoli.

²⁹ Eni Eshinegba o she kpe lese, wewe o ze oda ke ni e ya li abi Omi oli, ni oni Omi oli o khi onodode elemhi inyoghuo ebubu.

³⁰ Igho eni Eshinegba o ze oda ke, wewe o li lu. Eni o lu, wewe o li pfa na, eni o pfa na wewe o li ro khi eni e mhue ufumhi onabi oyoli.

³¹ Abi awa ke ro mhue ena shi udu oyawa, se awa ke ya so shi ena mena? Ini Eshinegba o nu awa la, oghuo o ya dobe mu okhue vule shi awa o?

³² Loli ni o a to ukphe Omi oli na awa, ni o roli luasobo na awa nya, se o a ya pfo udu gbo ri emhi nya ma oni Omi oli na awa?

³³ Oghuo o ya gue ingme shi egbo ni Eshinegba o she ze egbe? Eshinegba luoghuo o pfa na ogbo.

³⁴ Oghuo o dobe pfa ez o mu ogbo? Ijesu iKirisiti luoghuo lo, oni o ghua. O gbo dose agho, Oni a guise le bhale agbo, mena o shito obo ita oyi Eshinegba, o so iromhi e na awa.

³⁵ Oghuo o ke dobe ya vase awa rote inono ni iKirisiti o nono awa lasele? Osoli abi khi omunu abi okholi ni a mu

vule shi awa o o ya dobe? Abi khi okiamhi abi khi umha me so lo, abi khi ini i igbe-a tsekha deba lo?

³⁶ Abi a li keke oli shi ebe-no-pfuase, khi,
“Itobo oyee anye ro
la okhena eghuli e lekpa,
a ri anye khokho
isumha ni a ya gbolo a.”†

³⁷ Iiye, abi a rie me eni emhi enana nya, anye fu dose oni o kholi mu o le, rote obo oyi oni o nono ingme oyanye.

³⁸ Irari khi mhi me oli me khi emhikhoghuo o la agbo ona, eghuli wekhi agbo ilala, wekhi igeni wekhi iyemhe okphaghe ali emini e la irarogbe e mheshe shi agbo ni awa la memena okekhi agbo ni o ke e bhale wekhi ekpabo,

³⁹ wekhi iyagha ali ilimhi, wekhi emhikhoghuo ni a ma, o dobe ya vase awa rote inono ni Eshinegba o nono awa rote iJesu oyawa lasese.

9

Uzemhi ni Eshinegba o ze egbo iZireni

¹ Egbegbi ingme mhia ngme itobo khi onayi iKirisiti mhi khi. Oa khi egbholi mhia lo. Udu oyemhe o pfi otsese shi o elemhi Ayemhe-no-pfuase,

² ini mhiye khi mhi mholi oya ali udu ialamhe ni oa mhue ukpese,

³ na egbo eyemhe ni anye khi egbo eghuo ali oia eghuo. Itobo oyewe, eri mhia lie khi Eshinegba o kha pfi unu na mhe ali khi a kha rue mhe

ikugbe ni mhi kugbe iKirisiti o le, ini loli rewe mholi imiep-fuese.

⁴ Wewe e khi imimi iZireni ni Eshinegba o ze, ni o ro khi imi oli, o ri ufumhi oyoli khashe we, o nu we riele ilama kugbe, o ri ushi oyoli na we. Wewe e mholi egbegbi ugamhi, e she mie ishobo oyi Eshinegba.*

⁵ Wewe e mholi eni egbhali ena elele ni a suo eko, ni e gba ushishi Iburu eke le. Wewe e li khi itita iKirisiti. Eshinegba ni oo mheshe na emhikpa, o khi oni aa kueghie agbo agbo.

⁶ Mhi aa lie khi ishobo ni Eshinegba o shi, khi, o fia kua. Irari khi oa khi egbo ni e rote iZireni lasese nya, e khi egbo eyi Eshinegba.

⁷ Wekhi imimi Aburaamu nya e khi egbegbi imi Aburaamu. Eshinegba o gueye Aburaamu khi, “Imimi Aziki a ya leli shi eni u bia.”†

⁸ Onana o guele khi eniye ni o bia elemhi oghuemhe idiegbe nya ea khi imi Eshinegba. Ama eniye ni a bia rote ishobo onayi Eshinegba wewe a leli shi egbegbi imimi Aburaamu.

⁹ Irari khi ishobo onayi Eshinegba khi, “Egheghe ni o roshi eke o kha da ramhi ne, mhi ya ri ishobo oyemhe tse, iSera o bia omoo omose.”‡

¹⁰ Oa pfo ghoo. Irari khi itesema emose eyi iRebeka, ita oghuo o bia we ikhi Aziki itita awa.

† 8:36 Li ze Iwolo 44.22 * 9:4 Li ze Okiali 4.22 † 9:7 Li ze Igbae 21.12 ‡ 9:9 Li ze Igbae 18.10

11-12 Ogbò a bia itsema ena ne wèkhi eri e lèşè ingme e rièlè onete ali onobe ne, ni Èshinègba ọ rọ she gueyè inyewè iRebeka khi, “Onogbhali ọ ya ke ga ọnikeke.” Eri Èshinègba ọ rièlè ona rọkhasè khi, uzèmhi ni lọli ẹ zè ogbò ni ọ khi emini ọ ya khi elemhi agbò, khi ọa khi itobò akanya ni ọ gbe ama abi o ghòlè Èshinègba ọ li lu ọli. §

13 Abi Ebe-no-pfuasè o ngme ni ọọ, “IGiekọpu mhi nono dọşè iSo.”*

14 Sè awa kẹ ngme mena? Khi Èshinègba ọọ zọlọ? Iiye o, ọa khi ighọ kpa!

15 Irari khi ọ gueyè iMosisi ọọ li,

“Mhi ya mhọli ilèlemhi na
oni mhi ya mhọli ilèlemhi na,
mhi viẹ osue na
oni mhi ya viẹ osue na.”†

16 Itobò ighọ, ọa khi abi o ghòlè ogbò wèkhi emini ogbò ọ rièlè ama rọte ilèlemhi oyi Èshinègba.

17 Irari khi Ebe-no-pfuasè o ngme na shi iFero egbe, ọọ li, “Itobò ona mhi rọ rẹ khi oghie ni mhi rọte emini mhi ya li ẹ ri ekpabọ eyèmhẹ khase, ni mhi rọ zè agbò nya lèşè eva oyèmhẹ.”‡

18 Irarighọ, eri Èshinègba ọọ mhọli ilèlemhi na oni ọ ghòlè ọli, ọ zese oni ọ ghòlè ọli udu-a.

19 U dobè ya mhila mhẹ ogbò ona, “Elo o zè ni Èshinègba ọ rọ kiele ẹ mẹ umhaguẹli oyawa shọ,

aborokhia khi lọli ọ ri awa ngeli abi o ghòlè ọli? Irari khi ogbòkghoghuo ọ dobè ya nu Èshinègba khẹ abọ?”

20 Ama ogghuo u khi, yeyè ogbò ni gbudu ya mie Èshinègba unu? Emini a ma o dobè ya liẹ oni ọ ma li, “Elo o zè ni u rọ lina ma mhẹ?”§

21 Omekhe ọa fẹ mhue afu ni ọ rọ ri eke eme ẹ ma emini o ghòlè ọli? Ọ kha ma eghuo shi eni a rọ rièlè emini e mu ẹloe, ọ manọ elese shi ni a rọ rièlè emini a mẹ kpa.

22 Ighọ li khi emini Èshinègba ọ rièlè. Aborièkhia khi ọ mhọli afu ni ọ kha rọ ri ofu ali ekpabọ oyọli khase ẹgbò ni e kha pfua, ni ọ mẹ ofu oyewè eghọ, ama eri ọ kie mhue irabomudu na wẹ.

23 Ilèlemhi ni ọ mhọli na ẹgbò ni ọ zè, ikhi ẹgbò ni e ya mhọli okemhi ufumhi oyọli, ọ rọ ri abi ufumhi onièmhi oyọli o li khase.

24 Li shi awa, eni ọ li lu. Ọa khi ẹgbò iJu tşè ama shi ẹgbò iJeta.

25 Abi ọ ngme shi ebe Osia ni ọ,
“Ègbò ni ẹa khi eyèmhẹ,
mhi ya lu wẹ ẹgbò
eyèmhẹ.

Ushishi ni mhi aa
nono ingme oyewè,
mhi ya lu,

‘Ègbò ni mhi nono.’**

26 Ali khi,
“A ya mẹ khi,
ashini a ga la liẹ wẹ,
‘Aa khi ẹgbò eyèmhẹ,’

§ 9:11-12 Li zè *Igbae* 25.23 * 9:13 Li zè *iMala* 1.2-3 † 9:15 Li zè *Okiali* 33.19

‡ 9:17 Li zè *Okiali* 9.16 § 9:20 Li zè *Aza* 29.16; 45.9 * 9:25 Li zè *Osia* 2.23

† 9:26 Li zè *Osia* 1.10

aghọ a gbo la lu wẹ,
‘Imi Ẹshinẹgba ni ọ la ọ.’”†

27 Azaya o ngme ingme
oyi iZireni lasela gboo, khi,
“Ini o tseku khia khi
ẹgbọ iZireni e bu abi ekhashe
ne la okẹ oniẹmhi,
ikuku ẹgbọ ọ a ya tsumhi.

28 Irari khi Ẹshinẹgba ọ ya
ri inyanya sọ ẹzọ oyọli
ekẹ agbọ-a zeghele.”‡

29 Ẹzeṣe abi Azaya ọ kpẹ li
ngme ọli khi:

“Ini Ẹshinẹgba ni ọ
mhẹsẹ shi emhi nya
ọa kẹsẹ imi-imi le na awa
lọ,
a kha li na awa osoli
abi ẹgbọ iSodomu,
a pfuse awa abi ẹgbọ
iGomora.”§

*Umha-miesuọ oyi ẹgbọ
iZireni*

30 Sẹ awa ke ya ngme?
Khi ẹgbọ iJeta ni ẹa na khu
ipfuasẹ, khi a pfa na rọte
irudunga,

31 ama ẹgbọ iZireni ni e na
khu ushi iguẹ-ngeli, ẹa kie tẹ
ọ?

32 Sẹ ọ li khi ighọ? Itobo
khi ẹa rọte irudunga na khu
ọli, ama e rọte odẹ ikanya khu
ọli. E kholo awẹ shi, “ẹche
ọzuode.”

33 Abi Ebe-no-pfuasẹ o
ngme, ni ọọ, “Bino, mhi tsua
ẹche shi iZayo ni o ya ri ẹgbọ
kholo awẹ. Ẹcheli ni o ya rẹ
wẹ de. Ama oni ọ da mie ọli
suọ ne, ọa ya mẹ omama.”*

10

1 Inyoghuo-mhẹ, emini ẹ
ghọle udu oyemhẹ ali olema
ni mhia lema Ẹshinẹgba khi,
ni a bhale ya ẹ khi ẹgbọ
iZireni eyemhẹ e khi eni a mie
pfuese.

2 Mhi pfi ọtselẹ shi ọ khi
e mhue ọmuegbe shi ugamhi
oyi Ẹshinẹgba. Ama egbegbi
ilẹsingme ọa la ọmuegbe oyewẹ.

3 Aborokhia khi ẹa lẹsẹ
ipfuasẹ ni o rọte obọ oyi
Ẹshinẹgba bhale, ni e rọ nono
abi e li ya ri oyewẹ kọ eghọ,
eri ẹa ri egbe wẹ na ipfuasẹ
oyi Ẹshinẹgba.

4 Irari khi iKirisiti ọ ri emi-
ni ushi o ngme nya gba pfo,
ni o zẹ khi Ẹshinẹgba ọ pfa na
ogbọkpa ni ọ miesuọ.

Imiepfuese, oyi ogbọkpa lọ

5 IMosisi ọ lina gue ọli le
emini ipfuasẹ ushi o khi, ni ọ
rẹ, “Oni ọ da ri ushi nya gbe
ne, ọ ya la agbọ.”*

6 Ama eri ipfuasẹ ni o rọte
irudunga bhale ọọ, “Khi la
ekelemhi udu oyẹ liẹ, ‘Oghuo
ọ ya nga iloghie?’ ” (Ni ọ ya
rue iKirisiti tiemhile.)

7 “Okekhi eri u wẹ, ‘Oghuo ọ
ya tiemhi ilimhi na ningolọ?’
” (Ni ọ ya rue iKirisiti rọte
eghuli ngale.)

8 Abi o ngme na: “Ung-
memhi oyi Ẹshinẹgba o la
mama ẹ. O lẹ unu, o lẹ udu,”
ikhi ungmehi irudunga ni
anye rọ ọ tse abọ.†

9 Ini u ri unu oyẹ ẹ khi,
“Ijesu ọ khi Onomhūe,” ni u
rọ miesuọ shi udu oyẹ khi

‡ 9:28 Li zẹ Aza 10.22-23 § 9:29 Li zẹ Aza 1.9 * 9:33 Li zẹ Aza 28.16 * 10:5
Li zẹ iLev 18.5 † 10:8 Li zẹ iDeut 30.12-14

Ɛshinegba o rɔte eghuli guise ɔli le, a ya mie ɛ pfuese.

¹⁰ Irari khi udu ɔgbɔ o rɔ miesuɔ ni a rɔ pfa na li, ali khi unu ɔgbɔ o rɔ ngme lasele ni o rɔ mhuɛ imiepfuese.

¹¹ Abi Ebe-no-pfuase o ngme, ni ɔɔ, “Onini o da regbenga li ne, ɔa tigbe ya me omama.”[‡]

¹² Ogbokpa ona o nu ngme, irari khi ikhiɔda ɔa la shi ɛgbɔ iJu ali ɛgbɔ iJeta o. Ɛshinegba o ga khi Onomhuɛ oyi ɛgbɔ nya, ɔɔ khivose ɛgbegbɔ na oni o da lu ɔli.

¹³ Irari khi, “Onini o da lu eva oyi Onomhuɛ o ya khi oni a mie pfuese.”[§]

¹⁴ Ama se e li ya lu ɔli ini ɛa mie ɔli suɔ? Se e li ya mie ɔli suɔ ini ɛa suɔ oni ungmehi? Se e li ya suɔ ini a ri oni ungmehi tsabɔ.

¹⁵ Se a li ya ri oni ungmehi tsabɔ ini ɔgbɔ a ghie eni ɛɛ tsabɔ fie lase? Abi Ebe-no-pfuase o ngme o khi, “Eri ibhale oyi ɛgbɔ ni e tsua usomhi onete bhale o ri oghelɛ bhale!”^{*}

¹⁶ Ama ɛgbɔ iZireni nya ɛa mie oni usomhi onete ona suɔ. Azaya o lie, “Ɛshinegba, oghuo o mie usomhi oyi anye suɔ?”[†]

¹⁷ Igho irudunga o li rɔte ini ɔgbɔ o suɔ oni usomhi ɛ bhale, ali khi usomhi oyi ingme iKirisiti iro-tse abo a te ɛ suɔ oni usomhi.

¹⁸ Ama mhi mhila, eri aa suɔ oni usomhi? Eeli, e suɔ.

“Uruli oyewe o she ramhi ashakpa eke agbo, ungmehi oyewe o ramhi ukpese agbo.”[‡]

¹⁹ Mhi gbo mhila, Eri ɔa lo ɛgbɔ iZireni esɔ? Odode IMosisi o lie,

“Mhi ya ri ɛgbɔ eyemhe ke kpe ofuma oyi ɛgbɔ ni ɛa khi eyemhe ne,

Mhi ya re ɛ mhuɛ iyese elemhi-a deba ushishi ni ɛa lese mhe ne.”[§]

²⁰ Eri Azaya o ri igbeudu ngme ɔli khi,

“Ɛgbɔ ni ɛa rɔsheka nono mhe e me mhe.

Mhi ri egbe mhe khasɛ eni ɛa mhila ogbɔ mhe.”^{*}

²¹ Ama abi o ngme shi ɛgbɔ iZireni egbe khi,

“Ogbelɛ nya mhi nise obo oyemhe-a na ɛgbɔ ni ɛa ya suɔ esɔ, ni ɛa lama mu pfi.”[†]

11

Ikheremhi ɛgbɔ iZireni ni e kpole

¹ Mhie i. Eri Ɛshinegba o kie ɛgbɔ eyi lolighuo? Iiye e! Mhemhe oyemhe ongi iZireni mhi khi. Omi-omi Aburaamu, Mhi rɔte edeli oyi iBejami lasele.*

² Ɛshinegba ɔa kie ɛgbɔ eyoli ni o rɔte igbaekele ze. Waa lese abi Ebe-no-pfuase o ngme shi ashini Elaja o rɔ so iromhi ri awolo gueye

[‡] 10:11 Li ze Aza 28.16 § 10:13 Li ze iJope 2.32 * 10:15 Li ze Aza 52.7 † 10:16

Li ze Aza 53.1 ‡ 10:18 Li ze Iwolo 19.4 § 10:19 Li ze iDeut 32.21 * 10:20 Li

ze Aza 65.1 † 10:21 Li ze Aza 65.2 * 11:1 Li ze iFili 3.5

Ɛshinegba emini ẹgbọ iZireni ẹ riẹle?

³ Ni ọ rẹẹ, “Ɛshinegba, e she gbolo emekeguele eyẹ-a, e guoghọ itẹtẹ eyẹ-a. Mhẹmheghuo kpele mhi ke kpọle, e gbolo ẹ nono ni e gbe mhẹ-a.”†

⁴ Sẹ Ɛshinegba ọ sọ li? Eri ọọ Elaja, “Mhi kẹsẹ emọse agbẹlẹ ishilua le ni ẹa lama nyẹsẹ ukhomhi na olitsa iBali.”‡

⁵ Ighọ o kie li khi memena. Itobọ khi ẹgbọ iZireni e la ọ ni e kiele ẹ suọ esọ na Ɛshinegba irari okhale oyọli ni ọ rọ zẹ wẹ.

⁶ Ini oni uzẹmhi o khi itobọ okhale, ọa ke khi itobọ ikanya. Ini o khi irari ikanya lọ, okhale ọa ke khi egbegbi okhale.

⁷ Elo a ke mẹ, Ɛgbọ iZireni ẹa mẹ emini e nono. Ikuku ẹgbọ ni Ɛshinegba ọ zẹ, wẹwẹ e mẹ emini e nono. Eni e kpọle e le esọ shi ulumhi ni Ɛshinegba ọ lu wẹ,

⁸ Abi Ebe-no-pfuasẹ o ngme khi,

“Ɛshinegba o rẹ wẹ
lese-a ningọlọ.

Alo eyẹwẹ e zuse
ni ẹa zẹ wẹ mẹ eke,

ali esọ eyẹwẹ e zuse
ni ẹa zẹwẹ ke rọ ọ suọ esọ,
ramhi ogbe-namo.”§

⁹ IDefidi ọọ liẹ,

“Ɛshinegba ọ ka zẹ
ni akhe ni e nye,
e mu okhọli vule shi wẹ ọ.

Ni o rẹwẹ kholo awẹ,
ni o nasẹ wẹ.

¹⁰ Alo eyẹwẹ e ka zuse
ini e khi mẹ eke.

Ugugu oyẹwẹ o nyẹsẹ
abi ighumha, agbọagbọ.”*

Iguabọ ni a toma ọara

¹¹ Mhi gbo mhila, eri e kholo awẹ ini e de, ni ẹa ke dobe ya vule? Iiye e! Ama itobọ olamhẹ ni e lamhẹ lọ. Imiepfuese o she bhale deba ẹgbọ iJeta, ini ẹgbọ iJu e ba ke kpe ofuma.

¹² Mena, ini o khia khi a khivose na ẹgbọ iJeta itobọ khi ẹgbọ iJu ẹa lama mie imiepfuese ni Ɛshinegba ọ rọ ghi wẹ. Sa ọ ghue, abi ikhivose ni agbọ nya e ya mhọli o ke beshi ya fu ramhi, ini eni ẹgbọ iJu e lama mie oni imiepfuese ikpukhokho.

¹³ Mena, ẹẹ ẹgbọ iJeta mhi nu ẹ ngme. Aborokhia khi eri Ɛshinegba ọ zẹ mhẹ mhi khi aghiusomhi na kẹẹ na ghie ghi ẹgbọ iJeta eghọ, eri akanya oyemhẹ o mu mhẹ egbe.

¹⁴ Eri mhia riẹlẹ ona ini mhi ri ẹgbọ iJu eyemhẹ ke kpe ofuma, isheghọ ni mhi dobe tsumhi eghuo elemhi wẹ.

¹⁵ Ini ukiemhi ni a kie ẹgbọ iZireni o ri ẹgbọ na agbọ enekpọle nu Ɛshinegba rọ riẹlẹ, seẹ o ke beshi ya li ti ramhi, ini eni iZireni e ke mie oni Ɛshinegba suọ? Eri o ya li abine khi a rọte eghuli guise ọgbọ le.

¹⁶ Ini a ri ukiẹkiẹ ibuledi onodode mele oni o pfuasẹ-a irari khi a rọli ga Ɛshinegba, oni ibuledi nya oni o pfuasẹ o ke khi. Ini imhili ọọra o

† 11:3 Li zẹ 1 Ighie 19.10,14 ‡ 11:4 Li zẹ 1 Ighie 19.18 § 11:8 Li zẹ iDẹt 29.4;

Aza 29.10 * 11:10 Li zẹ Iwolo 69.22-23

pfuase oni oora nya o ya khi oni o pfuase.†

17 Ama eri ee egbo ijeta a li abi uguabo oora olivu onokpo ni a khi gbose shi idiegbe oyi egbegbi oora olivu ni a rote eke kuele vule. Eri ee a ke ya migha ashini iguabo eni a rote oni egbegbi oora olivu kanokua. Itobo ona, ikhivose ni e rote imhili oni oora olivu e lasele ee a ke ro li agbo.

18 Itobo igho, a khi ri eloe gbe eni iguabo ni a kanokua egho. Elo o re e ya ke vuse ike? Iguabo tse a lese khi. Aa mu imhili mhue, imhili e mu e mhue.

19 A dobe ya me khi a sa khi eri a kanokua eni iguabo egho kua ni a ba me asha to-eli we.

20 Igēsikia onana o khi. Eri a kanokua we-a irari khi ea mholi irudunga. Ee la ashini a la irari khi a mholi irudunga. Ama a khi ze ni a ke vuse ike shi ona, ochogho a ze ni ulishi o ke mu e.

21 Irari khi ini Eshinegba o kholo egbo iju ni e khi egbegbi iguabo kua, o mema ya li dobe kholo e kua.

22 Ama a sa abi isomhelemhi ali izese-inmge-a oyi Eshinegba o li. Oo zese ingme-a deba eni e de o le, ama o somhi elemhi e, a kha da la angeli isomhelemhi ne, o ti elemhi e ini a da suo eso na li. Ini oa khi igho eri o ya khi e kua.

23 Ini eni egbo iju e lase umha miesuo oyewe le, a ya

gbo gbose we shi egbegbi oni oora olivu. Eshinegba o dobe ya gbo gbose we shi ashini e kpe la.

24 Eri ee egbo ijeta a li abi uguabo oora olivu onokpo na ifuegua. Ini Eshinegba o lina riele emini aa ya riele, ni o ro gbose e shi egbegbi oora olivu. Ona o li abi egbo iju. A lese khi oni Eshinegba o ya gbo dobe gbose oni uguabo oyi egbegbi olivu ni a kanokua, shi oni olivu ni a kpe te kanokua we kua.

A ya mie egbo iZireni pfuese ikpukhokho agbo

25 Mhia nono ni a lese igēsikia oyi osheli ni o la akagho inyoghuo. Ini a khi dabi khi a lese ingme. Oni osheli khi, umha suo eso oyi egbo iju oa khi ona agboagbo. Ama oni umha-sueso oyewe o ya laq ramhi ni egbo ijeta otuongme ni Eshinegba o nono ni e bhale deba li, e ro gba pfo.

26 Ona o khi abi a li ya tsumhi egbo iZireni nya. Abi Ebe-no-pfuase o ngme, khi, "Omiepfuese o ya rote iZayo bhale,

o ya khu ireloegbe
Eshinegba
idiegbe imimi iGiekopu-
a.‡

27 Onana khi ilama-kugbe ni mhi mholi na we, oni egheghe ni mhi ro ya rue
olamhe oyewe ode-a."§

† 11:16 Emini a ri onana ngme khi: Ini Aburaamu ali Aziki ali iGiekopu ni e khi itititawa e da khi eni e pfuase, eni e pfuase awa imimi we e li khi. ‡ 11:26 Li ze

28 Itobọ khi ẹgbọ iJu e kie usomhi onete ona, e rọ khi ebe Ẹshinẹgba, itobọ onete oyẹẹ ni aa khi iJu. Ama itobọ ititita wẹ, e khi ọmọle Ẹshinẹgba itobọ khi ọ zẹ wẹ.

29 Irari khi Ẹshinẹgba ọa ya mu udu pfi shi isomhopfa ni ọ rọ na ọgbọ ali uzẹmhi ni ọọ zẹ ọgbọ.

30 Ẹzẹzẹ abi ẹẹ ẹgbọ iJeta a kpẹ riẹlẹ umha-suesọ deba Ẹshinẹgba ẹghẹghẹ ni o dọsẹ, a li mie ilẹlemhi oyi Ẹshinẹgba irari umha-suesọ ni ẹgbọ iJu e riẹlẹ.

31 Ẹzẹzẹ abi ẹẹ ni aa khi iJu a li mie ilẹlemhi itobọ khi ẹgbọ iJu e khi ena umha-suọesọ memena, ighọ wẹwẹ e ke ya li mie ilẹlemhi.

32 Irari khi eri Ẹshinẹgba ọ ri ẹgbọ nya khili ighumha umha-suesọ ni ọ ba mhọli ilẹlemhi na wẹ nya.

A kueghie Ẹshinẹgba

33 Ọghuo ọ doḅẹ ya mhẹsẹ
abi ẹpfue, ali ẹgbhali ali
ilẹsẹ

oyi Ẹshinẹgba o limhi
ramhi?

Ọghuo ọ doḅẹ ya lẹsẹ
emini o la li udu ni ọ ya
riẹlẹ,

ali ni ọ doḅẹ ya guanọ ode
eyọli?*

34 “Ọghuo ọ she lẹsẹ
udu oyi Ọnọmhẹ?
Ọghuo o doḅẹ ya ye ọli
ude?”†

35 “Ọghuo ọ ri ongmomhi
na Ẹshinẹgba ghue,

ni ọ ya nyenẹ egbe fali ọli
lue?”‡

36 Irari khi lọli ọ ma emhi nya,
obọ oyọli e te la agbọ.

E la ọ gbo na li.

Lọli a ri ufumhi a na
agbọagbọ. Atsẹ§

12

Iluasobo ni o la agbọ

1 Itobọ ighọ, inyọghuo-mhẹ,
mhi ri itobọ ilẹlemhi oniẹmhi
ni Ẹshinẹgba ọ mhue na awa
lema ẹ, a ri idiegbe eye ẹ na
Ẹshinẹgba, abi iluasobo ni o
kie la agbọ, ni o pfuasẹ, ni
o ti Ẹshinẹgba ẹloe. Onana
o khi egbegbi ugamhi na el-
emhi ayẹmhẹ ni a doḅẹ ya ga.

2 A khi zẹ ni ingeli eye ẹ ali
eyi ẹgbọ na agbọ e li abeghuo.
Ama a zẹ ni Ẹshinẹgba ọ
mu udu eyeẹ pfi mele udu
enegbọ-a. Ẹghẹghẹ aghọ a ya
doḅẹ lẹsẹ abi ọghuẹmhẹ oyi
Ẹshinẹgba o li, a lẹsẹ emini o
ti, ni o gba pfo ni o ri egbe ẹ
mu Ẹshinẹgba.

3 Itobọ okhale ni Ẹshinẹgba
ọ rọ na mhẹ, mhi rọ gue ọli
ẹ yẹ ẹ nya, a khi ke ti egbe ẹ
nga dọsẹ ashini á fu ramhi.
Ochoghọ, a ke ri ukpẹloe
itiegbe-tiemhi ekẹ bino egbe
ẹ, ni o de shi abi irudunga ni
Ẹshinẹgba ọ rọ nẹ o fu ramhi.

4 Ẹzẹzẹ abi awa li zẹ idiegbe
oghuo ni o mhue iguabọ
ọdọda ni e bu, ni ẹa ya gbe
akanya oghuo,

5 ighọ o li khi elemhi
iKirisiti ni awa rọte idiegbe
oghuo lasẹle, ni uguabọ

* 11:33 Li zẹ Aza 55.8 † 11:34 Li zẹ Aza 40.13 ‡ 11:35 Li zẹ Ijobu 41.11

§ 11:36 Li zẹ 1 iKori 8.6 * 12:5 Li zẹ 1 iKori 12.12

ogbogbo ali enekpọle nya e li kugbe iguabọ enekpọle.*

6 Isomhopfa ọdọda Ẹshinẹgba ọ rọ na awa abi ọ ri ekpabọ na awa ramhi. O kha khi isomhopfa imekeguele ogbo ọ mholi, ọ rọli ke gbe akanya ni o de shi irudunga ni awa nya awa mholi.

7 Ini o khi oyi oni a rọ ọ ga egboese, ọ ke ga. O kha ke khi oyi oni a rọ ọ sese, ọ ke sese.

8 O kha khi oyi irudushi egbo ọ o khi ni ọ mie, ọ ke ri udu shi egbo ọ. Ini oni a rọ ọ kpaghiẹ egboese obọ, ini e mholi emini o to wẹ lọ, ọ ke rue obọ-a na egbo, abi o li pfo ọli udu. Ini oni a la ralo ke mhese na egbo lọ, ọ ri eloe shi omhese ke mhese, o kha khi oyi ilẹlemhi, o ri egbe mu ọli ke riẹle.†

Inono

9 Rọte ekelemhi udu oye ke riẹle inono. A kie emhi onobe, a mu eminete mhue egbegbo.

10 A nono ingme oyi egbe ẹ egbegbo, abi ogbo ali inyoghuo. A mhue ekpe na egbo elese ke dose abi u li mu ekpe na egbe ẹ.

11 Khi li owaza akanya igbegbe, ama ri omuegbe elemhi ayemhe ke ga Onomhue.

12 Ze ni irudushi ni u mhue o ri egbe ke muẹ. Mhue irabomudu ini u mhue osoli, ke lema eghẹghẹ kpa.

13 Ke kpaghiẹ inyoghue ni e mhue otomhe obọ. Ke mu egbo epfese.

14 Ke so iromhi ikhivose na egbo ni e mu okholi ẹ vule shi ẹ ọ. Ke khivose na egbo, khi ku itse na ogbo.‡

15 Nu egbo ni e mhue oghẹle ke ghele, u nu eni ee vie, ee vie.

16 A ri opfomhe nu egbe ẹ ke la. Khi khi ogbo ni ọọ ti ike ẹ nga, ama ke timama egbo ni ẹa pfue. Khi riẹle khi u ma lese dose. §

17 Khi ri onobe fali ota onobe. Kuegbe-a ke riẹle emini o ti egbo nya eloe.

18 Ini o ze ya riẹle, roshẹka odekhode, ni u rọ nu egbo nya la kugbe elemhi opfomhe, ini o khi obọ oye o kpole shi.

19 Emolemhe, a khi mie abọ okholi, ochoghọ a ze Ẹshinẹgba ọ mie abọ okholi na ẹ. Irari khi Ebe-no-pfuase o lie, "Mhemhe mhi mholi imieabọ okholi, mhi ya fali wẹ ota." Ighọ Ẹshinẹgba ọ ngme.*

20 Ochoghọ a ke riẹle abi Ebe-no-pfuase o ngme khi, "Ini okiamhi ọọ gbe obe ẹ, ri eminale na li le. Ini okiamẹ ọọ gbe ọli ri amẹ nali da. Irari khi ini u li na, eri u wẹ ingamhi erẹ a nga li ukhomhi."†

21 Khi ze ni onobe o mu ẹ le, ama ri onete mu onobe ọ le.

13

Iregbe-tiemhie na eni ẹ la ukpekhomhi omhese

1 Ogbo kpa ọ ke suo eso na eni e la ukpekhomhi

† 12:8 Li ze 1 iKori 12.4-11 ‡ 12:14 Li ze iMat 5.44; iLuk 6.28 § 12:16 Li ze Ekpi 3.7 * 12:19 Li ze iDeut 32.35 † 12:20 Li ze Ekpi 25.21-22

omhese. Irari khi Eshinegba lolighuo tse o dobe ze e ogbo shi ukpekhomhi omhese. Eshinegba o ri eni e la ukpekhomhi omhese nya leghie.

² Irarigho, ogbo ni o da mu okholi vule e shi eni ee mhese o ne, eri e mu okholi e vule shi emini Eshinegba o ro migha. Eni e da ligho ne, ipfezomu e nono e ghi egbewe.

³ Irari khi eni ea guę ngeli a ze enighie e ke nase, oa khi eni e guę ngeli. Irarigho oni oo riele okholo o na ulishi ena omhese. Waa nono ni u pfue ulishi oyi egbo ni e la ukpekhomhi? Ke riele emini o gbe akanya. Ini u li ghọ, e ya kuęhie.

⁴ Irari khi eni e la ukpekhomhi omhese, Eshinegba o ze we ni e ke kpaghie e obọ. Ama u kha riele emini oa gbe akanya, ke na ulishi oyewe, irari khi e mhue itoto ni e ro ya nase. Eni ee ga eyi Eshinegba e khi, ni ee nase eni ea ya suo eso, ni o ro khase khi elemhi ee bi Eshinegba shi o.

⁵ Irarigho, ze ni u ke nyese ukhomhi na eni e la ukpekhomhi omhese, itobo khi emini o ti lo ni u ke riele, aa khi itobo elemhi ibibi oyi Eshinegba tse.

⁶ Onana o li ze khi u mema ya ze oga, irari khi eni e la ukpekhomhi omhese eni ee ga eyi Eshinegba e khi, ni e ri eghęghę oyewe nya na akanya omhese.

⁷ Fali ogbokpa ota ni u lo oli. Ini u lo ota oga, ze oli, okekhi ozela, ze oli, ri ekpe ke na egbo, u nyese ukhomhi na we.*

A ke riele inono irari oni ogbele o she ti ramhi ana

⁸ Khi lo ogbo ota emhikhoghuo, se ni ota inono ingme oyi onuzava oye tse! Irari khi ogbo ni o da nono ingme oyi onuzava oyoli ne, o she ri ushi gbe akanya.

⁹ Ishi ni ee, "Khi kia okia," "Khi gbe ugbeli," "Khi do ughiatọ," "Khi ze ni emhi ogbo o to e egbe," Ali elese ni e kpole nya, ushi oghuo o ze wewe nya ukhomhi, ni oo, "Nono ingme oyi onuzava oye abi u li nono ingme oyi egbe e."†

¹⁰ Oni o da nono ingme oyi onuzava oyoli ne, oa tigbe ya li o li onobe. Irarigho, inono o khi irushi gbe akanya.

¹¹ Ke riele ona, lese eghęghę ni a la memena. Eghęghę o she ramhi ni u ro ya rote olese guale. Irari khi eghęghę imiepfuese oyawa ni o kpe ukhokho o she ti bhale dose eghęghę ni awa rote odode miesuo.

¹² Ele iyose o she e dose, ogbe o she e gbe-a. Awa khi ke ngeli abi egbo ni e la alo ebili, awa mema mu egbe ni awa ro ya la elemhi akpa.

¹³ Awa guę ke ngeli abi egbo ni e la akpa. Awa khi nu we ye ukue ebe ni e la riele efiala, ali idonyo guoghọ-a. Awa

* **13:7** Li ze iMat 22.21; iMak 12.17; iLuk 20.25 † **13:9** Li ze Okiali 20.13-15,17; iDeut 5.17-19,21; iLev 19.18

khi kia okia ke mu ighue ebe. Awa khi la agbo okholi wekhi agbo ivie shi emhi ogbo.

¹⁴ Ochoghọ awa ri iJesu iKirisiti Onomhue so abi awulu. Khi ke sa abi u li ya rieḷe oghueme eyi idiegbe olamhe.

14

A khi ke ri unu ze egboese ifue

¹ A mie ogbo ni irudunga oyoli ọa lolo toto. Khi nu oli ke khako shi emini o mieshi ni o khi ọda shi oye.

² Irari khi egbo eghuo e miesuo khi o ti ni a ke le emhikpa. Ama ogboese ni irudunga oyoli ọa lolo toto, o lese le ebe tse.

³ Ogbo ni o le emhikpa, o khi ri eloe gbe oni ọa ya le, ogbo ni ọa ya le emhikpa, o khi gue oni o le emhikpa ezọ. Irari khi Eshinegba o ga mie we.

⁴ Oghuo u khi ni wa ke gue aghiusomhi oyi ogboese ezọ? Oga oyoli tse o dobe e lie khi o gueli, ali khi ọa gueli. O ya migha, irari khi Onomhue o dobe ya roli migha.

⁵ Eri egbo eghuo e dabi khi ogbele oghuo o mu eloe dose olese. Ogbo olese ọọ khi abeghuo ogbele nya e li. Ogbogbo o ri udu oyoli shi asha ni o migha shi.

⁶ Oni o bino khi ogbele okhoghuo o la o ni o mu eloe ne, eri o roli ri ufumhi na Onomhue. Ogbo ni o le eminale, o le oli ri ufumhi na

Onomhue, irari khi Eshinegba o kphemhi na, oni ọa le, Onomhue o roli mu ekpe na, o kphemhi na Eshinegba.*

⁷ Aa me onge-awa ni o la agbo na egboli tse, we khi eri a me onge-awa ni ọọ ghu-a na egboli tse.

⁸ Ini awa la agbo, Onomhue awa la o agbo na. Ini awa ghu-a, Onomhue awa ghu-a na. Awa la agbo o, awa ghu-a o, oyi Onomhue awa khi.

⁹ Onana o ze khi iKirisiti o ghu-a, o guale ni o ro khi Onomhue oyi egbo ni e ghu-a ali egbo ne la agbo.

¹⁰ Yeye o ye, elo o ze ni u ro a gue inyoghuo e ezọ mena? Yeye o ye, elo o ze ni u ro ri eloe e gbe inyoghue. Awa nya awa ya migha odalo oyi Eshinegba ni o gue awa ezọ.†

¹¹ Irari Eshinegba o lina ngme oli shi Ebe-no-pfuase khi,

“ ‘Aborokhia khi mhi la o egbo,’

Onomhue o lina ngme,
‘Ogbokpa o ya wugha mhe odalo,

Ogbokpa o ya guele khi mhemhe mhi khi Eshinegba.’”‡

¹² Itobo igho, ogbokpa o ya gue khase Eshinegba abi o li gbe.

A khi yese egbe e de

¹³ Itobo igho, lase iguegbe-ezọ le. Ochoghọ, mholi oli shi udu oye khi u waa ya kpe emhi wekhi ozuode shi eke ni inyoghuo e o kholo awe shi.

* 14:6 Li ze iKolo 2.16 † 14:10 Li ze 2 iKori 5.10 ‡ 14:11 Li ze Aza 45.23

14 Ikugbe ni mhemhe ali ijesu anye kugbe, o rokhase mhe khi emhi khoghuo o la o ni o pfuase. Ama ini ogbo o mholi oli shi udu khi emhi o pfuase, loli oni emhi ogho o pfuase shi o.

15 Ini u yese inyoghuo udu-a, irari eminale ni u le, inono o ke la oni angeli. Khi ze ni eminale nu le, o ri inyoghuo e ni ijesu o ghu-a na de.

16 Khi ze afa ni u mholi ro o le emhikpa, ni u roli ri omama ghi iKirisiti.

17 Irari khi Eghiele oyi Eshinegba o khi ingme eminale ali onyo idada, ama oyi ipfuase, ali opfomhe ali oghela na Ayemhe-no-pfuase.

18 Ogbo ni o da lina ga iKirisiti, o ma ti Eshinegba eloe, egbo e mu ekpe na li.

19 Itobo igho, ke riela emini e ri opfomhe e bhale, ni e gbo ya kpaghie ogbokpa ro mholi imiesuo ni o toto.

20 Khi ri itobo eminale pfueche emini Eshinegba o riela-a. A dobe ya le emhikpa, ama o ti ni a ro bhale ya e khi emini u wa le, o ze ni ogbo olese o de pfilo olamhe.

21 O tine ini u waa bie le emhikhoghuo wekhi eri u da onyo, wekhi eri u riela emhikhoghuo ni o ya ze inyoghue de.

22 Irarigho, emini u mieshi ingme enana nya roli shi iteva oye ali Eshinegba. Oghela o khi ni ogbo ni o pfa ezoo mu egboli shi emini o riela ni o mie shi khi o gbe

akanya.

23 Ama ini ogbo ni o mhu e akhokhomhe o da kie le, a she pfa ezoo mu oli. Irari khi ulemhi ni o le o khi rote irudunga. Emini o da da rote irudunga bhale ne, olamhe o khi.

15

1 Awa ni awa toto shi irudunga, awa kha ke ri egbe mie na eni ea toto irudunga. Awa khi ke lese riela egbe awa ti tsee.

2 Ochogho, ogbogbo o ke riela inyoghuo oli emini o ti oli egbe, ni o ro kpaghie irudunga oyoli, ni o vule.

3 Irari khi iKirisiti o riela egboli tsee ti. Ochogho, abi Ebe-no-pfuase o ngme ni oo, "Eshinegba, itsuemhi ni egbo e tsue e, o de nga mhe egbe."*

4 Emini a keke shi Ebe-no-pfuase nya, eri a keke oli ni a ro sese awa ingme, ni a bhale ya e khi iregbemie ali irudusho ni Ebe-no-pfuase o ro na awa, o ri awa mholi irudushi.

5 Eshinegba ni o khi oni o ri iregbemie, ali irudusho o na ogbo, o ka re e mhu e usamhi oghuo abi a lie deba ete-awe eyi ijesu iKirisiti.

6 Ni ee nya a ri udu oghuo ali uruli oghuo kuaghie Eshinegba ni o khi ita ijesu iKirisiti Onomhu e oyawa.

7 Awa ke lama ingme egbe abi iKirisiti o li lama ingme oyawa, ni o ri ikueghie bhale ghi Eshinegba.

* 15:3 Li ze Iwolo 69.9

⁸ Itobọ khi mhi gueye ẹ khi iKirisiti ọ she bhale abi ọni ọọ ga ọgbọ na ẹgbọ iJu, ni o rokhase khi Eshinegba igesikia ọ khi, ni o ro mu ma ishobọ ni ọ shi na itita awa,

⁹ ni iJeta e kuẹghie Eshinegba shi ilelemhi oyoli. Abi a li keke oli khi,

“Irarigho, mhi ya kuẹghie ẹ iteva ẹgbọ iJeta.

Mhi ya to uwolo kuẹghie eva oye.”†

¹⁰ O gbolo ẹ,

“Eẹ iJeta, ni a kuma ẹgbọ eyoli ke ghele.”‡

¹¹ O gbolo ẹ,

“A kuẹghie Eshinegba ẹẹ ẹgbọ iJeta, a to uwolo kuẹghie oli ẹgbọ nya.”§

¹² Azaya ọ gbolo lie,

“Omio mi iJese ọ ya fu vule, ọni ọ ya vule mhesẹ na ẹ iJeta,

ẹgbọ iJeta e ya ri udu nga li.”*

¹³ Eshinegba ni a rote obọ oyoli ẹ mhue irudushi, ọ ri oghẹle ali opfomhe ne rote iregbenga ni a mhue nali, ni a ro bhale ya ẹ khi irudushi oye ọ fu shọ rote ekpabọ oyi Ayemhe-no-pfuase.

IPolu oni a ze ọ khi ọni ọ gbe akanya na ẹgbọ iJeta

¹⁴ Inyoghuo-mhe, mhemhe oyemhe mhi mhue imieshiọ khi onete o vo ẹ egbe, khi ilese o gba na ẹ ni a ro dobe ya ke sese egbe ẹ.

¹⁵ Mhi she kpe gue ingme eghuo ye ẹ gboo elemhi ebe

ona ni mhi gbolo ẹ ye le ẹ le ena. Itobọ afu ni Eshinegba ọ ro na mhe,

¹⁶ ni mhi ro khi aghiusomhi na ke ọyi iJesu iKirisiti na ẹgbọ iJeta. Eri mhia gbe akanya okpodalo-ugamhi oyi Eshinegba, ni a ro tsabọ usomhi onete oyi Eshinegba, ni a ro bhale ya ẹ khi ẹgbọ iJeta e li khi iluasobo, ni Eshinegba ọ mie, eni Ayemhe-no-pfuase ọ khuese-a pfuase.

¹⁷ Rote iJesu iKirisiti mhi te ẹ mholi egbe-imumhe shi ugamhi ni mhia ga Eshinegba.

¹⁸ Mhi aa ya gbudu ngme emhikhoghuo, se ẹ ni emini iKirisiti ọ rote obọ oyemhe rie le ro ri ẹgbọ iJeta suo eso na Eshinegba, rote ungmehi ali ikanya oyemhe,

¹⁹ rote ekpabọ eyi olele ali onyaloa, ali rote ekpabọ oyi Ayemhe-no-pfuase. Igho mhi rote iJerusalemu ngme ungmehi usomhi onete oyi iKirisiti ya ramhi iLirikumu.

²⁰ O ma kie kpe khi emini o la mhe udu ni mhi ro ngme ungmehi usomhi onete ye ẹgbọ ni ẹa kie suo ungmehi oyi iKirisiti ne, ini mhi khi ya to nga irogbekẹ ni ogoese ọ ro gbe.

²¹ Abi Ebe-no-pfuase o ngme ọ khi,

“Egbọ ni aa kpe

gue ingme oyoli ye ne, e ya me, ali khi eni ẹa kpe suo, o ya ye we.”†

Ugbamhi ni iPolu ọ gba, khi loli ya ye iRomu

† 15:9 Li ze 2 iSam 22.50; Iwolo 18.49

Iwolo 117.1 * 15:12 Li ze Aza 11.10

‡ 15:10 Li ze iDeut 32.43

† 15:21 Li ze Aza 52.15

§ 15:11 Li ze

22 Akanya oyemhẹ ona o zu mhe ode, ni mhi aa rọ me asha bhale deba ẹ.‡

23 Aborokhia khi mhi aa ke mhue ikanya ni e kpọ mhe le shi ikpe ena, ali ni o rọ gbo khia khi ikpe ebubu na ni mhi te ẹ nono ni mhi bhale ya meghọ,

24 o la mhe udu khi mhi ya rọte olieye ẹ ini mhia le iSipeni. Mhi sa khi a dobe ya ri ikpaghiobo na mhe ni mhi rọ ti okiali oyemhẹ je odalo, ini awa ri egbe mu egbe ukuku eghẹghẹ se.

25 Mena, mhia je iJerusalemu ni mhi ya kpaghiẹ egbo eyi Eshinegba obọ.

26 Irari khi o ghọle eni miesuo ni e la eke iMasidonia ali Akhaya ni e ri ikpaghiobo na egbo eyi Eshinegba ni e la iJerusalemu. §

27 Egbe ẹ mu wẹ khi wẹwẹ e lighọ riẹle ọli, e rue ọli shi khi ota wẹwẹ e lo wẹ. Irari khi ini egbo iJeta e kemhi ikhivose ayemhẹ oyi egbo iJu, eri o li abi ota ni egbo iJeta e lo egbo iJu.*

28 Ini mhi gbe akanya ona se ni mhi rọ me ọli me khi e she mie ikpagho ena se, mhi ya je iSipeni, mhi ya kọ feli ẹ ini mhia le.

29 Mhi leşe ọli gboo khi ini mhi bhale, ikhivose oyi iKirisiti ni o vọ tsululu mhi rọ ya bhale.

30 Mhi ri iJesu iKirisiti Onomhue oyawa ali inono ni Ayemhẹ o rọ na awa lema ẹ

inyoghuo, a nu mhe sọ iromhi ali a gbo sọ iromhi na mhe.

31 Sọ iromhi Eshinegba o tsumhi mhe obọ oyi egbo ni ẹa miesuo na eke iJudia ali ni egbo Eshinegba ni e la ẹoli iJerusalemu ni e mie eni ikpagho ni mhi rọghẹ wẹ.

32 Ni a rọ bhale ya ẹ khi rọte oghuemhẹ oyi Eshinegba, mhi dobe ri udu oghẹle bhale deba ẹ ali ni awa ri udu shi egbe o.

33 Eshinegba oyi opfomhẹ o ka nu ẹẹ nya la, Atse.

16

Otse ni iPolu lolighuo o tse egbo ke

1 Mhi gue ingme onete oyi iFobi ye ẹ, ikhi inyoghuo awa ni okpotso, ni o khi oni o ralo shi eni e miesuo ni e la ẹoli iKengkhiria.

2 A ri eva oyi Onomhue kpẹ abọ mie ọli, abi egbo eyi Eshinegba e ye ni e li. A ri ikpaghiẹ obọ onini o da ya nono obọ oye ẹ na li. Irari khi anamelo oyemhẹ ali ebubu egboese o khi.

3 Mhia tse iPisilia ali Akuila ni e kpaghiẹ mhe obọ shi akanya oyi iJesu iKirisiti.*

4 E ri agbo oyewe shi okhena irari oyemhẹ. Oa khi weweghuo tse mhia tse uwegbe, ama li shi igbaa nya eyi eni e mie iKirisiti suo enayi egbo iJeta.

5 Mhi gbo li tse igbaa oyi eni e mie iJesu iKirisiti suo ni o la owa oyewe.

‡ 15:22 Li ze iRom 1.13 § 15:26 Li ze 1 iKori 16.1-4 * 15:27 Li ze 1 iKori 9.11

* 16:3 Li ze Ika 18.2

Mhia tşę egbegbi ọmọlemhę Epanętusi ni ọ khi ọgbọ ọnodode ni ọ mie iKirisiti suo ukiękię eke Esha.

⁶ Mhi tşę iMeli ni ọ toto obo a gbe akanya na ę.

⁷ Mhi tşę Adironikusi ali iJunayasi, ęgbọ iJu nabi mhęmhę ni anye ga la owa ighumha. Eni a mu ekpe na e khi elemhi idiegbe oyi ighiusomhi na keę. Ama e kpe miesuọ khe mhę.

⁸ Mhia tşę Amipiliatusi, egbegbi ọmọlemhę, ni mhi mhue inono na elemhi Ọnọmhue.

⁹ Mhia tşę Urubane, ni ọ kpaghię anye obo akanya oyi iKirisiti.

Mhi gbo tşę iSitachisi, egbegbi ọmọlemhę.

¹⁰ Mhia tşę Apelesi, ni a me gboo khi igesikia ọ rọ deba iKirisiti.

Mhi tşę ena ọmhue-apfe oyi Arisitobulusi.

¹¹ Mhi tşę Erođioni ni ọ khi inyoghuo-mhę.

Tşę eni e miesuọ na ọmhue-apfe oyi iNakisusi.

¹² Mhia tşę iTirifeana ali iTirifosa eni ikpotso egho ni e gbe akanya oyi Ọnọmhue egbegbo.

Mhi li tşę egbegbi ọmọlemhę iPesisi oni ọkpotoso ni ọ gbe ukpokpomhi akanya na Ọnọmhue.

¹³ Mhia tşę iRufosi, ọgbakanya ni a ze oyi Ọnọmhue, ali inyoli ni ọ li abi inyọ shi mhę ọ.[†]

¹⁴ Mhi tşę Asikiritusi, ali iFilegoni, ali Amęsi ali

iPatirobasi ali Amasi ali eni e miesuọ ni e ga la.

¹⁵ Mhia tşę iFilologusi ali iJulia ali iNirusi ali inyoghuo oli ni ọkpotoso ali Olimpasi ali ęgbọ Eshinegba nya ni e nu we la.

¹⁶ A tşę egbe ę otşę onete, a ghele mu egbe abi inyoghuo.

Igbaa nya eyi eni e mie iKirisiti suo, ę tşę ę.

¹⁷ Mhi lema ę, inyoghuo, a ke to ọkpe ęgbọ ni ę pfi okemhi ali ni e ri ęgbọ de irudunga ni e mhue-a, eni oseşę oyewę ọa de shi oseşę ni a seşę awa. A nuata shi we ọ.

¹⁸ Irari khi ęgbọ ni ę riele emhi eghogho ęa ya ga iKirisiti Ọnọmhue oyawa, ama elemhi oyewę ę ga. Rote eta-olelemhunu ni ę ngme, e rọ ọ di usamhi udu oyi ęgbọ eghuo ni ęa mhue ileşę.

¹⁹ Ọgbokpa ọ she suo abi a li ri ungmemhi oyi Eshinegba a gbe akanya. Itobo ona mhi rọ ghele shi ingme oyewę. Ama mhia nono ni a fialo-a shi emini o khi onete, ama a khi fialo-a shi emhi onobe.

²⁰ Eshinegba oyi opfomhę ọ ya kele guoghọ ọkphaghię-a shi ę ękowę. Okhale oyi iJesu iKirisiti Ọnọmhue oyawa o ke deba ę nya.

²¹ ITimoti ni anye ga a gbe akanya, ọọ tşę ę. Igho khi iLushosi ali iJasi ali iSosipata, ni anye ga khi iJu.[‡]

²² Mhęmhę iTetiusi ni mhi ri ugba ma a keke ebe ona na iPolu, mhi tşę ę, abi oni ọ miesuọ.

[†] 16:13 Li ze iMak 15.21 [‡] 16:21 Li ze Ika 16.1

²³ IGayusi ni ọ ri owa oyọli na mhe kushi, ni ọ gbo ri ukpelo e khu mhe, ni ọ lama eni e miesuo e ke legba owa oyọli, ọọ tse e.

Erasitosi, ni ọ ri ikpagho ọ shi na ọli oyewe ali inyoghwo anye ikhi iKaritusi, ee tse e. §

²⁴ [Okhale oyi iJesu iKirisiti Onomhue oyawa o ka nu e la, Atse.]

²⁵ Ufumhi khi oyi Eshinegba! Loli ọ dobe re migha shi irudunga oye e abi o li de shi oni usomhi onete oyi iJesu iKirisiti ni mhi ro ọ tse abo, ali ni o de shi irokhasa oyi osheli ni a ro sheli agboagbo elemhi ikpe ebubu ni e dose.

²⁶ Ama mena, a she ri oni igesikia khasa, rote akeke shi eke enayi emekeguele, abi Eshinegba ni ọ la ọ agboagbo ọ mhesa ọli a li roli khasa ishishi nya, ini e ba miesuo ni e suo esona lue.

²⁷ Eshinegba ona ilasa, a ri ufumhi na agboagbo, rote obo oyi iJesu iKirisiti! Atse.

Ebe onodode ni iPɔlu ɔ keke ghi egbo iKoritia Eni e miesuo

Otse oyi iPɔlu

1 Mhemhe iPɔlu, aghiu-somhi na keke oyi iJesu iKirisiti ni Eshinegba ɔ ze abi o ghole ɔli shi mhi khi, li shi inyoḡhuo awa iSositɛnisi.

2 Mhemhe mhi keke ebe ona a ghi igbaa oyi eni e mie iJesu iKirisiti suo onayi Eshinegba ni e la iKoriti, ikhi eni Eshinegba ɔ lu e khi egbo eyoli. Eri ɔ re e khi egbo ni e pfuase rote obo oyi iJesu iKirisiti, abi ɔ li egbo ni e miesuo ashakhasha.*

3 Eshinegba ita awa ali iJesu iKirisiti Onomhue oyawa e ka li okhale na e, e ri opfomhe na e.

IPɔlu ɔ ri ikphemhi na Eshinegba

4 Eghɛghɛ kpa mhi ro kphemhi e na Eshinegba oyemhe irari okhale ni ɔ riɛɛ na e rote obo oyi iJesu iKirisiti.

5 ɔ she re mholi epfue odekhode elemhi iguengme ungmehi ali ilese nya.

6 Oni usomhi oyi iKirisiti o she lo e egbe shito egbegbo.

7 Irarigho, isomhopfa ayemhe okhoghuo ɔa ke to e abi a li migha khe ibhale oyi iJesu iKirisiti Onomhue oyawa ni a la roli ya khase.

8 ɔ ya mu e mhue gbaa ya ramhi ukpese, ni a khi eni ea mhue umhaguekia, a khi ogbele ni iJesu iKirisiti Onomhue oyawa ɔ ya bhale.

9 Eshinegba ni ɔ lu e ni a nu omi ɔli iJesu iKirisiti Onomhue oyawa mhue ugamhi kugbe, oni a ri egbe e nga ɔ khi.

Okemhi ni o la eni e miesuo iteva

10 Inyoḡhuo-mhe mhi ri eva oyi iJesu iKirisiti Onomhue oyawa lema e, ee nya a ke yemhe na egbe ini okemhi o khi lo e le, ali ni a mholi udu oghuo ali usamhi oghuo.

11 Egbo eghuo na omhue-apfe oyi iKiloe e gueye mhe khi iwola e la e iteva.

12 Emini mhi ri onana ngme khi, ogbogbo oo ngme unu ododa, oghuo ɔ khe, "IPɔlu mhia deba," olese oo, "Apolosi mhia deba," olese oo, "IPita mhia deba," olese oo, "iKirisiti mhia deba."†

13 Eri a kemhi iKirisiti? IPɔlu a gbe-a shi ɔra apfida na e? Abi khi eva oyi iPɔlu a ro batazi e? Eniye odukhokho eyi iPɔlu a khi?

14 Mhi kphemhi na Eshinegba khi mhi aa batazi onge e, se ni iKirisipusi ali iGayusi.‡

15 Irarigho, onge e ɔa ya lie khi mhi ri eva oyemhe batazi lue.

16 Mhi lese khi mhi batazi apfe iSitefanasi, mhi aa ke sato ini mhi li batazi ogboese.§

* 1:2 Li ze Ika 18.1 † 1:12 Li ze Ika 18.24 ‡ 1:14 Li ze Ika 18.8; 19.29; iRom 16.23 § 1:16 Li ze 1 iKori 16.15

17 Irari khi iKirisiti ɔa ghie mhe mhi ke batazi egbɔ, ama mhi ke kia gue ungmehi oyɔli le ni ɔa rɔte ilɛsɛ oyi ɔgbɔ bhale. Ini eghuli ni iKirisiti ɔ ghu shi apfida o khi mele afue-a.

IKirisiti ni ɔ khi ilɛsɛ ali ekpabɔ

18 Irari khi eri ungmehi oyi apfida o khi afue shi esɔ oyi egbɔ ni eɛ pfua ɔ, ama awa ni a mie e pfuese, ekpabɔ oyi Eshinɛgba o khi na awa.

19 Irari khi Ebe-no-pfuase ɔɔ li,

“Mhi ya pfueche egbhali oyi eni e mhɔli egbhali-a, mhi bi ilɛsingme oyi eni e riɛɛ khi wɛwɛ e gue ebe ma.”*

20 Mena, ashi ɔna ilɛsingme ɔ migha? Ashi ɔguebe ɔ la? Ashi eni e gue khako ena agbɔ namo e migha? ɔa khi eri Eshinɛgba ɔ ri egbhali ni e la agbɔ ona mele ɔyɛghɛ-a?†

21 Eri Eshinɛgba ɔ ri ilɛsingme oyi lɔlighuo zɛ khi egbɔ ɛa rɔte ilɛsɛ oyewɛ lɛsɛ ɔli. Ochoghɔ, eri o ghɔle Eshinɛgba ni ɔ rɔte itsabɔ oyi usomhi ni egbɔ eɛ khi oyeghe lɔ, tsumhi eni e mie oni usomhi suɔ.

22 Egbɔ iJu, irɔkhasɛ eyi ɔnyaloa e migha khe, egbɔ iGiriki eɛ nono ilɛsingme,

23 ama eri anye ri iKirisiti ni a gbe-a tama apfida tse abɔ usomhi ona, o ri elemhi a bi egbɔ iJu, o khi oyeghe shi esɔ oyi egbɔ ijɛta,

24 ama egbɔ ni Eshinɛgba ɔ lu, ghe iJu ali iGiriki e me oni usomhi oyi iKirisiti shi khi ekpabɔ ali ilɛsɛ oyi Eshinɛgba o khi.

25 Irari khi emini o li abi umhalesɛ oyi Eshinɛgba, o mhue ilɛsɛ dɔsɛ egbhali oyi ɔgbɔ, emini o li abi ɔlɔsemhe oyi Eshinɛgba o mhue itoto dɔsɛ ekpabɔ oyi ɔgbɔ.

26 Inyoghuo, a sato emini a kpe khi neni Eshinɛgba ɔ lu e. Egbɔ ena agbɔ ona ɛa bino shi eni e mhɔli ugbhe, ali khi ɔa khi ebubu e e fialo-a, ɔa khi ebubu e e khi ekhemhue.

27 Eri Eshinɛgba ɔ zɛ emini egbɔ e bino shi emhi eyeghe elemhi agbɔ ona ke, ɔ rɛwɛ ri omama mu elɛsingme. ɔ zɛ emini eɛ mhue ochi elemhi agbɔ ona rɔ khi eni e mhue ekpabɔ unu-a.

28 Eshinɛgba ɔ zɛ emini ɛa mu eloe na agbɔ ona ali emini egbɔ e ri eloe gbe, ni e rɔ shi afue. ɔ rɛwɛ ri emini egbɔ ɛa bino khi e mu eloe mele afue-a,

29 ini ɔgbɔkhoghuo ɔ khi doɛ la odalo oyi Eshinɛgba tono obɔ udu.

30 Irari khi lɔli ɔ ku awa ali iJesu iKirisiti gbe. IKirisiti ni ɔ khi ilɛsɛ ni o rɔte obɔ oyi Eshinɛgba bhale. Emini a ri ona ngme khi, lɔli ɔ khi ipfuase ali irɔpfuase ali ipfasheke oyawa.

31 Irari ona, Ebe-no-pfuase o rɔ liɛ, “ɔnini ɔ da nono ni lɔli tono obɔ udu, ɔ ke ri emini ɔnmhue ɔ riɛɛ tono obɔ

* 1:19 Li zɛ Aza 29.14 † 1:20 Li zɛ iJobu 12.17; Aza 19.12; 33.18; 44.25 ‡ 1:31 Li zɛ iJere 9.24

udu.”‡

2

1 Inyoghuo, abi mhi rọ bhale oliye ẹ ya tsabo osheli igesikia ni o la ungmehi oyi Eshinegba, mhi aa lii ngme ingmemhi ena ghoghoghi, wekhi eri mhi rokhase khi mhii wena gba.

2 Irari khi abi mhi rọ la iteva oye ẹ, eri mhi rue udu emhikpa-a, mhi ri udu lese shi ingme oyi iJesu iKirisiti ali eghuli ni o ghu shi apfida.

3 Onana o ze khi abi mhi rọ te eke bhale, eri mhi li abi oni ọa mhuẹ ochi, ulishi o remhe kpheli.*

4 Abi mhi rọ sese ẹ, ni mhi rọ tse abo ungmehi gueye ẹ, mhi aa ri ilosedose ali eta-olelemhunu nu ẹ ngme. Ama eri mhi ri ekpabo oyi Ayemhe oyi Eshinegba khase.

5 Ini irudunga ni a mhuẹ, o khi ya migha nga egbhali oyi ogbọ, ama ekpabo oyi Eshinegba.

Ilesingme oyi Eshinegba

6 Usomhi ni o khi oyi ilasingme anye gueye egbo ni e womhe loe shi emhi irudunga. Ama ọa khi ilese oyi agbo namo wekhi oyi eni ẹ ẹ mheshe shi agbo namo, eni e ya mele afue-a.

7 Ingme osheli ilasingme oyi Eshinegba mhia ngme. Ilesingme ni o rọ sheli na egbo agbo agbo ni o she kpe gba shi eke khi awa ya mholi okemhi shi ufumhi oyoli.

8 Aa me oghie okhoghuo ighie ena agbo namo ni o lese oni ilasingme ona. Ini o khia khi e lese lo, ẹa kha ta Onomhuẹ ni o mhuẹ ufumhi ma afida gbe-a.

9 Ama abi Ebe-no-pfuase o ngme ni ọọ,

“Ukpeloe okhoghuo ọa me ne, eso okhoghuo ọa suo ne, wekhi eri ogbokhoghuo o sa udu oyoli ramhi o ghue, emini Eshinegba o ri ele shi eke ẹ khe eni e nono ingme oyoli.”†

10 Ama Eshinegba o she roli khase awa rote Ayemhe oyoli. Irari khi eri Ayemhe ọọ guano emhikpa, ya ramhi osheli ni Eshinegba o gba.

11 Itobo khi Ayemhe ni o la ogbọ egbe lueghuo o lese isamhi eyi oni ogbọ. Igho ogbokhoghuo ọa lese isamhi eyi Eshinegba, see ni Ayemhe oyi Eshinegba.

12 Awa aa mie ayemhe oyi agbo ona, ochoghọ ayemhe ni o rote obọ Eshinegba bhale ni awa rọ lese emhi nya ni Eshinegba o rọ na awa afue-afue, awa mie.

13 Anye ẹa ya ngme ingmemhi ni a rote egbhali oyi ogbọ sese, ama ingmemhi Ayemhe oyi Eshinegba o sese anye, anye lie sese egbo ni e la elemhi ayemhe, emini e khi emhi ayemhe, ni e khi egbegbo.

14 Ogbọ ni ọa da mhuẹ oni ayemhe ne, ọa ya lese emini a ri emhi na Ayemhe oyi Eshinegba ngme. Ogbọ

* 2:3 Li ze Ika 18.9 † 2:9 Li ze Aza 64.4

oghoghò, afue emhi ayemhe e khi shi òli eloe, irari khi emini e khi ode ayemhe, ayemhe a te e lese we.

¹⁵ Ogbò ni ò da mhue oni ayemhe ne, ò dobe ya lese udi emhikpa, ama egboese ea dobe ya lese abi oni ogbo ona ò la ò shi.

¹⁶ Abi Ebe-no-pfuase o ngme, ni oo, "Oghuo ò lese udu oyi Onomhue?"

Ni ò dobe ya ye òli ude?" Ama khi, awa mhòli udu oyi iKirisiti.‡

3

Okemhi ni o la iteva igbaa oyi eni e mie iJesu iKirisiti suo na iKoriti

¹ Inyoghuo, mhi aa nu e ya ngme abi eni e mhue Ayemhe oyi Eshinegba, ama abi egbo ni e ngeli abi egbo na agbo, ali emofe elemhi irudunga oyi iKirisiti.

² Loli mhi rò ri amè inyeli na e da ni òa khi eminale ni e toto, irari khi aa mu egbe shi eminale ni e toto ne. Ramhi memena aa kie mu egbe ne.*

³ Egbo na agbo a kie khi. Emini o da ze khi a kiele e kpe ofuma deba egbe ali khi a nu egbe e e wola, ogho o rokhasè khi egbo agbo a kie khi? Oa khi eri a kiele e ngeli abi egbo na agbo?

⁴ Ini otuoghuo elemhi e oo li, "IPolu mhia deba", ni olese o rò o li, Apolosi mhia deba, oa khi eri a ngeli abi egbo na agbo egho?†

⁵ Ini e e a bino òli bie, oghuo Apolosi o fe khi? Oghuo iPolu o khi. Eni e e ga eyi Eshinegba anye ga khi ni e e a ròte obò oyanye miesuo. Eri ogbogbo oo gbe akanya oyoli ni Onomhue o rona li o gbe.

⁶ Mhemhe mhi ri ukpamhi kò, Apolosi o ku amè shi o, ama Eshinegba o ze ni oni ukpamhi o rò fu.‡

⁷ Oni o rò kò ali oni o ku amè shi o, ea mu eloe. Se khi Eshinegba ni o ri emhi e fu.

⁸ Ikhioda oa laò na oni o rò kò ali oni o ku amè shi o, Eshinegba o ya ri elele na ogbogbo abi o li gbe.

⁹ Irari khi eri anye kugbe e gbe ikanya na Eshinegba, e e a khi ishemhi oyoli.

Owa oyi Eshinegba a gbo khi.

¹⁰ Ròte afu ni Eshinegba o rò na mhe, mhi rò ri irogbekè gbe, abi oga oyi itsona. Onana egboese e e ma a nga. Eri-tse ogbogbo o lese abi o li ma a nga o.

¹¹ Irari khi ogbokhoghuo oa ke gbo dobe ya ri irogbekè olese gbe dose oni Eshinegba o she rò gbe ni o khili iJesu iKirisiti.

¹² Ini ogbokhoghuo o to nga oni irogbekè ona, ni o rò ri igolu to nga o, okekhi elomho, okekhi eche ni e ghale, okekhi eera, okekhi efolo, okekhi ifulo o rò to nga o.

¹³ A ya ri emini e la elemhi emini ogbogbo o rò to nga o khase gboo, ogbele iguezo. Erali a rò ya mhesè emini o rò

‡ 2:16 Li ze Aza 40.13 * 3:2 Li ze Iburu 5.12-13 † 3:4 Li ze 1 iKori 1.12 ‡ 3:6 Li ze Ika 18.4-11,24-28

tọ nga bino ni a lẹsẹ emini e la elemhi wẹ.

¹⁴ Ini emini ọ rọ tọ nga ọ, o pfue oni erali, a ya ri elele na li.

¹⁵ Ini e toa, opfu o gbe ọli, ama a ya tsumhi ọli. Eri-tse khi eri o ya li abi ọgbọ ni ọ na pfue ẹlemhi erali.

¹⁶ Ẹẹ a lẹsẹ khi owa ugamhi oyi Ẹshinẹgba a khi, ali khi Ayẹmhe oyi Ẹshinẹgba o la ẹ egbe?†

¹⁷ Ini ọgbọkhọghuo ọ yese Owa ugamhi Oniẹmhi oyi Ẹshinẹgba-a, Ẹshinẹgba ọ ya yese ọni ọgbọ-a. Irari khi eri Owa ugamhi oyi Ẹshinẹgba, o pfuase, ali khi Owa Ugamhi oniẹmhi oyọli ẹẹ a khi.

¹⁸ A khi ke di egbe ẹ. Ini onḡẹ ẹ ọ nono ni lọli khi ọni ọ mhọli ilẹsingme shi ẹghẹghẹ ni a la ena, ọ ka khi oyẹghẹ ni ọ mẹ asha khi ọni ọ khi ọlẹsingme egbegbo.

¹⁹ Irari khi emini ẹgbọ na agbọ ẹẹ bino shi ilẹsingme, afuẹ Ẹshinẹgba ọ bino ọli shi. Abi ebe o ngme, ni ọọ, “Eri Ẹshinẹgba ọ ri ilẹsẹdọsẹ eyi eni ẹ liẹ khi wẹwẹ e lẹsingme riẹlẹ wẹ gbo mu.”*

²⁰ Asha olese o gbo ngme ọli shi ebe khi, “Ẹshinẹgba ọ lẹsẹ khi isamhi ni ọni ọ liẹ khi lọli lẹsẹ dọsẹ ọọ sa khi ẹa mu ame.”†

²¹ Itobọ ighọ, a khi ke ri ọgbọkhọghuo tono obọ udu, irari khi emhikpa, eyi ẹẹ lọ,

²² o khi iPọlu o, okekhi Apolosi o, okekhi iSẹfasi ni a gbolo a lu iPita o, okekhi

agbọ ali eghuli o, okekhi agbọ onana ali ogbenakọ o, ẹẹ a ga mhue wẹ nya.

²³ Ẹẹ oyẹẹ eyi iKirisiti a khi, ọni iKirisiti ọ khi oyi Ẹshinẹgba.

4

Ighiusomhi na ke eyi iKirisiti

¹ A ke sato anye egbe abi eni ẹẹ gbe akanya na iKirisiti ni a ri osheli oyi Ẹshinẹgba nga obọ.

² A zẹ ni a bhale ya ẹ khi ọni a ri emhi nga obọ, ọ ri igesikia deba li.

³ Ẹgboli oyẹmhe ọa laọ ini u gue mhe ẹzọ, o ke khi ikọtu na agbọ e gue mhe ẹzọ. Mhẹmhe mhi aa fẹ gue egbemhe ẹzọ.

⁴ Emhikhọghuo ọa nase mhe udu ni ọ gue mhe ẹzọ, ama oghọ ọa liẹ khi abọ eyẹmhe e ma pfuase gba. Onomhue ọọ gue mhe ẹzọ.

⁵ Irarighọ, a khi gue ọgbọkhọghuo ẹzọ ne neni ẹghẹghẹ iguezọ o ramhi. Migha ni Onomhue ọ bhale ne. O ya rue emini a rọ sheli alo ebili lasele ali emini e la ọgbọgbọ udu, ẹghẹghẹ aghọ Ẹshinẹgba ọ ya kueghie ọgbọgbọ abi o ti shi.

⁶ Emọle, mhi she ri Apolosi ali egbemhe riẹlẹ irọkhọkhọ khase ẹ ni a rọ lẹsẹ abi ungmemhi onana o ngme ni ọọ li, “A deba oni omhese ni o gbe akanya.” Aa khi ke liẹ khi ọghuo e, ọ ti dọsẹ ọlese.

⁷ Elọ o la e egbe ni o ghọ rẹ ẹ mu ẹloe? Elọ a mhọli ni ọa khi

eri a rōli na ẹ? Ini o khia khi eri a rōli na ẹ, elọ o zẹ ni a rọ tonon obọ udu?

8 Ẹẹ a she ga mhue emini a nono nya! Ẹẹ a she ga pfue se! Eri a ke a mhese abi ighie, anye tse anye ke khi eni ẹa mhue! Áá kpa lie khi egbegbo a khili ighie, ishegho ni anye li nu ẹ ke mhese!

9 O li mhe eloe khi anye ighiusomhi na kee, Eshinēgba o rọ shi asha ni o ga kholo ne nya. Eri anye li abi ighumha ni a rue ẹ je obini olele ni a te ya gbolo we-a. Ni anye khi emhi ofeli ni egbo na agbo ee gia, ali ni igeni ee gia.

10 Irari oyi iKirisiti a rọ bino anye shi eyeghe, ama ee a khi eni e lolo mholi ilēsingme elemhi iKirisiti. Anye aa mholi ekpabo, ama ee a mholi ekpabo, ali khi egbo ẹa mu ekpe ẹ na anye, a mu ekpe ẹ na ẹ.

11 Ya ramhi amo, okiamhi ali okiamẹ o gbe anye ramhi, anye aa mholi emini a so, se ni ijeje ide. A ri ukpeloe a gbe anye, anye aa mholi ashini a la.

12 Anye roshaka ri abo eyi anye ẹ gbe ikanya. Ini egbo ẹ ku itse ẹ na anye, anye ẹ ku isemhe na we, ini a mu okholi vule shi anye o, anye ri egbe mie.*

13 Ini ogbo o yese anye evaa, anye ri unu ni o pfomhe soli o. Ramhi memena, eri a bino anye shi egbo afue ali iku ni e la agbo.

14 Aa khi eri mhi keke ebe ona ghi ẹ ni mhi rọ ri omama

mu ẹ. Eri mhia nono ni mhi kpaghie ẹ obọ, abi eni e bia eniye e lie nono ni wewe e kpaghie imi we obọ.

15 U dobe ya mholi egbo agbele igbe (10,000) ododa ni ẹ sese ẹ ungmehi oyi ikirisiti, ama ita oghuo u lese mholi. Mhemhe khi ita ẹ, ee a khi imimhe rote usomhi onete oyi iJesu iKirisiti ni mhi sese ẹ.

16 Irarigho mhia nono ni a ke khonya mhe.†

17 Ona o zẹ ni mhi rọ ghi iTimoti ghi ẹ. Eri mhi nono ingme oyoli abi omọ ni mhi bia, ali khi oni oọ ga oyi Eshinēgba ni o ri igesikia a gbe akanya na Onomhue o khi. ITimoti o ya gueye ẹ angeli oyemhe abi mhi lie deba iKirisiti ali abi oni angeli oyemhe o li de shi osese ni mhia sese ingme oyi iKirisiti elemhi igbaa oyi eni e mie iJesu iKirisiti suo kpa.

18 Eghuo elemhi ẹ, e tsua ipfua eke abine khi mhi aa ke ẹ bhale ya fele ẹ.

19 O kha ghole Onomhue, mhi ya keke bhale oobọ. Eghēghē agho, mhemheghuo mhi ya me abi eni egbo ni ẹ tsua ipfua eke egho e lie ngme, ni mhi gbo me ekpabo nabi ẹ khi wewe e mholi.

20 Irari eghiele ni Eshinēgba o le shi awa udu, ọa khi oyi ungmehi unu tse, ama oyi ekpabo lo.

21 Elo a nono ni mhi li ini mhi bhale? Mhi rue utali mholi obọ bhale, abi mhi ri ayemhe inono ali o pfomhe bhale?

* 4:12 Li zẹ Ika 18.3 † 4:16 Li zẹ 1 iKori 11.1; iFili 3.17

5

A khu inyoghuo na itsebo iteva ya fie

¹ Mhi suọ khi angeli itsebo e la iteva oyẹ ẹ. Onabi aa ya me iteva oyi eni ẹa miesuọ kpa, a ga me iteva oyẹẹ. Ni o ramhi khi ogbọ ọ nu inyọli ọnuzava a gbhe.*

² A gbo ti ipfuabọ a nga, ocho ni egbe e kha rọ pfo ẹ-a, ramhi ni a rọ khu ogbọ oghoghọ iteva oyẹẹ lasele.

³ Abi o rọ tseku khia khi mhi nuata shi ẹ egbe alo-gbugbugbu, ayemhe oyemhe o nu ẹ la. Mhi she pfa ezọ mu ogbọ ni ọ riẹẹ emhi onana, abine khi mhi la aghọ.

⁴ Irarighọ, ini a ri eva oyi Onomhue iJesu lona kugbe, ali ni ayemhe oyemhe o rọ nu ẹ la, ali ni ekpabọ eyi Onomhue ọ rọ la ẹ iteva,

⁵ a rue ogbọ oghoghọ abọ-a na okphaghie, ni ọ pfuẹche idiegbe eyọli-a, ini a pfuese ayemhe oyọli ini iJesu Onomhue ọ bhale.

⁶ O ma khọlọ gba khi a tsua ipfuabọ eke. Ni a rọ ọ zẹ ni egbo enana e la iteva oyẹẹ. Aa leşe khi eri e li abi umiesobọ oghuo ni o ri oili gbolo enekpọle-a?†

⁷ A rue ogbọ okhọlọ onana iteva oyẹẹ lasele, ni a me asha la ipfuase. IKirisiti khi omi osumha oyi iPasova ni a she rọ luase obo na awa.‡

⁸ A khi zẹ ni awa ke riẹẹ imu elemhi okhọlọ ilili ni o li abine khi a kemhi ibuledi ni

a ri ifuma nye. Awa khi eni e pfuase ali ena igesikia, ni awa ke ri ibuledi ni aa ri ifuma nye li imu.§

⁹ Abi mhi rọ kpe te odode keke ebe ghi ẹ, mhi gueye ẹ a khi nu ogbọ na itsebo ke kia kugbe.

¹⁰ Ama ọa khi ingme oyi egbo ena agbo mhi ngme. Irari khi u mema ya lase elemhi agbo le neni u wa kie egbo ni ẹ ku itsebo, ali ena emhi itoegbe ali ighiatọ ali eni ẹẹ ga ikhumhi.

¹¹ Emini mhi ri onana ngme khi, a khi nu oni ọ miesuọ ọlo-egbhọli, ni ọọ ku itsebo kia kugbe, okekhi ogbọ emhi itoegbe o, okekhi oni ọ ga ikhumhi, okekhi oni ọ yese ogbọ eva-a, okekhi ọdonyọ pfuẹche egbe-a, okekhi oni ọ riẹẹ alile. Khi ga nu egbo eghoghọ le eminale kugbe.

¹² Ọa khi akanya oyawa ni awa ke gue ena odatọ ni ẹa miesuọ ezọ. Ena elemhi igbaa oyi eni e mie iJesu iKirisiti suọ tse ni e lina ngeli awa kha leşe ke gue ezọ

¹³ Eshinegba ọ ya gue eni ẹa miesuọ ezọ, ama abi Ebe-nopfuase o ngme ọli khi, "A khu ogbọ okhọlọ oghoghọ ẹ iteva le."*

6

Eni e mie suọ e khi ke lu egbe ezọ ikotu

¹ Ini abi a li ga miesuọ abi inyoghuo a me ingme, elọ o zẹ khi a lu egbe ezọ shi ikotu oyi

* 5:1 Li zẹ iDeut 22.30 † 5:6 Li zẹ iGal 5.9 ‡ 5:7 Li zẹ Okiali 12.5 § 5:8 Li zẹ Okiali 13.7; iDeut 16.3 * 5:13 Li zẹ iDeut 13.5; 17.7

esò-èzò ni ẹa miesuò, ocho ni a kha rọ zẹ ni eni e miesuò e sọ ẹẹ oni ingme?

² Aa lẹsẹ khi awa ni awa miesuò, khi awa ya gue ẹgbọ na agbọ ẹzọ? Ẹẹ ni a khi eni e ya gue agbọ ẹzọ, aa dobe a sọ shi ukuku ingme ifuabọ eyẹẹ?

³ Aa lẹsẹ khi awa ni awa miesuò, khi awa ya gue igeni ẹzọ? Sẹẹ awa aa li ke dobe ẹ sọ egbe awa ikuku ingme na agbọ ona.

⁴ Elo o zẹ ni a rọ o tsua ingme ni a mẹ ogbele kpa ke ghi esò-èzò ni ẹa mhue unu shi ingme igbaa oyi eni e mie iJesu iKirisiti suo?

⁵ Eri mhia ngme ona ni omama o mu ẹ. Eri aa mẹ ọngẹẹ ni o lẹsẹ ingme iteva oyẹẹ, ni o dobe ya ri inyoghuo aava ni e miesuò riẹle?

⁶ Elo o zẹ ni ọngẹẹ o rọ o rue inyoghuo ọli le deba eni ẹa miesuò ni e rọli gue ẹzọ?

⁷ Emini o da zẹ khi a mẹ iluegbe-èzọ ikọtun iteva oyẹẹ ne, eri o rọkhasẹ khi eni e de a khi. Oni u kha rọ ri egbe mie ini a lue na ẹ, ni u kha rọ lama ni a li ẹ le,

⁸ u ri ochoghọ vu ya lue na ẹgbọ, u li wẹ ẹ le, gbo li shi eni e miesuò elese.

⁹ A lẹsẹ gboo khi ọna ọkhọlo ọa ya lo Eghiele oyi Ẹshinẹgba. Aa khi di egbe ẹ. Ẹgbọ ni ẹ ku itẹbọ, okekhi eni ẹ ga ikhumhi, okekhi eni ẹ kia okia, okekhi emọse idiegbe, ali emọse ni e nu emọse enabi wẹwẹ ẹ gbhe,

¹⁰ li shi ighiatọ, okekhi ena emhi ituegbe, okekhi edonyo yese egbe-a, okekhi eni ẹ yese ẹgbọ eva, wẹ khi eni e li ẹgbọ a le, e ya lo Eghiele oyi Ẹshinẹgba.

¹¹ Eghẹghẹ o la o ni ẹẹ a rọ kpẹ la agbọ oghoghọ, ama a she khuẹsẹ ẹ olamhẹ-a, a khuẹsẹ-a pfuasẹ, a pfa na ẹ, rọte eva oyi iJesu iKirisiti Onomhue ali Ayemhẹ oyi Ẹshinẹgba oyawa.

Khi ke gbe ikanya itẹbọ

¹² Ogbọ o dobe ya liẹ, “Emini o ghọle mhẹ mhi dobe ya riẹle.” Ama mhie ọli, “Aa khi emhikpa e ti ni u riẹle.” Ali khi ini mhi tseku dobe ya riẹle emhikpa, mhi aa gbudu mele oghumha oyi emhikhoghuo-a.*

¹³ Wa liẹ khi, “Eminale khi oyi akpidi lo, ali khi akpidi o khi oyi eminale.” Igesikia onana o khi, ama ẹleghuo, Ẹshinẹgba o ya yese wẹ-a. Ama aa riẹle idiegbe eyawa shi itẹbọ ilili. Eri a riẹle idiegbe, ni awa rẹwẹ ke ga Onomhue. Ali khi idiegbe oyawa oo mu Onomhue egbe gba.

¹⁴ Ali khi Ẹshinẹgba o ya ri ekpabọ eyọli guise awa eghuli le, abi o guise Onomhue oyawa eghuli le.

¹⁵ Aa lẹsẹ khi idiegbe oyawa khi uguabọ idiegbe oyi iKirisiti lo. Eri ogbọ o ke ya rue uguobọ idiegbe oyi iKirisiti, o ke ku ọli gbe uguobọ oyi adegbe? Ọa zẹ ya li!

* 6:12 Li zẹ 1 iKori 10.23

16 Abi aa lẹsẹ khi ọgbọ ni ọ da lẹ deba adegbe ne, khi ọ she to egbọli ma ọni adegbe ọ? Idiegbe oghuo e ke khi, irari khi ebe ọọ li, “Wẹwẹ avavava, idiegbe oghuo e ke khi.”†

17 Ama ọgbọ ni ọ da to ma Onomhufe ọ ne, ayemhe oghuo e ke khi.

18 Mẹ itsebo ikuku na, olamhe okhoghuo ọa la ọ ni o ri ichimhi a mu ọgbọ abi olamhe itsebo ikuku. Irari khi olamhe itsebo ikuku oo re e lamhe shi idiegbe oyi yeye ghuo ọ.

19 Aa lẹsẹ khi idiegbe oye e khi owa ugami oyi Ayemhenon-pfuase lo, ni o la idiegbe oye, ni Eshinẹgba ọ ro na e? Ọa ke khi yeye u mhọli egbe e.‡

20 irari khi eri Eshinẹgba ọ de ghale. Irarigho, u mema ya ri idiegbe eye ri ufumhi na Eshinẹgba.

7

Ingme ingeli oyi omose ali okpotso

1 Ni mhi ro so shi ogbo ni a keke shi ebe ya mhila mhe.

O ti ini omose ali okpotso ẹa ya lẹ deba egbe.

2 Ama irari itsebo, omose ogbogbo ali ughue oli e ke lẹ deba egbe, okpotso ali odoli e ke lẹ deba egbe.

3 Omose ọ khi ri okiamhi ughue gbe ughue oli, okpotso ọ khi li ri okiamhi ughue gbe odoli.

4 Okpotso lolighuo ọa mhọli idiegbe oyoli, ama odoli ọ mhọli we. Igho o li khi

egbe oyi omose, ọa khi omose lolighuo ọ mhọli idiegbe eyoli, ama ughue oli ọ li mhọli we.

5 A khi kie egbe, sefe khi omose ali okpotso e lama shi egbe ọ khi wewe e ya nuata shi iledeba-egbe ne, ni e me asha mhọli ukuku eghẹghẹ ro so iromhi. Oni eghẹghẹ o kha dose se, e gbo bhale ya lona, ini okphaghe ọ khi me asha mu we fe, irari khi egbe ẹa ze e mu shi ingme ughue.

6 Eri mhi khokho ona na e, ọa khi ushi ni mhi shi e shi eke na e.

7 O ma kha ti gba ini ogbokpa ọ dobe ya la ọ ni ọa rue okpotso shi abi mhemhe lo. Ama awa nya awa aa li abeghuo. Eshinẹgba ọ somhi ogbogbo isomhopfa ododa. Ona ọ kha mhọli ona, olese ọ mhọli ogho.

8 Efe ni aa la ughue ghue ali esamhi-olimhi, o ti ne ini ẹa bie ye ughue abi mhemhe.

9 Ama ini ẹa dobe ya mu egbe we, e ke lẹ ughue. O tine ni a ye ughue dose ocho ni a ro ya shito, egbe ẹẹ lala e shi ingme ughue.

10 Efe ni a la ughue, mhi mhesa ona na e, ni ọa rote obo oyemhe bhale, ama obo oyi Onomhufe. Okpotso ọ khi rote obo oyi odoli vu.

11 Ama ini ọ li gho, ọ khi gbo ye ughue olese ghue, ochogho ọ ka nu odoli ro riefe. Omose ọ khi gbudu khu ughue oli.*

12 Efe oye enekpole, mhi

† 6:16 Li ze Igbae 2.24 ‡ 6:19 Li ze 1 iKori 3.16; 2 iKori 6.16

* 7:11 Li ze iMat 5.32; 19.9; iMak 10.11-12; iLuk 16.18

gue ona ye ẹ, mhemhe mhi ngme ona, ọa khi Onomhue. Ini omose ni o miesuo o rue okpotso ni ọa miesuo ughue, o kha ghole oni okpotso ni o ro nu oni omose shito, oni omose o khi khu oli.

13 Ini okpotso ni o miesuo o ngeli na omose ni ọa miesuo, ni oni omose o ro mholi oghuemhe khi loli ya kie ri oni okpotso shi, oni okpotso o khi pfa oni ughue-a.

14 Irari khi okpotso ni o miesuo oo rue ipfuase ẹ bhale ughue oyoli, ali khi omose ni o miesuo o ri ipfuase ẹ bhale ughue oyoli. Ini ọa khi igho lo, imi ẹ, eni ẹa pfuase e kha khi, ama abi o ke li ena khi, a she khuese we-a pfuase.

15 Ama ini oni ọa miesuo elemhi wewe aava, oo nono ni loli lase oni ughue le, o ke vu. Emhikhoghuo ọa ke la akana ya mu omose okekhi okpotso ni o miesuo mhue ini a me na. Eri Eshinegba o lu awa ni awa ro la gbọ opfomhe.

16 Yeye okpotso, u fe lese ini itobo oye ode o kha ro mhue imiepfuese? Abi khi, yeye omose u lese ini itobo oye ughue o kha ro mhue imiepfuese?

17 Abibi o tseku li, ogbogbo o migha ashini o la ni Eshinegba o ro lu oli, ali emini o lu oli shi. Ona o khi omheshe ni mhi ro na igbaa oyi eni e mie iJesu iKirisiti suo nya.

18 Ini omose o she shele-a neni Eshinegba o lu oli, o khi mu oli pfi riele. Ini omose ọa shele-a ne neni a lu oli, o khi ya shele-a.

19 Ọa mhue abi o ngme, ini ogbo o shele-a okekha khi ọa shele-a, emini o mema mu egbe khi, ni a ro ri ishi eyi Eshinegba gbe akanya.

20 Ogbogbo o kie li abi o la o shi ni Eshinegba o ro lu oli.

21 Oghumha u khi ni Eshinegba o ro lue? Khi ze ni ogho o nase udu. Ama ini u me asha ya pfa egbe ẹ o le, li ghọ.

22 Irari khi oni o khi oghumha ni Onomhue o ro lu oli, oni a rue abo-a o ke khi, igho li khi oni a rue abo-a ni Onomhue o ro lu oli, oghumha oyi Onomhue o ke khi.

23 Eri a de ẹ ghale, irarigho a khi gbo khi oghumha oyi ogboese.

24 Inyoghuo, ogbogbo o nu Eshinegba la abi o li ni a ro lu ẹ.

25 Shi ingme oyi ozele ni ẹa mu ughue ghue. Mhi aa rote obọ oyi Onomhue mie ushi ni mhi ya shi na we, ama mhi ri ushi oyemhe bhale abi oni a ri itobo ilelemhi khi oni a ri egbe ẹ nga.

26 Ini a bino ingme ni a me agbo memena, mhi sa khi o ti ini ogbo o bie shito abi o li.

27 U kha la ughue se, khi dua ni u pfa li-a. Ini waa la ughue ne, khi dua abi u li ya lo o.

28 Ama ini o khia khi u lo ughue, waa pfido, ini o rie khia khi u waa mu ughue ghue. Ama eni e rue ikpotso, e ya mholi anasemhe elemhi agbo ona, mhi aa nono ni a me onana.

29 Inyoghuo emini mhi ri

ona ngme khi eghẹghe o ke she. Rọ te memena vu, emose ni e rue ikpotso, ughue we e khi mu we egbe dose.

³⁰ Eni e vie, e khi ze ni o lo we egbe dose ode. Eni e ghele, e khi ze ni oghẹle rue we vu, eni e de emhi, e khi ze ni emini e de e lo we alo,

³¹ eni e mhọli emini e ri emhi na agbo o riẹle, e khi ze ni e rue we udu vu. Irari khi abi agbo ona o laọ shi memena, o she e dose.

³² Mhia nono ni a rue udu ayele le. Omose ni ọa rue ọkpotso, ikanya eyi Onomhue ẹa ku ọli ẹle-a, irari khi eri o nono abi lọli liẹ riẹle oghuemhe oyi Onomhue.

³³ Ama omose ni o rue ọkpotso shi, eri isamhi agbo ẹẹ nase ọli udu, irari khi eri o dua ni lọli ri egbe ke mu ughue ọli.

³⁴ Irarigho, eri isamhi eyọli e kemhi eva. Eri omueshi ni ọa ye ughue, okekhi, omueshi ni omose ọa ta owe lase ghue, ingme eyi Onomhue e mu ọli egbe. Eri o dua ni lọli ri idiegbe ali ayemhe oyọli na akanya oyi Onomhue pfo nya. Ama ọkpotso ni o ye ughue, emhi agbo o sa, irari khi eri ọọ dua abi lọli li ri egbe e ke mu ọdo.

³⁵ Eri mhi a ngme onana ni mhi kpaghie e obo, ọa khi eri mhia nono ni mhi zu e ode, ini a khi la ughue. Ochoghọ eri mhia nono ni a ke riẹle emini o te ode, ini udu oye o khi kemhi eva shi iregbena Onomhue pfo oyeẹ.

³⁶ Ini omose o me khi egbe

ẹa ke ze lọli e mu deba omueshi oyọli ni omose ọa ta owe lase ghue, ni e ga lama na egbe khi wewe e ya ri egbe shi. Ni o ro she te ni o ye ughue abi o ye ni o, o rue oni omueshi ughue abi o ghọle ọli shi. Ọa lamhe.

³⁷ Ama omose ni o me khi lọli mhọli udu no toto ni o dobe ya mu egbọli mhue. Ini o lama shi udu oyọli khi lọli ẹa ya rue oni omueshi oyelue ne, oni omose ọna o guẹ kia.

³⁸ Ogbọ ni o rue omueshi oyọli ughue o guẹ kia. Oni ọa rue ọli, lọli o guẹ kia ne.

³⁹ Ọkpotso ni o la ughue, ọa gbudu rọte obo oyi ọdọli vu ini o da kie la agbo. Ama ini ọdọli o ghua, o dobe ya ngeli na omose ni o nono, ama omose oni o miesuo o mema ya khi.

⁴⁰ Abi mhẹmhe so oni ingme shi khi, o ya mhọli oghẹle ne ini o shito khi ọa bie ke ngeli. Mhi sa khi mhi mhọli Ayemhe oyi Eshinegba ni mhi ro o ngme ona.

8

Eminale ni a ro luase ikhumhi

¹ Mena ni mhi ro ngme nga ogbo ni a mhila mhe ingme eminale ni a ro luase ikhumhi.

Awa lese khi, "Awa nya awa ga mhọli ilese," ingme ona. Eri ilese o ri ogbo a tipfuabo nga ke titi egbe, ama eri inono o ri awa a kpaghie egbe obo.

² Oni o dabi khi lọli lese gba, ọa kie lolo lese abi o kha li lese ne.

³ Ama oḡbọ ni ọ nono ingme oyi Ẹshinẹgba, Ẹshinẹgba ọ lẹsẹ ọli.

⁴ Ama memena, ingme oyi eminale ni a rọ luasẹ ikhumhi, awa lẹsẹ khi ikhumhi ọa khi emhikhoghhuo elemhi agbọ, ali khi Ẹshinẹgba oghuo ọ khi.

⁵ Ini a tseku mẹ emini a lu ilitsa ali ekhemhue, o khi eni e la idane o, okekhi ena ekekhe, ọngewẹ ọa khi Ẹshinẹgba wẹkhi Ọnọmhue.

⁶ Ama oyawa khi, Eshinẹgba oghuo kpe awa mhọli, ikhi ita ni emhikpa e rọte obọ oyọli bhale, ali ọni awa la agbọ na, ali khi Ọnọmhue oghuo ọ la ọ, ni ọ khi iJesu iKirisiti ni emhikpa e rọte obọ oyọli bhale ali ni awa rọte obọ oyọli la agbọ.

⁷ Ama ọa khi eni e miesuo nya e lẹsẹ igesikia onana khi afuẹ ilitsa e khi. Ama ingme oyi eni ilitsa ena, o she lo egbo eghoghọ egbe ramhi khi ini e le eminale ni a rọ luasobo eghoghọ, eri ọ li wẹ egbe khi eni ilitsa e liẹ ga eghọ. Eri ona ọọ yese udu oyewẹ ni ọ gue wẹ ezọ ọ-a, irari khi ọa lolo toto imiesuo ne.

⁸ Ama eminale ẹa ti oḡbọ ọ mama Ẹshinẹgba. Ẹa ri awa ya khi eni ẹa ti ini awa aa le, wẹkhi eri e ke ri awa ya ti ne ini awa le.

⁹ Ama a kuegbe-a ini afa ni awa mhue rọ ọ riẹle emini o ghọle awa o khi ya khi ọzuode na oḡboese ni ọa toto imiesuo, ni o rọli ya de pfilo olamhe.

¹⁰ Ini oḡbọ ni ọ mhue udu ni ọa toto imiesuo ne ọ fẹ mẹ

khi yeye ni u mhọli ilẹsẹ, khi u la udi olitsa ẹ le eminale, u sa khi oghọ ọa ya ri udu nali rọ ke le eminale ni a rọ luasẹ olitsa?

¹¹ Ighọ ọni oḡbọ ni udu oyọli ọa toto eghọ ni ọ khi inyoghue ni iKirisiti ọ ghu-a na ọ li ya opfu-a itobọ ilẹsẹ oye.

¹² Ini a da mẹ na ne, iKirisiti u lue a na, ini u da lue na inyoghue ni a ga miesuo, eri u wa kuale udu oyewẹ ni ọ gue wẹ ezọ ni ọa toto eghọ utse.

¹³ Irarighọ, ini o da khia khi eminale ni mhi le o ri inyoghuo-mhe ya de pfilo olamhe ne, mhi aa ke gbo tigbe ya le eminale, ini mhi khi ya zẹ ni inyoghuo-mhe ọ de pfilo olamhe.

9

Afu ni aghiusomhi na keẹ ọ mhọli

¹ Elo e kpomhe ọ le? Mhi áá khi aghiusomhi na keẹ? Mhi áá she mẹ iJesu Ọnọmhue oyawa, mhi rẹ ẹ mie ọli suo?

² Ini o tseku khia khi mhia khi aghiusomhi na keẹ shi egboese ọ, mhi aa li khi aghiusomhi na keẹ shi ẹ ọ? Akanya ni mhi gbe iteva oyeẹ o rọkhasẹ khi aghiusomhi mhi khi shi ẹ ọ.

³ Ina mhi li a sọ egbo ni e ri unu a yese afu ni mhi mhọli-a,

⁴ eri mhi aa fu tẹ ọ ni a ri eminale ali onyo a na shi akanya ni mhia gbe?

⁵ Mhi aa li fu tẹ ọ ni mhi li ẹ rue okpotso ni ọ miesuo shi, abi ighiusomhi na keẹ enekpole, ali inyoghuo Ọnọmhue ali iPita e li rọshi.

Ɛgheghe agho ni mhi li ke rue oli mhuẹ obo ini mhia le asha?

⁶ Abi khi mhemhe ali iBan-abasi tse anye lese khi eni e ri obọ oyewe ẹ gbe akanya ke ri eminale na egbe anye le?

⁷ A me okhọli-okhuẹ ni lolighuo ọ fali egbọli ota? Oghiale onoghuo ọa ya le emhi ekomhi eyọli? Oni ọ ri ena kia onoghuo ọa ya rote ena eyọli da amẹ inyeli?

⁸ Abi usamhi oyi egbo o li mhi lie ngme oli, abi khi eri ushi ọa li mu ma ọ?

⁹ Irari khi a keke oli shi ebe Ushi oyi iMosisi, “Khi mu ẹna onokpo unu zu ini u roli ẹ mhele ikpamhi emhi.” Ingme oyi ẹna weẹ khi Eshinegba ọ li ghọ lese sa?*

¹⁰ Itobọ oyawa ọ rọ ngme onana? Ii, irari oyanye a rọ lighọ keke oli. Itobọ khi ogbo ni ọ gua ọ kha gua ni oni ọ khiẹse ọ rọ khiẹse, eri e ga roli shi udu khi wewe e ya mhuẹ okemhi shi eni emhi ekomhi.

¹¹ Aborokhia khi anye she ri emhi ayemhe kọ iteva oye ẹ egho, anye khi eni e kha rote obọ oye ẹ li khiẹse emhi ikpaghiobo ni a me eloe.†

¹² Ini o khia khi egboese e te ni a ri ikpaghiobo ẹ na, ọa khi anye kha ga mema te ọ ne? Ama anye ẹa rue ete-awe oni afu ona.

Ochogho, eri anye ri egbe mie emini anye me kpa ini anye khi zu usomhi onete oyi iKirisiti ode.

¹³ Aa lese khi eni e la Owa Oyi Eshinegba a gbe akanya, khi oni owa e te ẹ le eminale, ali khi eni e la atete ẹ ga, eri e rote emini a rọ luasobo ẹ kemhi?

¹⁴ Igho, Onomhuẹ ọ li mhese oli eni e ri usomhi onete a tse abo, e rote ọ ke le emhi.‡

¹⁵ Ama mhia kie ri eni afu ena gbe akanya deba ẹ, wekhi eri mhi keke ebe ona ni a ba riẹle emhi eghogho na mhe. O tine ni mhi bie ghu-a ni ogbo ọ rọ lie mhi khi tono obọ udu.

¹⁶ Mhia mhuẹ afu ni mhi rọ tono obọ udu shi usomhi onete ni mhi rọ tse abo. Eri a mhese oli na mhe. O ma khọlo mhe egbe ini mhia ri oni usomhi onete tse abo!

¹⁷ Ini o khia khi eri mhia tsabo ungmemhi oyi Eshinegba itobọ khi o ghọle me. A ya fali mhe ota. Ama ini o riẹ khia khi ọa ghọle mhe, emini Eshinegba ọ rọ nga mhe obọ lo ni mhia riẹle

¹⁸ Ighe ifata ni mhi ke ya mie mena? Afa o khi na mhe ni mhi ke tsabo oni usomhi onete, ni mhia khi oki shi ọ, ni mhia mie emini e khi eyemhe shi akanya oyi itsabo usomhi onete.

¹⁹ Mhemhe ghuo mhi mhese ona na egbemhe, mhia khi oghumha oyi ogbokhoghuo, ama mhi ri egbe mhe mele oghumha oyi ogbokpa-a, ni mhi rọ lu ebubu egbo na iKirisiti abi mhi li dobe.

²⁰ Abi mhi rọ nu egbo iJu u gbe akanya, mhii ngeli abi

* 9:9 Li ze iDeut 25.4; 1 iTimo 5.18 † 9:11 Li ze iRom 15.27 ‡ 9:14 Li ze iMat 10.10; iLuk 10.7

ongi iJu ni mhi rọ doḅe lu we. Abi o rię khia khi ushi iMosisi ọa mu me, mhi kiele ę ngeli abi ọni ushi o mu ini mhi nu ęgbọ ni e la oni ushi gbe akanya, ni mhi doḅe lu we.

²¹ Ighọ o li khi, abi mhi rọ nu ęgbọ iJeta ę gbe akanya, mhi ngeli abi ọgbọ ni ọa khi iJu ni ushi iJu ọa mu ni mhi rọ doḅe lu we. Ona ọ lię khi mhi aa ke ri ushi oyi Eshinegba a gbe akanya, ama ushi oyi iKirisiti mhi rọ gbe akanya.

²² Ini mhi la ifuabọ oyi eni irudunga oyewe ọa toto, irudunga oyemhe o li abi oyewe, ni mhi rọ doḅe lu we. Emhikpa mhia mela-a na ęgbọ nya, ni mhi rọ tsumhi eghuo, ode ni mhi ya te doḅe rięle ọli kpa.

²³ Enana nya, irari oyi usomhi onete mhi rọ lighọ ni mhi mhuę okemhi shi ikhivose eyoli.

²⁴ A lese khi ebubu ęgbọ e migha shi unamhi ni a na, ama ọghuo elemhi we ọ kpe na a pfo, ni ọ mie eleli unamhi. Irarighọ, a na ode ni a te ya mie eleli oyi unamhi.

²⁵ Eri ọgbokpa ni ọ la unamhi ya na ọ kpe ę wena ushi unamhi egbegbo. Eri ę na ni e mie arula oghie ni ọọ ke-a. Ama arula ni o la ọ agboagbo awa na unamhi ę shi.

²⁶ Onana o ze ni mhi rọ na unamhi oyemhe sheshe ya ramhi ukpese. Loli o ze ni mhia rọ li abi ọpfiekpa ni ọọ pfi ekpa kua irarogbe.

²⁷ Eri mhia nase egbe eyemhe ni mhi doḅe mhesę ke na we. Mhi aa nono, ini mhi tsabo oni usomhi onete ona se, ni mhi khi ọni a khu pfi.

10

A rote okhe oyi ęgbọ iZireni tse agua ye ęgbọ

¹ Inyoghuo, mhia nono ni a sato emini itita awa ni e deba iMosisi e me. Oguese oyi otughunu o khukhu we, wewe nya e gbo rote okę ifulo ya dose tselele.*

² Elemhi otughunu ali okę oniemi e la batazi abi eni ę deba iMosisi.

³ Wewe nya e le eminale ayemhe.†

⁴ E gbo da ame oyi ayemhe ọghuo ni o rote eche ayemhe ni oo deba we tu. Oni eche khi iKirisiti.‡

⁵ Abi o tseku li ghọ, egbe ęa mu Eshinegba deba ebubu we, itobọ ighọ, eri a miatse ilimhi eyewe ku ọdagbe ifufu.§

⁶ Mena, ena nya irokhasę e khi na awa, ni o tse agua ye awa, awa khi mhuę ọghuemhe na emhi ebe abi wewe e li,*

⁷ we khi ilita awa ya ga abi eghuo ọ e li. Ebe-no-pfuase o ngme ọli khi, "Eni ęgbọ e shito le, e da, e gbe ishimhi idobie, e ku itsebo."†

⁸ Awa khi khili ena itsebo abi eghuo ọ e li, ni o ze khi agbele uye ali ese, 23,000, e ghuloa ogbeleghuo.‡

* **10:1** Li ze Okiali 13.21-22; 14.22-29 † **10:3** Li ze Okiali 16.35 ‡ **10:4** Li ze Okiali 17.6; iNoba 20.11 § **10:5** Li ze iNoba 14.29-30 * **10:6** Li ze iNoba 11.4 † **10:7** Li ze Okiali 32.6 ‡ **10:8** Li ze iNoba 25.1-18

⁹ Awa khi mu Onomhue fe bino abi eghuo o e li, ni enye e ro gbolo we-a. §

¹⁰ Awa khi wolo abi eghuo o e li ni Ageni eghuli o ro gbolo we-a.*

¹¹ Eri emhi ena nya e li we, ni a ro sese awa ingme elese, a keke we shi eke tse agua ye awa ni awa la egheghe ikpukhokho agbo ona.

¹² Ini u dabi khi u migha, gue kia ini u khi de ode-a.

¹³ Aa me imufe okhoghuo ni a me egbe, ni o a khi onabi egboese ea me ghue. Ama Eshinegba oni a ri egbe e nga lo. Oa ya ze ni a mu e fe ni o fu dose e, ni aa ya dobe ri egbe mie. Ama ini a mu e fe, Eshinegba o ya ri ode ni a te ya pfue o bhale, ni a ro dobe ya ri egbe mie.

¹⁴ Irarigho, inyoghuo, a nuata shi ikhumhi o.

¹⁵ Eri mhi nu e ngme abi egbo elesingme. Ee ghuo a sa emini mhi ngme.

¹⁶ Ini awa rote uko ni awa lema Eshinegba o khivose shi da, o a khi oia eyi iKirisiti awa da? Ini awa le ibuledi ni awa kemhi, o a khi idiegbe oyi iKirisiti ni awa le?†

¹⁷ Irari khi ibuledi oghuo o khi, awa nya ini awa tseku bu, idiegbe oghuo awa khi, irari khi eminale oghuo awa kemhi.

¹⁸ A sa ingme oyi egbo iZireni ghue. Oa khi eri wewe nya ni e le eminale ukhomhi

atete ugamhi e ga mholi obo shi oni ugamhi oyi Eshinegba egho?‡

¹⁹ Eri mhi ri ona lie khi olitsa ali eminale ni a ro luase oli khi egbegbi emhi e khi?

²⁰ Iiye o! Emini mhi a ngme khi, emini eni e ga ikhumhi e ro luase obo atete, okphaghi e rewe e luase, o a khi Eshinegba. Mhi aa nono ni a mhue kugbe iyemhe okphaghi e o. §

²¹ Wa ya rote uko oyi Onomhue da, u gbo rote uko oyi okphaghi e da. Wa ya rote ukpeko oyi Onomhue le, u gbo te ukpeko oyi okphaghi e le.

²² Abi khi eri awa nono ni Onomhue o ke kpe ofuma? Eri awa dabi khi awa toto dose oli?*

Epfua ni eni e miesuo e mholi

²³ “Emini o ghole awa, awa dobe ya ri ele.” Abi a li ngme oli. Ama aa khi emhikpa o mholi eleli. “Emini o ghole awa awa dobe ya ri ele.” Ama aa khi emhikpa o mholi ikpaghiobo. †

²⁴ Ogbokhoghuo o khi lese ke na shi onote oyi egboli tse ama onete oyi egboese.

²⁵ Elamhi kpa ni a ro o de oki, ke de oli le, khi ri irari udu oye ni o o gue e ez o mhila ogho okhoghuo shi o.

²⁶ Irari khi Ebe-no-pfuase o ngme oli khi, “Eke ali emini e la o nya, khi Onomhue o ga mholi we.” ‡

§ 10:9 Li ze iNoba 21.5-6 * 10:10 Li ze iNoba 16.41-49 † 10:16 Li ze iMat 26.26-28; iMak 14.22-24; iLuk 22.19-20 ‡ 10:18 Li ze iLey 7.6 § 10:20 Li ze iDeut 32.17 * 10:22 Li ze iDeut 32.21 † 10:23 Li ze 1 iKori 6.12 ‡ 10:26 Li ze Iwolo 24.1

27 Ini ogbo ni ọa miesuo ọ luẹ ukue, ni u rọ sa li shi udu khi u ya ye, le emiemi ni ọ rọ shi ẹ eke. Khi mhila ogbo okhoghuo oyi udu ni ọọ gue ogbo ẹzo.

28 Ama ini ogbokhoghuo ọọ ye, “Eminale ona, ikhumi a roli luase.” Khi le oni eminale ogho, irari usamhi udu oyi oni ọ gueye ogho, ali irari udu oye.

29 Aa khi irari usamhi udu oye, ama irari usamhi udu oyi oni ogbo ogho. “Elo o ze khi ogboese o ke ya khi ọzuode shi ẹpfua oyemhe, irari udu oni ọ gue ogbo ẹzo oyi ọli?”

30 Ini mhi kphemhi na Eshinegba shi eminale ni mhia le, elo o ze khi ogboese o ke tsue mhe shi eminale ni mhi kphemhi shi?”

31 Abi o lao shi khi, emiemi ni u wa riẹle kpa, ni u wa le, ni u wa da, riẹle ọli shi ufumhi oyi Eshinegba.

32 Khi ngeli angeli ni o ya ri ogbokhoghuo de, o khi egbo iJu okekhi egbo iJeta okekhi igbaa oyi eni e mie iJesu iKirisiti suo eyi Eshinegba.

33 Eri mhi dua ni mhi riẹle emini o ti ogbokpa ẹloe odekhode. Irari khi mhia lese na khu oyi mhemhe ghuo, ama oyi ogbokpa ini a mie we pfuese.

11

1 A ke khonya mhe abi mhi lie khonya iKirisiti Onomhue.*

Ukhomhi iguese elemhi ugamhi

2 Mhi kueghie ẹ shi abi a lie sato mhe egbe ni a rọ a deba osese ni mhi sese ẹ.

3 Ama mhi a nono ni a lese khi iKirisiti ọ khi ukhomhi oyi omose nya, ali khi omose ọ khi ukhomhi oyi Okpotso. Ama Eshinegba ọ khi ukhomhi oyi iKirisiti.

4 Irarigho, omose ni ọọ so iromhi okekhi eri ọ ngme ungmehi imeguele, ni ọ rọ da ri emhi guese ukhomhi ne, oyeghe ọ rọ ghi iKirisiti ni ọ khi ukhomhi oyoli.

5 Igho okpotso okhoghuo ni ọọ so iromhi okekhi eri ọ ngme ungmehi imeguele, ni ọa rọ da ri emhi khukhu ukhomhi ne, eri ọ yeghe-a, eri ọ ri odoli ni ọ khi ukhomhi oyoli she-a, eri o bie li abine khi ọ kpogholo itsu ukhomhia.

6 Ini okpotso ọa da khukhu ukhomhi ne, ọ ka ta itsu ukhomhi-a nyaa. Ini o da khia khi emhi omama ọọ khi ini okpotso ọ kpogholo itsu-a egho, ọ ke khukhu ukhomhi oyoli.

7 Ọa ye ni omose o khukhu ukhomhi oyoli, irari khi irokhokho ali ufumhi oyi Eshinegba ọ khi. Ama okpotso ufumhi oyi omose ọ khi.†

8 Irari khi aa rote egbe oyi okpotso ma omose, ama idiegbe oyi omose a te ma okpotso.

9 Aa ma omose na okpotso, ama omose a ma okpotso na.‡

10 Itobo onana, ali irari oyi igeni, okpotso ọ ke khukhu

* 11:1 Li ze 1 iKori 4.16; iFili 3.17 † 11:7 Li ze Igbae 1.26-27 ‡ 11:9 Li ze Igbae 2.18-23

ukhomhi oyoli ni o ro rokhase khi o kie la omhese oyi odoli.

11 Elemhi Onomhue ni awa ga la, okpotso o a khi ongeli, we khi omose o khi ongeli ni wewe aava ea mhue abi e lie rieie ugamhi kugbe.

12 Irari khi abi a rote omose ma okpotso, igho okpotso o li bia omose. Ama emhikpa obo oyi Eshinegba e te bhale.

13 Ee ghuo a so o bino ini o ti ni okpotso o ke so iromhi lema Eshinegba o a ri emhi khukhu ukhomhi el-emhi owa ugamhi?

14 Abi a ma emhi nya shi rote eke vu, o a sese e khi, omama o khi ni omose o ro mhue itsu ni e nuwe dolu shi ukhomhi?

15 Ama khi ini okpotso o mhue itsu ni e nuwe shi ukhomhi khi ufumhi ali isomhotse o khi na li? Eri a ri itsu ni e nuata na li ni o ro khukhu ukhomhi.

16 Ini ogbo o nono ni loli khako shi ingme onana, emini mhi mhue ya ngme khi, anye-a mholi ode olese ni anye te e rieie, igho li khi igbaa nya eyi eni e mie iJesu iKirisiti suo eyi Eshinegba.

Ushi oyi Eminale no pfuase oyi Onomhue

(iMat 26.26-29; iMak 14.22-25; iLuk 22.14-20)

17 Rote omhese ni mhi ro bhale, mhi aa kuoghi e, irari khi ilona kugbe shi ugamhi oye e, oo li oyese dose onete.

18 Irari onodode, a she gueye mhe khi okemhi oo la iteva oye e ini a lona ilegba

abi eni e mie iJesu iKirisiti suo. Mhi mie shi o khi igho o khi.

19 Aa me emini o ze khi aa ya khako. Ama oni ekhako ona o ya ri eni Eshinegba o mie iteva oyi e khase.

20 Ini a lona kugbe shi oghuo, o a khi eminale oyi Onomhue o khi ni a le,

21 Irari khi ini a le, aa ya migha khe egbe. Ogbogbo o rue eminale oyoli e le. Irarigho, eri eghuo e da pfueche egbe-a, eghuo ea ga me le kpa.

22 Aa mhue apfe oye e ni a la le ni a la da? Abi khi eri a ri eloe a gbe igbaa oyi eni e mie iJesu iKirisiti suo oyi Eshinegba? Eri a nono ni a ri omama mu egbo ni ea mhue emhikhoghuo? Se a nono ni mhi ngme shi onana? Eri mhi ya kuoghi e mena? Iiye o!

23 Irari khi obo oyi Onomhue mhi te mie ose e ni mhi sese e. Khi iJesu Onomhue, eliyose ni a roli de, o rue ibuledi,

24 o kphemhi na Eshinegba o khi oli-a, oo li, "Idiegbe oyemhe na ni a ro na e, a ke li ona ro sato mhe egbe."

25 Igho o gbo li, abi e ro le se. O rue uko onyo, oo li, "Onana o khi uko oyi ilama kugbe onogbo, ni a ri oia eyemhe rieie. Ini a da lina da ne, eri a da li ro sato mhe egbe."§

26 Irari khi eghenge kpa ni a ro da le ibuledi onana ni a ro da oni uko onana ne, eghuli oyi Onomhue u ro tse abo egho neni o ya bhale.

27 Onini o da le ibuleđi oyi Onomhuę ni o gbo rōte uko oyoli da, ode ni o a gbe akanya ne, o she lue, o lamhe shi idiegbe ali o lia oyi Onomhuę o.

28 Irarigho, ogbogbo o bino egboli bie ne neni o tigbe le, neni o rōte oni uko da.

29 Ini u waa da lese emini oni idiegbe oyi Onomhuę ona o migha shi ne, ni u ro da le oni ibuleđi ni u ro gbo te oni uko da, u she le u gbo da ro ri iguezo bhale ghi egbe e.

30 Ona o ze ni ebubu e e ro o ghua, eghuo ea mhue ochi, ebubu e she ghulo-a.

31 Ini awa kpe gue egbe awa ezō awa aa ya de pfilo ezō oyi Eshinegba.

32 Ini Onomhuę o gue awa ezō, eri o sese awa ingme ini awa khi nu agbo pfua.

33 Irarigho, ee inyoghuhmhe, ini awa lona ni awa ro ya le eminale oyi Onomhuę, awa ke migha khe egbe.

34 Ini a me oni okiamhi o o gbe, o la apfe le emhi ini a khi lo ezō oyi Eshinegba, ini a lona kugbe. Mhi ya pfuse ingme enekpole ngme ini mhi bhale.

12

Isomhopfa Ayemhe

1 Mena ni mhi ro so shi ogbo ni a mhila mhe ingme isomhopfa Ayemhe-no-pfuase.

Mhia nono ni a lese egbegbingme ni o la o.

2 A lese khi eghēghe ni a ro khili eni ea miesuo, a di e lo ode ni a la luase ilitsa ni ea mhue ayemhe.

3 Mhia nono ni mhi gueye e khi aa me ogbo ni Ayemhe oyi

Eshinegba o ro gbe akanya ni o ya lie, "A pfi unu na iJesu!" Aa me oni o gbolo ya lie, "Ijesu o khi Onomhuę!" Ini o a li khi Ayemhe-no-pfuase o sese oli.

4 Isomhopfa ododa e la o, ama Ayemhe oghuo o kemhi we.

5 Ode ebubu e la o ni a te e ga Onomhuę, ama Onomhuę oghuo awa ga.

6 Ode ododa Eshinegba o te e gbe ikanya elemhi agbo eyi awa, ama oni Eshinegba o ligho gbe oni akanya ona rōte idiegbe oyi awa nya.

7 Ogbogbo a ri isomhopfa Ayemhe na, ni o ro ke gbe akanya ni o kpaghie ogbokpa obō.

8 Oni Ayemhe loli o ri isomhopfa oyi ungmehi egbhali na ogbo oghuo. Oni Ayemhe o kie gbolo ri isomhopfa ilasingme a na ogboese.

9 Oni Ayemhe o gbo ri irudunga oniemhi a na ogbo. Oni Ayemhe oghuo o kie gbo ri ekpabo na ogboese ni o ro ri ogbo toto.

10 Oni Ayemhe o ri ekpabo na ogbo ni o ro gbe ikanya onyaloa, o ri ekpabo na ogboese ni o ro me eke guele. O gbo ro-na ogboese ni o lese ikhioda ni o la iyemhe ododa o. O ro-na ogbo ni o ro dobe e ngme emue oda, o ro-na olese ni o dobe guele abi oni emue ogho o ngme.

11 Ama Ayemhe oghuo o kie khi ni o ga gbe eni ikanya egho abi o ghole oli shi.

Ọ ri isomhopfa ọdọda na ọgbọgbọ.*

Idiegbe oghuo ni o mhuẹ iguabọ ọdọda

12 Eri iKirisiti ọ li abi idiegbe oghuo ni o mhuẹ iguabọ ọdọda, idiegbe oghuo o kie khi, ini o tsekọ mhọli iguabọ ebubu ọdọda.†

13 Ighọ awa nya awa gbo li, o khi ọngi iJu u khi, okekhi ọnge iJeta, o ke khi oghumha oo, o ke khi ọni ọọ khi oghumha, a she batazi awa shi idiegbe oghuo rọte ọni Ayemhe oghuo ọghọ, a kie gbo ri oni ayemhe oghuo ọghọ na awa.

14 Irari khi idiegbe ọa khi uguabọ oghuo tse loli nya o khi, ama iguabọ ni e bu o mhọli.

15 Ini owe ọ gueye obọ, “Irari khi mhia da khi obọ, mhi aa ke kugbe idiegbe ọ,” Oni owe ọa kie khi oyi idiegbe?

16 Ini esọ ọọ khi, “Irari khi mhi aa khili eloe, mhi aa ke khili oyi oni idiegbe.” Oghọ o ya lie khi ọa ke la oni idiegbe?

17 Ini idiegbe nya o khili eloe lo, se o kha li ke suọ. Abi ini idiegbe nya o ke khili esọ lo, se o kha li ke suọ issue?

18 Abi o li khi, eri Eshinegba ọ tono iguabọ egbe ọdọda ma shi idiegbe abi ọ li nono ọli shi.

19 Idiegbe o ya gbapfo, ini o khia uguabọ oghuo tse loli nya o khi?

20 Abi o li khi, iguabọ ọdọda e la o, ama idegbe oghuo kpe o khi.

21 Irarighọ, eloe ọa ya lie obọ, “Mhi aa mhuẹ emini mhi re ya li!” We khi ukhomhi o ya lie awe mhia mhuẹ emini mhi re ya li.

22 Ini awa te ukiekie ọ obini ọ kpole oyi ingme ona bino ọli, iguabọ oyi idiegbe ni ọa lolo toto, ọa ze idiegbe ya tsua pfiá,

23 ama idiegbe ni awa bino khi ẹa lolo mu eloe, wewe awa ga sonọ itsua guese. Awa a kuegbea guese iguabọ idiegbe ni ọa ti ni a ke khueghie-a shi eke ni áá me eloe,

24 Ama awa aa ya so it-sua guese ikpe ni e ze ro ọ shi eke ni egboese e me eloe. Eri Eshinegba ọ lighọ riele idiegbe, ni awa mu ekpe na iguabọ ni e li abine khi ẹa lolo mu eloe.

25 Itobọ ighọ, okemhi ọa la idiegbe, eri ikpe ọdọda eghọ e ri eloe a khu egbe.

26 Ini asha eghuo ọọ me osoli, ikpe enekpole nya e li nu ọli a me oni osoli. Ini a ri ekpe na uguabọ idiegbe oghuo eri enekpole nya ẹẹ ghele.

27 Eẹ nya idiegbe oyi iKirisiti a khi, ọgbọgbọ ọ khi uguabọ oyọli.

28 Elemhi igbaa oyi eni e mie iJesu iKirisiti suọ, onodode, Eshinegba ọ ze ighiu-somhi na kee, onuzi-eva ọ ze emekeguele, onuzi-ese, esese, ọ tigbe ri eni ẹ gbe ọnyalao

* 12:11 Li ze iRom 12.6-8 † 12:12 Li ze iRom 12.4-5

shi asha eghuo, gbo li shi eni mhọli isomhopfa ni a rọ ri ọgbọ ze. Ọ gbo zẹ eni e guẹ ẹ kpaghiẹ ẹgbọese obọ, elese ọ zẹwẹ eni e guẹ ri omhẹsẹ kia, ali eni ẹ ngme ẹmuẹ ọdọda.‡

29 Wẹwẹ nya e khi ighiusomhi na kẹẹ? Wẹwẹ nya e khi emekẹguele? Wẹwẹ nya e khi esẹsẹ? Ọgbọkpa ọ dobẹ a gbe akanya ọnyalọa?

30 Wẹwẹ nya e mhọli isomhopfa oyi iri-ọgbọ ze? Ẹgbọ nya e guẹ ngme ẹmuẹ ọdọda? Abi khi wẹwẹ nya e guẹ ẹ guele abi oni ẹmuẹ ọdọda o ngme?

31 Irarighọ, awa ke nono isomhopfa ni o tinẹ nya.

Mhi ya ri ode ni o tinẹ nya khase ẹ.

13

Inono

1 Ini mhi ga guẹ ẹ ngme ẹmuẹ oyi ẹgbọ ali oyi igeni, ni mhi aa rọ mhuẹ inono, okeke ulo ali okeke ipẹpẹ itasa mhi khi.

2 Ini mhi mhuẹ isomhopfa imekẹguele ali ni mhi rọ lẹsẹ udi osheli ali ilẹsẹ nya a guele. Mhi kha mhọli irudunga ni a rọ dobẹ ọoghie ite, ni mhi aa rọ mhuẹ inono, afuẹ mhi khi.*

3 Mhi kha ga ri emini mhi mhuẹ nya somhopfa, ni mhi rọ ga ri egbe mhe bhale ni a tose-a ni mhi ba tono obọ udu, ni mhi aa rọ mhuẹ inono, mhi aa mhuẹ elele okhọghuo ni mhi ya mẹ.

4 Eri inono o mhọli irabomudu, o mhọli isomhelemhi. Ọa ya kpe ofuma, ọa ya tono obọ udu, ọa ya vuse ike.

5 Inono ọa ya ngeli angeli obe, ọa ya khu oyọli tse, el-emhi ẹa kele bi inono, ọa ya keke ingme ni a li ọli ya shi na ọgbọ.

6 Ọa ya mẹ emhi obe ni ọọ ke ghele shi ọ, ama emhi egbegbingme o ghele ẹ shi.

7 Ọa ya mhọli ukhimhi-elementhi. Irudunga ali irudushi, ali irabomudu oyọli ọa ya ba li ku.

8 Inono ọa mhuẹ ukpese. Imekẹguele e la ọ, eri-tse khi e ya dose, isomhopfa oyi ingme-ẹmuẹ ọdọda e la ọ, ama e ya dose, ilẹsingme e la ọ, ama e ya dose.

9 Irarikhi isomhopfa ilẹsingme ali imekẹguele oy-awa ẹa ya gba pfo.

10 Ama ini oni o gba pfo o ramhi, oni ọa gba pfo o kelea.

11 Abi mhi rọ khi ọmọ, ẹmuẹ ali isamhi ali akhokhomhe eyemhe, e khi eyi ọmọ. Mena abi mhi rọ ke khi ọgbhali, mhi aa ke mhuẹ emini mhi ri angeli ọmọ a li.

12 Emini awa mẹ memena, eri o li abi aroro ni awa rọte ughegbe ẹ mẹ lishi-lishi. Ẹghẹghẹ aghọ o kha ramhi, awa ya mẹ ọli ghemhe, ghe ẹ. Emini mhi lẹsẹ, ọa gba pfo, ama ẹghẹghẹ aghọ, o ya gbpfo, abi Ẹshinegba ọ li sese mhe pfo.

13 Ama eni emhi esẹ enana e kie migha: Irudunga,

‡ 12:28 Li zẹ Ẹfi 4.11 * 13:2 Li zẹ iMat 17.20; 21.21; iMak 11.23

irudushi, ali inono. Oni o ga fune nya shi we o khi inono.

14

Isomhopfa imekeguele ali emue

¹ Zobe ni inono o khi emini u na a khu.

Ke dua ni u mholi isomhopfa eyi Ayemhe no pfuase, tete isomhopfa imekeguele.

² Ogbõ ni õõ ngme emue ni õgbõ õa lese emini õõ ngme, Eshinegba õ nu e ngme, irari õgbõkhõghuo õa ya lese emini õ ri eni ingmemhi ngme. Egbegbi ingme osheli õ rote Ayemhe no pfuase ee ngme.

³ Ama õgbõkpa ni õ meke ngme guele, eri õõ nu õgbõ õ ngme, o kpaghie we obõ, õ ri udu shi we õ, õ ri udu pfõmhi we.

⁴ Ogbõ ni õõ ngme emue õda ni õgbõ eã lese emini o ngme, egbõli õõ kpaghie obõ, ama õgbõ ni õ mekeguele, igbaa oyi eni e mie iJesu iKirisiti suo nya õõ kpaghie obõ.

⁵ O ga ghõle mhe ni ee nya a ke ngme emue õdõda, ama oni o ghõle mhe ne khi ni a ga mhõli isomhopfa imekeguele. Irari khi õni õ mekeguele õ mu eloe dõse õni õ ngme emue õda. Seẽ ni eri õgbõ õ la aghõ ni õ guele abi õ ngme ni õgbõkpa ni õ la igbaa oyi eni e mie iJesu iKirisiti suo õ mhue ikpaghiobõ.

⁶ Ighõ inyõghuo, ini mhi bhale deba e ni mhi rõ õ ngme emue õda, onete onõghuo o ya riele na e? Oa khi ini, mhi gue irõkhase ni

mhi rote obo oyi Eshinegba me ye e, okekhi emini mhi lese mhi gueye e, okekhi imeguele mhi gueye e, okekhi ungmehi osese mhi rõ bhale ghi e, o ya ri eleli na e?

⁷ Bino itsua ni eã mhue ayemhe, ni ee ngme, enabi ofele ali efa. Seẽ õgbõkhõghuo õ li ya lese emini a kpheli, ini õa suo obini a mu abõ we je?

⁸ Ali õni õõ pfi akala, ini õa li pfi õli gboo ni o de uruli ni a suo, õghuo õ ya mu egbe okhõli?

⁹ Ighõ khi, ini u ri emue ni õgbõ eã ya suo õ ngme ingmemhi ni e mhõli ileasingme, õgbõkhõghuo õa ya lese emini wa ngme. Eri u lese ke ngme kua idane!

¹⁰ Emue ebubu e la agbõ ona, wewe nya e khi eni e ti shi eni e ngme we õ.

¹¹ Ama ini mhi aa lese emue ni a ngme, õni õ nu mhe ngme, õpfese õ khi shi me õ, mhemhe khi õpfese shi õli õ.

¹² Aborõkhia khi isomhopfa eyi ayemhe e mema kiele e ghõle e eghõ, a ke nono isomhopfa eni e ya ri ikpaghiobõ ghi igbaa oyi eni e mie iJesu iKirisiti suo.

¹³ Itobõ ighõ, õni õõ ngme emue õda õ mema ya lema a ri ekpabõ ni õ rõ õ ke guele abi õ ngme na li.

¹⁴ Irari ini mhi ri emue õda a sõ iromhi, ayemhe oyemhe õõ sõ iromhi, ama udu oyemhe õa ya mhe mhue emini õ mu õ.

¹⁵ Se mhi ke ya li shõ? Mhi ga ya riele wewe eve-eva ena.

Eri mhi ya ri ayemhe oyemhe so iromhi, mhi gbo li ri udu oyemhe so. Mhi ya ri ayemhe oyemhe to uwolo, mhi gbo li ri udu oyemhe to.

16 Ini u ri ikphemhi na Eshinegba elemhi ayemhe tse, se egbo enekpole ni ea ya suo ikphemhi ni u ro na Eshinegba e lie suo, ni e mie Atse shi e oni iromhi ali ikphemhi? Ea mhue abi e li ya lese emini u wa ngme.

17 Ini o tseku khia khi iromhi ikphemhi eye khi enete lo, ea ga kpaghie egbo enekpole obo.

18 Mhi kphemhi na Eshinegba khi mhi ga ngme emue ododa dose ee nyaa.

19 Ini a la ugamhi igbaa oyi eni e mie iJesu iKirisiti suo, o ti mhe egbe ni mhi lese ngme ikpamhi ingmemhi ishe tse ni egbo ya suo abi mhi rewe ngme, ro sese we, ocho ni mhi ro ri emue oda ya ngme ingmemhi agbele ni ogbokhoghuo oa ya suo abi mhi rewe ngme.

20 Inyoghuo-mhe, a khi ke sa abi eniye. A mholi isamhi abi egbhali ama a li abi emofe ni ea lese emhikhoghuo obode onobe iriele.

21 A keke oli shi Ebe-nopfuase khi,

“Emue oda mhi ro ya
nu egbo eyemhe ngme.

Mhi ya ri uruli epfese ngme,
ama ini o tseku khi igho,
egbo eyemhe ea ya
ri esho shi mhe eke,
igho Onomhue o ngme.”*

22 Itobo igho, emue oda, oa khi emhi onyaloa shi eni e miesuo o sese ni eni ea miesuo. Ama imekeguele, eni miesuo o mema go lu, oa khi oyi eni ea miesuo.

23 Irarigho, ini igbaa oyi eni e mie iJesu iKirisiti suo kpa e legba ni ogbokpa o ro o ngme emue ododa, eshebe ali eni ea miesuo, ea ya lie khi ujili oo kpha e nya?

24 Ama ini ogbokpa oo mekeguele, ni egbo ni ea miesuo okekhi ogbo ni oa lese emini a riele o ro lo le. Rote ingmemhi ni oo suo, o ro ya lese khi ona olamhe loli khi, ni o khi oni o mu pfi.

25 Osheli isamhi udu eyoli e ya khueghie-a gboo. O de yeshi, oo ga Eshinegba, oo lie, “Eshinegba o la e iteva egbegbo.”

Ugamhi ni oa mhue ozughu

26 Inyoghuo, abi mhi ri ona ngme khi, ini a lona kugbe shi ugamhi, ni oghuo o ro mholi uwolo, okekha khi oghuo o mholi emini o sese, okekhi irokhaso olese o mholi, okekhi emue oda olese oo ngme, okekhi aguele emini a ri oni emue olese ngme mholi. A riele enana nya ro kpaghie igbaa oyi eni e mie iJesu iKirisiti suo obo.

27 Ini ogbo o ya ngme emue oda, egbo aava tse e lese ngme, ini e khi e bu dose, e khi aase. Ama otuoghuo oghuo o kpe ke ngme, ogboese oo guele abi oo ngme.

* 14:21 Li ze Aza 28.11-12

28 Ini o khia khi oḡbo ọa la oni igba oyi eni e miesuo ni ọ ya ke mie ọli emini ọọ ngme guele, ọni ọọ ngme ungmehi emue ọda oḡho ọ khukhu unu, ọ leṣe nu egboḷi ali Eshineḡba ke ngme.

29 Emekẹguele aava okekhi aase e doḡe ya ke ngme, eḡbo enekpoḷe e ku esọ-a ni e leṣe abi eḡ ngme.

30 O kha ke khia khi a ri irokhasẹ khasẹ oḡboḡese ni ọ shito oni ilegba, ọni ọ kpe ngme eḡho, o mu migha.

31 Eḡ nya a doḡe ya meḡuele, ama o khi ọtuoghuo oḡhuo, ni enekpoḷe e weṅa ali ni a ri udu shi we ọ.

32 Eni e mhuẹ ayemḡe imeḡuele e ke ri eḡheḡe na egbe ro ngme ini ayemḡe imeḡuele o la we egbe e gbe akanya.

33 Irari khi Eshineḡba ọa khi ọna ozughu, ama oyi opfomḡe. Abi o li shi elemhi igba oyi eni miesuo nya.

34 Ikpotsọ e ke khukhu unu ini igbaa oyi eni e mie iJesu iKirisiti suo e legba, abi o li shi igbaa oyi eni e mie iJesu iKirisiti suo elese nya. A khi ze we ngme, e ri ochoghọ ke deba omḡese, abi ushi o ngme.†

35 Ini e nono ni wewe e leṣe udi-ingme okhoghuo, e la apfe mhila edowe. Emhi omama o khi ni okpotsọ ọ ro la ilegba igbaa oyi eni e mie iJesu iKirisiti suo ngme.

36 Abi khi obọ oye e ungmehi oyi Eshineḡba o te gba

ekẹle, abi khi eḡ ghuo o leṣe ramhi egbe?

37 Ini oḡbokhoghuo o sa khi omekẹguele loḷi khi, okekhi khi eri ọ lie khi loḷi mholi ayemḡe ni ọ pfuase, ọ mema ya leṣe khi emini mhi keḡe e ghi e ena khi ushi oyi Onomhue lo.

38 Ama ini oḡbokhoghuo ọ ri eloe gbe ungmehi ona, a li ri eloe gbe ọli.

39 Irarigho, inyoghuo-mḡe, a ke nono ni a meḡuele, ama emue ọda ingmengme, o khi khi ighuighue.

40 A ke riḡe emhikpa te ode ni ọa mhuẹ ozughu.

15

Irote eghuli guale oyi iKirisiti

1 Mena mhia nono ni mhi yele e le inyoghuo, ingme usomhi onete ni mhi ro tse abo ye e ni a miesuo, ni irudunga oye e o migha nga eḡbego.

2 Oni usomhi onete ona a ro tsumhi e, ini a da mu emini mhi ro tse abo ye e mhuẹ toto. Ini ọa khi igho, eri a miesuo shi afue.

3 Abi mhi li te ekẹ mie oni usomhi ni o lolo mu eloe, igho mhi li gue ọli ye e. Usomhi khi,

iKirisiti ọ ghu-a
to olamḡe eyawa
abi a li keḡe ọli
shi Ebe-no-pfuase.*

4 Khi a roḷi to,
a roḡe eghuli guise ọli le
eḡe nuzi-ese,

† 14:34 Li ze Igbae 3.16 * 15:3 Li ze Aza 53.5-12 † 15:4 Li ze Iwolo 16.8-10; iMat 12.40; Ika 2.24-32

abi Ebe-no-pfuase o
ngme.†

5 O ri egboli khase iPita,
o tigbe ri egboli khase eni
ogbava.‡

6 O tigbe ri egboli khase,
egbo ni e miesuo ni e bu
dose
egbo egbhue uye ali ishe
(500),

ni e la asheghuo utoghuo,
ni o khia khi ebubu we
e kie la agbo,
eghuo o e she ghua.

7 O tigbe ri egboli khase
iJemhisi,
neni o tigbe gbo
ri egboli khase ighiu-
somhi na kee nya.

8 Ikpukhokho o, o li ri
egboli khase mhe abi om o ni a
bia shi egheghe ni aa kha bia
li shi. §

9 Irari khi mhemhe mhi ga
kpoke na ighiusomhi na kee
enekpole nya a. Mhi aa fe fu
te ni a lu aghiusomhi na kee,
itobo khi mhi mu okholi vule
shi igbaa oyi eni e mie iJesu
iKirisiti suo oyi Eshinegba o.*

10 Ama okhale ni mhia fute
ni Eshinegba o li na mhe o
remhe khi emini mhi khi. Ali
khi okhale ni o li na mhe o a li
opfu-a. Ini a ke gbo riele oli
bino, mhi she ga roshaka gbe
akanya dose we nya. Ama o a
khi mhemhe mhi dobe gbe oli,
ama okhale oyi Eshinegba ni o
la mhe egbe a gbe akanya lo.

11 Itobo igho, ini o khia
khi wewe e tsabo oni usomhi,
okekhi obo oyemhe o te bhale
o, ungemhi oghuo anye kie

ga ro o tse abo, ni o khi emini
a mie shi.

*Iröte eghuli guale oyi eni
eghua*

12 Usomhi oyanye na. A she
rote eghuli guise iKirisiti le.
Elo o ke ze khi eghuo e e ro
lie khi iteghuli guale oyi eni e
ghu-a o a la o sho?

13 Ini iröte eghuli guise eni
e ghu-a le o a la o, ogho khi aa
guise iKirisiti le.

14 Ini o khia khi aa rote
eghuli guise iKirisiti le lo,
itsabo oyawa, afue o kha khi,
igho li khi irudunga oyawa.

15 O a khi igho tse, eni
e pfi otsele kie egboli ma
Eshinegba anye kha khi. Irari
khi anye she kpe pfi otsele
guele na Eshinegba khi o rote
eghuli guise iKirisiti le. Ini
o khia khi igesikia o kha khi
lo khi aa ya guise eni e ghu-a
le lo, eri o kha rokhase khi o a
guise iKirisiti le.

16 Irari khi ini aa ya guise
eni e ghu-a le, aa li guise
iKirisiti le o li khi egho.

17 Ini o khia khi aa guise
iKirisiti le, irudunga oye o a
kha mhu e emini o kha li na
e. E e a kha kie la okhena
ipfezomu shi olamhe eye e.

18 Ogho li khia khi, eni e
ghuloa ni e mie iKirisiti suo
khi eri e li li opfu-a.

19 Ini o khia khi agbo ana
tse, irudushi ni awa mhu e na
iKirisiti o pfo shi lo, awa a
opfu o kha bie gbe ne nya.

20 Egbegbi ingme ni o la o
khi, a she rote eghuli guise

‡ 15:5 Li ze iMat 28.16-17; iMak 16.14; iLuk 24.34,36; iJon 20.19 § 15:8 Li ze Ika
9.3-6 * 15:9 Li ze Ika 8.3

iKirisiti le, ni o ri awa mie shi o khi a ya gbo guise eni e ghua le.

²¹ Irari khi abi eghuli o rōte obọ oyi ogbọ ọtuoghuo bhale ikhi Adamu, ighọ irōte eghuli guise le o li rōte obọ oyi ogbọ ọtuoghuo bhale ikhi iKirisiti.

²² Irari khi abi egbokpa e li rōte obọ oyi Adamu ghua, ighọ a li ya rōte eghuli guise ogbokpa le, rōte obọ oyi iKirisiti.

²³ Ama a ya guise ogbogbo le abi o li tẹ ọli, iKirisiti o khi ọni odode, o kha nyene egbe bhale, a tigbe li guise eni e mie oli suọ le.

²⁴ Isheghọ ọzukhomhi agbo o bhale, ini iKirisiti o mu ekpabọ ayemhẹ nya o le, ali eni e mhue afu ali itoto nya, o tigbe rue oni omhese nya na Eshinegba ita.

²⁵ Irari khi iKirisiti o ya ke mhese ramhi ni Eshinegba o rọ ya ri ebe ọli nya kpọkẹ ẹkoawe eyoli.†

²⁶ Obe ni o ya kpukhokho mu o le khi, eghuli.

²⁷ Irari khi Ebe-no-pfuase o ngme ọli khi “Eshinegba o ri emhikpa kpọkẹ ẹkoawe eyoli.” Onana o rọli khasẹ gbo khi aa li ri Eshinegba ma o rọ kpọkẹ na iKirisiti, ikhi lọli ni o ri emhikpa kpọkẹ ẹkoawe eyi iKirisiti.‡

²⁸ Itobọ khi ini a da ri emhikpa shi omhese oyi iKirisiti se, eghẹghẹ aghọ lọli ọyọli ni o khi omiọli, o ri egbọli kpọkẹ na Eshinegba, ọni o ri emhikpa kpọkẹ na li. Eshinegba o mhese ẹ shi emhi

nya.

²⁹ Elo zẹ ni egbọ e rọ o batazi na egbọ ni e she ghua? Ini aa ya guise eni e ghua le, elo o zẹ ni a rọ batazi shi na we?

³⁰ Elo o zẹ ni anye rọ ri agbo oyanye ẹ shi okhena eghẹghẹ kpa?

³¹ Anye ẹ la okhena eghuli ogbelekpa! Ititiegbe ni mhi ri itobọ oye ẹ titi, irari emini iJesu iKirisiti oyawa o riele na ẹ, o remhẹ ngme ona.

³² Elo a dabi khi o khi eleli oyemhẹ ni mhi rọ nu inyagbe-mhi ebe, ikhi emose eghọ na ẹli Efesosi khọli? Ini aa ya guise eni e ghua le bhale agbo,

Awa bie ke le awa a da,
irari khi awa ya ghua-
akọ. §

³³ Khi zẹ ni a sese wase-a. “Ikugbe egbọ ebe o, o ma yese egbegbi angeli-a.”

³⁴ Nyene egbe bhale egbhali eye, a tiegbe olamhẹ le. Eghuo ẹ e la o ni ẹa lese Eshinegba. Ni o ri omama mu ẹ, mhi rọ ngme ona.

Idiegbe ni a rōte eghuli guise le

³⁵ Ama ogbo o dobe ya mhila ogbo, “Seẹ a lie guise eni e ghua le bhale agbo? Idiegbe onabi onoghuo e ke ya mhọli?”

³⁶ Yeẹ oyeghe! Waa lese khi emini a rọ kọ ọa ya zẹ ini ọa li kpe ghua?

† 15:25 Li zẹ Iwolo 110.1 ‡ 15:27 Li zẹ Iwolo 8.6 § 15:32 Li zẹ Aza 22.13

37 Ini a ri ukpamhi ọakpa kọ, ọa ke ẹ zẹ ukpamhi nge, ama ughẹghẹ ọli o ke zẹ ngale.

38 Eshinẹgba ọ ri idiegbe ẹ na ikpamhi abi o ghọle ọli shi, ikpamhi emhi nya e mhọli idiegbe oyẹwe.

39 Idiegbe oyi emhi nya ẹa li abeghuo. Egbọ e mhọli idiegbe oghuo, elamhako e mhọli idiegbe olese, ipfeli ali ifele e mhọli idiegbe eyẹwe.

40 Emhi ọdoda e la idane, emhi ọdoda e li la ekẹkẹ. Otse oyi emhi na idane, o khi oghuo, otse ni o la emini e la ekẹkẹ o khi ọda.

41 Oyo o mhọli otse oyọli ọda ke, uki o mhọli otse olese, ikpẹtata e mhọli otse olese ọda. Eni ikpẹtata e gbo somhotse dọse egbe.

42 Igho o ya li ini a guise eni e ghu-a le. Idiegbe ni a ro to, eni ẹ kea e khi ni a ro to. Ama eri a guise ọli le ni ọa ke ya kea ghue.

43 Ini a roli to, o yemhi osue, ọa mhue itoto, ama ini a guise ọli le o somhotse-a, o mhue itoto.

44 Ini a roli to, o khi idiegbe ni a me alo gbugbugbu. Ini a guise ọli le, o khi idiegbe ayemhe.

Ini idiegbe ni a me alo gbugbugbu o la ọ, idiegbe elemhi ayemhe o li la ọ.

45 Abi a li keke ọli khi, "Omose onodode Adamu, eri a ma li ogbo ni ọ mhọli ayemhe." Ama khi Adamu ni o kpe ukhokho, ayemhe ni ọ ri agbo a na ogbo ọ khi.*

46 Ọa khi idiegbe ayemhe o kpẹ bhale, ama oni a me alo gbugbugbu, neni a me oyi ayemhe.

47 Adamu, omose onodode, itutu ena eke a ro ma li, Adamu onuzava iloghie o te tiemhile.

48 Eni e khi eyi eke, eri e li abi eni a ri itutu eyi eke ma, eni e khi eyi iloghie eri e li abi eni e rote iloghie bhale.

49 Ezeze abi awa li ri irokhokho oyi omose ni a ri eke ma so, igho awa gbo li ya ri irokhokho oyi omose ni ọ rote idane bhale so.

50 Mhi gue ona ye ẹ inyoghuo khi, emhi idiegbe ali emhi ọlia ẹa ya lo Eghiele oyi Eshinẹgba. U ke-liẹ khi eri idiegbe ni ọọ ke-a, o ke ya mhọli okemhi shi oni iloghie ni ọa ya kea.

51 A ri esọ shi egbegbingme osheli ona. Awa nya awa aa ya ghua, ama ini akala ni o kpukhokho o de, a ya mu awa mela-a, bia,

52 elemhi ikoko alo khueghie-a, ini oni akala ni o kpukhokho o de. Irari khi akala o ya de, eni e ghu-a e ya ri idiegbe ni ọa ya kea guale, a ya mu we mela-a.†

53 Irari khi idiegbe ni ọọ ke-a o mema ya ri idiegbe ni ọa ya ke so, oni ọọ ghu o ri idiegbe ni ọa ya ghu so.

54 Ishegho, ini idiegbe ni ọọ ke-a o ri idiegbe ni ọa ya ke so se, ni idiegbe ni ọọ ghu o ro ri idiegbe ni ọa ya ghu so se, ungmehi ni ebe o ngme o bhale ya tse ni ọ li khi,

* 15:45 Li ze Igbae 2.7 † 15:52 Li ze 1 iTeṣa 4.15-17

“A she to eghuli lue
elemhi imuḡle.”‡

55 “Eghuli o, ighe imuḡle
ni u ke doḡe ya mu o le
mena?

Eghuli o! Ighe ekpabḡ eye
mena?”§

56 Olamḡe o ri ekpabḡ na
utamhi oyi eghuli e ta, ni o rḡ
kuali utse, olamḡe o rḡte ushi
mhḡli ekpabḡ.

57 Ama awa kphemhi na
Eshineḡba ni o ri imuḡle na
awa rḡte obḡ oyi iJesu iKirisiti
Onḡmhue ḡyawa.

58 Irarighḡ, inyḡghuo a
migha gbaa. A gbe akanya
oyi Onḡmhue oyi e ke je odalo,
abi a rḡ leḡe khi akanya ni u
da gbe na Onḡmhue khi ḡa khi
afue.

16

*Ukpaghḡ ni a mie ghi igbaa
oyi eni e mie iJesu iKirisiti suḡ
na iJerusalemu*

1 Ni mhi rḡ ngme nga in-
gme ikpaghḡ ni a mie ni a rḡ
ya kpaghiḡ igbaa nya eyi eni
e mie iJesu iKirisiti suḡ ni e
la eke iJudia obḡ, ni a keke
shi ebe ghi mḡe. A ke li abi
mhi gueye igbaa oyi eni e mie
iJesu iKirisiti suḡ ni e la eke
iGalesha e li ke riḡe.*

2 Uka khi uka kpa, a ke
rḡte ikpaghḡ ni a gbe, rue
shi asheghuo abi ḡḡḡḡḡ ḡ
mhue, ini a khi gbo ke zela
ikpaghḡ elese ini mhi bhale.

3 Ini mhi bhale, mhi ya
keke ebe na eḡḡ ni á ze,

mhi keke shi ḡ khi wewe a
ghie, e tsua isomhopfa eyeye je
iJerusalemu.

4 Ini o ke khia khi o ti ni mhi
li ye, anye ga kia.

Omḡese ni iḡolu ḡ mḡese

5 Mhi ya bhale ya me e ini
mhi rḡte iMasidonia doḡe se.†

6 Mhi nu e ya la denḡ. Otse,
mhi ga la aghḡ okase nya.
Egheḡḡe aghḡ a ke ri ukpaghḡ
kpaghiḡ mḡe obḡ je obiobini
mhi ke ya je.

7 Mhi aa nono ni mhi me
e eḡe memena, mhi aa nono
ni mhi leḡe te aghḡ doḡe tse.
Mhia nono ni mhi nu e shito
tese ukukuḡ ini Eshineḡba ḡ
lama.

8 Mhi ya la Efesḡsi ramhi ele
ukpe iPetikḡsiti,‡

9 irari khi asha oniḡmhi o
khueghie-a na mḡe shi ana ni
mhi rḡ me asha gbe akanya
Eshineḡba. Ama khi eni e mu
okhue vule shi mḡe ḡ e bu.§

10 Ini iTimoti ḡ bhale, a
lolo mu ḡli epfese, irari ḡni ḡ
gbe akanya na Eshineḡba nabi
mhemḡe ḡ li khi.*

11 ḡḡḡḡḡḡḡ ḡ khi ri eḡe
gbe ḡli, ama a kpaghiḡ ḡli obo
ni ḡ rḡ doḡe ti okiali eyḡli je
odalo shi opfḡmḡe, ni ḡ doḡe
bhale deba mḡe. Mhia khe
ḡli, ali inyḡghuo enekḡḡe.

12 Ingme oyi Apolosi. Eri
mhi ga lolo ye ḡli ude ḡ kḡ
ya feḡi e, ḡli ali inyḡghuo
enekḡḡe. Ama ḡa ghḡle ḡli ni
ḡ rḡ ye memena, ama ini ḡ
mhue oni eḡḡḡe, ḡ ya bhale.

‡ 15:54 Li ze Aza 25.8 § 15:55 Li ze Osia 13.14 * 16:1 Li ze iRom 15.25-26

† 16:5 Li ze Ika 19.21 ‡ 16:8 Li ze iLev 23.15-21; iDeut 16.9-11 § 16:9 Li ze Ika

19.8-10 * 16:10 Li ze 1 iKori 4.17

13 A ke to ẹlo eke, a migha Atse.
gbaa shi irudunga, a khi ẹgbọ
ni e mholi aye, a khi eni e toto.

14 A ri inono ke gbe ikanya
eye nya.

15 A ẹse khi iSitefanasi ali
omhue-apfe oyoli nya, e kpe
todode khi eni e miesuo shi
obini eke Akhaya. E she ri
egbewe na ugamhi oyi ẹgbọ
ni a pfa na. Mhi lema e,†

16 a ke nyese ukhomhi na
omhese oyi ẹgbọ eghoghọ ali
ogboese ni e nu we e gbe
ikanya eghoghọ.

17 Egbe e ma mu mhe
shi ibhale oyi iSitefanasi ali
iFotunatusi ali Akhaikusi irari
wewe e ke to-ẹoli e abi aa ro la
akaghọ.

18 Eri e ri egbe mu mhe e ti
ayemhe oyemhe nga, abi e ri
egbe mu e. Ẹgbọ enana, e ti ni
a tse, e mu akanya.

19 Igbaa nya eyi eni e mie
iJesu iKirisiti suo eni e la eke
Esha ee tse e. Akuila ali iP-
isilia ali igbaa oyi eni e mie
iJesu iKirisiti suo ni e lona
apfe oyewe, e li e tse e otse
irudunga.‡

20 Inyoghwo nya ni e la ana
ee tse e. A ke tse egbe egbegbi
otse a ghele mu egbe.

21 Mhemhe iPolu mhi ga ri
obo ma ebe ona.

22 Oni o da nono ingme oyi
Onomhue ne, Eshinegba o ya
pfa ezọ mu oli. Mhi lema,
Onomhue o kele bhale.

23 Okhale oyi iJesu
Onomhue o ke deba e.

24 Inono oyemhe o ka nu e la
nya ni a khi eyi iJesu iKirisiti.

† 16:15 Li ze 1 iKori 1.16 ‡ 16:19 Li ze Ika 18.2

Ebe onuzi-eva ni iPọlu ọ kẹkẹ ghi ẹgbọ iKoritia Eni e miesuọ

1 Mhẹmhẹ iPọlu, aghi-u-somhi na kẹkẹ ọyi iJesu iKirisiti ni Ẹshinẹgba ọ zẹ abi o ghọle ọli shi mhi khi, li shi inyọghuo awa iTimoti. Mhẹmhẹ mhi kẹkẹ ebe ona ghi igbaa oyi eni e mie iJesu iKirisiti suọ onayi Ẹshinẹgba ni e la ẹoli iKoriti ali eni a pfa na nya ni e la eke Akhaya.*

2 Mhi lema Ẹshinẹgba ita awa ali iJesu iKirisiti Onomhuae e ka li okhale na ẹ, e ri opfomhẹ na ẹ.

Ẹshinẹgba ọna irudushi nya

3 Awa kuẹghie Ẹshinẹgba, ni ọ khi ita iJesu iKirisiti Onomhuae ọyawa, lọli ọ khi ita ọna ilẹlemhi, ni ọ khi Ẹshinẹgba na irudushọ nya.

4 Lọli ọ ri udu ẹ shi awa ọ ini awa la osoli khi osoli, ni awa li dobe ri udu shi eni e la osoli ọ, ikhi irudushọ onabi Ẹshinẹgba ọ rọ shi awa ọ.

5 Itobọ khi awa li nu iKirisiti me osoli ebubu eyọli, awa li ya rọte obọ oyi iKirisiti kemhi irudushọ oyi Ẹshinẹgba ni o gbeku ọ.

6 Anye kha me osoli, ni a rọ mholi irudushọ ali imiep-fuese lọ. Okekha khi eri a ri udu shi anye ọ, ẹẹ a ri udu shi ọ, ni o rẹ ẹ mholi irabomudu ri egbe mie osoli onabi anye li ri egbe mie.

7 Iregbenga ni anye regbenga ẹ, o kie migha, itobọ khi anye lesẹ khi abi a li nu anye me osoli eyi anye, ighọ a li nu anye mholi okemhi shi irudushọ oyanye.

8 Inyoghuo, anye ẹ nono ni a lesẹ osoli ni anye me obini Esha. Eri anye me ukpokpomhi omunu ni o ne anye abọ. Ni o khia khi eri anye ke khena egbe anye eghuli ukhomhi.†

9 Eri anye she ri ọli shi udu khi eni eghuli o mema ke ya gbe anye ke khi. Eri a me ona ini anye khi regbenga egbe anye, se ni Ẹshinẹgba tse ni ọọ guise oni ọ ghu-a le.

10 Lọli ọ rue anye okhena eghuli ukhomhi le, ọ ya rue awa ọ le. Lọli awa ri udu nga khi ọ ya gbo rue awa ọ le.

11 A li ri iromhi ke kpaghie anye obọ, ini ebubu ẹgbọ e me asha ri itobọ oyanye kphemhi na Ẹshinẹgba, oni ọ pfo udu ri iromhi ni ebubu ẹgbọ e sọ a tse.

IPọlu ọ mu ugbamhi eyọli pfi

12 Anye ma tonu obọ udu shi ọ, udu oyi anye ni ọọ gue anye ezọ o gbo pfi otselẹ shi ọ, khi, angeli oyanye elemhi agbọ ona ali angeli ni anye nu ẹ ngeli, khi ikhueghie elemhi-a ali igesikia oyi Ẹshinẹgba o ri anye ẹ gbe akanya. Oa khi ilẹsingme agbọ anye te riele ona, ama okhale oyi Ẹshinẹgba a rọ riele ọli.

13-14 Emini a dobe ya zẹ, ni o ya gbo lo ẹ esọ anye kẹkẹ

* 1:1 Li zẹ Ika 18.1 † 1:8 Li zẹ 1 iKori 15.32

ghi ẹ. O kha riẹ khia khi emini anye ẹ ngme ọa lo ẹ esọ pfo ne, anye mhọli ọ shi udu khi o ya lo ẹ esọ pfo nya ẹlelese, ni a ri anye ke tono obọ udu, abi anye li rẹ ẹ ya ke tono obọ udu, ogbele oyi iJesu Onomhue oyawa.

15 Itobọ khi mhi aa mhọli akhokhomhe shi ona, mhi rọ nono ni mhi kpẹ bhale ya bino ẹ, ni a mhọli ikhivose asha eva.

16 Mhi she gba li khi mhi bhale ya bino ẹ ini mhia le iMasidonia ali ini mhia jele, ni mhi me asha mie ẹ ikpagho rọ ye eke iJudia.‡

17 Eri a dabi khi mhia dobe ya lie khi emini mhi ya riẹle na, ni mhi riẹle ọli? Abi khi eri mhi li abi ogbo ni ọ khe, "Ii." O gbolo ẹ, "Iiye." Ini mhi ba riẹle ogghemhe oyi ogbo?

18 Abi ungmehi oyi Eshinegba o migha shi igesikia, igho emini mhi gueye ẹ ọa li khi unu eva ni o ri utoghuo lie "Ii." Ali "Iiye."

19 Itobọ khi iJesu iKirisiti Omi Eshinegba ni mhemhe ali iSivanosi ali iTimoti anye rọ tse abo ye ẹ, ọa khi, "Ii." Ali "Iiye," egheghe oghuo. Ama Eshinegba "Ii," ọ khi. §

20 Irari khi emiemini Eshinegba ọ rọ nga nya, iJesu iKirisiti ọ rewe nya khi, "Ii." Irarigho, rọte iJesu iKirisiti awa te ẹ mie "Atse." Ni anye rọ ri ufumhi na Eshinegba.

21 Ama Eshinegba ọ ri anye ali ẹẹ migha elemhi iKirisiti. Lọli ọ ze awa.

22 O she shi ọlele oyoli shi awa egbe. O ri Ayemhe-nọ-pfuase shi awa udu abi ọlele ni ọ khi iyobo shi emini Eshinegba ọ ya riẹle na awa.

23 Ama mhi ze Eshinegba ọtsele, loli ọ lese udu oyemhe. Itobọ khi mhi aa nono ni mhi ri elemhi ibibi nu ẹ ngme, loli mhi aa rọ ke ye iKoriti.

24 Ọa khi eri anye ri ekpabo gueye ẹ emini a ya miesuo. Anye lese khi a migha gbagbagba shi irudunga. Itobọ ni a mhọli oghele anye rọ nu ẹ gbe akanya.

2

1 Loli o ze ni mhi rọ khi, mhi aa ke gbo ya bhale deba ẹ, ini mhi khi yese ẹ udu-a.

2 Ini mhi yese ẹ udu-a, oghuo ọ la akagho ni ọ ya ri egbe mu ẹ. Se ni oni ogbo ni mhi yese udu-a.

3 Loli o ze ni mhi rọ keke ebe ogbo ghi ẹ, itobọ khi mhi aa nono ni mhi bhale ya me iyese-udu-a obọ eyi eni e kha remhe ghele. Irari khi mhi lese khi ini mhia ghele egheghe agho, ẹẹ a lie ke ghele.

4 Elemhi ukpokpomhi osoli ali amẹ eviẹ mhi te ẹ keke ebe ona ghi ẹ, ọa khi eri mhi ni udu o ba yese ẹ-a, ama ni a rọ lese abi mhi nono ingme oye nya ramhi.

5 Ama ini ogbokhoghuo ọ pfi iyese udu-a, ọa khi mhemhe ọ mema lolo yese udu-a, ama ẹẹ nya ọ rọte opfoghuo yese udu-a. Ama khi, mhia nono ni mhi ngme ọli ze dose ana.

‡ 1:16 Li ze Ika 19.21 § 1:19 Li ze Ika 18.5

⁶ Osoli ni ebubu e e lama shi a na ogbọ onana, e bu.

⁷ Ama a rọ topfa li a gbo ri udu shi ọli ọ, ini ọ khi yese udu-a dọsẹ ode, ni o te ya pfaṅo ku ọli alo.

⁸ Mhi lema e, a zẹ ni ọ lẹsẹ khi egbegbọ a nono ingme oyọli.

⁹ Eri mhi mu e fe bino ni me ini a ri ungmehi oyemhe ya gbe akanya.

¹⁰ Ini a rọ topfa ogbokhoghuo shi emini ọ rieḷe, mhemhe mhi li rọ topfa li. Ini o khia khi mhi mhue emini mhi kha rọ topfa, mhi she rọ topfa. IKirisiti ọ khi ọtselẹ oyemhe khi mhi she rọ topfa.

¹¹ Eghẹghẹ agho, okphaghie ọa me ashikhoghuo regbenga doḅe mu awa ọ ya le, itobo khi awa aa khi eni ẹa lẹsẹ igbamhi eyi okphaghie.

Egbe akanya ena ishobo onogbo

¹² Abi mhi rọ bhale iTiroasi ya gue usomhi onete oyi iKirisiti le, mhi me ọli khi Eshinegba ọ khueghie ode-a na me shi akanya oyọli, shi oobo.

¹³ Udu oyemhe ọa sheshe, itobo khi mhi aa me iTatosi oobo. Igho mhi tse egbo ena obo okhila, mhi ya je iMasionia.*

¹⁴ Ama, awa kuẹghie Eshinegba. Loli ọ zẹ ni iKirisiti ọ rọ ri awa la orolo ni a la mie obo abi eni e mu ọle. Ọ ri awa ri ilese oyi iKirisiti e gbhiaku asha kpa abi ikphela.

¹⁵ Eshinegba ọ she ri awa mele ighiusomhi eyoli-a, ni awa ba ri usomhi onete oyoli gbhiaku asha kpa, abi ikphela oyi ituale ni ọọ pfi e o lie gbhiaku, ni o lo iteva egbo eni a mie e pfuese ali eni e nono ni wewe e pfua.

¹⁶ Uwemhi ۇgbo oyi eghuli, usomhi oyawa ona o khi shi eni e ya pfua, ama upfiemhi oyi agbo o khi shi eni a mie e pfuese ọ. Oghuo ọ doḅe gbe onana?

¹⁷ Anye aa khi eni e ri ungmehi oyi Eshinegba nono epfue abi egbo eghuo e li. Ama ighiusomhi eyi Eshinegba ni e ri igesikia ngme ungmehi oyoli anye khi. Ekpabo oyi iKirisiti anye rọ gue usomhi oyanye le. Eshinegba ọ khi ọtselẹ oyanye.

3

Eni ee ga ena ishobo onogbo

¹ Ọa ya li abine khi eri anye ke e titi egbe anye mena? Anye ẹa li abi eni e mie ebe ni a titi we shi neni e tsabo ungmehi ye e, ali ni e kha gbolo te agho vu e gbo mie e ebe oghoghọ olese? Anye ẹa mhọli emini anye ri ebe eghoghọ ọ rieḷe.

² Ee oye e a khi ebe oyanye ni a keke shi ekelemhi udu oyi anye ni egbo nya e me ee zẹ.

³ Eri o rọkhasẹ khi ebe ni iKirisiti lolighuo ọ keke, a khi. Itobo khi a mie itsabo ungmehi oyanye suọ. Ọa khi ogbọ ọ ri atsu keke e shi ebe, ama Ayemhe oyi Eshinegba ọ

* 2:13 Li zẹ Ika 20.1

keke ẹ. Ọa khi ukiẹkiemhi ẹche ọ keke ẹ shi ama elemhi udu oyi ẹgbọ.*

4 Onana o khi iregbenga ni anye mhọli na Ẹshinegba rọte obọ oyi iKirisiti.

5 Ọa khia khi eri anye ghọ guẹ ẹ gbe oni akanya ona, ama Ẹshinegba ọ ri iguegbe-akanya ona na anye.

6 Lọli ọ ri anye khi eguegbe oyi akanya igue ungmehi oyọli le, na ishobọ onogbọ, ni ọa khi oni a keke shi ebe, ama ena elemhi Ayemhe. Irari khi emini a keke shi ebe, eri o ri eghuli ẹ bhale, ama Ayemhe o ri agbọ a na ọgbọ.†

7 Ushi oyi iMosisi ni o ri eghuli bhale, ni a keke shi ikiekiemhi eche, ufumhi ni o ge nyanyanya, ni ọọ kala, o deba bhale. Ini oni ufumhi ona ni o ze khi ẹgbọ iZireni ẹa ke dobe ẹ bino iMosisi alo ukhomhi tatata, o kala,‡

8 Seẹ ufumhi oyi ikanya eyi Ayemhe ni o ri agbọ a na ọgbọ o ke beşi ya li?

9 Ini ufumhi o la ugamhi ni o ri eghuli ẹ bhale, seẹ ugamhi ni o ri ipfuase ẹ bhale ọa li ya mhọli ufumhi oni o fune?

10 Itobọ ona, awa dobe ya lie khi emini o kpe lighọ mhọli ufumhi ni o ge nyanyanya elele, ọa ke mhọli ufumhi, itobọ ufumhi oyi emini o ke to-ẹoli ọli.

11 Ini emini oo kala, o mhọli ufumhi, seẹ ufumhi ni o la oni o migha agbọagbọ ọọ lie fu ne.

12 Itobọ khi anye mhọli oni irudushi ona anye rọ li ghọ mhọli igbeudu.

13 Anye ẹa li abi iMosisi ọ li, ni o ri ijejeti ku alo ini ẹgbọ iZireni e khi me abi oni ufumhi ni oo ge nyanyanya oghọ, ọ li i kala li alo-a.§

14 Ama eri a guese we udu, irari khi ramhi amo, eri a kie ri oni ijejeti oghọ ku we alo, ini ẹẹ ze ebe ishobọ ona elele. Ini ọgbọ ọ rọ ghi iKirisiti ko tse, ọ rọ ọ rue ọgbọ oni ijejeti alo-a.

15 Ighọ o kie li ogbe na amo, eri ijejeti o kie guese we udu ini ẹẹ ze oni Ushi oyi iMosisi.

16 Ama ini ọgbọ da mupfi bhale deba Ọnọmhuẹ ne, ọ rue ọli oni ijejeti ode-a.*

17 Ọnọmhuẹ ni a ngme shi akana ena, lọli khi iKirisiti, Ayemhe oyọli ọ te ẹ gbe akanya, ali khi ashini Ayemhe oyi Ọnọmhuẹ o da la ne, ẹpfua o la akaghọ.

18 Alo eyawa nya ni aa ri ijejeti ku, o ri ufumhi oyi Ọnọmhuẹ ẹ ge nyanyanya abi ughegbe. Oni ufumhi oghọ, obọ oyi Ọnọmhuẹ o te bhale, ni ọ khi ọni Ayemhe. Lọli ọ mu awa pfi ya li abi lọli, rọte ufumhi ni o rue ẹ nga ọ.

4

Osoli ali ọsuemhe ni e la akanya oyi iKirisiti

1 Irarighọ, aborokhia khi ilelemhi oyi Ẹshinegba anye rọ mie akanya igue ungmehi

* 3:3 Li ze Okiali 24.12; ijere 31.33; Ezik 11.19; 36.26 † 3:6 Li ze ijere 31.31 ‡ 3:7

Li ze Okiali 34.29 § 3:13 Li ze Okiali 34.33 * 3:16 Li ze Okiali 34.34

le ona egbo, lolu egbe ẹa rọ pfo anye-a.

² Eri anye ri ochoghọ she kie angeli osheli ali omama. Anye ẹa ya ngeli angeli ikpamhika wẹkhi eri anye ẹ mu ungmehi oyi Eshinẹgba ukhomhi pfi kpokẹ. Ochoghọ eri anye ri emini e khi igesikia khase gboo, abi o khi shi ukpelo e oyi Eshinẹgba. Onana o ri egbo mie shi o khi eni a ri egbe ẹ nga anye khi rọte udu oyewẹ ni o o gue wẹ ẹzọ.

³ A kha usomhi onete ni anye gue ẹ le sheli, eri a rọli sheli na eni e ya pfa.

⁴ Okphaghiẹ ni o o mhese ẹ shi agbo ona, o she zuse egbo ni ẹa miesu odu ini e khi me akpa ali ufumhi ni o la usomhi onete oyi iKirisiti, oni lolu ali Eshinẹgba e li abeghuo tee.

⁵ Irari khi anye aa ri egbe anye tse abo, ama iJesu iKirisiti anye rọ o tse abo, khi lolu o khi Onomhue, ali khi eni ẹ ẹ ga enaye ẹ anye khi, irari oyi iJesu.

⁶ Ebe-no-pfuase o o, "Eshinẹgba o gueye akpa o rọte alo ebili ge lasele." Mena oni Eshinẹgba o ri akpa oyoli ẹ ge shi elemhi udu oyanye, ni ẹ a rọ lese khi ufumhi oyelue khi, alo eyi iJesu iKirisiti a te ẹ me oli.*

⁷ Eri anye li abi akhe afue ni a ri oni epfue onana shi. Ona o rokhase khi ekpabo eniemhi, obo oyi Eshinẹgba e te ẹ bhale, ọa khi obo oyanye.

⁸ Isheghuo a na anye osoli, ama ọa pfuse anye-

a. Isheghuo anye mhọli akhokhomhe, ama anye ẹa la okhena.

⁹ A me anye omi olimhi ama Eshinẹgba ọa tsua anye pfi-a. A gbe anye de eke, ama anye ẹ ghua.

¹⁰⁻¹¹ Ogbele kpa anye rọ la okhena eghuli itobo oyi iJesu. Eri onana ni anye ẹ me egbe o li abi irokhokho eghuli ni iJesu o ghu, eghege agho ni o ri egbolu khase elemhi agbo oyanye.

¹² Onana o guele khi akanya ni anye gbe ẹ na iJesu, eri o ri anye la okhena eghuli ogbele kpa, ama agbo onogbo o rọ o na ẹ.

¹³ Ebe-no-pfuase o o, "Irari khi mhi mhọli irudunga mhi rọ ngme." Oni ayemhe irudunga onana, anye li rọ ngme.†

¹⁴ Anye lese khi Eshinẹgba ni o rọte eghuli guise iJesu Onomhue le bhale agbo o ya li rọte eghuli guise anye le, o rue anye ali ẹ ẹ bhale odalo oyoli.

¹⁵ Itobo oyee a rọ rie le enana nya, ni ebubu egbo e lese okhale ni Eshinẹgba o li, ishegho ni e ke so iromhi ikphemhi ri ufumhi na Eshinẹgba.

Agbo irudunga

¹⁶ Itobo onana, egbe ẹa tigbe ya pfo anye-a, ini anye ririe kuan-a pfo, ama ogbele kpa ekelemhi udu oyanye o rọ o khi onogbo-a shi o.

¹⁷ Eri ikuku osoli ni ẹa ya tese eyi anye, e muno

* 4:6 Li ze Igbae 1.3 † 4:13 Li ze Iwolo 116.10

anye egbe ẹ khe ufumhi na agboagbo. Loli o ze khi osoli eyi anye e li abi emhi afue shi anye o.

¹⁸ Emini aa me eloe ea ya la o agboagbo, ama emini aa ya me eloe ee la o agboagbo. Loli o ze khi anye ri udu oyanye shi emini aa ya me eloe.

5

Apfe oyawa na iloghie

¹ Anye lese khi ini idiegbe oyanye ona, na elemhi agbo, ni o li abi okhola, o ghua, anye mholi idiegbe olese ni o rote obo oyi Eshinegba bhale. Ikhi idiegbe no o ya ghu ni o la iloghie, owa ni o ya khi abo a ro mama li.

² Memena eri anye la oni elemhi idiegbe na agbo ona a to ekperumhe-a, irari khi eri oo ghole anye ni a kpha oni owa na iloghie so anye.

³ Itobo khi ini a roli so anye, anye ea ke ya la irumheba.

⁴ Irari khi abi anye kie li la idiegbe ona agbo ena, eri anye e to ekperumhe-a abi eni egbe e to. Oa khi eri anye ea ke nono ni anye ke la oni idiegbe oyanye ona, ama eri o ghole anye ni a ri idiegbe na iloghie ni o ya ghu ghue egho so anye. Eghenge agho ni agbo o to idiegbe ni oo ghu lue elemhi imuole.

⁵ Eshinegba o ma anye shi agbo na agboagbo ona, loli o gbo ri oni Ayemhe shi anye egbe ni o khi iyobo khi loli ya riele emini o ro nga na awa.

⁶ Irarigho, anye ro o mholi igbedu eghenge kpa.

Anye gbo lese khi ini anye kha da la apfe elemhi idiegbe oyanye ne, anye ea ke nu Onomhue la.

⁷ Ama irudunga o ri anye la agbo, oa khi emini anye ri ukpeloe me, o ri anye la agbo.

⁸ Udu oyanye o migha gbaa shi o, khi, oo kha ti anye eloe ni anye lase idiegbe oyanye ona le, ni anye nu Onomhue la apfe.

⁹ Irarigho, eri anye ro li shi udu oyanye khi anye mema ya riele emini o ghole oli, okekha khi anye ke la apfe elemhi idiegbe oyanye o, okekhi anye ea la apfe elemhi idiegbe oyanye.

¹⁰ Irari khi awa nya, awa mema bhale ya migha odalo ukpekhomhi iguezo oyi iKirisiti, ni ogbogbo o ro mie ifata ni o khi oyoli, shi emini o riele abi o ro la idiegbe oyoli, shi oni o ti o, shi oni o ti.*

Akanya iri-egbo ali Eshinegba riele

¹¹ Irarigho, aborokhia khi anye lese emini inulishi oyi Onomhue o khi egho, loli anye ro roshaka roli e lo egbo esu. Emini anye khi o ga khueghie-a shi Eshinegba o, anye gbo sa khi o gbo ligho khueghie-a shi udu oyee, ni oo gue e ezoo.

¹² Oa khi eri anye titi egbe anye e khasa e, ama eri anye ri eghenge e na e ni a me asha ri anye ke gha. Eghenge agho ni a me emini a ya so egbo eni

* 5:10 Li ze iRom 14.10

e ri emini ri ukpelo e me e gha, ocho ni e kha ro ri emini e la udu, ke gha.

13 Ini anye ea ke lese emini anye e ri ele, irari oyi Eshinegba lo, anye kha ke lese emini ee ri ele o, irari oye e lo.

14 Inono oyi iKirisiti o mhes e na anye, itobo khi anye me oli me khi ogo otuoghuo o ghu-a na agbo nya, irarigho eri awa li ghu pfa olamhe.

15 Eri iKirisiti o ghu-a na ogbokpa ini eni e la agbo e khi ke la agbo na egbe we, ama ni e ke la agbo na oni o ghu-a ni a gbo guise le na we.

16 Itobo igho, rote ana je odalo, anye ea ke ri ukpelo ni egbo na agbo e ro bino egbo ke bino ogo khoghuo. Ini o ririe khia khi anye kpe lina ri ukpelo agbo bino iKirisiti egheghe ni o dose, anye ea ke ligo.

17 Irarigho, ini ogo o da she ku ma iKirisiti o ne, ogo onogbo ni a lese ma o ke khi, agbo onodio o she dose, agbo onogbo o ke la.

18 Eshinegba o ga ri ele eni emhi enana nya. Loli o ri awa ni awa kpe khi ebe oli nu egbeoli ri ele, rote obo oyi iKirisiti. O ri akanya na awa, awa ro ke ri egboese nu lue ri ele.

19 Eri Eshinegba o ri egbo na agbo nya nu egboli i ri ele rote obo oyi iKirisiti, ni o khia khi Eshinegba o ri olamhe mu ota so we. Igho o she ri usomhi ni a ro ri egbo ali Eshinegba a

ri ele nga awa obo.

20 Irarigho eni e to eloli iKirisiti awa ke ri irarigho khi, ni o ro li abine khi eri Eshinegba o rote unu oyawa a lema egbo. Anye lema e na iKirisiti, a ka nu Eshinegba ro ri ele.

21 Eri Eshinegba o ri iKirisiti ni o mholi olamhe mele ona olamhe itobo oyawa, egheghe agho, ni awa me asha rote iKirisiti mholi ipfuase oyi Eshinegba.

6

1 Abi eni we we ali Eshinegba e ga a gbe akanya oghuo, anye lema e, a khi ze ni a mie okhale oyi Eshinegba shi afue.

2 Irari khi Eshinegba o li e, "Abi egheghe ni mhi ro ya ri ele isomhelempi na e,

o ro ramhi,
mhi ri eso shi e eke,
abi ogbele imiepfuese
oye o ro ramhi,

mhi kpaghie e obo." Mhi gueye e khi memena o khi egheghe isomhelempi, amo khi ogbele imiepfuese.*

3 Anye ea ya pfi ozude shi ogbokhoghuo ode, ini egbo e khi me emini o ti okhoghuo gue shi akanya oyi Eshinegba ni anye e gbe.

4 Ama abi ighumha eyi Eshinegba ni anye khi, eri anye ri emini anye khi khaso odekhode, abi anye li ri egbe mie osoli ali umham e ali iyese-udu-a.

5 A gbe anye itali, a gbo mu anye shi oga-ighumha, a la onyaghu kuale anye utse,

* 6:2 Li ze Aza 49.8

anye gbe akanya agbeghua, anye mhue umha-ke-lese ali okiamhi.†

6 Ama anye kie la elemhi ipfuase ali ilese, ali irabomudu ali isomhelemhi, rote Ayemhe-nõ-pfuase ali inono ni o rote udu igesikia lasele.

7 Anye e ngme ingmemhi igesikia, ali ekpabo oyi Eshinegba o la anye egbe e gbe akanya. Akhegbe oyanye khi igue-ngeli odalo oyi Eshinegba, abi okhõli-okhue o lie mu itsua okhõli mhue obita ali ogobo.

8 A ri ekpe na anye a gbo yeghe anye-a, a ngme onete oyanye, a gbo ngme onobe oyanye. Anye egbo igesikia, a lu anye elo-egbhue,

9 E li anye abi eni aa lese, ama a kie lese anye, a li anye abine khi eni e ghuloa anye khi, ama, a me õli me khi anye kie la agbo. A na anye osoli ama aa gbolo anye-a,

10 Anye mhõli iyeselemhi-a, ama anye kiele e ghele, anye li abi eni ea mhue, ama eri anye ri ebubu egbo khi eni e pfue. Anye li abi eni ea mhõli emhi khoghua, ama emhikpa anye mhue.

11 Egbo iKõriti, anye she ri igesikia nu e ngme, anye khueghie udu oyi anye-a gbodogio deba e.

12 Anye ea ti egbe je ukhokho inono ni anye mhõli na ee, ee tse aa ke nono anye.

13 Irarigho, mhi nu e ngme abi eniye eyemhe, a li mhõli

usamhi nabi anye sa deba e na anye. A khueghie udu oye e-a na anye gbodogio.

14 Khi ze ni u nu õni õa miesuo ke riele emhi kugbe. Se, igesikia ali egbhõli e li gue la asheghuo kugbe? Elo o ku akpa ali obili gbe?

15 Elo e ku iKirisiti ali Okphaghiye? Abi elo õni o miesuo ali õni õa miesuo e mhõli kugbe?

16 Ilama-kugbe onoghua o la Owa Oyi Eshinegba ali ikhumhi o? Irari khi Owa Oyi Eshinegba ni o la o, awa khi, ezeze abi Eshinegba o ngme õli khi,

“Mhi ya la we elemhi, mhi la we iteva a kia, mhi khi Eshinegba oyewe, wewe e khi egbo eyemhe.”‡

17 “Irarigho, a rote we iteva lasele,

ni a khi oda shi we o, ali a khi ri obõ ti emini õa pfuase, egheghe agho ni mhi ti e mama egbe.”

Eshinegba Onomhue nõ fune

nya,

o ngme na. §

18 “Mhi ya khi ita e, ee a khi imimhe emose ali ikpotso.”

Eshinegba Onomhue nõ fune

nya

o ngme na.*

7

1 Aborokhia khi awa mhõli ishobo ena, emole mhe, awa kpe idiegbe ali ayemhe

† 6:5 Li ze Ika 16.23 ‡ 6:16 Li ze iLev 26.12; Ezik 37.27; 1 iKõri 3.16; 6.19 § 6:17

Li ze Aza 52.11 * 6:18 Li ze 2 iSam 7.14; 1 Okhe 17.13; Aza 43.6; ijere 31.9

oyawa-a, rōte emini e ri ichimhi ẹ shi ọgbọ egbe ali ayemhẹ nya. Awa ke rōshẹka ini awa doḅe ramhi irọpfaṣe pfo nya, itobọ khi awa a na ulishi Ẹshinẹgba.

Igbaa oyi eni e mie ifesu iKirisiti suọ e ri egbe mu iPọlu

² A khueghie udu oyẹ ẹ-a na anye. Anye ẹa li ọgbọkhọghuo onobe, wẹkhi eri anye yese ọgbọkhọghuo udu-a, ukẹ-liẹ khi eri anye li ọgbọkhọghuo le.

³ Ọa khi eri mhi ngme ona rọ pfuẹchẹ ẹ-a, irari khi mhi kpẹ ngme ọli khi ingme oyẹ ẹ o la anye elemhi udu ramhi ni anye rọ ya lama nu ẹ ghua, okekhi ni anye rọ nu ẹ la agbọ.

⁴ Mhi lolo regbenga ẹ, mhi ma rẹ ẹ gha gba. Elemhi osoli ni anye mẹ nya, eri iridushio ali oghẹlẹ oyanye o vọ ọ tsuakua.

⁵ Irari khi abi mhi rọ lo iMasidonia le, idiegbe oyanye ona ọa mhọli iyemhẹa okhọghuo. Oḅe-khodẹ a na anye osoli, eghuo e nu anye wola, ulishi o la anye udu.*

⁶ Ama Ẹshinẹgba na irudushọ, ni ọ ri udu ẹ shi oni egbe e pfo-a ọ, ọ ri iTatọsi ni ọ bhale ri udu ke shi anye ọ.

⁷ Ọa khi ibhale oyọli tṣe o ri udu shi anye ọ, ama abi a li ri udu shi ọli ọ. Ọ gbo gueyẹ anye abi o liẹ ghọle ẹ ni a mẹ mhẹ, ali abi a li viẹ oya, ali abi ingme oyemhẹ ọ li mu ẹ egbe. Irarighọ, oghẹlẹ oyemhẹ o rọ fu doṣe abi o kpẹ li ghue.

⁸ Ini ebe ni mhi keḅe ghi ẹ, o ri iyese-udu-a na ẹ, ọa limhẹ egbe abinẹ khi emini ọa ti ni mhi riẹlẹ. O kie remhẹ chima, mhi mẹ khi ebe oyemhẹ o rẹ ẹ yese udu-a ukuku ẹghẹghẹ.

⁹ Ama egbe e kiele mu mhẹ, ọa khi itobọ khi mhi ri udu oyẹ yese-a, ama itobọ khi iyese-udu-a oyẹ o rẹ ẹ mu pfi. Eri a mhọli iyese-udu-a abi Ẹshinẹgba ọ nono ọli shi. Irarighọ, ọa li ẹ onobe.

¹⁰ Irari khi iviẹ-osoli ni o ghọle Ẹshinẹgba, eri o ri ọgbọ ọ mudu pfi, o rọli ẹ nono ni a mie ọli pfuese. Onana ọa ri ọgbọ ngomhi obọ-a. Ama ini ọgbọ viẹ osoli abi ẹgbọ na agbọ, eghuli o rọ ọ bhale.

¹¹ A lẹṣe bino emini iviẹ-osoli ni o ghọle Ẹshinẹgba ọ rọ na ẹ. Abi a li rōshẹka ni a rọkhasẹ khi aa mhue umh-aguẹli. Elemhi e bi ẹ. Abọ e sha ẹ, ni o rẹ ẹ yila. A gbolo nono ni a sọ ingme shi oḅe igesikia! A rọkhasẹ khi aa mhọli ashini a te riẹlẹ oni ingme do-a, ẹghẹghẹ kpa.

¹² Irarighọ, ini mhi ririẹ keḅe ebe oghọ ghi ẹ, ọa khi irari eni e li ingme wẹkhi irari eni ẹa li ingme. Ama eri mhi keḅe ebe ona ghi ẹ, ni a ba mẹ abi ingme oyanye o li mu ẹ egbe odalo oyi Ẹshinẹgba.

¹³ Enana nya e ri udu shi anye ọ.

Abi o li ri irudushọ na anye, ighọ egbe ma mu anye abi anye rọ mẹ abi iTatọsi ọ li ghẹlẹ, itobọ ayemhẹ oyọli o ti ngẹ abi ẹẹ nya a ri egbe mu ọli.

* 7:5 Li zẹ 2 iKori 2.13

14 Mhi kpẹ rẹ ẹ tonon obo udu khasẹ iTatosi, ama aa ri omama mu mhe. Abi emini anye gweye ẹ nya e li khi igesikia, igho abi anye rẹ gha khasẹ iTatosi o li ya khi igesikia.

15 Igho inono ni o mholi na ẹ o li nga shi o, ini oo sato abi a li suo eso na li, ali abi a ri ulishi ali iguomhise-egbe mie loli.

16 O ma remhe ghele gba khi eni e ze ri egbe ẹ nga a khi.

8

Abi eni e miesuo e lie somhopfa

1 Inyoghuo, anye ẹ nono ni a lese afu ni Eshinegba o ro na igbaa nya eyi eni e mie iJesu iKirisiti suo ni e la eke iMasidonia.

2 Eri a rote osoli ni e me mu we fe bino, ama eri e kie ri ukpokpomhi oghelẹ e somhopfa, abi o rie khia khi ẹa mhuẹ.

3 Mhi gue oli ẹ ye ẹ egbegbo khi eri e pfue elemhi somhopfa dose ashini e mhuẹ ramhi.

4 E lema anye, anye kpekpe anye ze ni wewe e mholi okemhi shi oghelẹ ni o la irikpaghiobo na egbo eyi Eshinegba ni e la eke iJudia.*

5 Eri e ga riele dose abi anye sa khi e li ya riele. E kpẹ te odode ri egbe we na Onomhuẹ, neni e ke ri egbe we na anye abi Eshinegba o nono ni e li riele.

6 Irarigho, anye ro lema iTatosi, oni o re ẹ bele oni egbegbi akanya ona, o kpaghie ẹ ni a ri eminete ni a gba eke le ramhi ukpese.

7 Eri a gue ẹ riele emhikpa dose egboese nya. A toto irudunga ne, a gue ẹ ngme emue ne, a gbo lese ne. A ma nono ni a rue obo-a, a gbo nono ingme oyanye ne. Zobe ni u dose ogbokpa okpokhe ilili.

8 Oa khi itoto mhi ro mhesẹ oli na ẹ ama eri mhia mhesẹ igesikia ni o la inono ni a mholi bino, abi mhi li roli ẹ khokho omuegbe ni egboese e mholi na anye.

9 A lese abi okhale oyi iJesu iKirisiti Onomhuẹ oyawa o li, khi aboriekhia khi oni o pfue o khi, eri o ri egbe oli mele ona umhame-a shi itobo oye ẹ, ni o me asha ri umhame oyoli re ẹ pfue.

10 Ude ni mhi ya ye ẹ ena, ni o ro ti ẹ egbe lo: O ma ti ini isomhopfa ni a te eke bele aolukpe ni a roli ramhi ukpese, abi a li kpẹ te odode khi eni e mholi oguemu mhuẹ somhopfa, ni e gbo somhopfa.

11 A zobe ni a pfuse oni akanya gbe pfo, ni abi o li te eke mu ẹ egbe ni a ro somhopfa, ni a ligho somhi oni opfa abi abo e te ẹ.

12 Emini a mholi oa mu Eshinegba eloe. Emini o mu eloe khi abi a li mholi oguemu mhuẹ ni a rote emini a mhuẹ somhopfa, oa khi oni aa mhuẹ, aa bino.

* 8:4 Li ze iRom 15.26

13 Oa khi eri mhia mie egbo eghuo itsua shi ekę ni mhi rọ ri itsua na egboęse tsua. Ama ni a ga li abeghuo.

14 Aborokhia khi a mhọli gbeku o memena egho, o ti ni a kpaghię eni ęa mhue obo. Ini wewę e ke li mhue gbeku o ełełese, ni ęę aa ke rọ mhọli, wewę e li kpaghię ę obo, ishegho o guę ti ę egbe abeghuo.

15 Abi a li keke ọli shi Ebe-no-pfuase khi,

“Oni o ti ę gbili

o ya tigbe mhọli gbeku o, ama oni o ti ikukuwe gbili, emhi khoghuo o ya tigbe ę baliku.”†

A ghie iTatosi je iKoriti

16 Mhi kphemhi na Eshinegba ni o li ri omuegbe onabi mhi mhọli na ę, shi iTatosi udu.

17 Irari khi o a khi eri o lese lama shi emini anye lema li o rięę tse, ama eri o she kpe la li udu khi loli ę bhale deba ę.

18 Anye li ghie inyoghuo ooghuo deba li ę bhale. Ogbọ ni a ga lolo mu ekpe ę na elemhi igbaa oyi eni e mie iJesu iKirisiti suọ nya shi akanya itsabo usomhi onete oyi Eshinegba o khi.

19 Oa khi ogho tse, eri eni igbaa nya eyi eni e mie iJesu iKirisiti suọ, e ze ọli o deba anye kia abi anye li tsua eni isomhopfa ikpagho ni anye ro ya na ę kia. Ikhi ikpaghiobo ni e ya ri ikuęghię ghi eva oyi oni Onomhue, ni

o rokhase khi anye mhọli omuegbe roo kpaghiobo.

20 Anye ęa nono ni ogbokhoghuo o me emhi akhokhomhe okhoghuo gue shi abi anye li ri isomhopfa ikpagho okpokhe ena kia.

21 Emini o ze khi anye lina rięę ọli khi, eri anye rosheka ni anye rokhase khi anye guę ri eni isomhopfa ikpagho ena kia. Oa khi odalo oyi Eshinegba tse ama li shi odalo oyi egbo nya.‡

22 Anye gbo li ghie inyoghuo olese ma aava ena egbe ę ghi ę. Anye she mu ọli fe itingmingme, anye me ọli me khi o ma nono ni loli kpaghię obo. Eena o mema ghole ọli o ro kpaghię obo, eena ni o she me khi eni a ri egbe ę nga a khi.

23 ITatosi onuzava oyemhe ali oni anye ga a gbe akanya kugbe o khi, ama inyoghuo awa enekpole, etoeloli igbaa nya eyi eni e mie iJesu iKirisiti suọ, ni e ri ufumhi na iKirisiti.

24 Irarigho, a ri inono oyeye khase eni egbo ena, ali emini o ze ni anye ro reę a gha, ni igbaa eyi eni e mie iJesu iKirisiti suọ e me ọli.

9

Ikpaghiobo ni a ro na egbo eyi Eshinegba

1 Mhi aa kha ke gbo keke ingme ikpaghiobo ni a nono ni a ro na egbo eyi Eshinegba ni e la ekę ijudia shi ebe ghi ę.

† 8:15 Li ze Okiali 16.18 ‡ 8:21 Li ze Ekpi 3.4

² Mhi lẹsẹ khi ọọ ghọle ẹ ni a rọ kpaghie obọ, mhi gbo rọli rẹẹ ẹ neta omọse khase ẹgbọ na obini iMasidonia, khi aolukpe, ẹẹ ni a la Akhaya a te muegbe ni a rọ ya kpaghie obọ, ali khi omuegbe oyeẹ o she li guise ẹgbọ eghuo le, ni e rọ li rieḷe ikpaghiobo.

³ Ama eri mhi ghi inyoghuo awa ena ghi ẹ ni a rọ mu egbe shi eke, ini eta omọse ni anye rẹ ẹ na shi isomhopfa ni a somhi, o khi li abi afue ni anye rẹ ẹ na eta omọse, ama ni o kie khi abi anye ẹ khi a li.

⁴ Irari khi ini onge iMasidonia okhoghuo ọ deba mhe bhale, ni aa rọ mu egbe shi eke, omama o ya mu anye shi abi anye li ligho beshi regbenga ẹ rẹẹ neta omọse. Eẹ omama o ya mu ne.

⁵ Lọli o zẹ ni mhi rọ ghie eni inyoghuo awa ena ralo na mhe, ni e ya muegbe isomhopfa okpokhe oyi ukpago, ni ẹ khi a ya rọ bhale shi eke neni mhi bhale. Eghẹghẹ agho ni a rokhasẹ khi eri o pfo ẹ udu li oni okpokhe ni ọa khi oyi ichiobo.

⁶ A sato khi oni ọ chi-obọ ri emhi kọ khi ukukuọ ọ ya me khiẹse. Oni ọ ri emhi kọ tuọ, emini e bu o ya me khiẹse.

⁷ Ogbogbo ọ ri irarigho ke rona abi o pfo ọli udu, ama ọ khi ri iwolo rona, ali o khi li abine khi oni a ri ekpabo rẹ ẹ rieḷe, irari khi Eshinegba ọ ma nono oni ọ ri oghẹle ẹ rue obọ-a.

⁸ Eshinegba ọ dobe ya ri ikhivose ni o dose oni a nono

na ẹ, ni a rọ bhale ya ẹ khi a mhọli emhikpa gbeku ọ dose abi a nono ọli shi, ni a rọ dobe ke rieḷe eminete khi eminete na ẹgbọese eghẹghẹ kpa.

⁹ Ezeze abi a li keke ọli shi Ebe-no-pfuase, ni ọọ,

“O li okpokhe tuotuo,
o somhi eni ẹa mhue
opfa,

ogbo ọa ya yele

igue-ngeli oyoli-a ghue

agboagbo.”*

¹⁰ Eshinegba ni ọ ri ukpamhi ẹ na ogbo rọ kọ, ọ gbo ri eminale na ogbokpa a le. O ya gbo ri ikpamhi ni a rọ ọ kọ ghi ẹ, ọ gbo rẹwe zẹ, ọ rẹwe fu ni a me khiẹse. Ishegho ni onete ni u rieḷe na ẹgbọ o mo umomhi ne, ni u pfa le.†

¹¹ O ya rẹ ẹ pfue odekhode ni a ke li okpokhe eghẹghẹ kpa, ni ebubu ẹgbọ e ke kphemhi na Eshinegba ini anye tsua isomhopfa eye ghi we.

¹² Oni ugamhi ni a lina ri okpokhe oyeẹ ona ga ena, ọa khi ẹgbọ eyi Eshinegba na pfa na tse o kpaghie obọ, ẹgbọ ebubu e ri itobọ ona a kphemhi na Eshinegba.

¹³ Eri akanya ni a gbe na ẹgbọ eyi Eshinegba o ri ufumhi na Eshinegba, o rẹwe kuẹghie Eshinegba. Ona o rokhasẹ khi eni e mie usomhi onete oyi iKirisiti suo a khi, ni a ri oni usomhi gbe akanya, abi a li li okpokhe na we ali ẹgbọ elese.

¹⁴ Inono ni e rọte ekelelmi udu mhọli na ẹ, e te ẹ so iromhi na ẹ, itobọ ikhivose ni

* 9:9 Li ze Iwolo 112.9 † 9:10 Li ze Aza 55.10

Ɛshinegba ọ rẹ ẹ khivose na we.

¹⁵ Awa ke kphemhi na Ɛshinegba shi isomhopfa oyoli ni unu ọa dobe ngme pfo.

10

IPolu ọ ri akanya aghiu-somhi oyoli lo egbo esọ

¹ Eri a roli shi khi eri mhia pfo ini mhi la odalo oye ẹ nu ẹ ngme, ama ini mhi aa nu ẹ migha, mhi nu ẹ ẹ ngme ingmemhi ni e ze. Mena, mhi lema ẹ a ri esọ shi mhe eke, irari khi egbegbi iKirisiti lue ọ, ọna ipfomhe ali ikuegbe-a ọ khi.

² Egbo eghuo ẹ lie khi eri mhia ngeli abi egbo na agbo ẹẹ li. Irarigho mhi ya ri uruli ni o ze nu we ngme emini mhi nu we ya ngme ini mhi bhale. A kpekpe a khi yese mhe ligho ngeli deba ẹ.

³ Irari khi ini o ri riẹ khia khi elemhi agbo anye la, anye ẹa ya kholi abi egbo na agbo e lie kholi.

⁴ Irari khi itsua okholi eyanye, ẹa khi eni áá me alo gbugbugbu, ama obọ oyi Ɛshinegba e te bhale. E mholi itoto ni e ro dobe ẹ guoghọ ekpabo itoto oyi okphaghiẹ-a. Anye ẹ guoghọ ekhako-a,

⁵ ali isamhi ighagha nya-a, ni ẹ khi ọzuode, ni e ti egbewe nga a dose ilese eyi Ɛshinegba. Anye ẹ mu isamhi ebe nya iko, anye rewe ẹ nyese ukhomhi na iKirisiti.

⁶ Anye mu egbe ni anye ro ya na umha-sueso nya osoli ini isueso-negbe oye ẹ gba se.

⁷ Ọa khi abi emhi o li odagbe a lie bino oli? Onge ẹ okhoghuo ọ la ọ ni ọọ lu egboli onayi iKirisiti, ọ gbo sa ingme egboli bino, irari khi oyi iKirisiti anye li khi abi loli oli khi oyi iKirisiti.

⁸ Omama ọa ya mu mhe shi ọ, ini mhi riẹ tono obọ udu dose ode shi afu ni Onomhue ọ ro na mhe, mhi ro kpaghiẹ ẹ obọ, ni ọa khi oni a ro yese ẹ.

⁹ Mhi aa nono ni mhi li abine khi eri mhi ri ebe ni mhi keke ẹ nyamhise ẹ alo.

¹⁰ Irari khi eri egbo eghuo ẹ lie khi, ebe eyi iPolu e ma kho dose, ama ini ọ nu awa la ana ọ pfo-a, ingmemhi eyoli ẹa ke mu amẹ.

¹¹ A ze egbo eghogho lese khi emini anye keke shi ebe ini anye ẹa la agho, khi wewe anye gbolo ẹ riẹle, ini anye bhale migha.

¹² Anye ẹa gbudu ya ri egbe anye khokho eni ẹẹ titi egbe we. Irari khi eni eri e ri egbewe mhesẹ egbewe, ni e ri egbewe khokho egbewe, eyeghe e khi.

¹³ Ama anye ẹa ya tono obọ udu da ode, ama ashini Ɛshinegba ọ ri afu na anye ramhi anye ya tono obọ udu ramhi, ikhi akanya ni anye gbe ni o ramhi ẹ egbe.

¹⁴ Anye ẹa ya titi egbe anye dose ashini anye kha titi egbe anye ramhi, irari khi anye e mema rue usomhi onete oyi iKirisiti bhale ghi ẹ, ni a ga lese gboo.

¹⁵ Anye ẹa ya ri ikanya ni egboese e gbe ke tono obọ

udu abine khi anye gbe we. Ochoghọ eri anye ri udu shi khi irudunga oye ẹ o ya ke nga shi o, ni anye gbo dobe gbe akanya ni e fune iteva oye ẹ, abi Eshinegba o mhesẹ ọli ni anye.

¹⁶ Ishegho ni anye dobe tsabo usomhi onete obini eke oboese ni o kpe obo na e, ini anye khi tigbe ri ikanya ni a gbe oboese tono obọ udu.

¹⁷ Oni ọọ tono obọ udu, o ke ri emini Onomhue o riẹle tono obọ udu.*

¹⁸ Irari khi ọa khi oni o ti egbe ọli nga egbo ẹẹ mie khi o ti, ama oni Onomhue o mie, o khi oni a mie.

11

IPolu ali ighiusomhi na kee eyi egbhọli

¹ Mhi lema e a kpepeke a rosheka ri egbe mie oyeghe oyemhe ukuku o tse!

² Ingme oye e o ma mu mhe egbe gba abi o li mu Eshinegba egbe, itobo khi eri a li abi omueshi ni ọa me omose ghue, ni mhi she ro nga na omose oghuo, ikhi iKirisiti.

³ Ulishi ọọ mu mhe ini a ya yese e udu-a ali khi a ya tsua inono na tselele ni a mholi na iKirisiti pfi, ezeze abi enye o li ri ikpamhika eyoli di iivu.*

⁴ Irari khi ini ogboese o bhale deba e ya ri ifesu olese tse abo ye e, ni mhia ro tsabo ye e ghue, okekha khi ayemhe olese ni o khi oda shi oni a kpe mie, a ke mie, okekha usomhi onete olese

ni o khi oda shi oni a kpe mie a ke mie, eri a mema nyanya mie ọli.

⁵ Mhi aa sa khi mhi kpo dose ighiusomhi na kee ena aakemeghue eye e ni e gho mu e eloe egho.

⁶ Ini o ri riẹ khia khi ungemhi ọa lolo bie shi mhe unu, mhia khi oni ọa lese ebe. Anye she ri ona lo e esọ gboo, odekhode.

⁷ Eri mhi ri ona lamhe ni mhi aa roo khi oki nga e ike abi mhi ro gue usomhi onete oyi Eshinegba ye e? Ni mhi ro ri egbe mhe tiemhie eke ni mhi ro re e fu?

⁸ Igbaa nya eyi eni e mie ifesu iKirisiti suo elese ee fali mhe ota abi mhi ro la iteva oye e gbe akanya. Mhi mie we ro zuse na e.

⁹ Abi mhi ro la aye e, mhi aa ri ingme ukpagho nase e, inyoghuo awa ni e rote iMasionia bhale e tsua emhikpa ni mhi i nono ghi mhe. Abi o kpe li ookhokho, ni mhi aa kpe ri itsua na e tsua igho o kie ya li odalo.†

¹⁰ Ini igesikia oyi iKirisiti o da kie la mhe egbe ne, ogbokhoghuo ọa la o ni o dobe ya khu mhe mhi khi ke lina tono obọ udu elemhi eke Akhaya.

¹¹ Ọa khi eri mhi aa nono ingme oye, ini mhi ke da lie khi mhi aa nono ni mhi ri itsua na e tsua. Eshinegba o lese khi mhi nono ingme oye e.

¹² Mhi ya kie ke riẹle emini mhi kie kpe riẹle. Eghẹghẹ

* 10:17 Li ze ifere 9.24 * 11:3 Li ze Igbae 3.1-5,13 † 11:9 Li ze ifili 4.15-18

aghọ, eni ẹẹ nono ni wẹwẹ e liẹ khi ikanya eyẹwẹ ali eyanye khi abeghuo e li, ni mhi rọli khi wẹ unu-a.

13 Emọse eghọghọ, ighiusomhi na keẹ eyi ẹgbhọli e khi, ni e ri ikanya ni ẹ gbe ẹ lono ẹgbhọli, ni ẹẹ li ẹgbọ ikokoalo, ni e ri egbe wẹ shi khi ighiusomhi na keẹ eyi iKirisiti wẹwẹ e khi.

14 Oa ke khi emini áá khọkhọ, irari khi eri ọkphaghie ọ ri egbọli mele aḡeni ọyi ákpá a li ẹgbọ ikokoalo.

15 Irarighọ, ọa khi emhi ọshabọ ini ighiusomhi eyọli, ẹẹ li ikokoalo ri egbewẹ mele ighiusomhi ni e migha shi ip-fuase. Ikpukhokho, e ya me isọ-ẹzọ oyẹwẹ mie.

Osoli ni iPọlu ọ me na iKirisiti

16 Mhi gbo ngme ọli, ọgbọkhọghuo ọ khi sa khi ọyẹghẹ mhi khi, ama ini u ke lighọ sa, kie lighọ mie mhe abi ọyẹghẹ, ni mhi me emhi rọ ke neta ọmọse.

17 Ama ọa khi emini Ọnọmhuẹ ọ kha liẹ mhi ngme mhia ngme memena. Eri mhi ga ngme abi ọyẹghẹ elemhi ingme ineta ọmọse ona.

18 Aborọkhia khi ẹgbọese e ri emini e riẹle ẹẹ neta ọmọse eghọ, mhi ya li lana lighọ.

19 Ilesingme dọse oyẹẹ o ze ni a rọ ri oghẹle mie eyẹghẹ shi iteva oyẹẹ ena!

20 Ẹgbọ ni ẹẹ mu ẹ ighumha, ni e ri ikpamhika do ẹ ighiatọ, ni e reẹ le emhi, ni e ri ukpeloe

e gbe ẹ e gbo pfi ima shi ẹ alo, wẹwẹ áá mie.

21 Omama o khi, ni mhi rọ liẹ khi eri anye pfo alo-a, ni anye a rọ lina ngeli deba ẹ.

O kha khia khi onete o khi ni eni ighiusomhi eyi ẹgbhọli eghọ e rọ ke neta ọmọse shi emhi afue ni ẹẹ riẹle deba ẹ, mhi ya li nu wẹ la ana neta ọmọse. Ama a rọli shi udu khi ọgbọ ni ọọ neta ọmọse shi angeli oghọghọ, khi ọoyẹghẹ ọ khi.

22 Ghe khe, e khe khi Iburu wẹwẹ e khi, Iburu mhi li khi, ẹẹ khi iZireni wẹwẹ e khi, iZireni mhi li khi. Imimi Abu-raamu ni e khi, lọli mhi li khi.

23 Ighiusomhi eyi iKirisiti ẹẹ khi wẹwẹ e khi? Mhi la ana ya li ọyẹghẹ! Mhi ga ti dọse wẹ e! Mhi ga gbe akanya dọse wẹ. Mhi la owa ighumha itingme ni e bu ne, iti-ingme ni a gbe mhe itali e bu dọse eyẹwẹ. Iti-ingme ni eghuli o kha gbe mhe e bu ne.‡

24 Agbhagbhamhi ishe ẹgbọ iJu e gbe mhe itali oghuo ọa la egbhueva.§

25 Itese ẹgbọ iRomu e gbe mhe ikpokpo, a tonu mhe eche utoghuo. Itese oko okẹ oniemi ni mhi lo e kulue, ogbeleghuo ali eliyose nya mhi la ukhomhi okẹ oniemi, ni o tsua mhe gasẹ, ni mhia me abi mhi li kia.*

26 Iti ingmi-ingme mhi ye asha, ni mhi kha ri egbe na okẹ oniemi ali ighiatọ gbe-a, mhi gbo la okhena oyi ẹgbọ iJu eyemhe, ali ijeta. Mhi li la

‡ 11:23 Li ze Ika 16.23 § 11:24 Li ze iDeut 25.3 * 11:25 Li ze Ika 16.22; 14.19

egbegbi okhena elemhi ifui apfe, mhi la okhena odagbe ifufu, mhi la okhena ukhomhi okẹ oniemi, mhi gbo la okhena oyi egbo eghuo, ni e li abi eni e mie Onomhue suo.†

27 Eghẹghẹ kpa mhi ro la iroshẹka ali akanya agbeghua, mhia me olesẹ lese ẹle-iyosẹ eni e bu, okiamhi ali okiamẹ o gbe mhe. Eminale eyemhe e pfo mhe isheghuo, isheghuo ulili o gbe mhe, mhi aa me itsua so.

28 Ini a ri obọ ri egho shi eke, ogbelekpa usamhi ni mhi sa shi ingme oyi igbaa nya eyi eni e mie ifesu iKirisiti suo o ro nase mhe.

29 Oghuo o famhi losẹ ni ọa li pfi ọlosemhe na mhe? Abi khi ogbokhoghuo o lamhe olamhe ni ọa ri egbe lala mhe?

30 Ini mhi riẹ neta omose, emini e ri ọlosemhe oyemhe ya khasẹ mhi ro ya neta omose.

31 Eshinegba ita Onomhue ifesu o lese khi ọa khi egbhọli mhia lo. Ikhivose khi eva oyoli agboagbo

32 Abi mhi ro la ẹoli iDamasikosi, eri igovuno ni o gbe akanya deba oghie Arẹtasi o ri idogeli kpe khe mhe ode unuekpe ni a te lo oni ẹoli, ni e ba gba mhe mu.

33 Ama eri ogbo rue mhe pfilo ugi rote okele ni o la ugbe ni a khi gasẹ oni ẹoli bẹna tiemhi, ni mhi ro me asha na vu.‡

12

Irokhase ni iPolu o me

1 Mhi ya kie ke neta omose, ama, mhi lese khi ọa mhọli eleli ni o ro o bhale. Irarigho ingme imeke ali irokhase ni Onomhue o ro na mhe mhi ke ya ke ngme nga memena.

2 Mhi lese omose oghuo ni o la elemhi iKirisiti ni a rue je idane agbhagbhamhi onuziese, oonokpe-igbene. Ini elemhi idiegbe o la o, ini ọa khi elemhi idiegbe o, mhia lese. Ama Eshinegba o lese.

3 Abi mhi ngme, mhiẹ khi Eshinegba tse o lese ini elemhi idiegbe o la, ini ọa la elemhi idiegbe.

4 Eri a rue ọli eke-a zai, ya nga Apfe oyi Eshinegba na iloghie. O suo emini ẹa ze ya guele, ni aa ya lama shi a gbudu ngme unu le.

5 Oni omose ogho mhi ro ya neta omose. Ama mhia ya ri egbemhe neta omose, seẹ ni umha mhue ekpabo oyemhe.

6 Ini mhi ri riẹ neta omose, mhia ya riẹle ingme oyeghe, itobo khi igesikia mhia ngme tse. Mhi ya roshẹka ini mhi khi ngme da ode. Eghẹghẹ agho ongeẹ okhoghuo ọa ya timhe nga dose abi a kha timhe nga ramhi, rote emini a me khi mhi riẹle ali emini a suo khi mhi ngme.

7 Eri a ri emini o li abi ugba ni o ya ke nase mhe shi mhe egbe ni o khi aghiusomhi oyi okphaghiẹ, ini mhi khi vuse ike dose shi irokhase ebubu ni mhi me.

8 Itese mhi lema Eshinegba o mie mhe oni emhi anasemhe

† 11:26 Li ze Ika 9.23; 14.15 ‡ 11:33 Li ze Ika 9.23-25

ona pfi-a.

⁹ Ama emini o ro so mhe o khi, “Ekpabọ eyemhe o she bu e, irari khi ini o lose, loli ekpabọ eyemhe e ro me asha ri egbe e khase.” Irarigho mhi ro ri oghela ri olosemhe oyemhe ya neta omose, ni ekpabọ eyi iKirisiti e me asha remhe gbe akanya.

¹⁰ Ini mhi mhu e olosemhe, ali ni a ro tsue mhe, ali ni mhi ro la umhame ali ni a ro mu okholi vule shi mhe o, ali ni mhi ro mholi iyese-udu-a, o kha da khi itobo oyi iKirisiti, eri o ri egbe e mu mhe. Irari khi ini o lose mhe, loli mhi ro mholi itoto.

Ingme oyi egbo iKoriti o mu iPolu egbe

¹¹ Eri mhi chi ooyeghe-a, ama ee a yese mhe e chi oli-a. Ee a kha ke titi mhe. Ini mhi aa ririe khi emhi khoghuo, mhia mhu e emhikhoghuo ni mhi te kpọ dose eni a lui, “Ighiusomhi na kee ena aakemeghue.”

¹² Elemhi iregbemie osoli, mhi ro la iteva oye e gbe riela olele onyaloa ali oshabo ni o rokhase khi aghiusomhi na kee oyi iKirisiti mhi khi.

¹³ Eri ikhivose ni igbaa nya eyi eni e mie ijesu iKirisiti suo elese e me mie o de e unu-a? Abi mhi aa li ri ingme ikpaghiobo ukpagho nase e lo? A kpekpe, a ro topfa mhe shi o.

¹⁴ Utonuzese na ni mhi ro mu egbe ni mhi ro bhale ya bino e. Mhi aa ya mhila e emhi khoghuo. Ee oye e mhia nono, o a khi ukpagho oye e.

Oa kpe khi eniye e ri emhi na eni e bia we e le, ama eni e bia eniye e ri emhi na we e le.

¹⁵ Irarigho, mhi ro ya ri oghela ri ukpagho ni mhi mholi nya ali mhemhe nya na e, ro kpaghie e obo. Inono onikeke a ya mholi deba mhe ini mhi mholi inono oniemhi na e?

¹⁶ A lama shi o khi mhi aa khi itsua na e ni aa tsua. Ama egbo eghuo e ya lie khi ikpamhika mhi ro ri egbholi di e mu.

¹⁷ Eri mhi ri egbo ni mhi ghie ghi e mu e ma eke?

¹⁸ Eri mhi lema iTatosi o ke le, mhi e inyoghuo awa onokpole o kphase oli. Eri a ya lie khi eri iTatosi o mu e ma eke? Oa fe ligho. Abi khi aa lese khi usamhi oghuo mhemhe ali loli anye mholi shi udu ni anye ro riela emini mhemhe ali loli anye ga riela?

¹⁹ Ots e eri a dabi khi eri anye kie kpe rosheka ke khe egbe anye shi eke odalo oye e. Oa khi igho. Ama abi iKirisiti o nono ni anye li ngme, anye li odalo oyi Eshin e gba. Emole, eri anye riela emini anye riela nya ro kpaghie e obo.

²⁰ Egbe limhe khi ini mhi ramhi agho khi mhia ya bhale ya me e shi abi mhia nono ni a li, ali khi aa ya me mhe abi a nono ni mhi li. Ulishi o mu mhe khi mhi ya bhale ya e shi uwola ali ubogbo, ali udu ni o to, ali ukphe, ali ikemhi ikui-iku, ali iyese egbe eva-a, ali ineta, ali itipfuabo-nga, ali ozughu iteva oye e.

21 Egbe limhẹ khi ini mhi ke bhale, khi Eshinẹgba ọ ya ri omama mu mhẹ odalo oyẹẹ. Mhi ya viẹ na ebubu ẹ ni ẹa kie rọte agbọ olamhẹ oyẹwẹ mupfi lasele. Ni a kie la angeli efiala, ikhi usamhi irumheba, ali olamhẹ ighue imumu.

13

Itse-agua ali otse enekpukhokoro ni de.

1 Utonuzesẹ na ni mhia bhale ya bino ẹ. Abi Ebe-nopfuase o ngme ni ọọ, "Ọtsẹle eva, okekhi esẹ, a rọ ọ mu ma ingme, ni a rọ sọ ẹzọ."*

2 Mhi kpẹ tse agua yẹ ẹ, ẹẹ ni a kpẹ lamhẹ olamhẹ, ali ẹgboese eni e kpọle nya. Mhi kpẹ ngme ọli ibhale onuzi-eva oyemhẹ. Memena, mhi gbo ngme ọli abi mhi la oboese, mhi tse agua khi ini mhi gbo bhale khi mhi aa ya zẹ wẹ obọ khi mhi aa na wẹ osoli.

3 Onana o ya rọkhasẹ ẹ khi iKirisiti mhi ngme ẹ na. Ini ọ sesẹ ẹ ingme se, a rọ ya lesẹ khi ọ mhọli ekpabọ iteva oyẹẹ.

4 Ini o ri riẹ khia khi ọa mhue itoto abi a rọ tali ma apfida gbe-a, ekpabọ oyi Eshinẹgba ọ rọ a la agbọ. Eri awa aa li mhue itoto abi iKirisiti. Ama a ya mẹ ọli khi anye ya ri ekpabọ oyi Eshinẹgba la agbọ, ẹzẹzẹ abi ijesu ọ li, ni anye rọ ga ẹ.

5 A mhese egbe ẹ bie bino ni a mẹ ini a kie la elemhi irudunga oyẹ ẹ. Ini a mhese egbe ẹ bino ni a rọ mẹ khi

ijesu iKirisiti ọa la agbọ oyẹẹ, a lesẹ khi a she de oni imhesebino.

6 Mhi lesẹ khi a ya mẹ ọli mẹ khi anye ẹa de oni imhesebino.

7 Anye lema Eshinẹgba, a khi riẹle do-a. Ona ọa khi ni anye rọ rọkhasẹ khi anye she mẹ emini anye ẹ nono mu mhue, ama ni o rẹ ẹ ke riẹle emini e gbe akanya ini anye riẹ li abi

ni de.

8 Irari khi anye ẹa ya riẹle emini o mu okhọli vule shi igesikia ọ, ama emini o ya mu igesikia mhue anye ya riẹle.

9 Egbe ma mu anye, ini o losẹ anye ni ẹẹ a rọ mhọli itoto. Ighọ anye gbo liẹ sọ iromhi Eshinẹgba ọ rẹ ẹ ke ngeli shi ẹghẹghẹ, abi ọ nono ni a li ke ngeli.

10 Lọli o zẹ khi mhia keke ebe ona abi mhia rọ nu ẹ la oobọ ena. Ighọ lọ, ini mhi khi rọli ze mu ẹ, ini mhi bhale deba ẹ. Irari khi eri mhia nono ni mhi ri afu ni Onomhẹ ọ rọ na mhẹ gbe akanya, ni mhi rọ kpaghie ẹ obọ, ni ọa khi ni mhi rọ bighi ẹ de.

11 Ni mhi rọ gbe ọli ukhomhi inyoghuo-mhẹ, Okhila! A mu udu oyẹ ẹ pfi, a suọ olema oyemhẹ, a lama shi egbe ẹ ọ, a ri opfomhẹ nu egbe ke la. Eghẹghẹ aghọ ni Eshinẹgba na inono ali opfomhẹ ọ nu ẹ la.

12 A ke tse egbe egbegbi otse, a ghele mu egbe.

13 Egbo eyi Eshinẹgba nya ẹẹ tse ẹ.

* 13:1 Li zẹ iDeut 17:6; 19:15

¹⁴ Okhale oyi iJesu iKirisiti
Ọ̀nọ̀mhuẹ, ali inono oyi
Ẹ̀shinẹ̀gba, ali iregbemu onayi
Ayẹ̀mhẹ-nọ̀-pfuasẹ, e ka nu ẹ̀
nya la.

Ebe ni iPolu o keke ghi egbo iGalesha Eni e miesuo

1 Mhemhe iPolu aghiusomhi na keke ni o a khi obọ oyi egbo mhi te bhale, wekhi obọ oyi ogbo a te ghie mhe, ama obọ oyi iJesu iKirisiti ali Eshinegba Ita ni o rọte eghuli guise ọli le mhi te bhale, mhemhe mhi keke ebe ona.

2 Mhemhe ali inyooghuo ni e miesuo nya ni e nu mhe la, anye ga tse igbaa nya eyi eni e mie iJesu iKirisiti suo ni e la eoli iGalesha nya.

3 Eshinegba itawa ali iJesu iKirisiti Onomhue oyawa e ka li okhale na e, e ri opfomhe na e.

4 Loli o ri egbo li bhale shi iluasobo shi olamhe eyawa ni o ro pfa awa shi eke agbo okholo ali agbo ingmobe ni awa la ena abi o ghole Eshinegba oyawa ni o gbo khi ita awa.

5 Loli a ri ufumhi ya na ya ramhi ele na agboagbo. Atse.

Usomhi onete olese o a ke la o

6 Abọ e sha mhe khi a she gbẹ kie oni o rọte isomhelemhi oyi iKirisiti lu e, a mu egbe nyene e deba usomhi onete olese ni o khili o da,

7 ni o khia khi ea fe ga khi usomhi onete. O rokhase khi egbo eghuo e she pfi e lo omunu ali khi ee dua ni e

mu usomhi onete oyi iKirisiti ukhomhi pfi kpọke

8 Ama ini otseku khi aanye, okekhi agheni ni o rọte iloghie tiemhile, o ya gue usomhi olese ye e ni o khi o da shi oni anye kpẹ gue ye e, a ze ni a rue ọli shi ogbo ni a she pfa ezọ mu je ilimhi iriere.

9 Abi anye kpẹ ngme loli mhi gbo ri ele ngme memena, khi ini ogbo o bhale ya gue usomhi onete olese ye e ni o khi o da shi oni a miesuo, oni a pfa ezọ mu o pfua agboagbo o khi!

10 Eri mhia nono ni egbo e ba mie shi mhe o abi khi Eshinegba mhia nono ni o mie shi mhe o? Abi khi egbo mhia nono ni mhi ri egbe mu? Ini o khia khi egbo mhi kiele a nono ni mhi ri egbe mu lo, mhi aa kha khi aghiusomhi oyi iKirisiti.

Eshinegba o lu iPolu

11 Mhia nono ni mhi gueye e inyooghuo-mhe khi usomhi onete ni mhi ro o tse abọ o a khi obọ oyi ogbo o te bhale.

12 Mhi aa rọte obọ oyi ogbo okhoghuo mie ọli, wekhi eri a sese mhe lue. Ime-alo mhi te mie ọli rọte obọ oyi iJesu iKirisiti.

13 Irari khi a she kpẹ suo mhe eko abi mhi ro la ugamhi oyi egbo iJu, abi mhi li lolo roshaka e mu okholi vule shi ena igbaa oyi eni e mie iJesu iKirisiti suo oyi Eshinegba o. Mhi roshaka ini mhi yese imiesuo oyewe-a.*

* 1:13 Li ze Ika 8.3; 22.4-5; 26.9-11

14 Mhi fu shi oni ugamhi ẹgbọ iJu dọse ebubu ẹgbọ ni anye la otu oghuo, ali mhi mhọli ọmuegbe shi ishi eyi eni e bia mhe.†

15 Ama abi Eshinegba ni o rọte eke ze mhe kee neni inyemhe o bia mhe, ni o lu mhe rọte okhale oyọli. Egbe mu ọli khi

16 o ri omiọli khase mhe ni a bhale ya e khi mhi ri ọli tsabo ifuabọ ẹgbọ iJeta. Mhi aa vu ya mhila ogbokhoghuo,‡

17 wekhi eri mhi je ẹoli iJerusalemu ya me eni e khi ighiusomhi na kee, neni o ze mhe, ama eri mhi je eke Arabia ali mhi tigbe nyene egbe jele ẹoli iDamasikosi.

18 Abi ikpe ese e ro dọse se, mhi ro tigbe nga iJerusalemu ni mhemhe ali iPita anye lese egbe, mhi nu ọli la ogbele igbeshe.§

19 Mhi aa me aghiusomhi na kee ọlese se khi iJemhisi ni o khi inyoghuo Onomhue.

20 Mhia gueye e ukpeloe Eshinegba khi emini mhi keke e ghi e ẹa khi ẹgbọli.

21 Elese, mhi je eke iSiria ali eke iSilisha.

22 Ogbokhoghuo ọa la elemhi igbaa nya eyi eni e mie iJesu iKirisiti suọ na eke iJudia ni o me mhe ukpeloe ghue.

23 Eko ni e lese suọ khi: “Oni omose ni o kpe mu okhọli vule shi awa o, eri o ke tsabo oni ungmehi irudunga oni o kpe dua ni lue yese-a.”

24 E kuẹghie Eshinegba itobo oyemhe.

2

Ighiusomhi na ke e mie IPolu

1 Ikpe igbene e dọse, mhi nga iJerusalemu. Utona, iBanabasi o deba mhe. Mhi li gbo rue iTatosi.*

2 Eri mhi nga obọ ni mhi ro ri imealo ni mhi me gbe akanya, ali ni mhi rokhasẹ we usomhi onete ni mhi ro o tse abọ ifuabọ ẹgbọ iJeta. Ama eri mhi bẹna riẹle ona khase ẹgbọ ni e khi eni ee ralo, irari khi ulishi oo mu mhe ini ikanya ni mhi kpe gbe ghue ali ena ikpukhokho eyemhe e ya khi afue.

3 ITatosi ni o nu mhe kia, aa lie khi o mema shele-a, abi o tseku khi ọngi iGiriki.

4 Eri ingme oshẹle onana o lasẹle irari khi inyoghuo eghuo ena ẹgbọli e bẹna lo anye ifuabọ, ni e ba me asha guanọ udi ẹpfua ni iJesu iKirisiti o ro na anye, mu anye ighumha.

5 Ama anye ẹa tigbe lama na we ukuku eghẹghẹ ni a ro bhale ya e khi igesikia oyi oni usomhi onete o nu e kie la.

6 Egbọ eni e bino egbewe khi wewe e mu ẹloe, ẹa mu mhe ẹloe, irari khi Eshinegba ọa mhue oni o kpe mhe ne, ali khi abi ogbo li edato ọa roli e gue ogbo ezọ. Eni ẹgbọ eghogho ẹa mhue emini e ro ma mhe usomhi onete.†

† 1:14 Li ze Ika 22.3 ‡ 1:16 Li ze Ika 9.3-6; 22.6-10; 26.13-18 § 1:18 Li ze Ika 9.26-30 * 2:1 Li ze Ika 11.30; 15.2 † 2:6 Li ze iDeut 10.17

7 Ama eri e mę khi a she ri akanya itsabọ usomhi onete ghi ęgbọ iJęta nga mhe obọ, ęzeęę abi a li li ghie iPita ghi ęgbọ iJu.

8 Irari khi abi Eshinęba ọ li nu iPita ę gbe akanya abi aghiusomhi na keę ni a ghie ghi ęgbọ iJu, ighọ ọ li nu mhe gbe abi aghiusomhi ni a ghie ghi ęgbọ iJęta.

9 IJemhisi ali iPita ali iJoni ni a leşę khi wewę e mu oni igbaa oyi eni e mie iJesu iKirisiti suọ mhue, e mę khi Eshinęba ọ ri isomhopfa na ke na mhemhe ali iBanabasi, e rọ lama na anye, anye ke tsabọ oni usomhi onete oghuo ye ęgbọ iJęta. Wewę e tsabọ ye ęgbọ iJu.

10 Emini e ngme khi anye ke kpaghię ęgbọ ni ęa mhọli obọ, ighọ mhi li roshęka rięle ọli.

IPolu ọ gueye iPita khi ọa guę rięle

11 Abi iPita ọ rọ bhale Atioki, mhi gueye ọli gboo ghemhe ghe ę khi ọa guę kia, irari khi ọ lue.

12 Neni ęgbọ ni iJemhisi ọ ghie usomhi, e bhale, iPita ọ kpę nu ęgbọ iJęta a le eminale kugbe, ama abi eni ęgbọ e rọ bhale, ọ ti je ukhokho na iJęta eghọ, irari khi ulishi oyi ęgbọ ni ę lię khi ọgbọ ọ mema shele-a oo mu ọli.

13 Ęgbọ iJu eni e miesuo enekpọle e li kuma ọli ọ rięle ikokoalo, ya ramhi khi oni ikokoalo o li ri iBanabasi kuma wę ọ.

14 Abi mhi rọ mę khi, ęa rọte odę igęsikia abi oni usomhi onete o ngme, mhi la ukpeloe eni ęgbọ lię iPita, “Ogbọ iJu u khi, ama wa ngeli abi ọgbọ iJęta. Elo o zę ni u ke rọ nono ni i ri itoto mu ęgbọ iJęta ke rięle ighuighue eyi ęgbọ iJu?”

15 “Ęgbọ iJu a bia awa, awa aa khi ęgbọ iJęta ena olamhe,” abi a lu wę.

16 Leşę khi aa ya pfa na ọgbọ irari khi ọ ri ushi a gbe akanya, ama itobọ irudunga iJesu iKirisiti. Ighọ awa li li ri udu nga iJesu iKirisiti ni a rọ pfa na awa. Ọa khi itobọ irushi-gbe akanya, irari khi ọgbọkhoghuo ọa la ọ ni a ya pfa na irari khi ọ dobe ri ushi a gbe akanya.‡

17 “Abi awa lię dua ni awa khi eni a pfa na elemhi iKirisiti, eri o rokhase khi ena olamhe awa khi. Oghọ khi eri iJesu ọ mu ę ma olamhe? Iiye o, ọa khi ighọ!

18 Mhi kha rięle emini mhi guoghọ-a rọkọ, eri mhi rokhase khi ọgbushia mhi khi.

19 Irari khi rọte ushi mhi te ghu pfa ushi, ni mhi dobe la ọ na Eshinęba.

20 A she li ta mhe ma apfida abi a li ta iJesu ma apfida, ali khi aa ke khi mhemhe mhi ke la agbọ, ama iKirisiti ọ ke la agbọ oyemhe. Agbọ ni mhi la elemhi idiegbe oyemhe memena, irudunga Omi Eshinęba mhi te la ọ, ni ọ nono ingme oyemhe, ni ọ ghu-a, ni ọ ri agbọ oyọli na mhe.

‡ 2:16 Li zę iWolo 143.2; iRom 3.20,22

21 Mhi aa ri obọ gbe isomhelemhi oyi Eshinẹgba nyẹ, irari khi ini o khia khi itobọ iri-ushi-gbe akanya ọgbọ rọ pfuasẹ lọ, eghuli afuẹ iKirisiti ọ ghu!”

3

Irudunga tşẹ o khi ode imiepfuase

1 Eẹ eyẹghe ẹgbọ iGalesha! Oghuo ọ ri ogbọ na ẹ le? Ukpeloe oyẹẹ a la ri iJesu iKirisiti khasẹ gboo khi eri a ta li ma afida.

2 Mhia nono ni mhi rọte obọ oyẹẹ lẹşẹ emhi oghuo. Eri a mie Ayẹmhe oyi Eshinẹgba irari khi a ri ushi gbe akanya, abi khi irari khi a mie emini a suọ suọ?

3 Eeyẹghe a ghọ khi? A kha ri Ayẹmhe oyi Eshinẹgba gba ekẹle se, a tigbe ẹ dua ni a ri ekpabọ ọgbọ gbe oni akanya pfo?

4 Eri a na lina me osoli shi afuẹ? Ini afuẹ a me osoli,

5 Ayẹmhe oyi Eshinẹgba ni ọ rọ na ẹ, ali ikanya oshabọ ni ọ gbe iteva oyẹẹ, itobọ khi a ri Ishi eyi iMosisi gbe akanya lọ abi khi irari emini a mie ingme oyi iKirisiti suọ, o zẹ ni ọ rọ riẹle ena?

6 A sa ingme oyi Aburaamu ghue, “Eri ọ mie Eshinẹgba suọ ni a rọ pfa na li khi ọ pfuasẹ.”*

7 A lẹşẹ ọli shọ, khi ẹgbọ ni e miesuọ, e khi imi Abu-raamu.†

8 Ebe-no-pfuasẹ o kpe ngme ọli shi ekẹ khi Eshinẹgba

ọ ya rọte irudunga oyi ẹgbọ iJeta pfa na wẹ, ọ gue oni ungmehi ye Aburaamu ọọ li, “A ya rọte obọ oyẹ khivose na ishishi ena ekagbọ nya.”‡

9 Irarighọ, eni e mholi irudunga a ya khivose na abi a li khivose na Aburaamu, ikhi omose irudunga.

10 Egbọ nya ni e ri egbe da iri-ushi gbe akanya, a pfi unu na, irari khi a keke ọli khi, “Unu a pfi na ọgbọ ni ọa da ri emini a keke shi ebe ushi nya gbe akanya.”§

11 Mena, aa me ọgbokhoghuo ni a pfa na odalo Eshinẹgba irari khi ọ ri ushi gbe akanya, itobọ khi, “Eni e pfuasẹ, irudunga o rẹ wẹ ya la agbọ.”*

12 Ode irudunga o kiọda shi ode ushi, ni ọọ, “Oni ọ da ri ushi gbe akanya, ushi ọ rọ ya la agbọ.”†

13 Eri iKirisiti ọ pfa awa shi ekẹ elemhi ipfiunu-a oyi ushi abi ọ li khi oni a pfi unu na irari oyawa, irari khi a keke ọli khi, “Unu a pfi na ọgbokpa ni a soli-a shi ọọra.”‡

14 Eri ọ pfa awa shi ekẹ ni ikhivose eyi Aburaamu e ramhi ẹgbọ iJeta egbe, rọte iJesu iKirisiti, ni awa me ikhivose oyi ishobọ Ayẹmhe-no-pfuasẹ rọte irudunga.

Oni Ushi ali oni ishobọ

15 Inyoghuo a zẹ mhe ri angeli elekpa rue irokhokho. Ezeze abi ọgbokhoghuo ọa li dobe ya shishi ọ-a, wẹkhi eri ọ dobe ya rọ ma ilamashọ, ni

* 3:6 Li zẹ Igbae 15.6; iRom 4.3 † 3:7 Li zẹ iRom 4.16 ‡ 3:8 Li zẹ Igbae 12.3

§ 3:10 Li zẹ iDeut 27.26 * 3:11 Li zẹ Abak 2.4 † 3:12 Li zẹ iLev 18.5 ‡ 3:13 Li zẹ iDeut 21.23

Ɛshinẹgba ọ nu ọgbọ lama shọ, ni o she gbọla migha. Ighọ oni ingme onana o li.

¹⁶ Oni ishobọ, Aburaamu ali omiọli a shi ọli na. Ebe-no-pfuase ọa lie, “Ali imiọli,” ni e khi ebubu ẹgbọ, ama, “Ali omie,” ni ọ khi ọgbọ ọghuo, ni ọ khi iKirisiti. §

¹⁷ Emini mhi ri ona ngme khi, ushi ni a tigbe rọ lasele abi ikpe egbhue uye ali uye ali igbe (430) e rọ dọse se, ọa guoghọ oni ishobọ ni Ɛshinẹgba ọ shi-a, ni a yele oni ekha-a.*

¹⁸ Ini oni ugu o migha shi ushi lọ, ọa kha ke migha nga ishobọ, Ama rọte isomhelemhi oyi Ɛshinẹgba ọ rọ shi oni ishobọ na Aburaamu. †

¹⁹ Elọ o zẹ ni a rọ ri ushi bhale? Eri a ri ushi bhale ni a rọ rọkhasẹ khi awa lamhe. Eri a rọli shi eke ramhi ẹghẹghẹ ni omiomi Aburaamu ni a riẹle ishobọ khe ọ rọ ya bhale. Ɛshinẹgba ọ ri oni ushi na igeni tiemhile na iMosisi ni ọ la iteva ọgbọ ali Ɛshinẹgba.

²⁰ Awa kha da ngme ingme omigha-na ọgbọ ne, o rọkhasẹ khi ẹgbọ aava e mema lasele shi aghọ, Ama Ɛshinẹgba lẹlighuo ọ shi oni ishobọ ona, Ɛshinẹgba ọghuo, ọ khi.

Emini ushi o migha shi

²¹ Eri ushi o ke a zu ishobọ oyi Ɛshinẹgba ode? Iiye o! Irari ini eri a ri ushi bhale ni o ri agbọ ke na ọgbọ lọ, a kha ri irarighọ pfa na ọgbọkpa ini ọ ri ushi gbe akanya.

²² Ama Ebe-no-pfuase o ngme ghọ khi ekpabọ olamhe o mhese a na agbọ nya, ni a ba bhale ya ẹ khi emini a shobọ, ni a rọ ọ na ọgbọ rọte obọ oyi iJesu iKirisiti ni a rọli na ẹgbọ ni e miesuo.

²³ Neni oni irudunga o bhale, eri ushi o mu awa ighumha, o pfi awa okpe ramhi ni irudunga o rọ bhale.

²⁴ Eri a ri ushi na awa ni o sese awa ode ramhi ni iKirisiti ọ rọ bhale, ni a rọte irudunga pfa na awa.

²⁵ Memena abi ẹghẹghẹ irudunga o rọ bhale, ushi ọa ke ẹ sese awa ode.

Imi Ɛshinẹgba

²⁶ Ɛẹ nya, imi Ɛshinẹgba a khi rọte irudunga oyi iJesu iKirisiti.

²⁷ Irari khi ẹẹ nya ni a batazi elemhi iKirisiti, a she ri iKirisiti sọ.

²⁸ Ikhioda ọa la ọ na ọgbọ iJu ali ọgbọ ijeta, wekhi ikhioda o la oghumha, ali oni ọa khi oghumha, wekhi omose ali okpotso, irari khi ẹẹ nya, ọghuo a khi shi iJesu iKirisiti ọ.

²⁹ Ini a khi onayi iKirisiti, ẹghẹghẹ aghọ imi Aburaamu a khi, a khi eni e mhọli okemhi shi oni ishobọ. ‡

4

¹ Emini mhia ngme khi, ini oni oni ugu o gọ lu ọ da kie khi ukuku omọ ne, ọa kioda shi oghumha ọ, ama lẹli ọ kie ya mhọli eni apfe nya.

² Eri ọ kiele ya la obọ oyi eni e ri eloe ẹ khu ọli, ali eni a ri eni ugu nga obọ ne, ya ramhi ẹghẹghẹ ni itali ọ shi shi eke, ni ọ rọ ya womhẹ eloe.

³ Ighọ o li khi shi awa egbe. Ighumha eyi iyemhẹ ni ẹ mhẹse na agbọ nya, e mhẹse ẹ na awa neni awa mhọli iwomhẹloe elemhi ayemhẹ.

⁴ Ama abi oni ẹghẹghẹ o rọ ramhi, Ẹshinegba ọ ghie omiọli ni ọkpotoso ọ bia, ni a bia shi ẹghẹghẹ ushi,

⁵ ni ọ rọ tsumhi ẹgbọ ni ushi o mhẹse ẹ na, ni awa tẹ eni a lu Imi Ẹshinegba.

⁶ Itobọ khi a khi imiọli, Ẹshinegba ọ rọ ghie Ayemhẹ oyi Omiọli bhale udu oyawa, Ayemhẹ ni ọ tsesẹ liẹ, "Itamhẹ, Itamhẹ."

⁷ Itobọ ona, wa a ke khi oghumha ama omiọli, abi u ke rọ khi omiọli eghọ, Ẹshinegba ọ she rẹ mie oni ishobọ.*

Omuegbe ni iPolu ọ mhọli na ẹgbọ iGalesha

⁸ Ẹghẹghẹ ni o dọse ni aa rọ kpe lese Ẹshinegba, a khi ighumha eyi emini e khi ilitisa ni ẹa khi Ẹshinegba.

⁹ Ama memena ni a ke rọ lese Ẹshinegba, ali abi Ẹshinegba ọ ke rọ lese ẹ ena, elọ o zẹ khi a nono ni a nyene egbe gbo deba iyemhẹ afue ni ẹa mhue ekpabọ? Elọ o zẹ ni a rọ ọ nono ni e gbo mu ẹ ighumha utonuzi-eva?

¹⁰ A ri eloe ẹ shi ogbẹle na ke ali iki ali ẹghẹghẹ ali ikpe.

¹¹ Ulishi ọọ mu mhẹ irari khi o li mhẹ eloe abine khi eri mhi pfuse ẹghẹghẹ-a shi ẹ egbe shi afue.

¹² Mhia lema ẹ, inyoghuo a li abi mhi li, irari khi eri mhi li abi a li. Aa li mhẹ ingmobe.

¹³ A yelege, khi elemhi umha ze mhi la ni mhi rọ tse abọ usomhi onete ye ẹ odo-ode.

¹⁴ Abi o tseku khia khi ughuamhi oyemhẹ khi eri o li abi anasemhẹ na ẹ, aa ri eloe gbe mhẹ, aa kie mhẹ. Ochogho, eri a kpe abọ mie mhẹ abine khi aḡeni Ẹshinegba mhi khi, abi a kha li mie iJesu iKirisiti.

¹⁵ Elọ o li oghẹle oyeẹ? Mhi dobe ya pfi ọtsele khi ini o zẹ ya li lọ khi a kha ga vuonyọ ikpamhi alo eye ẹ na mhẹ.

¹⁶ Mhi she mele obe ẹ-a irari khi mhi gue igesikia ye ẹ?

¹⁷ Ẹgbọ ẹ nono ni e ti ẹ ma egbe, ama ọa khia ode ni o ti o khi. Emini ẹ nono khi ni e rẹ ẹ mele epfese-a shi anye ọ, ni a khi eni e mhọli omuegbe na we.

¹⁸ O ti ni ogbọ ọ mhọli omuegbe ini o da khi eminente ọ mhọli ọli shi, ali ni ọ ke mhọli ọli ẹghẹghẹ kpa, ọa khi ini mhi da lese la aghọ tse.

¹⁹ Imimhẹ, egbe ẹ to mhẹ shi ingme oyeẹ, abi ọkpotoso ni oku ọọ to, ni a rọ bhale ya ẹ khi a me iKirisiti agbọ oyeẹ.

²⁰ Abi a khe khi mhi nu ẹ la, ni mhi mu uruli oyemhẹ pfi, irari khi egbe e pfọ mhẹ-a shi ingme oye ẹ!

Ega ali iSera

* 4:7 Li zẹ iRom 8.15-17

21 A gueye mhe ghue, ikhi e e ni a nono ni a khi eni ushi o mhesa a na, a lesa abi ushi o ngme?

22 Irari khi a keke oli khi Aburaamu, o bia eniye emose aava, oghuo o o khi omi okpotso oghumha, onokpole o khi omi ogo.[†]

23 Om o ni oghumha o bia na li, eri a bia li rote ode na tse, ama oni egbegbi okpotso o bia, a bia li rote ode ishobo.

24 Eni ingme ena nya e mholi emini e migha shi, irari khi ikpotso aava ena, ilama na egbe eva e khi. Ilama-negbe oghuo o khi ona ukhomhi ute iSinai, o bia eniye ni e ya khili ighumha. Loli khi Ega.

25 Mena, Ega o migha shi ute iSinai na eke Arebia ni o khili oli iJerusalemu, irari khi eri o nu imioli khili ighumha.

26 Ama iny o awa o khi oli iJerusalemu ni o la odane, omi ogo o khi.

27 Irari khi a keke oli, e li:
 "Ke ghele, yeye aga
 ni o a bia eniye,
 ri oghela tses leghe,
 yeye ni oku o a to ghue,
 irari khi okpotso ni a kie,
 o mholi eniye ni e bu
 dose okpotso ni o mholi
 odo."[‡]

28 Memena, iny oghuo-mhe, eniye ishobo a li khi ezeze abi Aziki o li khi om o ishobo.

29 Abi o kpe li oni egheghe, ni om o ni a bia elemhi idiege, o o li mu okholi

vule shi om o ni a ri ekpabo Ayemhe oyi Eshinegba bia o, igho o kie li memena. §

30 Ama se Ebe-no-pfuase o ngme? Oo, "Khu okpotso oghumha ali omioli vu, irari khi omi okpotso oghumha o a tigbe ya nu omi egbegbi okpotso kemhi ugu."^{*}

31 Irarigho, iny oghuo, awa aa khi eniye eyi okpotso oghumha ama eniye eyi okpotso ni o khi omi ogo.

5

Irueole ni o la ob oyi iKirisiti

1 IKirisiti o she rue awa o le. Irarigho, a migha gbaa shi oni irueole, a khi ke gbo ze ni a gbo ya nyene ri egbe e khi ighumha oyi ushi.

2 A ghe i! Mhemhe iPolu, mhi gue e ye e khi, akanya ni iKirisiti o gbe o a ke ya mholi elele okhoghuo na e, ini a ya shele-a.

3 Mhi gbo gue e ye ogo ni o da ze ni a shele oli-a ne, o mema ya ri ushi nya gbe akanya.

4 E e ni a dua ni a khi eni a pfa na rote iri-ushi gbe akanya, aa ke mholi ob o shi ikanya ni iKirisiti o gbe, a she de okhale oyoli-a.

5 Ama rote irudunga awa te lolo migha a khe ipfuase ni awa ri udu nga rote elemhi Ayemhe-no-pfuase.

6 Irari khi elemhi iJesu iKirisiti, oshela ali umha shele-a e a mhue eleli. Emini o

[†] 4:22 Li ze Igbae 16.15; 21.2 [‡] 4:27 Li ze Aza 54.1 § 4:29 Li ze Igbae 21.9

* 4:30 Li ze Igbae 21.10

mema mu egbe khi irudunga ni o mhōli inono.

⁷ A kpẹ guẹ ẹ kia. Oghuo ọ mu alo nyenẹ ni aa ke rọ ọ deba igesikia?

⁸ Oni ọ lina mu ẹ alo nyenẹ, ọa rọte obọ oyi iKirisiti ọni ọ lu ẹ bhale.

⁹ “Ogbọ ọbe ọtuoghuo ọ dobe ya yese egbo eni e bu-a. Eri ọ li abi umiesobọ oghuo, ni o ri oili ẹ gbolo enekpọle-a.”*

¹⁰ Ama mhi regbenga ẹ khi eyi Onomhue a khi. Onana o rẹ mhẹ lẹsẹ gboo khi emini mhi gueye ẹ a ya riẹlẹ, khi aa ya riẹlẹ emini ogboese ọ gueye ẹ. Ogbọ ni ọọ nase ẹ, ọ ya ri ukhomhi kpẹ ọ, ọnini ọ riẹ khi.

¹¹ Inyoghuo, ini ishele-a mhi kiele rọ tse abọ lọ, abi egbo eghuo ẹẹ ngme, elọ a mu okhōli vule shi mhẹ ọ kẹ shi? Ini o khi ighọ lọ, ungmehi apfida ọa kha ke ri elemhi ke bi.

¹² Egbo ni e na ri ingme oshelẹ a nase ẹ ena, mhi kha ga liẹ e bie wali egbewe-a.

Agbo na elemhi Ayemhe

¹³ Eẹ oyẹẹ, inyoghuo-mhẹ, eri a lu ẹ ni a la elemhi ẹpfua. Ama a khi zẹ ni a ri oni ẹpfua ona ke riẹlẹ emini idiegbe olamhẹ oyẹ ọọ nono. Ochoghọ a ri inono ke ga egbe ẹ.

¹⁴ Irari khi emini a rọ zẹ ushi nya ukhomhi khi, “Nono ọnuzava oyẹ abi u li nono egbie.”†

¹⁵ Ini a mu okhōli vule ẹ shi egbe ẹ ọ, ni a rọ ọ khu egbe

ẹ, a mhue egbhe ini a khi a ya pfuse egbe ẹ-a.

¹⁶ Emini mhia ngme khi, a ke kia okiali elemhi Ayemhe, eghẹghẹ aghọ aa ya riẹlẹ oghuemhe oyi idiegbe olamhẹ.

¹⁷ Irari khi idiegbe, ọbe Ayemhe o khi, ali khi emini Ayemhe ọ nono, eri ẹ zu oghuemhe idiegbe olamhẹ ode. Wewe ava-ava ọbe e khi shi egbe ọ, loli o zẹ khi u waa dobe a riẹlẹ emini u wa nono ni u riẹlẹ.‡

¹⁸ Ama ini Ayemhe ọ rẹ ẹ kia, waa tigbe ya riẹlẹ oghumha oyi ushi.

¹⁹ Emini ikanya idiegbe olamhẹ ẹẹ gbe na; Itsebo, ikanya ichimhi na itsebo ali angeli efiala,

²⁰ ikhumhi igaga, ali ogbho ipfifi, ibiselemhi, umha lama a na egbe, ofuma ikpekpe, ofu imhōli, ikanya ukphe, elemhi ibibi, ikemhi egbe,

²¹ Idegbe-okonyo, idonyo dose, iye-ukue ni a la li itsebo, ali emhi elese eghoghọ. Mhi tse agua ye ẹ, abi mhi kpẹ li tse ọli ye ẹ, khi egbo ni e da a ngeli angeli eghoghọ ne khi ẹa ya mhōli okemhi shi Eghiele oyi Eshinegba.

²² Emini Ayemhe ọ rọ ọ lasele khi; Inono, oghẹlẹ, opfomhe, irabomudu, isomhelemhi, onete, izẹ-ri-egbeda,

²³ Ipfomhe, igue-regbekia. Ushi ọa ya mu ogbo shi ọ ini ọ riẹlẹ enana nya.

* 5:9 Li zẹ i 1Kori 5.6 † 5:14 Li zẹ iLev 19.18 ‡ 5:17 Li zẹ iRom 7.15-23

²⁴Eni e khi eyi iJesu iKirisiti e she rōte idiegbe olamhẹ oyewẹ ali oghuẹmhẹ eyewẹ nya ma apfida.

²⁵Aborokhia khi Ayẹmhẹ o ri awa a kia egho, awa ke deba ete-awẹ eyoli.

²⁶Awa khi ke mu egbawa ẹloe doşẹ ode, yeşẹ elemhi ke bi egbe, ni o ri awa a ke kpe ofuma deba egbe.

6

A ke riẹle onete na egbo nya

¹Inyoghuo-mhẹ, a kha bhale ya ẹ khi a mu ogbokhoghuo shi olamhẹ, ẹẹ ni a la elemhi ayẹmhẹ, a kuegbe-a sheshe o shi ode fiẹ. Ama a ke to egbe ẹ okpe, ini a khi li de pfilo imufe.

²A kpaghiẹ egbe ẹ itsua, ini a li igho, a ya riẹle oghuẹmhẹ oyi iKirisiti.

³Ini ogbo o dabi khi lolu mu ẹloe, ni a ro bhale ya ẹ khi o a khi emhikhoghuo, egboli o o di.

⁴Ogbogbo o ke mu angeli eyoli fe ni o bino ini e ti. Oni eghẹghẹ, o tigbe me asha a titi egboli. O khi ri egboli khokho ogboşese.

⁵Ogbogbo o tsua itsua eyoli.

⁶A ke ri eminete nya somhi ogbo ni o o şese ẹ emini Eşhinegba o ngme.

⁷Khi di egbe ẹ. Ogbokhoghuo o a dobe ya ghagha Eşhinegba. Emini ogbo o ro ko, lolu o ya khişese.

⁸Ini ogbo o deba oghuẹmhẹ oyi idiegbe olamhẹ oyoli ro ko o khişese epfua. Oni o ro ko

ro ri egbe mu Ayẹmhẹ, o ya khişese agbo na agboagbo.

⁹A khi ze ni onete iriele o khuese awa, irari khi o kha ramhi oni eghẹghẹ, awa ya khişese, ini o a da loşe awa.

¹⁰Irarigho, abi awa da mholi oni eghẹghẹ kpa, awa ke riẹle onete deba ogbokpa, tee-tee, ena omhue-apfe irudunga.

Itse-agua ni o kpukhokho

¹¹A bino ikpamhi alo ebe eniemhi ni mhi ri obo oyẹmhẹ keke ghi ẹ.

¹²Egbo ni ẹẹ riẹle abamẹmhẹ, ẹ dua ni e ri itoto ti ẹ shi ishẹle-a, emini o ze ni e ro o li igho khi, ẹa nono ni a mu okholi vule shi we o shi oseşe oyi apfida oyi iKirisiti.

¹³Egbegbi eni e shele-a, ẹa ri ushi ẹ gbe akanya, ama ẹ nono ni a shele ẹ-a, ni e ba me asha ke neta omose khi e re ẹ she shele-a.

¹⁴Ama mhi aa tigbe ri emhikhoghuo ya neta omose, ini o a li khi ingme oyi apfida oyi iJesu iKirisiti Onomhue oyawa. Itobo oni apfida ona, mhi ro ghu pfa oghuẹmhẹ agbo, oghuẹmhẹ agbo o ghu pfa agbo oyẹmhẹ.

¹⁵Ishẹle-a ali umha shele-a o a mholi abi o ngme, emini o mu egbe khi, ni a ro riẹle ogbo bia elemhi iKirisiti.

¹⁶Opfomhẹ ali ilelemhi e ka nu eni e deba oseşe onana la elemhi agbo oyewẹ, li shi egbo iZireni eyi Eşhinegba.

¹⁷Ozukhomhi emhikpa khi, ogbokhoghuo o khi ke nase mhẹ, irari khi mhi mholi

ẹmẹli oyi iJesu shi egbe
oyẹmhe.

¹⁸Inyọghuo-mhe, okhale oyi
iJesu iKirisiti Ọnọmhue ọyawa,
ọ ka nu ayẹmhe oye ẹ nya la.
Atse.

Ebe ni iPoļu o keķe ghi eġbo Efisha Eni e miesuo

IPoļu o tse eni e mie iJesu suo ne la Efesoși

¹ Mhemhē iPoļu, aghi-u-somhi na keķ eyi iJesu iKirisiti ni Eshineġba o zē mhi khi.*

Eġbo eyi Eshineġba ni e la eķe Efesoși, eni e regbenga iJesu iKirisiti mhi keķe ebe ona a ghi.

² Mhi lema Eshineġba ita awa ali iJesu iKirisiti Onomhūe, e ka mhue isomhelemhi na e, e gbo ri ofomhē na e.

Eshineġba o she te obō oyi iKirisiti rieļe eminete na awa

³ Awa kuēghie Eshineġba. Loļi o khi Eshineġba ali ita iJesu iKirisiti Onomhūe oyi awa. Loļi o ri ikhivose ni o te iloghie bhale na awa, ikhivose oni o kpaghie ayemhē oyi awa obō. Ikugbe ni o ku awa ali iKirisiti gbe o ro rieļe ona.

⁴ Neni Eshineġba o ma agbo, o she kpe zē awa eni e khi eġbo eyoļi, rote obō oyi iJesu iKirisiti, ini awa khi eni e pfuase ni ea mhue umhaguekia shi odalo oyi Eshineġba. Itobō khi o o nono ingme oy-awa o ro ligho rieļe oļi.

⁵ Neni Eshineġba o ma agbo, o she te eķe gba li khi loļi ya ri

awa mele imi oļi-a, itobō emini iJesu iKirisiti o rieļe, ni o de shi o abi o ghoļe Eshineġba.

⁶ Eri o lina rieļe oļi ini awa kuēghie oļi shi okhale oniemhi ni o mhue na awa, itobō emini omi oļi oțuoghuo kpe ni o nono ingme oyōļi, o rieļe.

⁷ Obō oyi iKirisiti awa te mhōļi ipfasheķe, itobō oļia eyoļi ni o ku shi eķe abi o ro ghu-a na awa. Ona a te ri olamhē topfa awa. Itobō epfue oyi okhale oyi Eshineġba ni o gbeku o, o ro rieļe ona.†

⁸ Oni okhale ona o tutu ku awa, rote ilešingme ali eġbhē o te rieļe oļi.

⁹ Eshineġba O khueghie os-heli emini o gba shi eķe-a khaše awa, ikhi emini o rote obō oyi iJesu iKirisiti ro tse, abi o ghoļe oļi.

¹⁰ Emini Eshineġba o gba khi loļi ya pfuse rieļe khi, ini o ramhi oni eġheġhe te, o ya ku emhi na agbo ali ena iloghie gbe khi oghuo, o ya ri iKirisiti le oghie wewe nya.

¹¹ Itobō khi Eshineġba o ku anye ali iKirisiti gbe, anye she mie ugu obō oyi Eshineġba. Irari khi o she kpe te eķe gba li khi loļi ligho ya rieļe oļi, o ro ligho rieļe oļi. O ri emhikpa tse shi abi o ghoļe oļi shi.

¹² Ishegho ni anye iJu ni e khi eġbo eni odode ni e kpe regbenga iKirisiti, e kuēghie Eshineġba shi ufumhi oyōļi.

¹³ Eri a li ku e ma iKirisiti abi a ro suo oni ungemmhi iġesikia, oni o khi usomhi onete oyi Eshineġba, abi o mie

* 1:1 Li zē Ika 18.19-21; 19.1 † 1:7 Li zē iKolo 1.14

ẹ pfuese. Abi a rọ mie iKirisiti suọ, Ẹshinẹgba ọ rọ shi ọlẹle shi ẹ egbe. Ayemhẹ-no-pfuase ni Ọ kie kpẹ rọ nga na awa o khi oni ọlẹle.

14 Itobọ Ayemhẹ-no-pfuase ni Ẹshinẹgba ọ kpẹ rọ na awa, awa rọ mhọli ọ shi udu khi Ẹshinẹgba ọ ya ri emini ọ rọ nga na ẹgbọ eyọli gbo na awa. Ẹghẹghẹ ni Ẹshinẹgba ọ rọ pfa awa ẹgbọ eyọli shi ekẹ nya, awa rọ mhọli eni emhi ena. Ona o ya ri ẹgbọ eyọli kuẹghię oli shi ufumhi oyọli.

IPọlu ọ lema na eni e mie iJesu suọ ni e la Efesoṣi

15 Itobọ emhi ena nya ni Ẹshinẹgba ọ riẹle, ali abi mhi te suọ abi a mie iJesu iKirisiti Ọnọmhue suọ ni a gbo mhọli inono shi ẹgbọ eyi Ẹshinẹgba nya ọ,

16 mhia tigbe yemhẹ ikphẹmhi-a, ni mhi ri itobọ oye ẹ kphẹmhi na Ẹshinẹgba, ini mhi da lema na ẹ.

17 Eri mhia lema Ẹshinẹgba oyi iJesu iKirisiti Ọnọmhue ọyawa, ọni ọ khi ita awa ni ọ mhọli ufumhi oniẹmhi, ọ rẹ ẹ mhọli ayemhẹ ilẹsingme. Ọ gbo ri egbe ọli khasẹ ẹ ni a lolọ lẹsẹ ọli egbegbo.

18 Mhi gbo lema Ẹshinẹgba ọ khueghie ẹ udu-a ini a lẹsẹ oni igesikia oyọli, ini a gbo lẹsẹ irudushi ni a regbenga, ni Ẹshinẹgba ọ lu ẹ shi. Ni a gbo mẹ ẹpfue oyi ugu oniẹmhi oyọli ni eni e mie ọli suọ e mhọli.

19 Mhi gbo lema li ọ zẹ ni a lẹsẹ ekpabọ ni e funẹ eyọli, ni

ẹa mhue irokhokho, ni a rọ na awa eni e miesuọ.

20 Eni ekpabọ ena ọ rọ gbe akanya abi ọ rọ guise iKirisiti eghuli le abi ọ rọ ghua. Wewẹ ọ rọ ri iKirisiti shito obọ ita oyọli obini iloghie.‡

21 Oobọ iJesu iKirisiti ọ la mhẹsẹ na ekpabọ, ali itoto ali igeni, ghe enete ghe eni ẹa ti, ghe eni a mẹ agbọ ona ne, ghe ena agbọ ni aa mẹ ne.

22 Emhi nya Ẹshinẹgba ọ rọ shi ufuege oyọli ni ọ mhẹsẹ shi. Lọli ọ zẹ iJesu ọzukhomhi emhi nya ni o pfohmẹ igbaa oyi eni e mie iJesu iKirisiti suọ eyọli egbe.

23 Ẹgbọ ni e mie iJesu suọ e khi idiegbe oyi iJesu, iJesu ọ khi ukhomhi. Ekpabọ ali agbọ oyi iJesu iKirisiti o vose agbọ eyi eni e mie ọli suọ. Ufumhi oyọli o gasẹ agbọ ali emhikpa odekhode nya.§

2

Okhale oyi Ẹshinẹgba ọ rọ mie awa pfuese

1 Ẹghẹghẹ ni o doṣe ni a rọ kpẹ la agbọ olamhẹ, a la agbọ umha-suoseso, a khi ẹgbọ eni e ghu shi olamhẹ ni ẹa mhọli Ayemhẹ oyi Ẹshinẹgba.

2 Ẹghẹghẹ agho ingeli agbọ a ngeli, a ri ungmẹmhi oyi ọkphaghie ọni ọ khi oghie ayemhẹ alo ebili i gbe akanya. Oni ayemhẹ ona o kiele la agbọ oyi ẹgbọ ni ẹa ya suọ eso na Ẹshinẹgba a gbe akanya.

3 Igho awa nya awa kpẹ li ngeli. Awa ri ọghuemhẹ egbe, ali usamhi ebe ni udu oyi awa

‡ 1:20 Li zẹ Iwolo 110.1 § 1:23 Li zẹ Iwolo 8.6; iKolo 1.18

o gueye awa a rięę emhikpa. Abi eęboęse na agbo ni ęa ya suo esọ na Eshinęba e li ya pfua, awa kha li pfua.

4 Ama Eshinęba ọ nono ingme oyi awa gba, igho ilelemhi oyoli ọo gbędi.

5 Lọli o zę ni ọ rọ rọte obo oyi iJesu iKirisiti ni ọ guise le ri agbo ayemhe onogbo na awa, aboriekhia khi eni umha-guekia o kesę-a awa khi. Okhale oyi Eshinęba a rọ mie ę pfuese.*

6 Eri ọ ri agbo onogbo oyi iKirisiti na awa, ọ ri awa nu iKirisiti shito obini iloghie, nu ọ li ę mhęę, itobo emini iKirisiti ọ rięę na awa.

7 Rọte iJesu iKirisiti Eshinęba ọ te ri okhale ni ọ mhọli na awa khase, ogbenako ni eębo e me ashini okhale oyoli o fu ramhi, ni ọa mhọli irokhokho.

8 Okhale oyi Eshinęba a rọ mie ę pfuese abi u rọ miesuo, ọa khi ingeli enete ni u ngeli e mie ę pfuese. Afue-afue ọ mie ę pfuese.

9 Eshinęba ọa ri itobo ingeli enete ni u ngeli mie ę pfuese, ini oębokhoghuo ọ khi vuse ike.

10 Eshinęba ọ ma awa. Ikanya enete ọ ma awa awa ke gbe abi awa ali iJesu iKirisiti awa rọ da ke khi oghuo egho.

Eshinęba ọ she te iKirisiti ku eębo iju ali eębo ięeta gbe

11 A yelege eębo enabi a khi ęleę, khi aa khi iju. Eębo iju

e ma kpe ri ukpele gbe ę, itobo khi aa sheę a, ali itobo khi aa khi eębo iju. Ama ee lu egbe we eni e khi eębegbi eębo, itobo khi a sheę we-a. Osheę ni o khi akanya ni eębo e ri abo gbe idiegebe.

12 Yelege khi eęheęe agho khi aa kpe ku ma iJesu iKirisiti ọ, a khi opfese shi ishiobo ni Eshinęba ọ rọ nga na eębo iZireni. A khi eni ęa mhọli iregbenga ni ęa mhọli Eshinęba shi elemhi agbo.

13 Ama, memena, ęę ni a kpe nuata shi Eshinęba ọ, ọ ri ọlia eyi iKirisiti ti ę mama egbe.

14 IJesu iKirisiti ọ ri eębo ięeta ali eębo iju rięę. Ọ rue ugbe ibiselemhi ni o kpe la we iteva ode-a, ọ rewe mele eębo eghuo-a.

15 Eghuli ni ọ ghu ọ rọ shishi ishi ni e la we iteva-a, Ini ọ me asha ri eębo iju ali eębo ięeta khi eębo enegbo eghuo. Ona ọ rọ rewe rięę ini e khi ke biselemhi egbe.†

16 Eghuli ni ọ ghu-a shi ọora apfida ọ rọ ku eębo ena gbe, ọ gbo rewe ali Eshinęba rięę. Agho ibiselemhi egbewe o pfo shi.‡

17 Usomhi onete oyi Eshinęba oyi opfomhe, iJesu ọ bhale ya tse abo gueye eębo ięeta ni e nuata shi Eshinęba ọ, ali eębo iju ni e timama Eshinęba.§

18 Obo oyi iJesu iKirisiti awa te mhọli Ayemhe oghuo ni o zę khi awa ga rọ dobe a

* 2:5 Li zę iKolo 2.13 † 2:15 Li zę iKolo 2.14 ‡ 2:16 Li zę iKolo 1.20 § 2:17 Li zę Aza 57.19

lẹ deba Eshinegba.

¹⁹ Itobọ ighọ ẹẹ ẹgbọ iJeta, aa ke khi epfese, ama a she ku ma ẹgbọ eyi Eshinegba. Ena omhue-apfe oghuo a ke ga khi.

²⁰ Oni idiegbe owa a li khi. Ighiusomhi na ke ni iKirisiti o ze ali emekeguele eyi Eshinegba e khi igbaekele oyi oni owa. Ijesu iKirisiti o mu oni owa mhue.

²¹ IKirisiti o ze ni echẹ ni a ro ma oni owa nya e ro toma, ni oni owa o ro mele owa oniemi a. O ro li khi oni o pfuase na Onomhue.

²² Itobọ khi a ku ma ijesu o, o ro re e ma eni e mie o li suo. U ya mele owa ni Ayemhe oyi Eshinegba o ya ke la-a.

3

Eshinegba o ghi iPolu ghi ẹgbọ iJeta

¹ Itobọ ona, mhemhe iPolu mhi ro lema na e. Mhemhe ni a ri itobọ khi mhia gbe akanya na ijesu iKirisiti mu shi owa ighumha. Akanya abi mhi li e tse abo usomhi onete oyi Eshinegba ye e ẹgbọ iJeta.

² O limhe eloe khi ẹẹ ẹgbọ iJeta, khi a she kpe suo khi Eshinegba o ghie mhe ghi e mhi bhale ya tse abo ye e. Itobọ okhale oyoli o ro ghie mhe usomhi ona, ni mhi kpaghie e obo.

³ Oni usomhi khi, ugbamhi ni Eshinegba o gba ni o khi oyi osheli, ni o khueghie-a khashe mhe. Mhi kpe khueghie ukuku o li-a khashe e elemhi ebe ni mhi kpe keke ghi e.

⁴ Ini a ze ebe onana, a ya me emini mhi lese osheli oniemi ni o khi osheli na ijesu iKirisiti, ni Eshinegba o gba.

⁵ Eshinegba o kpe khueghie osheli emini o ya riele ni o gba shi eke khashe ẹgbọ na agbo ena elele. Ama o she rote elemhi Ayemhe-no-pfuase khueghie o li-a khashe ighiusomhi na ke ali emekeguele eyi Eshinegba.

⁶ Emini Eshinegba o gba khi, a ya rote itsabo usomhi onete oyi ijesu iKirisiti ri ẹgbọ iJeta ni e miesuo nu ẹgbọ iZireni ni e miesuo le ugu oghuo, abi ẹgbọ ni e khi idiegbe oghuo. Eghẹghẹ agho ni a bhale ya e khi ẹẹ ni aa khi ẹgbọ iJu, a nu ẹgbọ iJu mhue obo shi emini Eshinegba o rote ijesu iKirisiti ro nga na iJu.*

⁷ Eshinegba o ri akanya ni mhi ro o tse abo usomhi onete oyoli na mhe. Itobọ okhale oyoli o ro ri oni akanya na mhe. O ri ekpabo eyoli re mhe e gbe oni akanya.

⁸ Ini Eshinegba o pfi ukpeloe bino uwali ogbọ ni mhi kpe khi elele lo, o kha ze mhe, mhi ke tse abo usomhi onete oyoli. Ama itobọ okhale oyoli o ro ri akanya ona na mhe mhi ka tse abo usomhi onete oyi upfuemhi ni o la iKirisiti ye e ẹgbọ iJeta. Upfuemhi ni ogbọ o dobe lese udi o li e pfo.

⁹ O gbo ze mhe mhi ka khueghie-a khashe agbo kpa abi o li ri oni osheli ni o

* 3:6 Li ze iKolo 1.26-27

gba nya ya tşę. Eşhineęba ni o ma emhi nya o kpę rọ te igbaekele ri osheli ona sheli agbọ nya.

¹⁰ Eri Eşhineęba oọ nono ni lọli rọte igbaa oyi eni e mie iJesu iKirisiti suọ ri ileşingme ode ebubu eyelue khase igeni ali ekpabọ na idane.

¹¹ Ina Eşhineęba o te eke gba li neni o ma agbọ. Rọ te iJesu iKirisiti Onomhuę oyi awa o te rọli tşę.

¹² Itobọ khi awa mie iJesu suọ, ali khi awa gbo ku gbe ọli o, awa rọ a mhuę igbedu rọ a lo deba Eşhineęba.

¹³ Itobọ ighọ, a khi zę ni egbe pfo e-a ini a suọ abi mhi lie me osue shi itobọ khi mhia tse abọ usomhi onete oyi Eşhineęba ye e. Ochoghọ, a zę ni osue ni mhia me o ri ufumhi oyi Eşhineęba ghi e.

¹⁴ Lọli o zę ni mhi rọ wugha odalo oyi Eşhineęba ni o khi ita awa a sọ iromhi na e.

¹⁵ Rọ te ayi ọli unuękpę nya ni e la agbọ ali iloghie e te le eva.

¹⁶ Eşhineęba o mhọli ikhivose eniemhi ni o rọ o na eębo eyọli, itobọ ighọ mhi rọ lema li, o ri Ayemhe oyọli ri udu oye e toto a,

¹⁷ ini iKirisiti o lo e udu shitọ kpę abi a mie ọli suọ. Mhi gbo lema Eşhineęba o re e migha abi oora ni o pfi imhili lo eke egbegbo, ni a nono ingme oyi Eşhineęba ali ingme egbe e, ini a khi de.

¹⁸ Mhi gbo lema Eşhineęba o zę ni eę ali eębo eyi Eşhineęba

nya a dobe leşe abi inono oyi Eşhineęba o gba ramhi.

¹⁹ Eşhineęba o zę ni a leşe inono ni iKirisiti o nono awa, inono ni o ghọ fu doşe ode ni ọa mhọli ukpeşe, eęheęhe aghọ ni ingeli eyi eę, e li abi eyi Eşhineęba.

²⁰ A kphemhi na Eşhineęba ni o mhọli ekpabọ rọ rięle emhi eniemhi, eni e fu doşe emini awa mhila li, ali emini awa da dobe sa. Ekpabọ eyọli eni e la awa ayemhe e gbe akanya, o deba a rięle eni emhi na awa.

²¹ A zę ni awa eębo eyọli ni awa ali iJesu iKirisiti e khi oghuo, e kuęhie Eşhineęba, ogbe na akọ ali agbọagbọ, ya ramhi ukpeşe. Atşę.

4

Ikugbe onayi eni e miesuo

¹ Mhemhe ni mhi ri itobọ khi mhia ga Onomhuę la owa ighumha, mhi lema e, a ke ngeli ingeli enete, enabi Eşhineęba o o a ke ngeli eęheęhe ni o rọ lu e.

² Emini a rięle nya, a ke ti egbe e tiemhi eke, a ri ofie ali ikuegbe-a nu egbe ke ngeli. A ri inono ni a nono egbe ri ipfomhe-udu ke ngeli.*

³ A roşeka mu ikugbe ni Ayemhe-no-pfuase o ku awa gbe mhuę ali elemhi opfomhe ni o geņo awa kugbe.

⁴ Idiegbe oghuo awa khi, Ayemhe-no-pfuase oghuo o la awa egbe, Ighọ awa gbo li ri elo shi eke e khe iregbengba oghuo oyi imiepfuese

* 4:2 Li zę iKolo 3.12-13

ni Eshinegba o ro nga na awa abi o ro lu awa.

⁵ Onomhue oghuo ni o khi iKirisiti, ali irudunga oghuo, ali ibatizi oghuo, awa mholi.

⁶ Eshinegba ni o khi itawa nya, awa a ga, loli o mhese a na awa nya, loli o ri awa a gbe akanya oyoli, loli o gbo la agbo oyawa nya.

⁷ Ama iKirisiti o kemhi afu ododa ke a na ogbogbo ni o ro ke gbe akanya oyoli. Lolighuo o mhese abi o li kemhi we.

⁸ Ona o ze ni ungmehi oyi Eshinegba o ro o. "Abi o ro kholi ebe oli pfuse-a nya, o nga obini o yagha ne nya, o ri ebe oli ni o mu o le la orolo, ee deba li ukhu-khokho abi eni a mu okholi. O tigbe kemhi isomhopfa enete na egbo."†

⁹ Emini a ri ungmehi oyi Eshinegba ona ngme, ni oo, "O nga obini o yagha," loli khi, eri iKirisiti o kpe tiemhie agbo ona, neni o nga idane obini o yagha.

¹⁰ Ijesu iKirisiti oni o tiemhie agbo ona, o gbo nga obini idane iloghie ni o yagha ne nya, ini o ze emhikpa ukhomhi ni e gue ga ti.

¹¹ IKirisiti o kemhi afu na ke na ogbogbo. O ze eghuo ighiusomhi na ke eyoli, o ze eghuo emekeguele eyi Eshinegba, O ze eghuo eni e kia tse abo ungmehi oyi Eshinegba, o ze eghuo eni eri ukpeloe e khu egbo eyi Eshinegba ali eni e sese we.

¹² Eri o lina kemhi afu na we ni e rewe ke gbe ikanya

eyoli, ini eni e khi idiegbe oyoli e ke fu sho, ishegho ni idiegbe oyi iKirisiti o totoa el-emhi ugamhi oyoli.

¹³ Ina a li ya ke me oli, ramhi egheghe ni awa nya awa ro kugbe e khi oghuo (abi awa mie Eshinegba suo, ni awa gbo lese omi oli), ya ramhi ni awa ro fu shi imiesuo mele eni e womhelo shi imiesuo, ramhi ni awa ro ya womhelo nya abi iKirisiti.

¹⁴ Egheghe agho awa aa ke ea li abi eniye, ini egbo eni e di egbo e khi dobe di awa ya mie emini ea khi egbegbingme suo. Awa aa ke ya li abi oko-oké oniemi ni akpekpeli oniemi o tsua gasé ukhomhi oké oniemi,

¹⁵ ni awa ri ochogho ke ngme igesikia elemhi inono, ni awa womhelo shi emhikpa, ni awa li abi iKirisiti Onomhue, oni o li abi ukhomhi, awa li abi idiegbe oyoli.

¹⁶ IKirisiti o ku egbo eyoli nya gbe abi idiegbe ogho o tono elamhi manoh khi oghuo, ni uguabo ogbogbo o lie gbe akanya oyoli. Egheghe agho oni idiegbe nya o fu, o totoa, o womhelo shi o, egbo e mholi inono na egbe.‡

Awa mu ingeli eyi awa pf

¹⁷ Itobo ona, mhi lo ye e ude, itobo eva oyi Onomhue, a khi gbo ngeli abi egbo ni ea lese Eshinegba, ni usamhi ni ee sa o mu ame.

¹⁸ Egbo eghogho ea ya dobe lese udi emhi eyi Eshinegba

† 4:8 Li ze Iwolo 68.18 ‡ 4:16 Li ze iKolo 2.19

gboo. Ɛa mhuę obọ shi agbọ onogbọ oyi Ɛshineęba, itobọ umha leşę Ɛshineęba oyewę, igbe udu oyewę o tsua ghi wę.

¹⁹ Egbe ęa ke lili wę ini ę rięle ingme ebe. E she ri egbe wę na ikanya ebe eni ę ghọle wę dę. Ingeli khi ingeli eyi itşębọ ęę ngeli. Ingeli eghogho ę ghọle wę ęghęghę kpa e ke ngeli.

²⁰ Ama, ọa khi ina a şeşę ę a li ke ngeli abi a rọ leşę mie iKirisiti suọ.

²¹ Mhi leşę khi a she suọ ingme oyọli, a gbo şeşę ę igęsikia ni o la ingme oyọli.

²² Emimi a şeşę ę khi, a khi ke ngeli eni ingeli ni a kpę ngeli, ni oghuęmhę egbe ni ęa ti egho e rę ę ngeli, ni e yese ę agbọ-a.Ş

²³ A zę ni Ɛshineęba ọ mu isamhi ali ingeli eyi ę pfi ya khi enegbo.

²⁴ Ɛshineęba ọ she ri ingeli enegbọ enabi eyọli na ę. Itobọ igho a ke ngeli abi Ɛshineęba, elemhi ingeli enete ali ipfuase.*

²⁵ Irarigho, a khi ke gbo lo ęgbhọli, ama a ke gue igęsikia ye egbe, itobọ khi eri awa li abi iguabọ ododa eyi idiegbe oghuo.†

²⁶ Ini u mę elemhi ibibi, khi lamhę, khi zę obili o bi ya ę elemhi-ibibi oyę shi ę elemhi,‡

²⁷ Khi ri ęghęghę na ọkphaghię ni ọ mu ę fę.

²⁸ Oni ọ kpę ę do ughiatọ ọ khi ke gbo do, ama ọ ri abo

eyọli ke gbe akanya ni ọ te mę ę ke le, ni ọ gbo te mę ę ke kemhi na eni ęa mhọli.

²⁹ A khi ke ngme ingmemhi ichimhi unu, ama a ke ngme ungmemhi onete ni e ri egbe ę mu oębọ ni e ri oębọ ę fu shi imiesuọ. Zobę ni ungmemhi oyi ę o guę ke de shi ęghęghę ni a kha rọ ngme ọli, ni o mhọli ikpaghiobọ na eni e suọ li.

³⁰ A khi ri egbe pfọ Ayemhę-nọ-pfuasę oyi Ɛshineęba-a. Itobọ khi Ayemhę-nọ-pfuasę khi ọlele ni Ɛshineęba ọ shi shi ę egbe, ni o rę leşę ọli shi udu gboo khi oębele ọọ bhale ni ọ ya pfa ę olamhę eye ę shi eķę.

³¹ Zobę ni, iyese-a, ofu, elemhi ibibi, okhọli, ali iyese egbe eva, ghe imuegbe ọbe kpa, ali ikanya ebe nya, e lase ę udu le.

³² A ke mhọli ilęlemhi na egbe ę. A rọ ke topfa egbe abi Ɛshineęba ọ ri itobọ iKirisiti rọ topfa ę.Ş

5

Angeli oyi ọni ọ miesuọ

¹ Irarigho, a roşęka ke khonya Ɛshineęba abi a rọ da khi imi ọli ni ọ nono egbegbọ egho.

² A la agbọ inono, ęzęzę abi iKirisiti ọ nono awa ni ọ rọ ghu-a na awa abi iluasobo ni ę kphela ni e ghọle Ɛshineęba.*

³ Abi a rọ khi ęgbọ eni e pfuasę egho, a khi rięle emini ọa gbe akanya nabi itşębọ,

Ş 4:22 Li zę iKolo 3.9 * 4:24 Li zę Igbae 1.26; iKolo 3.10 † 4:25 Li zę iZaka 8.16

‡ 4:26 Li zę iWolo 4.4 Ş 4:32 Li zę iKolo 3.13 * 5:2 Li zę Okiali 29.18; iWolo 40.6

ukelię emini oọ pfi omama. A khi khi ena-emhi-ituegbe. Emhi enana ęa khi emini a suo khi a mę iteva oye ę ęgbọ eyi Eshinegba ni e khi eni e pfuase.

4 A khi gbo ngme ingmemhi omama ali ungmehi oyegehe unu, we khi eri a gbudu li iwęghie ali iba izeze ni e we-a. Ochoghọ, a ke kuęghie Eshinegba.

5 A lese khi, ghe ęgbọ ena itsebo, ali ona ingeli omama, ali ona emhi ituegbe, khi ęa ya mhọli okemhi shi iloghie oyi iKirisiti ali oyi Eshinegba. Eri ona emhi-ituegbe o li abi oni oọ ga ikhumhi.

6 A khi ze ni ogbokhoghuo o ri ingmemhi afue di e, itobọ khi ęgbọ eni e ngeli ingeli olamhe eghoghọ, Eshinegba o ya na we ali ęgbọ ni ęa ya suo esọ na li osue.

7 Irarighọ, khi ku ma ęgbọ eni e ngeli ingeli olamhe eghoghọ o.

8 Elele a kpe la alo ebili, ama memena elemhi akpa a ke la, itobọ khi, a ku ma Onomhue o. Irarighọ, a ke ngeli abi eni e la elemhi akpa.

9 Itobọ khi onete ali ipfuase, ghe igesikia e khi umomhi ni akpa o ro lasele.

10 Roshęka ni u wena emini e ti Onomhue eloe, ni u ke riele we.

11 Khi ke nu ęgbọ na alo ebili gbe ikanya afue na alo ebili, ni ęa mhue eleli. Ri ochoghọ ke khueghie osheli oye-we-a.

12 Emhi omama oọ khi, ini a ta unu emini ęgbọ ena alo ebili e riele elemhi osheli.

13 Ama, ini akpa o khueghie ikanya eghoghọ-a gbo o, ęgbọ e ya lese emini e khi,

14 itobọ khi akpa oọ khueghie emhi nya-a, ni a ke me gbo o. Lọli Ebe-no-pfuase o ro, "A guale eni e lese a, a khi li abi oni o ghua, ni akpa oyi iKirisiti o la e egbe ke ge."

15 Itobọ ighọ lese abi u ke li ya ke ngeli. Khi ke ngeli abi oyegehe, ama ke ngeli abi olesingme.

16 Ini u da mhọli egegehe ro ya riele onete ne, nyanya riele oli, itobọ khi agbo ingme-obe awa ke la.†

17 Itobọ ighọ a khi khi eyeghe, ama a ze ni a lese emini e ghole Onomhue ni a ke riele.

18 Khi da onyo pfueche egbe-a, ochoghọ ze ni Ayemhe-no-pfuase o ke vo agbo oye.

19 A ke to iwolo ena irudunga khasę egbe, ke to uwolo eni e te e udu lase ke kuęghie Onomhue.

20 Egegehe kpa, ke kuęghie Eshinegba ita awa shi emhikpa, itobọ iJesu iKirisiti Onomhue oyi awa.‡

Ingeli oyi emose ali ikpotso ni e la ughue

21 A ri egbe tiemhie na egbe e pfo nya itobọ khi u mu ekpe na iKirisiti.

22 Ee ikpotso ni a la ughue, a ri egbe e tiemhie na odo e,

† 5:16 Li ze iKolo 4.5 ‡ 5:20 Li ze iKolo 3.16-17 § 5:22 Li ze iKolo 3.18; 1 iPit 3.1

abi u li ri egbe ẹ tiemhie na Onomhue. §

23 Itobọ khi omose o khi ukhomhi oyi okpotso oni o ro shi ughue, ezeze abi iKirisiti o khi ukhomhi oyi igba oyi egbo eni e mie oli suo. Eni e mie oli suo e khi idiegbe oyoli ni o mie pfuese.

24 Itobọ igho okpotso ogbogbo ni o mhue odo, o nyese ukhomhi na odo li pfo, elemhi emhi nya, abi igba oyi eni e mie iKirisiti suo e li ri egbe we na li.

25 Ee emose eni e ri ikpotso shi, a mholi inono ni o te eke elemhi udu lasese shi ighue e o, ezeze abi iKirisiti o nono igba oyi eni e mie oli suo, ni o ze khi o ghu-a na we.*

26 O ri itoto oyi ungmehi oyi Eshinegba ri eni e miesuo khi eni e pfuse, o ri ameh khuse we-a ni e dala.

27 Eri o rieje ona na igba oyi eni e mie oli suo, ni o ro ri ewe somhi otse, ni e ze oli ro migha odalo oyoli, ni e khi egbo ni uchimhi o ta ma egbe, wekhi eni e mholi ichinya, u ke lie khi emhi olese ni o ta ti, ama ni e khi eni e pfuse ni ea mholi umhaguekia.

28 Ina, ee emose e li nono ingme oyi ughue we abi e nono ingme oyi idiegbe oyewe. Oni o nono ingme oyi ughue oli ingme egbe oli o nono.

29 Ini a mema bino o bie, a ya me khi ogbokhoghuo o ya biselemhi egbe oli, ama eri o

ri emhi na egbe oli e le, o ri ukpeloe e khu egbe oli, ezeze abi iKirisiti o li ri ukpeloe e khu igba oyi eni e mie oli suo oyoli.

30 Uguabọ idiegbe oyi iKirisiti awa khi.

31 "Onana o ze ni omose o ro ri ita li ali inyo li e shi eke, o ya toma ughue oli o, egheghe agho wewe aava e mele ogbo oghuo a."†

32 Ukpokpomhi osheli na ni mhi gue e le, ni o la iteva iKirisiti ali igba oyi eni e mie oli suo.

33 Ama, ni mhi ro gbe oli ukhomhi, omose ogbogbo o lolo nono ingme oyi ughue oli abi o li nono ingme egbe oli, yeye okpotso ni u la ughue, lolo mu ekpe ke na odo e.

6

IPolu o ye eniye ali eni e bia we ude

1 Eniye, a ri ungmehi oyi eni e bia e ke gbe akanya, itobọ khi loli o ti ni eni e mie Onomhue suo e ke rieje.*

2 "Mu ekpe na ita e ali inye e." Ona o khi ushi oni odode ni Eshinegba o shi ni o ri ish-iobọ ma.

3 "Ini u mu ekpe na eni e bia e, agbo oyẹ o ya ke je odalo egbegbo, u ya gbo li agbo tese agbo ona."†

4 Ee ita eniye, a khi rieje emini o ri elemhi e ke bi imie, a ri ochoghọ ke ri ukpeloe khu we, a ke sese we ode oni o ghole Onomhue.‡

* 5:25 Li ze iKolo 3.19; 1 iPit 3.7 † 5:31 Li ze Igbae 2.24

* 6:1 Li ze iKolo 3.20

† 6:3 Li ze Okiali 20.12; iDeut 5.16 ‡ 6:4 Li ze iKolo 3.21

IPolu o ye ighumha ali eni e mholi we ude

⁵ Ee ighumha, a ri ungmehi oyi oni o mholi e ni o la agbo ona ke gbe akanya. A rote ekelemhi udu ke mu ekpe na we. A ri ukpeloe oni o fu ke bino we abi a kha li ri ungmehi oyi iKirisiti gbe akanya.

⁶ A ke ri ingme oyi ewe gbe akanya eghẹghẹ kpa, ọa khi ini e bino e tse a ro ri ingme oyewe ke gbe akanya ini e ba ke kueghie e. Ama a ke li abi ighumha eyi iKirisiti e li mu ekpe e na li, ikhi eni e rote ekelemhi-udu oyewe e ri ele emini Eshinegba ọọ a ke ri ele.

⁷ Rote elemhi udu oye ke gbe akanya abine khi Onomhue wa ga, itobo o a khi egbo tse awa ga.

⁸ Roli shi udu khi Onomhue o ya somhi ogbogbo opfa shi ikanya enete ni o gbe, shi oghumha o, shi oni o a khi oghumha. §

⁹ Ee eni e mholi ighumha, a li gue ke ngeli deba ighumha eyi ee, A khi so we ulishi khi a ya nase we. A lese khi oni o mholi e, mholi ighumha eyi ee, o la iloghie. Loli o khi oni ọa mhue khi ọna o kpe mhe dose ogho.*

Abi eni e miesuo e li nu okphaghie e kholi

¹⁰ Ni mhi ro gbe oni ungmehi oyemhe ukhomhi, a rote obo oyi Onomhue mie itoto eniemhi. Rote ekpabo eniemhi eyoli mie itoto.

¹¹ Rue itsua okholi nya ni Eshinegba o ro ne so, ni u dobe nu (ekpabo ali ode ebubu ni okphaghie o rote e lasele shi ogbo o) khe abo pfuse a.

¹² Itobo khi ọa khi egbo nabi awa, awa nu e kholi, ama itoto ali ekpabo ali ighie eyewe ni e mhesa agbo ona alo ebili, ali ayemhe ebe eyi okphaghie ena irarogbe ni awa a ya me.

¹³ Itobo igho ri itsua okholi eni Eshinegba o ro ne nya so, ini u dobe kholi ele ni ekpabo ebe e mu okholi e vule shi e o. Ini u kholi se nya, gbe lighi.

¹⁴ Mu egbe ni u ro kholi okholi elemhi ayemhe. Eghẹghẹ kpa, mie emini e khi igesikia suo. Eri ona o li abi ogbene ni okholi-okhue o ro mu oku. Ke ngeli ingeli eni e migha shi ipfua odalo oyi Eshinegba. Ona o migha shi awulu akhuli ni a ro mu aye ini a ya kholi.†

¹⁵ Ke mu egbe eghẹghẹ kpa ni u ro gue usomhi onete oyi Eshinegba oyi opfomhe le, onana o li abi eku e ni okholi-okhue ọọ so shi awe.‡

¹⁶ Ke regbenga Eshinegba, ona o ya khukhu e obo oyi ikuatse ni okphaghie ọọ nono ni loli kual e, eri ona o li abi ofiasa ni okholi-okhue o ro mholi obo ro ke fiase ote-osue erali kua.

¹⁷ Yelele khi Eshinegba o mie e pfuese. Onana o li abi arula akhuli ni okholi-okhue o ro rughu e ye okholi. Rue ungmehi oyi Eshinegba

§ 6:8 Li ze iKolo 3.22-25 * 6:9 Li ze iDeut 10.17; iKolo 3.25; 4.1 † 6:14 Li ze Aza 11.5; 59.17 ‡ 6:15 Li ze Aza 52.7

ni Ayemhe-no-pfuase o ro ne mhuē obọ ke khọli, eri o li abi ogbhoro ni a ro khọli okhọli. §

18 Rọ te elemhi Ayemhe no pfuase ke lema eghẹghẹ kpa. U kha lema, ke sọ iromhi ododa. Ke liẹ Eshinegba o kpaghiẹ e obọ. Abi u liẹ lema, ke tokpẹ. Ke lema na egbọ eyi Eshinegba eghẹghẹ kpa.

19 A gbo li ke lema na mhe ni Eshinegba o ri ungmehi shi mhe unu eghẹghẹ kpa ini mhi ya khueghie unu a ngme, ni mhi dobe khueghie osheli ni o la usomhi onete oyi Eshinegba-a khasẹ egbọ, ini mhi khaa ngme, ni ulishi o khi mu mhe.

20 Oni o to-ẹoli iKirisiti e tse abọ usomhi onete oyi Eshinegba ona mhi khi. Ona o zẹ ni mhi rọ la owa ighumha. Itobọ ighọ, a ke lema na mhe ni Eshinegba o ri udu na mhe ke tse abọ usomhi onete oyọli abi mhi kha li tse ọli.

IPọlu o lema Eshinegba o khivose na eni e miesuo

21 Inyoghuo awa ni awa nono ingme oyọli, ni o gbe akanya oyi Onomhuē te ode igesikia, iTakikosi o khi. O ya gue ingme eyemhe nya ye e, ni a rọ gbo lese abi o li mhe egbe ali emini mhia rieḷ.*

22 Itobọ ighọ mhi rọ ghie ọli ghi e, ni a rọ lese abi anye li la o shi, ni o gbo ri udu shi e o.†

23 Eshinegba ita awa ali iJesu iKirisiti Onomhuē, e ri opfomhe na e ni a miesuo. E

ka re e nono ingme egbe e, ali ni a kie ke mie iJesu suọ

24 Eshinegba o ka li okhale na egbọ nya ni e nono ingme oyi iJesu iKirisiti Onomhuē oyi awa, ikhi inono ni ọa ya pfo ghue.

Ebe ni iPolu o keke ghi egbọ iFilipia Eni e miesuo

1 Mhemhe iPolu ali iTimoti eni e ga eyi iJesu iKirisiti anye ga khi.*

Mhemhe mhi keke ebe ona a ghi egbọ ni e mie iJesu iKirisiti suo nya ni e la eke iFilipi shi eni e ri ukpeloe e khu eyi igbaa oyi eni e mie iJesu iKirisiti suo ali eni e la agho o kpaghie obo.

2 Eshinegba Ita awa ali iJesu iKirisiti Onomhue e ka li okhale na e, e gbo ri opfomhe ghi e.

3 Eghẹghẹ kpa ni mhi ro da sato e egbe ne, eri mhia kphemhi na Eshinegba.

4 Eghẹghẹ kpa ni mhi ro da a so iromhi na e nya ne, eri oghẹle o o la mhe udu ke so iromhi.

5 Irari ode ni a te nu mhe ri oni usomhi onete kia, rote ele nodode ya ramhi amo.

6 Mhi ro sho khi, Eshinegba ni o gba ikanya enete eke le shi agbo oye, loyi o ya nu e tsua li ramhi ele ni iJesu iKirisiti o ro ya nyene egbe bhale.

7 O ti ni mhi lina ke saa ingme oye eghẹghẹ kpa irari khi ingme oye o la mhe udu. O kha ririe khi ighumha mhi la, okekhi ini mhia ke oni usomhi onete shi eke, ali ini mhia pfi otsele ro lama shi

emini oni usomhi onete o riele. Irari khi eri Eshinegba o ri oni afu ona ga na awa, ni awa ro gue oni usomhi onete le.

8 Eshinegba o khi otsele oyemhe khi igesikia mhia ngme ini mhi e khi inono ekelemhi udu ona iJesu iKirisiti mhi mhue na e.

9 Iromhi ni mhia so na e khi, inono ni a mhue ena, o ke nga sho, rote ilisingme ali ilese udi ingme,

10 ni a ro dobe ke ze emini o ti ne. Ini a pfuase, ni a khi eni ea mhue umha-guekia ya ramhi ele ni iKirisiti o ya nyene egbe bhale.

11 Ni agbo oye o vo ingeli ipfuase ni e rote obo oyi iJesu iKirisiti bhale. Ni a ro me asha ri ufumhi ali ikueghie na Eshinegba.

IKirisiti a la agbo o na

12 Mena, mhia nono ni a lese khi emini mhi me khi eri o kpaghie obo ti usomhi onete je odalo.

13 Irarigho, ekhe-ke na agbala nya e she lese khi itobo khi mhi khi aghiusomhi oyi iKirisiti a ro mu mhe shi owa ighumha.†

14 Ogba ighumha ni a mu mhe shi o she ri inyoghwo awa ebubu regbenga Onomhue, ni a ro bhale ya e khi e zese udu a eghẹghẹ kpa ro gue usomhi onete oyi Eshinegba le, ni o khia khi ulishi o a mu we.

15 Egbegbo lo, khi, rote ayemhe ubogbo ali ofuma, egbọ eghuo e ro ri iKirisiti e

* 1:1 Li ze Ika 16.12 † 1:13 Li ze Ika 28.30

tse abo, ama eghuo é rôte udu igesikia roli ẹ tse abo.

16 Eni e rôte udu igesikia a tse abo, ayemhe inono e ro o rihele oli, irari khi e lese khi itobo igho Eshinegba o ro remhe shi akana ni mhi migha ke khe oni usomhi onete shi eke.

17 Elese é rôte udu aro-timhenga ri iKirisiti ẹ tsabo. Oa khi ode igesikia e te roli ẹ tse abo. Eri o li we egbe abine khi e kha me asha to ingme shi eke na mhe abi mhi la owa ighumha ena.

18 Abiabi e li ri iKirisiti tsabo kpa, oa mhuẹ abi o ngme. O ke khi ode egbholi o, o khi egbegbi ode oo, mhi mema ya ke ghele shi o.

Igho lo e, mhi mema ya ke ghele shi o.

19 Itobo khi mhi lese khi rôte iromhi ni a so, ali ikpaghiobo ni o rôte Ayemhe oyi iJesu iKirisiti bhale, a ya rue mhe elemhi owa ighumha ona lasele.

20 Mhi ma to eloe eke, mhi gbo mhuẹ irudushi o khi, mhi aa ya tigbe ze ni akanya oyemhe o ba mhe ku. Ama egheghe kpa ali memena mhi ya ri igbedu ke ngme ni mhi ke ri ufumhi ghi iKirisiti rôte angeli oyemhe, mhi la agbo oo, okekhi ini mhi ghua.

21 Irari ini ẹ oyemhe, agbo ni mhi la, iKirisiti mhi la o na. Mhi kha ghua, eleli o khi na mhe.

22 Ama ini mhi kie la agbo a le, mhi kha kie mholi ikanya enete ni mhi kha gbe na

iKirisiti. Ama onoghuo o, mhi kha ze mena? Mhi aa lese e!

23 Udu o ze mhe eva, mhi aa lese oni mhi ya ze o. Mhi ga nono ni mhi deba iKirisiti ni mhi lase agbo le. Ona o ga ti mhe egbe ne.

24 Ama itobo oye ẹ, o ti ni mhi la agbo.

25 Mhi lama shi ona, mhi lese khi mhi ya la agbo. Mhi ya nu ee nya la agbo ni a ke je odalo, ali ni a mholi oghelẹ ni o la irudunga.

26 Ni a ro bhale ya ẹ khi ini mhi nyene egbe bhale gbo nu ẹ la, a ya me asha ke titi egbe irari oyemhe, rôte elemhi agbo oye ẹ ni o kuma iJesu iKirisiti o.

27 Abibi o riẹ li, ke ngeli abi ungmemhi oyi iKirisiti o ngme. Ni a ro bhale ya ẹ khi, mhi bhale ya me ẹ o, okekhi eri mhi suo eko ẹ o, mhi ke lese khi a kie migha egbegbo elemhi ayemhe oghuo. A kholi okhue usomhi onete elemhi ikudugbe abi ogbo oghuo.

28 A khi ze ni ulishi ebe ẹ o mu ẹ, ona o ya re we lese khi a ya mhuẹ eleli, ama wewe e ya pfua, irari khi Eshinegba loli o ri imuole na ẹ.

29 Irari khi a she ri egheghe na ẹ ni a ro ga iKirisiti, ni oa khi irari khi a lese ya miesuo tse, ama ni a ro li ya me osue na li.

30 Memena, a li kuma mhe o shi oni okholi. Oni a me khi mhii kholi egheghe ni o dose, ni mhi kiele ẹ kholi memena.‡

2

A ke khonya iregbe-tiemhie onabi oyi iJesu

¹ Agbọ oyeẹ ni o kugbe iKirisiti ọ, o zẹ ni a rọ toto. Inono ni ọ mhue na ẹ o ri udu shi ẹ ọ. Ẹẹ ali Ayemhẹ oyọli a mhue ikugbe. A gbo mhue isomhelemhi ali ilelemhi na egbe ẹ.

² Irarigho, mhia nono ni a remhẹ ke ghele shi abi a mhue isamhi eghuo, ni a riẹle inono na egbe, a gbo khili oghuo el-emhi ayemhẹ ali udu.

³ A khi ri ayemhẹ a ba timhẹ nga ali ni a ba mẹ asha ke tono obọ udu, riẹle emhikhoghuo. Ama a nyese ukhomhi na egbe. A bino khi ogboese ọ somhi dose ẹ.

⁴ A nono onete oyi egbe ẹ, ọa khi onete oyi yeyeghuo tse.

⁵ Mhue angeli nabi iJesu iKirisiti ọ mhue.

⁶ Abi o riẹ khia khi eri iKirisiti ọ li abi Eshinegba.

Ọa tigbe sa li khi otu loji ali Eshinegba e khi.

⁷ Ochoghọ, eri ọ rọte udu oyọli rue emini ọ mhue nya obọ-a,
ọ mele oni ọọ ga ogbo-a.

Ọ mele ogbo-a,
ọ ri ẹkuẹ ogbo ku egbe bhale.

⁸ Ọ ri egbọli tiemhile,
ọ kia okiali issueso
ya ramhi ni ọ rọ ghua,
ikhi eghuli oyọli na ap-fida.

⁹ Itobọ ona, Eshinegba ọ yase ọli
nga obini o yagha ne nya.

Ọ ri eva ni o fu dose eva nya nali,

¹⁰ ni a rọ bhale ya ẹ khi ashiashini a da la lu eva oyi iJesu ne, ikhomhẹgbhẹ nya e nyese ghe emhi nya ni e la idane

ali eni e la eke, ali eni e la elemhi eke,

¹¹ emhi nya e ya pfi otsẹle khi iJesu iKirisiti ọ khi Onomhue,
ni a rọ ri ufumhi

na Eshinegba Ita.*

¹² Itobọ igho, emole mhe, abi a lie sueso ukpeloe oyemhẹ a gbo ligho ke sueso odukhokho oyemhẹ. A ri ulishi ali ikpheli ke gbe ikanya, ni irudunga oyeẹ o gba pfo.

¹³ Itobọ khi egheghe kpa Eshinegba ọ rọ la ẹ egbe ẹ gbe akanya ni ọ re ẹ mhue oguemhẹ, ni a gbo dobe ke riẹle emini o de shi omhese onete oyọli.

¹⁴ A khi ri awolo we ekhako riẹle emhikhoghuo.

¹⁵ Ni a khi egbo ni ẹa mhue umhaguekia, ni e pfuase abi imi Eshinegba ni e gba pfo, elemhi agbo ni egbo ali ena ikanya ichimhi e la. A mema la we iteva ke ge abi ikpetata ni e la idane,†

¹⁶ abi a lie gue ungmehi agbo ke ye we. Ini a li ghọ, mhi ya mẹ asha ke re ẹ titi egbe ele ni iKirisiti ọ ya nyene egbe bhale. Irari khi eri ona o ya rokhase khi iroshaka ni mhi roshi ali ikanya ni mhi gbe, ẹa khi afue.

* 2:11 Li zẹ Aza 45.23 † 2:15 Li zẹ iDeut 32.5

17 Ini a tseku ku ɔlia eyemhẹ abi onyọ shi iluasobo ali ikanya enete ni o rọte irudunga oyẹẹ lasele, eri egbe e mu mhẹ shi ọ, mhi nu ẹ ghele.

18 Irarigho, egbe e li ke mu ẹ, a li nu mhẹ ke ghele.

ITimoti ali Epafuroditusi

19 Ini o ghọle Eshinegba, mhi khọkhọ khi mhi ya dobe kele ghie iTimoti ghi ẹ. Ni mhi rọ suọ eko ẹ, ni mhi mhue oghẹle ini ọ jele.

20 Lọlighuo kpe ọ lese abi o li mhẹ egbe, ni ingme oyẹẹ o gbo mu egbe.

21 Egbọ eni e kpọle nya, eleli oyewẹ e na khu, ama ọa khi eleli oyi iJesu iKirisiti.

22 Ama, ẹẹ, a lese abi iTimoti ọ li ri egbọli khase ẹ abi ọ la ọ shi. Abi mhemhẹ ali lue anye li kugbe gbe akanya oyi usomhi onete oyi Eshinegba abi ita ali omọ ẹẹ li.

23 Mhi ya kele ghie ọli ghi ẹ ini mhi da lese abi o ya li mhẹ egbe.

24 Mhi ri egbe da Onomhue khi mhi ya kele bhale.

25 Mhi kie gbo li khọkhọ khi o ti ni mhi ghie inyoghuo awa ghi ẹ, ikhi Epafuroditusi ni ọ she gbe akanya deba mhẹ, ni ọ she gbo nu mhẹ gbe akanya ode-khode. Ni ọ gbo khi aghiusomhi oyẹẹ ni ọọ kpaghie mhẹ obọ.

26 Egbe ẹẹ kphakpha li ni ọ rọ me ẹ. Egbe ẹ a ke sheshe ọli itobọ khi a suọ khi ọọ ghua.

27 Egbegbo lo, ọọ ghua gba, ukukuọ o kpọli eghuli le. Ama Eshinegba ọ mhue

ilelemhi na li. Ọa khi lolighuo Eshinegba ọ mhue ilelemhi na tse, ọ li mhue na mhẹ, ọ tsumhi mhẹ elemhi osue ni o to-nga osoli.

28 Mhemhẹ egbe ẹẹ kphakpha ne ni mhi rọ ghie ọli ghi ẹ. Ni a gbo mhue oghẹle ini a me ọli, ni osoli oyemhẹ o kelea.

29 A ri oghẹle kpe abọ mie ọli abi inyoghuo na elemhi oni irudunga. A mu ekpe nofunẹ na egbo nya nabi lolli.

30 Itobọ khi ọ ri agbo oyọli shi okhena, ukukuọ o kpọle suii ni ọ kha rọ ghua shi akanya oyi iKirisiti, ini ọ me asha ri ikpaghiobọ na mhẹ ni ẹẹ aa dobe rona mhẹ.

3

Angeli ni o migha shi ipfuase

1 Ni mhi rọ gbe ọli ukhomhi, inyoghuo, a ke ghele shi abi a li kuma Onomhue ọ. Ọa mhue abi o ngme mhẹ ini mhi riẹle emini mhi kpẹ keke ghi ẹ gbo keke, lolli o ya ti ẹ egbe ne.

2 A mu egbe ẹ shi egbo egbo ni e li abi ewa, ni ẹẹ gbe ikanya ebe. Ikhi eni ẹ lie khi ogbo mema shele-a neni imiepfuese oyọli o gba pfo.

3 Anye ena, a shele egbegbi ishele-a, irari khi anye te ode ayemhẹ ẹ ga Eshinegba. Anye mholi oghẹle shi elemhi agbo oyi anye khi anye kuma iJesu iKirisiti ọ, ni anye ẹa ri egbe da ikanya idiegbe.

⁴ Ama mhemhe mhii kha ri egbe da ikanya idiegbe eghoghò ne.

Ini àá nono oḡbò ni o kha regbeda ikanya idiegbe eghoghò lo, mhemhe o kha khi.

⁵ Irari khi eḷe-nuzi-elele ni a rọ bia mhe, a rọ sheḷe mhe-a. Oṅgi iZireni a bia mhe, mhi rọte unuḗkpẹ oyi iBejami lasele, egbegbi oṅgi Iburu. Ini eḗ, iri ushi oyi eḡbò iJu gbe akanya, iFarisi mhi khi.*

⁶ Mhi mhuẹ omuegbe ramhi ni mhi rọ mu okhọli vule shi igbaa oyi eni e mie iJesu iKirisiti suọ o. Ini eḗ abi oḡbò o liẹ pfuase, ode irushi-gbe akanya, mhi aa mhuẹ ashini o kpọ mhe shi.†

⁷ Ama emhi eghoghò ni mhi kha leli shi eleli, mhi rewe shi afue, itobọ oyi iKirisiti.

⁸ Oa khi egho tse, mhi lama emhikpa o limhe opfu-a, itobọ ufumhi ni o la ilese ni mhi lese iJesu iKirisiti Onomhuẹ oyemhe. Itobọ oyoli mhi rọtsua emhi nya kua. Eri mhi ga bino we shi iku, ni mhi me asha mhuẹ iKirisiti,

⁹ ali ni mhi ga toma li o pfo. Mhi aa ke mhuẹ angeli no migha shi ipfuase oyemhe, angeli ipfuase onabi mhi ri itobọ khi mhi ri ushi e gbe akanya mhọli. Ama angeli ni o migha shi ipfuase ni a rọte irudunga oyi iKirisiti rọ na mhe mhi ke mhọli memena, angeli ipfuase ni o rọte obọ oyi Eshinegba bhale, ni o rọte irudunga bhale.

¹⁰ Emini mhia nono ni mhi lolo lese khi iKirisiti ali ekpabo ni o rọte eghuli guise oli le. Ni mhi rọ nu oli me osoli ni o me, ni mhi nu oli ghu eghuli onabi o ghu.

¹¹ Itobọ khi mhi mhọli oli shi udu khi a ya li rọte eghuli guise mhe le.

Roshẹka na ya ramhi ukpese elemhi irudunga

¹² Mhi a liẹ khi mhi she ramhi ashini mhia nono ni mhi ramhi ne, wekhi eri mhi she gba pfo. Ama eri mhi roshẹka ni mhi li abi iKirisiti. Onana o ze khi iKirisiti o pfi obọ rue mhe.

¹³ Igesikia, inyoghuo, mhi aa bino egbemhe shi oni o she lo owa ne. Emhi oghuo ni mhia li, khi, ni mhi rọ rue elo e mini e je ikhokho a, ni mhi roshẹka ri obọ ramhi emini e la odalo.

¹⁴ Irarigho, eri mhi na le talala, ni mhi rọ mhuẹ ifata, ni o khi ulumhi ni Eshinegba o lu mhe, rọte iJesu iKirisiti je agbọ ni o la iloghie.

¹⁵ Awa nya ni awa mhọli iwomheloe shi elemhi ayemhe, awa li mhuẹ udu onana. Ama ini eghuo elemhi e, e mhuẹ udu oda shi ingme onana, Eshinegba o ya roli khase e.

¹⁶ Abibi o ya li, awa ke je odalo shi ushi oghuo ni awa deba ramhi ana.

¹⁷ A ke khonya mhe inyoghuo. A ri eso shi eḡbò ni e deba oni ode onete ni anye rọ shi eke na e.‡

* 3:5 Li ze Ika 23.6; 26.5; iRom 11.1 † 3:6 Li ze Ika 8.3; 22.4; 26.9-11 ‡ 3:17 Li ze 1 iKori 4.16; 11.1

18 Mhi she kpẹ gueyẹ ẹ ne, mhi gbolo ri eviẹ shi alo a gueyẹ ẹ memena, khi ẹgbo eghuo e la no khia khi uwali agbọ ni e la, o she rẹ wẹ khi ọbe oyi eghuli ni iKirisiti ọ ghu shi apfida.

19 Owa ẹrẹ ẹẹ je, irari khi ọghuẹmhe idiegbe oyewẹ o khi olitsa oyewẹ. Eri ẹẹ titi egbe shi emini e kha rọ shi omama. Usamhi emhi agbọ ona e lẹsẹ ẹ sa.

20 Ama awa, udiokute oy-awa o la iloghie, awa lolo ri alo shi ekẹ ke kẹ Ọmiepfuese ikhi iJesu iKirisiti ni ọ rọte iloghie jele.

21 Ọ ya ọoghie idiegbe oyawa ona ni ọọ ghu, ọ ri idiegbe oyi ufumhi onabi oyoli to-ẹloli ọli. Itoto ogho ni ọ rọ dobe ri emhikpa bhale omhesẹ oyoli ọ rọ ya riẹlẹ wẹ.

4

Ungmemhi irudusho

1 Itobọ igho, inyoghuo, in-gme oyẹẹ oo mu mhe egbe gba. Ẹloli ẹ, o she nga mhe. A ma ri egbe a mu mhe, mhi gbo rẹ ẹ titi egbe, igho o ti ni a kha li migha agbọ oyẹẹ na Ọnọmhuẹ.

2 Mhi lema Euodia ali iSi-taiki, a kpẹkpẹ a lama na egbe abi inyoghuo ni e mie Ọnọmhuẹ suọ.

3 Ali yeyẹ ọmuzava oyemhe, iSizigusi, kpaghie eni ikpotso ena obọ irari khi e she nu mhe mẹ osue shi itsabọ usomhi onete ona kia kia. Ghe iKilemeti ali eni anye ga gbe akanya kugbe ali elese nekpole, eni eva oyewẹ o la

ebe ni a kẹkẹ eva oyi eni e ya mhọli agbọ na agbọagbọ.

4 Eshinegba o zẹ ni a ke mhọli oghelẹ ẹghẹghẹ kpa irari khi a kugbe Ọnọmhuẹ ọ. Mhi gbolo ẹ i, a ke ghele!

5 Zẹ ni ọgbokpa ọ ke mẹ iguẹ riẹlẹ emhi shi ẹghẹghẹ oyẹ gboo. Irari khi Ọnọmhuẹ ọ kele ya bhale.

6 A khi zẹ ni emhikhoghuo o mu ẹ egbe dose. Ama, emhikpa, a ri udu ikphemhi ke sọ iromhi mhila Eshinegba emini u wa nono.

7 Ni opfomhe oyi Eshinegba ni o dose ilẹsẹ oyi ọgbọ nya, o ri igbe udu ali ayemhe ni o migha na ẹ, irari ikugbe ni a kugbe iJesu iKirisiti ọ.

8 Ni mhi rọ gbe ọli ukhomhi i, inyoghuo-mhe, a zẹ ni isamhi eminete ni a kueghie ọgbọ ọ shi e vọ ẹ udu, li shi emini e khi egbegbọ, ni e mu ẹloe, ni e rọte ode ipfuase bhale, ni e khi eyi inono, ni a mu ekpe shi.

9 A ri emini a wena obọ oyemhe ali eni a mie obọ oyemhe, okekhi eni a mẹ agbọ oyemhe ke gbe akanya. Shi eni mhi ri unu ngme ali eni mhi riẹlẹ. Eshinegba ni ọ ri opfomhe ẹ na ọgbọ ọ ya nu ẹ la.

IPolu ọ tse obode shi isomhopfa

10 Abi ọgbọ ni ọ mie Ọnọmhuẹ suọ, egbe ma mu mhe shi ọ gba, khi, abi o tseku tesẹ, khi a kie gbo mẹ asha ri inono ni a mhuẹ na mhe khase mhe. Ọa ke khia khi eri mhi ri ona liẹ khi aa ke kpẹ

ri ẹloe e khu mhe, ama eri áá ke kpe me asha kpaghiẹ mhe obọ.

¹¹ Oa khi eri mhia ngme ona irari khi o limhe egbe abine khi a pfi mhe esọ-a, itobọ khi abi oni mhi mhue o lie khuese mhe o she ma mhe-a.

¹² Mhi lese abi ọọ li egbe ini ọgbọ ọ la umhamẹ ali abi ọọ li ini ọgbọ ọ la ọsuumhe. Mhi she wena osheli ona ni a rọ bhale ya ẹ khi oni mhi mhue o bu mhe. Obiobini o khi oo, ashiasini o khi oo, mhi le khue oo, o ke khia khi okiamhi ọọ gbe mhe.

¹³ Mhi dobe riele emhikpa rọte itoto ni iKirisiti ọ rọ na mhe.

¹⁴ A ma khale, abi a li kpaghiẹ mhe obọ abi mhi rọ la ọmunu.

¹⁵ Eẹ ẹgbọ iFilipi, a lese khi abi mhi rọ rọte eke iMasidonia vu, ni mhi rọ lese gba akanya itsabọ usomhi onete le, eẹghuo kpe a khi eni e miesuọ ni e kpaghiẹ mhe obọ elemhi irọna ali imemie.

¹⁶ Oa khi utoghuo tse, a kpaghiẹ mhe obini eke iTesalonika abi mhi rọ nono ikpaghiobọ.*†

¹⁷ Oa khia khi isomhopfa mhi lese nono, ama emini a ya keke shi ẹkuẹ oyẹ na iloghie mhia nono.

¹⁸ A she fali mhe ota gba pfo, e gbo gba nga ọ. A she ri itsua ghi mhe ni e vọ mhe eke, abi mhi rọ mie Epafuroditusi emini a rọna li ghi mhe ena, eri e li abi irọna ni eẹ kphela,

ikhi iluasobo ni a mie, ni e ti Eshinegba ẹloe.‡

¹⁹ Eshinegba oyemhe ọ ya emini ẹ ghọle ẹ nya na ẹ. Epfue ni o fune ni o la iJesu iKirisiti onayi ọli ọ te ya riele ọli.

²⁰ Ufumhi o khi oyi Eshinegba Ita awa ya ramhi ele ni agboagbo, Atse!

Otse ni o kpukhokho

²¹ Mhia tse ọgbokpa ni ọ khi Omi Eshinegba ni ọ khi oyi iJesu iKirisiti. Inyoghuo nya ni e nu mhe la ana eẹ tse ẹ.

²² Egbọ eyi Eshinegba ni e la ana nya eẹ tse ẹ, ghe eni e la agbala oyi iSiza.

²³ Okhale oyi iJesu iKirisiti Onomhue o ka nu ayemhe oye ẹ la. Atse.

* 4:16 Li ze Ika 17.1 † 4:16 Li ze 2 iKori 11.9 ‡ 4:18 Li ze Okiali 29.18

Ebe ni iPolu o keke ghi egbo IKolosha Eni e miesuo

1 Mhemhe iPolu, aghiusomhi na kee oyi iJesu iKirisiti ni Eshinegba o ze abi o ghole oli shi mhi khi, li shi inyoghuo awa iTimoti.

2 Mhemhe mhi keke ebe ona ghi egbo eyi Eshinegba ni e la eoli iKolose, ikhi inyoghuo awa ni e pfuase ni a ri egbe e nga elemhi iKirisiti.

Eshinegba Ita awa o ka li okhale na e, o ri opfomhe na e.

Iromhi ali ikphemhi

3 Egheghe kpa anye ro kphemhi na Eshinegba, Ita iJesu iKirisiti Onomhue oyawa, ini anye e so iromhi na e.

4 Itobo khi anye she suo abi a migha shi irudunga oyi iJesu, ali abi a li nono ingme oyi egbo eyi Eshinegba nya.

5 Emini Eshinegba o ro shi eke e khe e obini iloghie, o re e mholi irudunga ali inono ona, ikhi emini a she suo elemhi ungmehi igesikia, ikhi usomhi onete oyi iJesu iKirisiti ni a she gueye e.

6 Oni usomhi onete ona o she ri umomhi e lasese, o gbolo fu e shi o elemhi agbo nya, abi o kie kpe e li iteva oye e rote ogbele ni a te lese igesikia ni o la ukpokpomhi okhale ni Eshinegba o li.

7 Obo oyi Epafurasi a te suo oni okhale oyi Eshinegba, oni o khi otuoghuo elemhi anye, ni oo gbe akanya oyi iKirisiti te ode igesikia ni o to eloli anye.*

8 Loli o gbo gueye anye abi oni Ayemhe o li re e mholi inono na egbo eyi Eshinegba.

9 Abi anye te lina suo esone te oyi angeli oye e, anye e tigbe yemhe iromhi isoso-a, ni anye so o na e. Anye e so iromhi, Eshinegba o rote ile singme ali lese elemhi Ayemhe-no-pfuase kpaghie e obo, ni a lese oghuemhe oyoli, ni a ri ele oli.

10 Eri anye lina so iromhi na e, ni a gue ke ngeli abi egbo eyi Onomhue ee li, ni a ri egbe ke mu oli, a ri imomhi eyi onete iriele lasese, a gbolo e lese Eshinegba gbo shi o.

11 Anye gbolo e lema li, o ri itoto na e, ni a ke ri ekpabo eyoli nya gbe akanya, ni a mholi ukpokpomhi iregbe mie ali irabomudu ali oghela.

12 Ni a ke kphemhi na Eshinegba Ita, ni o li re e fu te eni e li mholi okemhi shi ugu oyi egbo eyi Eshinegba, eni e la akpa, ni o roo khe e.

13 Eshinegba o she rue awa obo oyi ekpabo alo ebili eyi okphaghie lasese, o rue awa bhale iloghie oyi omi oli ni o nono.

14 Obo oyoli awa te mholi ipfasheke, ni o ri olamhe topfa awa.†

IKirisiti o fu ne nya

15 IKirisiti khi irokhokho oyi Eshinegba ni obo aa ya me

* 1:7 Li ze iKolo 4.12; iFile 23 † 1:14 Li ze Efi 1.7

ẹloe. Lọli ọ khi ọni odode emini Eshinegba ọ ma nya.

16 Irari khi obọ oyọli a te ma emhikpa, ikhi emini e la ukhuli ali eke, ghe eni a me ali eni aa ya me, okekhi ikpekhomhi eghiele o, o khi ekpabo o, o khi ighie o, okekhi ena omhese o, loli ọ ma emhikpa, ọ ma we na egboli.

17 O kpe la ọ neni a ma emhi nya, loli ọ ze ni emhi nya e ro kugbe khi oghuo.

18 Loli ọ khi ukhomhi oyi idiegbe, ikhi igbaa oyi eni e mie iJesu iKirisiti suọ. Loli ọ khi igbaekele, itobo khi loli Eshinegba ọ kpe guise le, ni ọa ke gbo ya ghu ghue, eghẹghẹ agho ni lolighuo ọ ri obọ nga emini e la agbo nya ke mhese shi.‡

19 Irari khi eri o ghole Eshinegba ni emini ọ khi nya o la agbo oyi Omi ọli.

20 Ishegho ni ọ me asha rote obọ oyi ọni Omi ọli nu emhikpa mhuẹ iro-riẹle, o khi emhi na agbo ona okekhi ena idane. Ọlia eyoli ni ọ ku abi ọ ro ghu-a shi ukhomhi apfida ọ ro riẹle ona. §

21 Eghẹghẹ ni o dose ni aa ro kpe lese Eshinegba, eri a nuata shi ọli ọ. A khi ebe ọli elemhi udu oyẹ, itobo angeli obe ni a ngeli.

22 Ama Eshinegba ọ she re ẹ nu egboli ro riẹle. Eghuli oyi iKirisiti ọ ro re ẹ khi eni e pfuase shi odalo oyoli, ni aa ke mhọli ichimhi, ni á pfue umhaguekia.

23 Ini a da kie la elemhi irudunga oyẹ, ni a ro migha gbagbagba shi ọ, ni aa ro ze ni irudushi ni a mhọli o nighise, ikhi oni a mhọli shi emini Eshinegba ọ ro shobo na ẹ elemhi usomhi onete oyoli. Oni usomhi onete ona ni a she ro tse abọ khase ogbokpa elemhi agbo ona, loli a ze me iPolu shi abi aghiusomhi, mhi roli ke tse abọ.

Ikanya ni iPolu ọ gbe na igbaa oyi eni e mie iJesu iKirisiti suọ

24 Memena, egbe ga a mu me shi osoli ni mhi me ẹ na ẹ elemhi idiegbe oyemhe. Eri mhi ri oni osoli ona pfuse ikanya eni e kpole gbe, abi iKirisiti ọ me osoli na idiegbe oyoli, ikhi igbaa oyi eni e mie iJesu iKirisiti suọ.

25 Eshinegba ọ she remhe khi ọni ọọ ga ọyi igbaa oyi eni e mie iJesu iKirisiti suọ oyoli, ni mhi ya tse-abọ oni usomhi oyoli nya ye ẹ.

26 Ona o khi osheli ni ọ kpe ro sheli na egbo rote igbaekele ramhi eghẹghẹ ana. Ama, loli ọ tigbe khueghie a khase egbo eyoli ena.

27 Eri Eshinegba ọ riẹle ona ni eni egbo eyoli e lese pfue oniemi ni o la oni osheli ona. Oni osheli khi, iKirisiti ni ọ la agbo oyẹ ẹ, ni ọ re ẹ mhọli irudusho khi, a ya nu ọli mhọli okemhi shi ufumhi oyi Eshinegba.

28 Loli o ze ni anye ro ri iKirisiti ẹ tse abọ khase ogbokpa. Rote egbhali ni anye mhọli nya anye te ẹ tse agua

ye օգբօ, anye gbolo օ sօsօ wօ ni anye rօ rue wօ bhale odalo oyi Էshinօgba abi օգբօ ni e mhւօ iwomhօloe, ni e toma iKirisiti օ.

²⁹ Ni a bhale ya օ khi ona o zօ ukhomhi, eri mhi ri ekpabօ eyi iKirisiti nya ni e la mhօ egbe rօshօka gbe akanya.

2

¹ Mhia nono ni mhi gueye օ abi mhi li rօshօka a kpaghiօ օ ali eni e miesuօ ni e la օli iLaodisha ali օգբօsօ ni օa mօ mhօ ukpօloe ghue obօ.

² Emini o zօ ni mhi rօ օ rիօ օna khi ni a rօ ri udu shi wօ օ, ali ni e kugbe elemhi inono, ini e mhօli օpfue ni o gba pfo ni ilօsօ o rօ օ na օգբօ. Էghօghօ aghօ ni e lօsօ osheli ni Էshinօgba օ gba, ni o khi iKirisiti.

³ Lօlighuo kpe օ khi okpօ ni օօ khueghie օpfue-a ni o la ilօsingme ali ilօsօ eyi Էshinօgba.

⁴ Eri mhi gue ona a yօ ini օգբօkhօghuo օ khi ri osօsօ օgbhօli bhale ya di օ, abibi eni osօsօ e ririօ dala esօ ramhi.

⁵ Irari khi, ini mhi aa ririօ nu օ la aghօ, ayօmhօ oyօmhօ o nu օ la aghօ. Mhi nono ni mhi bhale ya mօ օ abi a guօ la kuete, ni irudunga ni a mhօli shi iKirisiti օ օa li nighise.

⁶ Aborօkhia khi a she rue iJesu iKirisiti abi Օնօmhւօ, a nu օli ke ngeli kugbe,

⁷ à gbelighi mighà, a gbo rօ ma imiesuօ ni a mie iKirisiti suօ, a kie mhօli օli shi udu

khi emini a sօsօ օ ikhi ingme eyi iKirisiti khi igօsikia e khi. A kphօmhi օ na Էshinօgba օghօghօ kpa.

⁸ Khi zօ օգբօkhօghuo di օ mu lama shi osօsօ afuօ ali eyi ikpamhika. Ikhi osօsօ ni e migha nga angeli ali օgbhali oyi agբօ, ni օa rօte obօ oyi iKirisiti bhale.

⁹ Irari khi emini Էshinօgba օ khi nya e la idiegbe oyi iKirisiti.

¹⁰ Irari khi a kugbe iKirisiti օ, a rօ mhօli agբօ ni o gba pfo elemhi ayօmhօ. Lօli օօ kpeda nya elemhi ekpabօ ali omhօsօ ali afu nya na elemhi ayօmhօ.

¹¹ Itobօ khi a kugbe iKirisiti օ, օ rօ rue օ օghuօmhօ idiegbe udu lasօle, օzօzօ abi a liօ shօlօ օգբօ օpfi-a.

¹² Էzօzօ abi a li ri iKirisiti tօ abi օ rօ ghua, ni a gbo guise օli le, ighօ a li pfi օ lo elemhi okօ gbo mu օ vule, elemhi ibatizi. A guise օ le bhale agբօ irari khi a mhօli irudunga shi ekpabօ oyi Էshinօgba ni օ rօte eghuli guise iKirisiti le.*

¹³ Eri a kpօ ghua shi elemhi ayօmhօ օghօghօ no dօsօ, irari khi a la agբօ olamhօ. Ama memena, Էshinօgba օ she ri iKirisiti rօ օ gbo mhօli agբօ. Օ ri olamhօ eyawa nya topfa awa.†

¹⁴ Abi Էshinօgba օ rօ shishi ishi ni a zօ shi awa egbe-a se, ikhi eni e migha zu awa odօ, օ rue wօ awa odօ-a, օ ta wօ ma apfida abi iJesu օ rօ ghua.‡

* 2:12 Li zօ iRom 6.4 † 2:13 Li zօ Էfi 2.1-5 ‡ 2:14 Li zօ Էfi 2.15

15 Abi ọ rọ mie iyemhẹ ọkphaghie ekpabọ se, ọ rẹ wẹ lasеле gboo yeghe-a abi ọ rọ ghu-a shi apfida.

16 Irarigho, khi zẹ ni ọgbokhoghuo ọ gue ẹ ẹzọ shi emini u wa le ali oni u wa da, ukeneta ushi imu Uki Onogbo ali ogbelẹ ne pfuase ali Ogbelẹ iyemhea oyi iju. §

17 Enana nya, irokhokho oyi emini e ya bhale ikpukhokho agbo e khi, iKirisiti ọ khi ọzukhomhi wẹ nya.

18 Khi zẹ ni ọgbokhoghuo ni ọ riele iregbe-tiemhie eyi ikpamhika, ni ọọ ga igeni, ọ di ẹ dobe eleli oye-a. Emini egbo eghoghọ e me e la tonọ ali udu oyewẹ ni imiesuọ o roli ẹ vuse ike shi isamhi afue.

19 Ogbọ oghoghọ ọa ke kugbe iKirisiti ọ, ni ọ khi Ọzukhomhi oyi oni idiegbe, ikhi igbaa oyi eni e mie iJesu iKirisiti suọ miesuọ. Ẹzeze abi ukhomhi oyi ogbọ o liẹ gueye idiegbe abi o liẹ kia, igho omhese oyi iKirisiti o liẹ mhese na egbo eyoli nya, rẹwe gbe akanya kugbe abi idiegbe ogbọ o tono elamhi ali ikpesẹ egbe manọ, khi oghuo. Eghẹghẹ agho oni idiegbe nya o fu abi Eshinegba ọ nono ọli shi.*

20 Aborokhia khi u she nu iKirisiti ghua, ni ushi agbo ọa ke rọ mhese ne egho, elo o ze khi u kie ri egbe ẹ na we, ni u rọ ri ushi eyewẹ gbe akanya, ni ẹẹ liẹ,

21 “Khi mu ona mholi obo,”
“Khi to elemhi ogho bino,”

“Khi ri obo ti onana?”

22 Enana nya, emini e ya mele afue-a e khi, ini a rẹwe riele emini a rẹwe ya riele se. Irari khi ishi ali omhese ni egbo e mhese lo.

23 Eri omhese eghoghọ e li abine khi ileingme e la ọ, ikhi eni e ri itoto ri egbo ga ugamhi ikpamhika ali iregbe-tiemhile oyi ikpamhika, ali ina-idiegbe-osoli, ama eni ẹ riele ena ẹa rẹwe lase olamhe le.

3

Angeli ni o ghole Eshinegba

1 Aborokhia khi a she rọte eghuli guise ẹ ali iKirisiti le bhale agbo egho, ri udu oye shi emini e la obini iloghie obini iKirisiti ọ shito obita Eghiele oyi Eshinegba.*

2 Ri udu oye shi emini e la obini iloghie, khi roli shi emini e la agbo ana,

3 irari khi u she ghua, elemhi iKirisiti u ke la, ni ọ la elemhi Eshinegba.

4 Egbegbi agbo oye, elemhi iKirisiti o la. Ọ kha da feli lasеле, yeye, u li ya nu ọli la akaghọ, u li nu ọli mholi okemhi shi ufumhi oyoli.

5 Irarigho, ze ni oghuemhe oyi emhi agbo ni o kpe la agbo oye o ghua. Enabi itsebo, ali angeli ichimhi, ali isamhi ebe, ali oghuemhe ni ẹa ti, ali emhi-itoegbe ni o li khi ikhumhi igaga.

6 Itobo enana, elemhi e rọ bi Eshinegba deba egbo ni ẹa ya suọ eso na li.

⁷ Eẹ, a kpe li lina ngeli eleele, abi a ro la ifuabo eyi egbo eghogho.

⁸ Ama, memena a ze ni emhi eghogho nya e lase e egbe le. Emhi nabi elemhi-ibibi, ali ofu imholi, ali imuegbe obe, ali iyesegebe-eva-a, ali ingmemhi iditse, ali itono obo udu.

⁹ A khi ke lono egbholi khas e egbe aborokhia khi a she gueghie ingeli ali idiegbe onodio shi eke egbo,†

¹⁰ ni a shi ri idiegbe enegbo ku egbe, ni Eshinegba Ima o ro ya mele onogbo-a, ni o li abi oyoli. Ini o me asha re e mholi ilese oyoli.‡

¹¹ Itobo ona, azolomhe o ke la iteva eni e khi iju ali egbo ifeta, we e eni a shele-a ali eni aa shele-a, we e egbo eni ea fialo-a ali egbo eni e rote ifui ishemhi lasele, we e oghumha ali omi ogbo. Ama iKirisiti o khi oni o mu egbe ne.

¹² Irarigho, abi a ro da khi eni Eshinegba o ze, ni e pfuase ni o nono ingme oyewe egbo, a ri ilelemhi, isomhelemhi, itiegbe-tiemhi, ali ipfomhe ali irobomodudu so abi awulu.

¹³ A ke ti eni e miesuo nabi ee ma egbe. Ini a lue na egbe, a ro ke topfa egbe e. A ro topfa abi Onomhue o li ro topfa e. §*

¹⁴ Emini u gbo ro ya ma eni ingeli enete ena nya khi, inono ni o gen o eni ingeli ena

nya kugbe, elemhi ikugbe ni o gba pfo.

¹⁵ Zobe ni opfomhe oyi iKirisiti o mholi omhes e shi udu oye, aborokhia khi egbo ni e kugbe elemhi idiegbe oghuo a khi egbo, aa kphemhi.

¹⁶ A ze ni ungmehi oyi Onomhue o la agbo oye e, abi a lie sese egbe, ni a ri ile singme e ye egbe ude. A gbo ligho ke to iwolo ena irudunga, ni a rote elemhi ayemhe e to ke lasele. A ri ayemhe ikphemhi e to uwolo kueghie Eshinegba.†

¹⁷ Emhikpa ni u wa rie e ni u wa ngme, ri eva oyi iJesu Onomhue rie e we. U gbolo ri eva oyoli e kphemhi na Eshinegba Ita.

Abi eni e miesuo e li ya ke ngeli

¹⁸ Eẹ ikpotso ni a la ughue, a ri egbe e na odo e pfo, irari khi ina ee eni e miesuo e ke li.‡

¹⁹ Eẹ edo, a nono ingme oyi ughue e, a khi ri obo ni o toto dose mu we. §

²⁰ Eniye, a ke suo eso na eni e bia e odekhode, irari khi onana o ti Eshinegba eloe.*

²¹ Ita eniye, a khi rie e emini e ya ri elemhi bi imi e, irari khi o ya ri egbe pfo we a.†

²² Eẹ ighumha, a ri ungmehi oyi oni o mholi e ni o la agbo ona ke gbe akanya. Oa khi ini e nu e la agho tse a ro ri ungmehi oyewe ya ke gbe akanya ini e ba somhi-elemhi

† 3:9 Li ze Efi 4.22 ‡ 3:10 Li ze Igbae 1.26; Efi 4.24 § 3:13 Li ze Efi 4.32 * 3:13 Li ze Efi 4.2 † 3:16 Li ze Efi 5.19-20 ‡ 3:18 Li ze Efi 5.22; 1 iPit 3.1 § 3:19 Li ze Efi 5.25; 1 iPit 3.7 * 3:20 Li ze Efi 6.1 † 3:21 Li ze Efi 6.4

ẹ. Ama ri udu oghuo ke gbe akanya irari khi u mu ekpe a na Onomhue.

²³ Emiemini u wa rieḷe nya ri omuegbe ni o roṭe udu oye nya lasele ke rieḷe oḷi, abine khi Onomhue u gbe akanya a na, ni ọa khi oḡbọ.

²⁴ Lina ke ngeli abi u ro da leṣe khi u ya roṭe obọ oyi Onomhue me eleli egho.

²⁵ Eshinegba o ya fali oni o li onobe ota, ọa ya gbe oḡbọkoghuo azeba.†§

4

¹ Eḡe ega, a gue ke rieḷe deba ighumha eye e abi o ti shi, a ri igesikia deba we. Sato khi yeḡe u li mholi Oga shi iloghie.*

Emini o gbo mhesẹ na we

² A lolo ke so iromhi, a to eloe eke, a tse Eshinegba uwegbe.

³ A gbo li ke so iromhi na anye, ni Eshinegba o khueghie ode-a na anye ini anye me asha gue ungmehi oyoli le. Ikhi ungmehi onayi osheli oyi iKirisiti, ni o ze khi mhi la oḡba ighumha memena.

⁴ A lema na mhe, ni mhi gue oni usomhi le gboo ni eḡbo e suo li.

⁵ Ri ileṣingme nu eḡbo eni ea miesuo ke ngeli. Egheghe ni u mholi nya, roḷi rieḷe onete.†

⁶ Ze ni ileṣingme o la ungmehi ni u wa ngme, u gbolo e ngme ingmemhi eni ee ti eso, eghẹghe agho ni u leṣe

emini u ya ke so shi oḡbọkpa ingme.

Otse ni o kpukhokho

⁷ ITakikosi o ya gue ingme eyemhe nya ye e. Egbegbi inyoghuo ni oo gbe akanya oyi Eshinegba te ode igesikia, ni mhi nono ingme oyoli o khi. Oni anye ga kugbe ee ga Onomhue o li khi.

⁸ Ni a ro leṣe abi anye li la o shi memena mhi ro ghie oḷi e ghi e, ali ni o gbo ri udu shi e o.‡

⁹ Loḷi ali Onesimusi mhi ga ghie e ghi e. Inyoghuo anye oni oo gbe akanya oyi Eshinegba te ode igesikia ni anye nono ingme oyoli o li khi. Onge eoli oye e o khi. E ya gueye e emini aa me oola nya.§

¹⁰ Arisitakusi ni anye ga la owa ighumha, oo tse e. IMaki ni loḷi ali iBanabasi e khi inyoghuo, ee tse e. Ini iMaki o bhale a kpe abo mie oḷi abi a li mhesẹ oḷi na e.*

¹¹ Ijesu ni akiseva oyoli o khi iḡositosi, o lie tse e. Eni eḡbo aase ena e khi eḡbo iJu tse eni e nu mhe e gbe akanya iri-ungmehi oyi Eghiele oyi Eshinegba ke kia gasẹ. Eri e ga ri egbe e mu mhe.

¹² Epafurasi ni o khi onge eoli oye e, ni o khi oni oo ga ijesu iKirisiti, o li tse e. Egheghe kpa o ro o do oḡbo elemhi iromhi isoso itobo oye e, ni a migha gbagbagba, ni a womhelo shi elemhi

‡ 3:25 Li ze iDeut 10.17; Efi 6.9 § 3:25 Li ze Efi 6.5-8 * 4:1 Li ze Efi 6.9 † 4:5

Li ze Efi 5.16 ‡ 4:8 Li ze Ika 20.4; 2 iTimo 4.12; Efi 6.21-22 § 4:9 Li ze iFile 10-12

* 4:10 Li ze Ika 19.29; 27.2; iFile 24; Ika 12.12,25; 13.13; 15.37-39

oghuemhe oyi Eshinegba. Ali ni a gbo mhọli ọli shi udu khi Eshinegba ọ ya rieḷe emini ọọ khi ọli ya rieḷe.†

¹³ Mhi pfi ọtseḷe na li khi ọ ma a gbe akanya egbegbo itobọ oye ẹ, ali ẹgbọ ni e miesuọ ni e la iLaodisha ali Erapolisi.

¹⁴ ILuku omọle anye ni ọ khi idokita, ali iDemasi ẹẹ tse ẹ.‡

¹⁵ A li nu mhe tse eni e miesuọ ni e la iLaodisha, ali iNifa ali igbaa oyi eni e mie iJesu iKirisiti suọ ni e la owa oyọli.

¹⁶ Ini a ze ebe ona se, a ze ni a li ze ọli ye igbaa oyi eni e mie iJesu iKirisiti suọ ni o la ẹoli iLaodisha. Zobẹ ni a li mie ẹgbọ iLaodisha ebe ni mhi keke ghi we li ze.

¹⁷ Gueye Achiposi khi mhiẹ ọli ọ roshẹka pfuse akanya ni Onomhue ọ ro nga li obọ gbe pfo.§

¹⁸ Mhemhe iPolu mhi ri ugba ma ebe ga keke otse ona ghi ẹ. A khi yele-a khi eri a so mhe igha. Okhale oyi Eshinegba o nu ẹ la.

† 4:12 Li ze iKolo 1.7; iFilẹ 23 ‡ 4:14 Li ze 2 iTimo 4.10,11; iFilẹ 24 § 4:17 Li ze iFilẹ 2

Ebe onodode ni iPōlu o keke ghi egbo iTēsalonia Eni e miesuo

1 Mhēmhe iPōlu ali iSalasi ali iTimoti anye ri ebe ona ghi ẹ igbaa oyi eni e mie iJesu iKirisiti suo ni o la eke iTēsalonika, ni e khi egbo eyi Ẹshinẹgba Ita awa ali iJesu iKirisiti Ọnọmhuẹ.

Okhale ali opfomhe oyi Ẹshinẹgba e ka nu ẹ la.

Angeli ali irudunga oyi egbo iTēsalonika

2 Anye maa tse Ẹshinẹgba uwegbe ẹghẹghẹ kpa shi itobo oyi ẹẹ nya, igho anye gbo lie teva ẹ elemhi iromhi isoso oyi anye.

3 Anye ma la odalo oyi Ẹshinẹgba oyawa ali Ita awa sato ikanya eyẹ ẹ ni iregbenga oyẹ ẹ, o rẹ ẹ gbe. Abi inono ni a mhuẹ na egbe ẹ o li rẹ ẹ toto obọ akanya, ali abi irudunga ni a mhuẹ na iKirisiti Ọnọmhuẹ o li migha.

4 Inyoghuo anye, anye lese khi Ẹshinẹgba o nono ingme oyẹ ẹ, o she gbo zẹ ẹ ni a khi egbo eyoli.

5 Irari khi eri anye ri usomhi onete bhale ghi ẹ. Oa khi ungmehi unu tse anye ro roli bhale, ama li rote elemhi ekpabo ali Ayemhe-no-pfuase. Anye li ri igesikia oyoli lo ẹ eso egbegbo. A lese abi anye li ngeli abi awa ro ga

la kugbe, irari ni o ro ti na ẹ anye ro ligho ngeli.

6 Áá khonya anye ali Ọnọmhuẹ abi o tseku khia khi a me osoli egbegbo, a ri oghẹle mie oni usomhi ni o rote Ayemhe-no-pfuase bhale.*

7 Itobo igho, eni khonya a ngeli a ke khi shi egbo ni e miesuo na eke iMasidonia ali Akhaya o.

8 Irari khi aa khi eri usomhi oyi Ọnọmhuẹ o lese rote ẹ unu fie lase ya je eke iMasidonia ali Akhaya tse, ama, iregbenga ni a mhuẹ na Ẹshinẹgba o she ramhi asha kpa. Itobo ona, anye a ke mhuẹ ingme olese ni anye ke ya ngme.

9 Egbo egho nya e ngme oli abi a li ri eloe e khu anye abi anye ro ku shi na ẹ. Ali abi a li tsua ikhumhi kua bhale deba Ẹshinẹgba, ni áá ga egbegbi oni Ẹshinẹgba ni o la o.

10 A gbo gueye anye abi a li migha a khe Omioli ni o rote iloghie ya bhale, ikhi iJesu ni o rote eghuli guise le, ni o mie awa pfuese ofu oyi Ẹshinẹgba ni o o bhale.

2

Ikanya eyi iPōlu elemhi eoli iTēsalonika

1 Inyoghuo anye eni emose ali eni ikpotso, ẹẹ a lese khi ifeli ni anye bhale ya feli ẹ, oa khi afue.

2 A lese abi anye li me osoli ni a li tsue anye obini eke iFilipi neni anye bhale deba ẹ eke iTēsalonika. Abi o tseku khia khi anye

* 1:6 Li zẹ Ika 17.5-9

mẹ ukpokpomhi ọzuodẹ, Ẹshinẹgba ọyawa ọ ri igbedu na anye ni anye kiele rue usomhi onete ni o rọte obọ oyọli bhale ghi ẹ.*

³ Olema ni anye lema ẹ ọa khi odẹ ni ọa gbe akanya, wẹkhi rọte usamhi ni ọa ti, wẹkhi eri anye e nono ni anye di ẹ.

⁴ Ochoghọ, eri anye a ngme abi Ẹshinẹgba ọọ anye li ngme. Irari khi ọ she bino anye shi ẹgbọ ni e nga obọ ni ọ ri oni usomhi onete ona a te obọ. Ọa khi eri anye rọshẹka ni anye ba ri egbe ke mu ẹgbọ, ama Ẹshinẹgba anye rọshẹka ri egbe a mu. Lọli ọ she bino isamhi udu eyi anye bie.

⁵ Ẹẹ a leşẹ khi ọa khi ingmemhi udimhi anye rọ bhale deba ẹ, wẹkhi eri anye ri ingmemhi ikokoalo ẹ guese ukpokọ. Ẹshinẹgba ọ khi ọtsẹlẹ oyi anye.

⁶ Ọa khi eri anye ẹ dua ni ẹẹ ukẹliẹ ọgbọese ọ kuẹghię anye, ukẹliẹ khi eri anye nono ọli obọ oyeẹ wẹ khi obọ oyi ẹgbọese.

Abi ighiusomhi na keẹ eyi iKirisiti, anye tẹ ọ ni anye kha mhila ẹ emhi obọ.

⁷ Ama abi anye rọ nu ẹ la, eri anye ku egbe a abi inyo ọ li ri ẹloe ẹ khu eniyẹ eyọli.

⁸ Itobọ inono ni anye mhue na ẹ, ọa khi usomhi onete oyi Ẹshinẹgba ona tşẹ anye leşẹ nono ni anye rọ ghi ẹ. Ama li shi agbọ oyi anye. Irari khi ingme oye ẹ o mu anye egbe

gba.

⁹ Inyoghuo, a ga sato abi anye toto obọ gbe ikanya ali ọmunu ni anye mẹ. Eri anye e gbe ikanya ogbeleş kpa, ini anye khi nase ọngeẹ abi anye li i gue usomhi onete oyi Ẹshinẹgba ye ẹ.

¹⁰ Ẹẹ ali Ẹshinẹgba a khi ọtsẹlẹ eyi anye, khi angeli oyi anye khi eri o pfuase, o ti, ọa mhue umhaguẹli abi anye rọ la ẹẹ eni e miesuo iteva.

¹¹ Anye riele deba ọgbogbo abi ita ọ li riele a deba ọmọ.

¹² Anye ye ẹ ude, anye yeşẹ ẹ, anye ri udu u shi ẹ ọ, ni a ke ngeli angeli ni o ri egbe a mu Ẹshinẹgba ni ọ lu ẹ, ni a mhue okemhi shi eghiele ali ufumhi onayi ọli.

¹³ Emhi olese ni o gbo ri anye a kuẹghię Ẹshinẹgba khi, abi anye rọ ri usomhi oyi Ẹshinẹgba bhale ghie ẹ, a suo a kpe abọ mie ọli. Aa mie ọli abi usomhi ọgbọ ama eri a mie ọli abi usomhi oyi Ẹshinẹgba ni o khia khi ighọ o khi. Irari khi ungmemhi oyi Ẹshinẹgba o la ẹ ni a miesuo egbe ẹ akanya.

¹⁴ Inyoghuo, eri a ga li abi igbaa nya eyi eni e mie iJesu iKirisiti suo eyi Ẹshinẹgba ni e la eke iJudia, ni e khi ẹgbọ eyi iJesu iKirisiti. Abi e li mẹ ajilimhẹ obọ oyi ẹgbọ iJu eyẹwẹ, ighọ a li li mẹ ajilimhẹ obọ oyi ẹgbọ eyẹ ẹ.†

¹⁵ Eni ẹgbọ ena, e gbe iJesu Ọnọmhue ali emekeguele-a. E tigbe khu anye ya fiẹ. E ma ri elemhi a bi Ẹshinẹgba. E khi

* 2:2 Li zẹ Ika 16.19-24; 17.1-9 † 2:14 Li zẹ Ika 17.5 ‡ 2:15 Li zẹ Ika 9.23,29; 13.45,50; 14.2,5,19; 17.5,13; 18.12

obe oḡbōkpa.‡

¹⁶ Eri e ga roshēka ni wewe e zu anye ode ini anye khi me asha gue usomhi oyi Eshineḡba ye eḡbo iJeta, ikhi ungmehi ni o ri imiesuo o ghi we. Ode ona e te buse olamhe ni ee lamhe-a. Mena, elemhi ibibi oyi Eshineḡba o she tiemhile shi we o.

IPolu o nono ni o gbo ya bino eḡbo iTēsalonika

¹⁷ Inyoghuo, abi a ro vase anye ali ee-a ukuku eḡheḡhe, (elemhi idiegbe o a khi us-amhi), eri eloli e o nga anye. Anye dua ini anye gbo me e.

¹⁸ Anye nono ni anye gbo deba e. Mhemhe oyemhe mhi dua ni mhi bhale iti-ingmingme, ama okphaghi e o zu anye ode.

¹⁹ Ini a bino o, ee a ze ni anye ro mholi irudushi ali oghelē, ni a gbo ze khi anye roḡ tono obō udu shi imuḡle ni anye ya mhu e odalo oyi iJesu, ini o bhale.

²⁰ Igesikia, ee a khi ititiegbe ali oghelē ni anye mholi.

3

¹ Abi anye ea ke ro doḡe ri egbe mie, anye ke bie ro shito obini eoli Ateni.*

² Loli o ze ni anye ro ghie iTimoti inyoghuo anye ni o nu anye e gbe akanya na Eshineḡba, ikhi akanya itse-abo usomhi onete oyi iKirisiti. Anye ghie oli ghi e ni o zese e-a, ni o gbo kpaghi e irudunga oyee obō,

³ ini onḡee o khi nyene egbe ukhokho irari ajilimhe enana. Ee oyee a lese khi ajilimhe eghogho e li la emini e ghole Eshineḡba khi awa ya me.

⁴ Irari khi abi anye ro nu e la, anye kpe gue oli ye e shi eke khi a ya mu okholi vule shi anye o, a lese khi igho o kie tse.

⁵ Loli o ze ni mhi ro ghie iTimoti. Itobo khi mhi a ke doḡe ri egbe mie, mhi ro ghie oli o bhale ya bino abi irudunga oyee o ke laḡ shi. Eri udu o nase mhe khi okphaghi e o doḡe ya mu e fe, o li abine khi akanya ni anye gbe nya e ya mele afue-a.

Emini o ri egbe e mu ni iTimoti o guele

⁶ Mena, iTimoti o she jele ya gue usomhi onete oyi irudunga ali inono oyee ye anye. O she gueye anye abi a lie sa usamhi onete oyi anye ali abi o li e ghole e ni a me anye, abi anye lie nono ni anye li me e.†

⁷ Itobo ona inyoghuo, irudunga oyee o she ri udu shi anye o, abi a ri e mu okholi vule shi anye o ni anye la osoli.

⁸ Eri ayemhe oyanye o mholi itije-odalo abi anye ro suo abi a li kie migha shi ikugbe ni ee ali Onomhu e a kugbe.

⁹ Mena see anye lie doḡe kphemhi na Eshineḡba shi oghelē ni a ro ghi anye?

* 3:1 Li ze Ika 17.15 † 3:6 Li ze Ika 18.5

10 Ni o gbe no bi anye rọ ri udu oyanye nya mhila li, ọ zẹ ni anye mẹ ẹ ẹlo e ni anye ri emini e kọ ẹ irudunga le na ẹ.

11 Eshinegba ọyawa ali Ita awa loli ghuo ali iJesu Onomhue e ka be ode na anye ni anye rọ bhale deba ẹ.

12 Onomhue ọ ka zẹ ni inono ni a mhue na egbe ẹ ali egbo kpa e ke fu shi ọ, ni o fu abi inono ni anye mhue na ẹ.

13 Ode ona ọ te ya zese ẹ udu-a, ni a khi eni e gba pfo, ni e pfuase shi odalo oyi Eshinegba ọyawa ali Ita awa, ini iJesu Onomhue ali eni e khi eyoli e bhale.

4

Angeli ni o ghole Eshinegba

1 Ni mhi rọ gbe ọli ukhomhi inyoghuo, anye e sese ẹ abi a li ya ke ngeli ni o ya ghole Eshinegba. A she ligho ọ ngeli. Mena anye ri eva oyi iJesu Onomhue gbo lema ẹ, a kie lina ke ngeli. A gbo khi ma ọ.

2 Irari khi a lese osese ni anye sese ẹ rọte afu ni iJesu Onomhue ọ rọ na anye.

3 Eri Eshinegba ọọ nono ni a re ẹ khi eni a khuese pfuase ni a pfi angeli itsebo shi eke,

4 khi omose ogbogbo ọ guẹ ri egbo li ke kia ọ gbo guẹ ngeli deba ughue-oli, ode ipfuase ali ekpe.

5 A khi mholi oghumhe oyi efiala ona itsebo deba egbe, abi eni ẹa lese Eshinegba ẹ li.

6 Emini a ngme ena khi, ogbokhoghuo ọ khi kia onuzava ọyoli ni e ga mie iKirisiti suo

okiengme. O khi li ọli le irari khi ọọ da ne ọli. Anye she kpe gue ona ye ẹ anye rọli tse agua ye ẹ khi Onomhue ọ ya na egbo eghoghọ osue.

7 Eshinegba ọa lu awa shi ikanya itsebo, ama eri ọ lu awa ni awa khi eni e pfuase.

8 Itobo ona, ogbo ni ọ da kie osese ona ne, ọa khi osese oyi ogbo ọ kie ama oyi Eshinegba ọ kie ni ọ ri Ayemhe-nọ-pfuase na awa.

9 Oa khi oni anye ya gbo keke ebe ghi ẹ, a nono ingme oyi eni e miesuo enabi ẹ. Irari khi Eshinegba loli ghuo ọ she sese ẹ abi a li ya nono ingme egbe ẹ.

10 Igesikia, igho a kie li ẹ ngeli deba inyoghuo ẹ ni e la eke iMasidonia. Irarigho, inyoghuo, anye lema ẹ a gbo khi ma oni angeli.

11 Roshaka la agbo ni o pfomhe. Ke mu alo shi akanya oye, u ri abo eye ẹ gbe akanya, abi anye kie kpe gueye ẹ.

12 Ini a da lina ne, o ya ri ekpe shi ẹ egbe odalo oyi egbo ni ẹa miesuo. Eghẹghẹ agho wa ya ri egbe da ogbo shi emini e to ẹ.

Inyenegbe bhale oyi Onomhue

13 A ghe i inyoghuo, anye ẹ nono ni a lese igesikia ni o la ingme oyi egbo ni e ghua, ini egbe e khi pfo ẹ-a abi egbo ni ẹa mhue irudushi

14 Irari khi ini awa miesuo khi iJesu ọọ ghu-a ọ gbo guale. Awa li miesuo khi ini Eshinegba ọ rue iJesu nyene ẹ bhale, ọ ya li rue eni e mholi

irudunga shi iJesu o ramhi ni e ro ghua, ma li egbe bhale.

¹⁵ Osese ni anye e sese e ena, osese oyi Onomhue lo. Awa ni awa la agbo awa aa ya ralo na eni e ghu-a, ele ni Onomhue o ya bhale.

¹⁶ A ya mhesse leghe, uruli oyi agheni ni o kpeda nya o pfi leghe, a pfi akala oyi Eshinegba. Onomhue o ya rote iloghie tiemhile irarogbe. Egb o ni e ri udu nga iKirisiti ramhi ni e ro ghua, e kpe ya guale bhale agbo.

¹⁷ Awa ni awa la agbo oni egheshe, a tigbe rue awa nga idane vui, ya ma we egbe deba Onomhue irarogbe elemhi otughunu. Igho awa ke lie nu Onomhue la agboagbo.*

¹⁸ Irarigho, a ri ingmemhi ena ke ri udu shi egbe e o.

5

A mu egbe khe ibhale oyi Onomhue

¹ Inyoghuo, o a khi oni a ke gbolo e kেকে ebe ghi e shi ingme egheshe ali oni ogbele ni a ya me ingme enana nya.

² Irari khi esse oyese a ga lese egbegbo khi ogbele iguezo oyi Onomhue eri o ya li abi oghiato o lie bhale eliyose.*

³ Ini egbo e da lie. "Emhikpa o she pfomhe, ingme okhoghuo o a ke la o ne." Egheshe agho opfuse o ro ya de rughu we. Eri o ya bhale udemhija abi oku o lie to okpotso. Egb o a ya pfue oni iguezo.

⁴ Ama ese inyoghuo aa la alo ebili nabi oni ogbele o ya bhale guo shi o abi oghiato.

⁵ Irari khi esse nya egbo ni e khi eyi akpa a khi. Eyi ele oguota a khi. Awa a khi egbo na eliyose wekhi egbo alo ebili.

⁶ Itobo igho awa khi ke lese abi egboese, a bino angeli bie ke ngeli, aa ke tokpe.

⁷ Eliyose egbo e ro lese, eliyose onyo o ro gbe egbo.

⁸ Aborokhia khi egbo ena ele oguota awa khi egho, awa bino angeli bie ke ngeli. Awa mema ya ri irudunga ali inono so abi awulu akhuli ni okholi-okhue o ro mu aye, awa ri irudushi oyi imiefuese rughu abi arula akhuli ni okholi-okhue o ro rughu.†

⁹ Irari khi Eshinegba o a ze awa shi eni a ya pfuse-a, ama eni iJesu iKirisiti Onomhue o ya mie pfuese.

¹⁰ Eri o ghu-a na awa, ni awa nu oli la, awa la agbo o, okekhi ini awa ghua.

¹¹ Itobo ona, awa ri udu shi egbe awa o, awa a kpaghie egbe awa ob o, abi a kiele e li ena.

Ungmemhi ali otse ni e kpukhokho

¹² A ghe ii, anye lema e inyoghuo, a ze ni a ke mu ekpe na eni e totobo o gbe akanya egbegbo ifuabo oyese, ni esse e ode ni a te ya khi eni e miesuo.

¹³ A ga ri ekpe ali inono onofune ke na we, itobo

* 4:17 Li ze 1 iKori 15.51-52 * 5:2 Li ze iMat 24.43; iLuk 12.39; 2 iPit 3.10 † 5:8 Li ze Aza 59.17; Efi 6.13-17

akanya ni ɛɛ gbe. A nu egbe ɛ ɛ ngeli angeli opfɔmhɛ.

¹⁴ Anye gbo lema ɛ inyɔghuo, a ke tse agua ye ɛgbɔ ɔlɛmhɛ. Àá ye eni ulishi ɔɔ mu ude. Àá kpaghiɛ eni ɛa mhuɛ ekpabɔ obɔ. Á mhuɛ irabɔmudu ke deba ɔgbɔkpa.

¹⁵ A khi zɛ ni ɔgbɔ ɔ ri onobe fata onobe, ama ɛghɛghɛ kpa a zɛ ni a rɔshɛka ke riɛlɛ onete na egbe ɛ ali ɔgbɔkpa.

¹⁶ Egbe e ke mu ɛ ɛghɛghɛ kpa.

¹⁷ Aa sɔ iromhi ɛghɛghɛ kpa.

¹⁸ A ke tsɛ uwegbe shi emiemini a mɛ kpa. Ona o khi emini Ɛshinɛgba ɔɔ nono obɔ oyɛɛ, abi yɛyɛ ali iJesu iKirisiti a rɔ ga kugbe eghɔ.

¹⁹ Khi ke pfuse erali Ayɛmhɛ-nɔ-pfuasɛ a.

²⁰ A khi ri ɛloe gbe ungmemhi imekɛguele.

²¹ A ke mu emhikpa fɛ bino, à rue onete ni o laɔ.

²² Ti egbe emhi obe nya le.

²³ Ɛshinɛgba lɔlighuo ni ɔ khi Ɛshinɛgba ɔna opfɔmhɛ, ɔ ka rɛ khi ɔni ɔ pfuasɛ ode khi ode. Ɔ ri yɛyɛ nya, ghe ayɛmhɛ ali agbɔ ali idiegbe eyɛ khi eni e gba pfo ni ɛa mhɔli umha-guɛkia, ya ramhi ɛghɛghɛ ni iJesu iKirisiti ɔyawa ɔ rɔ ya bhale.

²⁴ Lɔli ni ɔ lu ɛ, ɔ ya riɛlɛ ɔli, irari khi ɔni ɔ zɛ ri egbe ɛ nga ɔ khi.

²⁵ A ke sɔ iromhi na anye inyɔghuo.

²⁶ A ke tsɛ ɛgbɔ ni e miesuo egbegbi otɛ, a ghɛlɛ ɛ mu wɛ.

²⁷ Mhi ri afu ni mhi mhuɛ obɔ oyi Ɔnɔmhue lema ɛ, a zɛ oni ebe ona khase ɛgbɔ ni e miesuo nya.

²⁸ Okhale oyi iJesu iKirisiti Ɔnɔmhue ɔyawa o ka nu ɛ la.

Ebe onuzi-eva ni iPōlu o keke ghi egbo ITēsalonia Eni e miesuo

¹ Mhēmhē iPōlu ali iSalasi ali iTimoti anye ri ebe ona ghi igbaa oyi eni e mie iJesu iKirisiti suo ni o la eke iTēsalonika, ni e khi egbo eyi Eshinēgba Ita awa ali iJesu iKirisiti Onomhūe.*

² Mhi lema Eshinēgba Ita awa ali iJesu iKirisiti Onomhūe e mhūe isomhelemhi na ẹ, e ri opfomhē na ẹ.

Ikpēmhi ali Iromhi isosọ

³ Inyoghūo, anye mema ya ke tse Eshinēgba uwegbe na ẹ egheghe kpa. O ti ni anye ke ligho, irari khi irudunga oye ẹ ọọ fu sho egheghe kpa. Inono ni a mhūe na egbe ọọ fu sho.

⁴ Lōli o zẹ ni anye rọ rẹ ẹ la iteva igbaa nya eyi eni e mie iJesu iKirisiti suo eyi Eshinēgba a neta omose. Eri anye rẹ ẹ neta omose itobo abi a li dobe ri obọ mu udu migha irudunga oye ẹ elemhi okhōli ali imufe nya ni a mu vule shi ẹ ọ.

⁵ Enana nya e rọkhasẹ khi ezọ oyi Eshinēgba o migha shi ipfuase. Itobo igho Eshinēgba ọ ya leli ẹ shi eni e tẹ ọ, ni e ya lo iloghie oyoli ni a mē osoli ẹ shi.

⁶ Eshinēgba ọa ya gbe azẹba, ọ ya ri osoli fali eni e na ẹ osue ota.

⁷ Ọ ya ri iyēmhẹa na ẹ ẹ ni a mē osue, ọ gbo li ri oni iyēmhẹa na anye. Ọ ya ri ẹle ona ini iJesu Onomhūe ọ da feli lasele shi idane elemhi avuere, lōli ali igeni eniemhi eyoli.

⁸ Ọ ya na egbo ni ẹa lẹse Eshinēgba osue, ali eni ẹa ri usomhi onete oyi iJesu Onomhūe gbe akanya.

⁹ E ya mē osue. E ghu tiemhi ilimhi iri ẹrẹ. A rue wẹ odalo oyi Onomhūe ali ufumhi oniemhi oyoli le.†

¹⁰ E ẹ ni a ya mē ona khi, ogbẹle ni Onomhūe ọ ya bhale, ni eni e ri udu nga li e ri ikueghie ali ekpe na li. Li shi ẹ ẹ lẹ, itobo khi a she mie ungmemhi ni anye gueye ẹ suo.

¹¹ Lōli o zẹ ni anye rọ ọ so iromhi na ẹ, Eshinēgba ọ zẹ ni a li khi eni e ya la agbo ni ọọ ghole ọli. Ali ọ ri ekpabo eyoli ri ugbamhi onete ni a mhōli bhale ya tse na ẹ, li shi onete ni irudunga oye ẹ o rẹ ẹ ri ẹle.

¹² Itobo okhale oyi Eshinēgba oyawa ali oyi iJesu iKirisiti Onomhūe oyawa, a ya rue ufumhi ghi eva oyi iJesu Onomhūe oyawa, ọ li ri ufumhi ghi ẹ.

2

Ona okhōlo

¹ Inyoghūo, ingme ibhale oyi iJesu iKirisiti Onomhūe oyawa, ali abi awa li ya kuma li egbe,*

² a khi zẹ ni usamhi oye ẹ o nyanya ghagha ku ni a yila. Ini ogbokhoghūo ọ riri ẹ khi

* 1:1 Li zẹ Ika 17.1 † 1:9 Li zẹ Aza 2.10

* 2:1 Li zẹ 1 iTesa 4.15-17

imeke loli me, okekhi usomhi ona ke o guele, okekhi eri o o khi ebe ni anye keke ghi loli lue rote ze oli khi ogbele oyi Onomhue o she bhale,

3 a khi ze ni ogbokhoghuo o te ode okhoghuo di e. Irari khi oni ogbele o ya bhale ini aa li me ukpokpomhi imuokhuevule shi Eshinegba o ali ini ona umhasuo-eso ni o khi ogbo o be o ya li feli lase gboo, ikhi oni a mhese owa ere na.

4 O ya mu okholi vule shi emhikpa ni egbo e lu Eshinegba, ilitsa ali emhikpa ni egbo ee ga o, o ri egboli fu dose we nya. O gbo ga vu ya shito Owa oyi Eshinegba oyi Eshinegba oo lie khi loli ke khi Eshinegba.†

5 Aa ke sato khi mhi gue ingme ena nya ye e abi mhi ro nu e la?

6 Ee a lese emini o ze khi aa roli lasele khase ne, ini egheghe oyi ona okholo ona o da ramhi, a ya roli lasele khase.

7 Ama eni ikhiakhiamhi ekpabo okholo ena e she bele e gbe ikanya eyewe, ama oni o mu oli gbaga. Ama oni ona okholo o ya feli lasele ini oni o mu oli gbaga o ya li lase ode-a.

8 Egheghe agho a ya ri ona okholo khase, oni iJesu Onomhue o ya ri ungmehi ni o rote oli unu lasele pfuse-a. Ugemhi oyoli ini o nyene egbe bhale o ya ga pfuse oli-anya.‡

9 Ona okholo ona, o ya ri ekpabo oyi Okphaghiye bhale, oo

gbe onyaloa egbhue ali oshabo ododa.§

10 O ri udimhi ododa ni e kholo di egbo ni ee pfua. E ya pfua irari khi ea lama mie wekhi eri e nono igesikia, ni o kha mie we pfuese.

11 Itobo igho, Eshinegba o ro ghie ayemhe egbholi ghi we, ni ee ro mie emini e khi egbholi suo.

12 A ya pfa ezoo mu ogbo ni o da mie igesikia suo ne, ni o da mhue oghuemhe shi olamhe.

A migha gbagbagba

13 Anye mema ya ke tse Eshinegba uwegbe egheghe kpa na e, inyoghuo ni Onomhue o nono. Irari khi ee Eshinegba o kpe ze ni a ya mie pfuese. Ayemhe oyoli o ree khi eni e pfuse, ali eni e mie igesikia suo.

14 Rote usomhi onete oyanye, Eshinegba o te lu e shi ona. Eri o lu e ni a ro mhue okemhi shi ufumhi oyi iJesu iKirisiti Onomhue oyawa.

15 Irarigho, inyoghuo, a migha gbagbagba, a mu eni igesikia ni anye sese e mhue abi anye rote itsabo ali elemhi ebe ni anye keke gue oli ye e.

16 IJesu iKirisiti Onomhue oyawa lueghuo ali Eshinegba Itawa ni o nono ingme oyawa, ni o rote okhale oyoli ri udu shi awa o, ni o gbo ri irudushi ni o ya ya nighise na awa,

17 e ka ri udu shi e o, e gbo zese e a shi ikanya ali ingmemhi enete.

† 2:4 Li ze iDan 11.36; Ezik 28.2 ‡ 2:8 Li ze Aza 11.4 § 2:9 Li ze iMat 24.24

3

IPoſu oſo, a so iromhi na wewe

¹ Ni mhi ro gbe oſi ukhomhi inyoghuo, a ke so iromhi na anye. A so iromhi ni ungmehi oyi Onomhue o nyanya ke ga aſha kpa, ni egbo e gbo mie oſi, ni e ri ufumhi ke ghi Eſhinegba, abi a li mie oſi abi o ro la e iteva.

² A gbo ke so iromhi Eſhinegba o rue anye obo oyi egbo ebe ali ena okholo laſele, irari khi o a khi ogbokpa o miesuo.

³ Ama oni a ri egbe e nga Onomhue o khi. O ya ri itoto na e o khukhu e obo oyi ona okholo.

⁴ Anye regbenga Onomhue khi a ri ele ali khi a kiele e ke ri ele emini anye se se e.

⁵ Mhi lema, Onomhue o ka udu oyee le se inono ni o fune ni Eſhinegba o mhue ali ni iKirisiti o re se migha egbegbo.

Ogbogbo o ke gbe akanya

⁶ Inyoghuo, anye ri eva oyi iJesu iKirisiti Onomhue oyawa mhe se na e, a ti kia na inyoghuo okhoghuo ni o la agbo owaza ni o a ya deba ose se ni anye e se se e.

⁷ Ee oyee a le se khi o ti ni a ke li abi anye e li. Anye e a li owaza abi anye ro nu e la,

⁸ wekhi eri anye mie ogbokhoghuo emhi le ni anye a fal i ota shi. Eri anye ri ochogh o gbe akanya, ofo o ta anye ghe ele oguota ali ele iyose, ini anye khi ya khi itsua na ongete tsua.

⁹ Oa khi itobo khi anye e a te eni e mhila e ikpaghiobo, anye ro ligho ngeli. Eri anye ligho, ni anye khi irokhokho ni aa ke deba.

¹⁰ Abi anye ro nu e la, anye gueye e khi, "Ogbo ni o a lama gbe akanya o khi le eminale."

¹¹ Eri anye ngme ona itobo khi anye suo khi egbo eghuo e la e iteva ni e a lama gbe akanya, ni e a ya li emhikhoghuo ama ikanya eyi egbo elese ee sono unu ke pfueche-a.

¹² Anye ri eva oyi iJesu iKirisiti Onomhue mhe se na egbo eghogh o, anye gbo tse agua yewe e ke ngeli angeli ni o te ode. E ke gbe akanya ni e te me emhi ya ke le.

¹³ Ama ee inyoghuo a khi ze ni onete iriele o susu e.

¹⁴ Ini ogbokhoghuo o la o ni o a ya ri omhe se ni a keke shi ebe ona gbe akanya, a lolo to ogbo oghogho okpe. A khi kugbe ogbo oghogho o, ni omama o mu oſi.

¹⁵ Ama a khi ngeli deba li abi o be e, ama a ri ochogh o tse agua ye oſi abi inyoghuo.

Ingmehi ni e kpe ukhokho

¹⁶ Onomhue lueghuo ni o khi ode ofomhe oyawa o ka ri ofomhe na e eghenge kpa ali ode khi ode. Onomhue o ka nu e la.

¹⁷ Mhemhe iPoſu mhi ri obo oyemhe keke ebe ona ghi e. Mhi tse e. Ina mhi lie keke eva oyemhe shi ebe ni mhi keke kpa. Ina mhi lie keke ebe.

¹⁸ Okhale oyi iJesu iKirisiti oyawa o ka nu e la nya.

Ebe onodode ni iPọlu o kekẹ ghi ITimoti

1 Mhẹmhẹ iPọlu aghiu-somhi na kekẹ oyi iJesu iKirisiti, rọte omhẹsẹ oyi Ẹshinẹgba ni o mie awa pfuese ali iJesu iKirisiti ni o khi irudushi oyawa.

2 Mhẹmhẹ mhi kekẹ ebe ona ghi iTimoti, ni o khi egbegbi omimhẹ elemhi imiesuọ, okhale ali ilẹlemhi ali opfomhẹ enayi Ẹshinẹgba e ka khi eye.*

Mhue ẹgbhẹ shi ena osesẹ ẹgbhọli egbe

3 Mhia nono ni u la ẹoli Efesọsi abi mhi kie kpẹ gueye abi mhi rọ lẹẹ iMasidonia, ni u mẹ asha gueye ẹgbọ eghuo ni e la oobọ o sẹsẹ osesẹ ẹgbhọli e mu migha.

4 Gueye wẹ, e tsua okhẹ igbaekẹle oyi ẹgbọ enẹde ali ida-ẹchẹ ku-a ni o khia khi ekhako o lẹsẹ rọọ bhale, ẹa ya kpaghiẹ akanya oyi Ẹshinẹgba ni o rọte irudunga bhale obọ.

5 Emini o zẹ ni a rọ mhẹsẹ omhẹsẹ ona khi, ni a rọ guise inono, ni o rọte udu no pfuase bhale le, ali oni o rọte udu-onete ni o gue ọgbọ ẹzọ ali egbegbi irudunga bhale.

6 Ẹgbọ eghuo e she rọte enana lasẹle, nyenẹ egbe je ingmemhi afuẹ.

7 Ẹẹ nono ni wẹwẹ e khi esesẹ Ishi eyi iMosisi eyi Ẹshinẹgba, ama ẹa lẹsẹ emini ẹ

ngme wẹkhi eri e lẹsẹ emini e ri itoto gẹ ma gue gagaga.

8 Awa lẹsẹ khi ushi o ti ini awa guẹ deba li abi awa khalii.

9 Awa lẹsẹ khi ọa khi itobọ ẹgbọ enete a rọ shi ushi, ama itobọ ẹgbọ ni ẹẹ gbe ushi-a ali ighiatọ ali eni ẹa mhue ulishi Ẹshinẹgba ali ena olamhẹ, ali ẹgbọ ni ẹa lẹsẹ ugamhi, ni ẹa mu ekpẹ ẹ na emhi eyi Ẹshinẹgba, ali ẹgbọ ni ẹẹ gbe itawẹ ali inyewẹ-a, ali ẹgbọ ni ẹẹ gbe ugbeli.

10 A shi ushi na ẹgbọ okia ali eni nu emose nabi wẹwẹ ali ikpotso nabi wẹwẹ ẹẹ gbhẹ, ali ẹgbọ ni e muno ẹgbọ o de, ali ẹgbọ ni ẹ lo ẹgbhue ali eni ẹẹ pfi ọtselẹ ẹgbhue, ali emhi elese ni ẹa de shi egbegbi osesẹ,

11 ni o khi osesẹ ni o de shi usomhi onete oni o mhọli ufumhi oyi Ẹshinẹgba, ni o mhọli ikhivose ni a rọ nga mhẹ obọ.

Ikpemhi shi ilẹlemhi oyi Ẹshinẹgba

12 Mhi kpemhi na iJesu iKirisiti Onomhue oyawa ni o ri itoto na mhẹ, ni o mẹ khi mhi tẹ o ni o rọ zẹ mhẹ shi akanya oyọli.

13 Abi o tseku khia khi ẹghẹghẹ ni o dosẹ khi mhi pfi unu-a deba Ẹshinẹgba, ali ni mhi i jili ẹgbọ ni e miesuọ, ni mhi nu wẹ khọli, ọọ mhọli ilẹlemhi na mhẹ irari khi umhalẹsẹ ali umha miesuọ o remhẹ li ghọ.†

* 1:2 Li zẹ Ika 16.1 † 1:13 Li zẹ Ika 8.3; 9.4-5

14 Onomhue oyawa o ya tutu okhale ku mhe. O ri irudunga ali inono na mhe ni e khi eyawa irari ikugbe ni awa ali iJesu iKirisiti awa kugbe.

15 Egbegbi ungmehi na, ni awa kha mie shi nya, khi eri iJesu iKirisiti o bhale agbo ya tsumhi ena olamhe, ni o khia khi mhemhe mhi ga kholo ne nya.

16 Ama eri Eshinegba o mhue ilelemhi na mhemhe ni o kholo ne ena olamhe nya, ni a ro bhale ya e khi irabomudu oniemhi ni iJesu o mhue na mhe o khi irokhocho shi egbo ni e ke ya mie oli suo o, ali eni e ya mhue agbo na agboagbo.

17 Ekpe ali ufumhi o khi oyi Oghie na agboagbo, ni o ya ya ghu, ni aa ya me, Eshinegba ni o khi oghuo kpe, rote agboagbo ya je agboagbo! Atse.

18 Yeye iTimoti omimhe, ena e khi omheshe ni mhi ro ne, ni e de shi abi a li me eke shi e egbe egheghe ni o dose. Ke ri omheshe ena gbe akanya, irari khi itsua-okhue e khi ne, ni u ro dobe ya kholi okholi onete,

19 kie mu irudunga oye ali udu onete ni o gue ogbo ez oye mhue. Egb oghuo ni ea ke ri ele emini udu onete ni o gue ogbo ez oye we o gueye we e ri ele, eri irudunga oye we o de guogh o-a abi oko-oke oniemhi.

20 Egb oenabi eghogh o iManiusi ali Alezada e khi, ni mhi wol o abo na okphaghi ni o sese we ingme, ini e khi

ke ngme ungmehi ipfiununa deba Eshinegba.

2

Ugamhi igbaa oyi eni e mie iJesu iKirisiti suo

1 Mhi gueye e, a kpe te odode so iromhi na egbo kpa. Abi u lie gue emini e to e le, lema Eshinegba shi ilelemhi na we, u kphemhi na Eshinegba na we.

2 U li so iromhi na enighie ali eni ee mheshe ni awa, ni e ro dobe ke la agbo na tsuke ali opfomhe, elemhi ekpe oyi Eshinegba rote igue-ngeli.

3 Ona oo ti, o ma ri egbe a mu Eshinegba otsumhi oyawa.

4 Ni o o nono ni ogbokpa o mholi imiepfuese, ni o gbo lese igesikia.

5 Irari khi Eshinegba oghuo o lao, ali omigha iteva ogbo ali Eshinegba oghuo, omose ni a lu iJesu iKirisiti.

6 Ni o ri egboli bhale shi otoeloli, ni o ro mie egbo nya pfuese. Ona o khi usomhi ni Eshinegba o nono ni loli gueye ogbokpa ni o gue de shi egheghe oyoli.

7 Ona o ze ni a ro ghie mhe abi aghiusomhi na ke ni iKirisiti o ze ali osese oyi iJeta ni mhi ro gue usomhi irudunga ali igesikia le. A khi egbhue mhia lo, igesikia mhia guele.*

8 Ini a ye ugamhi, mhia nono ni emose e tsua abo eke shi iromhi isoso ni o mhue elemhi ibibi wekhi ekhako.

* 2:7 Li ze 2 iTimo 1.11

⁹ Mhi lili ẹ nono ni eni ikpotso e guẹ ke sọ itsua ni e gbe akanya, a khi khuẹ akhuẹ abamemhẹ, wẹkhi iẹ-itsu dọlọdọlọ shi ukhomhi, wẹkhi iri-igolu khuẹ akhuẹ ali ifẹfẹ isọsọ wẹkhi itsua ni e lolo ghalẹ isọsọ.†

¹⁰ Ama e ke gbe ikanya enete, ni o ye ni ikpotso ni ẹẹ khi wẹwẹ a ga Ẹshinegba ẹ gbe.

¹¹ Ikpotso e ke ri iregbe-tiemhile ke ku esọ-a wẹna.

¹² Mhi aa zẹ ọkpotso ni ọ sẹsẹ, wẹ khi eri ọ ya mhue omhẹsẹ shi emọse ukhomhi. Ọ ke tsaghie-a.

¹³ Itobọ khi Adamu a kpe ma neni a ma Ivu.‡

¹⁴ Ọa khi Adamu ọkphaghie ọ di, ama ọkpotso a di ni ọ gbe ushi oyi Ẹshinegba-a.§

¹⁵ Ama a ya tsumhi ọkpotso rọte eniyẹ ibiabia, ini ọ kiele ẹ deba irudunga ali inono ali ipfuaş, ni ọ rọ mu ekpe shi egbọli egbe.

3

Eni ẹ mhẹsẹ elemhi igbaa oyi eni e mie iJesu iKirisiti suọ.

¹ Oni ungmehi ona oo gbe akanya gba. Ini ọgbọ ọọ nono ni lọli khi ọni ọ ri ẹloe ẹ khu ẹgbọ eyi Ẹshinegba, eminete lọ ni o ghọle ọli.

² Ọni ọ ri ẹloe a khu eni e miesuọ ọ mema ya khi ọgbọ ni ọ fu dọsẹ umhaguẹli, ọ khi ọdọ ọkpotso ọghuo, ọ mhue ikuegbe-a, ọ mu ekpe shi egbọli egbe, ọ khi ọni a mu ekpe a na, ọ mema ya ke kpe

abọ mie epfese lo apfẹ oyọli le, ọ mema ya dọbẹ ke sẹsẹ osẹsẹ.

³ Ọ khi khi ọdonyọ, wẹ ọgbọ okhọli, ama ọ pfomhẹ, ọ khi khi ọgbọ uwola, ọ khi nono ingme ukpaghọ dọsẹ.

⁴ Ọ mema khi ọni ọ guẹ ri ẹloe ẹ khu ọmhue-apfẹ oyọli. Ọ khi ọni imiọli e mu ekpe ẹ na, ẹẹ suọ esọ na li egbegbọ.

⁵ Itobọ khi ini ọgbọ ọa guẹ ri ẹloe ẹ khu ọmhue-apfẹ oyọli, se ọli ya dọbẹ ri ẹloe khu igbaa oyi eni e mie iJesu iKirisiti suọ?

⁶ Ọ khi khi ọni ọ lẹsẹ miesuọ ni odẹ ọa nuẹ ne ini ititiegbe e khi vọ li egbe ni ọ tigbe ya de pfilo epfua nabi ọkphaghie ọ de pfilo.

⁷ Ọ mema khi ọgbọ ni ọ mhọli eva onete iteva oyi ena edato, ini ọ khi yeghẹ-a ni ọ de ya pfilo igha ọkphaghie.*

⁸ Eni ẹẹ kpaghie elemhi owa ugamhi, e khi ẹgbọ ni a mu ekpe ẹ na, e khi ẹgbọ ni a ri egbe ẹ nga. E khi khi eni e da onyọ ọ dọsẹ wẹkhi eni ẹẹ li oyamhi ukpaghọ.

⁹ E ri udu-onete ni ọọ gue ọgbọ ẹzọ mu igesikia ni a rọkhasẹ ni e la irudunga mhue.

¹⁰ A kpe mu wẹ fẹ bino, ini o khia khi e gue gbe, a tigbe zẹ wẹ obọ ọ gbe akanya ọni ọọ ga.

¹¹ Ighuẹwẹ e mema ya mhue ingeli enete. E khi khi eni ẹẹ le ẹgbọ itsa uruli kiakia, e mhọli ayemhẹ ni o pfomhẹ, e khi eni a ri egbe ẹ nga shi emhikpa.

† 2:9 Li zẹ 1 iPit 3.3 ‡ 2:13 Li zẹ Igbae 2.7,21-22 § 2:14 Li zẹ Igbae 3.1-6 * 3:7 Li zẹ iTato 1.6-9

12 Omoşe okpoghiobo o mema ya khi oni o rue okpotso oghuo shi, o khi oni o gue e seşe eniye eyoli ode, o gue ri ukpeloe a khu omhue-apfe oyoli.

13 Ekpaghie-obo eni e gue ga, e she roli mie ashini o mu eloe, ali e doşe ri igbedu e ngme ingme oyi irudunga oyi iJesu iKirisiti ni e mhue.

Osheli ni o la irudunga oyawa

14 Aboriekhia khi mhi ririe mholi oli shi udu khi mhi ya kelę bhale ya bine, mhi ro kie keke eni omheşe ena ghi e. Eghęghę agho ni a bhale ya e khi,

15 ini o khia khi mhi teşe deşe, ebe ona o ya seşe e abi o ti ni egbo e li ke ngeli elemhi omhue-apfe oyi Eshinegba, ni o khi igbaa oyi eni e mie iJesu iKirisiti suo oyi Eshinegba ni o la agbo. Ikhi igbaa oyi eni e mie iJesu iKirisiti suo ni o khi oche ali irogbekę ni a ma igesikia nga.

16 Igesikia ni o la osheli oniemi ni o la irudunga oyawa o fu doşe oni oghokhoghuo o mhue ekhako e shi.

IJesu o bhale agbo abi ogho,
Ayemhe o roli khase
khi o ghole Eshinegba,

igeni e me oli
A roli tşe abo gase
ushishi nya,

egbo e mie oli suo
elemhi agbo nya
a rue oli nga iloghie.

4

Ena Osese egbholi

1 Ayemhe o guele gboo khi, ikpukhokho agbo, egbo eghuo e ya tsua irudunga pfi-a. E deba iyemhe ni ee di agbo, ee deba osese ni ayemhe okphaghie e tsua lasele.

2 Osese eghoghō, obo oyi elo-egbhue ena ikokoalo e te e bhale, eni udu-onete ni o gue ogho ezō oyewe o she ghua dishi.

3 Egbo eghoghō e seşe egbo e khi rue okpotso, eni ikpotso e khi ye ughue, e gueye we e khi ke le eminale eghuo. Ama eri Eshinegba o ma eminale eghoghō, eni e miesuo ni e leşe igesikia e ke ri ikphemhi mie we le.

4 Emhikpa ni Eshinegba o ma o ti, a khi me emini a kie, ama a ke ri ikphemhi mie emhikpa.

5 Irari khi ungmehi oyi Eshinegba ali iromhi isoso a ro rewe e shi eni e pfuase.

6 Ini u ri oni omheşe ona na eni e miesuo, u ya khi oni o gue gbe akanya ugamhi oyi iJesu iKirisiti, ni a kuęle vule rote igesikia na irudunga ali osese enete ni u wa deba.

7 Khi mholi emini u ri okhe oyi egbo neşe, ali okhe ikpotso egbhali e rieleş. Ke ngeli rieleş oghuemhe oyi Eshinegba.

8 Inisegbe-a o mholi ukuku eminete ni o rieleş a na ogho, ama ni a ro suo esō na Eshinegba, eri o ti odekhode, itobo khi o mholi ishobo na awa memena ali agbo ni o ke e bhale.

⁹ Ungmemhi igesikia na ni o ti ni a mieshi, ni a gbo lama shi o.

¹⁰ Onana o ri anye roshaka a gbe akanya egbegbo, irari khi awa she ri irudushi oyawa shi Eshinegba obo, oni o lao ni o khi Omiepfuese oyi ogbokpa, eni e miesuo kpaashi.

¹¹ Mhese, u gbo sese ena nya.

¹² Khi ze ni ogbokhoghuo o ri eloe gbe e irari khi ozele u khi, ama rote ungmehi oye, ali agbo oye, ali inono oye, elemhi irudunga ali ipfuase oye khili irokhasa na eni e miesuo.

¹³ Ya ramhi eghenge ni mhi ro ya bhale, ri eloe shi o kie ke ze Ebe-no-pfuase khasa igbaa, u kie le e tse-abo oni ungmehi, wa sese we.

¹⁴ Khi ri obo gbe isomhopfa ni Eshinegba o ro ne nye. Oni a ro ne abi a ro mekeguele shi e egbe ali abi eni egbhali e ro ri abo nge egbe.

¹⁵ Ke ri eloe shi eni emhi ena egbegbo, u ri egbe e na we pfo ni egbo nya e ke me ijeodalalo oye.

¹⁶ Ri eloe shi egbe e egbe ali osese oye. Kie ke riela emhi ena, irari khi ini u wa ligo u ya tsumhi egbe e ali eni e suo e.

5

Abi ee a ke li esamhi-olimhi, ali egbhali ali ighumha

¹ Khi dese ogbhali, ri ipfome uruli nu oli ngme abine khi ite o khi. Ke

riela deba ozele abine khi inyoghua e u ngeli e deba.

² U riela deba ikpotso eni egbhali abine khi inye e khi. Ke ngeli deba ozele ikpotso abi inyoghue ni ikpotso.

³ Khi ri eloe gbe esamhi-olimhi ni e khi esamhi-olimhi egbegbo, ni e mhola otomhe.

⁴ Ini oni osamhi-olimhi o bia eniye, o ke khia khi o mhue imimi, eni eniye e kpe ke ri emini e wena imiesuo gbe akanya, abi e li ri eloe e khu omhue-apfe oyewe. Ini e lina, eri e feli eni e bia we ali itita we egho, irari khi onana o ma ri egbe a mu Eshinegba.

⁵ Oni o khi osamhi-olimhi igesikia ni o ke ye ughue, ni lighuo o la, o she regbenga Eshinegba, o so iromhi e mhila li ikpaghiobo obo, elogwota ali ele iyose.

⁶ Ama osamhi-olimhi ni o ri egboli shi aruele agbo, o she ghu-a ini ayemhe oyoli o kie tseku lao.

⁷ Mhese enana na we ini a khi me gue shi we egbe.

⁸ Irari khi ini ogbo o a ri ukpeloe khu ena omhue-apfe oyoli, tete imi oli ali ughue oli, o she kie oni irudunga. O kholo dose oni o miesuo.

⁹ Khi keke eva oyi osamhi-olimhi kuma eva eyi esamhi-olimhi se ni o she dose ikpe egbhuese, oni o khia khi utoghua-kpe o kpe lese ye ughue.

¹⁰ O khi oni a suo eko shi ikanya enete, okpotso ni o gue kuela imioli. Ni o mie epfese e shi owa. O gue a gbe ikanya deba eni e miesuo, ni

oƣo kpaghie ẹgbọ ni e la ọmunu obọ ni o ri ẹgbọli shi onete ọdoda iriele.

11 Ama khi ri eva oyi ozele esamhi-olimhi shi ebe. Irari khi ini ọghuẹmhe idiegbe oyewe o nga we ukhomhi le dose ugamhi ni ẹ ga iKirisiti, e vu ya ngeli.

12 Eri e rote agho lue, irari khi e she gbe ironga ni e kpe te ke ro nga ni iKirisiti-a.

13 Egbọ owaza e khi ni ẹe kia ifui owa. Oni o kholo ne nya khi ẹe le ẹgbọ ita uruli kia kia, ẹe sono unu ingme ni aa fe lu we shi, ẹe ngme ungmehi ni ẹa kha ngme.

14 Itobo igho, o ghole mhe ni ozele isamhi olimhi e ye ughue, e bia eniye, e ri eloe ẹ khu omhue-apfe oyewe. Ini awa khi ri eghẹghẹ na ebe awa me asha yese awa eva-a.

15 Eni esamhi-olimhi eghuo e she lase ode oyi iKirisiti le deba okphaghie.

16 Ama ini okpotso okhoghuo ni o miesuo o mhue osamhi-olimhi she unuekpe oyoli, o mema ya ke ri eloe khu oli, o khi rue oli ghi igbaa oyi eni e mie iJesu iKirisiti suo ke tsua, ni e dobe ri eloe ke khu eni e khi egbegbi esamhi-olimhi ni e mholi otomhe.

17 A ke fali eni egbhali ni e ri igbaa oyi eni e mie iJesu iKirisiti suo ẹe kia ni e guẹ gbe akanya egbegbo ifata agbhagbhamhi eva, tete eni e mema lolo toto obọ itse-abọ ali osese ungmehi oyi Eshinegba.

18 Irari khi ebe o ngme oli, u khi ge ena unu ini u roli ẹ kpishi ikpamhi emhi. A ke fali egbakanya ifata eyewe.*

19 Khi roli shi egbegbi ingme ini ogboghuo a bhale ya ngme ingme shi ogbhali egbe, se ini e gbe aava okekhi aase.†

20 La odalo ẹgbọ kpa ke dese eni e lamhe ni o tse agua ye enekpole.

21 Mhi la ukpelo onayi Eshinegba ali iJesu iKirisiti ali oyi igeni ni e pfuase mhese ne, u ri omhese ena gbe akanya, khi rote ode oshili we azeba riele emhikhoghuo.

22 Khi tigbe kele ri obọ nga ogbo egbe roli nga akanya ugamhi oyi Onomhue, u khi ya nu oli mhue okemhi shi olamhe oyi oli. Ri egbe ẹ shi ipfuase.

23 Khi ke da amẹ tsee, ama ke da ukuku onyo ni eminale e kele ke daghie-a shi ẹ el-emhi, abi o ro khia khi u ma kele ẹ ghua egho.

24 Eri a ga ẹgbọ eghuo zu olamhe eyewe, neni a re ramhi iguezo, ama olamhe oye egboese elelese e ya lasele.

25 Igho a lie me ikanya enete gboo. Shi eghuo ni aa ya me memena, ẹa ya sheli okhese.

6

1 Eni e khi ighumha e ke ri ekpe na ega eyewe eghẹghẹkpa ini ogbokhoghuo o khi ze emuebe na eva oyi Eshinegba ali osese oyawa.

* 5:18 Li ze iDeut 25.4; iMat 10.10; iLuk 10.7 † 5:19 Li ze iDeut 17.6; 19.15

² Ighumha e khi ri ẹloe gbe ega eyewẹ ni e miesuo, ni e mholi wẹ, irari khi inyoghuo egbe e ga khi ni ẹẹ deba iKirisiti, ọni iKirisiti ọ nono ingme oyewẹ. Ochoghọ e ke ga wẹ doşẹ abi e kpe li a ga wẹ, Eni ingme ena e khi eni u ya ke seşẹ wẹ, u gbo rewe ẹ ye wẹ ude.

³ Ogbo ni ọ da seşẹ oseşẹ olese ne, ọa lama shi egbegbi oseşẹ oyi iJesu iKirisiti Onomhue oyawa ali ugamhi oyawa,

⁴ eri itipfuabo-nga o she vo li egbe ni ọa ke leşẹ emhikhoghuo. O mhuẹ oghuemhẹ obe na ekhako ali uwola shi ingmemhi ni ẹẹ pfi ofuma ali uwola ali itsue ali ireloevioba.

⁵ E gbolo ẹ pfi ekhako shi iteva egbo ni isamhi udu oyewẹ ọa ya gbe akanya te ode, ni igesikia o she wa wẹ-a. Eri ẹ dabi khi ugamhi khi epfue a roli ẹ nono.

⁶ Egbegbo lo khi ugamhi o ri ogbo ọ mhuẹ epfue egbegbo, o ri emini u mhuẹ khuese ẹ.

⁷ Irari khi awa a kpe tsua emhikhoghuo bhale agbo ona. Igho awa a li rote agbo ya tsua emhikhoghuo vu.

⁸ Irari onana, ini awa da mhuẹ eminale ali itsua na so ne, o khuese awa.

⁹ Ama eni ẹ nono ni wewẹ e pfue eri ẹẹ de pfilo imufe ali igha ali oghuemhẹ eyi oyeghe ni ẹ kuale ogbo utse, ni o pfi egbo pfilo epfua ali oyese.

¹⁰ Irari khi rote oyamhi ukpagho iwali onobe nya e te ẹ

ze lasele. Egbo eghuo e she kphakpha egbe ini e mhuẹ ikpagho, ni o she rewe kia lase ode irudunga le. E she ri ebubu oya yese egbe wẹ udu-a.

Agbo ni o ti ni oni ọ miesuo ọ la

¹¹ Ama yeye Omose oyi Eshinegba, ti egbe emhi enana nya le, na ke khu ipfuase, ali iriele emini o ti Eshinegba ẹloe, ali irudunga, ali inono, iregbemie ali angeli ipfomhe.

¹² Ga ri itoto eye nya na unamhi oni irudunga oye, ni u mie eleli agbo na agboagbo. Itobo khi oni agbo onana Eshinegba o lu ẹ shi abi u ro pfi otsele shi irudunga oye odalo ebubu egbo.

¹³ Odalo oyi Eshinegba ni ọ ri agbo na emhi nya ali odalo oyi iJesu iKirisiti, ni ọ pfi otsele odalo iPotiusi iPaleti, mhi la mhesẹ ne ena,*

¹⁴ u ri omhesẹ enana gbe akanya, ri igesikia mu wẹ mhuẹ gbaa ya ramhi ẹle ni iJesu iKirisiti Onomhue oyawa ọ ro ya bhale.

¹⁵ Oni ibhale oyoli o ya tse shi egheghe ni Eshinegba ọ mhesẹ oli shi te, loli ọ khi Oghie oghuo kpele ni a khivose na, Oghie oyi ighie nya, ali Onomhue oyi ekhemhue nya.

¹⁶ Lolighuo kpele ọ leşẹ la ọ le agboagbo. Eri ọ la akpa ni ogbokhoghuo ọa gbudu a ti mama. Oni ogbokhoghuo ọa me ghue wekhi eri ogbo tigbe dobe ya me oli ghue. A ri

* 6:13 Li ze ifon 18.37

ufumhi ali ekpabọ oniēmhi nali. Atse.

¹⁷ Mhese na egbo ni e pfue shi elemhi agbo ona, e khi ke ti-ipfuabọ nga, a e khi ri udu shi epfue ni ẹa ze ri egbe ẹ da, ama e mhue irudushi na Eshinegba ni o ri emhikpa somhi awa opfa tuo, awa ro ke li agbo.

¹⁸ Mhese na we e ke rieḗ onete, e khili eni e pfue shi elemhi onete irieḗ, e ke somhi egbo opfa, e ke rote emini e mhue rue obo-a.

¹⁹ Ini e da li na ne, e ya ti epfue ma na egbewe abi irogbeke ni o migha, elemhi agbo ni o o bhale, ni e la agbo ni Eshinegba o nono ni e la.

²⁰ ITimoti, ri elo khu emini a ro shi e obo. Khi kuma ingmemhi ni ẹa khi eyi Eshinegba ali ekhako eyeghe ni egbo eghuo e ri egbhọli ẹ lu ilese,

²¹ ni egbo eghuo e deba ni o rewe lase ode irudunga oyewe le.

Okhale oyi Eshinegba o ka nu ẹ nya la.

Ebe onuzi-eva ni iPolu o keke ghi ITimoti

¹ Mhemhe iPolu ni mhi khi aghiusomhi na kee oyi iJesu iKirisiti abi o ghole Eshinegba shi. Mhemhe mhi keke ebe ona. Mhemhe ni o ghie mhi ka ri agbo ni o la iJesu iKirisiti ni Eshinegba o ro shobo na awa tse abo guele.

² ITimoti mhi keke ebe ona ghi. Okhale ali ilemhi ali opfomhe eyi Eshinegba ali eyi iJesu iKirisiti Onomhue oyawa e ka khi eye.*

³ Mhi tse Eshinegba ni mhi ri udu no pfuase e ga abi eni e bia mhe e li ga. Eri mhi a tse Eshinegba uwegbe ini mhi la iromhi isoso sato e egbe, eleiyose ali ele oguota.

⁴ Mhi aa sato evie oye, mhi aa nono ni mhi me e, egheghe agho ni oghela oyemhe o vo.

⁵ Mhi aa sato egbegbi irudunga ni u mhue. Irudunga onabi inyinye o mhue ikhi iLoisi ali ni inye iYunisi o li mhue. Mhi mie shi o khi oni irudunga o li le egbe.†

⁶ Irari ona, mhia ye e ude u guise isomhopfa ni Eshinegba o ro ne le ke gbe akanya egbegbo, eni u mie abi mhi ro ri abo nge ukhomhi.

⁷ Irari khi Eshinegba o ri ayemhe ulishi na awa, ama ayemhe ekpabo ali inono ali igue ri egbe kia.

⁸ Itobo ona, khi ze ni omama o muo ni u ro pfi otsele na Onomhue oyawa, wekhi omama mhe ni mhi khi oghumha itobo iKirisiti. Ama kuma mhe o shi osoli imeme shi iri usomhi onete tsabo, rote ekpabo oyi Eshinegba,

⁹ ni o tsumhi awa, o lu awa ni awa nu oli la agbo ipfuase ni o khia khi o a khi irari emhikhoghwo ni awa riele, ama abi o li gba li ali irari okhale oyoli. Eri a li oni okhale ona na awa rote obo oyi iJesu iKirisiti neni egheghe o gba eke le.

¹⁰ Ama mena, a she roli khasa awa rote ibhale oyi Omiepfuese, iJesu iKirisiti ni o pfueche eghuli-a, ali ni o ri agbo bhale, ni o rote usomhi onete ri agbo ni o a ya ghu khasa gboo.

¹¹ Oni usomhi onete ona Eshinegba o ze mhe shi mhi ke guele abi aghiusomhi na kee oyi iJesu, ali oni oo sese.‡

¹² Itobo ona o ze ni mhi ro me osue abi mhi li ena. Abi o tseku li, omama o a mu mhe irari khi mhi lese oni mhi miesuo ali khi mhi mie shi o khi o dobe ya ri eloe khu emini mhi rongali obo shi ogbe ni elegho.

¹³ Emini u rote unu oyemhe suo, mu we mholi ni e khi eteawe ni u ro ya ke sese osese ni o dala. Gbo sato ke la elemhi irudunga ali inono ni u mhue elemhi iJesu iKirisiti.

¹⁴ Ri eloe khu osese onete ni a ro nga e obo, rote ikpaghiobo oyi Ayemhe-no-

* 1:2 Li ze Ika 16.1 † 1:5 Li ze Ika 16.1

‡ 1:11 Li ze 1 iTimo 2.7

pfuase ni o nu awa la ini ogbo khi dobe pfi oli ukhomhi kpoke.

¹⁵ U lese khi egbokpa ni e la eke Esha e she me me na, li shi iFigelusi ali Emogensesi.

¹⁶ Eshinegba o ka mhue ilelemhi na unuekpe oyi Onesiforosi, irari khi eri o ri egbe e mu me eghenge kpa, o na omama iwenge ni a so me.

¹⁷ Ni mhi ro ma o, abi o ro bhale iRomu, o nono me ya ramhi ni o ro me me.

¹⁸ Eshinegba o ka ze ni o me ilelemhi oyi Eshinegba ogbele elegeho. U ga lese gboo abi o li kpaghie me obo abi mhi ro la Efesosi.

2

Abi a lie khi Okholi-okhue oyi iJesu iKirisiti

¹ ITimoti omimhe, ze ni u toto shi okhale ni o rote obo oyi iJesu iKirisiti bhale.

² Emini u suo khi mhi ngme ukpeloe otsela ebubu, rewe nga egbo ni a dobe ri egbe e nga obo, ni e ya dobe sese egboese.

³ Nu me ri egbe mie osoli abi okholi-okhue onete oyi iJesu iKirisiti.

⁴ Ogbo ni oo gbe akanya okholi-okhue, o ya ya ku abo lo emhi agbo, irari khi oga oyoli oo ke dua ni loli ri egbe ke mu.

⁵ Igho o li khi, ini ogbo o kuma eni e ya na, aa ya rughu oli arula oghie khi o lo owa, ini o li deba ushi ni o la un-amhi.

⁶ O ti ni oghiale ni o toto obo gbe akanya, o kpe khi onodode ni o le emhi ekomhi ni o gua.

⁷ Sa shi emini mhi ngme ena irari khi Onomhue o ya re lese udi emhi ena nya.

⁸ Sato iJesu egbe ni a rote eghuli guise le, ni o khi unuekpe oyi iDefidi. Onana o khi usomhi onete ni mhi ro a tse abo,

⁹ ni o re me a me osoli ramhi ni a ro ri igha shi me abo abi ogbo usueso-akhue. Ama, ungmehi oyi Eshinegba o ze e so igha.

¹⁰ Irarigho, mhi ro ri egbe mie emhikpa irari egbo ni Eshinegba o ze ni wewe e li mie imiepfuese ni o te obo oyi iJesu iKirisiti bhale, li shi ufumhi na agboagbo.

¹¹ Egbegbi ungmehi ni a ri egbe a da na.

Ini awa nu oli ghua,
awa gbo li ya nu oli la agbo.

¹² Ini awa ri egbe mie,
awa ya nu oli ke mhese.

Ini awa kie oli,
O ya kie awa.*

¹³ Ini awa a ya gbe akanya
te ode igesikia,
Ona igesikia o kiele khi.
Irari khi o ya ya kie egboli.

Ogbakanya ni o ghole Eshinegba

¹⁴ Ke yele egbo eye enana le. U gbo tse agua ye we ukpeloe Eshinegba, e khi wola shi ingmemhi, ni o mholi eleli, eri o lese e yese eni e suo oli-a.

* 2:12 Li ze iMat 10.33; iLuk 12.9

15 Roshëka ni u ri egbeë na Eshinëgba abi, ogbakanya ni o mie ni omama ọa ya mu, ni o guë ẹ sẹsẹ ungmehi igesikia.

16 Nuata shi ingme afue ni ẹa mhọli eleli, irari khi egbo ni ẹ so egbe ingme eghoghọ, eri ẹ ri egbo nuata shi Eshinëgba o.

17 Osese oyewe, o ya ke ge abi ugboko. Egbo eghoghọ khi Ameneusi ali iFiletusi.

18 E she zobę ođę igesikia obọ. E khi irọte eghuli guale o she bhale ya dọse, e yese irudunga oyi egbo eghuo-a.

19 Abi bi o tseku li, irọgbeke ni Eshinëgba o rọ gbe eri o migha gbaa, ni a keke ena rọ shi ọli ọlele khi: "Onomhue o lese egbo ni e khi eyọli." Ali, "Onini o da guele khi oyi Onomhue ọli khi ne, o mema ya ti egbe okholo iriele le."†

20 Ukpokpomhi owa ọa lese mhue itasa igolu ali eyi elomho tse, ama o li mhọli eyi ẹra ali eme, eghuo, e khi eni e mu eloe, eghuo, e khi eni ẹa mu eloe.

21 Ini ogbo khuese egboli-a pfuase lase emhi ebe le, a ya roli riele egbegbi emhi. A roli pfuase, ọga oyọli o roli li emhi, ali khi o ya riele ọli shi oni a rọ ke gbe ikanya enete.

22 Me ogghumhe ebe oyi ozele na, ke na khu igue-ngeli ali irudunga, ali inono ali opfomhe. Kuma egbo ni e ri udu ni o pfuase ẹ lu eva oyi Onomhue o.

23 Khi mhọli emini u ri ekhako oyeghe ali umhalese li, irari khi u lese khi uwola ẹ

pfi.

24 Oni ọọ ga Eshinëgba ọa gbudu wola. O mema khi oni ọọ riele isomhelemhi deba ogbokpa, o khi osese onete ni o ri abo o mudu.

25 O ri ofie sese eni ẹ nu ọli khako. O mhọli ọli shi udu khi Eshinëgba o ya khueghie ode-a na we ro mu pfi ni o ya rewe bhale ya lese igesikia,

26 ali khi egbhali oyewe o ya tiemhile, e na pfue igha ni okphaghie o kpe khe we. Oni o she mu we ighumha e ke riele ogghumhe oyọli.

3

Angeli oyi egbo ikpukhokho agbo

1 Ke bino ọli khi eghęghę omunu o ya la o ogbele ni e kpe ukhokho.

2 Egbo e ya ke nono ingme oyi egbe wewe-ghuo tse, e mhọli ogghumhe ebe na ukpagho, ẹẹ tonon obọ udu, ẹẹ titiegbe, ẹẹ weghie egbo, ẹẹ riele umha-sueso deba eni e bia we, ẹa mhọli itsuwegbe wekhi itsobode, e khi egbo ni ẹa mu ekpe na emhi Eshinëgba.

3 Ẹa mhue isomhelemhi, ẹa mhue igbekua na ogbo, e ri unu ẹ pfueche egbo-a, ẹa mhọli igue-regbekia, wekhi ilelemhi, ẹa nono eminente.

4 E ri egbewe ẹ de, ẹẹ li umumume, ẹẹ ti ipfuabọ nga, e mhọli ogghumhe na agbo ilili, ocho ni e kha rọ mhọli inono na Eshinëgba.

5 E riele abine khi eri e miesuo, ama e kie ekpabo ni

† 2:19 Li ze iNọba 16.5

o la imiesuo. Khi mh̄oli emini u ri ẹgb̄o egh̄ogh̄o li.

⁶ Ẹgb̄o egh̄ogh̄o e b̄ena lo owa deba ikpotso ni ẹa mh̄ue ẹgb̄hali, eni usamhi oyi olamh̄e eyew̄e enedīo ẹ nase, ali ni oghūemh̄e khi oghūemh̄e ọọ gua.

⁷ Eri ikpotso egh̄ogh̄o ẹ nono ni e w̄ena, ama ẹa doḅe ẹ leṣe iḡesikia.

⁸ Ẹzeṣe abi iJan̄esi ali iJabirēsi e mu okh̄ue vule shi iMosisi ọ, igh̄o eni ẹgb̄o ena e li mu okh̄ue vule shi iḡesikia ọ. Ẹgb̄o ni o khia khi usamhi oyew̄e ọa ke a gbe akanya ni e she de ode irudunga-a.*

⁹ Ama ẹa ya kia nuata, itob̄o khi oyegh̄e oyew̄e o ya ri egbe khas̄e ọgb̄okpa, abi ó ke li eni em̄ose aava egh̄o egbe.

Om̄h̄ese ni iPolu ọ rọ na iTi-moti

¹⁰ Ama u she leṣe oseṣe oyem̄h̄e nya ali abi mhi lī ngeli, U leṣe emini mhi la agb̄o shi, u leṣe irudunga, ali irab̄omudu ali inono ali iregbemie eyem̄h̄e.

¹¹ U leṣe okh̄oli ni a mu vule shi mh̄e ọ, ali osoli ali emini mhi me egbe obini ẹoli Atīoki, ali ẹoli iKonīomu ali ẹoli iL-isitira. Okh̄oli onīemhi a mu vule shi mh̄e ọ ni mhi ri egbe mie. Ama On̄omh̄ue ọ rue mh̄e ọ le nya.†

¹² Egbegb̄o l̄o khi, ọgb̄okpa ni ọ da nono ni lue la agb̄o ipfuase oyi iJesu iKirisiti ne, a ya mu okh̄oli vule shi ọli ọ.

¹³ Ẹgb̄o okh̄ol̄o ni ẹ ri egbe w̄e khi emini ẹa fut̄e e ya ke

riele onobe ke khi ma ọ, ẹẹ di ẹgb̄o, a lili ẹ di w̄e.

¹⁴ Ama yeȳe oȳe, toto ob̄o emini u w̄ena ni u she mie shi, irari khi u leṣe ob̄o oyi eni u te w̄ena w̄e,

¹⁵ Ali abi u te r̄ote om̄of̄e leṣe Ebe-no-pfuase ni e doḅe ya r̄e khili ọlesingme shi irudunga ni u mh̄oli na iJesu iKirisiti ni u khi ọni a mie pfuase.

¹⁶ Emini a keke shi Ebe-no-pfuase nya, ungm̄emhi oyi Ẹshin̄egba l̄o. E ti ni a r̄o ọ seṣe emini e khi iḡesikia, ali ni a r̄o ọ tse agua ye ọgb̄o shi iriele do-a, ali ni a r̄o ọ sheshe ọgb̄o shi ode r̄ote umh̄aguēli, ali ni a r̄o ọ seṣe ọgb̄o igue-ngeli.

¹⁷ Ni r̄o a bhale ya ẹ khi a seṣe Om̄ose oyi Ẹshin̄egba egbegb̄o ni ọ gūe ke gbe ikanya enete ọd̄oda.

4

¹ Ukp̄eloe oyi Ẹshin̄egba ali iJesu iKirisiti, ni ọ ya gue ẹgb̄o ni e lāo ali eni e ghu-a ẹz̄o, ali ọni ọ bhale ya mh̄ese abi Oghie, mhi la ri oni om̄h̄ese onana ne.

² Ke tse ab̄o oni ungm̄emhi, ke mu egbe ẹgh̄egh̄e kpa ni u r̄o ke tse ọli, o khi ẹgh̄egh̄e ni o ti, o ke khi ẹgh̄egh̄e ni ọa ti, ke sheshe ẹgb̄o, wa dese w̄e ali u ri udu ẹ shi w̄e ọ. U ri iregbemie ri ọfīe seṣe w̄e.

³ Irari khi ẹgh̄egh̄e ọḅ bhale ni ẹgb̄o ẹa ke r̄o ya ri es̄o shi egbegbi oseṣe. Ama ni e ba ke suo emini ẹ ti w̄e es̄o, e ya ri ochogh̄o ti es̄ese gbili gas̄e egbe ni e ya ke ngme emini

* 3:8 Li z̄e Okiali 7.11 † 3:11 Li z̄e Ika 13.14-52; 14.1-7,8-20

esò ni ẹ riẹlẹ wẹ ẹ nono ni wẹwẹ e ke suọ.

⁴ E ya rue esò egbegbi ungmehi le, e ri esò shi okhẹ nẹdẹ.

⁵ Ama yeye oye, u mema ya ku egbe-a abibi o riẹ li. U ri egbe mie osoli, ri abọ mu udu ini u wa a mẹ osoli. Ke gbe akanya oyi oni ọ ri usomhi onete a tş abọ, u ri ẹloe shi ikanya eye e gbe abi oni ọọ ga oyi Ẽshinẹgba.

⁶ Irari khi a she ku mhẹ abi onyọ ni a ku shi iluasobo, ali oni ẹghẹghẹ o she bhale ni mhi rọ ya ghua.

⁷ Mhi she khọli oni okhọli onete, mhi she na oni unamhi pfo, mhi mu oni irudunga mhue ya to.

⁸ Mena, a shi ri arula igue-ngeli shi na mhẹ, ni Onomhue ni ọ pfuase ni ọ khi ọsọ-ẹzọ ọ rọ ya na mhẹ ogbe na ẹlẹghọ. Ọa khi mhemhẹghuo tş a ya rọli na, ama li shi ẹgbọ ni e nono inyenẹ egbe bhale oyọli.

IPolu ọọ ghie iTimoti usomhi

⁹ Rosheka ni u keleş ramhi mhẹ egbe.

¹⁰ Irari khi iDemasi ọ mhọli inono na oni agbọ ona. Ọ she tsua mhẹ pfi a je ẹoli iTeşalonika. IKiresenisi ọ she je eke iGalesha, iTatọsi ọ je ẹoli iDalimatia.*

¹¹ ILuku luẹghuo kpe ọ ke leşẹ nu mhẹ la akana. Rue iMaki mhọli obọ bhale, irari

khi ọ mhọli ikpaghiobọ na mhẹ oni akanya.†

¹² Mhi ghie iTakikọsi je ẹoli Efesọsi.‡

¹³ Ini u wa bhale rue awulu ugbakpi ni mhi rọ shi obọ oyi iKaripusi obini ẹoli iTiroasi ali ebe eyemhẹ mhue obọ bhale. Tete ẹkuẹ ẹlamhi ni a keke emhi shi.§

¹⁴ Alezada oni ọọ lumhi ikhuli, ọọ li mhẹ onobe gba. Onomhue ọ ya fali ọli ota shi emini ọ riẹlẹ.*

¹⁵ Yeye li mu egbe ẹ shi ọli egbe, irari khi eri ọ lolo mu okhue vule shi usomhi ni awa rọ ọ tse abọ ọ.

¹⁶ Abi mhi rọ kpe tode pfa egbe mhẹ shi eke, ọgbokhọghuo ọa nu mhẹ migha, eri wẹwẹ nya e na tsua mhẹ pfi a. Ẽshinẹgba ọ khi rọli mu ota sọ wẹ.

¹⁷ Ama eri Ẽshinẹgba ọ migha kpeşẹ mhẹ, ọ ri ekpabọ na mhẹ ni a bhale ya ẹ khi, rọte obọ oyemhẹ, oni ungmehi o lolo zẹ guele ni ẹgbọ iJeta e suọ li. Ali ni a rọ tsumhi mhẹ obọ oyi eghuli abine khi a mie ọgbọ unu oyi idumhi.

¹⁸ Onomhue ọ ya pfuese mhẹ okhọli obe ni o vule shi mhẹ ọ, ali khi ọ ya rue mhẹ bhale iloghie oyọli tselele. Lọli ọ mhọli ufumhi ẹlẹ na agbọagbọ ya je agbọagbọ. Atşẹ.

Otşẹ ni o kpe ukhokho

* **4:10** Li zẹ iKolo 4.14; iFilẹ 24; 2 iKori 8.23; iGal 2.3; iTatọ 1.4 † **4:11** Li zẹ iKolo 4.14; iFilẹ 24; Ika 12.12,25; 13.13; 15.37-39; iKolo 4.10 ‡ **4:12** Li zẹ Ika 20.4; Efi 6.21-22; iKolo 4.7-8 § **4:13** Li zẹ Ika 20.6 * **4:14** Li zẹ 1 iTimo 1.20; Iwolo 62.12; iRom 2.6 † **4:19** Li zẹ Ika 18.2; 2 iTimo 1.16-17

19 Tşę iPisilia ali Akuila ali ọmhuę-apfę oyi Onesiforọsi na mhe.†

20 Erasitọsi ọ la ẹoli iKọriti, ali mhi zę iTirofimoşisi obọ shi ẹoli iMiletusi irari khi ọọ ghua.‡

21 Rọshęka ni u keleş ramhi ana neni oruę ọọ pfi. Eubulusi ọọ tşę ali iPudenisi ali iLanusu ali iKilaudia, ali eni e miesuọ nya e ga tşę.

22 Ọnọmhuę ọ nu ayẹmhe oye la. Okhale oyi Eshinęgba o nu ẹ la.

‡ 4:20 Li zę Ika 19.22; iRom 16.23; Ika 20.4; 21.29

Ebe ni iPoḷu o keke ghi ITatōsi

Otse

¹ Mhēmhẹ iPoḷu ni a zẹ abi ọni ọọ ga oyi Eshinegba ali aghiusomhi na keẹ oyi iJesu iKirisiti, mhi keke ebe ona. Eri a ghie mhẹ ni mhi ya zese irudunga oyi eni Eshinegba o zẹ-a, ali ni mhi rẹwẹ khase igesikia ni o ya sese wẹ abi e li ya la agbọ ni o ri egbe ẹ mu Eshinegba.

² Oni irudunga ali ilẹse ona o migha nga irudushi oyi agbọ na agbọagbọ, ni Eshinegba ni ọa ya lo ẹgbhọli o ri nga na awa neni a mẹ igbaekele oyi agbọ.

³ Eghẹghẹ ni o ghọle Eshinegba, o la rọte ungemhi oyọli ni o rọ nga mhẹ obọ ri usomhi oyọli khase gboo. Eshinegba oni o mie awa pfuese o lighọ mhese ọli.

⁴ Mhi keke ebe ona ghi iTatōsi omimhẹ esheshi elemhi irudunga, ni mhēmhẹ ali lọli anye ga la elemhi imiesuọ oghuo.

Eshinegba Ita iJesu iKirisiti oni o mie awa pfuese o ka li okhale ne, o ri opfomhẹ ne.*

Akanya ni iTatōsi o ya gbe ẹoli iKireti

⁵ Emini o zẹ ni mhi rọ zẹ obọ shi iKireti khi, ni u mẹ asha pfuse ikanya ni e kpọle nya gbe, ali ni u zẹ ẹgbhali shi

igbaa nya eyi eni e mie iJesu iKirisiti suọ na ukhomhi ẹoli ni e la iKireti nya. Sato abi mhi gueye khi:

⁶ Oni o khi ọgbhali shi elemhi igbaa oyi eni e mie iJesu iKirisiti suọ o mema ya khi ọgbọ ni o gue ẹ ngeli, ini a khi mẹ asha gue ẹzọ shi ọli egbe. O mema ya khi oni o rue ọkpotsọ oghuo shi. Imi ọli e khi eni e miesuọ ni ẹa khi eniyẹ ni e gbakaa ni ẹa ya suọ esọ.

⁷ Aborokhia khi eri a ri akanya oyi Eshinegba nga oni o ralo na igbaa oyi eni e mie iJesu iKirisiti suọ nya obọ eghọ, ọọ mema khi ọgbọ ni o gue ẹ ngeli ini a khi gue ẹzọ shi ọli egbe. O khi khi ọgbọ ni o ri imebie ẹ ngeli deba ẹgbọ. O khi khi oni elemhi e kele ẹ bi. O khi khi ọgbọ ni o da onyọ pfueche egbe-a. O khi khi ọgbọ ni o kele ẹ pfi obọ, wẹkhi ọgbọ ni ingme ukpaghọ o ghọ mu egbe dọse ode.

⁸ Ochoghọ o khi oni o ghele ẹ mu ẹgbọ, ni ọọ nono eminete. O khi ọgbọ ni o gue ri egbọli ẹ kia. O khi ọgbọ igesikia, ali ọgbọ ni o pfuase. O khi ọgbọ ni o mu ekpe shi egbọli egbe.

⁹ O mema mu oni usomhi onete ni o mhọli iregbenga mhue jijiji, abi a li sese ọli. Lọli o rọ dobe ya ri osese igesikia ni ọọ sese ẹgbọese ke ri udu shi wẹ o, ali ni o gbo ri ida-ode oyi eni e nu wẹ ẹ khako khase, khi ẹgbhọli ẹe lo.†

¹⁰ Irari khi ẹgbọ iju ebubu

* 1:4 Li zẹ 2 iKori 8.23; iGal 2.3; 2 iTimo 4.10 † 1:9 Li zẹ 1 iTimo 3.2-7

eghuo ni e miesuọ ni ẹ pfi ozughu, e la ọ, ni ẹẹ ngme ingmemhi afue ni ẹẹ di egbo. Wewẹ ẹ sẹsẹ ode egbhọli khi a mema shelẹ ogbo a neni ọ khi oni ọ miesuọ.

¹¹ O ti ni a pfi wẹ okpe unu, itobọ khi eri e ri emini ẹ sẹsẹ yese udu oyi omhue-apfe ebubu-a. Itobọ ini e ba mẹ asha ke ti ukpaghọ ma, e rọ lighọ sẹsẹ.

¹² Egbegbi omekeguele oyewẹ, ọ ke ngme ọli ghue, ọọ, “Egbo iKireti, egbo egbhọli, ali egbo ebe ali egbo iwaza elemhi-gbidi-a, a khi.”

¹³ Igesikia oni ungmehi ona o khi. Irarighọ, ga lolo gbe omama ku wẹ, ni irudunga oyewẹ o mẹ asha migha.

¹⁴ Eghẹghẹ aghọ, ẹa kẹ ke ri esọ shi okhẹ afue oyi egbo iju ali ishi eyi egbo eni e kie igesikia.

¹⁵ Eri emhi nya e pfuasẹ shi odalo oyi egbo ni e pfuasẹ. Ama emhikhoghhuo ọa ya pfuasẹ shi ẹloe oyi egbo ni ẹa pfuasẹ ni ẹa miesuọ, irari khi a she kẹsẹ wẹ udu ali isamhi-a.

¹⁶ E ma liẹ khi wewẹ e lẹsẹ Eshinẹgba, ama eri angeli oyewẹ o rọkhasẹ gboo, khi ẹa lẹsẹ ọli. Egbo ni aa ti ẹ mama ali egbo umha-sueso e khi, ni ẹa ti okiẹ wẹ itoto.

2

Osesẹ ni a ya ke sẹsẹ iku egbo ododa

¹ Ghe i! Yeyẹ oye, u mema ya ke sẹsẹ emini o lama shi egbegbi osesẹ ọ.

² Sẹsẹ emose ni e she khi egbhali, e ke ri abọ mu udu. E khi eni a mu ekpe na, e khi egbo ni e guẹ ri egbewẹ kia. E zẹ ni irudunga ali inono ali iregbemie oyewẹ o lolo mu ekẹ.

³ Gbo lighọ sẹsẹ ikpotso eni egbhali e ke ngeli abi ikpotso egbhali ni e la agbo ipfuasẹ. E khi khi eni e ri unu ẹ yese egbo a, e khi ditse onyo idada a, ama e ke sẹsẹ egbo ingeli enete.

⁴ Isheghọ ni e ke sẹsẹ izele ikpotso e nono ingme oyi odo wẹ ali imi wẹ.

⁵ E khi egbo ni e guẹ ri egbewẹ ẹ kia, e khi eni e pfuasẹ. E khi shito ni ẹa mhọli oni ẹẹ gbe owa. E khi eni e mhọli isomhalemhi. E ke nyẹsẹ ukhomhi na odo wẹ pfo. Ini ogbokhoghhuo ọ khi mẹ asha ngme ungmehi imebie deba usomhi onete oyi Eshinẹgba.

⁶ Gbo li lighọ gueye eni izẹo e khi egbo ni e guẹ ri egbewẹ ẹ kia.

⁷ Zẹ ni emini u wa riẹlẹ nya e khi eminete ni egbo nya e ya ke khonya. Ri igesikia ali omuegbe ke khasẹ elemhi osesẹ ni u wa sẹsẹ.

⁸ Ke ri ingmemhi ni e gba pfo ni ogbokhoghhuo ọa mẹ te ya ke zẹ ifue ngme ungmehi oye. Ini ebe awa e khi mẹ emini ọa ti okhoghhuo ngme shi awa egbe, ni omama o mu wẹ.

⁹ Sẹsẹ ighumha e ri egbewẹ na ega eyewẹ pfo nya, e ga ke riẹlẹ emini o ri egbe ẹ ke mu wẹ odekhode. E khi ke sọlo shi wẹ ọ ini e nu wẹ ẹ wola.

10 E khi bēna ke do wẹ ughiatọ. E ri ochoghọ ke rọkhasẹ khi ẹgbọ enete ni ẹ gbe akanya te ode igesikia wẹwẹ e khi. Eghẹghẹ aghọ ni e ri osesẹ ungmehi oyi Eshinẹgba ni ọ mie awa pfuese ke ghọle.

11 Irari khi okhale oyi Eshinẹgba ni o ri imiepfuese bhale o she ri egbọli khase ọgbọkpa.

12 Lọli o sesẹ awa, awa ke kie ingeli ni ẹa ghọle Eshinẹgba ali ọghuẹmhe oyi emhi agbọ, ni ọgbọgbọ ọ ke nu egbọli ngme. Awa a ngeli angeli ni o migha shi ipfuase ẹghẹghẹ ni awa la memena.

13 Abi awa li ri ukpẹloe shi ekẹ ẹ khẹ ogbẹle ni Eshinẹgba ni ọ funẹ Omiepfuese iJesu iKirisiti ọyawa o rọ ya nyene egbe bhale.

14 IJesu iKirisiti ni ọ ri egbọli bhale rọ pfa awa shi ekẹ rọte obọ oyi ọkholọ nya lasẹle, ali ni ọ rọ khuẹsẹ ẹgbọ eyọli-a, ikhi ẹgbọ ni ikanya enete igbegbe ẹ ghọle.*

15 Enana e khi emini u wa ke sesẹ. Ri afu ni mhi rọ ne ke ri udu shi wẹ ọ, u gbo tse agua yẹ wẹ. Khi zẹ ni ọgbọkhoghuo ọ ri ukpẹloe gbe ẹ.

3

Abi eni e miesuo e liẹ ke ngeli

1 Ke yeke eni ẹgbọ le, e ke nyese ukhomhi na enighie ali eni ẹ mhesẹ, ali e ri ungmehi oyewẹ ke gbe akanya.

E mu egbe ni e rọ ke gbe ikanya enete.

2 E khi lo ẹgbhọli yese ọgbọkhoghuo eva-a, e khi ẹgbọ opfomhe, e khi nu egbewẹ ke wola, ama e khi eni e ri ikuegbe-a a ngeli deba ọgbọkpa.

3 Irari khi awa kpẹ li riẹle ingme oyeghe ali umhasueso. Awa khi eni a di, ni a ri ọghuẹmhe egbe, ali aruele mu shi igha. Awa la angeli ubogbo ali ofuma ikpekpe. Áá biselemhi awa, awa gbolo biselemhi egbe.

4 Ama abi isomhelemhi ali inono oyi Eshinẹgba Omiepfuese ọyawa o rọ feli lasẹle.

5 Ọ mie awa pfuese, ni ọa khi itobọ ingeli ni e migha shi ipfuase ni awa ngeli, ama itobọ ilelemhi oyọli. Ọ rọte iriẹle bia ali ikhuẹsẹ-pfuase oyi Ayemhe-no-pfuase tsumhi awa. Ọ ri agbọ onogbo na awa.

6 Eri Eshinẹgba ọ tutu Ayemhe-no-pfuase ku awa tuọ itobọ emini iJesu iKirisiti ọ riẹle na awa.

7 Eghẹghẹ aghọ, awa kha khi eni ọ rọte okhale oyọli rọ pfuase se, awa mele imi ọli a ni e mhọli ọli shi udu khi e mhue obọ shi ugu agbọ na agbọagbọ.

8 Egbegbi ungmehi ni a ri egbe ẹ nga ona o khi.

Mhia nono ni u lolo gue ọli ye wẹ jijiji, ini eni e she kpẹ regbenga Eshinẹgba, ni e kuegbe-a ke gbe ikanya enete. Eni emhi ena e ma ti

* 2:14 Li zẹ iwolo 130.8; Okiali 19.5; iDeut 4.20; 7.6; 14.2; 1 iPit 2.9

gba irari khi e ma ri eleli ẹ na Ọgbọkpa.

⁹ Khi nu ẹgbọ khẹ akọ shi ingme afue, ali itonọ utetọ oyi echeli idada. Khi wola ali khi khọli shi ingme Ishi eyi iMosisi, itobọ khi afue ali emini ẹa ri eleli a bhale e khi.

¹⁰ Kpẹ tse agua yẹ ọgbọ ozughu iteva, ini ọa kie suọ, u ti gbe mẹ ọli na, ini emhikhoghuo e khi ku ẹ gbe.

¹¹ Lọli u rọ ya lẹsẹ khi ẹgbọ enana e she de ode khi ode, olamhẹ e ke la. Angeli oyewẹ o she pfa ẹzọ mu wẹ.

Omhesẹ ni o kpukhokho

¹² Mhi kha da lẹsẹ ghie Atẹmasi ghi ẹ ne o ke khi iTakikosi, rọshẹka ni u bhale ya ẹ mhẹ iNikapolisi irari khi mhi she ri ọli shi udu khi oobọ mhi ya la ẹghẹghẹ oruame.*

¹³ Abibi o riẹ li, rọshẹka kpaghiẹ iZẹnasi ọni ọ khi ilọya ali Apolosi obọ, ini ẹẹ vu. Ri emini ẹ nono nya na wẹ.†

¹⁴ Ẹgbọ eyawa e khi eni e wẹna abi a liẹ gbe akanya enete, ni e doḅẹ ke riẹlẹ emini ẹẹ nono elemhi ogbẹlẹ na egbewẹ, ini e khi la agbọ ighalaba.

¹⁵ Ẹgbọ ni e nu mhẹ la ana nya e ga tṣẹ ẹ. A tṣẹ eni e li miesuọ ali eni e nono ingme oyi anye.

Okhale oyi Ẹshinẹgba o ka nu ẹ la.

* **3:12** Li zẹ *Ika* 20.4; *Ẹfi* 6.21-22; *iKolo* 4.7-8; 2 *iTimo* 4.12
† **3:13** Li zẹ *Ika* 18.24; 1 *iKọri* 16.12

Ebe ni iPolu o keke ghi IFilemọ

¹ Mhemhe iPolu ni a ri itobo khi mhi a gbe akanya na iJesu iKirisiti mu shi oḡba ighumha, mhi keke ebe ona, ali iTimoti. IFilemọ omole anye ni anye ga a gbe akanya, a keke ọli ghi,

² li shi igbaa oyi eni e mie iJesu iKirisiti suọ ni o la owa oye ali inyoghuo awa ni okpotso na lui Apfia ali Achiposi ni anye ga khi ekholi-okhue eyi Eshineḡba.*

³ Eshineḡba Ita awa ali iJesu iKirisiti Onomhue e ka li okhale na e, e ri opfomhe na e.

Inono ali iregbenga ni iFilemọ o mholi

⁴ IFilemọ, eḡheḡhe kpa mhi ro kphemhi na Eshineḡba ini mhia so iromhi ne.

⁵ Irari khi mhi suọ inono ni u mholi na eḡbo eyi Eshineḡba nya ali irudunga ni u mhue shi iJesu Onomhue.

⁶ Iromhi ni mhia so khi, o ze ni ilakugbe oyawa abi eni e mholi irudunga oghuo, o ri awa lese ikhivose nya, ni awa mholi irari khi awa kugbe iKirisiti o.

⁷ Inono oye i, inyoghuo-mhe, o she ri ukpokpomhi oghelẹ ghi mhe, o gbo ri udu shi mhe o! U gbo guise udu oyi eni e miesuọ le.

IPolu o so iromhi na Onesimusi

⁸ Itobo igho, ini o riẹ khia khi mhi kha doḡe mhesẹ ne emini o ti ni u riẹle abi inyoghuae elemhi iKirisiti,

⁹ mhi ya ri itobo inono lema e, abi mhemhe iPolu ni o she khi oḡbhali ni mhi gbo khi oni oḡ ga oyi iJesu iKirisiti memena.

¹⁰ Mhi lema e shi itobo oyi Onesimusi ni o la elemhi oḡba ighumha ana mele omimhe-a.†

¹¹ Ni o khia khi waa ke kpe mhuẹ emini a roli e riẹle, ama memena, o she mhuẹ emini awa roli ya riẹle.

¹² Mhi ghie ọli nyeneḡ egbe e ghi e, roḡe ekelemhi udu inono oyemhe.

¹³ Mhii kha ze ọli obo ni o nu mhe la akana ni o to eloli e ke ri eloe khu mhe abi mhi li la oḡba oghumha ena shi usomhi onete oyi Eshineḡba.

¹⁴ Ama mhi aa nono ni mhi riẹle emhi okhoghuo ni u waa lama shi, ni a ro bhale ya e khi ikanya enete ni u gbe, eri u roḡe elemhi udu gbe we. Ni oḡa khi eri a tanḡ e abo shi o.

¹⁵ A doḡe e me khi eri Onesimusi o roḡe e obo vu ukuku eḡheḡhe, ni o kha ke jele deba e, o nu e la agboagbo.

¹⁶ Oḡa ke khi oghumha tse, ama o fu doḡe oghumha, inyoghuo awa elemhi iKirisiti o ke khi. Oni awa nono ingme oyoli eḡbegbo o khi, abi oḡbo ali inyoghuo, elemhi Onomhue.

¹⁷ Ini o khia khi u lese mhe shi onuzava oye, gbo mie ọli

* 1:2 Li ze iKolo 4.17 † 1:10 Li ze iKolo 4.9

abi u kha li mie mhe.

¹⁸ Ama ini o khia khi o lue ne, okekha khi eri o lo e ota, ku ota eyoli lo eku e oyemhe.

¹⁹ Mhemhe iPolu mhi ri obo oyemhe e keke ebe ona. Mhie ye khi mhi ya fali e ewe. Mhia ke khi oni o ke gbolo e yele e le khi mhemhe mhi mholi agbo oye nya.

²⁰ Irarigho, inyoghuo, ri ikpaghiobo ona na mhe itobo Onomhue, abi inyoghuo ni awa ga mie iKirisiti su o ri oghela shi mhe udu.

²¹ Mhi lese gboo khi abi mhi lie keke ebe ona ghi e, khi u ya rie e emini mhie u rie e, mhi ga lese khi u ya rie e dose abi mhie u li rie e.

²² Gbo li rie e elemhi owa oghuo shi eke ke mhe. Irari khi mhi lese khi a ya rue mhe obo a na e, ni o ri iromhi ni a so bhale ya tse.

²³ Epafurasi ni anye ga khi eni ee ga eyi iJesu iKirisiti, o o tse e. †

²⁴ Igho li khi iMaki ali Arisitakusi ali iDemasi ali iLuku ni anye ga gbe akanya, ee tse e. §

²⁵ Okhale oyi iJesu iKirisiti Onomhue o ka la ayemhe oyi ee nya.

† 1:23 Li ze iKolo 1.7; 4.12 § 1:24 Li ze Ika 12.12,25; 13.13; 15.37-39; 19.29; 27.2; iKolo 4.10,14; 2 iTimo 4.10,11

Ebe ni a keke ghi egbo Iburu Eni e miesuo

*Ungmemhi oyi Eshinegba ni
o rote obo oyi Omiqli bhale*

1 Agbo-neḁe, ebubu
egheghe ali ode ododa
Eshinegba o te ri emekeguele
nu ititawa ngme.

2 Ama omiqli ni o ze ni o le
ugu emhikpa o ke ro nu awa
ngme ogbele ikpukhokho ni
awa la memena. Obọ oyọli o
gbo rote ma agbo

3 Lọli o ri ufumhi oyi
Eshinegba khaṣe. Eri o gbo li
abi Eshinegba o li tee. Lọli o ri
ungmemhi ni o tsua ekpabo
oyọli mu agbo nya mhọli. Abi
o ro khuṣe awa olamhe-a
se, o shito ukiękie obita na
Eghiele oyi Eshinegba ni o
mhọli ekpabo ni o fune nya.

Ufumhi oyi Omi Eshinegba

4 A ri oni omiqli fu doṣe igeni
abi eva ni Eshinegba o ro na li
o li fu doṣe oyewe.

5 Aḁeni onoghuo Eshinegba o
tigbe lie ọli,

“Omimhe u khi
amo mhi te khi Ite?”

Ali onoghuo o gbolo ọli;

“Mhi ya khi Ita e,

yeḁe u khi Omimhe?”*

6 Ama abi Eshinegba o ro ya
ghie Omiqli oghuo kpe je el-
emhi agbo, oo,

“Iḁeni eyi Eshinegba nya
e mema nyese ukhomhi
ga li.”†

7 Abi o ro o ngme ingme oyi
igeni, oo,

“O ma igeni eyoli
abi akpekpeli,
o ma eni ee ga eyoli
abi emhi ere.”‡

8 Ama abi Eshinegba o ro o
ngme ingme oyi Omiqli, oo,

“Eshinegba u khi!
Omheṣe oye,
agbo agbo o ya la o.

Ipfuase ali igesia
u ro ya ke mheṣe
na egbo eye.

9 Ipfuase u nono,
ingmobe o a ghole e,
irarigho Eshinegba u khi!

Eshinegba oye, o she re
fu doṣe etu-e,

itobo khi o ri
oili oghelę to e ukhomhi.”§

10 O gbolo lie,

“Yeḁe Onomhue,
rote igbaekele,

u te ma agbo.

Abọ eye u ro ma ukhuli.

11 Weḁe nya e ya pfua,
ama yeḁe u kiele e la o.

E ya taa abi itsua ni a so.

12 U khili we abi ide,
e ya oghie abi a lie
oghie itsua ni a so.

Ama abi u li u kiele e li,
agbo oye o a tigbe
ya mhọli ukpeṣe.”*

13 Aḁeni onoghuo Eshinegba o
tigbe lie ọli,

“Shito mhe ukiękie obita
omheṣe,

* 1:5 Li ze Iwolo 2.7; 2 iSam 7.14; 1 Okhe 17.13 † 1:6 Li ze iDeut 32.43 ‡ 1:7 Li
ze Iwolo 104.4 § 1:9 Li ze Iwolo 45.6,7 * 1:12 Li ze Iwolo 102.25-27 † 1:13
Li ze Iwolo 110.1

ramhi ni mhi rọ ya ri ebe
e
mele ukpẹkhome akphawẹ-
nga oye-a?"†

14 Oa khi iyemhe eni ee ga
Eshinegba igeni nya e khi, ni
Eshinegba oọ ghie e ke ga eni
e ya le ugu imiepfuese?

2

Ukpokpomhi imiepfuese

1 Irarigho a ze ni awa lolo
mu igesikia ni awa suo mhue,
ini a khi tsua awa ibe vu.

2 Irari khi ini usomhi ni
igeni e bhale ya guele, o khi
egbegbo, ni a ya na egbo ni ea
roli gbe akanya osoli to shi;

3 sefe awa li ya pfue oni
osoli ona, ini awa ri eloe
gbe ukpokpomhi imiepfuese
oghoghohi ni Onomhue lolighuo
o te odode gue le, ni eni e suo
li, e gueye anye khi igesikia lo?

4 Oni usomhi ona ni
Eshinegba o gbo ri oleele, ali
ikanya oshabọ ali onyaloa
ododa ze otsele shi, li shi
isomhopfa eyi Ayemhe-nọ-
pfuase ni o kemhi abi o li ghole
oli shi.

Ijesu o bhale agbo abi ogbo

5 Eshinegba o ri omhese oyi
agbo ni oọ bhale nga igeni
obo, ikhi agbo ni awa ngme
ena.

6 Ama, a mholi ashini a
ngme oli shi elemhi Ebe-nọ-
pfuase, ni oọ.

"Elo ogbo fe khi,
ni ingme oyoli o ro na mu
yeye Eshinegba egbe,
elo o khi ni u ro
lina ri eloe e khu oli?"

7 U ma li kpoke

na igeni dene,
u ri ufumhi
ali ekpe rughu oli,
u roli loghie nga
emini u ma nya.

8 U roli loghie
emhi nya."*

Eshinegba o she ri emini o ma
nya na li o ro ke mhese shi.
Oa kese emhikhoghuo le ni
oa ro shi oli omhese. Ama
memena, awa aa kie me eni
emhi nya pfo ne ni o ro nali o
ke mhese shi.

9 Ama ijesu awa a me, ni a kpe
ma kpoke na igeni ukuku o
dene. Oni a ri ufumhi ali ekpe
rughu memena itobo eghuli
ni o ghu. Igho lo, okhale
oyi Eshinegba o roli ghu-a na
egbokpa.

10 Ni Eshinegba, ni o ma
emhi nya ni o mu we mholi,
o me asha ri oni ufumhi ona
na ebubu egbo, o ro ri ijesu
khi oni o gba pfo rote osoli ni
o me. Irari khi ijesu o re egbo
nya bhale imiepfuese.

11 Ghe oni o ri egbo pfuase
ali eni a ro pfuase nya,
unuokpe oghuo e ke ga khi.
Loli o ze khi omama oa mu
ijesu ni o ro lu we inyoghuo.

12 Oo Eshinegba,
"Mhi ya gueye
inyoghuo-mhe
emini u she riele,
Mhi ya la ilegba oyewe
to uwolo ikueghie oye."†

13 O gbolo e,
"Mhi ya regbenga
Eshinegba."

O gbolo e,
"Ghe mhemhe ali eniye

* 2:8 Li ze Iwolo 8.4-6 † 2:12 Li ze Iwolo 22.22 ‡ 2:13 Li ze Aza 8.17,18

ni Eshinegba o ro na mhe.”‡

14 Aborokhia khi imi Eshinegba, egbo ni e ze idiegbe ogbo ali oia e khi, loli iJesu Omioli o ro li mele ogbo ni o mholi idiegbe ali oia-a. Eri o lina ini o me asha rote eghuli ni o ghu pfuse Okphaghiye-a ni o kpe mu ekpabo oyi eghuli mhe,

15 ni o me asha pfuese egbo ni ulishi eghuli oo mu ekehete.

16 Egbegbo lo khi oia khi igeni o bhale ya kpaghiye obo, ama imimi Aburaamu. §

17 Itobo ona a ro roli li abi inyoghuo oli nya odekhode. Ni o me asha khi Okpodalougamhi oyi Eshinegba ni o kpeda nya, ni o mholi igesikia ali ilelemhi shi elemhi ugamhi oyi Eshinegba, ni o me asha shishi olamhe eyi egbo-a.

18 Irari khi o li me osoli abi a ro mu oli fe, o li dobe e kpaghiye eni a lili e mufe obo.

3

Ijesu o fu dose iMosisi

1 Irarigho, inyoghuo-mhe ni Eshinegba o ze ni e khi egbo ni e pfuase eyoli, a sa ingme oyi iJesu ni awa lui aghiusomhi na kee, ali Oga oyi ekpodalougamhi nya.

2 Eri o ri igesikia deba Eshinegba, ni o ze oli o ke gbe akanya eyoli, ezeze abi iMosisi oni oo ga o li ri igesikia gbe akanya elemhi Owa oyi Eshinegba.*

3 A she me khi iJesu o mhe imueloe ni o fu dose oyi iMosisi, ezeze abi atsona o lie mholi imueloe ni o fu dose owa ni o to.

4 A kie kpe lese khi ogbo oo to owa kpa, Eshinegba o ma emhikpa.

5 IMosisi o khi ogbo igesikia elemhi Owa oyi Eshinegba abi oni oo ga. Akanya ni o gbe o khi otsese oyi igesikia oyi emini a ya ngme ogbe na ako.

6 Ama iKirisiti o khi Omi Eshinegba ni o mhesese e shi Owa ugamhi oyoli. Owa oyoli awa khi ini awa da kie mu igbedu ali irudushi oyawa ni awa regbenga mhe ne.

Iyemhea ni a ro na Egbo eyi Eshinegba

7 Irarigho, abi Ayemhe-noonfuase o ngme, ni oo,

“A kha suo uruli

oyi Eshinegba amo,

8 a khi zese udu-a,

abi eni e bia e e li

egheghe ni e ro o riele

umha-sueso deba

Eshinegba.

Egheghe ni a ro la

odagbe ifufu mu we fe,

9 ikhi obini ita e e la

mu mhe fe, mhesese mhe

mino,

e me emini mhi riele

elemhi ikpe egbhueva

10 Loli o ze ni elemhi e ro bi mhe

deba oni agbhotu ogho,

ni mhi ro lie, ‘Egheghe kpa

udu oyewe o ro rewe lo

ebuli,

ea lese ode eyemhe.’

11 Irarigho, mhi ro ri

elemhi-ibibi shi-ẹmuẹ liẹ,
‘Ea ya tigbe lo
iyemhẹa oyemhẹ.’”†

12 Inyoghuo, a mu egbe ẹ ini
onḡe ẹ ọ khi mholi udu umha-
miesuo, ni ọ ya lase ode oyi
Eshinegba ni ọ la ọ le.

13 Ochoghọ a ke ye egbe ẹ
ude, itobọ khi, “Amo.” Oni
egheghe o kie la ọ, ni a rọ ọ
mu pfi, ini udimhi ni olamhe
ọọ di ogbo o khi ri onḡe ẹ zese
udu-a.

14 Eni e kuma iKirisiti ọ awa
khi ini awa lolo mu igbedu ni
awa rọte eke mholi mhue ya
ramhi ukpese.

15 Abi Ebe-no-pfuase o
ngme.

“Ini u suọ uruli
oyi Eshinegba amo,
a khi zese udu-a,
abi eni e bia ẹ e li
egheghe ni e rọ ọ riẹle
umha-sueso deba
Eshinegba.”‡

16 Eghuo e khi eni egbo ni
e suọ uruli oyi Eshinegba ni e
riẹle umha suọ esọ deba li?
Oa khi eni iMosisi ọ rọte eke
ijipiti rue lasele?

17 Eghuo ọ biselemhi deba
ikpe egbhueva? Oa khi eni e
lamhe, ni e ghuloa shi odagbe
ifufu?

18 Eghuo Eshinegba ọ shi
ẹmuẹ deba khi ẹa ya tigbe lo
iyemhẹa, ọa khi eni ẹa suọ esọ
na li?§

19 Irarigho, awa me khi
itobọ umha-miesuo oyewe ẹa
rọ dobe lo.

4

*Iyemhẹa ni a shobo na egbo
eyi Eshinegba*

1 Aborokhia khi ishobo ni
awa rọ ya lo iyemhẹa khi o kie
la ọ, awa mu egbe awa ini o
khi de onḡe ẹ obọ-a.

2 Awa she li suọ oni usomhi
onete abi wewe e ke li suọ ọli.
Ama oni usomhi ọa mu we
ẹloe irari khi ẹa ri irudunga
mie ọli.

3 Awa ni awa mhue
irudunga, awa ya lo oni
iyemhẹa. Ama eni ẹa miesuo,
Eshinegba ọọ liẹ

“Elemhi ibibi
mhi rọ shi-ẹmuẹ,
khi ‘Ea ya tigbe lo
asha iyemhẹa oyemhẹ.’”

Aboriekhia rọte abi ọ te ma
agbo ọ te riẹle oni iyemhẹa
ona shi eke.*

4 A ngme na shi Ebe-no-
pfuase abi ọ rọ ngme in-
gme ogbele onuzi-ishilua khi,
“Eshinegba ọ yemhẹ ikanya-a
nya-a ẹlenizu-ishilua.”†

5 A gbo ngme oni ingme
onana khi. “Ea tigbe ya lo
iyemhẹa oyemhẹ.”‡

6 Elese e laọ ni a ya ri
egheghe na ni e rọ lo oni
iyemhẹa. Irari khi eni e kpe
suọ oni Usomhi Onete ẹa lo
oni iyemhẹa ogho, itobọ khi ẹa
miesuo.

7 Irarigho, Eshinegba ọ rọ
gbo ri ẹlelese shi eke ni a rọ
ya lo iyemhẹa oyoli, ni ọ lu
Amo. Ezeze abi ọ rọte unu oyi
iDefidi ngme ọli ẹlelese abi a
kpe li ngme ọli, ni ọọ:

† 3:11 Li ze *Iwolo* 95.7-11 ‡ 3:15 Li ze *Iwolo* 95.7-8 § 3:18 Li ze *iNqba* 14.1-35

* 4:3 Li ze *Iwolo* 95.11 † 4:4 Li ze *Igbae* 2.2 ‡ 4:5 Li ze *Iwolo* 95.11 § 4:7 Li
ze *Iwolo* 95.7-8

“A kha suọ uruli oyọli Amo,
a khi zese udu-a.”[§]

⁸ Ini iJoshua ọọ ri iyemhẹa na wẹ lọ, Eshinẹgba ọa kha gbo te ikpukhokho ri ogbẹlẹ olese shi ekẹ na wẹ.*

⁹ Abi o li ena, Ogbẹlẹ iyemhẹa o kie la ọ, ni ẹgbọ eyi Eshinẹgba e la yemhẹ-a

¹⁰ Itobọ khi ọni ọ da lo iyemhẹa oyi Eshinẹgba ne, eri ọ li yemhẹ ikanya eyọli-a, abi Eshinẹgba ọ li yemhẹ eyọli-a.†

¹¹ Irarighọ, awa rọshẹka ini awa doḅe lo oni iyemhẹa oghọ, ini awa khi de itobọ khi awa khọnya wẹ riẹlẹ umhasueso.

¹² Irari khi eri ungmehi oyi Eshinẹgba o mhọli agbọ, ọọ gbe akanya. Ọ mu doḅe itakobi ọzalo eva kpa, ni ọọ gbese lo ọgbọ udu, o khueghie ọli-a, ni ọọ guanọ emini e la usamhi ali ayemhẹ, o gbo li gbese lo ikpẹsẹ ali ikhọrọ na elemhi igua. O doḅe ẹ khueghie ingeli ali isamhi na ekelemhi udu-a.

¹³ Emhikhoghuo ọa la emini a ma nya ni o sheli shi ọli ọ. Eri emhikpa e na khueghie-a shi ukpẹloe oyi Eshinẹgba, ikhi ọni awa ya ri abọ khasẹ abi awa li gbe.

Ijesu ọ khi Ọga Ọkpodalo-ugamhi Ọniemhi Oyawa

¹⁴ Irarighọ, a zẹ ni awa lolo mu irudunga ni awa mhọli mhue, abi o rọ da khia khi awa mhọli Ọga ọyi ekpodalo ugamhi ni ọ Funẹ ni ọ she je odalo oyi Eshinẹgba. Lọli ọ khi

iJesu Omi Eshinẹgba. ¹⁵ Ọa khi Ọga ọyi ekpodalo ugamhi ni ọa ya lẹlemhi awa shi emini awa do-a riẹlẹ. Ama ọni a she mu fẹ abi awa, odekhode ọ khi, ama ọa tigbe lamhẹ.

¹⁶ A zẹ ni awa ri igbedu ti deba Eshinẹgba ni ọ mhọli isomhelemhi. Aghọ awa te ya mie ilẹlemhi ali isomhelemhi ni o ya kpaghiẹ awa obọ ẹghẹghẹ ni awa rọ ọ nono ikpaghiobo.

5

¹ Ọga ọyi ekpodalo ugamhi, ni a da rọte elemhi ẹgbọ zẹ kpa, eri a zẹ ọli ni ọ ke migha na wẹ ingme ugamhi eyi Eshinẹgba. Ni ọ ke riẹlẹ irona ali iluasobo na wẹ shi olamhẹ eyẹwẹ.

² Ofiẹ ọ rọọ deba eni ẹa lẹsẹ emini aa li, ni ẹẹ da ode, itobọ khi lọli ọ li mhọli ode ni ọa te li gba pfo.

³ Onana o zẹ khi egbọli ọ kpẹ luasobo a na shi olamhẹ eyọli, neni ọ luasẹ na ẹgbọ nya shi olamhẹ oyẹwẹ.*

⁴ Ogbokhoghuo, ọa ya rue oni okhale ona ni a rọ lu ọgbọ shi Ọga ọyi ekpodalo ugamhi. Eshinẹgba lolighuo tse ọọ lu ọgbọ, ọ rọli khi Ọga ọyi ekpodalo ugamhi, ẹzẹzẹ abi a li lu Erọni.†

⁵ Ighọ iKirisiti ọa li mie oni okhale rọ lu egbọli Ọga ọyi ekpodalo ugamhi. Ama Eshinẹgba ọọ li, “Omimhẹ u khi,

Amo mhi te khi Itẹ.”‡

⁶ Ọ gbo ngme ọli shi ashese,

* 4:8 Li zẹ iDeut 31.7; iJosh 22.4 † 4:10 Li zẹ Igbae 2.2 * 5:3 Li zẹ iLev 9.7 † 5:4 Li zẹ Okiali 28.1 ‡ 5:5 Li zẹ Iwolo 2.7

“Okpodalo-ugamhi oyi Eshinegba
u khi agboagbo,

ezeze onabi iMekizedeki.”§

⁷ Abi iJesu o ro la agbo,
atsese ali iku-ame-ewie alo
iJesu o roo so iromhi lema
Eshinegba, oni o kha tsumhi
oli obo eghuli. Itobo khi eri
o ri egboli tiemhile, ri egboli
na Eshinegba pfo, loli o ro suo
iromhi eyoli.*

⁸ Abi o rie khia khi Omi
Eshinegba o khi, osoli ni o
me, o roli wena isueso na
Eshinegba.

⁹ Abi a ro roli gba pfo se,
obo oyoli eni e suo eso nali e
ke rote mholi imiepfuese na
agboagbo.

¹⁰ Eshinegba o ze oli Oga
oyi ekpodalo ugamhi, onabi
iMekizedeki.

*Ogbo khi pfi irudunga ona
shi eke*

¹¹ Emhi ebubu e la o ni awa
ya ngme shi eni ingme enana,
ama o ma a munu ni a ro
zolo we-a lo e eso, itobo khi aa
mholi oghuemhe ni a ro suo.

¹² Abi o rie khia khi a she
ramhi eni ee esese egboese,
ni a ro kie khi eni a sese
owena eni odode eyi ingme
Eshinegba egho, enyeli o ti e
egbe a te eminale ni o toto ne.

¹³ Onini o da kiele e nye
enyeli ne, eri o li abi omo ni o
lolo mholi ilese shi osese igue-
ngeli.†

¹⁴ Ama eminale ni e toto,
eni e womhe eloe ee le. Ikhi
eni e ri itobo eni eminale ni e
toto ni ee le eghenge kpa lese

ikhioda shi emini o migha shi
onete ali onobe.

6

¹ Irarigho, a ze ni awa je
odalo shi osese ni e womheloe
ni awa pfi osese ni a ro gba
ingme eyi iKirisiti eke le. Awa
khi ke gbo tiemhi eke je osese
ena imupfi rote ikanya ebe
lasele, ali osese ena irudunga
Eshinegba,

² ali osese ibatizi, ali irobo-
nga ogbo egbe, ali irote eghuli
guale oyi eni e ghua, ali osese
oyi iguezo ni ogbo la je obini o
ya la agboagbo.

³ O kha ghole Eshinegba awa
ya je odalo elemhi owena.

⁴⁻⁶ Egbo ni e she kpe me
akpa, ni e she kpe mie
isomhopfa oyi iloghie ghue,
ni e kpe mie Ayemhe-
nopfuese, ni e she lese onete ni o
la ungmehi oyi Eshinegba ali
ekpabo oyi agbo ni oo bhale,
ni e tigbe tsua irudunga
oyewe pfia, o ke ze e ri ele ni
a dobe nyene we gbolo bhale
imiesuo, aborokhia khi eri e
she gbolo ta Omi Eshinegba
ma apfida utonuzi-eva, ri
omama mu oli gboo.

⁷ Eri awa egbo awa li abi
eke. Ini amee o ru e shi eke
ni emhi ekomhi e ro ze na
oghiale, ikhivose oyi Eshinegba
o khi.

⁸ Ama ini o ze igba ali
ebuli-a, ogbo o mholi emini
a roli ya ri ele, o ya la okhena
ipfunu-a oyi Eshinegba ali khi
a ya ri erali tose oli-a.*

§ 5:6 Li ze Iwolo 110.4 * 5:7 Li ze iMat 26.36-46; iMak 14.32-42; iLuk 22.39-46

† 5:13 Li ze 1 iKori 3.2 * 6:8 Li ze Igbae 3.17-18

⁹ Emọle mhe, ini anye rie lina a ngme i, anye lese khi ọa khi e e o nu ngme, anye lese gboo khi emini e ti egbegbo a riele, enabi egbo ee riele ini a mie we e pfuese.

¹⁰ Eshinegba ọa ya gbe ogbo azeba. Ọa ya yele ikanya ni u gbe-a ali inono ni u rokhase khi u nono ọli abi u li ri ikpaghiobo na egbo eyoli ni u kiele e kpaghiwe we.

¹¹ Anye e nono ni ogbogbo o mu omuegbe ni o mholi mhue ya ramhi ukpese, ni o rokhase abi irudushi oyoli o toto ramhi.

¹² Anye ea nono ni a mele ewaza-a, ama ni a ke khonya eni e rote irudunga ali irobomudu mie ishobo oyi Eshinegba.

Ekha oyi Eshinegba ọa ya fiakua

¹³ Abi Eshinegba o ro tse ekha na Aburaamu, Eshinegba o romhi egboli aborokhia khi ogboese ọa ke gbo fu dose oli ni o ke ya romhi.

¹⁴ Oo li, "Mhi mema ya khi vose ne, mhi ya re mholi eniye ali imi-imi ni e bu."[†]

¹⁵ Aburaamu o ri abo mu udu, irarigho o me emini Eshinegba o ro tsekha nali mie.

¹⁶ Ini ogbo o tse ekha, ogboese ni o fu dose oli oo romhi ni o mu oni ekha migha, egheghe akhokhomhe ọa ke la o, oni ekha o migha.

¹⁷ Eri Eshinegba o romhi isheli ro roli khase eni o tse

ekha na gboo, khi emini loli ro tse ekha khi loli ya riele oli, khi ọa ya fiakua.

¹⁸ Irarigho, Eshinegba o ro ri emhi eva ena shi eke; ekha ali isheli ni o romhi. Eni emhi eva ena ea ze mupfi irari khi Eshinegba ọa tigbe ya lo egbholi ghue. Irarigho awa ni awa she na deba li shi akhukhu, awa ya mholi iregbeda abi awa li mu irudushi oyoli ni o la odalo mhue.

¹⁹ Eri oni irudushi ona o li abi azu ni o toto ni o migha gbaa, ni ayemhe oyawa o mhue. Onana o ri awa dobe dose ode ugbakpi ni a ro pfa ode ni o lo ashini o pfuase ne nya-a.[‡] ²⁰ Ijesu o she ralo itobo oyawa, o mele Oga oyi ekpodalo ugamhi na agbogbo-a, onabi iMekizedeki.S

7

iMekizedeki okpodalo-ugamhi oyi Eshinegba

¹ Oni iMekizedeki ona, oghie oyi eoli iSalemu o khi, o gbo khi okpodalo-ugamhi onayi Eshinegba ni o Yagha ne nya. Abi Aburaamu o ro rote okholi ni o la gbe ighie okholi jele, iMekizedeki o ya ee oli ode, o so iromhi khivose na Aburaamu.

² Igho Aburaamu o rote itsua ni o rote okholi ti nya ze aze-oghwo-igbe na li. Emi ni a ri iMekizedeki ngme khi, "Oghie Igue-ngeli," emini a

[†] 6:14 Li ze Igbae 22.16-17 [‡] 6:19 Li ze iLev 16.2 § 6:20 Li ze Iwolo 110.4

* 7:2 Li ze Igbae 14.17-20

ri oghie iSalẹmu ngme khi, ne.
 “Oghie opfomhẹ.”*

3 Oa mhue ita wẹkhi inyo, wẹkhi eri o mholi unuekpẹ ni o te lasese, wẹkhi eri a mhue ashini a keke abi a li bia li ali abi o li ghu-a shi. Abi Omi Eshinegba, Okpodalo-ugamhi oyi Eshinegba na agboagbo o khi.

4 Waà mẹ ashini o fu ramhi. Egbegbi Aburaamu oni o gba ushishi egbo iZireni eke le, o ze aze-oghwo-igbe epfue ni o tsua rote okholi ni o ye na li.

5 Eri ushi oo Imi iLiva ni e khi ekpodalo-ugamhi eyi Eshinegba e ke mieno egbo iZireni ni e khi inyoghwo we, aze-oghwo-igbe, aboriekhia khi imi-imi Aburaamu e ga khi.†

6 IMekizedeki oa khi omi iLiva, ama o mie Aburaamu aze-oghwo-igbe, so iromhi khivose na li, ikhi omose ni o mie ekha ni Eshinegba o shi na li.

7 Akhokhomhẹ oa la o khi ogbo oni kpeda, oo so iromhi ikhivose na oni o kpoke.

8 Eralo-ugamhi eyi Eshinegba ni ee mie aze-oghwo-igbe, egbo ni ee ghu-a e khi. Ama iMekizedeki ona o fu dose we nya itobo khi a gueye awa khi agboagbo o la o le.

9 Ogbo dobe e lie khi imi imi iLiva ni ee mie aze-oghwo-igbe, e she li ze oni aze-oghwo-igbe ona rote obọ oyi iti-iti itawe Aburaamu.

10 Itobo khi eghẹghẹ ni iMekizedeki o ro me Aburaamu, iLiva o kie la elemhi oyi Aburaamu. Ogbo a bia li

Abi iJesu ali iMekizedeki e li kpo egbe

11 Irari khi ini akanya eghiele ekpodalo-ugamhi eyi Eshinegba, ni Ushi oyi iMosisi o ro migha, ni imi imi iLiva ee gbe, o dobe ri ogbokhoghuo gba pfo lo, aa kha ke gbo ri okpodalo-ugamhi oyi Eshinegba olese lasese, oni o li abi iMekizedeki, ni oa khi unuekpẹ oyi iLiva wẹkhi oyi Eroni.

12 Irari khi ini a mu eghiele ona ekpodalo-ugamhi eyi Eshinegba pfi, a mema li ya mu ushi pfi.

13 Onomhwe oyawa ni a ngme ingme oyoli ena, edeli olese o te lasese. Ogbokhoghuo oa rote oni edeli oyoli gbe akanya okpodalo-ugamhi oyi Eshinegba ukhomhi atete ghue.

14 Awa ga lese gboo khi Onomhwe, edeli iJuda o te lasese. IMosisi oa teva oni edeli abi o ro o ngme ungmehi oyi ekpodalo-ugamhi eyi Eshinegba.

15 Ibhale ni okpodalo-ugamhi oyi Eshinegba olese ni o li abi iMekizedeki o bhale, o rokhasẹ gboo khi ushi oyi Eshinegba o she mu pfi.

16 Oa khi itobo khi o rote edeli oyi iLiva lasese abi ushi oo a ke li, lolu a ro ze oli okpodalo-ugamhi oyi Eshinegba, ama itobo khi lolu o mholi ekpabo ni o ro o la agbo agboagbo.

17 Itobo khi Ebe-no-pfuase o ngme oli khi,

† 7:5 Li ze iNoba 18.21

“Okpodalo-ugamhi
 oyi Eshinegba
 ele na agboagbo u khi,
 onabi iMekizedeki.”‡

18 Eri a ri obo gbe ushi
 oni elele nye, itobo khi o
 mholi ekpabo wekhi eri o gbe
 akanya.

19 Irari khi Ushi oyi iMosisi o
 dobe ri emhikhoghwo gba pfo.
 Memena irudushi oni o ti ne a
 ke ro na awa, ni o ri awa dobe
 ti bhale mama Eshinegba.

20 Eshinegba o gbo romhi
 ishe ma o khi iKirisiti khi
 okpodalo-ugamhi oyi Eshinegba
 o ya khi agboagbo. Oa romhi
 isheli abi a ro ri egboese ya
 le oghie ekpodalo-ugamhi eyi
 Eshinegba.

21 Ijesu tse a romhi isheli ro
 le eghie abi Eshinegba o re.

“Mhemhe Onomhue
 mhi she shi-emu, khi
 ‘Okpodalo-ugamhi oyi Eshinegba
 u ya khi agboagbo.

Mhi aa ya da o ghue.’”§

22 Itobo oni emue ni Eshinegba
 o shi, ijesu o ro khili oni
 iregbenga ni o ri awa mholi
 ishobo onogbo ni o tine.

23 Ikhioda olese ni o gbo
 la akaghwo khi, ekpodalo-
 ugamhi eyi Eshinegba ebubu
 elese e la o egheghe ishobo
 onodiwo. Egheghe aghwo ini
 okpodalo-ugamhi oyi Eshinegba
 o ghua, olese o to elolo oli.

24 Ama eri ijesu o la o agbo
 le agboagbo, akanya okpodalo-
 ugamhi oyi Eshinegba oyoli, eri
 o migha agboagbo ni o za ze e
 kpe na oghoese.

25 Irarigho, o dobe ya
 tsumhi eni e ri eva oyoli bhale
 deba Eshinegba zeghele. Itobo
 khi eri o la o agboagbo, oo
 lema na we.

26 Ijesu o khi oni Okpodalo-
 ugamhi oyi Eshinegba ni o
 kpeda, ni o ri emini awa nono
 na awa. Oni o pfuase o khi,
 o mholi umhaguekia wekhi
 olamhe shi egbe. A she zolo
 li iteva ena olamhe lasela, a
 yase oli nga yagha dose idane.

27 Oa li abi Ega eyi
 ekpodalo-ugamhi eyi
 Eshinegba elese ni e kpe luase
 obo oyi igbe-olamhe kua na
 egbewe elekhele, neni e tigbe
 e luase na egboese. Iluasobo
 oghwo iKirisiti o lese luase
 utoghwo kpele shi olamhe
 oyi egboese abi o ro ri egboli
 luasobo.*

28 Egbwo eni mhue ashini o
 kie kpo we le shi, Ushi oyi
 iMosisi oo ze shi Oga oyi ekpo-
 dalo ugamhi, ama ishobo ni
 Eshinegba o ri isheli shi, ni
 o kpe ukhokho bhale khe
 Ushi oyi iMosisi, o ro ze Omi
 Eshinegba, ni a she ro khi oni o
 gba pfo agboagbo.

8

*Oga oyi ekpodalo ugamhi
 ona Ishobo onogbo*

1 Ozukhomhi emini anye e
 ngme na. Awa mholi Oga
 oyi ekpodalo ugamhi, ni o
 shito ukiekie obita omhesa
 oyi Eshinegba ni o mholi ek-
 pabo nya na obini iloghie
 agboagbo.*

‡ 7:17 Li ze iwolo 110.4

§ 7:21 Li ze iwolo 110.4

* 7:27 Li ze iLev 9.7

* 8:1

² ni ọọ ga abi Ọga
 oyi ekpodalo-ugamhi eyi
 Ẹshinẹgba elemhi Okholo ni
 a ri ode ghi ni o khi egbegbi
 igholo ni o la iloghie, oni
 Ọnọmhuẹ lọlighuo ọ tọ, ni ọa
 khi abọ eyi ẹgbọ a rọ tọ li.

³ Eri a zẹ eni e kpeda
 na ekpodalo-ugamhi eyi
 Ẹshinẹgba kpa ni e ri
 isomhopfa ali iluasobo ke
 luasẹ. Lọli o zẹ khi Ọni ọ
 kpeda na ekpodalo-ugamhi
 eyi Ẹshinẹgba oyawa, ọ mema
 mhọli emini ọ li rọ ya luasẹ.

⁴ Agbọ ọ kha la lọ, ọa
 kha fẹ khi ọkpodalo-ugamhi
 oyi Ẹshinẹgba, aborọkhia
 khi ekpodalo-ugamhi eyi
 Ẹshinẹgba ni ẹ deba ushi oyi
 ẹgbọ iJu e la aghọ eghọ.

⁵ Okholo ni a ri ide tọ ni e
 la ga, irọkhọkhọ ali aroro oyi
 emini e la iloghie e khi. Lọli
 o zẹ khi abi iMosisi ọ rọ ya tọ
 oni igholo, khi Ẹshinẹgba ọọ li,
 “Zobe ni a bhale ya ẹ khi abi a
 li rẹ wẹ khasẹ ukhomhi ute, u
 li ya riẹlẹ wẹ tee.”†

⁶ Ama, memena, akanya
 ọkpodalo-ugamhi ni a rọ na
 iJesu, o mu ẹloe dọsẹ oni a rọ
 na ekpodalo-ugamhi enedio,
 ẹzẹzẹ abi ishobọ ni ọ migha
 shi rọ gbe akanya o li mu
 ẹloe dọsẹ onodio, itobọ khi o
 migha nga irọnga eni e ti nẹ.

⁷ Ini ishobọ oni ododẹ ọa
 mhọli ashini o kpọli le shi lọ,
 ọgbọ ọa kha ke mhọli emini a
 ri ishobọ olese ẹ riẹlẹ.

⁸ Ama Ẹshinẹgba ọ mẹ
 ashini ẹgbọ eyọli ẹa kie te gba
 pfo, lọli ọ rẹ.

“Oni ogbele ọọ bhale,
 ni mhi rọ ya shobọ
 onogbọ

na ẹgbọ iZireni
 ali ẹgbọ iJuda.

⁹ Ọa ya li abi ishobọ
 ni mhi nu iti-itita wẹ shi,
 ogbele ni mhi mu wẹ oobọ
 rọte eke ijipiti ya fiẹ.

Ẹa ri igesikia deba
 oni ishobọ ni mhi nu wẹ
 shi,

itobọ ighọ mhi rọ
 rue wẹ ẹloe egbe-a.

¹⁰ Ọnọmhuẹ ọọ,
 ogbele ni ọọ bhale,
 Ishobọ ni mhi ya shi
 na ẹgbọ eyi iZireni na,
 Mhi ya ri ishi eyemhẹ
 shi wẹ isamhi,
 mhi keke ọli shi wẹ udu.

Mhi ya khi Ẹshinẹgba oyewẹ,
 wewẹ e khi ẹgbọ eyemhẹ.

¹¹ Ọngewẹ ọa ke ke sesẹ
 ọnuzava oyọli, wẹkhi eri

ọ ya liẹ inyoghuo ọli,
 ‘Lese Ẹshinẹgba.’

Itobọ khi wewẹ nya
 e ya lese mhẹ,

rọte oni ọ kpọkẹ nya
 ya je oni ọ funẹ nya.

¹² Mhi ya ri olamhẹ topfa wẹ,
 mhi aa ke gbo ya sato
 ipfido oyewẹ.”‡

¹³ Abi ọ rọ da lu ishobọ
 onana, “Onogbọ” eghọ, o she
 ri oni ododẹ mele onodio-a.
 Emini o da mele onodio-a ni o
 she ẹ womhẹ, o kele ya kele-a.

9

*Ugamhi na iloghie ali eke
 agbo*

1 Ishobọ onodode o mholi ishi ni a ro o ga ugamhi, o gbo mholi igholo ni a ri ide ghi shi eke agbo.

2 A to okholo ni a ri ide ghi gashe shi elemhi oni igholo. Elemhi owa eva e la o oni okholo. Elemhi owa ni a kpe ramhi aa lui, Asha no Pfuase. Akaghọ a ri emini a ri akpá ru e nga shi, ali itebu ni a ri ibuledi ni o pfuase e nga.*

3 Elemhi owa onuzi-eva ni o kpe oobọ na ode ugbakpi ni a ro pfa ode-a, a lui Ashini o Pfuase ne nya.†

4 Aghọ adido igolu ni a la tose ituale afu eera ni e e pfie o la. Akpati ishobọ ni a ri igolu ku o li la Ashini o Pfuase ne nya. Oni akpati ona, omi utasa igolu o la o ni a ri ibuledi imana a shi.‡ Aghọ a li ri orokpo oyi Erọni ni o ze ukhuli shi, ali ipememhi eche eva ni a keke ishi shi.§*

5 Ikpeda na oni akpati ona, a ma emhi eva ni e li abi igeni ni e ze ipfua shi, ni e so alo ghue ufumhi oyi Eshinegba. E naghie ipfua eyewe-a guese ashini a la ri olamhe e topfa. Ama ọa khi memena awa ya me eghenge ro ke tonọ eni emhi ena nya ramhi udi we pfo.†

6 A kha da she lina ri emhi ogbogbo nya shi ashini a roli e shi se, loli eni e e ralo ugamhi e ro o lo elemhi owa onodode

ya gbe akanya ododa eyewe ogbele kpa.‡

7 Ama Oga oyi ekpodalo ugamhi lolighuo tse o dobe e lo elemhi Owa Ni o pfuase ne nya ni o la o. Utoghuo elemhi ukpe o lese e lo akaghọ. Olia eni o ro luasobo na egboli ali egboese shi olamhe ni e lamhe elemhi umhaleshe, oo rue e mholi obọ lo akaghọ.§

8 Eri Ayemhe-no-pfuase o ri onana guele khi, ogbo ọa khueghie ode ni o lo elemhi Owa ni o Pfuase ne nya-a, na ogbokhoghuo ne, ini okholo onodode o kie migha.

9 Eri emhi enana e khi irokhokho na awa eghenge ana. Emini onana o ngme khi irona ali iluasobo eyi elamhako ni a luase ukpe khi ukpe khi, ọa dobe khueshe eni e bhale ya ga Eshinegba udu-a pfuase, rewe gba pfo.

10 Ingme eminale, ali onyo ali ikpegbe-a enana e migha shi, ni e khi ushi na elee. Eri ushi onana o gbe akanya ramhi eghenge ni Eshinegba o ro ri ushi onogbo shi eke.

Olia eyi iJesu

11 Ama iKirisiti o she bhale abi Oga oyi ekpodalo ugamhi, ni o khi oyi eminete ni e she bhale. O she lo elemhi Okholo ni a ri ode ghi ni o fune ogho ni o gba pfo, ni o

* 9:2 Li ze Okiali 26.1-30; 25.31-40, 23-30 † 9:3 Li ze Okiali 26.31-33 ‡ 9:4 Imana khi eminale ni Eshinegba o rote idane ruese kule abi amena na eniye iZireni abi e ro rote iJipiti vu je eke ishobọ, ni a lu iKena

§ 9:4 Eri orokpo onayi Erọni ni a ngme * 9:4 Li ze Okiali 30.1-6; 25.10-16; 16.33; iNọba 17.8-10; Okiali 25.16; iDeut 10.3-5 † 9:5 Li ze Okiali 25.18-22 ‡ 9:6

Li ze iNọba 18.2-6 § 9:7 Li ze iLev 16.2-34

la iloghie, ni ọgbọ ọa ri abọ to wẹkhi eri o la eke agbọ.

12 Abi iKirisiti ọ rọte elemhi oni okhọlo lo oni elemhi Owa ni o Pfuase nẹ nya, ọa rue ọlia eyi elamhi ali ena ya luase obo, ama ọlia eyi lẹlighuo ọ rue utoghuo kpele rọ mie ipfasheke na agbọagbọ na awa.

13 Eri ọlia eyi elamhi ali ena, ali emue eyi ozele ẹna ni a tose-a, ni áá miatse ku ẹgbọ ni ẹa pfuase, o rewe khi eni e pfuase idiegbe.*

14 Seẹ ọlia eyi iKirisiti ẹa ke lie li dobe khuese udu oyawa-a pfuase, rọte ikanya ni ẹẹ pfi eghuli. Ikhi oni ọ rọte ekpabọ Ayemhe oyi Eshinegba ri egbọli na Eshinegba abi iluasobo ni o gba pfo itobọ olamhe eyawa-a, ni awa dobe ke ga Eshinegba ni ọ la ọ agbọagbọ.

15 Itobọ ona iKirisiti ọ rọ migha iteva Eshinegba ali ẹgbọ ri ishobọ onogbọ ona gbe eke, ẹghẹghẹ aghọ ni eni Eshinegba ọ lu, e li mie ugu na agbọagbọ ni Eshinegba ọ rọ nga. Onana o ya zẹ li, itobọ khi ọ ghu eghuli ni ọ rọ gbe olamhe ni ẹgbọ e lamhe ẹghẹghẹ ishobọ onodode kua.

16 Ini ọgbọ ọ keke shi eke abi a li ya kemhi ugu oyọli se, ni ọ rọ ghua, a mema ya me ọli me gbo khi ọ she ghua neni ọgbọkhoghuo ọ ya me emhikhoghuo le ugu.

17 Irari khi emhi afue oni ebe ni a keke abi a li ri ugu ya kia o ya khi, ini oni ọ keke ọli ọ da kie la agbọ ne. Ama ini ọ

ghu-a se, a rọ tigebe ri ọli ẹ gbe akanya.

18 Ona o zẹ khi ishobọ onodode ọa kha zẹ rọ gbe akanya ini ọlia ọa ma ọ lo.

19 Abi iMosisi ọ rọ zẹ ishi eyi Eshinegba ye eni ẹgbọ se, ọ rue ọlia eyi ena ali elamhi, ọ ku amẹ shi ọ. Ọ rue uguabọ ọọra ni a khili oolu opfopfo shi, ọ rọli miatse eni ọlia shi oni emini a keke ishi nya shi, ọ gbo li miatse ku ẹgbọ nya.

20 Oọ we, “Ọlia eyi oni ishobọ na, ni Eshinegba ọọ awa rọ ghue.”†

21 Ighọ ọ gbo li miatse eni ọlia shi oni owa ugamhi ali emhi nya ni a rọ la ọ riele ugamhi.‡

22 Abi o li, khi, eri ushi ọọ a ri ọlia ri emhi nya khi eni e pfuase, ali khi ini aa li ri ọlia luase, irolamhe-topfa ọa la ọ. §

23 Owa Oyi Eshinegba na eke agbọ ni a lina ri ọlia rọ khi oni o pfuase, irokhokho oyi owa ugamhi na obini iloghie o khi. Ama emini e la obini iloghie, iluasobo oni o tine a mema rọ ya rewe shi ipfuase.

24 IKirisiti ọa lo elemhi okhọlo ni a ri ode ghi ni ẹgbọ e ri abọ ma ni o khi irokhokho eyi egegbewe. Ama iloghie ọ ri ochoghọ ya lo, ni ọ la migha odalo oyi Eshinegba na awa memena.

25 Wẹkhi eri iKirisiti ọ lo iloghie ya ri egbọli luasobo iti-ingmingme, abi Oga oyi ekpodalo ugamhi ọ lie tsua ọlia eni ẹa khi eyọli ẹ lo elemhi

* 9:13 Li zẹ iLẹv 16.15-16; iNọba 19.9,17-19 † 9:20 Li zẹ Okiali 24.6-8 ‡ 9:21 Li zẹ iLẹv 8.15 § 9:22 Li zẹ iLẹv 17.11

Owa ni o Pfuase nẹ nya, ukpe-khi-ukpe ya luase.

²⁶ Igho ó kha khi lo, eri iKirisiti o kha me osue itingmingme abi a te ma agbo. Ama o a khi igho. Eri o bhale utoghuo tse abi oni eghẹghẹ o ro gba, ni o ro ri egbo li luasobo ro rue olamhe ode-a.

²⁷ Ezeze abi ogbo o lie ghu-a utoghuo tse, o kha da ghu-a se, o bhale shi iguezo.

²⁸ Igho a li ri iKirisiti luasobo utoghuo kpele ni a ro shishi olamhe oyi ebubu egbo-a. O ya gbo bhale utonuzi-eva. O a khi ni o ro gbo tsua olamhe, ama ni o ro tsumhi eni e migha a khe oli.*

10

Iluasobo utoghuo kpele oyi iKirisiti

¹ Ugamhi onodio ni a ga eghẹghẹ Ushi oyi iMosisi, aroro oyi eminete ni e bhale e khi. E a khi wewe e khi egbegbewe we. Eni iluasobo ni a kpe luase eghẹghẹ agho ukpe kpa, e a tigbe dobe ri ipfuase ni o gba pfo na eni bhale odalo oyi Eshinegba ya ga ugamhi.

² Ini eni iluasobo ee dobe ri eni egbo pfuase lo, a kha yemhe eni iluasobo a? Irari khi e kha ri eni e bhale ya ga pfuase utoghuo kpele, ni udu oyewe o a ke mholi umhaguẹkia.

³ Ama eri eni iluasobo e yele egbo olamhe eyewe le ukpe khi ukpe.

⁴ Irari khi o lia eyi ena ali elamhi e a dobe rue olamhe ode-a.

⁵ Irarigho, abi iKirisiti o ro ya bhale agbo, oo Eshinegba, "Iluasobo ali isomhopfa e a ghole e.

Ama u she ri idiegbe na mhe, ni mhi ri ungmehi oye gbe akanya.

⁶ Iluasobo eni a tose ali iluasobo igbe-olamhe kua e a tigbe ti e eloe.

⁷ Igho mhi re,

'Ghe mhe ana,

Eri mhi bhale ya ri ele

oghuemhe oye, Eshinegba.'

„*"

⁸ O te eke ya ngme, oo, "Iluasobo ali isomhopfa e a ghole e, wekhi iluasobo eni a tose ali iluasobo igbe-olamhe kua e ghole e, wekhi eri e ti e eloe." Ama khi a lese khi eri ushi oo a mema ligho ke ri ele we.

⁹ Igho o ke re, "Ghe mhe ana Eshinegba, eri mhi bhale ya ri ele oghuemhe oye." Eri o ri obo ri iluasobo eni elele shi eke, o ri iluasobo oyi iKirisiti to eloli we.

¹⁰ Itobo khi iJesu iKirisiti o ri ele oghuemhe oyi Eshinegba, loli o ze ni a ro ri iluasobo ni o ri idiegbe oyoli luase utoghuo kpele khusa awa nya olamhe-a pfuase.

¹¹ Elekhele, ekpodalougamhi eyi Eshinegba nya e ro gbe ikanya ugamhi eyewe, eri e ri ele eni iluasobo gbo ri ele iti ingmi-ingme, ama e a tigbe dobe rue olamhe ode-a.†

* 9:28 Li ze Aza 53.12

* 10:7 Li ze Iwolo 40.6-8

† 10:11 Li ze Okiali 29.38

12 Ama abi iKirisiti, oni ọkpodalo-ugamhi oyi Ẹshinẹgba ọna, ọ rọ luasobo utoghuo kpele oyi igbe-olamhẹ-kua ni o khi oyi ona agbọagbọkpa, ni ọ rọ shitọ obita oyi Eghiele oyi Ẹshinẹgba.

13 Aghọ ọ ke shitọ migha a khẹ ẹghẹghẹ ni Ẹshinẹgba ọ rọ ya ri ebe ọli mele akphawẹ-nga eyọli-a.‡

14 Irari iluasobo utoghuo kpele ni ọ luase ọ rọ ri ẹgbọ eni ọ rọte olamhẹ pfuase khi eni e pfuase agbọagbọ.

15 Ayemhẹ-no-pfuase ọ gbo pfi ọtsẹle shi ona ye awa. Oni odode, ọọ,

16 “Ishobọ ona mhi ya nu wẹ shi.

Ọnọmhuẹ ọ ngme ghọ khi, oni ẹghẹghẹ oghọ o kha ramhi,

mhi ya ri ishi eyemhẹ shi wẹ udu,

mhi kẹkẹ ọli shi wẹ ayemhẹ.”§

17 Ọ ke gbo rọ ma ọ khi, “Mhi aa ke ya sato olamhẹ ali ikanya ebe eyẹwẹ.”*

18 Irarighọ, a kha she da ri ena topfa se, ọgbọ ọa ke gbo mhọli emini a ri iluasobo irue-olamhẹ ode-a ya riẹle.

A zẹ ni awa ti bhale deba Ẹshinẹgba

19 Irarighọ, inyoghuo-mhẹ, aborokhia ọlia eyi iJesu e ri igbedu na awa rọ lo Ashini o Pfuase nẹ nya eghọ,

20 ikhi ode onogbọ ni o mhọli agbọ, ni o ri awa te ode

ugbakpi ni a rọ pfa ode-a a doṣe.

21 Abi o rọ gbo li khia khi awa mhọli ọkpodalo-ugamhi oyi Ẹshinẹgba ọniemhi ni ọọ mhẹse shi Owa ugamhi oyi Ẹshinẹgba na iloghie eghọ,

22 awa ri udu igesikia ali irudunga ni o migha gboo ti bhale deba Ẹshinẹgba. Awa gbo mhọli udu ni a ri imiatse ọlia eyi iKirisiti rọ khi ipfuase ni ẹa ke mhọli umhaguekia, ali awa mhọli idiegbe ni a ri amẹ khuṣe-a pfuase.†

23 Awa mu irudushi ni awa guele khi awa mhọli mhue gagaga, irari khi Ẹshinẹgba ni ọ shobọ na awa, ọni a ri egbe ẹ nga ọ khi.

24 Awa ke sa abi awa li ya ke ri udu shi egbe ọ, ni awa ke riẹle inono ali awa gbe ikanya enete.

25 Awa khi ti egbe ilona oyi egbawa je ukhokho, abi ẹgbọ eghuo ẹẹ li, ama, awa totobọ ke ri udu shi egbe ọ, aborokhia khi u mẹ khi Ogbẹle oyi Ọnọmhuẹ o shi ti ẹ bhale.

26 Irari khi iluasobo olese ọa ke gbo laọ ni o ya rue olamhẹ ode-a, ini awa mema famhi ẹ lamhẹ, ikpukhokho khi a she kpe gue oni igesikia ye awa ne.

27 Emini ẹgbọ eghogho e ke ya shitọ ke khẹ khi iguezọ ni o ri ulishi ẹ mu ali erali na biobiobio, ni o ya pfuse eni ẹa ya suọ esọ na Ẹshinẹgba-a.‡

28 Ọnini ọ da gbe Ushi oyi iMosisi-a, ni a rọ da ri ọli gue

‡ 10:13 Li zẹ Iwolo 110.1 § 10:16 Li zẹ iJere 31.33 * 10:17 Li zẹ iJere 31.34

† 10:22 Li zẹ iLẹv 8.30; Ezik 36.25 ‡ 10:27 Li zẹ Aza 26.11

ẹzọ, ni ọ rọ da lue ne, ni a rọ mẹ ọtsẹlẹ ẹgbọ aava okekhi aase, eri a gbe ọli-a, ni ọa mhọli ilelemhi. §

29 Sẹ u sa khi a kha li nase eni e ri awẹ wu Omi Ẹshinẹgba eke-a, ni e ri ukpẹloe gbe ọlia ni Ẹshinẹgba ọ rọ riẹlẹ ishobọ, ikhi ọlia ni o khuẹsẹ wẹ olamhẹ-a pfuase, ali eni o khia khi eri e zẹ ẹmuẹbe na Ayẹmhẹ Okhale?*

30 Irari khi awa lẹsẹ ọni ọọ, “Mhẹmhẹ mhi ya nase eni e lina ngeli, Mhi ya fali oru,” ali ọni ọ gbolo ẹ, “Ọnọmhue ọ ya ri ẹgbọ eyọli gue ẹzọ.”†

31 Irari khi emhi okhena o khi ni ọgbọ ọ rọ ya pfi obọ lo ingme oyi Ẹshinẹgba ni ọ la ọ.

32 A ke sato ẹghẹghẹ ni a rọ lẹsẹ mie oni ákpá, ni a rọ migha mu imiesuọ oye ẹ mhue, aboriẹkhia khi àá na ẹ ukpokpomhi osoli shi ọ.

33 Isheghuo, eri ẹgbọ e ga la igbaa a pfi itsue manya ẹ, a mu okhọli vule shi ẹ ọ. Isheghuo, a kugbe ẹgbọ elese ni a lighọ mu okhọli vule shi ọ.

34 Elemhi eni e la ọgba ighumha ee ala ẹ. Abi a rọ ri itoto mie ẹ itsua, aa khako, a ri oghẹlẹ rue wẹ obọ-a na wẹ, itobọ khi a lẹsẹ khi a mhọli itsua eni e tinẹ ni e ya la ọ agboagbo.

35 A khi tsua igbedu oyeẹ pfiá, irari khi o ma mhọli eleli oniẹmhi.

36 A mhọli iregbemie, ni a bhale ya ẹ khi ini a dobe riẹlẹ

oghuẹmhẹ oyi Ẹshinẹgba se, ni a mie emini ọ rọ nga na ẹ.

37 Irari khi Ebe-no-pfuase o ngme ọli khi,

“Ini o riẹ tẹsẹ ukukuọ,
Oni ọ ya bhale ọ ya bhale,
ọa ya tẹsẹ.

38 Ama eni Ẹshinẹgba ọ pfa na, irudunga e rọ ya ke la agbo,
ama ini ọngewẹ ọ nyenẹ egbe ukhokho,
elemhi ẹa ya timhẹ deba li.”‡

39 Awa aa li abi eni ẹẹ nyenẹ egbe ukhokho ni e ya pfua, ama eni e miesuọ ni a mie pfuese awa khi.

11

Irudunga

1 Mena, irudunga khi, ini ọgbọ ọa mhọli akhọkhomhẹ shi udu shi emini ọ ri udu shi eke ẹ khe, ali ni ọgbọ rọ mhọli ọli shi udu gueguegue khi emini aa mẹ ne khi e la aghọ.

2 Irudunga ona, o ri ẹgbọ enedẹ le eva onete odalo oyi Ẹshinẹgba.

3 Awa lẹsẹ khi irudunga ona, Ẹshinẹgba ọ rọ ri ungmemhi oyọli ma emini awa mẹ ẹloe nya. Ni a rọ bhale ya ẹ khi, a rọte emini aa ya mẹ ẹloe riẹlẹ emini a mẹ ẹloe.*

4 Irudunga, o ri Ebeli ri iluasobo ni e ti dọsẹ eyi iKen na Ẹshinẹgba. Rọte irudunga oyọli, Ẹshinẹgba ọ rọ mie obọ shi ọ khi ọgbọ ni ọ mhọli an-geli onete ọ khi, abi Ẹshinẹgba

§ 10:28 Li zẹ iDeut 17.6; 19.15 * 10:29 Li zẹ Okiali 24.8 † 10:30 Li zẹ iDeut 32.35,36 ‡ 10:38 Li zẹ Abak 2.3-4 * 11:3 Li zẹ Igbae 1.1; Iwolo 33.6,9; iJon 1.3

o rọ ngme onete irona eyọli. Irudunga ona o ri Ebeli kiele ngme, abi o rọ ririę ghua.†

5 Irudunga a rọ rue Enọki agbọ vu, ini o khi mę eghuli. Ogbọ ọa ke mę ọli, irari khi eri Eshineęba o rue ọli nga idane. Neni a rue ọli vu, o mhọli ọtsele khi ogbọ ni o ri egbe mu Eshineęba o khi.‡

6 Ogbọkhoghuo ọa dobe ya riele emini e ri egbe e mu Eshineęba, ini ọa mhọli irudunga. Irari khi neni ogbọ ọ ya bhale deba Eshineęba, o mema mhọli irudunga khi o la agho, khi loli o somhi eni e kuegbe-a nono ọli opfa.

7 Irudunga o ri iNoa, abi o rọ suọ agua ni Eshineęba o tse ye ọli shi emini aa mę ne, roli ri ikuegbe-a ali ulishi oyi Eshineęba, khali oko-okę onięmhi ni o pfuese apfe ọli. Irudunga oyọli o ri umha miesuọ oyi eni egbọ na agbọ khasę gboo, ni o rọ mie ikhivose itobọ khi irudunga oyọli o ti Eshineęba eloe.§

8 Irudunga o ri Aburaamu vule abi Eshineęba o rọ lu ọli o vule ke je ashini loli shobọ khi loli rọ ya na li le ugu. O rọte eke oyọli vu, abi otseku khia khi ọa lese obini ọọ je.*

9 Irudunga o roli ngeli eke ishobọ abi ofese. Oọ la ifui okholo, igho li khi Aziki ali iGiekọpu, ni e ga le ugu oni ekha oghuo.†

10 Irari khi eri o ri eloe

shi eke khe ọoli oni o mhọli irogbekę, ni Eshineęba o vi ali ni o gbo khi atsona oyọli.

11 Irari irudunga a rọ ri Aburaamu dobe khi ita eniye abi o rọ ririę rọ she dose oni eghęghę ni o kha la dobe bia omọ ali ni iSera o rọ khi aga. Irari khi o lese khi Eshineęba ni o shobọ nali khi ọna igesikia o khi lo.‡

12 Rote obọ oyi Aburaamu, ni o li abi oni oyọli o she pfo se, a te mę imimi ni ęa ze leli abi ikpetata na idane ali ekhasę na ese oke onięmhi.§

13 Agbọ irudunga egbọ ena e kie la ramhi ni e rọ ghua. E kie miesuọ khi wewę e ya mie emini a rọ shobọ na wę. Eri e lese li rote odonue pfi alo o mę wę odalo, o ri egbe mu wę. E lama shi o khi ena ọoli oboese ali epfese wewę e khi shi elemhi eke agbọ.*

14 Ini egbọ e da lina ngme ne, eri o rokhase khi ọoli oni e ya ke lu oyewę ęę nono.

15 Ini eri ọoli ni e rote vu kha o la wę udu lo, e kha mhọli eghęghę rọ mu egbe pfi je obini e te vu.

16 Eri ọoli ni o tine o ri okiamhi i gbe wę, oni o khi ona iloghie. Irarigho, ọa ri omama mu Eshineęba khi ee lu lue Eshineęba oyewę, irari khi o she mu egbe ọoli shi eke khe wę.

17 Irudunga o ri Aburaamu ri Aziki luasobo, abi Eshineęba o rọ mu ọli fe bino.

† 11:4 Li ze Igbae 4.3-10 ‡ 11:5 Li ze Igbae 5.21-24 § 11:7 Li ze Igbae 6.13-22

* 11:8 Li ze Igbae 12.1-5 † 11:9 Li ze Igbae 35.27 ‡ 11:11 Li ze Igbae 18.11-14;

21.2 § 11:12 Li ze Igbae 15.5; 22.17; 32.12 * 11:13 Li ze Igbae 23.4; 1 Okhe

29.15; Iwolo 39.12

Lọli ni ọ she mie oni ekha, ọ nono ni lọli ri omi ọli ọtuoghwo kpe luasobo,†

18 aboriekhia khi Eshinegba ọ gueye ọli khi, “Rote Aziki u te ya mhọli imi imi e.”‡

19 Eri Aburaamu ọ sa li shi udu khi Eshinegba ọ dobe ya rote eghuli guise ọgbọ le. Eri o li abine khi eri oni Aziki ọ ghu-a egho, ni o rọ li abine khi eri Aburaamu ọ rote eghuli gbo mie Aziki.

20 Irudunga o ri Aziki ku isemhe na iGiekọpu ali iSọ shi emini a ya me odalo.§

21 Irudunga o ri iGiekọpu abi ọ rọ ya ghu-a sọ iromhi na imi iJosefu ava-ava, ọ da abo na Eshinegba abi ọ li kie ri egbe da orokpo oyoli.*

22 Irudunga o ri iJosefu, abi ọ rọ ya ghu-a ngme ingme abi eniye iZireni e li rote eke iJipiti ya vu shi eke. Ọ guele shi eke abi a ya li igua eyelue.†

23 Irudunga o ri eni e bia iMosisi roli sheli ramhi iki ese abi a rọ bia li se, irari khi ọa khi omọ na tse, ulishi ọa mu we ni e rọ ri ukpeloe gbe omhese oyi oghie.‡

24 Irudunga o ze khi abi iMosisi ọ rọ fu vule se, khi ọa lama a ke lu lue omi omi iFero onokpotso.§

25 Ọ lama khi lọli ya nu egbo eyi Eshinegba me osoli, ocho

ni lue rọ ya li agbo olamhe ukuku eghenge.

26 Ọ bino ọli khi, omama ni ọgbọ ọ ri itobo iKirisiti e me o mu eloe dose efue na iJipiti nya. Itobo khi eleli ni o la odalo ọ ri ukpeloe shi.

27 Irudunga o roli rote iJipiti vu, ni o khia khi ulishi el-emhi ibibi oyi oghie ọa mu ọli. Itobo khi o li abine khi eri ọ me Eshinegba ni aa ya me eloe, lọli ọa rọ mu egbe pfi.

28 Irudunga o roli ri Ukpe iPasova na iri-olia to ogbhele ko, ni ọ re, eniye iZireni e mi-atse ọlia ku shi ogbhele, ini ageti eghuli ọ khi gbe emodio eyewe-a.*

29 Irudunga o ri egbo iZireni dobe da oke oniemi ni a lu Oke Ifulo, abine khi eni e rote eke ifufu dose. Abi egbo iJipiti e rọ li mu ọli fe, khonya we, oni oke o to we lue.†

30 Irudunga o ri ugbe ni a khi gasẹ iJeriko de ya gbe abi egbo iZireni e rọ kia gasẹ ọli se ogbele ishilua.‡

31 Irudunga a rọ tsumhi iRé-àbu ni ọ khi adegbe ni ọa rọ nu eni ọa suọ esọ na Eshinegba pfua. Irari khi egbo iZireni ni a ghie e ka bena tokpe oni eke bino, ọ mie we shi owa.§

32 See mhi ke gbo ya ngme ma ọ? Mhi kie ke zono we? Eghenge ọa la ọ na mhe ni mhi rọ ya ngme ingme oyi

† 11:17 Li ze Igbae 22.1-14 ‡ 11:18 Li ze Igbae 21.12 § 11:20 Li ze Igbae 27.27-29,39-40 * 11:21 Li ze Igbae 47.31; 48.1-20 † 11:22 Li ze Igbae 50.24-25; Okiali 13.19 ‡ 11:23 Li ze Okiali 2.2; 1.22 § 11:24 Li ze Okiali 2.10-12 * 11:28 Li ze Okiali 12.21-30 † 11:29 Li ze Okiali 14.21-31 ‡ 11:30 Li ze iJosh 6.12-21 § 11:31 Li ze iJosh 2.1-21; 6.22-25 * 11:32 Li ze Egezo 6.11-8.32; 4.6-5.31; 13.2-16.31; 11.1-12.7; 1 iSam 16.1-1 Ighie 2.11; 1 iSam 1.1-25.1

iGidiḡni, iBaraki, iSamusi, iJefita, iDefidi, iSamuḡeni ali emekeḡuele eyi Eshineḡba.*

³³ Irudunga e rḡ mu omhḡḡ eyi ighie le, e mhḡḡ na ḡbḡ abi Eshineḡba ḡḡ li nono ḡli shi. E mie emini Eshineḡba ḡ tse ekha na wḡ. E ḡuese inu eyi idu,†

³⁴ e pfuse erali ebe-a, e na pfue eghuli ḡgbhḡrḡ. O lḡḡ wḡ, ama e toto-a, e khi idenḡmḡ elemhi okhḡli, e pfuse ekhḡli-okhuḡ eyi ḡoli oboese-a.‡

³⁵ Irudunga, ikpotso e rḡ gbo mie ḡbḡ eyḡwḡ ni a rḡte eghuli guise le bhale ḡbḡ. §

ḡbḡ elese e ri ḡbe mie ugbemhi obe, ḡa lama a wolḡ wḡwḡ abḡ-a, ama e ghu-a shi ugbemhi obe, itobḡ khi e ri udu shi irḡte-eghuli-guale bhale ḡbḡ ni o tinḡ.

³⁶ Eghuo ḡ, a rḡwḡ li ḡgia, a gbe wḡ itali, a sḡ eghuo igha rḡ shi ḡgba ighumha.*

³⁷ A tono wḡ eḡḡ, a ri isḡ kie wḡ shi asha eva, a ri ḡgbhḡrḡ gbolo wḡ-a. E ri ekue elamhi ali isumha ku ḡbe, e khi ena umha mḡ, a nase wḡ, a li wḡ umumume.†

³⁸ ḡbḡ ni ḡbḡ ḡa lu emhi eni ḡbḡ ena e khi. E dudu kia kia ifui ḡdagbe ifufu ali ikhomhi ite abi eni ḡa mhḡli apfḡ, ee la elemhi irui ali ifui ese na elemhi eḡ.

³⁹ Itobḡ irudunga oyi enana a rḡ kuḡghie wḡ, ama ḡngḡwḡ ḡa kie mie emini

Eshineḡba ḡ shobḡ.

⁴⁰ Itobḡ khi Eshineḡba ḡ she mhḡḡ emini o tinḡ shi eḡ ḡ khḡ awa, ḡghḡghḡ ḡghḡ e kha kugbe awa ḡ, ḡ ri awa ali wḡwḡ gba pfo.

12

¹ Aborḡkhia khi ebubu ḡtseḡ eyi ingme ḡbḡ irudunga e she lina le gase awa ena, awa tsua emini ḡḡ zu awa oḡ ku-a ali olamhḡ ni e keḡ ti awa je ukhokho. Awa zḡ ni awa ri iregbemie ke na oni unamhi ni a rḡshi awa odalo.

² Awa ri ḡloe shi iJesu ḡbe ke bino ḡli, ḡni ḡ khi igbaekeḡ ali ḡni ḡ ri irudunga oyawa gba pfo. ḡni ḡ ri itobḡ ḡghḡḡ oni a rḡ shi eḡ ḡ khḡ ḡli, ri ḡbe mie eghuli na apfida, ḡ ri ukpḡloe gbe omama ni ḡ la apfida ya mḡ. Mena, ḡ she shitḡ obita ukpḡkhomhi Eghiele oyi Eshineḡba.

³ Pfi ukpḡloe ke bino lḡli ni ḡ ri ḡbe mie ibiselemhi ni mḡ obḡ oyi ḡbḡ olamhḡ, ini o khi lḡḡ ḡ ni o pfanḡ ku ḡ alo.

⁴ Inu-olamhḡ khḡ abḡ oye, ḡa kie rḡ ramhi oyi eghuli ne.

⁵ Eri a she yeke ungmemhi iyude ni Eshineḡba ḡ nu ḡ ngme-a, abi imi ḡli eni emḡse ali eni ikpotso? Ni ḡ le.

“Omi mhḡ, khi ri ḡloe gbe isheshe shi oḡ oyi ḡnḡmhuḡ,

ali a khi zḡ ni ḡbe pfḡ ḡ-a ini ḡ sheshe ḡ shi oḡ,

† 11:33 Li zḡ iDan 6.1-27 ‡ 11:34 Li zḡ iDan 3.1-30 § 11:35 Li zḡ 1 Ighie 17.17-24; 2 Ighie 4.25-37 * 11:36 Li zḡ 1 Ighie 22.26-27; 2 Okhḡ 18.25-26; iJere 20.2; 37.15; 38.6 † 11:37 Li zḡ 2 Okhḡ 24.21

6 Irari khi eni Ọnọmhuẹ
 ọ nono ingme oyewe
 ọọ sheshe shi ode,
 ọgbọkpa ni ọ lama
 khi omiọli luẹ khi
 ọọ na osoli.”*

7 Ri egbe mie ini a sheshe
 shi ode, eri Ẹshinegba ọọ riẹle
 ẹ abi imi ọli. Mhiẹ ii, ọmọ
 ọnọghuo itali ọa ya sheshe shi
 ode?

8 Ini aa sheshe ẹ shi ode abi
 a liẹ sheshe ọmọ kpa shi ode,
 eri o rọkhasẹ khi waa khi eg-
 begbi omiọli ama ọmọ ni aa
 lẹsẹ ọni ọ bia li u khi.

9 Itawa ena agbọ ẹa ya sheshe
 awa shi ode, ni awa rọ kiele
 ẹ mu ekpe na we? Elo o zẹ
 ni awa aa ke rọ lili ẹ zẹ ni ọni
 ọ khi Itawa elemhi ayemhẹ ọ
 li sheshe awa ni awa mhọli
 egbegbi agbọ?

10 Ukuku eghẹghẹ itawa ena
 agbọ ẹẹ sheshe awa shi ode
 abi ọ ti we ẹloe shi, ama itobọ
 onete oyawa Ẹshinegba ọ rọ
 sheshe awa shi ode, ini awa
 nu ọli mhọli okemhi shi ip-
 fuase oyọli.

11 Isheshe shi ode okhọghuo
 ọa ya viọlo egbe, ama eri ọọ
 to. O kha ke deṅe, o ri ọni a
 lighọ sẹsẹ ingme ẹ ngeli an-
 geli enete, ali ọ gbo mhọli
 opfomhẹ.

12 Irarighọ, abọ eyẹ ẹ ni o lọsẹ
 ali ikhomhẹgbhẹ eyẹ ẹ ni ẹẹ
 kpheli rẹrẹrẹ, a zese we-a.†

13 A ke kia ode ni o sheshe
 talala, ni a ri eni e cheghẹle
 awẹ-a ze, ocho ni e rọ ya de.‡

14 A rọsheka odekhode ni a nu
 ọgbọkpa la agbọ opfomhẹ, ni
 a gbo la agbọ ipfuase, irari
 khi ọgbọkhọghuo ni ọa mhọli
 ipfuase ọa ya me Ọnọmhuẹ.

15 A rọsheka ini ọngeẹ ọ khi
 khi ọni okhale oyi Ẹshinegba
 ọa ramhi obọ ali a khi zẹ
 ni iyese-elemhi-a o zẹ shi ẹ
 iteva ni ọọ pfi ingme obe rọ
 pfuẹche ẹgbọese-a.§

16 Ogbọkhọghuo ọ khi khi
 ọni ọọ ku itsebo, weẹ ọngeẹ
 ọkhọghuo ọ li abi iSọ ni ọa
 mhọli ayemhẹ ọyi Ẹshinegba,
 ni ọ ri itobọ eminale utoghuo
 kpele ri ugu ọdiọ oyọli de.*

17 A lẹsẹ khi ẹlelese, abi ọ
 ke rọ ọ nono ni lọli mie oni
 ikhivose, a kie ọli. Itobọ khi ọa
 ke me asha mu udu pfi, abi ọ
 tseku ke ri amẹ eviẹ nono ọli.†

18 Irari khi aa bhale ute ni a
 doḅe ri obọ ọ ti, onabi ute iSi-
 nai ni ẹgbọ iZireni e ke bhale,
 ni ẹlemhi erali o la a de biobio-
 bio, ni obili ulishi o la, ali ni
 okiki olitsa o la khili eke,

19 ali ni akala o la de
 limhilimhi, ni uruli oniẹmhi
 o la a ngme, ni ẹgbọ ni ẹ
 suọ oni uruli e rọ lema oni
 ungmẹmhi o kpeṣe aghọ.‡

20 Itobọ khi ẹa doḅe ri egbe
 mie ushi ni a shi na we ni ọọ,
 “Ini o riẹ khia khi ẹlamhakọ ọ
 ri egbe ti oni ute, a mema ya
 tono ọli eche gbe-a.”§

21 Eri emini a me aghọ o
 lolo ri ulishi mu ramhi ni
 iMosisi ọ rẹ, “Ulishi oniẹmhi o
 ga mu mhe!”*

* 12:6 Li zẹ iJobu 5.17; Ekpi 3.11-12 † 12:12 Li zẹ Aza 35.3 ‡ 12:13 Li zẹ Ekpi

4.26 § 12:15 Li zẹ iDeut 29.18 * 12:16 Li zẹ Igbae 25.29-34 † 12:17 Li zẹ Igbae

27.30-40 ‡ 12:19 Li zẹ Okiali 19.16-22; 20.18-21; iDeut 4.11-12; 5.22-27 § 12:20

Li zẹ Okiali 19.12-13 * 12:21 Li zẹ iDeut 9.19

22 Ama, mena, a she bhale ute iZayo, ali ẹoli oyi Ẹshinẹgba ọni ọ la ọ, ijerusalemu ona iloghie ali obini ilegba oghẹle oyi igeni upfoleli.

23 A she bhale igbaa oyi eni e mie iJesu iKirisiti suọ oyi emodiọ eyi Ẹshinẹgba, eni a kẹkẹ eva oyewẹ shi iloghie. A she bhale deba Ẹshinẹgba ni ọ khi ọsọ-ẹzọ oyi ẹgbọ kpa, ali a gbo bhale deba ayemhẹ oyi ẹgbọ enete ni a rọ khi eni e gba pfo.

24 A she bhale deba iJesu ọni ọ ri ishobọ onogbọ kọ, a gbo bhale deba ọlia ni a mi-atse ku, ni ẹẹ ngme emini e ti doṣe emini ọlia eyi Ebẹli e ngme.†

25 A mu egbe ẹ ini a khi kie ungmehi oyi ọni ọ nu ẹẹ ngme. Ini eni ẹgbọ ẹa doṣe pfue ọ, abi ẹa rọ ri ungmehi oyi ọni ọ la agbọ tse agua ye wẹ gbe akanya, se u sa khi awa li ya pfue ọ, ini awa aa ri ungmehi oyi ọni ọ rọte idane tse agua ye awa gbe akanya.‡

26 Eri uruli oyi Ẹshinẹgba o nighise ekẹ agbọ ẹghẹghẹ aghọ, ama mena, ọ she shobọ, ọọ, “Ọa khi ekẹ agbọ tse mhi gbo ya nighise utoghuo shi ọ, ama li shi ukhui.”§

27 Eri ungmehi ni ọọ, “Utoghuo shi ọ,” o rọkhasẹ gboo khi emini a ma nya, khi a ya nighise wẹ, a rue wẹ ode-a, ni a bhale ya ẹ khi emini ẹa zẹ nighise e kẹ kpọle.

28 Irarighọ, aborokhia khi awa a mie omhese ni ọa zẹ nighise eghọ, a zẹ ni awa ke kphemhi, awa ri ekpe ali ulishi ga Ẹshinẹgba abi o ti shi,

29 irari khi Ẹshinẹgba oyawa erali opfuse ọ khi.*

13

Ugamhi ni o ghọle Ẹshinẹgba

1 A kie lighọ ke nono ingme oyi egbe ẹ abi inyoghuo.

2 A ke sato mie epfese shi owa, a mu wẹ epfese. Irari khi ẹgbọ eghuo ee ke lighọ, ni e rọ mu ẹgbọ eghuo epfese, ni ẹa leṣe khi igeni e khi ni wewẹ e mu epfese.*

3 A ke sato eni a mu shi owa ighumha egbe abine khi eri a nu wẹ la aghọ. A ke sato ẹgbọ eni a na osoli egbe abine khi eri a li nu wẹ mẹ oni osoli.

4 Omose ali ughue ọli e mu ekpe shi angeli oyewẹ. Omose ali ughue ọli e khi li egbe le. Irari khi Ẹshinẹgba ọ ya gue eni ẹ ku itsebo ali eni ẹ kia okia ezọ.

5 Zobẹ ni agbọ oye o nuata shi oghuemhẹ ukpaghọ, zẹ ni emini u mholi o ke khuese ẹ. Irari khi Ẹshinẹgba ọọ liẹ,

“Mhi aa tigbe ya zẹ obo, mhia ya tsue pfia ghue.”†

6 Lọli o zẹ ni awa rọ ya ri igbedu liẹ,

“Onomhue ọ khi ọkpaghiobọ oyemhẹ, mhia ya tigbe na ulishi.

Elo ọgbọ doṣe ya li mhe?”‡

† 12:24 Li zẹ Igbae 4.10 ‡ 12:25 Li zẹ Okiali 20.22 § 12:26 Li zẹ Agai 2.6

* 12:29 Li zẹ iDeut 4.24 * 13:2 Li zẹ Igbae 18.1-8; 19.1-3 † 13:5 Li zẹ iDeut 31.6,8; iJosh 1.5 ‡ 13:6 Li zẹ Iwolo 118.6

⁷ A pfi ẹloe bino eni e ralo na ẹ ena ẹlele. Eni e ri irudunga gue ungmehi oyi Ẹshinẹgba ye ẹ. A sa je abi e li ngeli ramhi ni e rọ ghua, ni a ke khọnya irudunga oyẹwe.

⁸ IJesu iKirisiti, abeghuo ọ khi, ode, amo, ali agboagbo.

⁹ Khi ze ni osese egholi ododa e tsua ẹ udu vu. Irari khi okhale o ri udu oyawa zea, ọa khi ni a ri ushi eminale gbe akanya, ni ọa kpaghie eni e rewe gbe akanya obo.

¹⁰ Ama awa mholi atete ni ekpodalo-ugamhi eyi Ẹshinẹgba na elemhi owa ugamhi oyi egbo iJu ẹa mholi afu ya rote le emhi iluasobo. §

¹¹ Eri Oni ọ kpeda na ekpodalo-ugamhi eyi Ẹshinẹgba oyi egbo iJu ọọ tsua ọlia eyi elamhako lo elemhi Asha-no-Pfuase ne nya ya ro luase obo shi olamhe irọtopfa, ama eri a rue eni idiegbe eyi eni elamhako fie ifui apfe je odagbe ya tose-a.*

¹² Onana o ze ni iJesu ọ ro li ghu-a shi ikhokho apfe, ni ọ ro ri ọlia eyoli ri egbo khi eni e pfuase.

¹³ Irarigho, a ze ni awa le deba li ikhokho apfe ni awa nu ọli me omama ni ọ me.

¹⁴ Irari khi agbo oola, awa aa mholi ẹoli ni o lao agboagbo, ama ẹoli ni o ya bhale awa ri ukpeloe shi eke ẹ khe.

¹⁵ Awa ri irarigho rote iJesu ke ri iluasobo ikuẹhie na

Ẹshinẹgba. Ini awa ligho, eri awa pfi otselẹ shi ọ khi ọli ọ khi Onomhue.

¹⁶ A khi yele onete iriele-a, ali ni a gbo ke kpaghie egbe obo, irari khi enana khi iluasobo ni e lie ti Ẹshinẹgba ẹloe.

¹⁷ A ke suo eso na eni e ralo na ẹ, a ri egbe ẹ tiemhie na omhesẹ oyẹwe. Eri e ri ukpeloe shi ẹ egbe abi eni e ya rokhasẹ abi e li gbe. A ke suo eso na we ni akanya ni ẹ ẹ gbe o ri oghelẹ na we, ini o khi khi itsua na we, irari khi u wa mholi eleli ni u ya me ọ.

¹⁸ A ke lema na anye. Anye lese khi udu oyanye o pfuase, anye gbolo ẹ ngeli ke mu ekpe shi egbe anye egbe odekhode.

¹⁹ Mhi gbo ga lolo lema ẹ, a lolo lema Ẹshinẹgba ọ gbo remhe kele nyene egbe bhale deba ẹ.

²⁰ Mhi lema Ẹshinẹgba ọna opfomhe, oni ọ ri ọlia oyi ishobo na agboagbo rote eghuli guise iJesu Onomhue le, ikhi Orisumha-kia oniemhi oyi isumha ogho.

²¹ Ọ ri eminete nya shi ẹ egbe ni a ro ke riele oghuemhe oyoli. Ọ gbo gbe ikanya eni e ti ọli ẹloe shi awa egbe, rote obo oyi iJesu iKirisiti, ni ọ mholi ufumhi na agboagbo. Atse.

²² Inyoghuo-mhe, mhi lema ẹ, a kuegbe-a ri eso shi oni usomhi irudusho ona, irari khi ebe ni mhi keke ghi ẹ ena ọa lolo nuata.

§ 13:10 Emini onana o ngme khi, 'Awa mholi atete ni o khi apfida ni iJesu ọ la ri idiegbe oyoli luasobo. Ama egbo ni ẹ sa khi iluasobo ni a luase elemhi owa ugamhi oyi egbo iJu, e te ya mholi imiepfuese, ẹa mholi okemhi shi oni atete ona.' * 13:11 Li ze iLev 16.27

²³ Mhia nono ni a lẹṣẹ khi a she rue iTimoti inyọghuo awa ọgba ighumha lasele. Ini ọ keṣẹ bhale, mhi ya rọli bhale ya mẹ ẹ.

²⁴ A tṣẹ eni ẹẹ ralo na ẹ nya, ali ẹgbọ eyi Ẹshinẹgba nya. Inyọghuo awa eni e la Itili ẹẹ tṣẹ ẹ.

²⁵ Okhale oyi Ẹshinẹgba o ka nu ẹ nya la. Atṣẹ.

Ebe ni iJemhisi O keke

¹ Mhēmhē iJemhisi ni mhi khi ọni ọọ ga ọyi Ẹshinẹgba ali ọyi iJesu iKirisiti Ọnọmhue mhia keke ebe ona ghi ẹgbọ eni e miesuọ, ni ẹ la ẹdẹli igbẹva eyi ẹgbọ iZireni, ni e gb-
hiaku elemhi eke agbọ nya.*

Mhi tse ẹ.

Ke ghele elemhi imufe

² Inyoghuo-mhẹ, leli ọli shi emhi oghẹle ini imufe ọdoda e bhale debe.

³ Irari khi u lese khi ini a da mu irudunga oye fe bino ne, iregbemie oye o ya me asha fu-a shi ọ.

⁴ Zobe ni iregbemie oye ẹ o gbe akanya oyoli pfo, ni a mholi iwomhelo, ni o gba pfo, ni a khi eni ingeli enete ẹa baku.

⁵ Ama ini onge ọọ nono ẹgbhali, ọ mhila Ẹshinẹgba ni ọ pfo elemhi ro ọ na ogbokpa, ni ọa ya me umha-guekia oyi ogbo. Ọ ya roli na li.

⁶ Ama ini ọọ mhila, ọ mholi irudunga ni ọa mhue akhokhomhẹ, irari khi ọni mholi akhokhomhẹ, eri ọ li abi izughuse oyi okẹ oniemi ni akpepeli o pfi ẹ kia.

⁷ Ogbo oghoghọ ọ khi sa khi lolu me emhikhoghuo ya mie obọ oyi Onomhue.

⁸ Ogbo ozidu eva ọ khi, ọa ya riẹle emini o mu ame.

Ẹpfue ali umhame

⁹ Eni e mie iJesu iKirisiti suọ ena umhame e ke ghele irari khi e ma ghalẹ ukpele oyi Ẹshinẹgba.

¹⁰ Igbaa oyi eni e mie iJesu iKirisiti suọ ni e pfue, e ke ghele ini agbo o ke ti we tiemhile. Irari khi eri ẹpfue e ta a kua abi udodo.

¹¹ Irari khi ini ovo o ngale khi ọọ to, eri ọọ tose ebuli a, e khakha-a, idodo eyewe e de kua, isomhotse eyewe o yese a. Igho, ọni ọ pfue ọ li ya ta kua, abi ọ li na ya nga na ya tiemhi shi akanya oyoli.†

Imhese-bino ali imufe

¹² Ikhivose ọ khi na ogbo ni ọ kie migha ini ọ mholi imufe, irari khi ini ọ dobe ri egbe mie, ọ ya mie arula oghie oyi agbo na agboagbo, ni Ẹshinẹgba ọ she shobo khi lolu ya ro na eni e nono ingme oyele.

¹³ Ini a mu ogbo ligho fe bino, ọ khi lie khi, “Ẹshinẹgba ọ mu mhẹ ẹ fe.” Irari khi ogbo ọa ri onobe ya dobe mu Ẹshinẹgba fe, wekhi eri lolu ọ mu ogbokhoghuo ẹ fe bino.

¹⁴ Ama oghuemhẹ eyawa ni e di awa mu, e ri awa mholi imufe.

¹⁵ Eghẹghe agho oni oghuemhẹ o kha me, o bia olamhẹ, ini olamhẹ o fu, khi o te, o bia eghuli.

¹⁶ Inyoghuo-mhẹ a khi ze ni a di ẹ.

¹⁷ Isomhi-opfa onete kpa ni o gba pfo, idane o te bhale, obini oyi Ita ni ọ ma ikpa na

* 1:1 Li ze iMat 13.55; iMak 6.3; Ika 15.13; iGal 1.19 † 1:11 Li ze Aza 40.6-7

idane, o rọte ẹ tiemhile. Oni ọa ya mu pfi abi aroro ni ọọ je oola je oobọ.

¹⁸ Ọghuẹmhe oyọli ọ rọ ri ungmehi igesikia oyọli ri awa bhale agbọ, ini ọ me asha ri awa khi imomhi eni odode elemhi emini o ma nya.

Isu-ungmemhi oyi Eshinegba ali irọli-gbe akanya

¹⁹ A sato ona inyoghuo-mhe, ọgbokpa ọ kele ke suọ ungmehi, ama ọ khi kele ke ngme unu, ọ khi gbo kele ke mhue elemhi ibibi.

²⁰ Irari khi elemhi ibibi oyi ọgbọ ọa ri ọgbọ ọ mhọli igue-ngeli oyi Eshinegba

²¹ Irarigho, a ti egbe ingeli ichimhi-a ali ingeli ingmobe ni e sha ẹ ma-a. A ri egbe ẹ tiemhile na Eshinegba, a ri eloe shi ungmehi oyọli, ikhi oni a rọ kọ ẹ udu, ni o dobe ya mie ẹ pfuese.

²² A khi khi eni e lese ri esọ suọ tse ni ẹẹ di egbe we, a ri ochoghọ ke ri emini a suọ gbe akanya.

²³ Oni ọ ri esọ suọ oni ungmehi ni ọa riele emini o ngme, eri ọ li abi oni ọ le ya bino egbọli ughegbe abi loli li.

²⁴ Ọ kha bino egbọli se, ọ vu agho le, aghoaghọ ọ yele abi ọ li-a.

²⁵ Ama ọgbọ ni ọ bino elemhi ushi ni o gba pfo ni ọọ rue ọgbọ ọ le, ni ọ kiele ẹ riele emini o ngme, ni ọa yele-a abi oni ushi o ngme, a ya khivose na li emiemini ọọ riele kpa.

²⁶ Ini onge ẹ ọ rue egbọli khi ọna ugamhi loli khi, ni ọa rọ lolo mu elemhi oyọli mhue

kpẹ, egbọli ọọ di. Ugamhi afue ọọ ga.

²⁷ Ugamhi ni o pfuase ni ọa mhọli ifue ni Eshinegba Ita awa ọọ mie loli o khi, ni u rọ ri ukpeloe khu imi-olimhi ali esamhi-olimhi ini ẹẹ me osoli. Ali ni ọgbọ ọ mu egbọli ini agbọ o khi ri ichimhi mu oli.

2

A khi zolo egbe ẹ

¹ Inyoghuo-mhe, ini u mie iJesu iKirisiti Onomhue oyawa ni ọ mhọli ufumhi oniemi suọ, a khi riele khi onana ọ kpe mhe ne.

² Ini a fe bhale ya ẹ khi ọgbọ ni ọ pfue ni ọ sọ ukpekhuili oyi igolu ali ide eni e somhotse, ọ lo ilegba oyee le, ali ni a rọ gbo me khi ọna umhame ọ sọ ijeje ide li lole.

³ Ini u ri ekpe na oni ọ sọ itsua ni e somhotse ne, ni u rọ lie oli, "Bhale ya shito ashini o ti ne," ni u rọ lie ọna umhame, "Migha oobọ," okekha khi eri u we oli, "Shito ekekhe epfe awe eyemhe." O fe ti ghọ?

⁴ Aa she riele azolomhe deba egbe ẹ egho? Aa gbolo ri isamhi ebe ẹ gue egbe ẹ ẹzo egho?

⁵ A ri esọ shi mhe eke inyoghuo-mhe, ọa khi eri Eshinegba ọ she ze ena umhame ukpeloe agbọ, ni e mhọli epfue oyi irudunga, ali ni e mhọli okemhi shi ugu eghiele ni ọ rọ shobo na eni e nono ingme oyọli?

⁶ Ama u she me ena umhame bie. Ọa khi eri eni

epfue e li e le? Oa khi wewe e re e ye ikotu?

7 Oa khi wewe e ri unu e yese eva onete oyi iJesu iKirisiti-a oni a kugbe o?

8 Onete wa rieḷe ini u ri ushi ni o mu egbe ne nya, ni o la Ebe-no-pfuase gbe akanya, ni o o, “Nono ingme oyi onuzava oye abi u li nono ingme egbe e.”*

9 Ama ini u rieḷe azolomhe, u she lamhe, ushi o gbo pfa ezọ mu e khi oni o gbe ushi-a u khi.

10 Irari khi onini o da ri ishi nya ghuḷe ni o pfi do elemhi ushi oghuo tse, ishi enekpọle nya o gbe-a.

11 Irari khi oni o o, “Khi kia okia.” Lọli o gbolo e, “Khi gbe ugbeli.” Ini u wa ririe kia okia, ni u ro da gbe ugbeli ne, ogbushia u khi.†

12 A ke ngme ungmehi, aa ngeli abi egbo eni a ri ushi inono ya gue we ezọ, ikhi ushi oni o ri epfua a na ogbọ.

13 Irari khi Eshinegba o ya mhọli ilelemhi na ogbọ ni o ya mhọli ilelemhi, ele ni Eshinegba o roli ya gue ezọ. Irari khi ini u mhọli ilelemhi, eri u ya ke ghele ini a re e gue ezọ.

Irudunga ali iro-gbe akanya

14 Inyoghuo-mhe ini ogbọ guele khi loli mhọli irudunga, ni o ro mhọli iro-gbe akanya, onete onoghuo o ya li nali? Imiesuo oghoghọ o ya dobe tsumhi oli?

15 Ini a fe bhale ya e khi inyoghuo awa oni omose okekhi okpotso o mhọli itsua ni a so ali eminale ni o ya le ogbẹle.

16 Ni onge o ro gueye oli, “Ke vu, o ya ti ne, Eshinegba o khi ze ni ulili ali okiamhi o ne osoli”, ni o ro mhọli emhi khoghuo ni o rieḷe na, ighe onete ni o rieḷe?

17 Eri o li abine khi ogbọ mhọli irudunga ni o roli gbe akanya. Irudunga luoghuo tse ni a ri akanya ma, irudunga oni o ghu-a o khi.

18 Ama a dobe ya me khi ogbọ o o li, “U mhọli irudunga, mhemhe mhi gueye oli khi irogbekanya mhi mhọli.” Ri irudunga oye khashe mhe ni o ro mhọli akanya igbegbe, mhemhe mhi ya ri emini mhi rieḷe ro ri irudunga oyemhe khashe e.

19 U miesuo khi Eshinegba oghuo o khi, oo ti gba. Egbegbi ayemhe eyi okphaghe e mie ona suo, ee na ulishi, ee guo.

20 Yeye omose ooyeghe, eri u wa nono ni a gbo gue oli ke ye, khi irudunga ni o ro mhọli akanya igbegbe, khi afue o khi?

21 Oa khi emini ititawa Abu-raamu o rieḷe a ro roli lie khi oni o pfuase o khi, abi o ro ri omi oli Aziki luase obo ukhomhi atete?‡

22 U me oli khi irudunga ali irogbekanya oyoli e ga gbe akanya kugbe, emini o rieḷe o ri irudunga oyoli gba pfo.

23 Loli o ze khi emini Ebe-

* 2:8 Li ze iLev 19.18 † 2:11 Li ze Okiali 20.13,14; iDeut 5.17,18 ‡ 2:21 Li ze Igbae 22.1-14

no-pfuase o ngme o ro bhale ya tse ni oḡ, “Aburaamu o mie Eshinegba suo, a leli oḡ nali shi ipfuase”, A lu oḡ omole Eshinegba. §

24 U me oḡ egho khi emhi ni oḡbo o riē a ro lie khi oḡbo ona ipfuase o khi, o a khi irudunga tse oḡbo o ro khue pfuase.

25 Igho o gbo li egbe oyi iRé-àbu ni o khi adegbe. Emini o riē o roḡi khue pfuase odalo oyi Eshinegba. Abi o li mu eḡbo iZireni ni e bhale ya toḡpe eke bino epfese. Ni o gbo kpaghie we obo ni e ro me *asha na rote ode oboese vu.*

26 Irarigho, abi idiegbe ni o a mḡoli ayemhe o li khi oni ghua, igho irudunga ni o a mḡoli akanya o li khi oni ghua.

3

Ekpabo oyi eḡemhi

1 Emole mhe, ee nya a khi ya khi eni ee sese, irari khi a lese khi anye ni anye khi eni ee sese eḡbo, a ri ezḡ oni o ze ne nya na ya gue.

2 Awa nya awa mḡoli ashini awa te pfi do. Ama ini oḡbo o a pfi do elemhi ungmehi oyoli ghue, oḡbo oni o gba pfo o khi, ni o doḡe e mhesē ni idiegbe oyoli nya.

3 Eri a so achi aghēkpe unu ni o ke suo eso na awa, loḡi o ze khi awa doḡe nga li e je obini o ghole awa.

4 Gbo li sa ingme oḡo oke oniemhi bino, ashini o gbēdi

ramhi egho, ni o khia khi akpekpeli oniemhi o kha riē e li, ukuku akhuli, oni oḡ gua li o ro mu oḡi ukhomhi e pfi je obiobini o ghole oḡi.

5 Igho eḡemhi o li li. Ashini o she ramhi elemhi idiegbe oyi oḡbo, o ma pfi okhorobo.

Sa o ghue, abi ukuku akhuere o lie ma ere osha.

6 Eri eḡemhi o li abi erali. Emhi obe o khi ni o la elemhi idiegbe oḡbo. Eri oḡ yese oḡbo-a nya ode khi ode. Ilimhi iriēriē oni erali ogho o te bhale eḡemhi.

7 Elamhako nya e ze e mu abo, ghe ipfeli o, ghe eni e tialo akpidi eke o, ghe elamhako ena oke o, oḡbo o doḡe e mu we abo.

8 Ama oḡbo khoghuo o a doḡe ya mu eḡemhi abo. Eri o li abi osue enye obe ni oḡ gbe.

9 Oni eḡemhi awa ro o kuēghie Ita awa Onomhue. Loḡi awa gbo ro o ku itse na eḡbo ni a ro khokho Eshinegba ma.*

10 Ikuēghie ali itse ikuku e rote unu oghuo e lasele. O a kha khi igho inyoghuo-mhe.

11 Ame eni e ti unu ali ame ni ea ti unu ea doḡe ya rote unupfie oyi oke oghuo ke chocho lasele.

12 Inyoghuo-mhe, okhua-eni o fe doḡe ya mo udumhi olivu? Weḡhi eri olomu iba o doḡe ya mo udumhi okhua-eni? Igho oke oni oḡ chocho ame ugbheli, o a doḡe ri ame eni e ti unu ya lasele.

Iku ilęsingme eva

¹³ Oghuo ọ elemhi ẹ ọ khi ọtsegbhe ni ọ mhọli ilęse? Oni ọgbọ ọ ri angeli onete oyọli rọli khase, ikhi onete ni ọ ri iregbe-tiemhile ni o rọte ilęsingme bhale rięle.

¹⁴ Ama ini u mhọli ayemhe ubogbo ali emhi-itoegbe shi udu oye, khi vuse ipfua shi ọ, ni u rọli kie oni igesikia.

¹⁵ Ilęsingme oghogho ọa khi iloghie o te bhale, ama on-ayi agbo ona o khi, ni ọa rọte Ayemhe-no-pfuase bhale, elemhi ayemhe oyi okphaghie o te lasele.

¹⁶ Ashini ubogbo ali emhi ituegbe o da la ne, ozughu ali emhi ebe ododa, e ma la akaghọ.

¹⁷ Ama egbhe ali ilęse ni o te idane bhale, eri o kpe te eke pfuase, o nono opfomhe. Eri ọọ kuegbe-a, o ri egbe ọli ẹ tiemhile na ọgbokpa pfo, o mhọli elemhi-iamhe, o ri umomhi angeli onete ẹ khase. Ọa ya gbe azeba, o mhọli igesikia.

¹⁸ Eni ẹ nono opfomhe ni e ri ayemhe opfomhe ri onete ko, ikhiesę oyi ipfuase ẹẹ me.

4*A ri egbe ẹ na Eshinegba pfo*

¹ Elo ọọ pfi okhọli ali uwola a na ẹ? Ọa khi itobo ọghuemhe, ni e la ẹ udu nu ẹ a khọli o ze ni a rọ nu egbe ẹ khọli?

² Emhi ọọ ghọle ẹ, ama aa mhọli ọli. A gbe ugbeli, a mhọli ẹloe-iamhe ama a dobe mhọli emini ẹẹ ghọle ẹ. A kha

wola, a khọli. Aa ya mhọli emini a nono, irari khi aa mhila Eshinegba.

³ A kha mhila, aa ya me mie, irari khi usamhi obe a rọ shi udu ke mhila, ini a ba me asha ri emini a mhila rọ li agbo shi egbe.

⁴ Eẹ ni a khi egbo ni e li abi okpotso ni ọọ kia okia, eri aa lese khi ini emhi agbo o ghọle ẹ dose, khi obe Eshinegba a khi? Onini ọ da ze agbo ona omole ne, obe Eshinegba ọ khi.

⁵ Eri u dabi khi afue Ebe-no-pfuase o ngme ọli khi, eri ayemhe ni Eshinegba ọ rọ shi awa egbe ọọ kpe ofuma egbegbo, ni o khia khi eri ọọ nono ni awa khi oyi Eshinegba pfo nya.

⁶ Ama eri Eshinegba ọ khi ma okhale na awa. Onana o ze ni Ebe-no-pfuase o rọ lie, "Eri Eshinegba

ọ mu okhọli ẹ vule shi ọni ọ ti egbe ọli ẹ nga ọ.

Oọ somhi elemhi

ọni ọ ti egbọli ẹ tiemhile."*

⁷ Ri egbe ẹ tiemhile na Eshinegba pfo nya. Tsesę ku okphaghie ọ ti kia ne, khi ọ ya na ne.

⁸ Ti bhale deba Eshinegba, khi ọ ya ti bhale debe. A kpe abọ eye ẹ-a, ẹẹ ena olamhe, a ri udu oye ẹ shi eni e pfuase, ẹẹ ezidu-eva.

⁹ Vię osoli, vię oya, mu egia oye mele evię-a, u gbo mu oghęle oye pfi bhale iyese udu-a.

¹⁰ Ti egbe ẹ tiemhile odalo oyi Onomhue, khi ọ ya ti ẹ nga.

* 4:6 Li ze Ekpi 3.34

11 A khi ke yese egbe eva inyoghuo-mhe. Ini u da yese onuzava oye ni a ga mie iKirisiti suo eva-a ne, ni u ro da gue oli ezọ, ushi wa ze ifue, ni u wa gue ezọ. Ini u gue ushi ezọ, wa ke khi oni o ri ushi e gbe akanya! Ama oni o gue oli ezọ u ke khi.

12 Eshinęba lolighuo tse o khi oni o rue ushi na agbo ni oọ gue ogbọ ezọ egbe-a. Lolighuo tse o dobe a tsumhi, ni o dobe a gbe-a. Oghuo u sa khi u khi ni u wa gue ogbọese ezọ?

Awa khi ke tono obọ udu

13 A suo mhe, yeye ni u we, “Amo okekhi akọ awa ya ye eoli ona okekhi ogho, awa ya la oobọ elemhi ukpe oghuo, awa la oobọ gbe akanya ona ali ogho, awa gbe ukpago tima.”

14 Waa lese emini ogbe na akọ o ngme ne, wekhi emini a ya me akọ. Se u lese abi agbo oye o ya li? Eri u li abi otughunu ele uzogbe ni oọ lasela ukuku eghęghę, o gbo kala-a.†

15 Eri u kha ri ochogho lie, “Ini o ghole Onomhue, awa ya la agbo, awa li ona ali ogho.”

16 Mena eri u wa tono obọ udu, waa ti ipfuabọ nga. Itonobọ-udu eghogho nya e a gbe akanya.

17 Irarigho, onini o da lese onete ni o kha ri ele ni o a ro da ri ele oli ne, olamhe o khi na li.

5

A tse agua ye eni e pfue, ni e e nase eni e a pfue.

1 Ghe ii, e e eni a pfue, a vie, a vie oya irari osoli ni oọ bhale na e.

2 Epfue eye e, e she ke a, ali khi esele e she re e ide le.

3 Igho ali elomho eye e, e she mu oghuo oghuo-a. Oghuo oghuo ni e mu, e ya pfi otsele mu e, a ya na e osoli to o irari khi u ti ikpago ma leghe na egbe e ya ramhi memena.*

4 Waa fali egbọ eni e gbe ikanya ishemhi oye ne ifata ne. E e vie, e e wolo. Evie oyi eni e nu e khi ese itsua ishemhi, o she ramhi eso eyi Eshinęba ni o fune nya ni o mhu e kholi-okhu e na iloghie.†

5 Eri u la agbo e li agbo nya-funyawu, u li agbo o tsua kua. Wa le okpo, ali ofolo, u gbedi-a loogho abi elamhi ni a mu ya gbe-a.

6 U she pfa ezọ ugbeli mu egbọ eni e a mhu e abi e li, u gbolo we-a. Wewe na, e a dobe lie khi wewe a lama shi e o.

Irabomudu elemhi osoli

7 Irarigho, inyoghuo, ri abo mudu ramhi ibhale oyi Onomhue. Bino ghue abi oghiale o lie migha khe eghęghę ni ishemhi e la bie. Abi o li ri abo mudu ni otsuke o de, ni oruame o ro le.

8 Yeye li ligho ri abo mu udu abi oghiale. Lolo ri ukpeloe shi eke, u migha gbagbagba irari

† 4:14 Li ze Ekpi 27.1 * 5:3 Li ze iMat 6.19 † 5:4 Li ze iDeut 24.14-15

khi ibhale oyi Ọnọmhuẹ o ti bhale.

⁹ A khi ke mẹ umha-guẹli oyegbe inyọghuo-mhẹ, ini a khi gue ẹ ẹzọ. Ọsọzọ ọ ga ti mama awa memena.

¹⁰ Inyọghuo-mhẹ, a ke khọnya emekeguele ni ẹẹ ngme na Ọnọmhuẹ. Eri e ri abọ mudu ini o riẹ khi e ya mẹ osoli.

¹¹ A she kpe lẹsẹ khi eni a khivọsẹ na, anye ẹ lu ẹgbọ eni e ri egbe ẹ mie. A she kpe suọ eko iJobu abi ọọ ri egbe mie tẹsẹ. A mẹ emini Eshinẹgba ọ riẹlẹ na li ikpukhokho. Ọnọmhuẹ, ona ilelemhi ọ khi.‡

¹² Inyọghuo-mhẹ, oni o mu egbe nẹ nya khi, khi romhi iloghie ali eke agbọ ali emhese. Zẹ ni, “Ii oye o khi ii, u zẹ ni iiye oye, o khi iiye.” Ini a khi mẹ asha pfa ẹzọ mu ẹ. §

Iromhi ni a ri irudunga sọ

¹³ Ini ọngẹẹ ọ la elemhi ọmunu, ọ lema Eshinẹgba. Ini ọngẹẹ ọọ ghele, ọ to uwolo ikuẹghie.

¹⁴ Ini ọngẹẹ ọọ ghua, ọ ka lu egbhali ni e la igbaa oyi eni e mie iJesu iKirisiti suọ, ni e sọ iromhi na li, e ri eva oyi Ọnọmhuẹ ri oili to ọli egbe.*

¹⁵ Eghẹghe agho, ni iromhi ni e ri irudunga sọ, ni o ri ọli zẹ. Ni Ọnọmhuẹ ọ rọte ughuamhi mu ọli vule. Ini ọ lamhẹ olamhẹ, Ọnọmhuẹ ọ ya rọ topfa li.

¹⁶ Irarigho, a zọnọ olamhẹ eyeẹ ye egbe ẹ, a lema na egbe, ni a rẹ ẹ ze. Eri iromhi oyi ọgbọ ni ọ la ipfuase o migha a gbe akanya egbegbọ.

¹⁷ Ọgbọ onabi awa, Elaja ọ khi. Eri ọ te ekelemhi udu lema egbegbọ. Ọọ amẹ o khi ruẹ, amẹ o mu oni eke elemhi ikpe ese ali ukhukhui.†

¹⁸ Ọ gbo lema, ọọ amẹ o ruẹ, amẹ o ruẹ, eke o ri emhi ẹkọmhi zẹ lasele.‡

¹⁹ Ini ọngẹ ẹ ọ pfi egbegbi ode oyi Eshinẹgba shi eke, no ọgbọese ọ rọ mu ọli nyene bhale ukhokho,

²⁰ sato ọ khi, ọnini ọ mu ọna olamhẹ rọte ode ẹgbhọli oyọli pfi, ọ ya tsumhi ayemhẹ oyọli obọ eghuli, ọ guese olamhẹ ebubu na li. §

‡ 5:11 Li zẹ iJobu 1.21-22; 2.10; Iwolo 103.8 zẹ iMak 6.13 † 5:17 Li zẹ 1 Ighie 17.1; 18.1 Li zẹ Ekpi 10.12; 1 iPit 4.8

§ 5:12 Li zẹ iMat 5.34-37 * 5:14 Li

‡ 5:18 Li zẹ 1 Ighie 18.42-45 § 5:20

Ebe onodode ni IPita O keke

¹ Mhemhe iPita aghiusomhi na keke oyi iJesu iKirisiti mhi keke ebe ona ghi e egbo ni Eshinegba o ze, ni a khi epfese shi elemhi eke agbo, ni a mitse ku asha khi asha eke iPontusi, ali iGalesha ali iKapatosha ali Esha, ali iBitinia.

² Eri Eshinegba ita o ze e abi o li ghole oli shi, o rote ikanya eyi Ayemhe-no-pfuase khuese-a pfuase ni a ke suo eso na iJesu iKirisiti ali ni o ri o lia eyi iKirisiti re e khi egbo oda shi ugamhi oyoli.

Opfomhe ali okhale ni e gbeku o, e ka nu e la.

A kueghie Eshinegba shi Irudushi ni o mhue agbo

³ Awa kueghie Eshinegba, ita iJesu iKirisiti Onomhue. Itobo ilelemhi oniemi ni o mholi na awa o ro rote eghuli guise iJesu iKirisiti le. Onana o ri agbo onogbo ali irudushi ni o mhue agbo na awa.

⁴ Loli o li ri awa ri eloe shi eke e khe ugu ni Eshinegba o ro shi agho o khe egbo eyoli. Iloghie o re we shi ne, ni o khi asha ni ea la ke-a, ni ea la pfueche, wekhi eri e ya taa.

⁵ Eye e eni ugu ena e khi, ikhi ee ni a mholi iregbenga, ni Eshinegba o ri ekpabo eyoli khukhu shi e khe imiepfuese, ikhi imiepfuese ni a ya rokhase ikpukhokho agbo.

⁶ A ze ni onana o ri egbe ke mu e ini o tseku khia khi a ya mholi iyeseudu-akuku eghenge irari imhese bino ebubu ni a ya me.

⁷ Eri a ri ena mu e fe bino ni a me ini egbegbo irudunga oye e o khi. Igotu ni o li opfua, erali a ro o mhese oli bino ni a me ini egbegbo o khi. Igho a ya li mhese irudunga oye e ni o mu eloe dose igolu bino, ni a me asha mie ekpe ali ikuoghi ali ufumhi ele ni iJesu o ya nyene egbe bhale.

⁸ A nono ingme oyoli, a gbo mie oli suo, aboriekhia khi aa me oli eloe ghue. A mholi ogheloniemi ni unu oa dobe e ngme.

⁹ Itobo khi u mholi imiepfuese elemhi ayemhe oye, o ze khi a miesuo, a regbenga li.

¹⁰ Eri emekeguele ngme ingme okhale ni oo bhale deba e, e kuegbe-a guanobie abi Eshinegba o li ya mie egbo eyoli pfuese, onana o ze ni e ro ngme angme-shi-ekpe oyi oni imiepfuese ona.

¹¹ Ayemhe oyi iKirisiti ni o la emekeguele udu o gueye we abi iJesu o li ya me osoli, neni o ya me ufumhi oniemi, eghenge ni e ro ngme ungememi ameguele. E roshaka guanoni e lese oghuo o ya khi oni iKirisiti ali abi eni ingme e ga li ya de nyaa.

¹² Eshinegba o rokhase eni emekeguele khi oa khi itobo eleli oyewe a ro ri emhi ena kase we ama irari oye e. Memena, eni emekeguele e she gue eni ingme ena nya

ye ẹ, abi ekpabo Ayemhe-no-pfuase ni o rote iloghie bhale o li gue we ye we. Eri igeni e lili nono ni wewe e li me eni ingme ena.

A ke la angeli ipfuase

13 Irarigho, a bino angeli bie ke ngeli ni a mu egbe shi ugamhi oyi Eshinegba, a ke te eloe eke, a ri udu oye ẹ shi isomhelemhi ni a ya me ogbele ni a ya ri iKirisiti khase.

14 Abi eniye ni ee suo eso na Eshinegba ni o la iloghie, a khi nyene egbe ukhokho je angeli ni u kpe ngeli neni a lese ungmehi oyi Eshinegba.

15 Lese khi Eshinegba ni o lu ẹ, o ma pfuase ni a li ghọ mholi ingeli ni e pfuase shi emiemi a riele nya.

16 Ebe-no-pfuase oo, "Ze ni u khi oni o pfuase, itobo khi mhemhe mhi pfuase."*

17 Ini o khia khi Ita wa lu Eshinegba ini u wa so iromhi, ikhi ita ni oa ya gbe azeba ini oo gue ezọ, ri ekpe ali ulishi ke ga li aborokhia khi ofese eke agbo u khi egho.

18 Irari khi a lese khi oa khi emhi nabi igolu ali elomho ni ee li opfu-a a ro pfa ẹ shi eke, lase elemhi imu ali angeli afue le, ni eni e bia ẹ e roshi eke na ẹ.

19 Olia ni e ghale eyi iJesu iKirisiti, ni o khi omi osumha ni oa mhuẹ ichimhi, a ro luase obo na awa.

20 Eshinegba o ze oli neni a ma agbo, o gbo ri oli lasele

khase egbo ikpukhokho agbo ni awa la ena, irari oye ẹ.

21 Obo oyi iJesu a te mie Eshinegba suo ni o te eghuli guise oni iJesu le, ni o gbo ri ufumhi oniemi na li, irarigho a mholi irudunga ali irudushi na Eshinegba.

22 Aborokhia khi a she ri udu eye ẹ khi eni e pfuase egho, abi a ri ungmehi igesikia a gbe akanya, ni a ro mholi inono na egbe ẹ abi a ga miesuo, a kie ligho ke nono ingme egbe ẹ.

23 Irari khi ungmehi oyi Eshinegba ni o mhuẹ agbo na agboagbo a ro riele ẹ bia, oa khi emini ee pfua a ro riele bia.

24 Ebe-no-pfuase o ngme ghọ khi,

"Eri egbo nya

e li abi ebuli.

Eri isomotse oyewe

o li abi udodo.

Ini ebuli o khakha-a,

udodo e de o kua.

25 Ama eri ungmehi

oyi Eshinegba o lao agboagbo."†

Ona o khi usomhi onete ni a tse abo ye ẹ.

2

Eche ni o mholi agbo ali ushishi no pfuase

1 A she riele ẹ bia, irarigho, khi kono onobe shi elemhi deba ogbo, khi ke lo egbholi, khi ke ngeli ingeli abamemhe, khi ke do ogbokhoghuo okonyo ali khi ke ngme ungmehi yese ogbo-a.

* 1:16 Li ze iLev 11.44,45; iLev 19.2; iLev 20.7 † 1:25 Li ze Aza 40.6-9

² Ochoghò, zẹ ni angeli oye ẹ e li abi oyi emofẹ. Oki-amhi egbegbi amẹ inyeli eyi ayemhẹ ni o khi ungmehi oyi Eshinẹgba, o ke gbe ẹ. Eni a kha da, o rẹẹ fu shi imiep-fuese,

³ mena ni a she mu Onomhufe fẹ bino ni a mẹ ọli mẹ khi ọọ ti.*

⁴ Abi a li bhale deba Onomhufe ni ọ khi ẹchẹ nọ mhufe agbọ, ni ẹgbọ e kie, ama Eshinẹgba ọ zẹ ọli, ọ mu ọli ẹloe.

⁵ Ighọ, ẹẹ abi echẹ ni e mhufe agbọ, a rọ tọ owa ayemhẹ, ni a khi ekpodalougamhi eyi Eshinẹgba ni e pfuase, ni a ke luasobo ena ayemhẹ eni e ghọle Eshinẹgba, rọte obọ oyi iJesu iKirisiti.

⁶ Irari khi Ebe-no-pfuase ọọ,

“A bino khi mhi ri

ẹchẹ gbe ekẹ shi iZayo,

ẹchẹli ẹbẹ ni o mu owa mhufe,

ni mhi zẹ ni o mu ẹloe.

Oni ọ da ri egbe da li ne,

ọa ya mẹ omama.”†

⁷ Irari khi ẹchẹ ona oni o mu ẹloe o khi na ẹẹ ni a mie ọli suo. Ama eni ẹa mie ọli suo, o khi,

“Echẹ ni itsona e kie,

ni o tigbe mele oni

o mu ẹloe nẹ nya-a.”‡

⁸ “Onana o kie gbo khi

ẹchẹ ni ebubu ẹgbọ

e ya kholo awẹ shi

ukpokpomhi echẹ

ni o ya pfi wẹ gbe.”

Itobọ khi ẹa ri ungmehi oyi Eshinẹgba gbe akanya e rọ de. Abi o kha li wẹ o li eghọ. §

⁹ Ama eni Eshinẹgba ọ zẹ a khi, ni a khi ekhemhufe ni ẹẹ ga Eshinẹgba, ushishi na ipfuase, ẹgbọ enayi Eshinẹgba, ni a rọ mẹ asha ri ikueghie na oni ọ rọte alo ebili lu ẹ lasele bhale ákpá ni o somhotse oyọli.*

¹⁰ Eghẹghẹ ni o dọsẹ aa kpẹ khi ẹgbọ eyi Eshinẹgba, ama memena, ẹgbọ eyi Eshinẹgba a ke khi, aa kpẹ mhọli ilelemhi na ẹ, ama memena Eshinẹgba ọ she mhọli ilelemhi na ẹ.†

Ighumha eyi Eshinẹgba

¹¹ Emọle mhẹ, mhi lema ẹ, ẹẹ abi epfese ni a la elemhi agbọ ona, a lase oghuemhẹ ni e khi eyi olamhẹ le, ni e mu okhọli ẹ vule shi isamhi eye ẹ ọ.

¹² A kie ke ngeli ingeli enete elemhi ifuabọ oyi ẹgbọ ni ẹa miesuo. Ini e tseku ẹ zẹ ẹ unu, e kie ke mẹ ingeli enete ni a ngeli, ni e ke kueghie Eshinẹgba, ogbẹlẹ ni ọ ya bhale deba awa.

Iregbe-tiemhie na Enighie ali Ega eyawa

¹³ A ri itobọ Onomhufe ke ri egbe ẹ tiemhie na eni ẹẹ mhẹsẹ nya ni a mu vule shi iteva ẹgbọ. Okekhi oghie ni ọ funẹ,

¹⁴ okekhi igovunọ ni oni oghie ọọ ghie ọ ke nasẹ eni e pfido, ali e ke kueghie eni e rieḷe onete.

* 2:3 Li zẹ Iwolo 34.8 † 2:6 Li zẹ Aza 28.16 ‡ 2:7 Li zẹ Iwolo 118.22 § 2:8 Li zẹ Aza 8.14-15 * 2:9 Li zẹ Okiali 19.5-6; Aza 43.20,21; iDeut 4.20; 7.6; 14.2; iTatọ 2.14; Aza 9.2 † 2:10 Li zẹ Osia 2.23

15 Irari khi eri Eshinegba o nono ni a pfi egbo okholo okpe unu, rote angeli enete ni a ya ke ngeli.

16 A ke ngeli abi egbo ni ea mholi ozuode, ama a khi zudigba umha mholi ozuode oyeke ke ngeli ingeli ebe. A ke ngeli abi eni eke ga Eshinegba.

17 A ke ri ekpe na ogbokpa. A nono ingme oyi egbo ni a ga ro khi ena irudunga. A ke na ulishi oyi Eshinegba. A gbo mu ekpe e na oghie.

18 Ee ni a khi eni eke ga, a ri egbe e tiemhi eke na eni e khi ega eye e. Oa khi ega ni eri opfomhe ngeli deba e tse ama li shi eni e ngeli angeli ni o ze deba e.

19 Eshinegba o ya khivose ne ini u ri egbe mie osoli anasemhe ni u wa kha me, itobo khi u lese oguemhe oyi Eshinegba.

20 Eleli onoghwo o la o ini ogbo o me osoli shi umhasueso ni o ri ele? Ama ini u wa me osoli shi onete ni u ri ele, ni u ro ri egbe mie oli, Eshinegba o ya khi vose ne shi o.

21 Irari onana Eshinegba o ro lu e, abi ijesu o ro me osoli na e ro ri angeli irokhokho shi eke na e ni a ke deba. A roshaka ke deba oni angeli.

22 Oa lamhe olamhe okhoghuo, wekhi eri a me khi o ngme ungmehi egbholi.‡

23 Abi egbo e ro tseku u tsue oli, oa tsue we shi o. Abi o ro tseku me osoli oa tsekha we. Ama eri o ri egboli mholi

Eshinegba obo, oni o gue so ezoshi ode igesikia. §

24 IKirisiti lolighuo o tsua olamhe eyawa shi egbe je apfida, ini awa khi ghu eghuli olamhe, ama ni awa la agbo igue-ngeli elemhi ipfuase. Utse ni a kuale oli o ri awa ze.*

25 Eri a kpe la agbo abi os-umha ni o waa, ama a she mu pfi deba Oni Orisumha-kia ni o khi oni o khekhe ayemhe o ye.†

3

Angeli oyi ikpotso ni e la ughue ali odo we

1 Ee ni a khi ikpotso, a nyese ukhomhi na edo e, ishegho a khi me ongewe ni oa mie ungmehi oyi Eshinegba suo, ni eni edo e ri itobo ekpe ni a mholi a na we ali angeli eyi e mu udu pfi, ini aa ke tseku ngme ungmehi unu lasele,*

2 ini ee me angeli ipfuase ali angeli ekpe ni a ngeli.

3 Khi ze ni isomhotse oye o rote akhue idiegbe ri egbe khase, ni a la do itsu shi ukhomhi dolodolo, ali ena igolu isoso ali igbano itsua ni e somhotse.†

4 Ochogho, ze ni isomotse oye o khi ona ekelemhi udu. Isomhotse ni oa ya taa, ni o khi ona ikuegbea ali ayemhe no pfomhe, ni o ghole Eshinegba ne nya.

5 Ina ikpotso eni elele ni e ri egbe da Eshinegba, e li ri egbe

‡ 2:22 Li ze Aza 53.9 § 2:23 Li ze Aza 53.7 * 2:24 Li ze Aza 53.5 † 2:25 Li ze Aza 53.6 * 3:1 Li ze Efi 5.22; iKolo 3.18 † 3:3 Li ze 1 iTimo 2.9

wẹ shi isomotse, irari khi e nyẹsẹ ukhomhi na edo wẹ.

⁶ Abi iSera o li mu ekpe na odoli Aburaamu ramhi ni o ro lu oli, onomhuemhe. Imi oni iSera a khi, ini a da ngeli ingeli enete ne, ni aa ro da ze ni ulishi o mu e.‡

⁷ Igho, eedọ, a guẹ ke ngeli deba ighue e. A ri iwomhelo nu wẹ ke ngeli. A lese khi ea mhue ekpabo abi ee. A gbo lese khi eni e nu e mholi okemhi shi isomhopfa oyi isomhelemhi oyi Eshinegba ni o mholi agbo onogbo e li khi. A guẹ ri eloe ke khu wẹ, ini emhikhoghuo o khi zu iromhi oyeede. §

Ime-osoli shi onete iriele

⁸ Ozukhomhi ungmehi oyemhe khi, ee nya a mholi udu oghuo, a mholi ilelemhi na egbe, a nono ingme egbe abi inyoghuo, a vie osoli ke na egbe, a ke ri egbe e tiemhile.

⁹ Khi ri onobe fata onobe. Ini ogbo o tsue e, khi tsue oli shi o, ochoghọ so iromhi onete na li. Itobo khi eri Eshinegba o lue ni u khi ogbo oyoli, ni u le ikhivose ugu.

¹⁰ Irari khi,
oni o da a nono
ni loli me agbo li
ali ni loli mholi
ebubu ogbele enete,
o khi ke ri elemhi oyoli
ngme ingmemhi ebe,
ali ingmemhi egbholi.

¹¹ O mema ya me
ingmobe na,
oo riele onete.

Oo mema ya ke
nono opfomhe,
o na khu oli.

¹² Irari khi eri ukpelo
oyi Onomhue o la
egbo eni e guẹ ngeli egbe,
eso eyoli e khueghie-a
shi iromhi ni e so,
ama elemhi e ma bi
Onomhue deba egbo
okholo.*

¹³ Oghuo o ya ri emhi obe
li e, ini onete iriele o mema
ghole e?

¹⁴ Ama ini u tseku me osoli shi onete iriele, ikhivose o khi ne. "Khi na ulishi ogbokhoghuo."

¹⁵ Ama a rote eke elemhi udu oyeede rue ijesu abi Onomhue oye e. A ke mu egbe shi eke eghegheka, ini ogbokhoghuo o ya mhila e emini irudushi oyeede o migha nga, ni a gue oli ye wẹ. Ama a ri ipfomhe-udu ali ekpe ke so wẹ o.†

¹⁶ Zobe ni udu oye o pfuase ishegho ni eni e ngme onobe shi angeli onete oye abi oni o deba iKirisiti, e me omama ingmemhi ipfueche ogbo-a eyewe.

¹⁷ Ini o ghole Eshinegba ni u ro me osoli shi itobo khi u riele onete, o ti dose khi u me osoli shi okholo ni u riele.

¹⁸ Irari khi iKirisiti o ghu-a shi olamhe oyi ogbokpa utoghuo kpe, ikhi loli ni o pfuase, o me osoli na ena umhapfuase, ni o ro rue awa bhale ghi Eshinegba. A gbe oli-a alo gbugbugbu, ama o la agbo

‡ 3:6 Li ze Igbae 18.12 § 3:7 Li ze Efi 5.25; iKolo 3.19 * 3:12 Li ze Iwolo 34.12-16

† 3:15 Li ze iMat 5.10; Aza 8.12-13

elemhi ayemhẹ, a ri Ayemhẹ guise ọli le bhale agbọ.

¹⁹ Elemhi ayemhẹ ni ọ la, ọ rọ vu ya tse abọ usomhi onete oyi Eshinegba ye iyemhẹ ni e la owa ighumha.

²⁰ Iyemhẹ ena e khi eni ẹa suọ esọ, abi Eshinegba ọ rọ ri abọ mu udu, ni iNoa ọ rọ khali ọkọ-oke oniemhi se. Egbọ etu-olale kpele a pfunse elemhi oni amẹ.‡

²¹ Oni amẹ o migha shi ibatizi, ona o mie ẹ pfunse memena. Oa khi ilẹsẹ khue ichimhi idiegbe-a, ama, imhọli udu ni o pfunse deba Eshinegba ni ọ tsumhi ẹ rọte irọte eghuli guale oyi iJesu iKirisiti.

²² IJesu iKirisiti ọ she je iloghie, ọ shitọ epfe obọ obita oyi Eshinegba, ọ mhẹsẹ ẹ na igeni ali afu ali ekpabọ ni e la idane.

4

Angeli ni o mu pfi

¹ Abi o rọ khia khi iKirisiti ọ she mẹ osoli idiegbe, a li mu egbe ni a li ya mhọli angeli oghoghọ, irari khi oni ọ da lighọ mẹ osoli idiegbe ne, ọa ke gbo mhọli emini ọ ri olamhẹ ẹ riẹle.

² Rọte memena je odalo elemhi agbọ oye, khi gbo zẹ ni oghuemhẹ idiegbe oye o mhẹsẹ ne, ochoghọ, zẹ ni u ke ngeli abi Eshinegba ọ li nono ọli shi.

³ A she kpe pfuse ukpokpomhi eghẹghẹ-a je ukhokho rọ ọ riẹle emini eni ẹa miesuọ e riẹle. A la agbọ

itsebọ ilili, idokonyo, idonyo yesegbe-a, ali idobie, ali ikia-ye-ukue ke da onyo, ali ilita igaga.

⁴ Ama memena, abọ e sha wẹ khi aa ke nu wẹ a riẹle ikhiakhiamhi emini ẹẹ riẹle, e ri itobọ ighọ ọ tsue ẹ.

⁵ Ama khi e mema ya gueye Eshinegba abi e li gbe, oni ọ ya gue egbọ ẹzọ, shi eni e laọ ali eni e ghua.

⁶ Onana o zẹ ni a rọ tse abọ usomhi onete ye egbọ ni e ghua, ni a rọ gue wẹ ẹzọ abi a li ya gue egbọ na agbọ ẹzọ, ama eri e la elemhi ayemhẹ abi Eshinegba ọ la ọ.

Guẹ ri ukpeloe ke khu isomhopfa eyi Eshinegba

⁷ Eghẹghẹ ni agbọ o rọ ya pfo o she ti ramhi ana. Irarighọ, a bino angeli bie ke ngeli ni a dobe toto obọ iromhi isosọ.

⁸ Oni o mema mu egbe ne nya khi, a nono ingme egbe ẹ egbegbọ, itobọ khi eri inono ọọ khukhu olamhẹ ebubu.*

⁹ A ke mu egbe ẹ epfese, ni awọlo ọa la.

¹⁰ Ogbogbọ ọ ri isomhopfa ni ọ mhue ke kpaghie onuzava oyọli obọ, ọ ri igesikia ke ri ẹloe khu okhale oyi Eshinegba odekhode.

¹¹ Ini ogbokhoghuo ọ mhọli ungmehi ya ngme, ọ ke ngme ungmehi oyi Eshinegba. Onini ọ ya kpaghie ogbọ obọ, ọ ri itoto ni Eshinegba ọ rọ na li riẹle ọli. Ni a rọ bhale ya ẹ khi a rọte obọ oyi iJesu iKirisiti ri ikuẹghie

‡ 3:20 Li zẹ Igbae 6.1--7.24

* 4:8 Li zẹ Ekpi 10.12

na Ẹshinẹgba odẹkhodẹ. Lọli ọ mhọli ufumhi ali ekpabọ rọte agbọagbọ ya je agbọagbọ. Atse.

Imẹ-osoli irari khi u miesuo

¹² Emọle mhẹ abọ e khi sha ẹ shi ọmufẹ ni o toto ni a mẹ, abinẹ khi emini aa kpẹ mẹ ghue a mẹ.

¹³ A ri ochoghọ ke ghele khi a li nu iKirisiti mẹ osoli ni ọ mẹ. Eghẹghẹ aghọ ni a mhọli oghẹle oniẹmhi, ini a ri ufumhi oyọli khase.

¹⁴ Ini a ri itobọ eva oyi iKirisiti ẹẹ tsue ẹ, ikhivose ọ khi nẹ, irari khi Ayemhẹ oyi ufumhi ali oyi Ẹshinẹgba o nu ẹ la.

¹⁵ Ini u mẹ osoli, khi zẹ ni a bhale ya ẹ khi itobọ khi u gbe ugbeli ali itobọ khi u do ighi-atọ, wẹkhi angeli ikpamhika ali itashingme u rọ mẹ osoli.

¹⁶ Ama ini u wa mẹ osoli abi ọni ọ miesuo, khi zẹ ni omama o mu ẹ, ama ke kuẹghie Ẹshinẹgba irari khi u wa yemhẹ eva oyọli.

¹⁷ Irari khi eghẹghẹ o she ramhi ni iguezo o rọ ya rọte Owa oyi Ẹshinẹgba ya gbaekẹle. Ini o te awa egbe gbaekẹle, se o ke beshi ya li eni ẹa mie usomhi onete oyi Ẹshinẹgba suọ egbe?

¹⁸ Abi Ebe-no-pfuase o ngme ọ li khi,

“Ini o ya munu ni a rọ tsumhi ọgbọ ni ọ guẹ ẹ ngeli, se ọ ke bie ya li ẹgbọ ọkholọ ni ẹa mhọli Ẹshinẹgba egbe?”†

¹⁹ Irarighọ, eni ẹẹ mẹ osoli, abi o li ghọle Ẹshinẹgba shi, e ri egbe wẹ mhọli Ẹshinẹgba ni ọ ma wẹ ni ọ zẹ ri egbe ẹ nga obọ. E kie ke gbe ikanya enete.

5

Ude ni a ye Egbhali ali ozele

¹ Mhi lolo ye ẹ ude, ẹẹ ni a khi egbhali abi mhẹmhẹ mhi li khi ọgbhali, ni mhi ri ẹloe mẹ osoli ni iJesu ọ mẹ, ni mhi gbo li ya mhọli okemhi shi ufumhi oyọli ini ọ nyenẹ egbe bhale.

² A ri ẹloe ke khu isumha eyi Ẹshinẹgba ni a rọ nga ẹ obọ. O ga pfo ẹ udu ke ri ẹloe khu wẹ. Ọa khi irari eleli ni u ya mẹ ọ tse, ama abi ọgbọ ni ọ mhọli ọghuẹmhẹ ugamhi oyi Ẹshinẹgba.*

³ Khi ri itoto mhese na ẹgbọ ni Ẹshinẹgba ọ rọ nge obọ, ochoghọ angeli o ye o khi irọkhokho ni ẹgbọ ke deba.

⁴ Ini iJesu iKirisiti ni ọ khi Ọrẹloe-khu isumha ọnofunẹ ọ bhale, ọ ya ri arula oghie ni ọa tigbe ya taa nẹ.

⁵ Ẹẹ ezele, a li lighọ nyese ukhomhi ke na egbhali. Ọgbokpa ọ ke ti egbe ọli tiemhi eke, ọa ga egbe ẹ. Irari khi Ebe-no-pfuase o ngme ghọ khi.

“Ẹshinẹgba ọ ma biselemhi ọgbọ ni ọ ti egbọli a nga, ama ọ khi ẹ vose na eni e ti egbewe ẹ tiemhile.”†

⁶ Irarighọ, a ri egbe ẹ tiemhile na ekpabọ oyi Ẹshinẹgba ni e

† 4:18 Li zẹ Ekpi 11.31 * 5:2 Li zẹ iJon 21.15-17 † 5:5 Li zẹ Ekpi 3.34 ‡ 5:6 Li zẹ iMat 23.12; iLuk 14.11; 18.14

funẹ, ni ọ ti ẹ nga idane ini o ramhi oni ẹghẹghẹ.‡

⁷ A zẹ ọtoemhẹ eyẹ ẹ obọ na Ẹshinegba, itobọ khi ọ ya rue ẹ ọ le.

⁸ A bino angeli bie ke ngeli, àà tọkpẹ, itobọ khi ọbe ẹ ni ọ khi ọkpaghie, ọ kia gasẹ abi ọdumhi ni ọọ khoshẹ, eri ọ nono oni ọ ya mu nyanọ le.

⁹ Khi zẹ ọli lo ẹ le! Gbe lighi irudunga oye, itobọ khi u lẹsẹ khi eni e miesuọ nabi yeyẹ ni e la elemhi agbọ ashakhasha e lili ẹ mẹ osoli enabi enana.

¹⁰ Ini u mẹ osoli ukuku ẹghẹghẹ se, Ẹshinegba na okhale nya, ni ọ rọte iKirisiti lu ẹ shi ufumhi oyọli na agbọagbọ, ọ ya rieḽe ẹ ti dọsẹ abi o kpẹ li ẹ egbe. Ọ rẹ toto, ọ mu ẹ mhọli rẹ gbelighi.

¹¹ Ekpabọ o khi oyọli agbọagbọ. Atsẹ.

Otsẹ ni o kpukhokho

¹² ISalasi ni mhi rọ shi inyoghuo ni ọ mhọli igesikia ọ nu mhẹ kẹkẹ ebe ona. Eri mhi kẹkẹ ebe ona ni ọa nuẹ ghi ẹ, rọ ri udu shi ẹ ọ ali ni a rọ lẹsẹ khi emiemini a riẹ mẹ khi egbegbi okhale oyi Ẹshinegba na. A mu ọli mhue gagaga.§

¹³ Egbọ eni e miesuọ ni a zẹ abi ẹẹ na eke iBabilọ, ẹẹ tsẹ ẹ, li shi iMaki ni ọ limhẹ egbe abi omimhẹ.*

¹⁴ A ke tsẹ egbe ẹ a ri inono ghẹḽe mu egbe. Opfomhẹ o ka nu ẹẹ nya ni a la elemhi iKirisiti la.

§ 5:12 Li zẹ Ika 15.22,40
iFilẹ 24

* 5:13 Li zẹ Ika 12.12,25; 13.13; 15.37-39; iKolo 4.10;

Ebe onuzi-eva ni IPita O keke

1 Mhemhe iSamọ iPita ni mhi khi oghumha ali aghiusomhi na kee oyi iJesu iKirisiti, mhi keke ebe ona ghi eni e mhọli irudunga nabi oyi anye ni o mu ẹlo, ni a rote angeli onete oyi Eshinegba ali iJesu iKirisiti Omiepfuese ro na we.

2 Okhale ali opfomhe o ka khi oye rote ilese ni a lese Eshinegba ali iJesu Onomhue oyawa.

Ulumhi ali uzemhi oyi Eshinegba

3 Itoto oyi Eshinegba o she ri emhikpa ni o ri awa ya ke la agbo irudunga na awa, irari khi awa lese oni o ri ufumhi ali onete oyoli ti awa mama egbe.

4 Eni ekpabo eniemhi ena o ro rue isomhopfa ni e mu ẹlo ni o shobo na awa. Ini a bhale ya e khi irari eni isomhopfa ena awa me asha na pfue epfua ni o la oghumhe emhi agbo, ni awa mhọli okemhi shi agbo oyi Eshinegba.

5 Irarigho, roshaka ri ingeli enete ma irudunga oye, gbo ri ilese ma ingeli enete.

6 Ri igue-regbekia she egbe ma ilese, ri iregbemie ma igue-regbekia shi egbe, ri angeli irudunga ma iregbemie,

7 ri isomhelemhi-inyoghuo ma angeli irudunga, ri inono ma isomhelemhi inyoghuo.

8 Irari khi ini u mhọli eni ingeli enana egbegbo, e ya re ke zaza, wa gbe akanya elemhi ilese ni u lese Onomhue iJesu iKirisiti.

9 Ama oni o da mhọli eni ingeli ena ne, o ya ya me eke nuata, eri o ze alo, o she yeke-a khi Eshinegba o she kpe khusese lue olamhe enedio-a pfuase.

10 Irarigho, inyoghuo-mhe, roshaka ni uzemhi ali ulumhi oye o migha egbegbo. Ini u wa ligho, waa ya tigbe do owe eke-a wekhi eri u ya de.

11 Eghenge agho Eshinegba o ya khueghie ode Omhesese oyi Onomhue-a ne lo. Ikhi Onomhue na agboagbo Omiepfuese iJesu iKirisiti oyawa.

A ri esọ shi emini Ebe-nopfuase o ngme

12 Mhi ya ke yeke e le eni ingme ena nya eghenge kpa. Ini a ririe kpe lese we, ni a migha gba elemhi igesikia ni a mhọli ena.

13 Mhi lese khi o ti ni mhi yeke e eni ingme ena nya le, ini mhi da kie la agbo.

14 IJesu iKirisiti Onomhue oyawa o she ro li khashe mhe khi ogbele eyemhe ea ke bu, khi mhi kele ya ghua.

15 Mhi ya roshaka ri ingme ena nya shi e odalo ni a ke sato o, ini mhi so ukhokho gbe.

Eni e ri ukpelo me ufumhi oyi iKirisiti

16 Oa khi okhe egbhọli anye regbenga gue ingme inyenegbe bhale oniemhi oyi

ijesu Onomhue ye e. Alo eyanye anye ro me ufumhi oyoli.

¹⁷ Anye la agho ni Eshinegba ita o ro ri ufumhi ali ekpe na li, ni uruli oyi Eshinegba o ro rote otughunu ni o ge nyanyanya ngme, ni oo, "Omimhe ni mhi nono ingme oyoli na, o ma ghole mhe."

¹⁸ Eri anye suo khi oni ungmehi o rote idane ngme tiemhile, abi anye ro nu oli la ukhomhi ute no pfuase.*

¹⁹ Igho anye li mholi iregbenga shi usomhi ni emekeguele e guele, khi egbegbo lo. O ma a ti e egbe ini a ri esọ shi oni ungmehi, itobọ khi eri o li abi akpá ni o la alo ebili e ge nyagha, ramhi ni ogbe o ro maghie alo-a, ni imeke oyi ukpetata na obilitaso o ro ge shi udu o ye.

²⁰ Ozukhomhi oni ungmehi khi, a lese khi ungmehi ameguele okhoghuo o ro rote ilese oyi omekeguele okhoghuo bhale.

²¹ Irari khi ungmehi ameguele okhoghuo o ro ri imelemhi oyi ogbo bhale ghue, ama Ayemhe-no-pfuase o la egbo egbe gbe akanya rewe gue usomhi oyi Eshinegba le.

2

Ena Osese egbholi ali epfua oyewe

¹ Abi emekeguele eyi egbholi e ke li la iteva eyi egbo iZireni, igho esese egbholi e ya li la e iteva. E ya tsua osese egbholi

ni oo yese egbo-a lasela ke sese egbo, e ga kie Onomhue ni o de we, e ya ri epfua ni o kele ghi egbewe.

² Igho ebubu e e li ya deba ode omama eyi itsebo eyewe, e ri omama shishi oni ode igesikia oyi iKirisiti-a.

³ E ya ri emhi ituegbe rue okhe egbholi lasela gueye e, ni e ro me asha di e mie ikpagho. Eshinegba o she so we ezọ se agboagbo, epfua oyewe o migha khe we ode.

⁴ Irari khi ini Eshinegba o a keshe igeni le abi e ro lamhe deba Eshinegba, ama o ku we lo ilimhi iriere, o ri iweghe ge we abo pfino kulo alo ebili migha khe ogbele iso-ezo.

⁵ Ini Eshinegba o a pfuese agbo onodiọ, ama o ri ochikpho oniemi pfuse oni agbo olamhe-a, se ni iNoa ni oo tse abo igue ngeli ali apfoli oshilua.*

⁶ Ini Eshinegba o pfa ezọ mu iSodomu ali iGomora, khi o ri erali tose we ni e de emue-a, ni o rewe riela irokhokho abi o ya li egbo ni ea mholi Eshinegba egbe,†

⁷ ni o ro pfuese iLoti, omose ni o gue ngeli, ni egbo ena umhasuo-eso e ri ingeli ebe nase ayemhe.‡

⁸ Eri oni omose ona ipfuase onana o vie oya elemhi ayemhe oyoli eghoghe kpa shi ingeli okholo ni oo me ali ni oo gbolo suo.

⁹ Ini o khi igho, Onomhue o lese abi o lie tsumhi egbo oyoli

* 1:18 Li ze iMat 17.1-5; iMak 9.2-7; iLuk 9.28-35

* 2:5 Li ze Igbae 6.1-7.24

† 2:6 Li ze Igbae 19.24 ‡ 2:7 Li ze Igbae 19.1-16

elemhi imhesebino, ali o gbo li lese abi o li ya pfi egbo okholo lo anasemhe ramhi ogbele iso ezọ.

¹⁰ Tete egbo ni e deba oghuemhe idiegbe oyewe ni e ri ukpeloe gbe omhese oyi Eshinegba.

E mhọli igbedu obe ali itiegbe. Ulishi ọa ya mu we ni e ro ri unu ghi igeni ro yese we-a.

¹¹ Ama abotseku khia khi eni igeni ena e mhọli ekpabo dose eni esese egbhọli ena, ẹa ya yese we-a khase Onomhue.

¹² Eri eni egbo ena ẹẹ pfi unu-a shi emini ẹa lese udi ọli. Eri e li abi elamhako ni ẹa mhọli egbhali ni a bia, ni a mu ẹgbolo le tse. Igho e li ya pfua abi elamhako.

¹³ Opfuse a ro ya fali we ota shi ode opfuse ni weweghuo e be na egbewe. Idobie ele oguota gboo, ẹẹ bino khi o khi agbo ilili, ni o ya khuese idiegbe oyewe. Egbo ebe e khi itobo khi ini e nu ẹ le eminale inono kugbe egho, eri e kiele ẹngeli angeli efiala.

¹⁴ Alo efiala eyi okia, e ze shi ukhomhi, ikpotso ni e ya yemhe shi we o, e kia bino alo. Okiamhi olamhe ni oo gbe we ọa tigbe ẹ mhọli ukpese. Egbo ni udu oyewe ọa sheshe ẹẹ di kulo igha olamhe. E she wena emhi ituegbe shi udu. Elemhi itse eyi Eshinegba e la kia.

¹⁵ E she da egbegbo ode lase, e wase ode oyewe-a. E she deba ode oyi iBelamu omi iBeo vu ni o mhọli ukpoko

shi ukpagho ni o ya mie shi onobe ilili.

¹⁶ Ni akphere o dese shi angeli olamhe. Akphere ni o khia khi ọa kpe mhọli ungemhi ogbo shi unu, ni o ri uruli ogbo nu iBelamu ngme shi angeli ujili. §

¹⁷ Eri egbo ena e li abi oke ni o khakha-a, ali uza ni o bi abi amẹ ni akpekpeli o pfiolo irarogbe kua. Eshinegba o she riefe ilimhi iriere shi eke ẹ khe we ni e la me osoli.

¹⁸ Eri ẹẹ ngme ingmemhi itono obo udu, ali ingmemhi ni e violo, ro re egbo sato oghuemhe idiegbe oyewe, ni e ba di we nyene egbe je olamhe. Ikhi egbo ni e lese rote ifuabo eyi egbo ni e la agbo egbhọli pfue.

¹⁹ E shobo epfua na we, ama wewe ni e shi oni obo onana, e khi ighumha angeli epfua. Irari khi oghumha ogbo o khi shi emini o da mhese na ayemhe oyoli.

²⁰ Irari khi, ini egbo e she da rote oyese ni o la agbo pfue ne itobo khi e lese iJesu iKirisiti Onomhue, ni e ro gbo ri egbewe na emhi agbo genọ ne, ikpukhokho oyewe o ke kholo dose igbaekele oyewe.

²¹ O kha tine ini ẹa bie kpe lese ode ipfuase oyi Eshinegba lo, khi e lese ọli se, e tigbe so ukhokho gbe ode ipfuase oyi Eshinegba ni a ro na we.

²² Emini o li we o rokhase khi ekpita ona khi igesikia lo, ni oo,

“Awá o mu egbe nyene

gbo ya le ekpa
ni o kpa shi eke.

Agulu ni a kpe khuęę-a se,
o gbo mu egbe nyenę
je igbolọ ya pfue.”*

3

*Onomhuę o nyenę egbe e
bhale*

¹ Emolemhe, ebe onuzi-eva
ni mhi keke e ghi e na, eri mhi
ri ebe eva ena ya guise e le ali
ni a ro mhọli isamhi eni e te
ode.

² A sato ingmemhi ni
emekeguele ni e pfuase e
ngme ni o she teşe, ali omheşe
ni Onomhuę Omiepfuese oyawa
o mheşe rote obọ ighiusomhi
na keę eyawa.

³ Onodode, a leşe khi ogbele
ni e kpukhokho, egbo ni e ri
ungmemhi oyi Eshinegba a li
egia e ya lasele. Eę li egia
eę rięle oghuęmhe idiegebe
oyewe.*

⁴ E ya ke lię, “Ige ihhale
ni o shobọ khi loli ya bhale
mena? Abi ititawa e te ghu-
loa, emhikpa e kiele e je odalo
abi e li rote igbaekele agbo la
o.”

⁵ Eri e famhi roli shi ie-
eso-a, khi rote ungmemehi oyi
Eshinegba a te ma idane, ni a
ro gbo rote amę ri amę ma
eke agbo.†

⁶ Ama, eni amę ena a gbo
ro ri ochikpho pfuse egbo na
agbo onodio-a.‡

⁷ Ama agbo ali idane ni e
kie lao ogbe-namo, Eghiele
oyi Eshinegba a ro rewe migha
rewe e khe ofuse oyi erali.
Eri a ze we obo o khe ogbele
iguezọ ni a ro ya pfuse egbo
okholo-a.

⁸ Emolemhe, a khi yele emhi
oghuo-a khi, eri ogbeleghuo
o li abi ogbele agbele, ogbele
agbele o li abi ogbeleghuo
ukpeloe oyi Eshinegba.§*

⁹ Oa khi eri Eshinegba o ti
egbe e je ukhokho shi emini
o ro shobọ, abi egbo eghuo e
lię sa khi ini emhi o o ti eke eri
o wu eke-a egho. Eri o mema
mhọli irabomudu na e, itobọ
khi oa nono ni ogbokhoghuo
o pfua, ama ni ogbokpa o te
agbo olamhe mu nyenę.

¹⁰ Ama eri ogbele oyi
Onomhuę o ya bhale abi
ibhale oyi oghiatọ. Oni
ogbele, eri idane o ya ri okeke
onięmhi kele-a udemhija.
Erali onięmhi o daghię emini
e la idane nya kua. Eke ali
emhikpa ni e lao e kala-a.†

¹¹ Aborokhia khi a ya lina
pfuse emhi nya ena, uwali
egbo enabise a kha ke fe khi?
A kha ke la agbo ipfuase ali
agbo Eshinegba,

¹² abi a li ri eloe shi eke e
khe ogbele oyi Eshinegba, ni
awa ke rięle emini o ya roli
bhale pia, ali ogbele ni a ya
ri erali pfuse idane-a erali
onięmhi o daghię emini e la
idane-a nyaa.

* 2:22 Li ze Ekpi 26.11 * 3:3 Li ze Iju 18 † 3:5 Li ze Igbae 1.6-9 ‡ 3:6 Li ze Igbae 7.11 § 3:8 Emini a ri onana ngme khi Eshinegba oa deba eghęghę gbe akanya. * 3:8 Li ze Iwolo 90.4 † 3:10 Li ze iMat 24.43; iLuk 12.39; 1 iTęsa 5.2; Iro 16.15 ‡ 3:13 Li ze Aza 65.17; 66.22; Iro 21.1

¹³ Ama emini Eshinegba o ro shobo, awa migha a khe, ikhi iloghie ali eke agbo onogbo, ni o khi apfe igue-ngeli.‡

¹⁴ Irarigho, ee emole mhe, abi a li ri eloe shi eke e khe oni ogbele ena, a ze ni a bhale ya e e shi ingeli ni ea mholi ichimhi ali umhaguekia, ali a la opfomhe.

¹⁵ Ri oli shi udu khi irabomudu ni Onomhue o mholi na awa, khi, ni o ba ri eghenge na awa mholi imiepfuese lo, ezee abi inyoghwo awa iPolu o kpe li keke oli shi ebe ghi e abi Eshinegba o li ri oni ileasingme na li.

¹⁶ Ina o kie lie keke oli shi ebe, ini o da a ngme eni ingmemhi ena ne. Ebe ni o keke e tsua ingme eghuo ni e lolo e munu irolo-ogbo-eso, ni egbo ni ea mholi ilese ali igesikia e kholo e mano, abi e lie khi ma ingmemhi elese ni e la Ebeno-pfuase ni o ya ri epfua ghi we.

¹⁷ Irarigho, emolemhe, abi a ke ro lese onana egho, a mu egbe e ini a khi ya deba ode egbholi oyi egbo ena umhasuo-eso, ini a khi rote iguemigha oye e de.

¹⁸ Ama mena awa ke fu shi okhale ali ilese ni awa lese Onomhue Omiepfuese oyawa ikhi iJesu iKirisiti. Loli a ri Ufumhi a na agboagbo. Atse!

Ebe onodode ni Ijoni O keke

Ungmemhi ni o mhọli agbọ

¹ Anye keke ungmehi oyi oni o ri agbọ o na ogbọ ghi e, oni o rọte igbaekele la o. Anye she suọ ọli, anye ri alo eyi anye me ọli, anye bino ọli, anye gbo ri abọ eyi anye ti ọli.*

² Abi oni o ri agbọ o na ogbọ ọna o rọ feli lasele, anye me ọli, anye gbo li pfi ọtsele shi oni agbọ na agbọagbọ ọna. Lọli o nu Ita la, ni a rọkhasẹ anye.†

³ Emini anye me ni anye suọ, anye gbo liẹ gueye e, isheghọ ni awa kugbe nu Ita ali Omi ọli iJesu iKirisiti la.

⁴ Eri anye keke ona ni oghẹle oyawa o gba pfo.

Okiali elemhi ákpá

⁵ Onana khi usomhi ni anye rọte obọ oyi Omi ọli suọ, ni anye gue e ye e khi, Eshinegba khi ákpá, obili okhọghuo ọa fe la li egbe kpa.

⁶ Awa kha guele khi awa nu ọli la kugbe ni awa rọ kie la elemhi alo ebili e kia, egbhọli awa lo, awa aa la agbọ igesikia.

⁷ Ama ini awa la elemhi ákpá a kia, abi lọli ọli la elemhi ákpá, ona o rọkhasẹ khi awa nu ọli la kugbe, isheghọ ọlia eyi iJesu Omi ọli, e khuẹse awa olamhe-a pfuase.

⁸ Ini awa guele khi awa aa mhọli olamhe, egbawa awa a di, awa aa mhọli igesikia.

⁹ Ama ini awa zọnọ olamhe eyawa ye Eshinegba ni o ri igesikia riele emhikpa; oni o rọ riele emini o te ode o khi, o ya ri olamhe eyawa topfa awa, o khuẹse awa umha-pfuase egbe-a nya.

¹⁰ Ini awa e khi awa aa lamhe, eri awa ri Eshinegba mele ọlo-egbhọli-a. Ungmemhi oyọli ọa la agbọ oyawa.

2

IKirisiti, ọkpaghiobọ Oyawa

¹ Eniye eyemhe, ee mhi keke ebe ona ghi, ini a khi lamhe. Ama, ini a bhale ya e khi ogbọkhọghuo o lamhe, awa mhọli oni o nu Ita a ngme khe awa shi eke. Lọli khi iJesu iKirisiti oni o pfuase.

² Lọli o khi iluasobo ni a rọ shishi olamhe eyawa-a, ọa khi eyawa tse ama olamhe eyi egbọ kpa.

³ Ini awa ri omhesẹ eyọli e gbe akanya, lọli awa rọ ya lese gboo khi awa lese ọli.

⁴ Eni liẹ khi wewe e lese ọli ni ẹa ri omhesẹ eyọli e gbe akanya, elo-egbhue e khi, ẹa mhọli igesikia.

⁵ Ama ọnini o da ri ungmehi oyọli da gbe akanya ne, inono oyi Eshinegba o gba shi ọli egbe. Ina awa li ya lese khi awa ali Eshinegba khi oghuo awa khi.

⁶ Eni e da liẹ khi wewe e kugbe Eshinegba o ne, e mema

* 1:1 Li ze ijon 1.1 † 1:2 Li ze ijon 1.14

ya ke ngeli abi iJesu iKirisiti o lię ngeli.

Ushi onogbo

⁷ Emole mhe, ọa khi omheşe olese mhi keke ę ghi ę, ama onodiọ lọ, ikhi oni a rọte igbaekele rọ na ę. Oni omheşe onodiọ ona o khi oni usomhi ni a she kpę suọ.*

⁸ Aboriekhi ighọ, omheşe onogbo mhi keke ę ghi ę, irari khi a me igesikia oyi oni omheşe ona iJesu egbe, a gbo me ọli agbo oyęę. Itobọ khi obili o she ę kalaa, oni akpa oyi igesikia o she ę ge.

⁹ Onini ọ da lię khi loli la elemhi akpa ni ọọ biselemhi inyoghuo ọli ne, elemhi alo obili ọ kie la.

¹⁰ Onini ọ da nono ingme oyi inyoghuo ọli ne, elemhi akpa ọ la, emhikhoghuo ọa la li egbe ni o rọli ya khi owę.

¹¹ Ama onini ọ da biselemhi inyoghuo ọli ne, alo obili ọ la, alo obili ọ la kia gase. Ọa leşe obini ọọ je, irari khi obili o she zuse ọli alo.

¹² Mhi keke ebe ona ghi ę eniye,
itobọ khi a she ri olamhe topfa ę
itobọ eva oyi iKirisiti.

¹³ Mhi keke ebe ona ghi ę, ęę ita,
itobọ khi a she leşe ọli,
oni ọ rọte igbaekele la ọ.
Mhi keke ebe ona ghi ę ozele,
itobọ khi a she mu
Oni ọ khi Ogbọ-ọbe ọ le.

Mhi keke ebe ghi ę eniye,
itobọ khi a she leşe oni Ita.

¹⁴ Mhi keke ebe ghi ę, ęę ita,

itobọ khi a she leşe ọli,
oni ọ rọte igbaekele la ọ.
Mhi keke ebe ona ghi ę ezele,
itobọ khi a mhọli ekpabọ,
ali khi ungmemhi
oyi Eshinegba o la
elemhi oyę ę,
ali khi a she mu
Oni ọ khi Ogbọ-ọbe ọ le.

Agbo ona o khi ghọle ę doşe

¹⁵ Agbo ona o khi ghọle ę doşe, wekhi emhikhoghuo ni e la ọ. Ini ogbokhoghuo ọ mhọli oghuemhe na agbo, inono oyi Ita ọa la agbo oyọli.

¹⁶ Irari emhikpa ni e la elemhi agbo, ni e khi, oghuemhe olamhe idiegbe, emini ukpeloe o vię shi, ali itipfuabọ-nga shi emini ọ mhọli ali ni ọ dobe ę riele. Okhoghuo ena nya ęa rọte obọ oyi Ita bhale, ama agbo ona e te bhale.

¹⁷ Oni agbo ona ali emini e la ọ ni ęę ghọle ęgbọ e she ę doşe, ama eni ę riele oghuemhe oyi Eshinegba e ya la ọ agboagbo.

Eni ęę khọli iKirisiti

¹⁸ Eniye, ukpeşe agbo o she ti bhale! A she gueye ę khi oni ọ khọli Omiepfuese ọ ya bhale, memena eni ęę khọli Omiepfuese ebubu e she bhale agbo. Onana awa rọ ya leşe khi ukpeşe agbo o she ti bhale.

¹⁹ Eni ęgbọ ena ęa mema kie kpę khi eyawa, loli o ze khi e rọte awa iteva vu. Ini e kie kpę khi eyawa lọ, e kha migha. Ama eri uvumhi oyewe o rokhase khi ęa ku ma awa ọ.

* 2:7 Li ze iJon 13.34

20 Ama Omiepfuese, Oni o pfuase o she ze e, irarigho a she lese igesikia.

21 Oa khi itobo khi aa lese igesikia mhi ro keke ebe ona ghi e, ama itobo khi a lese igesikia, a gbo lese khi egbholi oa rote igesikia a lasele.

22 Mena, oghuo o khi olo-egbhue? Oni oo khi iJesu oa khi oni Omiepfuese, loli o khi Obe vule shi Omiepfuese o, loli o kie Ita ali Omọ.

23 Aa me ogbokhoghuo ni o kie Omọ ni o mholi Ita. Oni o da mie-obo shi Omọ o, o li mholi Ita.

24 Zobe ni emini u rote eke suo o kie le egbe. Ini o ligho kie le egbe, u ya li kie nu oni Omọ ali Ita la kugbe.

25 Emini o shobo na wa na, ikhi agbo na agboagbo.

26 Ingme eyi egbo eni e nono ni wewe e yese e da ode mhi keke e ghi e.

27 Ama ee oye e, ekpabo Ayemhe no pfuase ni a mie, o kie la e egbe, irarigho, aa ke khi eni a sese. Ama eri Ayemhe oyoli oo sese e emhikpa, ikhi emini e khi igesikia ni ea khi egbholi. A ri osese oyi Ayemhe ke gbe akanya, a kie nu oli la kugbe.

Imi Eshinegba

28 Mena, eniye, a kie kugbe oli o. Ishegho ini o feli lasele, awa mholi igbedu ni omama oa mu awa odalo oyoli, ini o nyene egbe bhale.

29 Ini u lese khi iKirisiti khi oni o migha shi ipfuase o khi,

lese khi oni o riye emini e te ode Omi Eshinegba o khi.

3

1 A bino abi inono ni Ita awa o nono awa o li fu ramhi, ni a ro bhale ya e khi aa lu awa imi Eshinegba! Ni o khia khi igho awa khi! Emini o ze khi egbo na agbo ea lese awa khi, ea lese Eshinegba.*

2 Emole mhe, imi Eshinegba awa khi, ama, awa aa lese ne, abi awa ya li, ama awa lese khi ini iKirisiti o lasele, awa ya li abi loli, irari khi awa ya me oli abi o li tee.

3 Ogbokpa ni o da mholi irudushi ona ne, oo mholi oni oghuemhe ni o ro khi oni o pfuase abi iKirisiti o li pfuase.

4 Onini o da lamhe ne, eri o gbe ushi oyi Eshinegba-a, irari khi olamhe, igbushi oyi Eshinegba-a o khi.

5 Ama u lese khi eri iKirisiti o bhale ni o ya rue olamhe eyawa vu, ali khi olamhe oa la li egbe.†

6 Irarigho, ogbokpa ni o nu oli la kugbe, oa ya lamhe ke le. Onini o kie da la olamhe ne, oa fe me oli ghue wekhi eri o lese oli.

7 Eniye, a khi ze ni ogbokhoghuo o di e ya de ode-a. Oni o da riye emini o te ode ne, o pfuase, ezee abi iKirisiti o li pfuase.

8 Onini o da riye emhi olamhe ne, oyi Okphaghiye o khi. Irari khi te-ekẹ vu, okphaghiye o te e lamhe. Emini o ze ni Omi Eshinegba o ro feli bhale khi, ni o ro me asha

* 3:1 Li ze iJon 1.12 † 3:5 Li ze iJon 1.29

pfueche ikanya eyi okphaghię-a.

⁹ Ogbokpa ni o da khi Omi Eshinegba o ya lamhe, irari khi ukpamhi oyi Eshinegba o la li egbe, ęa ya lamhe irari khi Eshinegba o khi Ita we.

¹⁰ Onana o ri ikhioda shi iteva imi Eshinegba ali imi Okphaghię. Enieni ęa da rięle emini o te ode ne ali ni ęa mholi inono na egboęe ne, ęa khi imi Eshinegba.

A nono ingme oyi egbe ę

¹¹ Onana o khi usomhi ni a rote eke suo. Ikhi, awa nono ingme oyi egbe awa.‡

¹² Khi li abi iKeni ni o khi oyi Ona Okholo, ni o gbe Ebeli inyoghuo oli-a. Elo o ze ni iKeni o ro gbe oli-a? Irari khi emini oni iKeni oo rięle, ęa gbe akanya, ama emini inyoghuo oli oo rięle e khi eni e pfuase.Š

¹³ Irarigho, o khi sha ę abo, inyoghuo-mhe eni emose ali eni ikpotso, ini egbo na agbo ęa ti elemhi ę.

¹⁴ Awa lese khi awa she te eghuli lasela je agbo, itobo khi awa nono ingme oyi inyoghuo awa. Onini o da mholi inono ne, elemhi eghuli o kie la.*

¹⁵ Onini o da biselemhi inyoghuo oli ne, ogbo-ugbeli o khi. U lese khi ogbo-ugbeli o mholi agbo oyi Eshinegba shi agbo oyoli.

¹⁶ Ina awa lie lese emini inono o khi. Eri iJesu iKirisiti o ri agbo oyoli bhale, ni e pfuse-a, shi itobo oyawa. Awa kha li

rue agbo oyawa li shi eke na inyoghuo awa.

¹⁷ Ini ogbo o mholi epfue, ni o ro me khi inyoghuo oli o mholi emini o to oli, ni o ro ro mholi ilelemhi na li, seę o li dobe ya lie khi loli mholi inono oyi Eshinegba?

¹⁸ Eniye, a khi ze ni awa ri ungmehi ali elemhi ke rięle inono, ama awa ri irięle ali igesikia ke ri inono khasę.

¹⁹ Ini awa nono ingme oyi egboęe, awa lese khi igesikia awa la kia, awa mholi udu opfomhe odalo oyi Eshinegba.

²⁰ Abi eni e miesuo, ini udu oyawa o pfa ezo mu awa, awa lese khi Eshinegba o fu dose udu oyawa, ali khi o lese emhikpa.

²¹ Irarigho, emole mhe, ini udu oyawa o da pfa ezo mu awa ne, loli awa roo mholi igbedu odalo oyi Eshinegba.

²² Emiemini awa da mhila kpa, awa te obo oyoli ya mie oli, itobo khi awa ri ishi eyoli ę gbe akanya ali khi awa a rięle emini e ghole oli.

²³ Emini o mhese na awa khi, awa mie Omi oli iJesu iKirisiti suo, ali awa nono ingme oyi egbe, ezeze abi iKirisiti o li mhese na awa.†

²⁴ Eni e ri omhese oyi Eshinegba a gbe akanya, eri wewe ali Eshinegba e ga kugbe, Eshinegba o li kugbe we o. Itobo Ayemhe ni Eshinegba o ro na awa, awa ro lese khi awa kugbe Eshinegba o.

‡ 3:11 Li ze iJoni 13.34 ze iJoni 13.34; 15.12,17

Š 3:12 Li ze Igbae 4.8

* 3:14 Li ze iJoni 5.24

† 3:23 Li

4

Ke mu Iyemhe fe bino

¹ Emole mhe, a khi mie shi iyemhe nya o, ama mu we fe bino ni a me ini obo oyi Eshinegba e te bhale. Irari khi emekeguele eyi egbholi ebubu e she fie lasele shi agbo ona.

² Ina a li ya lese ini Ayemhe oyi Eshinegba lo: Ayemhe nya ni o da lama khi iJesu iKirisiti o she bhale abi ogbo ne, oyi Eshinegba lo.

³ Ama ayemhe nya ni o da mie-obo shi iJesu o ne, o rote obo oyi Eshinegba bhale. Onana o khi ayemhe oyi oni o kholi Omiepfuese, ni a su o khi o o bhale, o she ga la elemhi agbo memena.

⁴ Ama enayi Eshinegba a khi, imi mhe, a she gbo mu emekeguele eyi egbholi o le, irari khi Ayemhe ni o la e egbe o fu dose oyi oni o la elemhi agbo.

⁵ Elemhi agbo eni emekeguele eyi egbholi egbo e rote lasele, ingmemhi agbo e egbe, irarigho egbo agbo e ro mie shi emini e egbe.

⁶ Ama enayi Eshinegba awa khi. Onini o da lese Eshinegba, loli o ri es o shi emini anye e egbe. Oni o da khi oyi Eshinegba ne, o ya ri es o shi emini anye e egbe. Ina awa lie lese ikhioda ni o la Ayemhe igesikia ali ayemhe egbholi.

Eshinegba inono o khi

⁷ Emole mhe, a ze ni awa nono ingme egbe, irari khi obo oyi Eshinegba inono o te bhale. Oni o da mholi inono,

Eshinegba o khi itali ali khi o lese Eshinegba.

⁸ Ogbo ni o da mholi inono ne, o da lese Eshinegba, irari khi Eshinegba khi inono.

⁹ Eri Eshinegba o ri Omi oli otuoghuo kpe ni o ghie bhale agbo ro ri inono ni o mholi na awa khashe, ini awa a rote obo oyoli mholi agbo.

¹⁰ Onana o khi egbegbi inono, o da khia khi eri awa nono ingme oyi Eshinegba, ama eri o nono ingme oyawa, loli o ze ni o ro ghie Omi oli bhale ni o ro luase obo ro shishi olamhe eyawa.

¹¹ Emole mhe, ini o khia khi ina Eshinegba o li nono awa, awa li nono ingme egbe awa.

¹² Ogbo khoghuo o da me Eshinegba ghue, ama ini awa nono ingme egbe awa, Eshinegba o la agbo oyawa, ali khi, inono oyoli o gbe akanya ni o nono ni loli gbe agbo oyawa.*

¹³ Awa ga lese khi Eshinegba o la agbo oyawa, irari khi o she ri Ayemhe oyoli na awa.

¹⁴ Ali khi awa me, awa gbo pfi otsele khi Ita o ghie Omi oli ni o ro khi Omiepfuese oyi agbo.

¹⁵ Ini ogbo khoghuo o mie shi o khi Omi Eshinegba iJesu o khi, Eshinegba o la agbo oyoli, loli o li la elemhi Eshinegba

¹⁶ Ishegho, awa lese, awa gbo mie shi inono ni Eshinegba o mholi na awa.

Inono Eshinegba o khi, eni e la agbo inono e nu Eshinegba

* 4:12 Li ze iJon 1.18

la kugbe, Ẹshinẹgba ọ li nu wẹ la kugbe.

17 Ina inono oyọli o liẹ gbe akanya ni ọ nono ni lọli gbe agbọ oyawa, ni awa rọ mhọli igbedu ogbele iguezo, irari khi eri awa li abi lọli ekagbọ ona.

18 Ulishi ọa la inono. Ama eri inono ni o gba pfo, ọọ khu ulishi fiẹ, irari khi eri egbọ ẹẹ na ulishi Ẹshinẹgba itobọ khi ọ ya na wẹ osoli. Ọni ọọ na ulishi ọa gba pfo elemhi inono.

19 Eri awa mhọli inono, itobọ khi lọli ọ kpe nono ingme oyawa.

20 Ini ọgbọkhoghuo ọọ liẹ, “Mhi nono ingme oyi Ẹshinẹgba,” ama ọ kiele ẹ biselemhi inyoghuo ọli, ọloegbhue ọ khi. Irari khi ọgbọ ni ọa da nono ingme oyi inyoghuo ọli ni ọọ me ẹloe, ọa dobe ya nono ingme oyi Ẹshinẹgba ni ọa me ẹloe ghue.

21 Omhese ni iKirisiti ọ rọ na awa na: Eni e nono ingme oyi Ẹshinẹgba nya, e mema li nono ingme oyi inyoghuo wẹ.

5

Imuọle ni awa mu agbọ ọ le

1 Ọnini ọ da mie shi ọ ne khi iJesu ọ khi ọni iKirisiti Ọmiepfuese, Omi Ẹshinẹgba ọ khi, Ọnini ọ da nono ingme oyi Ita ne, ọ li nono ingme oyi omi ọli.

2 Abi awa liẹ lese khi awa nono ingme oyi imi Ẹshinẹgba khi, ini awa nono ingme oyi Ẹshinẹgba, ni awa gbo rọ ri omhese oyọli gbe akanya.

3 Ini awa nono ingme oyi Ẹshinẹgba egbegbo, awa mema ya ri omhese oyọli gbe akanya. Ama omhese eyọli ẹa ya mu unu irogbe-akanya.*

4 Itobọ khi ọgbọkpa ni Ẹshinẹgba ọ bia, lọli ọ dobe ya mu agbọ ọ le, irudunga oyawa o khi oni imuọle.

5 Oghuo ọ dobe mu agbọ ọọ le? Se ni ọgbọ ni ọ miesuọ khi, iJesu khi Omi Ẹshinẹgba.

6 Ọna khi iJesu iKirisiti ni ọ bhale, rọte iri-amẹ-batazi, ali rọte ọlia ikushieke abi ọ rọ ghua. Ọa khi rọte amẹ tse, ama li shi ọlia ni ọ ku shi eke abi ọ rọ ghua. Ayemhe ọ pfi ọtsele shi ọ, irari khi ọni Ayemhe oyi igesikia lo.

7 Irari khi ọtsele ese e la ọ.

8 Ayemhe, amẹ, ali ọlia. Eni ọtsele ese ena unu oghuo ee ngme.

9 Ọtsele oyi agbọ awa mie ẹ suọ, ama ọtsele oyi Ẹshinẹgba ọ toto ne. Ọ she pfi ọtsele shi ingme oyi Omi ọli

10 Irarigho, ọgbọkpa ni ọ mie Omi Ẹshinẹgba suọ nya, ọ mhọli ọtsele onana shi udu oyọli. Ama ọni ọa mie Ẹshinẹgba suọ, eri ọ rọli shi ọlo-egbhọli, itobọ khi ọa mie shi emini Ẹshinẹgba ọ ngme shi ingme oyi Omi ọli.

11 Oni ọtsele o khi Ẹshinẹgba ọ she ri agbọ na agbọagbọ na awa. Oni agbọ ona o la obo oyi Omi ọli.†

12 Irarigho, ọni ọ da kugbe Omi Ẹshinẹgba ọ ne, lọli ọ mhọli oni agbọ oyi Ẹshinẹgba ona. Ọni ọa da kugbe Omi

* 5:3 Li ze iJoni 14.15 † 5:11 Li ze iJoni 3.36

Ɛshinẹgba ọ ne, ọa mhọli agbọ oyi Ɛshinẹgba.

¹³ Mhi she kẹkẹ emhikpa shi elemhi ebe ona ghi ẹ, ni a mie iJesu Omi Ɛshinẹgba suọ, ni a rọ mhọli ọli shi udu khi a mhọli agbọ oyi Ɛshinẹgba.

¹⁴ Igbe-udu ni awa a mhọli ini awa la odalo oyi Ɛshinẹgba a sọ iromhi khi, awa lẹsẹ khi ẹghẹghẹ kpa ni awa rọ mhila li emhikhọghuo abi o ghọle ọli shi, eri ọọ suọ awa ọ.

¹⁵ Irarighọ, abi awa rọ da lẹsẹ khi ọọ suọ awa ini awa da mhila emhi ne, awa lẹsẹ khi awa she mhọli emini awa mhila li.

¹⁶ Ini ọgbọkhọghuo ọ me khi inyọghuo ọli ọọ lamhẹ olamhẹ ni ọa ri eghuli gbe ọgbọ, ọ lema na li, khi Ɛshinẹgba ya ri agbọ nali. Eni olamhẹ oyewẹ e khi olamhẹ ni ẹa ri eghuli gbe ọgbọ mhia ngme. Olamhẹ o la ọ ni o ri eghuli ẹ gbe ọgbọ. Ọa khi olamhẹ eghọghọ mhiẹ a lema shi.

¹⁷ Umha-guẹli kpa, olamhẹ o khi. Ama olamhẹ o la ọ ni ọa ya ri eghuli gbe ọgbọ.

¹⁸ Awa lẹsẹ khi oni Ɛshinẹgba ọ bia, ọa ya lamhẹ olamhẹ, irari khi eri Omi Ɛshinẹgba ọ khukhu ọli, ini Ọkphaghie ọ khi dobe li ọli onobe.

¹⁹ Awa lẹsẹ khi imi Ɛshinẹgba awa khi, ali khi Ọkphaghie ọ mhẹsẹ ẹ na ẹgbọ nya ni ẹa lẹsẹ Ɛshinẹgba.

²⁰ Awa gbo lẹsẹ khi Omi Ɛshinẹgba ọ she bhale elemhi agbọ, ali khi ọ she ri ilẹsẹ ni awa rọ lẹsẹ oni egbegbi Ɛshinẹgba. Ali khi awa kugbe

oni Ɛshinẹgba ni ọ khi igesikia ọ, ighọ awa gbo li kugbe iJesu iKirisiti ni ọ khi Omi ọli ọ. Lọlighuo kpe ọ khi egbegbi Ɛshinẹgba, ali oni agbọ na agbọagbọ.

²¹ Eniyẹ eyemhẹ, a mu egbe ẹ. A khi mhọli emini e ku ẹ ali ilitsa gbe.

Ebe onuzi-eva ni iJoni O keke

1 Mhemhe ogbhali na igbaa oyi eni e mie iJesu iKirisiti suo mhia keke ebe ona ghi e.

Yeje okpotso ni Eshinegba o ze ali imi e, ni mhi nono ingme oyewe mhi keke oli ghi. Oa khi mhemheghuo tse mhi nono ingme oyee, li shi eni e lese igesikia.

2 Eri anye nono ingme oyee, itobo igesikia ni o la anye egbe, ni o kie ya la anye egbe agboagbo.

3 Mhi lema Eshinegba Ita ali iJesu iKirisiti Omioli e ri okhale ali ilelemhi ali opfomhe na awa elemhi igesikia ali inono.

4 Egbe ma mu mhe gba abi mhi ro suo ingme oyi imi e eghuo, ni e la angeli ode oyi Eshinegba, ni ee rieje emini e ghole Ita.

5 Irarigho, nokpotso, onana oa khi omheso onogbo ni mhia yele e le, ama oni awa rote eke lese lo. Eri mhi awa nono ingme egbe awa.*

6 Inono ni mhia ngme khi awa mema ya ke ri omheso oyi Eshinegba gbe akanya. Oni omheso abi ee nya a she li suo li rote eke vu khi, ee nya a mema la angeli inono.

7 Ebu bu egbo ni e di egbo e she lasese shi asha kpa elemhi agbo, ni ee lie khi iJesu iKirisiti oa li abi ogbo li bhale

agbo. Egbo enana nya, egbo elo-egbhu e khi, e gbo khi eni ee kholi Omiepfuese.

8 Irarigho, a mu egbe e ini emini awa gbe akanya a shi o khi de awa obo-a, ama ni awa khi eni a somhopfa gba pfo.

9 Mhi gueye e khi onini oa da mu emini iKirisiti o sese mhue, ni o da o, oa mholi Eshinegba. Ama onini o da mu emini iKirisiti o sese mhue ne, o mholi Eshinegba Ita ali Omioli.

10 Irarigho, ini ogbokhoghuo o bhale debe ni o ro tsua osese olese ni oa khi onana bhale, khi ze oli lo owa oye le, khi ga fe mholi ikpaghiobo shi oli oni osese.

11 Onini o da mholi ikpaghiobo shi oni ogbo oghogho osese ne, eri o kugbe oli o, ni e ga rieje oni okholo.

Ungmemhi ni o kpukhokho

12 Mhi ga mholi emhi ebubu ni mhi kha keke ghi e, ama mhi aa nono ni mhi keke we shi ebe. Eri mhi ya ri ochogho bhale ya bino e, ishegho ni awa me egbe imialo nu egbe ngme. Ni ogheloyawa o vo.

13 Imi inyoghue ni okpotso ni Eshinegba o ze, ee tse.

* 1:5 Li ze iJon 13.34; 15.12,17

Ebe onuzi-ese ni Ijoni O keke

1 Mhemhe ni mhi khi ogbhali.*

Mhia keke ebe ona ghi omole mhe iGayusi ni mhi nono ingme oyoli egbegbo.

2 Omole mhe, mhi so iromhi ne, Eshinegba o ka re ze, ali emhikpa e ke je odalo ne onete abi ayemhe oye o lie je odalo shi o.

3 Egbe ma mu mhe gba abi eni anye ga miesuo eghuo e ro bhale ya bino anye, ni e ro guele khi u ma mu igesikia mhue ali khi u kiele e ngeli angeli igesikia.

4 Emhese ea la o ni o remhe e ghele, abine khi ini mhi suo khi imi mhe e la angeli igesikia.

5 Omole mhe, u ga ri igesikia rieler emhi ebubu ro kpaghie inyoghuo awa ni awa ga miesuo obo, abi e ririer khi epfese.

6 Eni egbo e she gue ingme inono oye ye igbaa oyi eni e mie iJesu iKirisiti suo ni o la akana. Kpekpe kpaghie we obo ni e dober ri oni okiali ke je odalo abi o li ghole Eshinegba.

7 Itobo oni Eva ona, e ro vu oni okiali ona, ni o khia khi ea lama mie eni ea mie Eshinegba suo ikpaghiobo.

8 Irarigho, awa egbo eyi iKirisiti, awa khi eni e mema

ya kpaghie eni egbo eghoghobob, ni awa kugbe we o gbe oni akanya, shi igesikia.

9 Mhi kpe keke ebe ghi igbaa oyi eni e mie iJesu iKirisiti suo ni o la eoli oye, ama iDiotefisi ni o kie kpe ligho nono ni loli ralo na eni igbaa oyi eni e mie iJesu iKirisiti suo, oa lama ri emini mhi gueye oli gbe akanya.

10 Irarigho, mhi kha bhale, mhi ya guele emini o rieler le gboo. Abi o lie gue anye ez, ni o lie kiener ogbholi ma anye. Ogho oa ga bu oli, ama oa gbo lama mie apfowa ni awa ga miesuo. Eri o ga khu egbo ni e nono ni wewe e mie we shi owa ya fie igbaa oyi eni e mie iJesu iKirisiti suo.

11 Omole mhe khi ke khonya angeli obe, ama khonya eminete. Oni o da rieler eminete ne, Omi Eshinegba o khi. Onini o da rieler onobe, oa lere Eshinegba.

12 Ogbokpa oo ngme onete oyi iDemetiriusi. Egbegbi angeli igesikia oyoli o gbo pfi otsele na li. Anye gbo ri otsele oyanye ma o. A lere khi otsele oyanye khi igesikia o khi.

Otse ni o kpukhokho

13 Emhi ebubu e la o ni mhi kha keke ghi e, ama mhi aa nono ni mhi keke we shi ebe.

14 Mhi sa khi mhi ya kele bhale ya me, ni awa me egbe imialo nu egbe ngme.

15 Opfomhe o ka nu e la. Emole e ni e la oola, ee tse e. Kpekpe tse emole anye nya ni e la oobo, otuoghughuo.

* 1:1 Li ze Ika 19.29; iRom 16.23; 1 iKori 1.14

Ebe ni iJudu O keke

¹ Mhemhẹ iJudu ni mhia ga iJesu iKirisiti, ni mhi gbo khi inyoghuo iJemhisi mhi keke ebe ona.*

Eni Eshinegba Ita o ze, ni o nono ingme oyewe, ni a ri akhukhu oyi iJesu iKirisiti khukhu, mhi keke oli ghi.

² Ilemhi ali opfomhe ali inono ni e gbeku o, e ka khi oyeye.

Epfua oyi egbo esese egbholi

³ Emole mhe ni awa ga a ga Eshinegba, o mema ghole mhe ni mhi keke ingme imiepfuese ni awa mholi shi ebe ghi e, ni mhi ro me khi o mu egbe ne ni mhi ri ebe ya ri udu shi e o, ni a dobe gbelighi shi oni irudunga ni Eshinegba o ro nga egbo eyoli obo agboagbo kpa.

⁴ Oni irudunga o she la okhena, irari khi egbo ni ea ya na ulishi Eshinegba e she kuma awa o ni awa aa lese. Eni e mu ilemhi oyi Eshinegba nyene, khi eri o ri egheghe na we e ro ke li itsebo. E kie iJesu iKirisiti ni o khi Oga ali Onomhue oyawa. O she tese ni Ebe-no-pfuase o ro kpe te eke ngme oli khi eni e ya pfua ele iguezọ e khi.

⁵ Irari khi ini a ririe kpe kie lese ena nya, mhi kie gbolo

e yele e le khi Onomhue o rue egbo eyoli rote eke ijipiti lasese, ama, elese, o pfuse eni ea lama miesuo ni e la we iteva-a.†

⁶ A sato khi igeni ni ea mu omhese ni a ro na we mhue, ni e lase ashini a re we shia. Eri o rewe shi obili, o ri iweghe na agboagbo ge we, o rewe e khe iguezọ ona ogbele ni o fune ni a la ya pfuse we a.

⁷ A sato khi igho egbo iSodomu ali iGomora ali eni e la eoli ni e mama we e li i ngeli, ni e ro ku abo lo itsebo ali ighue ebe imumu. Eri a na we osoli na agboagbo, ro re we riele irokhokho, ro tse agua ye egbo kpa.‡

⁸ Igho eni egbo ena, e li la elena ni o rewe lamhe ri ichimhi mu egbe we, e ri ukpeloe gbe omhese oyi Eshinegba, e tigbe gbo me igeni na idane bie.

⁹ Egbegbi ageni ni o fune nya ni a lu iMakieni o a fe gbudu ri ungmehi imebie pfueche Okphaghe-a, abi e ro khe olimhi oyi iMosisi, ama eri o lese lie, "Onomhue o kie e."§

¹⁰ Ama eri eni egbo ena e kie pfi itsue e manya egbo shi emini ea ririe lese udi oli. Eri e li abi elamhako ni ea ya sa. Angeli obe oyewe o ze ni e ro pfua.

¹¹ Epfua e ya pfua! Ode oyi iKeni e rote, eri itobo ukpagho ri egbewe ni ode ni o a gbe akanya de abi oni iBelamu o riele. E nga engo,

* 1:1 Li ze iMat 13.55; iMak 6.3 † 1:5 Li ze Okiali 12.51; iNoba 14.29-30 ‡ 1:7 Li ze Igbae 19.1-24 § 1:9 Li ze iDan 10.13,21; 12.1; iIro 12.7; iDeut 34.6; iZaka 3.2

abi iKora o li nga engo, ni o ro li pfua.*

12 Egbọ ukhimhi elemhi e khi ini e nu e la ukue ni a la le eminale inono. E ri umha a na omama ali ulishi, e ro nu e a le eminale. Egbewę tse, e so eminale e shi idi. Eri e li abi iza ni akpekpeli o tsua kia. Eri e li abi eera okase ni ea ya mo idumhi, ni a vu a pfia, e khakha.

13 Eri angeli oyewe o ri egbe a khasę abi ofulu okę oniemhi ni akpekpeli o o tsughuse. Eri e li abi ikpetata ni e kele-a, ni Eshinegba o ri obili ni o limhi shi eke e khe agboagbo.

14 Agbhotu ishilua, Enoki o khi ini a rote Adamu leli oli, ayemhe o ro ngme ingme angme-shi-ekę oyi egbo ena, ni o la lie, "Ghe khi Onomhue o o bhale, loli ali igeni agbele agbele eni e pfuase eyoli,

15 ni o ro bhale ya gue ogbokpa ezọ, ni o ro pfa ezọ mu egbo ebe nya shi ingeli ebe ni e ri ode obe ngeli, ali ingmemhi ebe ni e toto ni egbo ebe e ngme deba li."

16 Egbọ awolo ali eni ee me umha-gueli oyi ogbo e khi, oghuemhe obe oyi egbewę e deba, e ri unu e nyanọ ifele shi osomhi ro ti egbewę nga. E ri ikhomhi akọ e titi egbo, ini o ba me asha ti we egbe.

Itse-agua ali Ude

17 Ama emole mhe, a sato emini ighiusomhi na keę eyi iKirisiti Onomhue e ngme shi eke.

18 Ee gweye e khi, "Ogbele ikpukhokho, egbo ni e ri egbo e li egia, ni e ya ke deba oghuemhe ebe eyewe e ya la o."†

19 Eni egbo ena ee pfi okemhi shi e iteva. Isamhi agbo, ni udu oyewe o gweye we, ee deba. E a mholi Ayemhe oyi Eshinegba.

20 Ama ee emole mhe, a ke sese egbe e ode irudunga ni o pfuase. A ke lema elemhi Ayemhe-no-pfuase

21 A la elemhi inono oyi Eshinegba abi a li migha a khe ilelemhi oyi iJesu iKirisiti Onomhue oyawa ni o re e bhale agbo na agboagbo.

22 Le elemhi eni e mhue akhokhomhe shi irudunga oyewe.

23 Tsumhi egbo ni ee nono ni weye e mie iwali osese egbholi suo abine khi u wa ti ogbo erali lasele, lelemhi egboese ni e nono ikpaghiobo. Ama mu egbe e ini e khi yese li de pfilo olamhe eyewe.‡

Iromhi ikueghie

24-25 Awa ri ikueghie na Eshinegba Otsumhi oyawa itobo iJesu iKirisiti Onomhue oyi awa! Loli o dobe ya mu e mholi ini u khi de, ni o re pfuase, re e ghele odalo oyoli ni o mholi ufumhi. Eshinegba, lolighuo o fute ni a ri ufumhi, ekpe, ekpabo ali omhese e na, neni a me igbaekele agbo, ghe memena, ali agboagbo. Atse.

* 1:11 Li ze Igbae 4.3-8; iNoba 22.1-35; 16.1-35 † 1:18 Li ze 2 iPit 3.3 ‡ 1:23 Abi a li keke ona shi elemhi iGiriki khi. 'Khi mholi emini u ri itsua ni idiege olamhe e ri ichimhi a mu li.'

Irokhase Ni iJoni o keke

Ikhueghie ungmehi-a

¹ Ebe ona a keke imekeguele oyi iJesu iKirisiti shi ni Eshinegba o ro nali ni e khi emini a ya me ni ode o ke nu, ni o rote obo oyi ageni rokhase iJoni oni oo ga oyoli.

² IJoni o pfi otsele shi emhi nya ni o me ni o khi ungmehi oyi Eshinegba ali otsele oyi iJesu iKirisiti.

³ Ikhivose o khi na ogbo ni o ya ze ingmemhi eyi imeguele ena, ikhivose o li ya khi na ogbo ni o suo we, ali oni o ri emini a keke shi o gbe akanya, irari khi oni egheghe ni a ro ya me eni emhi enana nya o she ti bhale.

⁴ IJoni o ri otseghi igbaa nya eyi eni e mie iJesu iKirisiti suo ishilua ni e la eke Esha.

Okhale ali opfomhe o ka khi oye rote obo oyoli, Oni o khi loli, ni o kie kpe khi loli, ni o kie gbo ya bhale. Iyemhe ishilua ni e migha odalo ukpekhomhi oyoli e li e tse e.*

⁵ Li shi iJesu iKirisiti ni o khi otsele ona igesikia, oni o te odode mu eghuli o le, ni o mhesa na ighie na agbo, o li ri otseghi e.†

Loli ni o nono ingme oyawa, ni o ri oia eyoli rue awa olamhe eyawa le,

⁶ o she ri awa khi ighie ali ekpodalo-ugamhi eyi Eshinegba ni e ke ga Eshinegba oyoli ali itali. Ufumhi ali ekpabo e khi eyoli agboagbo ya je agboagbo! Atse.‡

⁷ A ghe i, o ya la

elemhi otughunu

ke bhale,

ukpeloe nya e ya me oli, ghe egbo ni e sonoli iwerere.

Egbo nya na eke agbo e ya vie oya irari oyoli.

Igho o ya li! Atse.§

⁸ "Mhemhe mhi khi Aafa ali Omega." Eshinegba Onomhue Nofune nya o ngme gho, Oni o khi loli, ni o kie kpe khi loli, ali ni o ya bhale.*

O ni o li abi Omi ogbo

⁹ Mhemhe iJoni ni mhi khi inyoghuo e ni awa ga me osoli, ni awa ga mholi obo shi omhesa ali ni awa kuegba a regbemie itobo iJesu. Abi mhi ro la eke ni i la iteva oke oniemhi ni a lu iPatimosi irari ungmehi oyi Eshinegba ali otsele oyi iJesu.

¹⁰ Ayemhe o tiemhile shi mhe o ogbele oyi Onomhue, mhi suo uruli na leghe nabi akala ukhokho oyemhe.

¹¹ Oni uruli oo, "Keke emini u me shi ebe, ni u rue oli ghi igbaa nya eyi eni e mie iJesu iKirisiti suo ishilua eni e la eoli Efesosi, ali iSimirina ali iPagamu ali iTiatira

* 1:4 Li ze Okiali 3.14; Iro 4.5 † 1:5 Li ze Aza 55.4; Iwolo 89.27 ‡ 1:6 Li ze

Okiali 19.6; Iro 5.10 § 1:7 Li ze iDan 7.13; iMat 24.30; iMak 13.26; iLuk 21.27; 1

iTesa 4.17; iZaka 12.10; iJon 19.34,37 * 1:8 Li ze iRom 1.17; Iro 22.13; Okiali 3.14

ali iSadisi ali iFiladefia ali iLaodisha.”

¹² Mhi mu egbe nyene ni mhi me uruli ni o nu mhe e ngme. Abi mhi ro nyene egbe, mhi me ikhuli igolu ishilua ni a ri ikpa ru e nga.

¹³ Ifui eni ikhuli ni a ri akpa ru e nga, mhi me ogbo, “Ni o li abi Omi Ogbo.”† O so itsua na dogo ni e ramhi oli imekene awe, ni o ri ugbhobho igolu mu aye.

¹⁴ Ukhomhi ali itsu eyoli ee pfuase abi afuolu, ee pfuase pepere abi otughunu opfopfo, ikpamhi alo eyoli e li abi elemhi erali.

¹⁵ Awe eyoli e ge nyagha abi akhuli ide. Uruli oyoli oo de limhilimhi abi ikhoshe oyi utumhi oko nofuni ni o rote ikhomhi eche tu e tiemhile.‡

¹⁶ Obita oyoli o mu ikpetata ishilua mhue, itakobi ozalo eva o rote unu oyoli lasele. Alo eyoli e ga nyanyanya abi ovo o khueghie unu-a.

¹⁷ Abi mhi ro me oli, mhi de yeshi oli awe abi oni o she ghu-a. Ama o ri obita oyoli nga mhe egbe, oo mhe, “Khi na ulishi, mhemhe mhi khi Onodode ni mhi khi oni o kpe ukhokho.*

¹⁸ Mhemhe mhi khi Oni o la agbo, Mhi kpe ghua, ghe khe khi mhi la agbo agboagbo. Mhi mu okpe eghuli ali ilimhi mhue obo.

¹⁹ “Irarigho, keke emini u me, emini aa me mena, ali emini a ya me ini oo deni.

²⁰ Osheli oyi ikpetata

ishilua ni u me mhe obita ali ikhuli igolu ishilua ni a ri ikpa ru e nga na. Eni ikpetata ishilua wewe e khi eni igeni ena igbaa oyi eni e mie iJesu iKirisiti suo ishilua, eni ikhuli ikpa ishilua e khi igbaa nya eyi eni e mie iJesu iKirisiti suo ishilua.

2

Ebe ni a keke ghi igba eni e miesuo ena eoli Efesosi

¹ “Keke enana ghi ageni na igbaa oyi eni e mie iJesu iKirisiti suo ni o la eoli Efesosi: Enana e khi ingmemhi eyi oni o mu ikpetata ishilua mhue obita, ni oo kia ifuabo eyi ikhuli igolu ni a ri ikpa ru e nga. ² Mhi lese onete ni aa riele ali itotobo gbe akanya oye e ali iregbemie oye e. Mhi lese khi aa ya so egbo okholo shi iteva oye e, ali khi a she mu egbo ni e lu egbewe ighiusomhi na keke fe bino, a me khi egholi ee lo.

³ A she mhue iregbemie, a ri egbe mie omunu irari eva oyemhe, aa ti egbe je ukhokho.

⁴ Ama mhi mholi ona ya gue shi e egbe, khi a she kie inono ni a te eke mhue.

⁵ A sato ashini a ti nga ramhi elemhi ayemhe ni a te de. A mu pfi, ni a riele emini a kpe te eke e riele gbo ke riele. Ini aa mu pfi, mhi ya bhale deba e ya wolok ikhuli ni a ri ikpa ru e nga eye e ashini e la le.

† 1:13 Li ze iDan 7.13 ‡ 1:15 Li ze Ezik 1.24; 43.2 § 1:15 Li ze iDan 7.9; 10.6

* 1:17 Li ze Aza 44.6; 48.12; Iro 2.8; 22.13

⁶ Ama a mhuē onete ona ni a riēle. Eri angeli eyi egbo iNikolaita e kpasē e, ni o khia khi e lili e kpasē mhe.

⁷ Oni o zē esō, o rō suō abi Ayemhē o gue e ye igbaa oyi eni e mie iJesu iKirisiti suō nya. * Oni o da mu o le ne, mhi ya lama na li ni o le ukpamhi oora oyi agbo ni o la Apfē oyi Eshinēgba ni o la iloghie.

Ebe ni a keke ghi igba eni e miesuo ena eoli iSimirina

⁸ “Keke enana ghi aḡeni na igbaa oyi eni e mie iJesu iKirisiti suō na eoli iSimirina.†

“Enana e khi ingmemhi eyi oni o ralo ni o gbo kpe ukhokho, ni o ghu-a ni o gbo bhale agbo.

⁹ Mhi leṣe osoli ali umhame oyeḡe, ama a mhōli epfue. Mhi leṣe ungmehi opfuēche ni egbo ni e lu egbewe iju ni ea khi, e rō o pfuēche e-a, no khia khi egbo owa ugamhi oyi okphaghie e khi.

¹⁰ A khi na ulishi osoli ni oḡ bhale na e. A ghe i, okphaghie o ya pfi eghuo lo ogba ighumha ni a mu e fe bino, a ya nase e ogbele igbe. A mu irudunga oyeḡe mhuē ramhi eghuli, eghēghē agho, mhi ya ri arula oghie agbo na e.

¹¹ Oni o zē esō, o rō suō abi Ayemhē o gue e ye igbaa oyi eni e mie iJesu iKirisiti suō nya. Oni o da mu o le ne, eghuli ni uzeva oya ya ramhi oli egbe.‡

Ebe ni a keke ghi igba eni e miesuo ena eoli iPagamu

¹² “Keke ona ghi aḡeni na igbaa oyi eni e mie iJesu iKirisiti suō na iPagamu.

“Enana e khi ingmemhi eyi oni o mhōli itakobi ozalo-eva ni o lolo e mu.

¹³ Mhi leṣe ashini a la, ikhi ashini okphaghie o ri ukpekhomhi oyoli shi. Ama a kie mu eva oyemhē mhuē. Aa kie irudunga ni a mhōli na mhe. Gbo li shi eghēghē oyi Atipasi, ni o khi oṣele oyemhē ni o migha shi igesikia, ni a gbe-a shi ifu apfē oyeḡe ashini okphaghie o ngeli.

¹⁴ Ama mhi mhuē ikuku ingme shi e egbe. A mhōli egbo eghuo iteva oyeḡe ni e mu oseṣe oyi iBelamu mhuē. Loli o seṣe oghie iBalaki o di egbo iZireni lo olamhe. Eri o gueye we e le eminale ni a rō luase obo na ikhumhi ali e ke ku itsebo.§

¹⁵ Igho a gbo mhuē egbo ni e mu oseṣe oyi iNikolaita mhuē.

¹⁶ Irarigho, a mupfi. Ini oya khi igho, mhi ya kele bhale ya ri itakobi ni o la mhe unu nu we kholi.

¹⁷ Oni o zē esō o rō suō abi Ayemhē o gueye igbaa oyi eni e mie iJesu iKirisiti suō nya. Onini o da mu o le, mhi ya ri ibuledi eghuo ni a rō sheli na li le. Mhi gbo li ya ri eche opfopfo na li ni a keke eva onogbo shi, ni ogbo okhoghuo

* 2:7 Li ze Igbae 2.9; Iro 22.2; Ezik 28.13; 31.8 † 2:8 Li ze Aza 44.6; 48.12; Iro 1.17; 22.13 ‡ 2:11 Li ze Iro 20.14; 21.8 § 2:14 Li ze iNoba 22.5,7; 31.16; iDeut 23.4; iNoba 25.1-3

o a lese, se ni ogbo ni o mie oni echeli.*

Ebe ni a keke ghi igba eni e miesuo ena eoli iTiatura

18 “Keke ona ghi ageni na igbaa oyi eni e mie iJesu iKirisiti suo na eoli iTiatura: Enana e khi ingmemhi eyi Omi Eshinegba ni o mhue ikpamhi alo ni e ge abi elemhi erali, ni awe eyoli e li abi ide.

19 Mhi lese ikanya eye e, abi a li mholi inono ali irudunga ali abi a li ga egbe e ali iregbe-mie ni a mholi. A gbolo e ri ele memena dose abi a te eke li.

20 Ama mhi mhue ingme onana ni mhi ya gue shi e egbe. A mie oni okpotso iJezebe ogho lama, oni o lu egboli omekeguele. Rote ose se oyoli o te di eni ee ga eyemhe ya lo itsebo, ni e gbolo a le eminale ni a ro luase ikhumhi.†

21 Mhi she ri egheghe na li ni o ro mupfi lase itsebo eyoli le, ama o a ghole oli.

22 A ghe i, mhi ya ri ughuamhi pfi oli gbe she ukpho osoli, mhi ya pfi egbo ni e nu oli kia okia lo osoli, se se ni e mupfi lase ode okholo oyoli le.

23 Mhi ya ri eghuli gbe imioli, egheghe agho eni igbaa nya eyi eni e mie iJesu iKirisiti suo e ya lese khi mhemhe khi oni oo bino udu ali isamhi eyi ogbo. Mhi ya fali e ota abi ogbogbo o li gbe.‡

24 “Ama ee ni e kpo le shi eoli iTiatura ni ea lama mu ose se eyi iJezebe mhue, ni aa lama wena owena eyi okphaghi e ni ee lu osheli ni e limhi, mhi aa ya khi omhese olese nga e ike.

25 A lese mu emini a mholi mhue obogbegbo ya ramhi ni mhi ro ya bhale.

26 Oni o mu o le, ni o ri oghuemhe oyemhe gbe ya ramhi ukpese, mhi ya ri ishishi nali ke mhese shi.

27 ‘O ya ri akhuli mhue obogbegbo ke mhese na we, o ya guogho we-a abi a lie ma ekhe.’§

28 O ya mholi afu onabi mhi rote obogbegbo oyi Itamhe mie. Mhi gbo ri ukpetata anukpesumegie na eluzogbe na li.

29 “Oni o ze eso, o ro suo abi Ayemhe o gueye eni igbaa nya oyi eni e mie iJesu iKirisiti suo.

3

Ebe ni a keke ghi igba eni e miesuo ena eoli iSadisi

1 “Keke ona ghi ageni na igbaa oyi eni e mie iJesu iKirisiti suo na eoli iSadisi.

“Enana e khi ingmemhi eyi oni o mu iyemhe ishilua eyi Eshinegba ali ikpetata ishilua mhue. Mhi lese ikanya eye e. A mholi eva onete abi ezeze khi a la agbo, ama eri a ghua.

2 A guale ni a zese emini o kpo e le-a ni e nono ni e ghua. Irari khi mhi me ikanya eye e khi ea gba pfo odalo oyi Eshinegba oyemhe.

* 2:17 Li ze Okiali 16.14-15; 16.33-34; iJon 6.48-50; Aza 62.2; 65.15 † 2:20 Li ze 1 Ighie 16.31; 2 Ighie 9.22,30 ‡ 2:23 Li ze Iwolo 7.9; ijere 17.10; Iwolo 62.12 § 2:27 Li ze Iwolo 2.8-9

³ A ri itobọ ighọ sato emini a she mie ni a suọ, a ri ọli gbe akanya, a mupfi. Ama ini aa da guale, mhi ya bhale abi oghiatọ, aa ya lẹsẹ ẹghẹghẹ ni mhi rọ ya bhale na ẹ.*

⁴ Abi o kie li ena, à kie mhue ẹgbọ ẹghuo ẹoli iSadisi ni ẹa ri ichimhi mu itsua eyewẹ. E ya sọ itsua epfopfo nu mhe kia, irari khi e tẹ ọ.

⁵ Oni o mu ọ le, ighọ ọ li ya sọ itsua epfopfo. Mhi aa ya shishi eva oyọli ebe ni a keke eva oyi eni e ya mhọli agbọ na agbọagbọ shi-a. Ama mhi ya ngme ingme oyọli le khase itamhe ali igeni eyọli.†

⁶ Oni ọ zẹ esọ, ọ rọ suọ emini Ayemhe ọ gueye eni igbaa oyi eni e mie iJesu iKirisiti suọ nya.

Ebe ni a keke ghi igba eni e miesuọ ena ẹoli iFiladefia

⁷ “Keke ona ghi ajeni na igbaa oyi eni e mie iJesu iKirisiti suọ na ẹoli iFiladefia. Ena e khi ingmemhi eyi oni ọ pfuase, ni ọ khi igesikia, ni ọ mhọli okpe oyi iDefidi. Oni ọ kha khueghie-a, ọgbọ ọa laọ ni ọ dobe ya khukhu, oni ọ kha khukhu, ọgbọ ọa dobe khueghie-a.‡

⁸ Mhi lẹsẹ ikanya eyẹ ẹ. A ghe i, mhi she khueghie ode-a shi eke na ẹ, ni ọgbọ ọa dobe ya khukhu. Mhi lẹsẹ khi ukuku itoto a mhọli, abotseku khi ighọ, a kie ri ungememhi oyemhe ẹ gbe akanya, aa tigbe kie eva oyemhe.

⁹ A ghe i, mhi ya ri eni e la owa ugamhi oyi okphaghie ni ẹ lu egbewe iJu ni o khia khi ẹgbhọli ẹ lo, bhale ya nyese ukhomhi shi ẹ ufuege ni e lẹsẹ khi mhi nono ingme oyẹ. §

¹⁰ Irari khi a ri omhesẹ oyemhe gbe akanya ni o gueye ẹ a ri irabomudu ri egbe mie, mhi ya rue ẹ imufe le, ni ọọ bhale eke agbọ nya. Imufe ni o ya mu ẹgbọ na agbọ nya fe bino.

¹¹ Mhi ya keke bhale. Mu emini u mhọli mhue toto, ini ọgbokhoghuo ọ khi mie ẹ arula oghie oyẹ.

¹² Oni ọ da mu ọ le ne, mhi ya rọli khi oche elemhi Owa ugamhi oyi Eshinegba oyemhe. Ọa ya tigbe rote aghọ vu. Mhi ya keke eva oyi Eshinegba oyemhe shi ọli egbe, li shi eva oyi ẹoli oyi Eshinegba oyemhe ni o khi iJerusalemu onogbọ, ni o rote Eghiele oyi Eshinegba oyemhe ẹ tiemhile ali eva onogbọ oyemhe.*

¹³ Oni ọ zẹ esọ, ọ suọ emini Ayemhe o gue ẹ ye eni igbaa oyi eni e mie iJesu iKirisiti suọ nya.

Ebe ni a keke ghi igba eni e miesuọ ena ẹoli iLaodisha

¹⁴ “Keke ona li ghi ajeni na igbaa oyi eni e mie iJesu iKirisiti suọ na ẹoli iLaodisha. Enana e khi ingmemhi eyi Atse, ni ọ khi otsẹle oni ọ zẹ ri egbe ẹ nga, ni ọ khi igesikia, oni ọ mhese ẹ na emini Eshinegba ọ ma nya.†

* 3:3 Li zẹ iMat 24.43-44; iLuk 12.39-40; Iro 16.15 † 3:5 Li zẹ Okiali 32.32-33; Iwolo 69.28; Iro 20.12; iMat 10.32; iLuk 12.8 ‡ 3:7 Li zẹ Aza 22.22; iJobu 12.14

§ 3:9 Li zẹ Aza 49.23; 60.14; 43.4 * 3:12 Li zẹ Iro 21.2; Aza 62.2; 65.15 † 3:14 Li zẹ Ekpi 8.22

15 Mhi lẹse ikanya eye ẹ khi, aa mhue utomhi wekhi eri a pfọ. O kha ti ini a khi oghuo ọ lo.

16 Irarigho, itobo khi a rimhe, ni aa ro to wekhi eri a pfọ, mhi ya rote unu oyemhe to ẹ pfia.

17 Irari khi a lie, 'Mhi pfue, mhi she ti epfue ma, mhi aa ke mhue emini o to mhe.' Ama aa lẹse khi egbo eyemhe a khi, eni a vie osoli ẹ na, ena umhame, ni e khi ezalo ali ebanqa.

18 Irarigho, mhia ye ẹ ude ni a nu mhe de elomho ni a ri erali nye-a ini a mele eni e pfue-a, ni a mhọli itsua epfopfo ni aa so, ni a ro khukhu irumheba omama eye ẹ. Ni mhi ri ogugu na ẹ vi shi alo ni a ke me eke.

19 Egbo ni mhi nono ingme oyewe, mhi ya dese, mhi gbo sheshe we shi ode, irarigho a mhue omuegbe ni a mu nyene.‡

20 A ghe i! Mhi migha ode mhia kpheli obo ọ, ini ogbokhoghuo ọ suo uruli oyemhe ni ọ ro khueghie-a na mhe, mhi ya lo le, mhi nu ọli le, ọ nu mhe le.

21 Oni ọ mu ọ le, mhi ya lama na li ni ọ nu mhe shito ukpekhomhi oghie oyemhe, ezeze abi mhemhe mhi li mu ọ le ni mhi nu Itamhe shito ukpekhomhi oghie oyoli.

22 Oni ọ ze eso, ọ ro suo emini Ayemhe o gueye eni igbaa nya eyi eni e mie iJesu iKirisiti suo."

4

Ugamhi na iloghie

1 Abi mhi ro me ena dose se, mhi ke gbo me imeke olese. Mhi me khi ode o khueghie-a shi iloghie, mhi suo khi uruli ni o kpe nu me mhe ngme abi akala. Oo mhe, "Bhale odane ana, khi mhi ya re khasa emini a ya me ini ena e dose se."

2 Utoghuo kpe mhi la el-emhi Ayemhe, mhi me odalo oyemhe khi ukpekhomhi o migha iloghie, khi ogbo ọ shito nga ọ.

3 Oni ọ shito ọ, ọ li abi eche ni oo ge ni a lu ijasipa ali ikaneliani. Ogaji ni o li abi eche ughegbe ni a lu emeradi o vi gasa oni ukpekhomhi.*

4 Ipekhomhi uye ali ene elesa e la gasa oni ukpekhomhi. Egbhali uye ogbo ali aane e shito eni ikpekhomhi. E so itsua epfopfo, e rughu irula oghie igolu shi ukhomhi.

5 Rote oni ukpekhomhi oghie, inyamhisalo ames ali ingmolo oyi akphala e te ọ ọ lasale. Rote oni ukpekhomhi oghie ikpa ishilua e lala ni e khi Ayemhe ishilua eyi Eshinegba.†

6 Ali khi oni ukpekhomhi khi emini o li abi oke ighegbe oniemhi o la odalo ọli ni o pfuase ni a te ẹ me eke gboo.

Elamhako aane ni e mhue ayemhe ni e ze alo gasa egbe odalo ali ukhokho, e le gasa oni ukpekhomhi oghie roli shi iteva.

‡ 3:19 Li ze Ekpi 3.12; Iburu 12.6 * 4:3 Li ze Ezik 1.26-28; 10.1 † 4:5 Li ze Okiali 19.16; Iro 8.5; 11.19; 16.18; Ezik 1.13; Iro 1.4; iZaka 4.2

7 Emimi o mhue ayemhe onodode o li abi idu, onuzava o li abi ena, onuzase o ze alo abi ogbo, onuzi-aane o li abi akpa odegbe ni o fiala.‡

8 Eni elamhako aane ena e mholi ipfua esesa esesa, e mholi ikpamhi alo gase idiegbe, li ghe elemhi ipfua eyewe, Ele oguota ali ele iyose ea tigbe e yemhe-a, eri e lese lie,

“Ipfuase, ipfuase, ipfuase
khi Eshinegba Onomhue
Nofune nya,

Oni o khi loli,
ni o kie kpe khi loli,
ali ni o ya bhale.”§

9 Ini eni elamhako aane egho e da ri ufumhi ali ekpe ali ikphemhi na oni o shito oni ukpekhomhi oghie ne, ni o la o le ele na agboagbo,

10 eni egbhali uye ogbo ali aane egho, e de ya yeshi na oni o shito oni ukpekhomhi, e ri kphemhi na oni la o le ele na agboagbo. E gueghie irula eghiele eyewe shi eke odalo oni ukpekhomhi oghie, ee lie.

11 “U teo Onomhue ali
Eshinegba oyanye,

Ni o mie ufumhi
ali ekpe ali ekpabo,
Irari khi yeye u ma emhikpa.
Oghuemhe oye u ro ma we,
loli e gbo ro la o abi a li ma we.”

5

Ebe ali Omi Osumha

1 Mhi ke gbo me oni o shito oni ukpekhomhi oghie khi o mu ebe ni a keke emhi shi odalo oli ali ukhokho oli mhue obita. A ri erueli rote asha ishilua to oli ma.*

2 Mhi me ageni ni o fune ni o tse se ngme leghe o o lie, “Oghuo o ya dobe maghie eni erueli oni ebe-a?”

3 Ama ogbokhoghuo o la iloghie, wekhi eke agbo, wekhi ikpoko na agbo, ni o dobe khueghie oni ebe-a, ukeneta khi eri o dobe ya bino elemhi oni ebe.

4 Mhi vie egbegbo irari khi aa me ogbo ni o teo ni o ya khueghie oni ebe-a wekhi ni o bino elemhi oli.

5 Otuoghuo eni egbhali egho o o me, “Khi ke vie! Ghe khe, Odumhi na unuekpe oyi ijuda, Omiomi iDefidi o she mu o le. O dobe ya khueghie oni ebe-a ali erueli ishilua eyoli.”†

6 Igho mhi me khi Omi Osumha khi o migha odalo oyi oni ukpekhomhi oghie ni elamhako aane egho, ali eni egbhali e gase. O li abine khi a she kpe gbe oli-a. O ze ekphali ishilua ali ikpamhi alo ishilua ni e khi Ayemhe ishilua eyi Eshinegba ni o she ghie je eke agbo nya.‡

7 Oni omi osumha o le ya rue oni ebe obita oyi oni o shito oni ukpekhomhi oghie.

8 Abi o ro rue oni ebe se, eni elamhako aane egho ali egbhali uye ogbo ali aane, e de yeshi odalo oyi oni Omi

‡ 4:7 Li ze Ezik 1.22,5-10; 10.14 § 4:8 Li ze Ezik 1.18; 10.12; Aza 6.2-3 * 5:1 Li ze Ezik 2.9-10; Aza 29.11 † 5:5 Li ze Igbae 49.9; Aza 11.1,10 ‡ 5:6 Li ze Aza 53.7; iZaka 4.10

osumha. Wẹwẹ nya oḱbọḱbọ
 ọ mu ẹfa mhọli obọ ali itasa
 igolu ni ituale afu ẹra ni a
 tose e vọ, ni e khi iromhi ni
 eni Ẹshineḱba ọ she pfa na e
 sọ. §

9 E to uwolo onogbọ, e liẹ,
 “U tẹ ọni ọ rue oni ebe,
 u gbọ tẹ ọni ọ ya maghiẹ
 ẹruẹli ni a rọ ma ọ-a,

Irari khi a gbe-a,
 U ri ọlia eye de ẹgbọ
 na Ẹshineḱba,
 ẹgbọ ni e rọte agbọ nya bhale
 rọte unuẹkpẹ nya ali
 ẹmuẹ ọdọda ali ẹgbọ ọdọda
 nya.*

10 U rẹwẹ mele ighie
 ali ekpodalo-ugamhi ni ẹ
 ga
 Ẹshineḱba ọyawa-a.

E ya la agbọ ke mhẹse.”†

11 Mhi bino mhi suọ iruli
 eyi igeni ebubu ni e ramhi
 igbeḱe ali idududu. E le
 gasẹ oni ukpẹkhomhi oghie
 ali elamhako eghọ ali eni
 egbhali.‡

12 E ri ukpokpomhi uruli i
 to uwolo, e liẹ,
 “Ọni ọ tẹọ Omi osumha
 ni a gbe-a ọ khi,
 ni ọ mie ekpabọ ali ẹpfue
 ali iḱsingme ali itoto,
 ali ekpẹ ali ufumhi
 ali ikuẹghie!”

13 Mhi tigbe suọ khi
 emhikpa ni a ma na iloghie
 ali ekẹ agbọ ali ikpọkẹ na
 agbọ ali ena okẹ oniẹmhi ali
 emini e laọ elemhi ọli nya khi
 ẹ to uwolo, ẹẹ liẹ,
 “Ọni ọ shito oni ukpẹkhomhi

ali Omi osumha,
 Ikuẹghie ali ekpẹ
 ali ufumhi ali ekpabọ,
 e khi eyeẹ, rọte
 agbọagbọ ya je agbọagbọ!”
 14 Eni elamhako aane eghọ ẹ
 li, “Atse,” eni egbhali eghọ, e
 de yeshi, e ga li.

6

Eni ẹruẹli

1 Mhi tokpẹ bino abi ọni
 Omi Osumha ọ rọ maghiẹ
 ẹruẹli onodode elemhi eni
 ẹruẹli ishilua-a. Mhi suọ khi
 ọghuo eni elamhako eghọ o
 ngme abi uruli akphala, ọọ li,
 “Bhale!”

2 Mhi bino, ghe achi ọpfopfo
 odalo oyemhẹ khẹ! Ọmose ni
 ọ nga li ọ mu usheli mhue, a
 ri arula oghie na li, ọ nga ọni
 achi ya fiẹ abi ọkhọli-okhue ni
 ọ khọli mu ọ le ni ọ gbọ vu ya
 khọli mu ọ le.*

3 Abi ọni Omi Osumha ọ
 rọ maghiẹ ẹruẹli onuzi-eva-a,
 mhi suọ khi ẹlamhako ọnuzava
 ọ ngme, ọọ li, “Bhale!”

4 Mhi mẹ khi achi ọlese ni ọọ
 yilẹ nyoghọ ọ fiẹ lasele. A ri
 afu na ọni ọ nga li ni ọ rọ rue
 ọpfomhẹ ekẹ agbọ-a, ni ọ rọ ri
 ẹgbọ ke gbolo egbe wẹ-a. A ri
 ọgbhoro oniẹmhi na li.†

5 Abi ọni Omi Osumha ọ
 rọ maghiẹ ẹruẹli onuzi-ese-a,
 mhi suọ khi ẹlamhako onuzi-
 aase ọ ngme, ọọ li, “Bhale!”
 Mhi bino, ghe achi ọbishi
 odalo oyemhẹ khẹ! Ọni ọ nga
 li ọ mu emini a rọ ọ mhẹse
 ukhomhi oyi emhi.‡ 6 Mhi

§ 5:8 Li zẹ *Iwolo* 141.2 * 5:9 Li zẹ *Iwolo* 33.3; 98.1; *Aza* 42.10 † 5:10 Li zẹ

Okiali 19.6; *Iro* 1.6 ‡ 5:11 Li zẹ *iDan* 7.10 * 6:2 Li zẹ *iZaka* 1.8; 6.3,6 † 6:4 Li
 zẹ *iZaka* 1.8; 6.2 ‡ 6:5 Li zẹ *iZaka* 6.2,6

suo khi emini o li abi uruli o la elemhi ifuabo oyi eni elamhako aane egbo ngme, o o li, "Ifata ogbeleghuo a ri ago oghuo oyi ado e de, idiakpala ese oyi okpa, o li migha shi ifata ogbeleghuo. Khi yese oili olivu-a ali onyo!"

7 Abi oni Omi Osumha o ro maghie erueli onuzi-ene-a, mhi suo khi uruli oyi elamhako onuzi-aane o o li, "Bhale!"

8 Igho mhi me achi ni o li abi oni o ya ghu-a. Oni o nga li a lui Eghuli, ali eghiele ilimhi oo deba li udidi, a ri afu na we ni e ro ri ogbhoru ali okiamhi ali ighuamhi ali elamhako okhena gbolo egbo iku akemhishi asha ene egbo na eke agbo-a. §

9 Abi oni Omi Osumha o ro maghie erueli onuzi-ishe-a, mhi me iyemhe eyi egbo na gbolo-a irari ungmehi oyi Eshinomba ali otsele ni e mu mhuu ufui oni atete.

10 Ee vie lege, e lie, "Onomhuu ni o khi ona ipfuase ali igesikia, egheghe onoghuo u ro ya gue egbo na agbo ezu, ni u ro ya ye okhue oia eyi anye obu oyewe na anye?"

11 Egheghe agho, a ri itsua epfopo na we. A gueye we e migha ne ukuku o, ramhi egheghe ni eni ee ga nabi wewe etuangme ni a nono ni a li gbolo-a e ro ya gba. Ezeze abi a li gbolo wewe-a.

12 Mhi bino abi o li

khueghie erueli onuzi-esesa-a. Ukpokpomhi eke o kuluu. Ovu o bishi-a abi ode abuma ni a ri iriria elamhi do. Uki nya o yile-a abi oia.*

13 Ikpeta na idane e deno kule eke abi ikpamhi okhuaeni ni ea yile ne e lie de kule ini akpepeli ni o ze o jighise we.

14 Irarogbe o khili ode-a abi a lie khili ighela eke-a. Ite nya ali eke ni e la iteva oke, a rue we ashini e la le.†

15 Egheghe agho, ighie na eke agbo ali ekhemhuu ali idenomoko okholi ali eni e mholi epfue ali eni e mholi ekpabo ali ogbokpa ali ighumha ali eni ea khi ighumha, e na ya sheli ifui irui ali eche na ite. §

16 Ee vie lu ite ali eche eniemhi, e lie we, "A de mu anye ni a ri anye sheli eloe oyi oni o shito oni ukpekhomhi oghie ali ofu oyi oni Omi Osumha!*

17 Irari khi ogbele ofu oniemhi oyi Eshinomba o she ramhi ni o ro ya tiemhile shi we o, oghuo o dobe ya migha?"†

7

Egbo agbele egbhueshilua ali ene (144,000) ni a shi olele

1 Ona o dose se, mhi ke gbo me khi igeni aane e migha iguabo enenene na eke agbo. E mu akpepeli enenene na iguabo eke agbo gba ini akpepeli o khi ke li eke agbo,

§ 6:8 Li ze Ezik 14.21 * 6:12 Li ze Iro 11.13; 16.18; Aza 13.10; iJofe 2.10,31; 3.15; iMat 24.29; iMak 13.24-25; iLuk 21.25 † 6:14 Li ze Iro 16.20 ‡ 6:14 Li ze Aza 34.4 § 6:15 Li ze Aza 2.19,21 * 6:16 Li ze Osia 10.8; iLuk 23.30 † 6:17 Li ze iJofe 2.11; iMala 3.2

węę ukhomhi okę onięmhi
węę ęęera.*

² Igho mhi ke me aęeni olese
khi o rote obini ovo o te e
ngale lasele, o tsua akhuli
ni a ro o shi emhi olele oyi
Eshineęba ni o la agbo. O
ri uruli na leghe lu eni ięeni
aane egho ni a ri ekpabo na ni
e ro yese eke ali okę onięmhi-

³ Oo we, "A khi yese eke-a
węę okę onięmhi węę ęęera, se
khi awa shi olele shi eni ęę ga
eyi Eshineęba alukpo se."†

⁴ Igho mhi suo khi eni a
rote elemhi edeli eyi iZireni
nya shi olele, e ya khi egbo
agbele egbhueshilua ali ene
(144,000).

⁵ A rote unuekpe oyi iJuda,
shi olele shi egbo
agbele igbeva egbe (12,000).

A rote unuekpe oyi iRubeni,
shi olele shi egbo
agbele igbeva egbe (12,000).

A rote unuekpe oyi iGadi,
shi olele shi egbo
agbele igbeva egbe (12,000).

⁶ A rote unuekpe oyi iAsha,
shi olele shi egbo
agbele igbeva egbe (12,000).

A rote unuekpe oyi iNafutali,
shi olele shi egbo
agbele igbeva egbe (12,000).

A rote unuekpe oyi iManase,
shi olele shi egbo
agbele igbeva egbe (12,000).

⁷ A rote unuekpe oyi iSamo,
shi olele shi egbo
agbele igbeva egbe (12,000).

A rote unuekpe oyi iLiva,
shi olele shi egbo
agbele igbeva egbe (12,000).

A rote unuekpe oyi iSaka,
shi olele shi egbo
agbele igbeva egbe (12,000).

⁸ A rote unuekpe oyi iZebulo,
shi olele shi egbo
agbele igbeva egbe (12,000).

A rote unuekpe oyi iJosefu,
shi olele shi egbo
agbele igbeva egbe (12,000).

A rote unuekpe oyi iBejami,
shi olele shi egbo
agbele igbeva egbe (12,000.)

⁹ Ona o dose se, mhi
bino, ghe ebubu egbo ni
ogbokhoghuo o do be ya leli
khe! Ishishi khi ishishi ali
unuekpe nya ali egbo ali emue
ododa e te bhale. Igho e migha
odalo oyi oni ukpekhomhi
oghie, e migha odalo oyi oni
Omi Osumha, e sono itsua
epfopfo, e muno eyamhi
mholi abo.

¹⁰ E tse se leghe, e lie.
"Eshineęba oni o shito
oni ukpekhomhi oghie,
O mholi ekpabo
ni o ro mie egbo eyoli
pfuese,
igho li khi oni Omi Osumha."

¹¹ Ięeni nya e migha gase
oni ukpekhomhi oghie, ali eni
egbhali ali elamhako aane
e de ta alo mu eke odalo
oni ukpekhomhi oghie e ga
Eshineęba.

¹² E lie,
"Atse!
Ikuęghie ali ufumhi,
ali egbhe ali

ikphemhi ali ekpe,
ali ekpabo ali itoto,
e khi eyi Eshineęba oyawa,
ele na agbo agbo.

* 7:1 Li ze ijere 49.36; iDan 7.2; iZaka 6.5

† 7:3 Li ze Ezik 9.4,6

Atse!”

¹³ Igho oḱbhali oḱhuo elemhi we o nu mhe ngme o mhe, “Eghuo egho e khi ni e sono itsua epfopfo? U lese obini e te bhale?”

¹⁴ Mhie oli, “Oga, yeye u ya lese.”‡

Oo mhe, “Ena e khi eni e pfue oni ukpokpomhi ajilimhe, e she pfue itsua eyewe-a, e ri oia eyi oni Omi Osumha rewe pfuase.

¹⁵ Irarigho,
“E ro migha odalo
ukpekhomhi oghie
oyi Eshinegba.

Ni e la
elemhi Owa oyi Eshinegba
oyoli
ke ga li ele oḱuota ali
eliyose.

Oni o shito oni
ukpekhomhi oghie oyoli,
o ya ri okhola oyoli
khukhu we.

¹⁶ Okiamhi o a ke
gbo ya gbe we ghue,
wekhi okiamẹ o ke ya gbe
we ghue.

A ya khukhu we ovo erere,
o a ke tose we ghue. §

¹⁷ Irari khi oni Omi Osumha
ni o migha odalo oni
ukpekhomhi oghie,
o ya ri eloe ke khu we.
O rewe je okẹ ame
ni o ri agbo a na oḱbo.

Eshinegba o ya shishi we
amevie alo-a.”*

‡ 7:14 Li ze iDan 12.1; iMat 24.21; iMak 13.19 § 7:16 Li ze Aza 49.10 * 7:17 Li ze Iwolo 23.1; Ezik 34.23; Iwolo 23.2; Aza 49.10; 25.8 * 8:3 Li ze Emo 9.1; Okiali 30.1,3 † 8:5 Li ze iLev 16.12; Ezik 10.2; Okiali 19.16; Iro 11.19; 16.18 ‡ 8:7 Li ze Okiali 9.23-25; Ezik 38.22

8

Erueli onuzi-ishilua

¹ Abi oni Omi Osumha o ro maghie eruẹ onuzi-ishilua-a, iloghie o kekeke elemhi iminiti uye ali igbe.

² Igho mhi me igeni oshilua ni ee migha odalo oyi Eshinegba, khi a ri ikala ishilua na we.

³ Aḱeni olese o bhale ya migha atete. O tsua ilolo oyi elomho. A ri afu ituale ne e bu na li ni o ya tose, gbo li shi iromhi ni eni Eshinegba o she pfa na e so. O la oni atete elomho ni o la oni eghiele tose we.*

⁴ Ewoi eyi oni ituale afu era ni aa tose ali iromhi eyi eni Eshinegba o she pfa na, e rote obo oyi oni aḱeni nga idane deba Eshinegba.

⁵ Igho oni aḱeni o rue oni ilolo, o we erali ni e la ukhomhi oni atete vo o. O pfi oli tiemhi eke agbo, igho ikphala e de, ali ingmolo, ali inyamhise alo ame, ali eke ikulue.†

Eni ikala

⁶ Mena, igeni oshilua ni e mholi ikala ishilua e mu egbe ni e ro pfi we.

⁷ Aḱeni onodode o pfi akala oyoli, eche ame ali erali e kuma oia wushe kugbe, e de ku shi ekeke. Ukiekie opfoghua akemhishi ese oyi eke agbo, o to-a. Asheghuo

akhemhi shi esẹ oyi ẹẹra nya e toa, ebuli nya e toa.‡

8 Agẹni ọnuzi ava o pfi akala oyọli, emini o li abi ute o lala, a pfi ọli lo okẹ oniẹmhi. Ukiẹkiẹ oghuo ini a kemhi oni okẹ oniẹmhi shi asha esẹ o mele ọlia-a

9 asheghuo akemhi shi esẹ elamhako ni e lao e ghuloa, asheghuo akemhishi esẹ oko-okẹ eniẹmhi ni e la oni okẹ e tseke-a.

10 Agẹni ọnuzasẹ o pfi akala oyọli, ukpokpomhi ukpẹtata ni o lala abi ugbili, o rọte idane pfa, o de ya shi asheghuo akemhi okẹ nya shi asha-esẹ ali inu wẹ ni okẹ e te ẹ chọchọ. §

11 Eva oyi oni ukpẹtata a lu Oyala. Asheghuo akemhi-shi esẹ amẹ eyi okẹ nya ni o de pfilo egho e yala, ebubu ẹgbọ e ghuloa irari khi eni amẹ okẹ e yala.*

12 Agẹni ọnuzi-aane o pfi akala oyọli, a gbe emhi shi asheghuo akhi ovo-a shi asha esẹ, ali akhi uki-a shi asha esẹ, ali akhi ikpẹtata-a shi asha esẹ. Eni asha esesese ena e bishi-a. A khi ogbe-a shi asha esẹ, o bi obili-a, igho a li li khi ẹliyosẹ-a shi asha esẹ, ákpá ọa gẹ. †

13 Abi mhi li bino egho, mhi suo khi ákpá ọdegbe ni o la irarogbe fiala, o viẹ, o liẹ, “Epfua, Epfua! Epfua o khi na eni e la ekẹ agbọ itobọ ikala ni igẹni aasẹ enekpọle e ya pfi.”

9

1 Agẹni ọnuzi-oshe o pfi akala oyọli. Mhi mẹ ukpẹtata ni o rọte idane de tiemhile ekẹkẹ. A ri okpẹ oyi ode oyi ilimhi na ningolo na li.

2 Abi o ro khueghie ode oyi oni ilimhi na ningolo-a, ewoli e rọte o lasele abi ewoli ni e rọte avuerẹ lasele. Ovo ali irarogbe e bishi-a irari eni ewoli ni e rọte oni ilimhi na ningolo lasele.*

3 Initso e rọte eni ewoli wẹ e kule ekẹ agbọ, a ri afu na wẹ ni e ro mhuẹ ekpabọ nabi eyi izage. †

4 A gweyẹ wẹ e khi ri unu ti ebuli ali emhi ekomhi okhoghuo wẹkhi ọora na ekẹ agbọ, ama e ke nasẹ ẹgbọ ni ẹa mhọli ọlele oyi Eshinẹgba shi alukpo oyewẹ. ‡

5 Aa liẹ wẹ e gbolo eni ẹgbọ ena-a, ama ni e ro nasẹ wẹ iki ishe. Utomhi ni e to wẹ, eri e li abi utomhi oyi okpi ini o ta ọgbọ.

6 Eghẹghẹ ni a ngme ena, ẹgbọ e ya ke nono eghuli ama ẹa ya mẹ, o ya ghọle wẹ ni e ghu-a ama eghuli o ya mẹ wẹ na. §

7 Eni initso e li abi ichi ni a mu egbe shi okhọli. E rughu emini o li abi arula oghie igolu shi ukhomhi, alo eyewẹ e li abi alo ẹgbọ.*

8 Itsu eyewẹ e li abi itsu eyi ikpotso, akọ eyewẹ e li abi akọ idumhi. †

§ 8:10 Li zẹ Aza 14.12 * 8:11 Li zẹ iJere 9.15 † 8:12 Li zẹ Aza 13.10; Ezik 32.7; iJoẹ 2.10,31; 3.15 * 9:2 Li zẹ Igbae 19.28 † 9:3 Li zẹ Okiali 10.12-15 ‡ 9:4 Li zẹ Ezik 9.4 § 9:6 Li zẹ iJobu 3.21; iJere 8.3 * 9:7 Li zẹ iJoẹ 2.4 † 9:8 Li zẹ iJoẹ 1.6

⁹ E ze ipfiapfia shi egbe abi awulu akhuli ni okhōli-okhue ọ rọ a mu aye. Okeke ni ipfua eyewe e kpe, e li abi okeke oyi ichi ikhuli ni e lo bu ni e na le okhue.‡

¹⁰ E ze ighia ali eka, ee ta abi ikpi, e mhōli ekpabọ shi eni ighia ni e rọ na egbọ osoli iki ishe.

¹¹ E mhōli oghie oyewe ni ọ khi aḡeni oyi ilimhi na ningolo. Abi a lu eva oyōli o khi Abadoni a lu ọli elemhi Iburu. Ama Apoliōni a lu ọli elemhi iGiriki. (Oni ọ Yese-a a ri ona ngme.)

¹² Epfua onodode ó she dose, ama epfua eva elese ẹa bhale ne.

Akala onuzi-esesa

¹³ Aḡeni onuzi-osasa ọ pfi akala oyōli, mhi suọ khi uruli o rọte igo ene oyi atete igolu ni o kpọ eke le ni o la odalo oyi Eshinegba ngme lasele. §

¹⁴ Ọ gueye oni aḡeni onuzi-osasa ogho ọọ li, “Taghie igeni aane ni a ge shi epfe oke oniemi na lu iYufiretisi-a.”

¹⁵ Igho a li rue eni igeni aane egho obọ-a, ni a she ge shi agho, rọ khe oni eghēghe ona, ali ogbele ali uki ona, ali ukpe ona, ni e ya gbolo egbọ igbekhi ese na eke agbọ onaa.

¹⁶ Ekhōli-okhue etuangme ni a rọ shi eke e khe okhōli e bu ramhi udududu asha egbhuegbe, 200,000,000. Mhi suọ etuangme ni a lu we.

¹⁷ Abi eni ichi ali eni e nga we e li na, abi mhi me we

elemhi imealo oyemhe. Iwulu ikhuli ni ekhōli-okhue e rọ ọ mu aye eyewe, ee yile nyoghọ abi erali, e li abi egholi ibulu na koli, o mhōli oyile abi ofu. Ikhomhi eyi eni ichi e li abi ikhomhi idumhi, erali, ewōli ali ofulu e rọte we unu lasele.

¹⁸ Igbekhi asha ese egbọ nya, eni erali ali ewōli ali ofulu ni e rọte we unu lasele e gbolo-a.

¹⁹ Ekpabọ eyi eni ichi e la we unu ali ighia. Irari khi eri ighia eyewe e li abi enye, e ze ikhomhi ni e rọ kuale egbọ utse.

²⁰ Egbọ ni e kpole shi agbọ ni oni opfuse ọa gbolo-a, ẹa kie mu pfi lase ikanya abọ eyewe le. Eẹa lase ekphaghie igaga le, li shi ugamhi eyi ikhumhi ni a ri igolu ali elomho ali ide ali eera khali. Ikhumhi ni ẹa ya me eke wekhi eri e suọ eso, wekhi eri e dobe e kia.*

²¹ Wekhi eri e lama mu pfi lase ugbeli le, ali imhesẹ imumu ali itsebo ilili ali ighiatọ idodo.

10

Oni aḡeni ali ebe nikeke

¹ Igho mhi me aḡeni nōfunẹ ọlese, khi ọ rọte idane e tiemhile, ọ ri otughunu khukhu egbe, ogaji o vi gase ọli ukhomhi, alo eyōli e li abi ovọ, awe eyōli e li abi oche erali.

² Ọ mhōli ukuku ebe mhōli obọ ni o khueghie-a shi eke. Ọ gbosẹ owẹ obita oyōli shi

‡ 9:9 Li ze iJọe 2.5
135.15-17; iDan 5.23

§ 9:13 Li ze Okiali 30.1-3

* 9:20 Li ze Iwolo 115.4-7;

elemhi okẹ oniēmhi, ọ ri owe ọgobọ nga ekẹ.

³ Ọ ri ukpokpomhi uruli pfi lasele leghe abi ọdumhi ọọ khoshe. Abi ọ rọ pfi, uruli ikphala ishilua e ngme.

⁴ Abi eni ikphala ishilua e rọ ngme se, mhi nono ni mhi kẹkẹ shi ebe, ama mhi suọ khi uruli ọ rọte idane liẹ, “Ri emini eni ikphala ishilua eghọ e ngme sheli, khi kẹkẹ wẹ shi ekẹ.”

⁵ Ighọ oni aḡeni ni mhi mẹ ni ọ migha okẹ oniēmhi ali ekẹkẹ eghọ, ọ yase obita oyọli nga ukhui.

⁶ Ọ ri eva oyi Eshinẹgba ni ọ laọ le eḡe na agbọagbọ romhi ishe. Oni ọ ma ukhui ali emhikpa ni e laọ, ali ekẹ ali emhikpa ni e la ọ ali okẹ oniēmhi ali emhikpa ni e laọ. Oọ, “Emhi enana ẹa ke ya tẹse ni e rọ bhale ya tẹse.”

⁷ Ama khi ogbeḡe ni aḡeni ọnuzi-oshilua ọ da ya pfi akala oyọli, Eshinẹgba ọ ya khueghie osheli oyọli-a ni ọ gba abi ọ li gue ọli ye eni ẹẹ ga ni e khi emeḡeḡe eyọli.*

⁸ Ighọ uruli ni mhi rọte iloghie suọ eghọ o gbo nu mhe ngme, ọọ mhe, “Le ya mie aḡeni ni ọ migha okẹ oniēmhi ali ekẹkẹ igheḡe ebe ni o khueghie-a, ni o la li obọ.”

⁹ Ighọ mhi le deba oni aḡeni mhiẹ ọ ri oni ebe nikeke ogho na mhe. Oọ mhe, “Mọ ọli le. O ya yese ẹ elemhi-a, ama o ya violọ ẹ unu abi iwọ.”

¹⁰ Mhi mie oni aḡeni oni ebe nikeke obọ, mhi rọli le. O violọ mhe unu abi iwọ, ama abi mhi rọ rọli le se, oo yala mhe elemhi.†

¹¹ Ighọ a gueye mhe, “U mema ya meḡeḡe shi ebubu unueḡe, ali eḡbọ ali emue ododa ali ighie egbe.”

11

Eni ọtseḡe aava

¹ Ighọ a ri ufulọ ni o li abi ukpokpo ni a rọ ọ mhesẹ emhi na mhe, a gueye mhe, “Le ya mhesẹ Owa Ugamhi oyi Eshinẹgba ali atẹte ali eni ẹ ga ugamhi akaghọ.*

² Khi mhesẹ atukpapfe oniēmhi oyọli, khi mhesẹ ọli irari khi a she rọli na iJeta. Wewe e ya lighi oni ẹoli no pfuase ekẹ-a elemhi iki egbhueva ali eva (42.)†

³ Mhi ya ri afu na ọtseḡe aava eyemhe. E ya meḡe guele elemhi ogbeḡe agbeḡe ali egbhueḡe (1,260.) E sọ ide ibuma.”

⁴ Ọtseḡe aava ena e khi ẹera olivu eva ali emhi eva ni a ri akpá ru ẹ nga ni e migha odalo oyi Onomhue ni ọ mhue ekẹ agbọ.‡

⁵ Ini ogbokhoghuo ọọ dua ni loḡi kwale wẹ utse, erali e rọte wẹ unu fiẹ ya tose eni ebe wẹ-a. Ina ebe wẹ ni e nono ni e kwale wẹ utse e mema li ya ghua.

⁶ E mhọli afu ni e rọ pfi okpe ukhui ini amẹ o khi rue eḡheḡhe ni e rọ da mẹ guele

* 10:7 Li ze Okiali 20.11; iDetu 32.40; iDan 12.7; Emo 3.7 † 10:10 Li ze Ezik 2.8–3.3

* 11:1 Li ze Ezik 40.3; iZaka 2.1-2 † 11:2 Li ze iLuk 21.24 ‡ 11:4 Li ze iZaka 4.3,11-14

ne. E gbo mholi afu ni e ro mu ame oke mele o lia-a. E gbo ku ighuamhi khi ighuamhi she eke abi o li ghole we shi. §

7 Ini e da pfi o otsese se ne, inyagbemhi ni o ya rote ilimhi na ningolo lasese o ya tsua mu we, o mu we o le, o gbolo we-a.*

8 Ilimhi eyewe e ya de yeshi ifui eoli ni o fune ashini a la gbe Onomhue oyewe-a shi apfida. Irokhokho iSodumu ali ijipiti eoli ona o khi.†

9 Ogbele ese ali ukhukui, egbo na agbo nya ali edeli ali emue ali ushishi e ya ke nise uruli bino ilimhi eyewe, e lama rewe to.

10 Egbo na eke agbo e ya ke ghele shi eghuli ni e ghu, ee bola, e de isomhopfa a ghi egbewe, irari khi emekeguele aava egho, e she nase egbo ni e la eke agbo khue.

11 Ama abi ele ese ali ukhukui e ro dose, Ayemhe oyi Eshinegba ni mholi agbo o lo we egbe, e vule migha. Ulishi oniemhi o lo egbo ni e me we egbe.‡

12 Igho e suo uruli na leghe o rote idane ngme. Oo we, "Ngale odane oola." Igho e li nga idane elemhi otughunu. Ebe we e lese fe kpee. §

13 Oni eghenge a me ukpokpomhi inighise eke ni o ku eke asheghuo akemhishi igbe oyi oni eoli lue. Egbo agbele oshilua, 7,000, e

ghulua, ulishi o mu egbo ni e kpole, e kueghie Eshinegba ni o la iloghie.

14 Opfuse onuzi-eva o she dose, opfuse onuzi-ese o kele ya bhale.

Akala onuzi-ishilua

15 Igho agheni Onuzi-oshilua o pfi akala oyoli, igho ikpokpo iruli e la idane ngme. Ee lie, "Eghiele agbo o she mele eghiele oyi Onomhue Oyawa-a, ali onayi iKirisiti oyoli-a. O ya mhesa ke le agbo agbo."*

16 Egbhali uye ali aane ni e shito ukpekhomhi oyewe odalo Eshinegba, e de ya ta alo mu eke ga Eshinegba.

17 Ee lie, "Anye ri ikphemhi ne, Eshinegba Onomhue Nofune nya, Oni o khi loli, oni o kpe khi loli,

irari khi u she rue ekpabo eniemhi eye, u she e mhesa.

18 Abi elemhi e ro bi ishishi, yeye u li mholi ofu.†

Eghenge o she ramhi ni u ro ya guo eni eghua ez,

ni u ro ya ri eleli na eni ee ga eye

ni e khi emekeguele, ali eni Eshinegba o she pfa na

ni e ri ekpe na eva oye, ghe egbo ni e mu eloe

ali ekhemhue,

abi u li pfuse eni e pfuse eke agbo-a."

§ 11:6 Li ze 1 Ighie 17.1; Okiali 7.17-19; 1 iSam 4.8 * 11:7 Li ze iDan 7.7,21; Iro

13.5-7; 17.8 † 11:8 Li ze Aza 1.9-10 ‡ 11:11 Li ze Ezik 37.10 § 11:12 Li ze 2

Ighie 2.11 * 11:15 Li ze Okiali 15.18; iDan 2.44; 7.14,27 † 11:18 Li ze Iwolo 2.5;

110.5; 115.13

19 Igho a li khueghie Owa ugamhi oyi Eshinegba na iloghie-a, a me Akpati Ishobo agho. Igho inyamhisalo ali ukpimhi ali ingmolo ali ikphala, eke e de kulue, eche rote idane deno kule.‡

12

Oni Okpotso ali Oligio oniemhi

1 Ukpokpomhi irokhase onyaloa o feli shi idane: Okpotso o ya lao ni itsua ni o so e khi ovo, uki o kpoke awe eyoli, arula oghie oyi ikpetata igbeva o rughu oli ukhomhi.

2 Oo me. O tseseg leghe el-emhi otomhe abi o ro ya bia.

3 Igho emhi olese o gbo feli shi idane, ukpokpomhi Oligio oniemhi oyile ni o ze ikhomhi ishilua ali ekphali igbe, ali o rughu irula oghie ishilua shi ukhomhi.*

4 O ri ughia oyoli fuomhi asheghuo akemhishi ese ikpetata ni e la ukhuli pfino kule eke agbo. Oni Oligio oniemhi o migha oni okpotso ni oku o to egho odalo, ni o ba me asha gbe oli oni omoo ogho le, ini a lese bia li lasele.†

5 Oni okpotso o bia omose ni o ya ri otsuodu akhuli mhese na egho ni e la eke agbo nya. Ama a ba oni omoo eke rue ya nga idane ghi Eshinegba ali ukpekhomhi eghiele oyoli.‡

6 Oni okpotso, o na je odagbe ifufu asha ni Eshinegba o riela shi eke khe oli ni a la ya dua

li egbe ogbele agbele ali egb-huegbeso (1,260.)

7 Igho okholi o lasele shi obini iloghie, iMakieni ali igeni eyoli, e nu oni inyagbemhi i kholi. Oni Oligio oniemhi ali igeni eyoli e mie we abo oni okholi.§

8 Ama oa mhue ekpabo te iMakeni ali igeni eyoli oni okholi. Ashini a kpe ro na we obini iloghie o de we oboa.

9 A pfi oni ukpokpomhi oni Oligio oniemhi ogho tiemhile eke agbo, oni enye onede ogho ni a lu Etse ali Okphaghie, oni o di agbo nya ya da ode, a pfi oli tiemhile eke agbo, a li pfi igeni eyoli li tiemhile.*

10 Igho mhi suo ukpokpomhi uruli obini iloghie khi oo li,

“Mena, imiepfuese

ali ekpabo ali

Eghiele oyi Eshinegba oyawa e she bhale!

IKirisiti oyoli ni o ze

o she ri afu oyoli khaso.

Irari khi Okphaghie,

ni o gue ezoo shi

inyoghuo awa egbe,

odalo oyi Eshinegba

ghe ele oghuota ghe ele-iyose,

a she pfi oli tiemhile.†

11 E gbe oli mu oli le,

itoboo oia eyi oni Omi Os-umha

ali ingmemhi otsele oyewe.

Ea ligho nono ingme agbo oyewe,

ni o rewe ya ke

ti je ukhokho na eghuli.

‡ 11:19 Li ze Iro 8.5; 16.18,21 * 12:3 Li ze iDan 7.7 † 12:4 Li ze iDan 8.10

‡ 12:5 Li ze Aza 66.7; Iwolo 2.9 § 12:7 Li ze iDan 10.13,21; 12.1; iJu 9 * 12:9 Li ze Igbae 3.1; iLuk 10.18 † 12:10 Li ze iJobu 1.9-11; iZaka 3.1

12 Irarigho, a ke ghele,
 e e iloghie ali egbo
 ni e la elemhi oli.

Ama epfua o khi na
 e eke ali oke oniemi,
 irari khi Okphaghi
 o she ri ofu tiemhie deba
 e!

Ofu o she vo li elemhi,
 irari khi o lese khi
 ukuku egheghe o ke
 mholi.”

13 Abi oni Oligio oniemi
 o ro me khi a she pfi lue
 tiemhile eke, o khu oni
 okpotso ni o bia oni omomose.

14 Ama a ri ipfua eva eyi
 akpa odegbe oniemi na li,
 ni o ro fiala je odagbe ifufu.
 Ikhi obini a riele shi eke khe
 oli ni a la ya ri eloe khu
 oli, egheghe ali igheghe ali
 ukhukhui egheghe ni o khi
 ikpe ese ali ukhukhui, ini oni
 inyagbemhi o khi ri emhi li
 o.‡

15 Oni Oligio oniemi o rote
 unu ku amese lasele abi oke ni
 oo tu, ro khu oni okpotso ni o
 ba ri ochikpho fuomhi oli ya
 gbe.

16 Ama eke o kpaghi oni
 okpotso obo irari khi eke o nya
 unu-a ri oni oke da ni oni Oli-
 gio oniemi o rote unu kpa ku
 le.

17 Igho oni inyagbemhi
 o pfaa deba oni okpotso, o
 ya mu okholi vule shi imi
 oli enekpole o, ikhi eni e ri
 Omhese eyi Eshinegba gbe
 akanya, ni e ri igesikia mu
 otsele oyi iJesu.

18 Igho oni Oligio oniemi o
 migha egele oke oniemi.

13

*Oni Inyagbemhi ni o rote
 oke oniemi lasele*

1 Mhi me inyagbemhi khi
 o rote elemhi oke oniemi
 ngale. O ze ekphe igbe ali
 ikhomhi ishilua, o rughu ir-
 ula oghie igbe shi eni ekphali.
 Ukhomhi ogbogbo a keke eva
 ni o khi ungmehi ipfiunu-a
 shi.*

2 Oni inyagbemhi ni mhi
 me, o li abi ekpe, awe eyoli
 e li abi eyi akpogene, unu
 oyoli o li abi unu odumhi. Oni
 oligio oniemi o ri afu na oni
 inyagbemhi ni o ro mholi ek-
 pabo ro ke mhese abi oghie.†

3 A kuale oni inyagbemhi
 ukpokpomhi utse ni o ge ug-
 boko oniemi. Ama oni ug-
 boko ogho o bie. O ri abo sha
 agbo nya, e ve deba li.

4 Egbo ee ga oni Oligio
 oniemi irari khi o she ri afu
 na oni elamhako, egbo e li ga
 oni elamhako, e lie, “Oghuo o li
 abi oni inyagbemhi!” “Oghuo
 o dobe ya nu oni inyagbemhi
 kholi?”

5 A ri unu na oni elamhako ni
 o ro ngme ingmemhi emuebe
 ali ipfiunu-a. A ri egheghe
 na li ni o ro ri afu oyoli gbe
 akanya iki egbhueva ali eva.

6 Okhueghie unu-a, o ngme
 ipfiunu-a deba Eshinegba, ro
 pfueche eva oyi Eshinegba ali
 ashini oo la ali egbo ni e nu oli
 la iloghie-a.‡

‡ 12:14 Li ze iDan 7.25; 12.7 * 13:1 Li ze iDan 7.3; Iro 17.3,7-12 † 13:2 Li ze
 iDan 7.4-6 ‡ 13:6 Li ze iDan 7.8,25; 11.36

⁷ A ri afu na li ni o nu eni Eshinegba o she pfa na kholi, ali ni o mu we o le. A ri afu na li ni o mhese shi edeli nya, egbo ali emue ododa ali ishishi. §

⁸ Egbo ni e la eke agbo nya e ya ke ga oni inyagbemhi. Eni ea ga ga oni inyagbemhi ona, e khi eni a keke eva oyewe shi ebe ni a keke eva oyi eni e ya mholi agbo na agboagbo shi, neni a ma agbo. Oni ebe agbo ona o khi ebe agbo oyi Omi Osumha ni a ro luase obo.*

⁹ Oni o mholi esu, o ro suo!
¹⁰ Eni okholi o ya mu,
o mema ya mu we.

Eni a ya gbolo-a,
a mema ri itakobi
ya gbolo we-a.

Eri a ri ona lie eni Eshinegba o pfa na e ri irabomudu ri egbe mie, e ri igesikia ke khase. †

Oni Inyagbemhi ni o rote agbo lasele

¹¹ Igho mhi gbo me inyagbemhi olese ni o rote eke e lasele. O ze ekphali eva abi omi osumha, oo ngme abi oligio oniemhi.

¹² O ri afu oyi inyagbemhi oni odode e gbe akanya na li. O ri itoto ri egbo na eke agbo o ga inyagbemhi onodode, ikhi oni ukpokpomhi ugboko oyoli o she bie.

¹³ O ri ele irokhase onyaloa enefune, o ga ri erali rote idane e tiemhile, ni egbo ee me.

¹⁴ Itobo irokhase ni a ri afu oyi inyagbemhi onodode lina a ri ele, o di egbo ni e la eke

agbo. O gueye we e khali ikhumhi, ro khi ufumhi na oni inyagbemhi ni oni itakobi o kualituse, ni o kie la agbo.

¹⁵ A ri afu na li ni o ri ayemhe na oni ikhumhi irokhokho oyi oni inyagbemhi onodode, ni o dobe ke ngme, ali ni a ke gbolo egbo ni ea lama ga li-a.

¹⁶ O gbo ri itoto mu ogbokpa shi olele shi obita okekhi alukpo, ghe egbo eniemhi ali enikeke, ghe eni e mholi epfue ali eni ea mholi, ghe eni ea khi ighumha ali eni e khi ighumha.

¹⁷ Ogbokhoghuo oa dobe ke e de emhikhoghuo wekhi eri o ro o de, se ni oni o mholi olele ogho, ni o khi eva oyi oni inyagbemhi ali inoba oyi eva oyoli.

¹⁸ Eri onana gueye awa, awa mholi ilisingme. Oni o lolo lese ingme o sa abi a ri oni inoba ona ngme. Oni inoba khi (666), egbhue uye ali igbe ali egbhuese ikpamhi esesa. Inoba ni o migha shi ogbo na.

14

Oni Omi Osumha ali eni egbo agbele egbhueshilua ali ene (144,000)

¹ Igho mhi bino. Ghe Omi Osumha odalo oyemhe khi o migha Ute izayo. Egbo 144,000 (agbele egbhueshilua ali ene) ni a keke eva oyoli ali eva oyi itali shi we alukpo e nu oli migha.*

§ 13:7 Li ze iDan 7.21 * 13:8 Li ze Iwolo 69.28 † 13:10 Li ze ijere 15.2; 43.11

* 14:1 Li ze Ezik 9.4; Iro 7.3

² Mhi ya rote idane suo uruli abi ikhoshe oyi utumhi oyi oke nofunē ni o rote ikhomhi eche tu e tiemhile. Oo ngmolo abi akphala. Oni uruli ni mhi suo, o li abi ini eni e kpheli efa, ee kpheli efa.

³ E to uwolo onogbo odalo ukpekhomhi oghie ali ukpeloe oyi eni elamhako aane ni Eshinegba o ma ali ukpeloe oyi eni egbhali. Ogbokhoghuo o a dobe wena oni uwolo ogho, se ni egbo agbele egbhueshilua ali ene egho (144,000), ni a she rote eke agbo pfasheke.

⁴ Enana e khi egbo ni ea ri ikpotso ri ichimhi mu egbewe, irari khi eri e ri egbewe shi ipfuase. E deba oni Omi Osumha a je obiobini o je kpa. Eni a rote ifuabo egbo pfasheke e khi ni a rote odode ro na Eshinegba ali oni Omi Osumha pfo.

⁵ Ogbō o a me egbhōli okhoghuo unu oyewe, irari khi ea mholi umhagueli okhoghuo.†

Eni Igeni Aase

⁶ Igho mhi me agheni olese khi o la iteva irarogbe e fila, o mhue usomhi onete na agboagbo ni o ro ya tsabo gueye egbo na agbo, ikhi eni e la ishishi nya, ali edeli nya, ali emue-khi-emue ali egbo kpa.

⁷ O ri ukpokpomhi uruli lie, "Na ulishi Eshinegba, ri ufumhi nali, irari khi eghēghe iguezo oyoli o she ramhi, a ke ga oni o ma idane ali eke ni

o ma oke oniemi ali ashini ame o te e chochō."

⁸ Agheni olese onuzava o deba li, oo, "IBabilo okekhui o de, oni o ri onyo ni o a pfuase oyoli ona okia na ishishi nya da."‡

⁹ Agheni onuzi-aase o deba we, o ri ukpokpomhi uruli lie, "Ini ogbokhoghuo o ga oni inyagbemhi ali ikhumhi oyoli, ni o ro mie olele oyoli shi alukpo, okekhi obo,

¹⁰ oni ogbo ogho, o ya rote onyo elemhi ibibi oyi Eshinegba li da, ikhi onyo ni aa pfose-a ni a she ku vo uko elemhi ibibi oyoli. A ya ri ofulu ni oo lala biobiobio tose oli-a ukpeloe oyi igeni eni e pfuase ali ukpeloe oyi oni Omi Osumha.§

¹¹ Ewoli oyi anasemhe eyewe ee nga idane agboagbo. Eni e ga oni inyagbemhi ali inyagbemhi ni a khali, ali onini o da mie olele oyi eva eyoli ne, ea mhue iyemhe shi eleoguota, shi eliyose.*

¹² Eri onana o gueye eni Eshinegba o pfa na e ri irabomudu ri egbe mie, ikhi eni e ri omhese eyi Eshinegba a gbe akanya, ni e ri igesikia a deba ijesu.

¹³ Igho mhi suo khi uruli o rote idane lie, "Keke onana: Ikhivose o khi na eni e ghua shi elemhi Onomhue rote memena vu."

"Ikhivose o khi na we egbegbo!" "Igho Ayemhe o ngme, khi e ya yemhe inyama-egbe agbo-a, irari khi

† 14:5 Li ze iZef 3.13 ‡ 14:8 Li ze Aza 21.9; iJere 51.8; Iro 18.2 § 14:10 Li ze Aza 51.17; Igbae 19.24; Ezik 38.22 * 14:11 Li ze Aza 34.10

eminete ni e riẹ, e ya deba wẹ!”

Ikhiẹse oyi eke agbo

¹⁴ Igho mhi bino, mhi me otughunu opfopfo odalo oyemhe. Oni o shito o, “O li abi Omi Ogbo.” O rughu arula igolu oyi oghie shi ukhomhi, o ri agaga ni o o mu mholi obo.[†]

¹⁵ Aḡeni olese o rote Owa oyi Eshinegba lasele ri ukpokpomhi uruli lu oni o shito nga ukhomhi otughunu egho leghe, o o li, “Rue agaga oye ni u ke khiese, irari khi eghẹghẹ ikhiese o she ramhi, irari khi agbo o she bie ni a khiese.”[‡]

¹⁶ Igho oni o shito otughunu egho, o ri agaga oyoli khiese agbo.

¹⁷ Aḡeni olese o rote Owa oyi Eshinegba na iloghie fie lasele, loli o li mholi agaga ni o o mu.

¹⁸ Igho aḡeni olese o rote atete fie lasele, ikhi aḡeni ni o mholi omheshe shi erali. O ri uruli oniemi lu oni o mholi agaga ni o o mu egho leghe, o o li, “Rue agaga oni o o mu oye, ni u ro khiese ipfonu eke agbo-a, irari khi ipfonu e she yile!”

¹⁹ Igho oni aḡeni o pfi agaga oyoli gase eke agbo, o khiese ipfonu nya, o ku we lo ashini a te e mino onyo. Amino onyo ona, elemhi ibibi oyi Eshinegba o migha shi.

²⁰ Igho a la ashini a la amino onyo ni o la olase oni eoli ri awe gue we. Olia e

rote oni amino onyo tu lasele. Utumhi oyi oni oia o ga nuata ramhi imali egbhuegbe, e limhi abi ete-awe ishe.[§]

15

Igeni oshilua ni e tsua anasemhe ishilua

¹ Igho, mhi me iroḱhasẹ oniemi ni o mu eloe olese ukhomhi idane, ikhi igeni oshilua ni e mholi anasemhe ishilua ni e khi eni e kpukhokho, irari khi wewe Eshinegba o ro ya gbe ofu oyoli ukhomhi.

² Mhi me emini o li abi oke ighegbe oniemi ni erali e solo shi, o migha epfe oke oniemi. Egb o ni e mu oni inyagbemhi ali oni ikhumhi oyoli ali inoba oyi eva oyoli o le, e mu efa ni Eshinegba o ro na we mhue abo.

³ E to uwolo oyi iMosisi oni o o ga oyi Eshinegba ali uwolo oyi oni Omi Osumha, e lie,

“Ufumhi ali oshabo
e khi ikanya eye,
Eshinegba Onomhue
Nofune nya.
Ipfuase ali igesikia
ode eye e khi,
oghie ni o mholi ishishi
nya!”^{*}

⁴ Oghuo o a ya na
ulishi oye Onomhue,
ni o a ya ri ufumhi
bhale ghi eva oye?
Irari khi yeyeghuo kpele
u khi oni o pfuase.
Ishishi nya e ya bhale
ya kueghie e, irari khi

[†] 14:14 Li ze iDan 7.13 [‡] 14:15 Li ze iJofe 3.13 [§] 14:20 Li ze Aza 63.3; iLame 1.15; iro 19.15 ^{*} 15:3 Li ze Okiali 15.1 [†] 15:4 Li ze iJere 10.7; iwolo 86.9

ikanya ipfuasẹ eyẹ
e she ri egbe khase.”†

⁵ Onana o doṣe se, mhi bino,
mhi me Owa oyi Eshineḡba na
iloghie, ni o khi Igholo oyi
oṣeḡe khi o khueghie-a.‡

⁶ Roṣe oni owa ugamhi,
eni igeni oshilua ni e mḡoli
anasemḡe ishilua e te lasese.
E soṅo itsua ni e pfuasẹ ni
eḡ ge nyanyanya, e ri oḡbene
igolu mu aye.

⁷ Igho oṣuḡghuo eni
elamhako aane ni e mḡoli
ayemḡe egho, e ri italabi igolu
ishilua ni ofu oyi Eshineḡba
e la, na eni igeni oshilua.
Ikhi Eshineḡba, ni o laḡ le
agboagbo.

⁸ Oni owa ugamhi o vo
ewoli oyi ufumhi ali ekpabo
oyi Eshineḡba. Oḡbo okhoghuo
oḡ la o ni o doḡe lo oni
owa ugamhi ya ramhi ni eni
anasemḡe ishilua e ro gba
pfo.§

16

*Italabi ishilua ofu eyi
Eshineḡba*

¹ Igho mhi suo khi uruli na
leghe o roṣe oni Owa ugamhi
oyi Eshineḡba gueye eni igeni
oshilua, “A ka ku eni italabi
ishilua eyi ofu oyi Eshineḡba
shi eke agbo.”

² Aḡeni onodode o vu ya
ku atalabi oyoli shi eke agbo.
Iwali igboko ebe ni e lolo e
to, e ge eḡbo ni e mḡoli oḡleḡ
oyi oni inyagbemhi, ni e ga oni
inyagbemhi ni a khali.*

³ Aḡeni onuzava o ya ku ata-
labi oyoli lo okẹ oniemhi, oni
okẹ oniemhi o mele oḡia eyi
eḡbo ni e ghua-a. Emhikpa ni
e mḡoli ayemḡe ni e la elemhi
oni okẹ oniemhi e ghuloo.

⁴ Aḡeni onuzi-aase, o ku ata-
labi oyoli lo okẹ ali ichocho
ame, e mele oḡia-a.†

⁵ Mhi suo khi aḡeni ni a ri
ame nga obo khi oḡ li,
“Oḡeso-ezo ni o pfuasẹ
u khi, irari khi

u guẹ so ingme ena,
Yeye u khi Eshineḡba No
pfuasẹ,

Yeye u la o memena,
ni u kpe la o, ni u gbo ya
la o,
itobo khi igesikia u ro o so
ezo eye.

⁶ Irari khi eḡbo e she gbolo
eni a pfa na-a
ali emekeḡuele,

u she ri oḡia na we da,
abi o ti shi!”

⁷ Mhi suo khi atete o tseṣe, oḡ,
“Gueḡeḡeḡe,

Eshineḡba Onomhue
Nofune nya,

iguezo eye, eyi igesikia
ali eni e te ode e khi!”

⁸ Aḡeni onuzi-aane o ku ata-
labi oyoli ku ovo, a ri ekpabo
na ovo o ri erali ke toṣe eḡbo-
a.

⁹ Eḡbo e daghie-a irari
utomhi oyi erali, e ze emuebe
na eva oyi Eshineḡba ni o
mḡoli ekpabo ro mḡese na
anasemḡe enana, ama ea
lama mupfi ni e ri ufumhi na
eva oyoli.

‡ 15:5 Li ze Okiali 38.21 § 15:8 Li ze Okiali 40.34; 1 Ighie 8.10-11; 2 Okhe 5.13-14;
Aza 6.4 * 16:2 Li ze Okiali 9.10 † 16:4 Li ze Okiali 7.17-21; Iwolo 78.44

¹⁰ Aḡeni ɔnuzi-oshe ɔ ku atalabi oyɔli kushi ukpekhomhi oghie oyi ɔni inyagbemhi, eghiele oyɔli o la obili. Egbɔ e ngomhi elemhi unu, shi oya.‡

¹¹ E ku itse na Eshinegba na iloghie irari utomhi ali igboko eyewe, ama ɛa lama mupfi lase ode okholo oyewe le.

¹² Aḡeni ɔnuzi-osasa o ku atalabi oyɔli lo oke iYufiretisi ni o fu, o khakha amɛ-a ni ighie na obini ovɔ o te ɛ ngale e me asha rote dose.‡

¹³ Igho mhi me khi ikhiakhiamhi iyemhe aase ni e li abi ikele e rote unu oyi ɔni oligio oniemi ali unu oyi inyagbemhi ali unu oyi omekeguele oyi egbholi, lasele.

¹⁴ Wewe e khi iyemhe okphaghiɛ ni ee gbe ikanya oshabɔ, ni e fiɛ deba ighie ni e la eke agbɔ nya, ni e ya ti we gbili shi okholi ogbele oyi Eshinegba No fune nya.

¹⁵ “A ghe i, mhi ya bhale abi oghiatɔ! Ikhivose o khi na ogbɔ ni o ya guale, ni o ya ri eloe khu ide eyɔli ini o khi banɔ-a ni a me ɔli irumheba!”*

¹⁶ Igho eni iyemhe okphaghiɛ e ti we gbili ashini a ri elemhi Iburu ɛ lui Amagedo.†

¹⁷ Aḡeni ɔnuzi-oshilua o ku atalabi oyɔli nga idane, igho uruli na leghe o rote Owa ugamhi oyi Eshinegba rote

ukpekhomhi eghiele ngme lasele, ɔɔ li, “A she riɛɛ ɔli!”

¹⁸ Igho, inyamhisalo amɛ, ali ukpimhi ali ingmolo oyi ikphala ali inighise eke ee bhale. Inighise nabi ogbɔ-a kpe me ghue abi a te ma ogbɔ shi eke agbɔ. Oni inighise o ga khi oniemi!‡

¹⁹ Oni ɛoli oniemi o kemhi asha ese, ɛoli oyi eni ishishinya e de kua. Eshinegba o sato ɛoli iBabilo no fu egbe. O mhese uko ni onyo ofu oyɔli o vo nali.‡

²⁰ Eke ni e la iteva elemhi oke nya e kelea, aa ke me ite ekhoghuo.*

²¹ Eche amɛ na idane oniemi e rote idane de mu egbɔ. Ee ngmanɔ ku Eshinegba irari eni opfuse oyi eni eche amɛ, irari khi oni opfuse o kholo gba.†

17

Adegbe nofunɛ

¹ Igho aḡeni oghuo ni o mholi italabi ishilua o bhale, ɔɔ me, “Bhale khi mhi ya ri abi a li ya nase ɔni adegbe onofune khasɛ, ikhi ɛoli oniemi ni o la epfe oke ni e bu.*

² Loli ighie na eke agbɔ e nu kia okia, onyo okia eyɔli e gbe egbɔ ni e la eke agbɔ.”†

³ Igho ɔni aḡeni o rue me je odagbe ifufu elemhi Ayemhe. Igho mhi me okpotso ni o shito nga inyagbemhi oyile, ni o

‡ 16:10 Li ze Okiali 10.21 § 16:12 Li ze Aza 11.15 * 16:15 Li ze iMat 24.43-44; iLuk 12.39-40; Iro 3.3 † 16:16 Li ze 2 Ighie 23.29; iZaka 12.11 ‡ 16:18 Li ze Iro 8.5; 11.13,19 § 16:19 Li ze Aza 51.17 * 16:20 Li ze Iro 6.14 † 16:21 Li ze Okiali 9.23; Iro 11.19 * 17:1 Li ze iJere 51.13 † 17:2 Li ze Aza 23.17; iJere 51.7

le iwali eva ipfiunu-a, o ze ikhomhi ishilua ali ekphali igbe.‡

4 Oni okpotso o sono itsua eyile, a ga mema ri igolu ali ifefe ali ema ro khueshe oli-a. O mu uko igolu mholi obo ni o vo emhi ighuighue ali ikanya ichimhi eyi itsebo eyoli. §

5 Emhi osheli na keke shi oli alukpo khi.

Osheli.

IBabilo Oniemhi.

Inyo idegbe nya.

Ali inyo itsebo nya.

6 Mhi me khi oni okpotso, o da oia eyi egbo ni a pfa na, oia eyi eni a gbe-a irari khi e mie ijesu suo.

Abi mhi ro me oli, mhi yila.

7 Igho oni ageni oo mhe, "Elo o ze ni u ro yila? Mhi ya gueye osheli oyi oni okpotso ali oyi oni inyagbemhi ni oo nga, ni o ze ikhomhi ishilua ali ekphali igbe.

8 Oni inyagbemhi ni u me ni o kpe khi, mena ni o ke khi loli, o ya rote ilimhi na ningolo ngale ya je epfua oyoli. Abo e ya sha egbo ni e la agbo ni aa keke eva oyewe shi ebe ni a keke eva oyi eni e ya mholi agbo na agboagbo shi, rote igbaekele agbo, ini e me oni inyagbemhi irari khi, o kpe khi, mena o ke khi, ni o ya bhale.*

9 "Onana o khi emini ogbo te e sa usamhi ilisingme. Eni ikhomhi ishilua egho, e khi ikhomhi ite ishilua ni oni okpotso oo shito.

10 Ighie oshilua e li gbo khi. Etuoshe o, e she ghua, oghuo oo kiele e mhese, oni o kpole o bhale ne. Ini o da bhale, o mema ya lao ukuku eghenge.

11 Oni inyagbemhi ni o kpe lao ni o ke lao egho, o khi oghie onuzi-olale, abeghuo loli ali oshilua enekpole e li, o ya li je epfua oyoli.

12 "Eni ekphali igbe ni u me egho, e khi ighie ogbe ni aa ri eghiele na ne, ama a ya ri afu na we elemhi iwakati oghuo tse ni e ro mhese abi ighie, li shi oni inyagbemhi. †

13 Enana emhi oghuo e khi, e ya ri ekpabo ali afu oyewe na oni inyagbemhi.

14 E ya nu oni Omi Osumha kholi. Oni Omi Osumha o ya gbe we oni okholi, irari khi Onomhue oyi enemhue o khi, ali Oghie ni o mholi ighie o khi. Irari khi e nu oli la, wewe o lu ni o ze, ali ni e khi eni e ri igesikia deba li."

15 Igho oni ageni oo mhe, "Eni oko eniemhi ni u me, ni oni adegbe o shito, egbo ali ebubu egbo ali ishishi ali emue ododa e la agho.

16 Oni inyagbemhi ali ekphali igbe ni u me egho e ya biselemhi oni adegbe. Epfuse oli-a, e ban o oli-a, e nyan o li elamhi egbe ro le, e ri erali tose oli-a.

17 Irari khi Eshinegba o roli shi we udu e ri ele emini o gba, loli e ro lama kugbe ri ekpabo eyewe na oni inyagbemhi ni o mhese, ya ramhi ni

‡ 17:3 Li ze Iro 13.1 § 17:4 Li ze iJere 51.7 * 17:8 Li ze iDan 7.7; Iro 11.7; Iwolo 69.28 † 17:12 Li ze iDan 7.24

ungmemhi oyi Ẹshineḡba o ro
bhale ya tṣẹ.

¹⁸ Oni ọkpotoso ni u me ọli
o khi oni ẹoli oniḡmhi ni ọo
mḡṣe na ighie na agbo.”

18

Udemhi oyi iBabilo

¹ Onana o doṣe se, mhi me
ageṇi olese khi o roṣe iloghie e
tiemhile. O mḡli afu nofunẹ,
ugemhi oyoli o ri eke agbo o ge
nyanyanya.

² O ri uruli oniḡmhi tṣeṣe
leghe, o li.

“Ẹoli iBabilo Oniḡmhi,
o she de.
O she mele ugbebo
oyi iyemḡ eyi
ọkphaghie-a,
ali ashini iyemḡ
ọkphaghie e la lese,
ashini ipfeli ali elamhako
ni aa pfuase ni aa ghue,
eḡ la.*

³ Irari khi ishishi nya,
e she kpokpo onyo,
ni o ri ujili e kpha,
ikhi onyo okia oyoli.
Ighie na eke agbo
e she kia okia deba li.
Eduoki na eke agbo,
e she roṣe
iliagbo-tsuakua oyoli
mḡḡ eḡfue.”†

⁴ Igho mhi suo uruli olese
ni o roṣe idane lie,
“Ẹgbo eyemḡ, a na li egbe
kua,
ini a khi mḡḡ okemhi
shi olamḡ eyoli,
ini a khi mḡḡ okemhi
shi osoli anasemḡ oyoli.‡

⁵ Irari khi olamḡ eyoli
e she tighili yagha ramhi
idane,

Ẹshineḡba o she sato
umha-guḡli eyoli.§

⁶ A li ọli, abi o li e,
a fali ọli ota asha eva
shi ikanya ni o gbe.

Onyo ni o toto ni o ro na e da,
a so oghoḡho nali da asha
eva.*

⁷ A ri osoli ali oyala nali
ni o guḡ to ufumhi ali
eḡfue
ni o rona egboli.

Irari khi eri Oni Ọkpotoso
o la ekelemhi tono obo
udu lie,

‘Mḡemḡ mhi khi oni ọlele!
Mhi aa tigbe ya khi
osamhi-olimhi,
mhi aa tigbe ya
me oya egbe ghue.’

⁸ Irarigho, ogbeḡghuo
anasemḡ oyoli
o ro ya sha rughu ọli,
shi eghuli ali evie
ali okiamhi.

A ya ri erali toṣe ọli-a.
Irari khi Ẹshineḡba Onomḡue
ni o ya gue ọli ezo,
onofunẹ nya o khi.”†

⁹ “Ini ighie na agbo ni e kia
okia deba li, ni e nu ọli li agbo
tsua kua, e ya vie, e vie evie
oya na li, ini e me ewoli erali
ni eḡ toṣe ọli-a.

¹⁰ E ya tapfia migha ke vie
irari ulishi osoli ni a na li, eḡ
lie,

“ ‘Eekhue o Eekhue o
yeḡḡ ẹoli nofunẹ,

* 18:2 Li ze Aza 13.21; 21.9; iJere 50.39; 51.8; Iro 14.8 † 18:3 Li ze Aza 23.17; iJere 51.7 ‡ 18:4 Li ze Aza 48.20; iJere 50.8; 51.6,45 § 18:5 Li ze Igbae 18.20-21; iJere 51.9 * 18:6 Li ze Iwolo 137.8; iJere 50.29 † 18:8 Li ze Aza 47.7-9

iBabilo ɛoli no mhuɛ ek-
pabo!

Elemhi iwakati oghuo tse
ɛpfua oye o she bhale!‡

11 “Eduoki na agbo e ya
vie ɔli e vie oya irari khi
ogbokhoghuo ɔa ke nu we ya
de itsua. §

12 Itsua igolu ali ɛlomho,
imieche ni e somhotse ni e
ghale, ifefe ali ema, ide ep-
fopfo na kpishi, ali eni ɛ yile,
ghe ena wono, ali ilolo eni ey-
ile ali itsua ododa ni a ri ɔora
ni ɛ pfi khali, ali itsua ododa
ni a ri ekphali eni khali, ali
ɛera ni e ghale, ide ali ikhuli
ali eche imabo.

13 Ali alagho na lu iki-
namoni ali oshamhi ali ituale
afu ɛera ali ituale ni a ku ɛ shi
olimhi egbe, ali atike ni ɔo
pfie ni o ghale ali onyo ali oili
ali ifulawa ali ikpamhi emhi
ni a lu ado, ena ali isumha ali
ichi ali amoku ni ichi ɛ tsua,
li shi ɛgbo ni e khi ighumha.*

14 “Eni eduoki e ya lie ɔli,
‘Imomhi ni u ri ukpelo shi eke
ɛ khe, o she me na. ɛpfue ali
osuemhe eye nya e she kele-a,
ni a ke dobe gbolo me ya mie.’

15 Eduoki ni e ri emhi
enana de ni e me elele ɛpfue
rote obo oyi oni ɔkpotso, e ya
migha tapfia, ulishi osoli ni ɔ
me ɔo mu we. E ya vie e vie
oya, †

16 e vie nyogho, ee lie,
“ ‘Eekhue-o! Eekhue-o,
ɛoli Onofune,
ni a ri iwulu ichi eneyile,

ni a ri igolu ali eche
ni e ghale ali ifefe
khuɛ akhue!

17 Aboriekhi igho,
elemhi iwakati oghuo
tse,

eni ɛpfue eniemhi egho
e li opfu-a. ‡

“Eni e khi ega oko-okɛ
oniemhi nya ali eni ɛ lo oko-
okɛ oniemhi ya asha ali eni
ɛ gua li ali eni e rote okɛ
oniemhi ɛ mie ifata, e ya
tapfia migha.

18 Ini e me ewoli eyi utomhi
oyoli, e ya lie, ‘Eoli okhoghuo
o la ɔ ni o li abi oni ɛoli
oniemhi?’ §

19 E yalo ifufu ku ukhomhi,
e ri evie ali oya vie leghe, ee
lie,*

“ ‘Eekhue-o! Eekhue-o,
yeye ɛoli oniemhi,
ni eni e mholi
oko-okɛ oniemhi nya,
e te mholi ɛpfue eyewe
rote osuemhe oyi oni ɛoli!
Elemhi iwakati oghuo tse
a ro pfuse ɔli-a. †

20 A ri itobo li
ke ghele, iloghie,
A ke ghele,
ɛɛ eni a pfa na
ali ighiusomhi na keɛ ali
emekeguele!

Irari khi Eshinegba
o she gue ɔli ɛzo
shi abi ɔ li nase ɛ.’ ‡

21 Igho ageni nofuno o rue
udumhi eche ni o li abi eche
iko pfilo oni okɛ oniemhi, ɔo
li,

‡ 18:10 Li ze Ezik 26.16-17 § 18:11 Li ze Ezik 27.31,36 * 18:13 Li ze Ezik
27.12,13,22 † 18:15 Li ze Ezik 27.31,36 ‡ 18:17 Li ze Aza 23.14; Ezik 27.26-30

§ 18:18 Li ze Ezik 27.32 * 18:19 Li ze Ezik 27.30-34 † 18:19 Li ze Ezik 27.30-34

‡ 18:20 Li ze iDeut 32.43; iJere 51.48

“Ekpabọ na guo
 a rọ ya guoḡho
 ẹoli iBabilọ oniẹmhi-a,
 aa ke gbo ya
 me ẹ ẹloe ghue. §
 22 Ogbọ ọa ke gbo ya suọ
 uruli ẹfa
 wẹkhi oyi emini áá kpheli
 wẹkhi oyi ofele,
 wẹkhi oyi akala
 elemhi yeyẹ oni ẹoli ona
 ghue.
 Ogbọ ọa ke ya me
 oḡbakanya oḱhoḡhuo
 elemhi ẹ ghue.
 Ogbọ ọa ke ya suọ
 okeke emini a mḡeli iko,
 elemhi ẹ ghue.*
 23 Erali ákpá ọa ke gbo ya ḡe
 elemhi ẹ ghue,
 wẹkhi eri a ya gbo suọ
 uruli eni ẹ zu ode
 elemhi ẹ ghue.
 Eduoki eyẹ e khi
 ẹḡbọ eni e funẹ na eke
 agbọ,
 u ri oḡbọ oye
 di ishishi nya wase-a. †
 24 Elemhi oni ẹoli a me
 ọlia eyi emeḱeḡuele
 ali eyi eni a pfa na,
 ali eni a gboloa shi eke
 agbọ nya.” ‡

19

Okuekhoogo!

1 Onana o dọse se, mhi suọ
 uruli ni o li abi okeke oniẹmhi
 oyi ebubu ẹḡbọ obini iloghie
 khi oo tsese, oo liẹ,
 “Okuekhoogo,
 Imiepfuese ali ufumhi

ali ekpabọ khi
 eyi Ẹshineḡba oyawa.
 2 Irari khi iguezo oyọli
 eyi igesikia ali
 eni e sheshe e khi.
 O she pfa ezọ mu
 adegbe onofunẹ,
 oni o she ri okia eyọli
 yese eke agbọ-a.
 Ẹshineḡba o she ye okhọli
 to ọlia eyi eni ẹ ẹ ga
 eyọli.”*

3 Ighọ e gbo tsese, e liẹ,
 “Okuekhoogo!
 Ewọli eyọli e she ẹ nga
 idane agbọagbọ.” †

4 Ighọ eḡbhali uye ali aane
 ali elamhako aane, e de yeshi,
 e ga Ẹshineḡba ni o shitọ oni
 ukpekhomhi oghie, e liẹ,
 “Atse! Okuekhoogo!”

5 Uruli o rọte oni
 ukpekhomhi oghie ngme ọọ
 liẹ,
 “A kuẹḡhie
 Ẹshineḡba oyawa,
 ẹ ẹ ni ẹ ẹ ga eyọli nya,
 ẹ ẹ ni a na ulishi oyọli,
 ghe ẹḡbọ ni e fu
 ali eni e she!” ‡

6 Ighọ mhi suọ uruli ni o li
 abi uruli oniẹmhi oyi ebubu
 ẹḡbọ ni o li abi ingmolo oyi
 oke ni ọọ tu, ni o gbo li abi
 ingmolo oyi akphala. Ee liẹ,
 “Okuekhoogo!

Irari khi Ẹshineḡba
 Onomhuẹ oyawa Nofunẹ nya,
 lọli o le oghie! §

7 Awa ke ḡhele,
 egbe ke mu awa,
 awa ri ufumhi nali!

§ 18:21 Li zẹ ijere 51.63-64; Ezik 26.21 * 18:22 Li zẹ Ezik 26.13; Aza 24.8

† 18:23 Li zẹ ijere 7.34; 25.10 ‡ 18:24 Li zẹ ijere 51.49 * 19:2 Li zẹ iDeut 32.43;

2 Ighie 9.7 † 19:3 Li zẹ Aza 34.10 ‡ 19:5 Li zẹ Iwolo 115.13 § 19:6 Li zẹ Ezik 1.24; Iwolo 93.1; 97.1; 99.1

Irari khi izu-ode oyi
 oni Omi Osumha
 o she ramhi,
 omueshi o she mu egbe shi
 eke.

8 Ode opfopfo

ni o dala ni o pfuase,
 a ro nali so.”

(Oni Ode opfopfo, igue ngeli
 oyi eni a pfa na o migha shi.)

9 Oni agheni oo mhe, “Keke
 khi. ‘Ikhivose o khi na egbo
 ni a lu shi oni ukue aruele oyi
 izu-ode oyi oni Omi Osumha.’
 ” O gbolo e mhe, “Ingmemhi
 enana, egbegbi ingmemhi eyi
 Eshinegba e khi.”*

10 Igho mhi de ya wugha
 li awe ni mhi ga li. Ama
 oo mhe, “Khi li gho! Oni
 oo ga nabi yeye ali onabi
 inyoghuo e enekpole mhi
 khi ni e mu otsele oyi iJesu
 mhue. Ga Eshinegba! Irari khi
 otsele oyi iJesu o khi ayemhe
 imekeguele.”

Oni o nga achi opfopfo

11 Igho mhi me khi iloghie
 o khueghie-a mhi me achi
 opfopfo. Oni o nga li a lu oze-
 regbenga ali oni o khi igesikia.
 Ode ni oa mhue azeba o te e so
 ezoo, ni o te e kholi.†

12 Ikpamhi alo eyoli e li abi
 elemhi ere. O rughu irula
 oghie ni e bu. O mholi eva ni a
 keke shi oli egbe ni ogbo olese
 oa lese, se ni loli ghuo kpele.‡

13 O so awulu ni a so oia.
 Eva ni a lu oli khi, “Ung-
 memhi oyi Eshinegba.”

14 Ekholi-okhue ni e la
 iloghie e deba li kia, e sono
 itsua epfopfo ni e dala ni e
 pfuase, e nga ichi epfopfo.

15 Itakobi ni oo mu o rote
 unu oyoli lasese, ni o ro ya
 kholi eni ishishi. Otsuodu
 akhuli o ro ya ke mhesa na eni
 ishishi. O ya rote ashini a te e
 mino-onyo mino onyo lasese,
 Ikhi onyo no khi ofu oniemhi
 oyi Eshinegba Nofune nya.§

16 A keke eva, “Oghie Ni o
 Mholi Ighie, Ali Onomhue Ni o
 Mholi Ekhemhue,” shi awulu
 na dogo oyoli ali ukhiowe
 oyoli.

17 Igho mhi me agheni khi
 o migha ovo, ni o vie lasese
 leghe lui ipfeli ni e la irarogbe
 e fiala, “A bhale a ka legba shi
 aruele ogbomhi oniemhi oyi
 Eshinegba.

18 Eghenge agho ni a le
 elamhi idiegbe oyi ighie
 ali ega ekholi-okhue ni e ri
 ekholi-okhue e ye okhue,
 ali elamhi idiegbe eyi egbo
 nefune, shi elamhi ichi ali eni
 e nga we, ali elamhi idiegbe
 egbo nya, shi ighumha ali
 eni ea khi ighumha ghe egbo
 enikeke ali egbo eniemhi.”*

19 Igho mhi me oni inyagbe-
 mhi ali ighie na eke agbo ali
 ekholi-okhue eyoli khi e lona
 kugbe, ni e ro nu oni o nga
 oni achi ali ekholi-okhue eyoli
 kholi.

20 Ama a mu oni inyagbe-
 mhi ma omekeguele oyi egbholi
 oyoli, oni o ri eva oyoli gbe

* 19:9 Li ze iMat 22.2-3 † 19:11 Li ze Ezik 1.1; Iwolo 96.13; Aza 11.4 ‡ 19:12

Li ze iDan 10.6 § 19:15 Li ze Iwolo 2.9; Aza 63.3; iJof 3.13; Iro 14.20 * 19:18 Li
 ze Ezik 39.17-20

irokhase onyaloa. Eni irokhase ena o ro di egbo ni e mie eni olole eyi oni inyagbemhi shi egbe, ni e ga irokhokho oyoli ni a khali. Oni inyagbemhi ali oni omekeguele oyi egbholi, a mu we pfilo uyele erali ni ofulu o la to kua yala.†

²¹ Eni e kpole, a ri itakobi oni o rote unu oyi oni o nga oni achi gbolo we-a. Eni ipfeli nya e ri elamhi idiegbe eyewe le.

20

Ikpe Agbele

¹ Igho mhi me khi azeni o rote idane e tiemhile o mu okpe ilimhi na ningolo mholi obo, o tsua ukpokpomhi uweghe.

² O gamhi oni oligio oniemhi rue, ikhi enye onede ogho ni o khi etse ali Okphaghiye, o ge oli ikpe agbele oghuo.*

³ O pfi oli lo oni ilimhi na ningolo, o pfi okpe o. O pfi oni ilimhi na ningolo unu ma, ini o khi ke gbo me asha di ishishi egbo, ya ramhi ni eni ikpe agbele e ro ya gba. Ini ona o dose se, a mema ya rue oli obo-a ukuku eghoghe.

⁴ Igho mhi me ikpekhomhi ighie. Eni e shito o, e khi eni a ri afu na ni e ri egbo gue ezọ. Igho mhi gbo li me iyemhe eyi egbo ni a kholo ikhomhi o, irari otsele ni e pfi na ijesu ali ungemhi oyi Eshinegba. Eni egbo ena ea ga oni inyagbemhi wekhi irokhokho eyoli, wekhi eri e mie olole oyoli shi

atete ukhomhi, wekhi obo. E ya te eghuli guale, e ya nu iKirisiti mhese ikpe agbele.†

⁵ Egbo ni e kpole ni e ghu-loa ea ke rote eghuli guale, ramhi ni ikpe agbele egho e ro gba. Onana o khi irote eghuli guale onodode.

⁶ Ikhivose ali ipfuase e khi eyi eni e mholi obo shi iguale onodode onana. Eghuli onuzi-eva oa mholi ekpabo shi egbo eghogho egbe, ama e ya khi ekpodalo-ugamhi eyi Eshinegba ali eyi iKirisiti. E ya nu oli mhese ikpe agbele.

⁷ Ini eni ikpe agbele e gba se, a ya taghiye Okphaghiye owa ighumha oyoli-a.

⁸ O ya fie lasele ya di egbo ni e la ishishi nya na eke agbo, ikhi egbo ni a lu iGogi ali iMagogi, ni o ro ti we gbili shi okholi. Eri e bu abi ekhashe ni e la egele oke oniemhi.‡

⁹ Igho e to ogholi ya gbe eke agbo khia, e pfi gasa apfe eyi egbo eyi Eshinegba, eoli ni o nono egbegbo. Ama erali e rote idane tiemhile ya tose we-a.

¹⁰ Oni etse ni o di we, a mu oli pfilo erali ilimhi iriere ni ofulu o la to kua yala. Ikhi ashini a pfi oni inyagbemhi ali omekeguele oyi egbholi lo. A ya la agho na we osoli agboagbo, no gbe no bi.

A ri eni e ghu-a gue ezọ

¹¹ Igho mhi me ukpokpomhi ukpekhomhi oghie opfopfo ali oni o shito o. Abi o shito egho,

† 19:20 Li ze Iro 13.1-18 * 20:2 Li ze Igbae 3.1 † 20:4 Li ze iDan 7.9,22 ‡ 20:8 Li ze Ezik 7.2; 38.2,9,15

eke ali ukhwei e kele-a, ɛa ke me ashikhoghwo la.

¹² Igho mhi me egbo ni e ghuloo, ghe eniemhi, ali enikeke, e migha odalo oni ukpekhomhi oghie. Igho a khueghie ebe ni e bu-a. A gbo khueghie ebe olese-a ni o khi ebe ni a keke eva oyi eni e ya mholi agbo na agboagbo shi. A gue eni e ghu-a ezɔ abi ikanya ni e gbe e li, abi a li keke we shi eni ebe. §

¹³ Oke o kpa egbo ni e ghuloo shi o ku lasese. Eghuli, ali ilimhi, e khueghie unu-a kpa egbo ni e la elemhi we ku lasese. A gue ogbogbo nya ezɔ abi o li gbe.

¹⁴ Igho a pfi Eghuli, ali ilimhi lo uyele erali. Er-ali ilimhi irierie onana o khi eghuli onuzi-eva.

¹⁵ Onini eva oyoli ɔa da la oni ebe ni a keke eva oyi eni e ya mholi agbo na agboagbo shi ne, eri a ya pfi oli pfilo oni erali ilimhi irierie.

21

IJerusalemu Onogbo

¹ Igho mhi li me iloghie onogbo ali eke agbo onogbo. Iloghie onodode ali eke agbo onodode e she kala-a, igho li khi oke oniemhi.*

² Mhi me oni ɛoli ni o pfuase ikhi oni iJerusalemu onogbo khi o rote idane e tiemhile rote obɔ oyi Eshinegba, abi omueshi ni a khuese somhotse e ghi odɔ li. †

³ Igho mhi suo ukpokpomhi uruli khi o rote oni eghiele e lie, “A ghe khe! Eshinegba o ri apfe oyoli tiemhile deba egbo, eri o ke ya nu egbo ngeli kugbe, eni egbo e ya khi egbo eyoli, Eshinegba o ya nu we la kugbe. ‡

⁴ O ya shishi we amevie alo-a, eghuli ɔa ke ya laɔ, wekhi eri a ke ke vie wekhi asha o ke ya ke to ogbo, irari khi emini edio e she dose.” §

⁵ Oni o shito oni ukpekhomhi oghie odɔ li, “Ghe khe, Mhi ri emhikpa a mele enegbo-a!” Igho odɔ, “Keke emhi enana shi eke irari khi ingmemhi ni a ri egbe e da ni e khi igesikia e khi.”

⁶ Odɔ mhe, “A she li oli. Mhemhe mhi Aafa ali Omega, mhemhe mhi khi igbaekele ni mhi khi ozukhomhi. Oni okiame odɔ gbe, mhi ya rote oke ni odɔ chocho ame, ni o ri agbo a na ogbo na li da afue.*

⁷ Oni o da mu o le ne, o ya mholi ikhivose ona, ni, Mhemhe mhi ya khi Eshinegba oyoli, lolɔ o khi omimhe. †

⁸ Ama egbo ni e khi enulishi ali eni ɛa ya lama miesuo, ena angeli ichimhi ali egbugbeli, ali ena itsebo eni e mu imhese ogbho ali eni ega ikhumhi, ali e lo egbholi nya, okiemhi oyewe o ya khi erali ilimhi irierie ni ofulu la to kua yala. Onana khi eghuli onuzi-eva.”

⁹ Ageni oghuo eni oshilua ni o mholi italabi ishilua ni e

§ 20:12 Li ze iDan 7.9-10 * 21:1 Li ze Aza 65.17; 66.22; 2 iPit 3.13 † 21:2 Li ze Aza 52.1; 61.10; Iro 3.12 ‡ 21:3 Li ze Ezik 37.27; iLev 26.11,12 § 21:4 Li ze Aza 25.8; 35.10; 65.19 * 21:6 Li ze Aza 55.1 † 21:7 Li ze 2 iSam 7.14; iwolo 89.26-27

vọ anasemhe ishilua ni e kpe ukhokho, o bhale ya lie mhe, “Bhale, mhi ya ri oni omueshi onogbo khashe, ni o khi ughue oni Omi Osumha.”

¹⁰ Elemhi oni ayemhe, oni ageni o tsua mhe nga ukhomhi ute oniemhi ni o yagha, o remhe khashe oni Eoli-No-pfuase ikhi ijerusalemu, khi o rote idane te obọ oyi Eshinegba a tiemhile.‡

¹¹ O ri ufumhi oyi Eshinegba ge nyanyanya. Ugemhi oyoli o li abi echeli ni o somhi otse ni a lu ijasipa ni o li abi ughegbe.

¹² O mholi ukpokpomhi ugbe ni o yagha ni o mholi ode inuekpe igbeva. Eni ode inuekpe, igeni ogbava e la o. Eni ode inuekpe igbeva ena a keke eva eyi edeli igbeva eyi iZireni shi o.

¹³ Ode inuekpe esese e la obọ-ugbe enenene oyi oni ugbe. Ese e la ukiekie obini ovo o te e ngale oyoli, ese e la ukiekie obita, ese e la ukiekie ogobo, ese e li la ukiekie obini ovo o te e lo eko.§

¹⁴ Oni ugbe ni o gashe oni eoli o mholi echegbe igbeva. Eni echegbe igbeva ena, a keke eva eyi ighiusomhi na keke ogbava eyi oni Omi Osumha shi o.

¹⁵ Oni o nu mhe e ngme, o mholi ukpokpo ni a roo mheshe emhi ni o khi igolu ni o ro ya mheshe oni eoli ali eni ode inuekpe ali igbe eyoli.*

¹⁶ Oni eoli o ze abo igbe ene, ni iyagha ali inuata ali uemhi eyoli e li abizize. O mheshe oni

eoli, o ya khi ikuku emhi ea la imali agbele ali egbhueshe ashi ishe (1,500), unumhi ali uemhi eyi eni abo igbe ali iyagha eyoli e khi abizize.

¹⁷ Oni ageni o li mheshe ugbe oyoli, e ya khi ete-awegbe egbhueshe. Abi awa lie mheshe eke.

¹⁸ Ugbe oyoli, echegbe ijasipa a ro ma li, oni eoli o khi egbegbi igolu ni a te e me eke abi ughegbe.

¹⁹ Irogbekhe oyi igbe ni a ma gashe oni eoli e ya khi echegbe ni e ghalagbe ododa. Onodode o khi ijasipa, onuzi-eva o khi isafaya, onuzi-ese o khi ikalisedoni, onuzi-ene o khi emeradi,

²⁰ onuzi-ishe o khi isadonizi, onuzi-esesa o khi ikaneliani, onuzi-ishilua o khi ikirisolati, onuzi-elele o khi iberili, onuzi-itili o khi itopazi, onuzi-igbe o khi ikirisopirazi, onuzi-igbaghuo o khi ijasiti, onuzi-igbeva o khi ametisiti.

²¹ Eni ode inuekpe igbeva e ya khi ifefe. Ode inuekpe ogbogbo a ri ufefe oyoli rielegbe. Ode agbala ni o la oni eoli, egbegbi igolu ni a te e me eke abi ughegbe a ro ku oli.†

²² Mhi aa me Owa ugamhi okhoghuo oni eoli, irari khi Eshinegba Onomhue Nofunehya ali Oni Omi Osumha wewe e khi Owa Ugamhi ni e la agho.

²³ Oni eoli oke mholi emini o ri ugemhi oyi ovo wekhi oyi uki ya li. Irari khi ugemhi oyi

‡ 21:10 Li ze Ezik 40.2 § 21:13 Li ze Ezik 48.30-35 * 21:15 Li ze Ezik 40.3

† 21:21 Li ze Aza 54.11-12

Ɛshinegba lolu o khi akpa ni o la agho, oni Omi Osumha o khi akpa ni o la agho.‡

²⁴ Egbọ na agbọ nya e ya ri oni akpa ke kia, ighie ni e la agbọ e ya tsua epfue eyewe bhale agho. §

²⁵ Ogbọ ọa ya tigbe khukhu ode inuekpẹ ni e lo oni ẹoli le ghue, itobọ khi ogbọ ọa ya me eliyose agho.

²⁶ A ya tsua epfue ali ufumhi eyi ishishi lo oni ẹoli le.*

²⁷ Ama, emini e ri ichimhi e mu ọa ya tigbe lo agho le, wekhi ogbọ ni ọọ gbe ikanya omama ali ni ọ rieḷe emhi egbhue, se khi egbọ ni eva oyewe o la ebe ni a keke eva oyi eni e ya mholi agbọ na agbomagbọ shi oyi oni Omi Osumha.†

22

Oke Amẹ Agbọ

¹ Igho o ri oke amẹ ni o ri agbọ o na ogbọ khasẹ mhe, oke ni o pfuase abi ughegbe, ni o rote ukpekhomhi Eghiele oyi Eshinegba ali oyi Omi Osumha tu u lasele.*

² Oni oke o rote iteva oyi oni ode agbala ni o la oni ẹoli. Ukiekie eve-eva oyi oni oke, ọọra ni o ri agbọ o na ogbọ e migha, ni o mo idumhi igbeva ododa, ni ọọ mo idumhi uki kpa. Ebe oyi oni ọọra a ro ri ishishi ẹẹ ze.†

³ Emhikhoghuo ni Eshinegba o pfi unu na ọa ke ya la agho. Ama ukpekhomhi oghie oyi

Eshinegba ali oyi Omi Osumha oyoli e ya la agho, eni ẹẹ ga eyoli e ya ke ga.‡

⁴ E ya me alo eyoli, ali eva oyoli o la we alukpo.

⁵ Eliyose ọa ke ya lao. Ɛa mholi emini e ri ugemhi oyi akpa ali ugemhi oyi ovo ya li, irari khi Eshinegba Onomhue lolighuo o ya khi akpa oyewe, e ya ke mhesẹ abi ighie agbomagbọ. §

⁶ Oni aḡeni ọọ mhe, “Eni ingmemhi enana, eni a ri egbe e da e khi, e gbo khi igesikia. Eshinegba Onomhue ni o ri ayemhe oyoli na emekeguele, lolu o ghie aḡeni oyoli o ka rokhase eni ẹẹ ga eyoli, emini a ya me ni ọa ke ya tese.”

Ijesu o ya bhale

⁷ “A ghe ii, mhi keḷe ya bhale! Ikhivose o khi na ogbọ ni o ri ingmemhi imeguele ni e la ebe onana gbe akanya.”

⁸ Mhemhe ijoni mhi suo, ni mhi gbo me emhi enana. Abi mhi ro suo, ni mhi ro gbo me na, mhi de ya wugha oni aḡeni ni o ri eni emhi enana khasẹ mhe awe ni mhi ga li.

⁹ Ama o gueye mhe, “Khi li igho, oni ọọ ga nabi yeye ali onabi inyoghuo e emekeguele, ali eni e ri ingme ni a keke shi ebe onana gbe akanya mhi li khi. Ga Eshinegba!”

¹⁰ Oo mhe, “Khi khukhu ingmemhi imeguele ni e la ebe ona, irari khi oni eghẹghe o she ti ramhi.

‡ 21:23 Li ze Aza 60.19-20 § 21:24 Li ze Aza 60.3 * 21:26 Li ze Aza 60.11

† 21:27 Li ze Aza 52.1; Ezik 44.9 * 22:1 Li ze Ezik 47.1; iZaka 14.8 † 22:2 Li ze

Igbae 2.9; Ezik 47.12 ‡ 22:3 Li ze iZaka 14.11 § 22:5 Li ze Aza 60.19; iDan 7.18

11 Oni oọ rięę onobe, o ke rięę tsee, oni oọ gbe ikanya ichimhi, o ke gbe tsee, oni o guę a ngeli, o guę ke ngeli tsee, oni o pfuase, o pfuase ke le tsee.*

12 “A ghe ii, mhi keę ya bhale, mhi tsua ifata eyemhe, mhi ya fali oğbogo ota abi o li gbe.†

13 Mhemhe mhi khi Aafa ali Omega, Mhemhe mhi khi oni Odode ali Okpukhokho, ni mhi khi Igbaekele ali Ukpese.‡

14 “Ikhivose o khi na egboni e pfue iwulu eyewe-a pfuase, ni e mhue oboshi oora ni o ri agbo a na oğbo, ali ini e ba me asha rote ode unuekpe ni o lo oni eoli, le lole.§

15 Ewa e la oolase oni eoli, ali eni e mu imhese ogbho ali eni e li itsebo ali egbu ugbeli ali eni e ga ikhumhi ali eni e da nono ingme egbho, ni e di egbu.

16 “Mhemhe iJesu mhi she ghie ageni oyemhe o ri otsele ona ghi e eni igbaa nya eyi eni e mie iJesu iKirisiti suo. Mhemhe mhi khi Umhili ali

Omiomi iDefidi, Mhemhe mhi khi Ukpeta ni o ge eluzogbe.”*

17 Oni Ayemhe ali omueshi onogbo o li, “Bhale!” Oni o suo ona o li lie, “Bhale!” Oni okiamę o gbe o bhale, ali onini o ghole o bhale ka da amę ni o ri agbo a na oğbo, afue afue.†

18 Mhi tse agua ye oğbo ni o suo imeguele ni e la ebe ona. Ini oğbokoghwo o khi ma o, Eshinegba o ya khi anasemhe ni a keke shi ebe ona ma li agbo.

19 Ini oğbokoghwo o rote ingmemhi imeguele ni a keke shi ebe onana rue pfi-a, Eshinegba o ya mie oli okemhi ni o mholi shi oora ni o ri agbo a na oğbo, ali ashini a khi na li shi eoli ni o pfuase, ni a ngme ingme oyoli shi oni ebe onana.‡

20 Oni o pfi otsele shi ebe onana, oọ, “Igesikia lo, mhi keę ya bhale.”

Atse. IJesu Onomhue bhale.

21 Okhale oyi iJesu Onomhue o ka nu eni miesuo nya la, Atse.

* 22:11 Li ze iDan 12.10 † 22:12 Li ze Aza 40.10; 62.11; Iwolo 28.4; ijere 17.10

‡ 22:13 Li ze Iro 1.8,17; 2.8; Aza 44.6; 48.12 § 22:14 Li ze Igbae 2.9; 3.22 * 22:16 Li ze Aza 11.1,10 † 22:17 Li ze Aza 55.1 ‡ 22:19 Li ze iDeut 4.2; 12.32